


Nuevo Testamento en
mixteco



New Testament in Mixtec, Atatláhuca (MX:mib:Mixtec,
Atatláhuca)

Nuevo Testamento en mixteco **New Testament in Mixtec, Atatláhuca (MX:mib:Mixtec, Atatláhuca)**

copyright © 1973 Wycliffe Bible Translators, Inc.

Language: Mixtec, Atatláhuca

Translation by: Wycliffe Bible Translators, Inc.

Mixteco, Atatláhuca [mib], Mexico

Copyright Information

© 1973, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Atatláhuca

© 1973, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files dated 29 Jan 2022
 9665e546-39d0-5bd5-8b10-38916a94951f

Contents

SAN MATEO	1
SAN MARCOS	40
SAN LUCAS	64
SAN JUAN	105
HECHOS	135
ROMANOS	174
1 CORINTIOS	191
2 CORINTIOS	207
GÁLATAS	218
EFESIOS	224
FILIPENSES	230
COLOSENSES	234
1 TESALONICENSES	238
2 TESALONICENSES	242
1 TIMOTEO	244
2 TIMOTEO	249
TITO	252
FILEMÓN	254
HEBREOS	255
SANTIAGO	267
1 PEDRO	271
2 PEDRO	276
1 JUAN	279
2 JUAN	283
3 JUAN	284
JUDAS	285
APOCALIPSIS	287

JNUHUN VAHA NI TEE SAN MATEO

Lista ñayuu yucūn jeē ní quiji Jesucristo (Lc. 3.23-38)

¹ Yāha cūu lista ñayuu yucūn jeē ní quiji Jesucristo. Te máá yá ní quiji nuū yucūn rey David, te David ní quiji nuū yucūn Abraham.

² Abraham ní cuu de tátá Isaac, te Isaac ní cuu de tátá Jacob, te Jacob ní cuu de tátá Judá jíin táca ñani í.

³ Te Judá ní cuu de tátá Fares jíin Zara, te náná ndindúú í ní cuu Tamar. Te Fares ní cuu de tátá Esrom, te Esrom ní cuu de tátá Aram.

⁴ Te Aram ní cuu de tátá Aminadab, te Aminadab ní cuu de tátá Naasón, te Naasón ní cuu de tátá Salmón.

⁵ Te Salmón ní cuu de tátá Booz, te náná í ní cuu Rahab. Te Booz ní cuu de tátá Obed, te náná í ní cuu Rut. Te Obed ní cuu de tátá Isai.

⁶ Te Isai ní cuu de tátá David, tēe ní cuu rey. Te rey David ní cuu de tátá Salomón, te náná í, xīhna gā ní cuu ña ñasihí Urías.

⁷ Te Salomón ní cuu de tátá Roboam, te Roboam ní cuu de tátá Abías, te Abías ní cuu de tátá Asa.

⁸ Te Asa ní cuu de tátá Josafat, te Josafat ní cuu de tátá Joram, te Joram ní cuu de tátá Uzías.

⁹ Te Uzías ní cuu de tátá Jotam, te Jotam ní cuu de tátá Acáz, te Acáz ní cuu de tátá Ezequías.

¹⁰ Te Ezequías ní cuu de tátá Manasés, te Manasés ní cuu de tátá Amón, te Amón ní cuu de tátá Josías.

¹¹ Te Josías ní cuu de tátá Jeconías jíin táca ñani í, máá tiempo jeē cuángoo ñayuu Israel preso nde ñuu Babilonia.

¹² Te náa cáyucú í yūcuán, te Jeconías ní cuu de tátá Salatiel. Te Salatiel ní cuu de tátá Zorobabel.

¹³ Te Zorobabel ní cuu de tátá Abiud, te Abiud ní cuu de tátá Eliaquim, te Eliaquim ní cuu de tátá Azor.

¹⁴ Te Azor ní cuu de tátá Sadoc, te Sadoc ní cuu de tátá Aquim, te Aquim ní cuu de tátá Eliud.

¹⁵ Te Eliud ní cuu de tátá Eleazar, te Eleazar ní cuu de tátá Matán, te Matán ní cuu de tátá Jacob.

¹⁶ Te Jacob ní cuu de tátá José, tēe ní cuu yíi María. Te María ní cuu ña náná Jesús, Yaa naní Cristo.

¹⁷ Te nde Abraham te nde David ní iyo uxí cuūn yucūn. Te nde David te nde náa cuángoo ñayuu Israel preso ñuu Babilonia ní

iyo inga uxí cuūn yucūn. Te nde ná ní jengoo í preso te nde ní cacu Cristo, suni ní iyo inga uxí cuūn yucūn.

Jeē ní cacu Jesucristo (Lc. 2.1-7)

¹⁸ Te jeē ní cacu Jesucristo, súcuan ní cuu: Náná yā María, je ní cundaā jeē quijnáhan ña jíin José. Te nde ná tu quijnáhan ña jíin de, te ní jecūhun séhe ña ní sáha Espíritu Santo.

¹⁹ Te José, tēe quijnáhan ña jíin, chí tēe ndaā cūu de. Te tu ní cūni de cuāha de jñūhun canu ña, chí sa cūni de jee na jécuiñi sáhi jēe ma quijnáhan de jíin ña.

²⁰ Te níni súcuan nácani ní de, te jíin jéni ní quee-ní ñin ndajéhe máá Jítoho yō Yaa Dios nuū de, te ní cahān yá jíin de:

José, séhe yucūn David, ma yūhu ró cueca ró ñasihí ró María, chí séhe jeē scácu ña, vēji í nde nuū máá Espíritu Santo.

²¹ Te scácu ña ñin séhe yíi. Te snání ró í Jesús, chí máá í cūu Yaa jnama ñayuu nuū cuéchi í, áchí ndajéhe.

²² Súcuan ní cuu táca jniñu yáha, návāha squícu jñūhun Jítoho yō Yaa Dios jeē ní cahān tēe ní nacani jñūhun ya nde jenahán. Te suhva ní cahān de:

²³ Coo ñin sūchi síhí, te nihñ séhe í, te scácu í ñin séhe yíi,

te conaní sūchí un Emanuel.

Achí tutu. Te síhví yáha cūni cahān: Yaa Dios ndeé yá jíin yó.

²⁴ Te ní natakū ní José, te ní sáha de nájñūhun ní cahān ndajéhe Jítoho yō jíin de. Te ní jeca de María ní cuu ña ñasihí de.

²⁵ Te tu ní quixí de jíin ña, chí nde ní scácu ña séhe yíi nuū ña. Te ní snaní de í Jesús.

Jeē ní quijicoo tēe mago nuū yā

2

¹ Te ná ní cacu Jesús ini ñuu Belén ndañūñ Judea, te tiempo un ndácu rey Herodes jniñu. Yūcuán na te jecu tēe ndíchí jēe cascuāha síquí quími, ní quijicoo de nde jicá, ichi nuū cáne niándii, te ní jinūcoo de ñuu Jerusalén.

² Te ní cacajñūhún de ñayuu:

¿Nde nuū íne sūchí jeē ní cacu jeē coo rey ñayuu hebreo? Chí ichi núu cáne niándii ní cajito ná ñin quími cáhu jeē cūu seña jeē ní cacu í. Te vējicoo ná chíñūhún ná í, áchí de.

³ Te rey Herodes, ná ní jini de jñūhun yáha, te ní cunéé ní de, nde jíin táca ñayuu ñuu Jerusalén.

⁴ Te ní nastútú de táca sūtū cácujeñhu jíin tēe cástéén tutu ley Yaa Dios nuū ñayuu. Te ní cajñūhún de tēe un ndé nuū cacu Cristo achí tutu.

⁵ Te ní cacachi nuū de:

Ini ñuu Belén ndañūñ Judea. Chí suhva cáhán nuū tútu ní tee tēe ní nacani jñūhun ya nde jenahán:

6 Te róhó ñayuu ñuu Belén ndañúu Judá, cújéhuu ga ñuu rō vēsú táca gá jeé cújéhuu ini Judá.

Chi suu ini ñuu rō quenda ñn Yaā ndacu jniñu,

te coto ya ñayuu maá rí Israel, achí Yaā Dios. Achí tutu.

7 Yūcuán na te Herodes ni cana sáhi de táca tée ndíchí un jeé nani mago. Te ni cajñuhun yúcún de ndé quíwí ní cane quími ún.

8 Te ni tají de tée un quíngoo de ñuu Belén. Te ni cahān de:

Cuángoo ní te cajñuhun yúcún ní ndé nuū íne sūchi lúli un. Te núu ní nanihīn ní i, te quíjicoo ní castúhun ní nuū ná, návāha suni máá ná quichiñúhún ná i, achí rey.

9 Te jeé ní cajini de jñuhun ní cahān rey, te cuangoo de. Te máá quími cáhuu jeé ní cajito de ichi núu cáne niāndii, yósnúu núu de cuahān nde ní jinú nuū íne sūchi lúli un, te yūcuan ní jecuíñi.

10 Te ná ní cajito de jeé ní jecuíñi quími ún, te yōhyo ní cacusí ni de.

11 Te ni jinúcoo de ní quívicoo de ini vehe, te ní cajito de nuū sūchi lúli un jíin náná i María. Te ní cajecuíñi yití de nuū i, te ní cachiñúhún de i. Te ní canune de yejnú de, te ní casocó de oro jíin sūje cútú jíin sūje uvuā nuū i.

12 Yūcuán na te ní scóto jēni de, ní cachi nuū de jeé ma nuhún de nuū Herodes. Te inga ichi cuanuhun de ñuu de.

Jeé ní jinú José cuangoo de nación Egipto

13 Te náa cuānuhun táca tée mago, te ní scóto jēni José jeé ñn ndajéhé maá Jítoho yō Yaā Dios ní cahān yā jíin de:

Ndocuíñi te cunu ró quíngoo ró jíin sūchi lúli jíin náná i nde nación Egipto. Te yūcuán coyūcu ró nde castúhun rí nuū rō. Chi Herodes je yajni nanducú de sūchi lúli jíin jeé cáhni de i. Achí yá.

14 Te ní natahū ní José. Te cuangoo de jíin sūchi lúli jíin náná i, te ñuu ní cajica de cuangoo de nación Egipto.

15 Te ní coyūcú de yūcuan ndé ní jihí Herodes. Te sūcuan ní cuu návāha squícu jñuhun Jítoho yō Yaā Dios jeé ní cahān tée ní nacani jñuhun ya nde jenahán: Nde nación Egipto ní cana rí Sēhe rí vēji i, achí Yaā Dios, achí tutu.

Jeé ní ndacu Herodes jniñu jeé na cúu táca sūchi yú lúli

16 Yūcuán na te Herodes ní jini de jeé sūcuan ní castáhú tée mago un de, te yōhyo ní quíñi ní de. Te ní tají de soldado cuangoo, te ní cajehni táca sūchi yú lúli jeé uú cuiyā jíin jeé yiquín gá jeé cáyūcú ini ñuu Belén jíin táca ñuu yajni. Chi je ní cajñuhun yúcún de táca tée mago un nasaa tiempo ní cuu jeé ní cacu Jesús.

17 Te sūcuan ní squícu jñuhun ní cahān Jeremías, tée ní nacani jñuhun Yaā Dios nde jenahán, chí ní cahān de:

18 Ini región Ramá ní jini sōho rí

jeé cándahyū te cándahyū cohó.

Chi ñahan cácuu yucún Raquel, cándahyū ña jehé séhe ña,

te tu cácuu ña ndusé ní ña, chí ní cajihí i.

Achí tutu.

19 Yūcuán na te ní jihí Herodes. Te ní scóto jēni José jeé ñn ndajéhé Jítoho yō Yaā Dios ní cahān yā jíin de nuū ndeé de nación Egipto.

20 Te ní cahān yā jíin de:

Ndocuíñi te nuhun rō ñuu rō Israel jíin sūchi lúli jíin náná i. Chi je ní cajihí tée cánducú cahni sūchi lúli jíin nuū. Achí ndajéhé.

21 Yūcuán na te ní ndocuíñi de, te cuanuhun de nación Israel jíin sūchi lúli jíin náná i.

22 Te ní nihīn de jñuhun jeé Arquelao ní nucuíñi de nuū tatá de Herodes, te máá de ndácu jniñu región Judea. Te ní yūhú de nuhun de yūcuán. Te ní scóto jēni de jeé na quíhín de región Galilea, te cuangoo de.

23 Te ní jinú de yūcuán, te ní coyūcú de ñuu nani Nazaret. Sūcuan ní cuu návāha squícu jñuhun ní cacahān tée ní canacani jñuhun Yaā Dios nde jenahán. Chi ní cacachi de jeé cahān ñayuu jeé tée ñuu Nazaret cúu Jesús.

Jñuhun Juan tée scuándute

(Mr. 1.1-8; Lc. 3.1-9, 15-17; Jn. 1.19-28)

3

1 Te ní yāha tiempo, te ní jinú Juan tée scuándute nde nuū ñuhun téhé ndañúu Judea, nácani de jñuhun suhva:

2 Nacani ní rō jijnáhan ró jéé stóo ró cuéchi ró, chí je ní cuyajni Yaā ndeé andiví jéé ndacu ya jniñu nuū rō. Achí de.

3 Te Isaías, tée ní nacani jñuhun Yaā Dios nde jenahán, suhva ní tee de jñuhun Juan nuū tútu:

Coo ñn tée cana jee nde nuū ñuhun téhé: Sátúhva ró máá ró jijnáhan ró, chí quee maá Jítoho yō.

Te sáha ró jniñu ndaā, chí vēji ya, achi de.

Achí Isaías.

4 Te sahma ñuhun Juan cúu ixi quiti nání camello, te nuhni ñn cinturón ñi chíji de. Te jeé técu de cúu táca ndicuéhyí jíin ndúxi yocó.

5 Te ñayuu ñuu Jerusalén jíin táca ñayuu región Judea jíin ñayuu yúcu yajni yuyúte Jordán, ní quíjicoo i nuū de.

6 Te ní canacani ndaā i cuéchi i nuū Yaā Dios, te ní scuándute de i ini yúte Jordán.

7 Te ná ní jito de jeé vējicoo cuehē tée grupo fariseo jíin tée grupo saduceo nuū scuándute de, te ní cahān de jíin:

Va sêhe coô cácuu ró, chi xeên rô nájñuhun coô. ¿A cájeni ni rô jeê cuu cunu ró cácu ró núú castigo xeên jeê quíji?

⁸ Núu súcuan te sáha ró jniñu váha, te súcuan stéén rô jeê ní canacani ndije ni rô jeê stóo ró cuéchi ró.

⁹ Te ma cáni ni rô cahān rô jeê cuu cácu ró síquí jeê cácuu ró yúcūn Abraham. Chi cáhān rí jín ró jeê cuu sáha Yaā Dios jeê táca yúú yáha nduu sêhe Abraham jeê candíje váha, te núu cúní yā.

¹⁰ Te cácuu ró nájñuhun nundehé jeê tu jêhe ndehē váha. Te vijna je íyó túhva Yaā Dios jeê cuáha ya castigo xeên, nájñuhun je íyó túhva ñn cāa jeê cahnde nde yoho yujnu. Núu súcuan te sáha ya jín ró nájñuhun jín táca yujnu jeê tu cún nundehē váha, jeê tahndé te cayū nuū ñuhún.

¹¹ Te ruhū chí jín ndute scuándute ri rohó, te yúcuan cúu jeê steén rô jeê ní canacani ni rô jeê stóo ró cuéchi ró. Te Yaā jeê quíji, chí nájñuhun scuándute ya rohó cúu jeê cuáha ya Espíritu Santo condee ini anuá rô, te poder yā cúu nájñuhun ñuhún. Te Yaā quíji chí cújéhu ndasí yā. Chi tú na vé jéhu cuiti cúu ri nuū yā, ni jeê cuajñiñu ri nuū yā vésú ñn jniñu lúlí gá nájñuhun jeê quénehen ri ndijēn yā.

¹² Te sáha ya nájñuhun sáha tēe scānda trigo, chí sásñn ya ñayuu váha jín ñayuu cunéé, nájñuhun cūndoo trigo jeê quéndā sñn paja. Te nastútú yā trigo yā ndívi ini yacā yā. Te paja chí jnaa yā nuū ñuhún jeê ma ndahvá cuiti. Achí Juan.

Jeê ní jendute Jesús

(Mr. 1.9-11; Lc. 3.21-22)

¹³ Yūcuán na te ni quenda Jesús región Galilea, te ni quee yā yūte Jordán nuū ñe Juan, návāha scuándute de ya.

¹⁴ Te tu ní cúní Juan scuándute de ya, chí ni cahān de jín yā:

Sa suhva cánuú jeê scuándute máá ní sãñá, ¿te ndese cúu jeê sa nuū ná vēji ní? áchí de.

¹⁵ Te ni cahān Jesús jín de:

Tuú chí sáha ró, chí súcuan cánuú squícu yó táca jniñu ndácu Yaā Dios, achí yā.

Yūcuán na te ni scuándute de ya.

¹⁶ Te ná ni cuu ni jendute Jesús, te ni quenda ya nuū ndúte. Te ni nune-ni andívi, te ni jito ya jeê cúun Espíritu Yaā Dios vēji, te cāa nájñuhun ñn paloma, te ni quee xiní yā.

¹⁷ Te ichi ándiví ní cahān ñn jñuhun:

Yáha cúu Sêhe ri jeê maní ndasí rí jín, te yóhoyo cúsiñ ni rí jín, áchí.

Jeê ní jito ndee jexeén Jesús

(Mr. 1.12-13; Lc. 4.1-13)

4

¹ Yūcuán na te ni jinū Jesús nde nuū ñuhun téhé ní sáha Espíritu Santo. Te yūcuán coto ndee jexeén yā, chí cúní jeê sáha ya cuéchi.

² Te ni ñyo ndite ni yā uū xico nduú uū xico ñuú, sáá te jíi yā sóco.

³ Te ni quee máá jéxeén jeê cóto ndee un yā, te ni cahān jín yā:

Núu máá ró cúu Sêhe Yaā Dios, te cahān rô jeê yuú yúcu yáha na nduu staā caji rô, achí.

⁴ Te ni cahān yā jín:

Tuú chí yósó núu tútu ñ: Nasūu máni máá jín stāá cátecu ñayuu, chí suni jín táca jñuhun cáhān Yaā Dios, achí yā.

⁵ Yūcuán na te cuahān jexeén un jín yā nde ñuu ñ Jerusalén. Te ni jeni ya xiní torre templo.

⁶ Te ni cahān jín yā:

Te núu Sêhe Yaā Dios cúu ró, te sngava ró máá ró nde nuū ñuhun, chí jnama ya rohó. Chí yósó núu tútu:

Tejñiñu ya ndajéhé yā quijicoo coto rohó.

Te cunundee yā rohó jñnāhan ya, návāha ma cáchihí ró jéhē rô nuū yuú.

Achí tutu. Achí jexeén.

⁷ Te ni cahān Jesús:

Tuú chí suni yósó núu tútu jeê ma cóto ndee ñayuu Jitoho i Yaā Dios, núu jnama ya i chí tuú, achí yā.

⁸ Te jexeén un ní jeca tucu ya cuahān jín yā nde xiní ñn yucu súcūn ndasí. Te ni steén táca nación ní cáhnu ñayivi núu yā, te yóhoyo luu cāa ndihí.

⁹ Te ni cahān jín yā:

Tácá ñuu yáha cuáha ri nuū rô, te núu cuiñi yítí ró chíñuhún ró ruhū, achí.

¹⁰ Yūcuán na te ni cahān Jesús nuū jexeén: Satanás, cujiyo qñhñn rô, chí yósó núu tútu jeê chíñuhún ñayuu máá Jitoho i Yaā Dios, te nuū má-ni ya cuajñiñu i. Achí yā.

¹¹ Yūcuán na te ni cujiyo-ni jexeén un cuahān. Te ni quecoo ndajéhé Yaā Dios ni cajejñiñu nuū yā.

Jeê ní quejéé Jesús nácani ya jñuhun región Galilea

(Mr. 1.14-15; Lc. 4.14-15)

¹² Te ná ni nihñ Jesús jñuhun jeê ñe Juan vecāa, te cuanuhun yā región Galilea.

¹³ Te tu ní cóndee yā ñuu Nazaret, chí ni jehēn yā ni condee yā ñuu Capernaum. Te ñuu un ñe yumar, máá región Zabulón jín Neftalí.

¹⁴ Te súcuan ní squícu jñuhun ní tee Isaías, tēe ní nacani jñuhun Yaā Dios nde jenahán:

¹⁵ Región Zabulón jín Neftalí, ichi jeê yñi yumar, lado yūte Jordán nuū cāne niāndii,

jín región Galilea nuū cáyūcú ñayuu táca nación tu jíní jñuhun ya.

¹⁶ Ñayuu ún chí nájñuhun cáyūcú i nuū néé, te coto i nájñuhun ñn luz cáhnu.

Te ñayuu je yajni naa, nihñ i jñuhun váha ndasí,

suu jñuhun jeê jnama ya anuá i. Achí Isaías.

17 Te nde quiví yúcan ní quejéé Jesús nacani ya jnūhun, te ni cahān yā suhva:

Nacani ni rō jijnāhan rō jée stóo rō cuéchi rō, chi je ni cuyajni Yaā ndeé andiví jée ndacu ya jniñu nuū rō, achí yá.

Jeē ní cana ya cuñ tēe jñú chācá
(Mr. 1.16-20; Lc. 5.1-11)

18 Te jica Jesús yumar Galilea cuahān yā. Te ni jito ya nuū uú jnāhan ñani. Te ñin de cúu Simón jeē suni nání Pedro, te inga de cúu Andrés. Te tēe cájniñ chācá cácuu de, te cásinga de ñunu de ini mar.

19 Te ni cahān yā jñin de:

Condiquñ ruhū na quihín yō, te nasáha ri rohó tēe nihñ cuehē ñayuu candije ruhū, nájñuhun cániññ rō chācá, achí yá.

20 Yúcuán na te ni castóo-ni de ñunu de, te ni candiquñ de ya.

21 Te ni jica ya jecu gā, te ni jito ya nuū inga uú jnāhan ñani. Te cácuu de Jacobo jñin Juan, sēhe Zebedeo. Te cáyucú de ini barco jñin tátá de Zebedeo, cánachijnñ de ñunu de. Te suni ni cana ya de jeē cóndiquñ de ya.

22 Te ni castóo-ni de tátá de jñin barco, te ni candiquñ de ya cuango de.

Jeē ní stéén yā nuū cuehē ñayuu
(Lc. 6.17-19)

23 Te ni jica cuu Jesús ní región Galilea, ni steén yā jñuhun ini táca vehe ñi jeē cúu sinagoga. Te ni nacani ya jñuhun váha ndese ndácu Yaā Dios jniñu. Te ni nasávaha ya ñayuu cácuñ táca-ni cuehyí.

24 Te ni jite núu jñuhun ya cuahān ní región Siria. Te nuū yā ni caquindeca i táca ñayuu cácuñ, ñayuu cándoho tijni nuū cuehyí, jñin jée jetú, jñin jée ñuhun tachí ini, jñin jée jñi yñí, jñin jée ní jñin. Te ni nasávaha ya i jijnāhan i.

25 Te cuehē ñayuu región Galilea jñin Decápolis, jñin ñayuu ñuu Jerusalén jñin región Judea, jñin táca ñuu ichi núu cáne niñdii yūte Jordán, ni cacondiquñ i ya.

Jeē ní nacani ya jñuhun nde nuū yúcu

5

1 Te ni jito Jesús nuū ñayuu cuehē. Te ni caa ya yucu cuahān yā, te ni cucóo ya. Te tēe cácuáha jñin yá, ni jinúcoo de nuū yā yúcuán.

2 Te ni quejéé yá ni steén yā táca jñuhun yáha nuū de:

Jñuhun yōhoyo ndetū
(Lc. 6.20-23)

3 Yōhoyo ndetū ñayuu jeē cánacuni i jeē tu iyó váha ánuá i siquí cuéchi i, chi je ni quivícoo i ndaha Yaā andiví jée ndácu ya jniñu nuū i.

4 Yōhoyo ndetū ñayuu cácuñhyá ni, chi ndusñ ni i sáha Yaā Dios.

5 Yōhoyo ndetū ñayuu cáhiyo víta suchí ini, chi ni jijnūhun ya jeē cutahū i ñayiví.

6 Yōhoyo ndetū ñayuu jeē nájñuhun jeē cájñi i sōco cájichi i, súcuñ jñáa i sáha i jniñu ndaā, chi máa yá chindéé ñáhán yá i jeē cuu sáha i.

7 Yōhoyo ndetū ñayuu cácuñdáhú ni jñāhan, chi suni cundáhú ni Yaā Dios i.

8 Yōhoyo ndetū ñayuu cáhiyo ndoo ini anuá, chi coto i nuū Yaā Dios.

9 Yōhoyo ndetū ñayuu cánasamaní jñāhan, chi cahān Yaā Dios jeē sēhe ya cácuu i.

10 Yōhoyo ndetū ñayuu jeē cájito xeēn inga ñayuu i siquí jeē casáha i jniñu ndaā, chi je ni quivícoo i ndaha Yaā andiví jée ndácu ya jniñu nuū i.

11 Yōhoyo ndetū máa rō jijnāhan rō núu cácahān neé i nuū rō jeē siquí ruhū, te coto xeēn i rōhó, te stáú yáhu i rōhó, vésú tú cuéchi rō.

12 Na cúsní ni rō jijnāhan rō núu súcuñ, te sa víhyá gā cusñ ni rō, chi cáhnu ndasí coo tahū rō nde andiví. Chi suni súcuñ ni cajito xeēn i táca tēe ni canacani jñuhun Yaā Dios jeē ní quijicoo xihna gā vésú rohó.

Jñuhun yátá siquí ññ jñin siquí luz
(Mr. 9.50; Lc. 14.34-35)

13 Máa rō jijnāhan rō cájejniñu rō ini ñayiví nájñuhun jéjniñu ññ nuū cúñu návaha tú tehyu. Te núu ññ ún na náa jeē uhvuá, ¿te ndese nduu uhvuá tucu? Tuá cuajniñu cuiti gā, chi sa cate ñayuu te cueñú i siquí.

14 Máa rō cácuu nájñuhun luz jeē steén ini anuá ñayuu ñayiví. Te cácuu rō nájñuhun ññ ñuu íne xini yúcu, jeē ma cuu quisáhi.

15 Te ni tu nástñ ñayuu ññ lámpara te chune i chíji cajón, chi sa suhva jéni i nuū sucún, návaha cundijin nuū táca jée cáyucú ini vehe.

16 Te suni súcuñ na steén rō luz máa rō nuū táca ñayuu, te suu cúu jeē cúni i jniñu váha casáha rō, te cahān i jeē yóhoyo váha Yaā cúu Tátá rō jeē ndeé yá andiví.

Jeē ní stéén yā siquí ley Yaā Dios

17 Ma cáni ni rō jijnāhan rō jée véji ri snáa rí ley jeē ní jéhe Yaā Dios nuū Moisés, jñin jée snáa rí táca jñuhun ni cacahān tēe ni canacani jñuhun ya jenahán. Tú véji ri jeē snáa rí, chi sa suhva jeē steén cají rí jñuhun ndíso.

18 Chi jendaá cahán rí jñin rō jeē núu níni iyó andiví jñin ñayiví, te ma náa cuiti ni ññ punto ni ññ letra nuū tútu ley yá, chi nde na squícu táca ndihí jñuhun jeē cahán.

19 Núu súcuñ te núu ññ ñayuu tu squícu i ññ jñuhun yáha jée ndácu ley yá, vésú ññ jñuhun lulí gá cúu, te núu steén i jeē suni súcuñ sáha sava ga ñayuu, núu súcuñ te cuu i ñayuu núu ga ichi andiví nuū ndácu Yaā Dios jniñu. Te núu ññ ñayuu squícu i te steén i jeē squícu ñayuu, yúcuán na te cujéñu i ichi andiví nuū ndácu Yaā Dios jniñu.

²⁰ Chi cáhán rī jín ró jeē núu tú coo ndaā gā jniñu cásáha ró vésú jniñu cásáha tēe cástéén tutu ley yā jín tēe grupo fariseo, te ma quáivico cuiñi ró ndaha Yaā andiví jée ndacu ya jniñu nuū rō.

*Jeē ni stéén yā jeē ma quití ni yō
(Lc. 12.57-59)*

²¹ 'Je ni cajini ró jñuhun ni cacahān jín ñayuu jenahán, jeē ma cáhni i ndíyi, te na-ni ñayuu núu cahni i ndíyi, te cundaā cuéchi i nuū tāca tóhō, áchí.

²² Te ruhū chi cáhán rī jín ró, vésú nuū máá jée quití ni ññ ñayuu jito i jnánhan i, suni cundaā siquí cuéchi i ún. Te núu ññ ñayuu cahān neē i nuū jnánhan i, núu súcuan te cundaā cuéchi i unū justicia cujéñnu ga. Te núu ññ ñayuu cahān i nuū jnánhan i: Róhó jée canéé í, áchí i, núu súcuan te quívi i nuū ññuhun infierno te núu ma nácani ni i.

²³ 'Jeē yúcuán te núu ni jín ró nuū altar jín jée socó rō nuū Yaā Dios, te núu ni nucúhun ni rō jeē ni sáha ró cuéchi siquí jnánhan rō,

²⁴ núu súcuan te squéñdō ró jée socó rō ún xiin altar, te xihna gā quihñ rō ndumaní rō jín jnánhan rō. Yúcuán na te nandicó ró socó rō.

²⁵ 'Te núu ññ ñayuu quihñ i jín ró nuū tohó jeē cacān i cuéchi siquí rō, núu súcuan te níni cuáhān rō jín i ichi te sándaā máá ró jín i, návāha ma squívi i róhó nuū juez. Chi juez siáha de róhó nuū policía, te chune de róhó vecāa.

²⁶ Te jendaá cahān rī jín ró jeē ma quénda cuiñi ró yúcuán, chi nde chunaa ró ndíhi cuiñi xñhun jée cájicān de.

Jeē ni stéén yā jeē ma cósiquí ndéē jnánhan

²⁷ 'Ni cajini ró jñuhun ni cacahān jenahán jeē ma cósiquí ndéē jnánhan ñayuu.

²⁸ Te ruhū chi cáhán rī jín ró jeē núu ññ tēe ndéhe de nuū ññ ñahan jeē ndíyo ni de ña, yúcuán na te je ni casíquí ndéē de ñahan ún ñni anuá de.

²⁹ 'Núu súcuan te núu tinūu lado váha ró sáha jeē quívi ró cuéchi, váha ga quenehen ró te scāne ró, návāha tuá sáha ró cuéchi. Chi váha gā jeē náā ññ tinūu ró vésú jeē cóo ndíhi yiquí cuñu ró te quihñ rō infierno.

³⁰ Te núu ndaha váha ró sáha jeē quívi ró cuéchi, váha ga cahnde ró te scāne ró, návāha tuá sáha ró cuéchi. Chi váha ga jeē náā ññ ndaha ró vésú jeē cóo ndíhi yiquí cuñu ró te quihñ rō infierno.

*Jeē ni stéén yā jeē ma ndusññ jnánhan
(Mt. 19.9; Mr. 10.11-12; Lc. 16.18)*

³¹ 'Te suni ni cacahān nde jenahán: Núu ndé ññ cúní stóo ññsihí, te na cuáha acta nuū ña jeē ndusññ jín ña.

³² Te ruhū chi sa cáhán rī jín ró jeē núu ññ tēe stóo de ññsihí de, te núu nasūu jée tíjni

ni ña, núu súcuan te sáha de jeē casíquí ndéē ña de, chi condee ña jín inga tēe. Te núu ññ tēe condeca de ñahan ní ndusññ, suni casíquí ndéē de ña.

Jeē ni stéén yā siquí jñuhun jéjñuhun téyi

³³ 'Te suni ni cajini ró jñuhun jeē ni cáhán jín ñayuu nde jenahán: Núu ni jeññuhun téyi ró jeē squícu ró, jito jínúu Yaā Dios, núu súcuan te cānuú squícu ró jée ni cáhán teyi ró un, áchí.

³⁴ Te ruhū chi cáhán rī jín ró jínánhan ró jeē ni ññ siquí jniñu ma cahán teyi ró nde jín shví Yaā Dios, ni ma cahán teyi ró jeē jito jínúu yā. Te núu jéjñuhun téyi ró te tú váha jeē ndácunehen ró andiví ni ñayívi. Chi andiví cúu nuū ññ mesa nuū ndácu Yaā Dios jniñu.

³⁵ Te ñayívi cúu nájnñuhun teyú nuū ññ jehé yā. Te ni ma ndácunehen ró ññu Jerusalén, chi suu cúu ññu máá Yáa cúu Rey cujéñnu.

³⁶ Ni ma cahán ró jeē na cóndee cuéchi siquí ró nuū tu squícu ró. Ma cahán ró súcuan, chi ma cúu cuiñi sáha ró jée ni ññ ixi xíní ró nducujín chí ndujnúu.

³⁷ Chi suhva-ni cahán ró: Cuu, áchí rō. Tuú, áchí rō. Chi núu chisóo gá ró jñuhun cahán rō, te nuū jexeén vëji.

Jeē ni stéén yā jeē ma cuáha yó jée ndútahū ñayuu

(Lc. 6.29-30)

³⁸ 'Ni cajini ró jñuhun jeē ni cáhán jín ñayuu jenahán: Núu ññ tēe ndahva de tinūu jnánhan de, suni súcuan na ndáha tinúu de. Te núu ññ tēe stáva de jñuhun jnánhan de, suni súcuan na stáva jñuhun de, áchí.

³⁹ Te ruhū chi sa cáhán rī jín ró: Ma nácuáha ró jée ndútahū tēe sáha ndeváha jín ró. Chi sa núu ndé tēe caní de yiquí núu lado váha ró, te váha ga suni cuáha ró inga lado caní de, vésú jeē nácuáha ró jée ndútahū de.

⁴⁰ Te núu ndé tēe stáú yáhu de róhó te quénde de camisa ró, suni cuáha ró jñuhun jeē na quihñ de jín ndé ticáchi ró.

⁴¹ Te núu ndé tēe scáca de róhó jée condiso ró ndajniñu de ññ kilómetro, te cacá ró úú kilómetro jín de.

⁴² Te na-ni ñayuu núu jicán i ndajniñu ró, te cuáha ró núu i. Te ñayuu jicán núu ndajniñu nuū rō, ma sasáhán ró cuáha ró núu i.

Jñuhun jeē cundáhú ni yō ñayuu cájito uhū yohó

(Lc. 6.27-28, 32-36)

⁴³ 'Te suni ni cajini ró jñuhun jeē ni cáhán nde jenahán: Cundáhú ni ró ñayuu cáhíyo maní jín ró, te coto uhū ró ñayuu cájito uhū róhó, áchí.

⁴⁴ Te ruhū chi sa cáhán rī jín ró: Cundáhú ni ró ñayuu cájito uhū róhó. Te cacān ró jeē váha coo ñayuu cácahān ndeváha siquí ró. Te sáha váha ró jín ñayuu cácahān ni nuū rō. Te

cacān tahú rō jehē ñāyuu cacāhān neē núu rō te cájito xeēn i rōhó.

⁴⁵ Te súcuan stéén rō jeē cácuu ró séhe máá Tátá rō, Yaa ndeé andiví, chí máá yá jéhe niāndii cúndijin nuū ñāyuu cuneeé jíin ñāyuu váha. Te jéhe ya saū nuū ñāyuu casáha jniñu ndaá jíin núu ñāyuu casáha jniñu neé.

⁴⁶ Chí núu iyó maní rō jíin máá-ni ñayuu jeē maní jíin ró, te tú na tahū nihin rō nuū yā. Chí nde tēe cástutú xuhun renta jeē castáhú, suni súcuan casáha de.

⁴⁷ Te núu maní jnāhan ró cáhān yñúhún ró jíin, ¿te na vé jeē váha ga sáha ró núu súcuan? Chí nde ñayuu tu cácdanje Yaa Dios, suni súcuan casáha i.

⁴⁸ Núu súcuan te ndaá na cóo ndihí jeē sáha ró, nájñuhun iyó ndaá ndihí jeē sáha Tátá rō, Yaa ndeé andiví.

Jeē ni stéén yā ndese sáha yó jniñu váha

6

¹ Te jeē sáha ró táca jniñu váha nuū Yaa Dios, coto ró jéé ma sáha ró máá síquí jeē cuni ñayuu te cuajñuhún i rōhó. Chí núu súcuan sáha ró, te tú na tahū rō cuāha máá Tátá rō, Yaa ndeé andiví.

² Jeē yúcuān te jeē sáha ró caridad, te ma sáha ró jéé cuni táca ñayuu, nájñuhun casáha tēe stáhú-ni, cáhān de nuū cúchitú ñayuu ini táca vehe i sinagoga jíin núu yáhu. Chí súcuan casáha de návāha cuajñuhún ñayuu de jeē váha casáha de. Jendaá cahán rí jíin ró jeē tahū de cúu jeē jejnúhún ñayuu de.

³ Te rōhó jíināhan ró, núu casáha ró caridad, te sáha yuhu rō, návāha nde amigo váha ró tú cuni jeē sáha ró.

⁴ Súcuan na sáha yuhu rō caridad. Te máá Tátá rō jeē jito ya jeē sáha yuhu rō, ñn quiví te cuāha ya tahū cuu ró.

Jeē ni stéén yā ndese cacān tahú yó (Lc. 11.2-4)

⁵ Te jeē cájicān tahú rō, te ma sáha ró nájñuhun casáha tēe stáhú-ni. Chí cánujnahān ni de cuiñi de cacān tahú de nuū iyó chitú ñayuu ini táca vehe i sinagoga jíin táca yiqui yáhu, návāha cuni ñayuu te cuajñuhún i de. Jendaá cahán rí jíin ró jeē máá yúcuān-ni cúu tahū jeē nihin de, suu jeē jejnúhún ñayuu de.

⁶ Te rōhó jíināhan ró, núu cájicān tahú rō, te ndiví ró ini vehe ró te casi rō yehiyí. Te cacān tahú rō nuū máá Tátá rō, Yaa ndeé yuhu jíin ró. Yúcuān na te máá Tátá rō jeē jito ya jeē súcuan sáha yuhu rō, sáha ya jeé jíicān ró.

⁷ Te jeē cájicān tahú rō, te ma cahán saá-ni ró jñuhun jeē tu cájecuhun ni ró, nájñuhun casáha ñayuu tu cájini jñuhun Yaa Dios. Chí cájeni ni i jeē núu cuehē jñuhun súcuan cahān i, te saá te cuni sōho ya, te tuú.

⁸ Núu súcuan te ma sáha ró nájñuhun casáha máá i. Chí máá Tátá rō, je jíin yā na vé cájini ñúhún ró nde ná tu cacān ró nuū yā.

⁹ Núu súcuan te suhva cacān tahú rō:

Tátá maá ná jíināhan ná jéé ndeé ní andiví, níni na cóo yñúhún ná nuū ní, chí Yaa i cúu ní.

¹⁰ Te ñuhun ni na jéé yachí quiji quiví ndacu ní jniñu ní ñayiví yáha.

Te na cóo táca jniñu nájñahan ni ní, nájñuhun iyó ini andiví, súcuan na cóo ini ñayiví.

¹¹ Staā jeē cátecu na táca quiví, cuāha ní núu ná vijna.

¹² Te cone cahnu ni ní núu táca cuēchi casáha ná núu ní,

nájñuhun cáhine cáhnu ni na núu ñayuu casáha cuēchi nuū ná.

¹³ Te ma cuāha ní jñuhun jeē coto ndee jexeēn sañá,

chí sa suhva jnama ní sañá núu táca jéé neé. Chí máá ní cúu Yaa ndacu jniñu, te jñú ní poder,

te yōhyo luu cújéhu ní ní cáni. Súcuan na cóo. Amén.

Achi rō jíināhan ró.

¹⁴ Chí núu cone cáhnu ní ró nuū ñayuu casáha cuēchi nuū ró, te suni súcuan cone cáhnu ní máá Tátá rō andiví nuū cuēchi ró.

¹⁵ Te núu ma cóne cáhnu ní ró nuū ñayuu casáha cuēchi nuū ró, te suni súcuan ma cóne cáhnu ní máá Tátá rō nuū cuēchi ró jíināhan ró.

Jeē ni stéén yā síquí jñuhun condite ni

¹⁶ Te núu condite ní ró jeē chíñuhún ró Yaa Dios, te ma sáha ró nájñuhun casáha tēe stáhú-ni. Chí casáha de jeē coto xí de, te súcuan stéén de nuū ñayuu jeē iyó ndite ni de, návāha cuajñuhún i de. Jendaá cahán rí jíin ró jeē máá yúcuān-ni cúu tahū jeē nihin de, suu jeē jejnúhún ñayuu de.

¹⁷ Te máá ró jíināhan ró, núu iyó ndite ni ró, te sa chuhun váha ró xini ró te nandahá núu ró,

¹⁸ návāha ma cuni ñayuu jeē iyó ndite ni ró. Chí máá-ni Tátá rō jeē ndeé yuhu yá jíin ró, cuni yā, te ñn quiví te cuāha ya tahū cuu ró.

Ndese coo cúcá yó nde andiví

(Lc. 12.33-34)

¹⁹ Ma cóndihví ni ró caya rō ndajniñu cúcá ini ñayiví yáha, chí quiví tiquixin, te cáne xehyu, te tívi. Te suni quívicoo ñacuñhá te sácuihná.

²⁰ Chí sa suhva sáha ró táca jniñu váha návāha cayā tahú rō nde andiví. Chí yúcuān má quiví tiquixin ní ma cáne xehyu jeé tívi. Ní ma cúu quiví ñacuñhá sácuihná.

²¹ Chí nde nuū nihin ró tahū váha ró, yúcuān cúu nuū cóndihví ní ró síquí.

Tinūu cúu lámpara yiqui cúñu (Lc. 11.34-36)

22 Tĩnũu ró cúu nájñũhun lámpara nuũ yiqui cúũu rō. Núu súcuau te núu tĩnũu rō iyó ndĩjin, te nĩ-ni yiqui cúũu rō cúndĩjin.

23 Te núu tĩnũu rō tu iyó ndĩjin, te nĩ-ni yiqui cúũu rō iyó nee. Te suni súcuau cúu anuá rō, chi núu máni jeē jení néé ni rō, te nacá jeē nee gā iyó ini anuá rō núu súcuau.

*Jeē ma cóndihvĩ ni yō siquĩ xũhun
(Lc. 16.13)*

24 Nĩ ĩn mozo ma cúu cuajñĩũ de nuũ uũ patrón. Chi quitĩ ni de nuũ ĩn te coo manĩ de jĩn inga, chí squĩcu vāha de nuũ ĩn te sájéé ni de nuũ inga. Te suni súcuau ma cúu cuajñĩũ rō núu Yaā Dios te núu máni siquĩ xũhun ndĩhvĩ ni rō.

*Yaā Dios ndĩto ya yohó
(Lc. 12.22-31)*

25 Núu súcuau te cáhan rĩ jĩn rō jijnáhan rō: Ma nácani ndasĩ ni rō siquĩ jeē cótecu rō, núu ndese caji rō coho rō, ni siquĩ sahma, núu ndese cuhun rō. Chi Yaā Dios ni sáha ya jeē técu rō jĩn yiqui cúũu rō, te nagá ni cuu jeē ma cuáha ya jeē caji rō jĩn jéé cuhun rō.

26 Condēhe rō ndese cátecu saa, chi tu cátaji tĩ, ni tu cánaštútũ tĩ jeē chúvāha tĩ, ni tú yacá tĩ. Te vėsũ súcuau te máá Tátá rō andivĩ scáji yā tĩ. Te cánuũ ndasĩ gá rō jijnáhan rō vėsũ táca saa ún.

27 ¿Te ndé ĩn rō, á cuu scuéhu rō máá rō sava metro gā, vėsũ na nácani ndasĩ ni rō?

28 ¿Te najehē cánaçani ndasĩ ni rō jeē ma nihĩn rō sahma? Condēhe jijnáhan rō ndese jeē ita táca yúcũ. Chi tu sájiñũ, ni tu táu.

29 Te cáhan rĩ jĩn rō jeē ni rey Salomón, quivĩ ní ñũhun de sahma vāha ndasĩ, tu ni ñũhun de sahma lúu súcuau nájñũhun ita ún.

30 Te núu súcuau jéhe Yaā Dios sahma lúu ita un jéé jéé vijna te sajnē cayũ nuũ ñũhun, te nagá ni cuu róhó jijnáhan rō jéé ma sáha ya jeē nihĩn rō sahma. ¿Te naun tu cácañdije nihĩn rō jéé ndĩto ya rohó?

31 Núu súcuau te ma nácani ndasĩ ni rō siquĩ jeē caji rō, jeē coho rō, jeē cuhun rō.

32 Chi táca ñayuu ñayivĩ jéé tu cácañdije cúu jeē máni siquĩ jeē yáha cándihvĩ ni i. Te máá rō jijnáhan rō, chí iyó Tátá rō andivĩ, te jínĩ yā jeē cājini ñũhún rō táca jéé yáha.

33 Te sa suhva cánuũ gá jeē cóndihvĩ ni rō siquĩ jñĩũ jeē ndácu Yaā Dios nuũ rō, jĩn siquĩ jeē sáha rō jñĩũ ndaā jeē nũjnahan ni yā. Yúcuán na te sáha ya jeē nihĩn rō táca jéé yáha.

34 Núu súcuau te ma nácani ni rō siquĩ jeē cóo sajnē, chí vijna cúu vijna te sajnē cúu sajnē. Chi cani ni rō siquĩ jñũndóho jeē iyó ná ĩn ná ĩn-ni quivĩ.

*Jeē ma cahán yō siquĩ cuéchi jnáhan yó
(Lc. 6.37-38, 41-42)*

7

1 Ma cahán rō siquĩ ñayuu ndese sáha i, návāha suni ma cahán Yaā Dios cuéchi siquĩ maá rō jeē casáha rō súcuau.

2 Chi nájñũhun cácahán rō siquĩ cuéchi ñayuu, suni súcuau cahán yā siquĩ cuéchi rō. Te cúhva jeē cándihvĩ ni rō siquĩ i, suni cúhva yúcuau sáha ya jĩn rō.

3 Chi cuéchi jnáhan rō cúu nájñũhun jeē ĩne ĩn yāca lúli tĩnũũ i. ¿Te naun casáha rō cuenta jeē súcuau, te tu casáha rō cuenta cuéchi máá rō jeē cúu nájñũhun jeē ĩne ĩn nduhu tĩnũ máá rō?

4 ¿Te naun cácahán rō jĩn jnáhan rō: Na táva rĩ yāca ĩne tĩnũu rō, te tu cánaçani ni rō jeē ĩne ĩn nduhu tĩnũ máá rō?

5 Tēe stáhũ-ni cácuu rō núu súcuau. Xĩhna gā tĩnũu máá rō tava rō nduhu, te yúcuán na te cuu condēhe vāha rō jéé táva rō yāca tĩnũu jnáhan rō.

6 Ma sáha fuerza rō ñayuu cunéé quivicoo i nuũ jñũhun ĩi yā núu tu cúni i. Chi ndonda i siquĩ rō nájñũhun ina jeē cayĩhi tĩ rohó. Te ma nácani rō jñũhun ya nuũ ñayuu jeē tu cúni cuiti cuajñũhún. Chi cándāa i nájñũhun quini jeē jeñũ tĩ siquĩ perla jeē ndeé yahu ga.

*Cacān yō nuũ yā te nihĩn yō
(Lc. 11.9-13; 6.31)*

7 Cacān rō nuũ Yaā Dios, te cuáha ya nuũ rō. Te nducú rō táca jéé váha iyó núu yā, te nihĩn rō sáha ya. Te cacān tahú rō nde nihĩn rō, nájñũhun sáha ñayuu cahán yehyĩ ndé nune quivĩ i.

8 Chi táca ñayuu jicán, cuáha ya nuũ i. Te ñayuu nducú, suni nihĩn i. Te ñayuu cahán, nune ya ichi nihĩn i jeé cúni i.

9 ¿Te ndé ĩn róhó núu sēhe rō jicán i staā nuũ rō, te á cuáha rō ĩn yũ nuũ i?

10 ¿Te núu jicán i ĩn chācá, te á cuáha rō ĩn coó nuũ i? Tú cuiti súcuau.

11 Núu súcuau te máá rō jijnáhan rō, vėsũ ñayuu iyó cuéchi cácuu rō, te cājini rō cuáha rō jéé váha nuũ sēhe rō. Te nagá ni cuu máá Tátá rō andivĩ jéé ma cuáha ya jeē váha nuũ ñayuu jicán nuũ yā.

12 Te nájñũhun cúni rō jeē sáha vāha ñayuu jĩn rō, suni súcuau na sáha vāha rō jĩn i. Chi tutu ley Moisés súcuau ndácu jñĩũ, jĩn táca tutu tēe ni canaçani jñũhun Yaā Dios.

*Siquĩ jeē quivĩ yó yéhyĩ túũ
(Lc. 13.24)*

13 Condihvĩ ni rō quivicoo rō ndaha Yaā Dios. Chi cúu nájñũhun ĩn yéhyĩ túũ. Chi yéhyĩ jĩn ichi jeē cuahán nuũ jñahnú ndetũ ñayuu, jíté te cáhnu, te cuehē i quivicoo yúcuán.

14 Te yéhyĩ jĩn ichi jeē cuahán nuũ nihĩn tahú i cotecu i, chi tuũ yehyĩ te cuĩni ichi, te jecu-ni i cánihĩn i.

Jíin jniñu cásáha ñayuu te nácuni yō ndese ñayuu cácuu i

(Lc. 6.43-44)

¹⁵ Te ma cándíje cuiti rō tēe stáhú jée cácahān de jeē jñuhun Yaā Dios cánacani de. Chi nájnūhun lanchi, quiti tú xeén, súcuan cásáha de vējicoo de nuū rō. Te ini anuá de chí cácuu de nájnūhun yihí, quiti xeén.

¹⁶ Jíin jniñu cásáha de te nacuni rō de ndese tēe cácuu de. Chi cúu nájnūhun jeē tu scóyo rō ndehē uva xiní ñnu, ni tu scóyo rō higo xiní ñnu yóquin.

¹⁷ Te tǎcá yujnu váha chí jéhe ndehē váha, te yujnu neé chí cúun ndehē neé.

¹⁸ ñin yujnu váha ma cúun ndehē neé, te ni ñin yujnu neé ma cuáha ndehē váha.

¹⁹ Te tǎcá yujnu jeē tu jéhe ndehē váha, chí tahndē te cayū nuū ñuhún.

²⁰ Te suni súcuan cácuu tēe ún, chí jíin jniñu cásáha de te nácuni rō ndese tēe cácuu de.

Nasūú ndíhi ñayuu quǎvicoo andiví

(Lc. 13.25-27)

²¹ Nasūú ndíhi ñayuu jeē cahán i Jitoho i ruhū cúu jeē quǎvicoo nuū ndácu Tátá rí jniñu nde andiví. Chí quǎvicoo máá nene ñayuu jeē squícu jniñu cúní Tátá rí andiví.

²² Te quǎví jeē sándaá rí jniñu ñayuu, te cuehē i cahán jíin rí: Jitoho na jíinánhan ná, ni canacani ná jñuhun jíin síhví ní, te ni caquenehen ná táchi jíin síhví ní, te ni casáha ná cuehē jniñu jéhu jíin síhví ní jeē náá ni ñayuu sáha. Achí i.

²³ Yūcuán na te cahán rí jíin ñayuu ún: Tu jíiní cuiti rí rohó. Cujiyó quingoo ró, chí ñayuu casáha jniñu neé cácuu ró, achí rí.

Siquí uí vehe

(Lc. 6.47-49; Mr. 1.22)

²⁴ Núu súcuan te tǎca ñayuu jeē cájini sōho jñuhun cáhán rí te squícu i, cácuu i nájnūhun ñin tēe ni nacani váha ni, te ni jeni de vehe de squí cáva.

²⁵ Te ní cuun saū, te ni ndaa yūte, te ni quee tachí xeén, te ni cachundahá vehe ún. Te tu ní cotúú, chí siquí cáva ndéé.

²⁶ Te tǎca ñayuu jeē cájini sōho jñuhun cáhán rí te tu squícu i, cácuu i nájnūhun ñin tēe cánéé jeē ní jeni de vehe de nuū ñiti.

²⁷ Te ni cuun saū, te ni quiji ndute ñuhún cuehē, te ni quee tachí xeén, te ni cachundahá vehe ún. Te ni cotúú-ni, te ni naa ñi-ni. Achí yá jíin i jíinánhan i.

²⁸ Te ná ni jínu ni cahán Jesús tǎca jñuhun yáha, te ñayuu cuehē un ní canaa ni i ni cajini i jñuhun ní steén yá.

²⁹ Chí ní steén váha ya nuū i, chí máá yá cúu jeē ndíso jniñu siquí ndíhi. Te tēe cástéén tutu ley Yaā Dios, tu súcuan cástéén de.

Jeē ní nasávaha ya ñin tēe ndóho cuehyí stehyú

(Mr. 1.40-45; Lc. 5.12-16)

8

¹ Te ni nanuu Jesús yucu ún, te cuehē ñayuu cándiquín i ya.

² Te ñin tēe ndóho cuehyí stehyú, ni quee de nuū yá. Te ní jecuíñi yití de nuū yá, te ní cahán de jíin yá:

Jíiní na jée cuu sáha ní jée nduváha ná, te núu cúní ní, achí de.

³ Te Jesús ní soó yá ndaha ya siquí de, te ní cahán yá:

Cúní rí. Te na ndúvaha ró, achí yá.

Te ná ni cahán yá súcuan, te ni nduváha-ni tēe ndóho cuehyí stehyú un.

⁴ Yūcuán na te ní cahán Jesús jíin de:

Ma cáchi cuiti rō nuū ní ñin. Chí quis-teén rō maá rō nuū sutú, te condahá rō jée socó rō nuū Yaā Dios, nájnūhun ni ndacu Moisés jniñu jenahán, návaha cuni ñayuu jeē ní nduváha ró. Achí yá.

Jeē ní nasávaha ya mozo capitán

(Lc. 7.1-10)

⁵ Te ní quǎví Jesús ñuu Capernaum. Te ñin tēe nación Roma jeē cúu capitán, ni quee de nuū yá, te ní cahán ndahú de jíin yá:

⁶ Mozo na cátu i vehe ná, chí ní ñin i te ndóho xeén i, achí de.

⁷ Te ní cahán Jesús:

Quihín rí nasávaha ri i núu súcuan, achí yá.

⁸ Te ní cahán capitán jíin yá:

Tu cújéhu ná jée quihín ní quǎví ní vehe ná. Chí máá jée cahán-ni ní, te na ndúvaha-ni mozo na.

⁹ Chí máá ná suni ndíso jniñu ná ní casáha tēe cácujeñu ga. Te cújéhu ná núu tǎcá soldado na. Te núu cáhán na jíin ñin de jeē na quihín de, te cuahán de. Te núu cáhán na jíin ñinga de jeē na quíji de, te quíji de. Te núu ndácu ná ñin jniñu nuū mozo na, te sáha i. Achí de.

¹⁰ Te jeē ní jini Jesús jñuhun yáha, te ní naa ní yá. Te ní cahán yá jíin ñayuu cándiquín yá ún:

Jendaá cahán rí jíin ró jeē ní nación yō Israel tu ní níhín rí ní ñin ñayuu cándíje níhin súcuan, nájnūhun cándíje tēe yáha, vēsú tēe nación tu jíin jñuhun Yaā Dios cúu de.

¹¹ Te cáhán rí jíin ró jeē quíjicoo cuehē ñayuu íchi núu cáne níandii jíin íchi núu quée níandii. Te cucōo i caji i staá jíin Abraham jíin Isaac jíin Jacob nuū ndácu Yaā Dios jniñu nde andiví.

¹² Te sava ñayuu nación Israel jeē maá i quǎvicoo núu, te sa quenehen ya i quihín i nuū neé, chí tu ní cácañíje i. Te yūcuán ndáhyú i te nacayihí yuhu i jeē ndoho xeén i. Achí yá.

¹³ Yūcuán na te ní cahán yá jíin tēe cúu capitán:

Cuánuhun vehe ró, chí sáha ri nájnūhun cándíje ró jée sáha rí.

Te mozo de un ní nduvāha-ni i máá hora un.

*Jeē ní nasávāha ya naná chíso Pedro
(Mr. 1.29-31; Lc. 4.38-39)*

¹⁴ Te ni jehēn Jesús vehe Pedro. Te ni jito ya naná chíso de jeē catú ña yíhi quíji ña.

¹⁵ Te ni jni ya ndaha ña, te ni quenda-ni quíji ún ña. Te ni ndocuiñi ña, te ni sáha ña jeē ní cayeji de jíin yá.

*Jeē ní nasávāha ya cuehē ñayuu
(Mr. 1.32-34; Lc. 4.40-41)*

¹⁶ Te jeē ní cuaa ni quecoo ñayuu jíin cuehē ñayuu jeē ñuhun tachí ini i. Te ni quenehen ya tachí un cuángoo jíin jñuhun cáhān-ni ya. Te suni ní nasávāha ya táca ñáyuu cácuñu.

¹⁷ Te súcuan ní cuu návāha cundaā jñuhun ní cahān Isaías, tēe ní nacani jñuhun Yaā Dios jenahān: Máá yá ní tejiyo ndinuū cuehyi cándoho yó, áchí Isaías.

*Siqui ñayuu jeē cácu ni condiquiñi i ya
(Lc. 9.57-62)*

¹⁸ Te ni jito Jesús jeē ní ndico nduū cuehē ñayuu yā. Te ni cahān yā jíin tēe cácuáha jíin yá jeē na yáha de jíin yá inga lado mar.

¹⁹ Te ñi tēe stéén tutu ley Yaā Dios, ní quee de nuū yā, te ni cahān de:

Maestro, condiquiñi na níhin quíhñi yō ndé-ni cúu-ni nuū quíhñi ní, áchí de.

²⁰ Te ni cahān Jesús jíin de:

Tāca ñucuii, iyó yāu cava cáñuhun ti. Te suni saa, iyó táca tī. Te ruhū, Yaā ní nduu tēe, tuú nuū cusú rí, áchí yá.

²¹ Te inga tēe ní cahān de jíin yá, te tēe scuáha jíin yá cúu de:

Condetu ní ndé na quíchindūji ná tátá na xíhna gā. Yūcuán na te condiquiñi na níhin, áchí de.

²² Te ni cahān Jesús jíin de:

Condiquiñi ruhū na quíhñi yō. Te stóo táca ndíyi na chindūji jñahan ndíyi, chí ndíyi cácu ñayuu tu cácandíje. Achí yá.

*Jeē ní jecuñi tachí níhin jíin mar ní sáha ya
(Mr. 4.35-41; Lc. 8.22-25)*

²³ Yūcuán na te ni quívi Jesús ini barco, te tēe cácuáha jíin yá ní quívicoo de cuahān de jíin yá.

²⁴ Te nuū mar ní jecuñi ñi tachí níhin, te ní stóna ndute mar, ní quívi ini barco un. Te Jesús chí quíxi yá.

²⁵ Te tēe cácuáha jíin yá ní castóna de ya, te ní cacahān de:

Jnama ní yóhó, chí je queé yó chíji ndute, áchí de.

²⁶ Te ni cahān yā jíin de:

¿Naun cáyuhú ndasi ró? Te tu cácandíje níhin ró jéé cácu ró sáha rí, áchí yá.

Yūcuán na te ní ndocuiñi yā, te ní cahān yā nuū tachí níhin un jíin núu mar. Te ní cuu nayúú í-ní.

²⁷ Te ní canaa ní de jíināhan de, te ní cacahān de:

¿Ndé ñi ga cúu tēe yáha, jéé ndé tachí níhin jíin mar cájetáhú jéé cahān de? áchí de.

*Tēe Gadara jeē cándoho tachí
(Mr. 5.1-20; Lc. 8.26-39)*

²⁸ Te ní jinū yā inga lado mar, máá región ñayuu Gadara. Te uū tēe ní quendacoo de nde nuū yíndūji ndíyi, ní quijnahan de ya. Te cáñuhun tachí ini de, te síquī jeē yóhyo xeēn tachí ún, te ní ñi ñayuu tu cúu yāha i ichi yúcuán.

²⁹ Te ní cacana cóho de ní casáha tachí:

¿Naun véji ní núu ná, Jesús Sēhe Yaā Dios? ¿A véji ní yáha jeē stóo ní sáña ndé ná tu quee máá quívi? áchí.

³⁰ Te nde jíca jecu cáhñi cuehē quíñi cájitu ti.

³¹ Te tachí jeē cáñuhun ini tēe un ní cacahān ndahú jíin yá:

Núu quenehen ní sáña, te cuāha ní jñuhun na quívicoo ná ñi quíñi cáhñi yúcuán, áchí.

³² Te ní cahān yā jíin:

Cuángoo núu súcuan.

Te ní quendacoo tachí ún ini tēe ún, te ní quívicoo ñi quíñi. Te quíñi un ní cajinu ti ní caningava ti ñi yucáva, te ní ndaquíñi ti ndute mar, ní cajihí ti.

³³ Te tēe cándito ti ní cajinu de cuangoo de jeē ní cayuhú de. Te ní najinūcoo de ñuu. Te ní cacastuhún de táca jñiñu yúcuán, jíin ndese ní cuu jeē ní quendacoo tachí ini ndindúú tēe ún.

³⁴ Yūcuán na te ndívi ñayuu ñuu un, ní quendacoo i cuacondēhē i Jesús. Te ná ní jinūcoo i nuū ñe ya, te ní cacahān ndahú i jíin yá jeē na quénda ya región yúcuán quíhñi yā.

*Jeē ní nasávāha ya ñi tēe ndóho cuehyi ní
íjin*

(Mr. 2.1-12; Lc. 5.17-26)

9

¹ Yūcuán na te ní ndívi Jesús ini barco. Te ní nayāha ya cuahān yā inga lado mar, te ní najinū yā ñuu máá yá.

² Te ní caquindeca ñayuu ñi tēe ndóho cuehyi ní íjin, catú de nuū ñi camilla. Te ní jini Jesús jeē cácandíje i jeē cúu nasávāha ya tēe ní íjin ún. Te ní cahān yā jíin de:

Na ndúndeyi ní ró séhé, chí je ñe cáhnu ní rí nuū táca cuéchi ró, áchí yá.

³ Yūcuán na te jecu tēe cástéén tutu ley Yaā Dios, ní cajeni ní de síquī yā: Jeē cahān tēe yáha súcuan, chí cahān de jñuhun ndevāha jeē quíñi ní Yaā Dios.

⁴ Te ní jini Jesús jeē súcuan cájeni ní de, te ní cahān yā jíin de:

¿Naun cájeni ní ró jeē cahān ndevāha rí?

⁵ Jeē uū jñuhun yáha, ¿ndé ñi yí gá cáa? ¿A jéé cahān rí jíin tēe cúhú: Je ñe cáhnu ní

rī nuū tāca cuēchi ró? ¿Chí yí gá jeē cahān rī: Ndocuiñi te cacá ró, chí je ni nduvāha ró, achi rī?

⁶ Te vijna te na stéen rī jeē maá rí, Yaā ní nduu tēe, ndíso jniñu ri ini ñayivi yāha jéē cōne cáhnu ni rī nuū cuēchi.

Yūcuán na te ni cahān yā jín tēe ni jín ún: Ndocuiñi te naquihin ró camilla rō te quinuñun rō vehe rō, áchí yá jín de.

⁷ Yūcuán na te ni ndocuiñi-ni tēe ún, te cuanuhun de vehe de.

⁸ Te ná ni cajito ñayuu un jéē súcuan ni sáha ya, te ni cayúhú i. Te ni cacahān i jeē yóhyo vāha Yaā cúu Yaā Dios jeē súcuan ni jēhe ya poder nuū ñn tēe jeē cúu nasávāha de ñayuu, achí i cájito i Jesús.

Jeē ní cana ya Mateo

(Mr. 2.13-17; Lc. 5.27-32)

⁹ Te ni quenda Jesús yūcuan cuahān yā. Te ni jito ya nuū ñn tēe nání Mateo, néne de nuū cutútú xúhun renta. Te ni cahān yā jín de:

Condiquín ruhū na quihín yō.

Te ni ndocuiñi de, te cuahān de jín yá.

¹⁰ Yūcuán na te ni jehēn yā ni yeji yā staā vehe de. Te cuehē tēe cástútú xúhun renta jín inga tēe casáha cuēchi, suni cáyucú de cáyeji de staā jín Jesús jín tēe cáscuáha jín yá.

¹¹ Te tēe grupo fariseo, ni cajito de, te ni cacahān de jín tēe cáscuáha jín yá:

¿Naun yéji maestro rō jín tēe cástútú xúhun renta jín inga tēe casáha cuēchi? áchí de.

¹² Te ni jini Jesús, te ni cahān yatá yá jín de:

Ñayuu cáhiyo vāha, tu jini ñúhún i tēe tájna, chí ñayuu cácuñú cúu jeē jini ñúhún.

¹³ Cuahān jijnáhan rō núu súcuan, te nacani ni rō na vé cúu jeē cahān jñuhun yāha jéē yosó núu tútu ñi: Cúni rí jee na cúndáhú ni rō jnāhan ró, nasūu jéē socó rō quiti nuū rí, achí Yaā Dios ndejenahán. Te ruhū nasūu jéē véji rí cana rí ñayuu tú cuēchi, jeē cúu i nájñuhun ñayuu cáhiyo vāha, chí sa suhva véji rí cana rí ñayuu iyó cuēchi, jeē na nácani ni i te stóo i cuēchi i. Achí yá.

Jeē ní cacajñuhún de ya síquī jeē cóndite ní

(Mr. 2.18-22; Lc. 5.33-39)

¹⁴ Yūcuán na te tēe cáscuáha jín Juan tēe scuándute, ni quecoo de nuū Jesús. Te ni cacahān de jín yá:

Saña jín tēe grupo fariseo, tijni jínu cáhiyo ndite ni na núu Yaā Dios. Te tēe cáscuáha jín maá ní, ¿naun tu casáha de súcuan?

¹⁵ Te ni cahān Jesús jín de:

¿A cuu condite ni de níni jéē iyó rí jín de? ¿A cuu cucuíhyá ni ñayuu cáhiin vico nándāha, te núu níni néne tēe nándāha? Te quee quiví jeē cújiyo tēe nándāha, te quiví ún chí condite ni i.

¹⁶ Te ni cahān yā uñ jñuhun yatá síquī jeē tu quijnáhan jñuhun jeē jéē steén yā jín táca jñuhun jenahán. Achí yá:

Ni ñn tu náchuhun ñn pedazo sahma jéē núu ñn sahma túhú. Chí núu súcuan te ndiyi pedazo jeé un, te tahndé gá jeé tuhú un, te nducáhnu ga nuū catáhndé un.

¹⁷ Te suni tu cáchuhun vino jeé ini ñi túhú. Chí núu súcuan te ndatā ñi ún, te naa vino jín ñi. Chí cánuú jéē chúhun i vino jeé ini ñi jéé, te súcuan te quéndōo vāha ndindúú. Achí yá.

Jñuhun sēhe síhí Jairo jín ñahan ní quehé yusáhma ya

(Mr. 5.21-43; Lc. 8.40-56)

¹⁸ Te níni cáhán Jesús táca jñuhun yāha, te ñn tēe cújéhnu nuū ñayuu hebreo, ni quee de nuū yá. Te ni jecuiñi yití de nuū yá, te ni cahān de:

Sēhe síhí ná sá ní jihí i. Te núu na quihín yō soó ní ndaha ní síquī i, te natecu i. Achí de.

¹⁹ Te ni ndocuiñi Jesús, te cuahān yā jín de, te suni cuango tēe cáscuáha jín yá.

²⁰ Te mēhñu ñayuu cuango jín yá ni quee ñn ñahan, te je ni cuu uxí uñ cuiyā ndóho ña cuehyi ñiñi. Te ni quee ña ichi yatá yá, te ni quehé ña yusáhma ya.

²¹ Chí ni jeni ní ña: Vēsú maá sahma ya na níhín rí quehé rí, te nduvāha rí, jéni ní ña.

²² Te ni ndió cóto Jesús, te ni jito ya nuū ña, te ni cahān ya:

Na ndúndeyí ni rō, séhē. Ni candíje ró jéē cuu nasávāha rí rohó, te jeé yūcuan ní nduvāha ró, áchí yá.

Te ni nduvāha ña maá hora un.

²³ Te ná ni jinū Jesús vehe tēe cújéhnu ún, te ni jito ya nuū tēe cácuu músico jeē quichindúji de i, jín nuū ñayuu cuehē, casávaá i.

²⁴ Te ni cahān yá jín i:

Cujiyo jijnáhan ró, chí sūchi síhí yāha, tu ní jihí i chí quixí-ni i, áchí yá.

Te ni cajecú catá i jeé ni cahān yá.

²⁵ Te ni quenehen ya ñayuu cuehē ún, te ni quiví ya ini vehe. Te ni jniñi ya ndaha sūchi síhí ní jihí ún, te ni ndocuiñi-ni i.

²⁶ Te ní región yūcuan ní jitē núu jñuhun jniñu jéhnu ní sáha ya ún.

Jeē ní nasávāha ya uñ tēe cuáá

²⁷ Te ni quenda Jesús yūcuan cuahān yā. Te uñ tēe cuáá cuango de yatá yá, cácana jee de:

Maá ní jeé cúu ní Sēhe yucún David, cundáhú ni ní saña víi, achí de.

²⁸ Te ná ni jinū yá vehe, te ni jinūcoo tēe cuáá un núu yá. Te ni cahān yá jín de:

¿A cácandíje ró jéē cúu nanune rí tinūu ró? achí yá.

Te ni cacahān de:

Cácandíje ná, áchí de.

²⁹ Yūcuán na te ni tee ya ndaha ya tinūu de, te ni cahān yá:

Na sáha rí nájñuhun cácandíje ró, áchí yá.

³⁰ Te ni cananune-ni tinūū de. Te Jesús ni cahān nihin ya jīn de:

Ma cáchi cuiti rō nuū ni ĩn, áchí yá.

³¹ Te máá de chí ni quendacoo de, te ni cajete-ni de jñūhun ní región yūcuan jéé súcuan ni sáha ya jīn de.

Jeē ní nasávāha ya ĩn tēe ñíhín

³² Te nuū ní quendacoo tēe un cuángoo de, te ni quecōo ñayuu jīn ĩn tēe ñíhín, jeē ñūhun tachí ĩni de.

³³ Te ni quenehen ya tachí un cuáhān. Te tēe ñíhín un ní nacahān de. Te ni canaa ni ñayuu ni cajito i, te ni cacahān i:

Ná tu cuni cuiti yō ni ĩn jñiñu súcuan ini ñuu Israel, achí i.

³⁴ Te tēe grupo fariseo chí ni cacahān de:

Tēe yáha chí quenehen de tachí jīn fuerza maá jexeén jeē kujénu nuū tachí, achí de.

Jeē cundáhú ni yá ñayuu cuehē

³⁵ Te ni jica cuu Jesús táca ñuu jīn rancho, te ni steén yá jñūhun ini táca vehe ĩ sinagoga. Te ni nacani ya jñūhun váha ndese ndácu Yaā Dios jñiñu. Te ni nasávāha ya ñayuu cácuñú na-ni cuehyí cándoho i.

³⁶ Te cundáhú ni yá jito ya nuū ñayuu cuehē ún. Chí cándoho i te cácuñúhá ní i, chí cácuu i nájnūhun lanchi jeē tú jito ho tī, chí tu ndíquín i Yaā cúu Jitoho i.

³⁷ Yūcuán na te ni cahān yá jīn tēe cácuáha jīn yá:

Ñayuu yáha cácuu i nájnūhun trigo jeē tahndé, te ndaā jeē cuehē cúu, te tēe cahnde chí jecu-ni de cúu.

³⁸ Núu súcuan te cacān tahu rō nuū maá Jitoho rō Yaā Dios jeē na táji yá cuehē tēe na quíngoo de cahnde de trigo, cúu jeē nácani de jñūhun ya nuū ñayuu. Achí yá.

*Jeē ní nacāji ya uxí uū tēe apóstol
(Mr 3.13-19; Lc. 6.12-16)*

10

¹ Yūcuán na te ni cana ya uxí uū tēe jeē scuáha de jīn yá. Te ni jēhe ya poder nuū de jeē quenehen de tachí ĩni ñayuu, jīn jéé nasávāha de ñayuu cácuñú táca ndinuū cuehyí.

² Te yáha cúu sñví ndihúxí uū tēe apóstol un: Tēe ĩn cúu Simón jeē suni nání Pedro, jīn ñani de Andrés. Te uū gā de cácuu sēhe Zebedeo, te nání de Jacobo jīn Juan.

³ Yūcuán na te Felipe, Bartolomé, Tomás, Mateo tēe ni stútú xūhun renta, Jacobo sēhe Alfeo, jīn Lebeo jeē suni nání Tadeo,

⁴ jīn Simón tēe grupo cananista, jīn Judas Iscariote, tēe jeē ní nastúu de ya.

Jeē ní táji yá ndihúxí uū de quinacani de jñūhun

(Mr. 6.7-13; Lc. 9.1-6)

⁵ Te ni táji Jesús ndihúxí uū tēe yáha jeē quíngoo de. Te ni ndacu ya jñiñu nuū de ndese sáha de:

Ma quíngoo rō núu ñayuu jeē násūu ñayuu hebreo cácuu i, ni ma quívicoo rō táca ñuu ñayuu Samaria.

⁶ Chí nuū maá-ni ñayuu nación yō Israel quíngoo rō, chí cácuu i nájnūhun lanchi jeē ní sana.

⁷ Te jeē quíngoo rō te suhva nacani rō jñūhun: Je ni cuyajni Yaā ndeé andiví jeē ndacu ya jñiñu nuū rō, achí rō.

⁸ Te nasávāha rō ñayuu cándoho cuehyí stehyú jīn ñayuu cándoho táca gá cuehyí, te nastécu rō ndíyí te quenehen rō táchí ĩni ñayuu. Te súcuan-ni ní jēhe ri poder nuū rō jeē sáha rō, te suni súcuan-ni sáha rō jīn i.

⁹ Te ma cóndiso rō xūhun oro, ni xūhun plata, ni centavo cuechí.

¹⁰ Ni ma cóndiso rō ñuu stáa caji rō ichi, ni inga camisa, ni ndijén, ni vara. Chí siquí jñiñu jeē nácani rō jñūhun nuū ñayuu, te cánuú coto i róhó.

¹¹ Te na-ni ñuu chí rancho núu ni jinúcoo rō, te yūcuán nducú rō ĩn ñayuu váha, te coyūcu rō vehe i nde quíngoo tucu rō.

¹² Te jeē quíví rō vehe ñayuu ún, te cahān rō jeē na quíji jñūhun ndeyí jñūhun sñ ni nuū i.

¹³ Te núu ñayuu váha cácuu i, te jñūhun ndeyí ní cahān rō quendōo siquí i. Te núu násūu ñayuu váha cácuu i, te jñūhun ndeyí ní cahān rō ma quéndōo siquí i.

¹⁴ Te núu íyó ñayuu jeē tu cájetáhú i róhó, ni tu cúní i cuni nahín i jñūhun cahān rō, yūcuán na te quendacoo rō vehe un chí ñuu ún, te scóyo rō tícachā jehé rō, te súcuan steén rō jeē íyó cuechi i jeé tu ní cájetáhú i.

¹⁵ Jendaá cahān rí jīn rō jeē quíví juicio te xeén gā coo castigo siquí ñuu casáha súcuan vésu siquí ñuu Sodoma jīn ñuu Gomorra nuū ní casáha ndasí ñayuu cuéchi.

Jeē coto xeén ñayuu de jñnāhan de

¹⁶ Cuni sōho rō, chí táji rí rohó quíngoo rō nájnūhun lanchi mehñu yñi. Núu súcuan te coo listo rō nájnūhun coō, te coo vítá ní rō nájnūhun paloma.

¹⁷ Te condito rō máá rō nuū ñayuu, chí quee quíví jeē quíndeca i róhó núu tohó, te caní i róhó ĩni táca vehe ĩ sinagoga.

¹⁸ Te suni nde nuū táca gobernador jīn rey quíndeca i róhó jéé siquí ruhū. Te súcuan te nune ichi jeē nacani ndaā rō jñūhun ri nuū de jīn núu ñayuu táca nación jeé tu jíní jñūhun Yaā Dios.

¹⁹ Te núu ni jendeca i róhó núu táca tēe ún, ma nácani ndasí ní rō ndese cahān rō. Chí máá hora un te máá yá steén nuū rō ndese cahān rō.

²⁰ Chi nasūu máá ró cúu jeē cahán, chi Espíritu máá Tátá rō cúu jeē cahán jíin yuhu rō.

²¹ Te sava ñayuu tu cácadíje, nastúu i ñani i jeē na cúu. Te tátá nastúu sehe. Te sehe ndonda siquí tátá jíin náná jeē na cúu.

²² Te ndihi ñayuu quití ni i nuū rō jeē siquí ruhū. Te ñayuu jeē cuiñi nihin nde jeē jíin jnūndóho, ñayuu ún chi cācu ánuá i.

²³ Te núu cájito xeēn i rōhó ñn ñuu, te cunu rō quíhin rō inga ñuu. Chi jendaá cahán rī jíin rō jeē ma ndécāva rō caca cuu rō ndihi naciōn yō Israel te ndiji-ni máá rī, Yaa ní nduu tēe.

²⁴ Ñin tēe scuáha, tu cújéhu de nuū maestro de. Ni tēe cúu mozo, tu cújéhu de nuū patrón de.

²⁵ Tēe scuáha chi nájnūhun ndóho maestro de suni súcuan ndoho nahín máá de, te tēe cúu mozo suni ndoho de nájnūhun ndóho patrón de. Núu súcuan te núu ruhū cácahān i jeē Satanás cúu rī, te nagā ni cuu jeē ma cahán i jeē rohó cácuu Satanás.

*Jeē ní cachi yā ndé ñn cúu jeē yūhu yó
(Lc. 12.2-9)*

²⁶ Núu súcuan te ma yūhu rō coto rō ñáyuu. Chi tāca jnūhun cácahān sáhi i ma quéndōo sáhi cuiñi, chi ndihi natūu ndijin, te cuni ñayuu.

²⁷ Jnūhun ní cahān rī jíin rō jeē tu ní jíin ñayuu, na nácastūhun cájí rō nuū i. Te jnūhun ní nacani sáhi rī nuū rō, na nácani jee rō yátá táca vehe.

²⁸ Te ma yūhu rō coto rō ñáyuu cahni yiqui cúñu rō, chi ma cúu cahni i ánuá rō. Chi sa suhva yūhu rō jée ma stívi rō núu Yaa Dios, chi cuu snáhnú ndetū yā rohó jée quívi ánuá rō jíin yiqui cúñu rō infierno.

²⁹ Te táca saa chi tú yahu ndéé tī, chi nde uū tī jeē ñn centavo lulí. Te ni ñn tī tu nínga nuū ñūhun te núu tu jéhe Tátá rō jnūhun, chi ndíto ya tī.

³⁰ Te nagā ni cuu rohó jíjnāhan rō, chi nde ndihi ixi xíni rō je ni cahu ya.

³¹ Núu súcuan te ma yūhu rō jíjnāhan rō, chi cánuu ndasí gá rō nuū yā vésú cuehē táca saa.

*Ñayuu jejnūhún Jesucristo nuū inga ñayuu
(Lc. 12.8-9)*

³² Te táca ñayuu jeē cuajnúhún ruhū nuū inga ñayuu, suni súcuan cuajnúhún rī i nuū Tatá rī, Yaa ndeé andiví.

³³ Te táca ñayuu jeē ma cuajnúhún ruhū nuū inga ñayuu, suni súcuan ma cuajnúhún rī i nuū Tatá rī, Yaa ndeé andiví.

*Jeē siquí Jesús te cusñn ini ñayuu
(Lc. 12.51-53; 14.26-27)*

³⁴ Ma cáni ni rō jíjnāhan rō jéé véji rī jeē cóyūcu máni ñayuu ñayiví. Tú véji rī jeē

cóyūcu máni ñayuu, chi sa suhva cuajnáhan i jeē siquí ruhū.

³⁵ Chi jeē siquí ruhū te cusñn ini sehe yí jíin tátá, te sehe síhi jíin náná, te sehe jēnu jíin náná chíso.

³⁶ Chi táca ñáyuu candíje ruhū, chi jnāhan vehe i cúu jeē quití ni nuū i.

³⁷ Te núu ndé ñn ñayuu maní gā i jíin tátá i chí jíin náná i vésú jíin ruhū, nasūu ñáyuu vāha cúu i jeē cóndiquín i ruhū. Te núu ndé ñn ñayuu maní gā i jíin sehe yí i chí jíin sehe síhi i vésú jíin ruhū, te suni nasūu ñáyuu vāha cúu i jeē cóndiquín i ruhū.

³⁸ Te na-ni ñayuu núu tu jéhe i jnūhun ndoho i jnūndóho vésú nde cuu i jeē siquí jeē cóndiquín i ruhū, nasūu ñáyuu vāha cúu i jeē cóndiquín i ruhū.

³⁹ Te núu ndé ñáyuu cúni i cācu i nuū jnūndóho quiji nuū i jeē siquí ruhū, núu súcuan te jnahnū ndetū i ní cáni. Te núu ndé ñn ñayuu vésú na cúu i jeē siquí ruhū, te cotecu i ní cáni.

*Jeē iyó táhū yō nuū Yaa Dios
(Mr. 9.41)*

⁴⁰ Te ñayuu cuatáhú rōhó jíjnāhan rō, núu súcuan te ruhū cájetáhú i. Te ñayuu cájetáhú ruhū, cájetáhú i Yaa ní tají ruhū véji rī.

⁴¹ Núu na-ni ñayuu cuatáhú i ñn tēe nácani jnūhun Yaa Dios, siquí jeē jica de jniñu Yaa Dios, núu súcuan te inuú-ni coo tahú de nuū Yaa Dios jíin tēe nácani jnūhun Yaa Dios. Te núu na-ni ñayuu cuatáhú i ñn tēe ndaá, siquí jeē tēe ndaá cúu de, núu súcuan te inuú-ni coo tahú de nuū Yaa Dios jíin tēe ndaá.

⁴² Te núu ndé ñáyuu cuāha i vésú ñn ñajin ndute mjin coho ñn sūchi yāha, siquí jeē cúu i sūchi cándíje ruhū, ndaá ndije cúu jeē nihín i tahú i. Achí yá.

*Jeē ní tají Juan uū tēe nuū yā
(Lc. 7.18-35)*

11

¹ Te ná ni jínu ni ndacu Jesús jniñu nuū ndihúxi uū tēe cáscuāha jíin yá, te ni quenda ya yūcuan cuāhān yā jeē steén yā te nacani ya jnūhun táca ñuu región yūcuán.

² Te ñe Juan vecāa. Te ni nihín de jnūhun táca jniñu sáha Cristo. Te ni tají de uū tēe cáscuāha jíin de,

³ cuacajnúhún de ya:

¿A máá ní cúu Cristo jeē achí tutu jeē quíji, chí condetu yó inga tēe quíji? achí de.

⁴ Te ni cahān yā jíin de:

Cuángoo te castūhun rō nuū Juan táca jniñu cájito rō jíin jnūhun cájini rō.

⁵ Te cachi rō nuū de jeē ñayuu cuáa cánanune tinúu i, te ñayuu yacuá cánacaca i, te ñayuu ndóho cuehyí stehyú cánduvāha i, te ñayuu sohó cánanune sōho i, te ñayuu jíhi nátecu i sáha rī. Te suni nácani rī jnūhun nuū ñáyuu ndahú jéé jnama Yaa Dios i.

⁶ Te yōhyo ndetū tēe jeē ma nácani yátá ni de jeē ruhū cúu Cristo. Súcuan cachi rō nuū Juan. Achí yá jíin de.

⁷ Te náa cuanuhun ndindúú tēe ún, te ni quejéé Jesús cahán yá jnūhun Juan jíin ñáyyu:

¿Na vé ni jécondēhe ró jíjnánan ró nde nuū ñūhun téhé? ¿A ñin tēe jéni ñin jéni uū ni, nájñūhun ite jeē cánda sáha tachí?

⁸ Te núu tuú, ¿te na vé ni jécondēhe ró núu súcuan? ¿A ñin tēe cúni cújēhu jeē ñūhun sahma lúu? Tuú chi cájini rō jeē tēe cáñuhun sahma lúu, máni ini vehe rey cáyūcú de.

⁹ ¿Te na vé ni jécondēhe ró núu súcuan? ¿A ñin tēe nácani jnūhun Yaā Dios? Cahán rī jíin rō jeē suu ni jecondēhe ró, te cújēhu ga Juan yáha vēsú táca gá tēe ni canacani jnūhun Yaā Dios.

¹⁰ Chi jnūhun Juan cúu jeē ni cáhān Yaā Dios jeē yosó núu tútu i:

Tají rí tēe nacani jnūhun ri cosnūú de ichi núú Cristo,

návāha coo túhva ñayuu jeē jíin yá.

Achí Yaā Dios, achí tutu.

¹¹ Te jendaá cahán rī jíin rō jeē ini ñayiví yáha cújēhu ga Juan tēe scuándute vēsú táca gá tēe jeē ní iyo ini ñayiví. Te vēsú súcuan te táca tēe núu ga ini ñuu nuū ndácu Yaā andiví jniñu, cújēhu ga de vēsú Juan.

¹² Te nde quiví ní quee Juan tēe scuándute, te nde vijna, chí cánducú ndéyí ñáyyu quívicoo i ndaha Yaā andiví jéē ndácu ya jniñu nuū i. Te nde ñayuu xeēn cánducú ndéyí i siquí.

¹³ Chí nde ná tu quiji Juan, te ní iyo máá ley Moisés, te suni ní iyo táca tēe ni canacani jnūhun Yaā Dios. Te ní cacastuhún de ndese coo jeē ndacu Yaā Dios jniñu.

¹⁴ Te ní cacahān de jeē ndíji Elías. Te núu cácu ni rō cuatáhú ró jnūhun, te jíin rō jeē máá Juan cúu tēe jeē ní cachi tutu jeē quiji, chí cúu de nájñūhun Elías.

¹⁵ Táca róhó jéé jíni sōho, na chúsóhó ró.

¹⁶ Yáhá cachi rī ñin jnūhun yátá návāha na cúni rō ndese cúu ñayuu tiempu vijna. Cúu i nájñūhun sūchi lúlú cáñin nuū yáhu cácasiquí i. Te cácana ndee i xiní jnāhan i:

¹⁷ Ni cativi rī scuilí, te tu ní cájita jéhé ró. Te ní cajita ri yaa jeē cuihyá jíta, te tu ní cándahyū ró, achí i. Te nájñūhun cándāa sūchi lúlú un jéé tu ní núnjahan ni i ni ñin, súcuan cándāa ró.

¹⁸ Chí ní quiji Juan te cuehē jínu ní iyo ndite ni de, te ní yéji de ní tu ní jíhi de. Te tu ní cánujahan ni rō, chí ní cacahān rō jeē ñūhun tachí ini de.

¹⁹ Yūcuán na te ní quee máá rí, Yaā ní nduu tēe, te yéji rī jíhi rí, te tu cánujahan ni rō, te chísoó jnūhun ró cácahān rō jeē máni máá jéé yéji rī jíhi rí vino. Te quijnāhan rī jíin tēe cástútú xūhun renta jíin táca gá tēe cása ha cuéchi, achí ró. Te núu cúndichí ñin tēe jíin

jnūhun Yaā Dios, te jíin jniñu sáha de te nátūu jeē tēe ndichí cúu de. Achí yá.

Jeē ní cuxeēn yá nuū sava ñuu ñihni ni (Lc. 10.13-15)

²⁰ Yūcuán na te ní quejéé yá cúxeēn yá nuū táca ñuu nuū ní sáha ya cuehē jniñu jéhu, chí tu ní cáncani ni i jeē stóo i cuéchi i. Te ní cahān yá:

²¹ Nacā jeē xeēn ndoho ró, ñáyyu ñuu Corazín. Te nacā jeē xeēn ndoho ró, ñáyyu ñuu Betsaida. Chí núu ini ñuu Tiro jíin ñuu Sidón ní sáha rí jniñu jéhu jeē ní sáha rí ini ñuu máá ró, te yachí nacani ní ñayuu ñuu un jéé stóo i cuéchi i núú. Te sáha i seña jeē steén jeē nácani ní i siquí cuéchi i, chí chuhun i sahma jnúú te chuhun i yaā xiní i núú.

²² Núu súcuan te cahán rī jíin rō jeē quiví coo juicio te xeēn gā coo castigo siquí rō jíjnánan ró vēsú jeē ní iyo siquí ñuu Tiro jíin ñuu Sidón.

²³ Te róhó ñáyyu ñuu Capernaum, ¿á cájeni ní rō jeē cújēhu ró nájñūhun ñin jeē cáca cuahān ichi andiví? Tuú chí sa nanuu ró ndé lugar nuū cáyūcu ánuá ndāyí. Chí núu ini ñuu Sodoma ní sáha rí jniñu jéhu jeē ní sáha rí nuū máá ró, te coo ñuu yúcuun ndé vijna núú.

²⁴ Núu súcuan te cahán rī jíin rō jeē quiví coo juicio te xeēn gā coo castigo siquí rō vēsú jeē ní iyo siquí ñayuu ñuu Sodoma. Achí yá.

Nehen nuū rī ndetātu ró, achí yá (Lc. 10.21-22)

²⁵ Te suni quiví un ní cahān Jesús:

Na cútahū na núu ní Tátā, Jitoho andiví jíin ñayiví. Chí ní jesi ní táca jnūhun ndichí ní, jeē ma cúni ñayuu ndichí jíin ñayuu túhva cuenta ñayiví yáha. Te ní steén ní núu ñayuu cácuu nájñūhun sūchi lúlú.

²⁶ Chí súcuan ní nujnahan ni ní Tátā, achí yá.

²⁷ Te ní cahān gā yá:

Ndivíi ní jēhe Tátá rī nuū rī. Te tu cájini ñayuu ndé ñin cúu ruhū, Sēhe Yaā Dios, chí máá-ni Tátá rī cúu jeē jíin yá ruhū. Ni tu cájini ñayuu ndese Yaa cúu máá Tátá, chí máá-ni Sēhe cúu jeē jíin. Te iyo ñayuu jeē cuní máá Sēhe steén yá nuū i ndese Yaā cúu Tátá yá, te máá i suni cuní i.

²⁸ Táca ró jéé ní cuíta ró jíin táca jniñu jíin ley jeē yí sáha jíin ró, nehen quívicoo ró ndaha rí, te ndetātu ró sáha rí.

²⁹ Quiví ró núu jniñu ndácu máá rí, te scuáha ró coo ró nájñūhun iyo máá rí. Chí vitá ní rí te suchí ní rí. Te súcuan te ndetātu ró jíin ánuá ró sáha rí.

³⁰ Chí tu yí jéé cuandetū ró nuū rí, ní tú yí jéé siquí ró jniñu ndácu rí. Achí yá.

Jeē ní cataxín de yoco trigo quiví ndetātu (Mr. 2.23-28; Lc. 6.1-5)

12

¹ Te ñn quivĩ ndétātu ní yáha Jesús cuahān yā nuū cáa trigo. Te tēe cáscuáha jíin yá, cájii de sōco. Te ní quejéé de cátaxín de yoco trigo cáyeji de.

² Te ní cajito tēe grupo fariseo, te ní cacahān de jíin yá:

Condéhé, chí tēe cáscuáha jíin ró casáha de jniñu jeē tu iyó váha sáha yó quivĩ ndétātu, áchí ley Moisés.

³ Te ní cahān máa yá jíin de:

¿A tu ní cácahu ró tutu ndese ní sáha David, ñn quivĩ jeē ní jíi de sōco jíin tēe cáhiin jíin de?

⁴ Te ní quivĩ de ini vehe Yāā Dios. Te ní yeji de pan íi jeē yosó ndijin nuū Yāā Dios. Te tú na ley jeē cáji de, ní tēe cáhiin jíin de, chí máá-ni sutū cuu caji. Te vēsú súcuān te tú na cuēchi ní iyo siquĩ de.

⁵ ¿Te á tu ní cácahu ró tutu ley Moisés, ndese casájniñu sutū ini templo, vēsú quivĩ ndétātu cúu? Te tú na cuēchi iyó siquĩ de, vēsú quivĩ ndétātu casájniñu de jniñu jeē cácuu de sutū.

⁶ Te cáhān rí jíin ró jeē máa rí jeē iyó yáha, cújéhu ga rí vēsú templo.

⁷ Te tu cájecūhun ní rō jíjnāhan ró jnūhun yáha jeē yosó núu tútu íi jeē ní cahān Yāā Dios: Jeē cuní gā rí cúu jeē cundáhú ní rō jnāhan ró, vēsú jeē socó ró quití nuū rí, achí yá. Te núu jeē ní cajecūhun ní rō jnūhun yáha, te ma cahān ró súcuān siquĩ tēe jeē tú na cuēchi núu.

⁸ Chí ruhū, Yāā ní nduu tēe, máa rí cúu jeē ndácu jniñu siquĩ ndese sáha ñayuu quivĩ ndétātu, áchí yá.

*Jeē ní nduvāha tēe ní ichĩ ndaha
(Mr. 3.1-6; Lc. 6.6-11)*

⁹ Yūcuān na te cuahān Jesús, te ní quivĩ ya ini vehe íi sinagoga.

¹⁰ Te yūcuān íne ñn tēe ní ichĩ ñn ndaha de. Te cácuñi tēe grupo fariseo jeē ñiñn de cuēchi siquĩ yā, te ní cacajñuhún de ya:

¿A iyó ley jeē cuu nasávāha yó ñayuu cuhú quivĩ ndétātu? áchí de.

¹¹ Te ní cahān yā jíin de:

¿Ndé ñn róhó, núu névāha ró ñn lanchi, te núu nínga tí ini ñn yaū quivĩ ndétātu, te á tu jéhén ró natava ró tí, chí naún?

¹² ¿Te á tu cánuú ndasí gá ñn tēe vēsú ñn lanchi? Núu súcuān te vetū-ni sáha yó jniñu váha quivĩ ndétātu, áchí yá.

¹³ Yūcuān na te ní cahān yā jíin tēe ní ichĩ ndaha ún:

Scáá ndaha ró.

Te ní scaá de, te ní nduvāha-ni nájnūhun iyó inga.

¹⁴ Yūcuān na te ní quendacoo tēe grupo fariseo, te ní candajñuhún de siquĩ Jesús, ndese cahni de ya.

Jnūhun Jesús jeē ní cahān Isaías nde jehahān

¹⁵ Te ní jini Jesús jeē súcuān cájeni ní de, te ní quenda ya yūcuān cuahān yā. Te cuehé ñayuu cándiquín í ya. Te ní nasávāha ya ndiñi ñayuu cuhú.

¹⁶ Te ní ndacu ya jniñu nuū í jeē ma stéén í ya.

¹⁷ Te súcuān ní cuu návāha squícu jnūhun ní cahān Yāā Dios siquĩ Jesús, te ní nacani Isaías jnūhun ya un ndé jehahān:

¹⁸ Yáha cúu mozo rí jeē ní nacāji rí, te maní rí jíin yá, te cúsi ní rí jíin yá.

Te cuāha rí Espíritu rí coo jíin yá.

Te máa yá sándaā jniñu ñayuu táca nación.

¹⁹ Ma tejnāhan ya, ní ma cána jee ya,

te ní ma cahān jee ya ichi jeē cúni ñayuu.

²⁰ Ma sáha xeēn yā jíin ñayuu ní cunñiñ jnūndóho siquĩ,

ní ma snáā yā ñayuu jeē máa lulí-ni cácañdije. Chí cújéhu ya siquĩ ndiñi, te ndaā ndacu ya jniñu.

²¹ Te ñayuu táca nación cocuhun ní í jeē jnáma ya í.

Achí Yāā Dios, achí Isaías nde jehahān.

Jeē ní cacahān de jeē jejniñu ya fuerza Satanás

(Mr. 3.19-30; Lc. 11.14-23; 12.10)

²² Yūcuān na te ní caquindeca í nuū yā ñn tēe cuáá ñiñn, chí ñūhun tachí ini de. Te ní nasávāha ya de. Te ní ndundijin tinūú de te ní nacahān de.

²³ Te ndiñi ñayuu cuehé un ní canaa ní í cájito í, te ní cacahān í:

¿A tēe yáha cúu jeē ní cahān Yāā Dios jeē cacu nuū yucūn David? áchí í.

²⁴ Te tēe grupo fariseo, ní cajini de jeē súcuān cacahān í. Te ní cacahān de:

Tēe yáha ma cúu quenehen de tachí núu jeē tu sáha de jíin fuerza Satanás jeē cújéhu nuū tachí, áchí de.

²⁵ Te Jesús ní jini yā jeē súcuān cájeni ní de, te ní cahān yā jíin de:

Táca nación jeē casásñn máa te cájejnāhan máa, núu súcuān te snáā jeē iyó váha máa. Te núu ñn ñuu chí ñn vehe casásñn máa te cájejnāhan máa, te ma cúu ga coyūcu cáhnu.

²⁶ Te suni súcuān Satanás núu quenehen jnāhan tachí, núu súcuān te sásñn máa. ¿Te ndese cuiñi ñiñn Satanás jeē ndácu jniñu núu súcuān?

²⁷ Chí cacahān ró jeē jíin fuerza Satanás quenehen rí tachí. Te núu súcuān cúu núú, te ñayuu cascuáha jíin máa ró jíjnāhan ró, ¿na jíin fuerza cáquenehen máa í tachí, cájeni ní ró? Núu súcuān te máa í jíjnāhan í cachi jeē ní castíví ndasí suhva ró ní cacahān ró jeē cáquenehen rí tachí jíin fuerza Satanás.

²⁸ Te tuú chí sa jíin Espíritu Yāā Dios cúu jeē quenehen rí tachí. Núu súcuān te je ndéé Yāā Dios mēñu ró jeē ndácu ya jniñu.

²⁹ ¿Chí ndese cuu quivĩ ñn tēe ini vehe tēe ndacuú jeē quenehen de ndajniñu de? Chí

cánuú jeē xíhna gā cuhni de tēe ndacuī ún, te yūcuán na te cuu quenehen de ndajnífu ún. Te suni súcuan cúu jeē jíhni rī Satanás te quénehen rī tachī.

³⁰ Te ñayuu tu iyó mání jíin rí, núu súcuan te jíto uhú i ruhú. Te ñayuu tu nástútú jíin rí, núu súcuan te sa jéte núu i ñayuu vējicoo nuū rī.

³¹ Jeē yúcuan cáhán rī jíin ró: Iyó modo coo jñuhun cáhnu ni nuū táca cuéchi cásaña ñayuu, jíin núu táca jñuhun neé cácahán i. Te núu cahán ndeváha i siquī Espírítu Santo, te ma cóne cáhnu ni Yaā Díos nuū i.

³² Te núu na-ni ñayuu cahán i siquī ruhú, Yaā ní nduu tēe, cuu cone cáhnu ni Yaā Díos nuū i. Te núu na-ni ñayuu cahán ndeváha i siquī Espírítu Santo, ma cóne cáhnu ni Yaā Díos nuū i, ni jeē iyó i ñayví yáha, ni náf tiempo quíji.

*Jñuhun yujnu váha jíin yujnu eé
(Lc. 6.43-45)*

³³ Núu yujnu váha, te váha ndehē, te núu yujnu neé, te cánée ndehē. Chi jíin ndehē te jíin yō ndese yujnu cúu. Te suni súcuan ñayuu.

³⁴ Va sēhe coō cácuu ró, chi xeēn rō nájñuhun coō. ¿Ndeese cuu cahán rō jñuhun váha, chi ñayuu cásaña neé cácuu ró? Chi jñiñu jeē jéni ni anuá ñayuu, mání yúcuan cáhán i.

³⁵ Tēe váha cáhán de jñuhun váha, chi iyó ndáa anuá de. Te tēe sáha neé cáhán de jñuhun neé, chi cánée ánuá de.

³⁶ Te cáhán rī jíin ró jeē táca na-ni jñuhun cácahán ñayuu, nacuaña i cuenta jñuhun un quíví coo juicio.

³⁷ Chi jíin jñuhun ni cahán rō sándaá yā siquī rō, núu jeē quéndōo ndaa rō chí jéé cóndee cuéchi siquī rō. Achí yá.

Jeē ní cajicán ñayuu tu cácañdije in jñiñu jéhnu

(Mr. 8.12; Lc. 11.29-32)

³⁸ Yūcuán na te jecu tēe grupo fariseo jíin tēe cástéén tutu ley Yaā Díos, ni cacahán de jíin yá:

Maestro, cácuu ni jéé sáha ní in jñiñu jéhnu jeē steén núu máá ní cúu Yaā ní tají Yaā Díos, achí de.

³⁹ Te ni cahán yā jíin de:

Ñayuu yáha jeē casáha jñiñu neé, tu cájetáhu cuíti i Yaā Díos. Te cájicán i in jñiñu jéhnu jeē steén núu Yaā ní tají Yaā Díos cúu rí. Te tuá na inga jñiñu jéhnu steén rí nuū i, chí máá-ni jñiñu jéhnu nájñuhun ni cuu jíin Jonás, tēe ni nacani jñuhun Yaā Díos.

⁴⁰ Chí nájñuhun ni ine Jonás chíji chácá cáhnu uní nduú uní ñuú, suni súcuan ruhú, Yaā ní nduu tēe, cuu rí te cone rí chíji ñuhun uní nduú uní ñuú, te sáa te natecu rí.

⁴¹ Te táca ñayuu ñuu Nínive nuū ní nacani Jonás jñuhun, natecu i jíin ñayuu tiempo

yáha, quíví juicio jeē sándaá yā cuéchi, te cahán i cuéchi siquī ñayuu yáha. Chí máá i ni canacani ni i ni castóo i cuéchi i quíví ní nacani Jonás jñuhun nuū i. Te vijna chí cújéhnu ga ruhú Yaā íne yáha vésú Jonás, te tu cácañdije rō ruhú.

⁴² Te reina jeē ní cújéhnu nación ichi sur, natecu ña jíin ñayuu tiempo yáha, quíví juicio jeē sándaá yā cuéchi, te cahán ña cuéchi siquī i. Chí nde jíca téyí ní quíji ña ni jini nahín ña jñuhun ndíchí ní cahán rey Salomón. Te vijna chí cújéhnu ga ruhú, Yaā íne yáha vésú Salomón, te tu cácañdije rō ruhú.

*Tachí jeē nástútú jñahan ndíví ini ñayuu
(Lc. 11.24-26)*

⁴³ Núu ni quenda in tachí ini in tēe tu cándije, te jíca cuu nuū ñuhun téhé, ndúcú núu ndétátú, te tu níhín, yūcuán na te jéni ni maá:

⁴⁴ Na quínuhun rī vehe nuū ní quenda rí. Te núu ni ndee tucu, te jíto jeē tēe tu cándije ún, cúu de nájñuhun in vehe íyú te ni ndundoo.

⁴⁵ Yūcuán na te jéquiñ uxā gā tachí neé gá vésú maá. Te quívicoo ini tēe un jéé cóyūcu yúcuan. Núu súcuan te xeēn gā ndoho tēe un jéé sándihí vésú jeē xíhna ñuhún. Te suni súcuan ndoho ñayuu tiempo yáha jeē casáha neé. Achí yá.

Náná yā jíin ñani yā

(Mr. 3.31-35; Lc. 8.19-21)

⁴⁶ Te níni súcuan cáhán yā jíin ñayuu ún, te ni quee naná yā jíin táca ñani yā, in ña nuū quéhe, te cúní ña cahán ña jíin yá.

⁴⁷ Te ni cachi in tēe nuū yá:

Náná ni jíin táca ñani ni cáhín nuū quéhe, te cácuu cahán jíin ní, achí de.

⁴⁸ Te ni cahán yā jíin tēe ni cahán súcuan jíin yá:

¿Ndé in cúu náná rí, te ndé in cácuu ñani rí? Achí yá.

⁴⁹ Te ni steén ndaha yá nde nuū cáyūcu tēe cácuáha jíin yá. Te ni cahán yá:

Suni náná rí jíin ñani rí cácuu táca jéé yáha.

⁵⁰ Chí táca ñayuu casquicu jñiñu cúní maá Táta rí, Yaā ndeé andiví, suu cácuu ñani rí, cuáha rí, náná rí. Achí yá.

*Jñuhun yátá siquí tēe jéte trigo
(Mr. 4.1-9; Lc. 8.4-8)*

13

¹ Te quíví un ní quenda Jesús vehe cuahán yá, te ni jíin yá ni cucóo ya yumar.

² Te ni cutútú cuéhē ndasí ñayuu nuū yá. Te ni quíví ya in in barco, ni cucóo ya. Te táca ñayuu un cáyūcú i yumar.

³ Te jíin jñuhun yátá ni cahán yá cuehé jñuhun nuū i, te súcuan ni cahán yá:

In tēe cate trigo, ni quenda de jeé cate de.

⁴ Te ná ni quejéé de jéte de, te jecu trigo ni jité yuhíchi. Te ni quecoo saa, ni cayejí tí.

⁵ Te jecu gā trigo ni jītē nuū ñuhun yuū, nuū tú cuehē ñuhun. Te yachī-ni ni cane, chí tu cóquin ñuhun.

⁶ Te nuū ní cane niāndii, te ni ichī-ni, te ni casun, chí tu ní nínín nuū quihín yoho.

⁷ Te jecu gā trigo ni jītē nuū náne iñu. Te ni jehnu iñu ún, te ni jesi nuū.

⁸ Te jecu ni jītē nuū ñuhun váha, te ni jēhe cuehē nunī. Sava ni jēhe ciento jeē ñin ñin, te sava ni jēhe unī xico, te sava ga ni jēhe ocó uxī.

⁹ Táca róhó jéē jíni sōho, na chúsóhó ró. Achí yá.

*Najehē cahán yā máni jñuhun yátá
(Mr. 4.10-12; Lc. 8.9-10)*

¹⁰ Yūcuán na te tēe cáscuáha jíni yá un ní quecoo de nde nuū yá, te ni cacajñuhún de ya:

¿Najehē cúu jeē máni jñuhun yátá cáhán ni jíni ñáyuu? achí de.

¹¹ Te ni cahán yā jíni de:

Róhó jíjnáhan ró chí sáha ya jeē cájecūhun ni ró jñuhun ni yisáhi yáha, ndese quivícoo ñayuu ndaha Yaā andiví jeē ndacu ya jniñu nuū i. Te ñayuu yáha jéē tu cácondije, chí ma jécūhun ni i.

¹² Chí ñayuu je jécūhun ní, chí stéén gā yá nuū i, te vihyá gā cuni i. Te ñayuu tu cándije, sa suhva naa jecu jeē je jíni i ún.

¹³ Jeē yúcuán cáhán rī jñuhun yátá jíni i. Chí vésú cájito i, te quendōo i nájñuhun jeē tú na vé ní cájito i. Te vésú cájini sōho i, te ma jécūhun ni i, te quendōo i nájñuhun jeē tú na vé ní cájini i.

¹⁴ Ñayuu yáha chí squicu siquī i jñuhun ni cahán Yaā Dios jeē ní nacani Isaiás, tēe ni nacani jñuhun nde jenahán:

Vésú cuni nahín ró, te ma jécūhun ni ró, te vésú coto ró, te ma nácu ni ró.

¹⁵ Chí ñayuu yáha yōhyo ni ndunīhni ni i,

te yōhyo uhū chusóhó i,
te nájñuhun cájesi i tinūú i,
návāha coo nájñuhun jeē tu cájito i,
ni tu cájini nahín i,
te ni ma jécūhun ni i,
ni ma násama ini i quivícoo i nuū rī
jeē nasávāha ri anuá i nuū cuéchi i.
Achí Yaā Dios, achí tutu.

¹⁶ Te máá ró jíjnáhan ró, yōhyo ndetū ró, chí cájito ró jíni tinūú ró, te cájini nahín ró jíni sōho ró.

¹⁷ Chí jendaá cahán rī jíni ró jeē cuehē tēe ni canacani jñuhun Yaā Dios jíni cuehē tēe ndaá, ni cacuni de coto de jeē cájito máá ró, te tu ní cájito de. Te suni ni cacuni de cuni sōho de jeē cájini sōho máá ró, te tu ní cájini de. Achí yá.

*Jeē ní castūhun cájī yá jñuhun yátá tēe jéte trigo
(Mr. 4.13-20; Lc. 8.11-15)*

¹⁸ Núu súcuán te cuni nahín jíjnáhan ró na vé cuni cahán jñuhun yátá tēe jéte trigo: Trigo un cúu jñuhun Yaā Dios.

¹⁹ Te ñayuu cájini sōho jñuhun ndese ndácu Yaā andiví jniñu, núu tu cájecūhun ni i te cácuu i nájñuhun trigo jeē ní jítē yuhíchi. Yūcuán na te quíji jexeén te quénde-ni jñuhun ini anuá i.

²⁰ Te trigo jeē ní jítē nuū ñuhun yuū cúu nájñuhun ñayuu cájini sōho jñuhun, te yachī-ni cájetáhú i te cácuuñ ni i jíni.

²¹ Te tu cúcutú jñuhun ún ini anuá i, te jecu-ni quiví cájetáhú i. Te núu ni quejéé jñúndóho, chí jito xēén ñayuu i siquī jñuhun ún, te quejéé nácani yátá ni i.

²² Te jeē ní jítē nuū náne iñu cúu ñayuu cájini nahín jñuhun, te cándihvī ni i siquī jeē iyó ini ñayvī yáha, te cúní i cucúca i, te stáhú un i cujnēñu i jíni. Te ndihi jeē yáha jési nuū jñuhun ya, te tu íje i jíni jñuhun ya.

²³ Te trigo jeē ní jítē nuū ñuhun váha cúu nájñuhun ñayuu cájini nahín jñuhun, te cájecūhun ni i, te cáhije i jíni jñuhun ya. Te sava i cúu nájñuhun nuní jeē jéhe ciento jeē ñin ñin, te sava ga i jéhe unī xico, te sava ga i jéhe ocó uxī. Achí yá.

Jñuhun yátá siquī ite lasú

²⁴ Te ni cahán yá inga jñuhun yátá jíni de:

Jeē ndácu Yaā andiví jniñu cúu nájñuhun ñin tēe jeē ní jete de trigo váha nuū ñuhun de.

²⁵ Te iyó ñin tēe jito uhū de tēe chíi trigo. Te náa cáquixī tēe chíi trigo jíni táca jnáhan de, te ni jehēn ni jete ndiquin lású nuū trigo de, te cuahán.

²⁶ Te nuū ní cane trigo ún, te ni cane yoco i, te suni súcuán ni jehnu ite lasú un.

²⁷ Yūcuán na te ni jengoo mozo ni cacahán i jíni patrón i: ¿A násuu trigo váha ní jéte ní núu ñuhun ní? ¿Te ndese cúu jeē ní canecoo ite lasú nuū?

²⁸ Te ni cahán de jíni i: ñin tēe jito uhū ruhū ni sáha jeē yáha. Te ni cacahán mozo un jíni de: ¿Núu súcuán te á cúní ní jéē na quíngoo ná te jñuhun ná? achí i.

²⁹ Te ni cahán de: Tuú, chí núu jñuhun ró lású un te sanaa te jñuhun ró ndé jíni trigo.

³⁰ Váha ga na cuéhnu máá ndé quiví tahndé. Te quiví un cáhán rī jíni tēe cahnde jeē xihna gā ite lasú cahnde de, te chucú tūtú de návāha cahmu yó. Yūcuán na te trigo chí cahnde de ndiví ini yacá rī, achí de. Achí yá.

*Jñuhun yátá siquī ndiquin mostaza
(Mr. 4.30-32; Lc. 13.18-19)*

³¹ Te suni ni cahán yá inga jñuhun yátá jéē steén yá ndese ndúcuehē ñayuu ndácu Yaā andiví jniñu nuū:

Ndúcuehē i nájñuhun jéhnu ñin ndiquin mostaza jeē ní jequin ñin tēe nuū ñuhun de.

³² Te jendaá jeē ñin ndiquin lúli gá cúu vésú táca gá ndiquin. Te núu ni jehnu, te cúu cáhnu ga vésú táca gá yucú, chí ndúu

nájñuhun ìn yujnu. Te quíjicoo saa, te cásáha tí tacá tí chíji ndaha ún. Achí yá.

*Jñuhun yátá síquī levadura
(Lc. 13.20-21)*

³³ Te inga jñuhun yátá ní cahān yā jíin de:

Jeē ndácu Yaā andiví jñiñu nuū ñáyuu cúu nájñuhun levadura jeē ní quihñ ìn ñahan. Te ní saca ña jíin ún kilo harina, nde ní ndaa ndihí ñujen ní sáha. Achí yá.

*Jeē máni jñuhun yátá cáhán yā jíin i
(Mr. 4.33-34)*

³⁴ Tāca jñuhun yáha ní cahān Jesús jíin ñáyuu cuehē ún. Te tāca jéē ní stéén yā, máni jñuhun yátá ní cahān yā jíin i.

³⁵ Súcuān ní sáha ya návāha squícu jñuhun ní cahān tēe ní nacani jñuhun Yaā Dios nde jenahán:

Cahān rī tāca jñuhun yátá jíin ñáyuu, te cachí rī tāca jñuhun yísahí ndé quiví ní jecōo ñayiví.

Achí tutu, áchí yá.

Jeē ní castūhun cájí yá jñuhun ite lasú

³⁶ Yūcuán na te ní nacuatáhú Jesús nuū ñáyuu. Te ní ndívi ya ìni vehe. Te tēe cáscuáha un ní jinūcoo de nuū yā, te ní cacahān de jíin yá:

Nacani cájí ní jñuhun yátá ite lasú nuū ná, áchí de.

³⁷ Te ní cahān yā jíin de:

Jeē jéte trigo vāha un cúu máá rí, Yaā ní nduu tēe.

³⁸ Te ñuhun un cúu ñayiví. Te trigo vāha un cúu ñayuu cáyihí ndaha Yaā Dios jeē ndácu ya jñiñu nuū i. Te ite lasú un cúu ñayuu cáyihí ndaha jexeén.

³⁹ Te tēe jíto uhū jeē ní jete lasú un cúu máá jexeén. Te quiví tahndé cúu quiví jínu ñayiví. Te tēe cahnde un cácuu ndajéhé Yaā Dios.

⁴⁰ Te nájñuhun tahndé ite lasú te cayū nuū ñuhún, súcuān coo quiví jínu ñayiví.

⁴¹ Chí máá rí, Yaā ní nduu tēe, tají rí ndajéhé rī quingoo. Te nastútú yá tāca ñáyuu casquíví jñahan nuū cuéchi, jíin ñáyuu casáha jñiñu néé, quenehen ya i mēhñu ñáyuu ndácu rí jñiñu nuū.

⁴² Te jnaa ya i cayū i nuū ñuhún. Te yūcuān ndáhyū i te nacayihí yuhu i jeē ndoho xeēn i.

⁴³ Yūcuán na te ñayuu squícu nuū yā chí ndindéé i nájñuhun niāndii, te coyūcú i nuū ndácu máá Tátá i jñiñu. Tāca róhó jéē jíni sōho, na chúsóhó ró.

Jñuhun yátá síquī yejñú xūhún jeē yísahí

⁴⁴ Te jeē ndácu Yaā andiví jñiñu nuū ñáyuu, suni cúu nájñuhun ìn yejñú xūhún jeē yísahí chíji ìn ñuhun. Te ní nanihñ ìn tēe, te ní nacasi tucu de síquī. Te jeē cúsi ní de jíin, te ní jehēn de ní xícó ndihí de jeē névāha de, te ní jeen de ñuhun ún.

Jñuhun yátá síquī perla jeē ndeé yahu

⁴⁵ Te jeē ndácu Yaā andiví jñiñu nuū ñáyuu, suni cúu nájñuhun ìn tēe jéen xíco, te ndúcú de perla vāha.

⁴⁶ Te ní jini de ìn perla jeē yáhu ndasi, te ní jehēn de ní xícó ndihí de jeē névāha de, te ní jeen de perla un.

Jñuhun yátá síquī ñunu jñí chācá

⁴⁷ Te jeē ndácu Yaā andiví jñiñu nuū ñáyuu, suni cúu nájñuhun ìn ñunu jeē cásingava de ìni mar, te quívicoo ndinuū chācá.

⁴⁸ Te núu ní chítú ñunu ún, te cánavata de yundúte. Te cácucoo de cānacāji de chācá. Te chācá vāha cájnaa de ìni jíca, te chācá tú vāha cáscāne de.

⁴⁹ Te suni súcuān coo quiví jínu ñayiví. Chí quijicoo ndajéhé yā, te sásín ya ñayuu casáha jñiñu néé mēhñu ñáyuu casáha jñiñu vāha.

⁵⁰ Te ñayuu cunéé chí jnaa ya i cayū i nuū ñuhún. Te yūcuān ndáhyū i te nacayihí yuhu i jeē ndoho xeēn i. Achí yá.

Jñuhun yátá síquī ndajñiñu ndeé yahu

⁵¹ Te ní cajñuhun yá de jíinánah de:

¿A ní cajecūhun ní rō tāca jñuhun yáha, chí tuú? áchí yá.

Te ní cacahān de jíin yá:

Ní cajecūhun ní ná, áchí de.

⁵² Te ní cahān yā jíin de:

Iyó vāha núu súcuān. Te ìn tēe stéén tutu ley Yaā Dios, núu je ní cutūhva de ndese ndácu Yaā andiví jñiñu, te cuu stéén de tāca jñuhun síquī ún. Chí cúu de nájñuhun ìn tēe chíí vehe. Te ìni yejñú de táva de ndajñiñu ndeé yahu, sava jeē jeē jíin sava jeē je ní cunahán iyó. Achí yá.

Jeē cuánuhun yā ñuu Nazaret

(Mr. 6.1-6; Lc. 4.16-30)

⁵³ Te ná ní ndihí ní cahān Jesús tāca jñuhun yátá yáha, te ní quenda ya yūcuān cuáhān yā.

⁵⁴ Te ní najinū yā ñuu yā Nazaret. Te ní stéén yā jñuhun ìni vehe ìi sinagoga yūcuān. Te ní canaa ní ñayuu cájini nahín i, te ní cacahān i:

¿Ndeé nuū ní cutūhva tēe yáha tāca jñuhun ndíchí? ¿Te ndese cúu sáha de táca jñiñu jéhu yāhā?

⁵⁵ Chí sēhe carpintero cúu tēe yáha, te náná de cúu María, te ñani de cácuu Jacobo, José, Simón, jíin Judas.

⁵⁶ Te suni cáyūcu cuáha de jíin yó yāhā. ¿Te ndese jíni de tāca jñuhun yáha núu súcuān? Achí ñayuu.

⁵⁷ Te súcuān ní cacujéé ní i nuū Jesús. Te ní cahān yā jíin i:

Tāca tēe nācani jñuhun Yaā Dios, iyó yífūhún ñayuu jíin de, te máni ñayuu ñuu máá de jíin ñáyuu vehe máá de cúu jeē tu iyó yífūhún jíin de. Achí yá.

⁵⁸ Te tu ní sáha ya cuehē jniñu jéhnú yúcuán, chí tu cácadnje i ya.

*Jeē ni jīhī Juan tēe scuándute
(Mr. 6.14-29; Lc. 9.7-9)*

14

¹ Te tiempo yúcuán te Herodes, tēe ndácu jniñu región Galilea, ni jini jñuhun de jñuhun Jesús.

² Te ni cahān de jín ñayuu cáhīn jín de:

Tēe yúcuán cúu Juan tēe ni scuándute, te ni natecu de. Jeē yúcuán iyó poder de sáha de jniñu jéhnú. Achí de.

³ Chí Herodes, je ni ndacu de jniñu jeē na quívi Juan vecāa, jín jēe na cónuhnī de jín cadena. Súcuán ni sáha de jeē siquí Herodías, ñasihí ñani de Felipe.

⁴ Chí Juan ni cahān de nuū Herodes:

Tu iyó ley condeca ró ña, áchí de.

⁵ Te jeē yúcuán ní cuni Herodes cahni de Juan. Te yúhú de jeē quívi ni ñayuu, chí ndihí i jéni ndije ni i jeē ñn tēe nácani jñuhun Yāa Dios cúu Juan.

⁶ Te ñn quívi ni sáha Herodes ñn vico quívi ní cacu de. Te sēhe síhí Herodías ni quívi i ní jita jéhé i nuū ñayuu ní cana de ún. Te ni cusī ñ Herodes ni sáha i.

⁷ Te ni jejnūhun téyí de jeē cuáha de núu na vé cacān i nuū de.

⁸ Te ni jehēn i ni cajñuhún i náná i na vé cacān i. Te ni ndívi i nuū Herodes, te ni cahān i:

Cuáha ní xíní Juan tēe scuándute, cone nuū ñn cohō, achí i.

⁹ Yúcuán na te rey Herodes ni cucuíhyá ni de. Te siquí jeē ni jéjnūhun téyí de, jín jēe ní cajini sóho tēe cayeji staā jín de, jeē yúcuán ni ndacu de jniñu jeē na cuáha nuū i.

¹⁰ Te ni tají de soldado jeē na quícahnde xiní Juan ini vecāa.

¹¹ Te ni quee soldado un jín xíní Juan, íne nuū ñn cohō, te ni jēhe nuū súchi síhí un. Te máá i ni jendeca i nuū naná i.

¹² Yúcuán na te ni jengoo tēe cáscuáha jín Juan, te ni candonehen de yíqui cúñu Juan, te ni cachindúji de. Yúcuán na te ni jengoo de ni cacastūhún de nuū Jesús.

*Jeē ni scáji yā uhūn mil tēe
(Mr. 6.30-44; Lc. 9.10-17; Jn. 6.1-14)*

¹³ Te ná ni jini Jesús jñuhun, te ni cujiyo ya yúcuán cuáhān yā jín barco, jeē cóne sín ya ñn lugar nuū tú ñayuu. Te ni cajini ñayuu jeē cuahān yā. Te táca ñuu ni quendacoo i cájica jéhé i, cuajnahān i ya.

¹⁴ Te nuū ní quenda Jesús ini barco, te ni jito ya ñayuu cuehē ún. Te ni cundáhú ní yā i, te ni nasávāha ya táca ñayuu cácuñu jeē véjicoo i jín.

¹⁵ Te nuū ní ini, te tēe cáscuáha jín yā, ni quecoo de nuū yā, te ni cacahān de:

Je ni ini, te yāhá chí tú na ñayuu yúcu. Núu súcuán te tají ní ñayuu na quíngoo i táca ñuu, te cuaan i jeē cáji i.

¹⁶ Te ni cahān Jesús jín de:

Tu jini ññuhún quíngoo i, chí cuáha máá ró jeē cáji i, áchí yā.

¹⁷ Te ni cacahān de jín yā:

Tú na vé cánevāha ná yāha, chí uhūn-ni staā jín úu-ni chácá, áchí de.

¹⁸ Te ni cahān yā jín de:

Cuáha na quíji, áchí yā.

¹⁹ Te ni cahān yā jín ñayuu un jēe na cúcōo i nuū íte. Te ni quihin ya ndihūhún staā jín úu chácá un. Te ni ndacoto ya ichi ándiví, te ni nacuatáhú yā. Te ni tahú cuechí yā staā ún, te ni jēhe ya nuū tēe cáscuáha jín yā. Te máá de ni casaja de nuū ñayuu cuehē ún.

²⁰ Te ndívi i ni cayeji, te ni candutú chíji i. Te ni canastútú de pedazo jeē ní quendōo, te ni chítú úu jica.

²¹ Te tēe ni cayeji un cúu nájnūhun uhūn mil, te sín ga cúu ñahan jín súchi lúlí.

*Jeē ní jica jéhé yā nuū mar
(Mr. 6.45-52; Jn. 6.16-21)*

²² Yúcuán na te ni cahān-ni Jesús jín tēe cáscuáha jín yā jeē na quívicoo de barco, te cosnū de quíngoo de nde inga lado mar, níni jēe nátají yā ñayuu un quíngoo i.

²³ Te nuū ní cuu ni nacuatáhú yā nuū i, te máñuhún-ni ya ni caa ya yucu, cuacacān tahú yā. Te ni cuaa, te íne máñuhún yā yúcuán.

²⁴ Te barco un, je ni cuu sava nuū mar cuahān. Te ndute mar un nátundahá níhin barco, chí vēji tachí ichi núu de.

²⁵ Te jeē yínee gā ni quee Jesús nuū de, jica jéhé yā nuū mar.

²⁶ Te tēe cáscuáha ún, ni cajito de ya jeē jica ya nuū mar. Te ni candondava de, te ni cacana cóho de jeē cáyuhú de.

Jíhná cúu, áchí de.

²⁷ Te ni cahān-ni Jesús jín de:

Ndeyí coo ni rō, te ma yūhu ró, chí máá rí cúu, áchí yā.

²⁸ Yúcuán na te ni cahān Pedro jín yā:

Núu máá ní cúu, te cahān ni jín ná jēe na cáca jéhé ná nuū mar te jeē na nuū ní, áchí de.

²⁹ Te ni cahān yā:

Nehen núu súcuán, áchí yā.

Te ni quenda Pedro ini barco, te ni jica de nuū ndúte cuahān de nuū Jesús.

³⁰ Te nuū ní jini de jeē níhin yáhi tachí, te ni yúhú de. Te ni quejé de queé de chíji ndute. Te ni cana cóho de:

Jnama ní sáña, áchí de.

³¹ Te Jesús ni jñi-ni ya ndaha de. Te ni cahān yā jín de:

Tēe tu cándje níhin cúu ró. ¿Naun ni nayūhu ró? Achí yā.

³² Te ni quívi ya ini barco un jíin de, te ni jecuíñi-ni tachí.

³³ Yücuán na te tēe cáhiin ini barco un, ni cajecuíñi yití de nuū yā. Te ni cacahān de:

Jendaá ndije jeē Sēhe Yaā Dios cúu ní, áchí de.

Jeē ní nasávāha ya ñayuu cácuñi región Genesaret

(Mr. 6.53-56)

³⁴ Te ni quenda jíyo ya jíin de nuū mar un, ní jinū yā región Genesaret.

³⁵ Te ñayuu yücuan ní canacuni i ya. Te ni cascáca i jñuhun táca ndañúñ yücuan jéē ní jinū yā. Te ñayuu ni caquindeca i ñayuu cácuñi nuū yā.

³⁶ Te ni cacahān ndahú i jíin yā jeē na quéhé i vésú yusáhma ya. Te táca ñáyuu jeē ní caquehé sahma ya, ni canduvāha i.

Siquí ndese cújnehén ñáyuu
(Mr. 7.1-23)

15

¹ Yücuán na te jecu tēe grupo fariseo jíin tēe cástéén tutu ley Yaā Dios, ni quendacoo de ñuu Jerusalén, te ni quecoo de nuū yā. Te ni cacahān de jíin yā:

² Tēe cáscuáha jíin ró, ¿naun cástívi de costumbre jeē ní cajequin ñayuu jenahán? Chi tu ní cáscuicu de costumbre jeē nándahá de nuū yā te caji de staā. Achí de.

³ Te Jesús ni cajñuhun yā de:

Te máá ró jijnáhan ró, ¿suni naun cástívi ró jniñu ní ndacu Yaā Dios nuū ró? Chi sa costumbre máá ró cúu jeē casquico ró.

⁴ Chi ni cahān Yaā Dios: Coó yíñuhún ró jíin tátá ró jíin náná ró. Te núu ndé ñin cahān siquí tátá chí siquí naná, na cúu nahín, áchí Yaā Dios.

⁵ Te máá ró chí cácahān ró jeē cuu cahān ñin tēe jíin tátá de jíin náná de: Ma cúu chindéé ñáhán ná níhín cuáha na jéē cáji ní jéē cúhun ní, chí ndihi jeē névāha ná, je ní socó na núu Yaā Dios.

⁶ Te tēe cahān súcuan, tuá cánuú chindéé ñáhán de tátá de náná de, áchí ró jijnáhan ró. Te súcuan cástívi ró jniñu ní ndacu Yaā Dios, jeē siquí costumbre ní cajequin máá ró.

⁷ Tēe stáhú-ni cácuu ró. Ndaā ni nacani Isaías jñuhun siquí ró nde jenahán, yósó núu tútu ñi jeē ní cahān Yaā Dios:

⁸ Ñayuu yáha chí máá yuhu-ni i cájetáhú i ruhū,
te nasūu ndé jíin ini jíin ánuá i.

⁹ Te cáchiñuhún sáá-ni i ruhū, chí jñuhun cástéén i cúu jniñu ní candacu tēe, te nasūu jéē ní ndacu máá rí cúu. Achí Yaā Dios. Achí yā.

¹⁰ Te ni cana ya ñayuu cuehē ún, te ni cahān yā jíin i:

Cuni sōho vāha jijnáhan ró, te chuhun ni ró:

¹¹ Nasūu jéē quívi ini yuhu ñayuu cujnehén i sáha. Chi jñuhun jeē quenda yuhu i, yücuan cúu jeē cujnehén i sáha, áchí yā.

¹² Yücuán na te tēe cáscuáha jíin yā, ni quecoo de nuū yā, te ni cacahān de:

¿A jíin ní jéē ní caquiti ní tēe fariseo jeē ní cajin sōho de jñuhun ni cahān ní? áchí de.

¹³ Te ni cahān máá yā:

Cácuu de nájñuhun yujnu jeē tu ní náchuhun Tátá rí, Yaā ndeé andiví, te ñin quívi te jñuhun ya quihín.

¹⁴ Na quíngoo máá de. Chi cácuu de nájñuhun tēe cuáá cástéén ichi nuū inga tēe cuáá. Chi núu ñin tēe cuáá stéén de ichi nuū inga tēe cuáá, te ndindúú de ninga de xehvā. Achí yā.

¹⁵ Te ni cahān Pedro jíin yā:

Castuhun cáji ní jñuhun yátá yáha nuū na jijnáhan ná, áchí de.

¹⁶ Te ni cahān Jesús:

¿Te á suni máá ró ná tu jecuhun ni ró chí naún?

¹⁷ ¿A tu cajecuhun ni ró jeē táca jéē yéji ñayuu, chí quívi chíji i, te quenda-ni cuahán?

¹⁸ Te jñuhun jeē quenda yuhu ñayuu, chí nde ini anuá i vēji, te yücuan cúu jeē cujnehén i sáha.

¹⁹ Chi nde ini anuá ñayuu quenda jeē jéni néé ní, jeē jéñi ndāyi, jeē casiquí ndéé jñáhan, jeē jíca jnéni, jeē saculhná, jeē cahān jñuhun stáhú, jeē cahān yāa siquí jñáhan.

²⁰ Táca jéē yáha cúu jeē cujnehén ñayuu sáha. Te núu tu siquicu i costumbre jeē nándahá i te caji i staā, tu cúnéhén i sáha. Achí yā.

Ñahan inga nación jeē ní candíje ñihin
(Mr. 7.24-30)

²¹ Te ni quenda Jesús yücuan cuahán yā región Tiro jíin Sidón.

²² Te ñin ñahan ñuu Canaán, néne ña región Tiro jíin Sidón, te ni quee ña nuū Jesús. Te ni cana jee ña:

Tátá, Sēhe yucūn David, cundáhú ni ní sáña víi. Chi sēhe síhí ná, ñuhun tachí ini i, te yōhyo xeēn ndóho i, áchí ña jíin yā.

²³ Te tu ní cahán cuiti yā jeē ní cahán ña. Yücuán na te ní quecoo tēe cáscuáha jíin yā, te ni cacahān de:

Cahān ní jíin ña na quihín ña, chí cana jee ña vēji ña yatá yō, áchí de.

²⁴ Te ni cahān yā jíin ña:

Nuū maá-ni ñayuu nación Israel ní tají Yaā Dios sáña vēji ná, chí cácuu i nájñuhun lanchi, quiti ní sana.

²⁵ Te ñahan ún chí ní quee ña, te ni jecuíñi yití ña nuū yā, te ni cahān ña:

Tátá, chindéé ñáhán ní sáña víi, áchí ña.

²⁶ Te ni cahān yatá yā jíin ña:

Tu iyó vāha jeē quende yō staā sēhe, te cuáha yó núu ína, áchí yā.

²⁷ Te ni cahān ña:

Jendaá cahán ni Tátā, te chindéé ñáhán ní sáña vésú cúu ná nájñūhun ina. Chi suni máá tí cániññ nahín tí pedazo staā cuechí jéé cóyo chíji mesa jitoño tí cáyeji tí, achí ña jíin yá.

²⁸ Yūcuán na te ni cahān Jesús:

Yōhyo vāha jeé cándije ñihin ní súcuān, nánā. Te na sáha ná jéé cuní ni, achí yá.

Te máá hora un ní nduvāha-ni sēhe síñi ña.

Jeé ní nasávāha ya cuehē ñayuu cácuñū

²⁹ Te ni quenda Jesús cuahān yā yūcuán, te ni yāha ya yumar Galilea. Te ni caa ya ñin yūcu, te yūcuān ní cucōo ya.

³⁰ Te cuehē ñayuu ni quecoo i nuū yā, te cándeca i táca jéé cájica chácuá, jeé cuaá, jeé ñihín, jeé cacūhndú, jíin cuehē gā ñayuu cácuñū. Te ni cajequin i nuū jehé Jesús. Te ni nasávāha ya i jíññahan i.

³¹ Te ni canaa ni ñayuu un cájito i jeé nácahān ñayuu ñihín, ndúvāha ñayuu cuhndú, náccaca vāha ñayuu chacuá, nánune tinūñū ñayuu cuaá. Te ni cacahān i jeé yōhyo vāha Yāá cúu Yāá Dios ñuu i Israel.

Jeé ní scáji yā cuññ mil tēe
(Mr. 8.1-10)

³² Yūcuán na te ni cana Jesús tēe cáscuáha jíin yá, te ni cahān yā jíin de:

Cúndáhú ní rī ñayuu cuehē yāhá, chí je ni cuu uní quiví cáyūcú i jíin rí, te tuá na vé caji i. Te tu cuní rī natajái rí i nuhun ndite i, chí núu súcuān te sava íchi te cuññ í i. Achí yá.

³³ Te ni cacahān tēe cáscuáha jíin yá:

¿Te ndé nuū ñihin yō staā caji ñayuu cuehē yāhá? Chí yāhá tú na ñayuu yūcu, achí de.

³⁴ Te ni cajññhun yá de:

¿Nasaa staā cánevāha ró?

Te ni cacahān de:

Uxā-ni, jíin jecu cháca lúlí, achí de.

³⁵ Yūcuán na te ni cahān yā jíin ñayuu cuehē un jéé na cucōo i.

³⁶ Te ni quihñ ya ndihúxá staā jíin cháca ún, te ni nacuatáhú yá nuū Yāá Dios. Te ni tahú cuéchí yá, te ni jēhe ya nuū tēe cáscuáha jíin yá, te máá de ni casaja nuū ñayuu.

³⁷ Te ndihi i ni cayeji, te ni candutú chíji i. Yūcuán na te ni canastútú de pedazo jeé ní quendōo, te ni chítú úxā jíca.

³⁸ Te tēe ni cayeji ún, nde cuññ mil de cúu, te sññ ga cúu ñahan jíin súchi lúlí.

³⁹ Yūcuán na te ni nacuatáhú yá nuū ñayuu ún, te cuanungoo i. Te ni ndiví ya ini barco, te cuahān yā región Magdala.

Jeé cájicān de ñin jññū jéñnu nuū yā
(Mr. 8.11-13; Lc. 12.54-56)

16

¹ Te ni quecoo tēe grupo fariseo jíin tēe grupo saduceo nuū yā. Chí cácuñi de coto ndee de ya, te ni cájicān de jeé na sáha ya ñin jññū jéñnu jeé coo ñin seña íchi ándiví.

² Te máá yá ni cahān yā jíin de:

Núu ni ini, te cácahān rō: Nandii, chí ni nasácuéhé i ándiví, achí ró.

³ Te jenéhen chí cácahān rō: Vijna te cuun saū, chí ni nasácuéhé i ándiví, achí ró. Tēe stáhú-ni cácuu ró. Chí cájēcūhun ni rō ndese stéén seña ándiví, te tu cájēcūhun ni rō ndese stéén táca jññū jéñnu sáha ri tiempo yāha.

⁴ Ñayuu yāha jeé casáha jññū neé, tu cájjetáhú cuiti i Yāá Dios. Te cájicān i jeé sáha ri ñin jññū jéñnu jeé coo ñin seña ándiví. Te tuá na inga jññū jéñnu stéén ri nuū í, chí máá-ni jññū jéñnu nájññūhun ni cuu jíin Jonás, tēe ni nacani jññūhun Yāá Dios nde jenahán. Achí yá.

Te ní stóo ya de jíññahan de, te cuahān yā.

Jññūhun levadura tēe fariseo
(Mr. 8.14-21)

⁵ Te tēe cáscuáha jíin yá ni canaa ni de condiso de staā náa cuangoo de jíin barco inga lado mar.

⁶ Te ni cahān Jesús jíin de:

Coto má candije ró levadura tēe grupo fariseo jíin tēe grupo saduceo, achí yá.

⁷ Te tēe cáscuáha un ní cacahān máá de:

Va síquí jeé tú na staā ndiso yó, jeé yúcuān cáhān yā súcuān, achí de.

⁸ Te ní jini Jesús, te ni cahān yā:

¿Najehé cácahān rō jeé ní cáhān rī súcuān síquí jeé tú na staā cándiso ró? Tēe tu cándije ñihin cácuu ró.

⁹ ¿A ná tu jecūhun ni rō jeé tu ní cáhān rī súcuān síquí jeé tu ndiso ró stáá? ¿A tu cánuccūhun ni rō jeé ní tahú cuéchí rí uhññ staā ni cayeji uhññ mil tēe, te nasaa jíca ni canastútú ró jeé ní quendōo?

¹⁰ ¿Te á tu cánuccūhun ni rō jeé ní tahú cuéchí rí uxā staā ni cayeji cuññ mil tēe, te nasaa jíca ni canastútú tucu ró?

¹¹ ¿Te najehé tu cájēcūhun ni rō jeé nāsūu síquí staā ní cahān rī jíin ró jeé ní cáhān rī jeé coto má candije ró levadura tēe fariseo jíin tēe saduceo? Achí yá jíin de.

¹² Yūcuán na te ni cajēcūhun ni de jeé tu ní cáhān yā jeé coto de jeé ma cáji de pan jeé yññi levadura, chí sa suhva ni cahān yatá yá jeé ma cándije de jññūhun stáhú cástéén tēe fariseo jíin tēe saduceo.

Jeé ní cáhān Pedro jeé Jesús cúu Cristo
(Mr. 8.27-30; Lc. 9.18-21)

¹³ Te nuū ní jíññ Jesús región Cesarea Filipo jíin tēe cáscuáha jíin yá, te ni cajññūhun yá de:

Ruhū, Yāá ní nduu tēe, ¿ndé ñin cúu rí cácahān ñayuu?

¹⁴ Te ni cacahān de:

Sava i cácahān jeé cúu ní Juan tēe ni scuándute. Te sava ga i cácahān jeé cúu ní Elías, tēe ni nacani jññūhun Yāá Dios nde jenahán. Te sava ga i cácahān jeé Jeremías chí inga tēe ni nacani jññūhun Yāá Dios cúu ní. Achí de.

15 Te ni cahān yā jīn de:

Te máá ró, ¿ndé ñin cúu ri cácahān rō? achí yá.

16 Te ni cahān Simón Pedro:

Máá ní cúu Cristo, Yaa ní tají Yaa Dios. Te cúu ní Sēhe Yaa Dios, Yaa técu ní cáni, áchí de.

17 Te ni cahān Jesús:

Yōhyo ndetū rō, Simón sēhe Jonás, chí nasūū ñin ñayuu ní steén jñūhun yáha nuū rō, chí sa suhva máá Tátá rī, Yaa ndeé andiví, ní steén yā nuū rō.

18 Te ruhū suni cáhān rī jīn ró jeé máá ró cúu Pedro, jeé cuní cahān: yuū. Te jñūhun ndaa jeé ní cahān rō jeé máá rī cúu Cristo, suu cúu nájnūhun ñin yuū cáhnu. Te siquī yuū cáhnu yáha sáha rī jeé quituu vehe, te vehe un cúu ñayuu cácañdije ruhū. Te tu ndé vé cundeyí cuiti siquī í, ní jñūhun xeēn jeé cájihí í, tuá na vé cúu sáha jīn ánuá í.

19 Te máá ró condiso jñiñu ró sáha ró jeé quívicoo ñayuu ndaha Yaa andiví jeé ndacu ya jñiñu nuū í. Te táca jéé cási rō jeé ma sáha ñayuu iní ñayiví yáha, suni casí jeé cáyūcú nde andiví. Te táca jéé cuáha ró jñūhun sáha í iní ñayiví yáha, suni jeé cáyūcú nde andiví cuáha jñūhun. Achí yá.

20 Yūcuán na te ní ndacu ya jñiñu nuū téé cáscuáha jīn yá, jeé ma cáchi de nuū ní ñin ñayuu jeé cúu ya Cristo.

*Jeé ní castūhún Jesús jeé cúu yá
(Mr. 8.31-9.1; Lc. 9.22-27)*

21 Te nde saá ní quejéé Jesús cástūhun cáji yá nuū téé cáscuáha jīn yá jeé jini ñūhún quihín yā ñuu Jerusalén. Te táca téé jéhuu jīn sūtū cácujeñu jīn téé cástéén tutu ley, stóho ndasí de ya. Te cahni de ya, te nuū uní quiví te natecu yā, achí yá.

22 Yūcuán na te Pedro, ni cana máñūhún de ya, te ní quejéé de cáhān de nuū yā:

¿Naun cáhān ní súcuān? Chí tu cúni Yaa Dios jeé cuu súcuān. Tu jini ñūhún cuiti ndoho ní jñūndóho yáha, achí de.

23 Te ní ndió cóto ya nuū Pedro, te ní cahān yā jīn de:

Cujiyo quihín rō, chí cáhān rō ná cáhān Satanás. Chí téé ndúcú stívi ruhū cúu ró. Te tu jéni ní rō nájnūhun jéni ní Yaa Dios, chí sa suhva jéni ní rō nájnūhun cájeni ní ñayuu. Achí yá.

24 Yūcuán na te ní cahān yā jīn téé cáscuáha jīn yá:

Na-ní ñayuu núu cúni í condiquín í ruhū, na cási í jeé cuní máá í, te na cóndiquín í ruhū te cuáha í jñūhun ndoho í jñūndóho jeé siquí rī, vésú na cúu í.

25 Chí núu ndé ñayuu cuní í cácu í nuū jñūndóho quiji nuū í jeé siquí ruhū, núu súcuān te jñahnú ndetú í ní cáni. Te núu ndé ñayuu, vésú na cúu í jeé siquí ruhū, te cotecu í ní cáni.

26 ¿Chí ndé cuajniñu vésú na cúndeyí ñayuu nihín í ní ñayiví, te núu quiví í nuū jñahnú ndetú í? Chí tú na jīn cuiti chunaa ñayuu jeé cácu ánuá í.

27 Chí ruhū, Yaa ní nduu téé, ndiji rī jīn táca ndajéhé rī, te yōhyo luu cujéhuu rī nájnūhun cújéhuu Tátá rī. Yūcuán na te cuáha rī tahū nuū ñin ñin ñayuu núu ndese jñiñu ní casáha í.

28 Te jendaá cáhān rī jīn ró jeé sava téé cáhīn yáhá, ma cúu de chí nde cuni de jeé máá rī, Yaa ní nduu téé, ndácu rī jñiñu jīn poder rī.

*Jeé tucu ni nduu ya
(Mr. 9.2-13; Lc. 9.28-36)*

17

1 Yūcuán na te nuū iní quiví te Jesús ní jeca ya Pedro jīn Jacobo jīn Juan ñani Jacobo, cuahān sín ya jīn de ñin yucu súcūn.

2 Te yūcuán, tucu ní nduu ya nuū de. Chí ní ndindéé núu yā nájnūhun niāndii. Te sahma ya ní nducujín quiví ndasí, nájnūhun nduva luz.

3 Te ní cajito-ni de jeé Moisés jīn Elías, téé ní cahyo jenahán, cándajnūhún de jīn yá.

4 Te ní cahān Pedro jīn yá:

Nacá jeé váha jeé cáhīn ná yáha. Te núu cúni ní te na sáha ná úní vehe ramada, ñin cuu máá ní, inga cuu Moisés, te inga cuu Elías, achí de.

5 Te ní cáhān gā de, te ní quiji vicó nūhun jéé yaa ndasí, ní jesi-ni nuū de. Te nuū vicó un ní cahān ñin jñūhun:

Yáha cúu Sēhe rī jeé maní ndasí rī jīn, te cúsi ní rī jīn. Na cúni nahín ró jñūhun cáhān yā. Achí.

6 Te jeé súcuān ní cajini sōho téé cáscuáha ún, te ní cajecava ndeyí de, chí yōhyo ní cayūhú de.

7 Yūcuán na te ní quee Jesús, te ní soó yá ndaha ya siquí de. Te ní cahān yá:

Ndocuñí, te ma yūhu ró jijnáhan ró, achí yá.

8 Te ní candacoto de, te tuá téé un ní cáji to de, chí máá ñin na Jesús.

9 Te ní cananu de jīn yá yucu ún. Te ní ndacu ya jñiñu nuū de:

Ma cáchi rō nuū ní ñin jeé súcuān ní cajito ró, chí nde na nátecu máá rī, Yaa ní nduu téé, achí yá.

10 Yūcuán na te téé cáscuáha jīn yá, ní cacajnūhún de ya:

Núu súcuān te téé cástéén tutu ley Yaa Dios, ¿najehé cácahān de jeé cánuú ndiji Elías xīhna gā, te saá te quiji Yaa cúu Cristo? achí de.

11 Te ní cahān Jesús jīn de:

Jendaá cúu jeé xīhna gā quiji ñin téé cuu nájnūhun Elías, te sātūhva de ndihi, achí tutu.

12 Te cáhān rī jīn ró jeé jé ní quiji téé ní cuu nájnūhun Elías, te tu ní jini ñayuu jeé suu de

cúu. Te ni casáha ndeváha ñayuu jín de ndihí jeé ní cacuu ni maá i. Te suni súcuan stóho i ruhú, Yaa ní nduu tée. Achí yá.

¹³ Yücuán na te tée cáscuáha un, ní cacuehún ni de jeé cahán yá jeé Juan tée scuándute, ni cuu de nájñuhun Elías.

*Jeé ní nasávaha ya ñin süchi jihí yihí
(Mr. 9.14-29; Lc. 9.37-43)*

¹⁴ Te ni najinü yá jín de nuü ñayuu cuehë ún. Te ni quee ñin tée, ni jecuíñi yití de nuü yá, te ni cahán de:

¹⁵ Cundáhu ni ni séhe yí ná, chí yóhyo xeén ndóho i cuehyí jihí yihí. Te je ni cuu cuehë jín cótúú i nuü ñuhún jín nuü ndúte.

¹⁶ Te ni quindeca ná i nuü tée cáscuáha jín ní, te tu ní cúu sávaha de í, áchí de.

¹⁷ Te ni cahán Jesús:

Ñayuu yóhyo ñihni ní cácuu ró chí tu cácañdije ró jeé cuu nduváha i. ¿Nasaa ga quívi condee rí jín ró? ¿Te nasaa ga quívi cuandeyí ni rí jín ró? Cuáquihin süchí un na quíji í, áchí yá.

¹⁸ Te ni cahán yá nuü tachí, te ni quenda-ni ñin süchí un. Te ni nduváha-ni i máa hora un.

¹⁹ Yücuán na te tée cáscuáha un, ní cacajñuhun sán de ya:

¿Najehë tu ní cúu quenehen ná tachí un jijnáhan ná? achí de.

²⁰ Te ni cahán yá:

Siquí jeé tu cácañdije ñihin ró jeé cuu sáha ró. Chí jendaá cahán rí jín ró, jeé núu candije ró vesú ñin tihí-ní, cüha nájñuhun ñin ndiquin mostaza, te cuu sáha ró táca-ni jniñu yí. Chí cuu cahán ró jeé na cújiyo yucu yáha quihín inga lado, te cujiyo-ní. Te táca-ni jniñu chí cuu sáha ró, te núu candije ñihin ró jeé cúu.

²¹ Te ñin tachí súcuan chí ma quénda cuiti quihín, te núu tu cacán tahú ró te coo ndite ni ró. Achí yá.

*Jeé ní cahán tucu ya jeé cúu yá
(Mr. 9.30-32; Lc. 9.43-45)*

²² Te jica cuu Jesús jín de jijnáhan de región Galilea, te ni cahán yá jín de:

Máa rí, Yaa ní nduu tée, nastúu i ruhú nuü táca tée xeén.

²³ Te cahni de ruhú, te nuü uní quívi te natecu rí, achí yá.

Te ni canducuíhá ndasí ni de jeé ni cahán yá jñuhun yáha.

Siquí xuhun cuajniñu ini templo

²⁴ Te ni jinü yá ñuu Capernaum jín tée cáscuáha jín yá. Te tée cástútu xuhun templo ni quecoo de, te ni cacajñuhún de Pedro:

Te maestro maá ró jijnáhan ró, ¿á tú cuáha de xuhún cuajniñu ini templo, chí naún? achí de.

²⁵ Te ni cahán Pedro:

Cuu, áchí de.

Te ná ni quívi de ini vehe, te xihna gá Jesús ni cahán yá jín de:

¿Ndese jéni ni ró, Simón? Táca tée cácuu rey ñin ñayívi yáha, ¿ndé núu cájicán de xuhun renta jín xuhun cuajniñu ñuu? ¿A núu séhe de chí núu ñayuu sán vehe? achí yá.

²⁶ Te ni cahán Pedro:

Nuü ñayuu sán vehe, áchí de.

Te ni cahán Jesús:

Núu súcuan te tú na inga cujéhu nuü séhe rey jeé cacán xuhún un núu í.

Súcuan ni cahán yá jeé cujéhu ya cúu ya Séhe Yaa Dios. Te ni cahán ya:

²⁷ Te na chúnaa yó, návaha tu squítí ni yó de. Núu súcuan te cuáhán ndé yumar, te scáne ró gancho jeé jñí chácá, te tava ró chácá jéé jñí xihna gá. Te ndica ró yuhu ti, te yücuan ñihín ró ñin xuhun jéé cánda chunaa ró jeé cájicán de. Te quindeca ró núu de jeé cúu ruhú jín róho. Achí yá.

*Nde ñayuu cúu jeé cujéhu ga
(Mr. 9.33-37; Lc. 9.46-48)*

18

¹ Te suni quívi un ní quecoo tée cáscuáha un núu yá, te ni cacajñuhún de ya:

¿Nde ñin cujéhu ga nuü ñayuu jeé ndácu Yaa andiví jniñu nuü? achí de.

² Te ni cana ya ñin süchi lúli, te ni jeni ya i mehñu de.

³ Te ni cahán yá:

Jendaá cahán rí jín ró, núu tú nandio cóo ní ró te caní ní ró nájñuhun ñin süchi lúli, ma quívi cuiti ró ndaha Yaa andiví jéé ndacu ya jniñu nuü ró.

⁴ Núu súcuan te ñayuu jeé jéni ni i jeé tu cujéhu i, nájñuhun jéni ni süchi lúli yáha, suu i cujéhu ga nuü ñayuu jeé ndácu Yaa andiví jniñu nuü.

⁵ Te na-ní ñayuu núu jeé siquí ruhú jetáhu i ñin süchi lúli nájñuhun süchi yáha, te ruhú jetáhu í. Achí yá.

*Xeén coo siquí ñayuu quívi nuü cuéchi
(Mr. 9.42-48; Lc. 17.1-2)*

⁶ Te núu ñin süchi lúli yáha cándije i ruhú, te núu quívi i cuéchi sáha na-ní ñayuu, te vaha ga núu ni conuhni ñin yoso cáhnu sucún ñayuu ún, te quee i chíji ndute mar nuü.

⁷ Nacá xeén cúu jín ñayuu ñayívi, chí máni iyó jéé nducú squívi ñayuu nuü cuéchi. Te máni súcuan coo ñin ñayívi. Te nacá xeén ndoho ñayuu jeé squívi jñáhan nuü cuéchi.

⁸ Núu súcuan te núu ndaha ró chí jéhe ró sáha jeé quívi ró cuéchi, vaha ga cahnde ró te scáne ró na quihín, návaha tuá sáha ró cuéchi. Chí vaha ga jeé coo chácua ró chí coo tícúhdnu ró te quívi ró núu cotecu ró ní cáni, vesú jeé cóndee ndindúú ndaha ró jéhe ró te quívi ró núu ñuhún jeé cayú ní cáni.

⁹ Te núu tinü ró sáha jeé quívi ró cuéchi, vaha ga tava ró te scáne ró na quihín, návaha

tuá sáha ró cuéchi. Chi vāha ga jeē coo ñn-ni tinūu ró te quīvī ró nūu cotecu rō níí cáni, vēsū jeē cóndee ndindúú tinūu ró te quīvī ró nūu ñuhún infierno.

Jñuhun yátá síquī lanchi jeē ní sana
(Lc. 15.3-7)

¹⁰ Coto ma sájéē ni rō nuū ní ñn sūchi lúli yáha. Chi cáhán rī jín rō jeē táca ndajéhe andiví jéē ndíto ya i, níni cáhñi ya nuū maá Tátá rī andiví.

¹¹ Chi ruhū, Yaā ní nduu tēe, vējī rī jeē jñama rī ñayuu jeē ní sana i nuū Yaā Dios.

¹² ¿Te ndese cájeni ni rō? Nūu ñn tēe ndéca de ñn ciento lanchi, te nūu sana ñn ti, ¿á tu stóo de cuñ xico xahūn cuñ gā tī yucu, te ndicó de quinanducú de quiti ní sana ún?

¹³ Te nūu ni nanihñ de ti, te ndaā jeē yóhyo ga cúsi ni de jín quiti ún vēsū jín cúun xico xahūn cuñ gā quiti jeē tu ní sána.

¹⁴ Te suni súcuan maá Tátá rō, Yaā ndeé andiví, tu cúni yā jeē jñahnú ndetū ní ñn sūchi lúli yáha.

Siquī jeē cóne cáhnu ni yō nuū jñahan yó
(Lc. 17.3)

¹⁵ Te nūu jñahan ró ní sáha de cuéchi síquī rō, nūu súcuan te castūhun ró nuū mañúhñ-ni de jeē ní sáha de cuéchi síquī rō. Te nūu ni jetáhú de jñuhun ni cahān rō jín de, nūu súcuan te je ni ndumaní de jín ró ní sáha ró.

¹⁶ Te nūu tu ní jétáhú de jñuhun cáhán rō, te quicāna ró ñn chí úú gā ñayuu quihñ rō jín nūu de, cuu i testigo jín rō, te cundaā cuéchi de te ndumaní de jín rō.

¹⁷ Te nūu tu ní jétáhú tucu de jñuhun cáhān tēe ún, yūcuán na te castūhun ró nuū ñayuu cácandje. Te nūu tu ní jétáhú tucu de jñuhun cahān ñayuu cácandje ún, te siáá rō de na cóo de nájñuhun ñn tēe tu cándje nuū Yaā Dios chí tēe stútú xūhun renta.

¹⁸ Jendaá cahán rī jín rō jéē táca jéē cási rō jeē ma sáha ñayuu ini ñayiví yáha, suni casi jeē cáyūcú nde andiví. Te táca jéē cuáha ró jñuhun sáha i ini ñayiví yáha, suni jeē cáyūcú nde andiví cuáha jñuhun.

¹⁹ Te suni cáhán rī jín ró, nūu uñ jñahan ró ini ñayiví yáha, inuú cani ni rō síquī ñn jeē cacán tahu rō, nūu súcuan te maá Tátá rī andiví cuáha ya jeē cájicān rō.

²⁰ Chi nūu ndé mí ndútútú úú chí únī ñayuu jeē cáchiñúhñ i ruhū, te yūcuán ñe rī jín i, áchí yá.

²¹ Yūcuán na te ni quee Pedro nuū yā, te ni cajñuhñ de ya:

¿Nasaa jínu cone cáhnu ni na nūu jñahan ná jéē sáha de cuéchi síquī ná? ¿A ndé uxā jínu chí naún? áchí de.

²² Te ni cahān Jesús:

Tu cáhán rī jín ró jeē maá uxā jínu, chí nde uxā jínu jeē uní xico uxí.

Jñuhun yátá síquī mozo jeē tu ní ñe cáhnu ni

²³ Nūu súcuan te Yaā ndeé andiví, suhva cúu jeē ñe cáhnu ni yā nuū ñayuu ndácu ya jññu nuū: Cúu nájñuhun ñn rey jeē cúni de sándaā de jín mozo de jeē cátañ nuū de.

²⁴ Te ni quejéē de sándaā de jín i. Te ni caquindeca i ñn mozo jeē taú tijni millón peso nuū de.

²⁵ Te tú na vé névāha mozo un chunaa nuū de. Te ni ndacu de jññu jeē na cúyāhu mozo un jín ñasihí jín séhe jín táca ndajññu, te nucūnaa xūhun táu.

²⁶ Yūcuán na te ni jecuiñi yití mozo un, te ni cahān ndahú de jín patrón de ún: Condetu ní, te na chūnaa ndihí ná xūhun ní, áchí de.

²⁷ Te maá patrón ni cundáhú ni de mozo de. Te ni ñe cáhnu ni de jeē taú mozo de ún, te ni siáá de jeē ma chūnaa gā.

²⁸ Te ni quenda mozo un cuáhān de, te ni najñāhan-ni de jín ñn jñāhan mozo de jeē taú jecu peso nuū de. Te ni jññ de tēe ún, te ni quetu de sucñ, te ni cahān de: Chunaa jeē taú rō nuū rī, áchí de.

²⁹ Te jñahan mozo de un ní jecuiñi yití nūu de, te ni cahān ndahú jín de: Condetu te na chūnaa ndihí rī xūhun ró, áchí.

³⁰ Te maá de tu ní cúni de, chí ni chune de tēe un vecāa nde quiví nachunaa jeē taú nuū de.

³¹ Te táca jñahan mozo de ni cajito jeē súcuan ni sáha de, te ni cajnahuhū ndasí ni de. Te cuangoo de nuū patrón de, te ni cacachi de ndihí ndese ni cuu.

³² Yūcuán na te patrón un ní nacana de mozo un, te ni cahān de jín: Mozo ndevāha cúu ró. Chi ni ñe cáhnu ni rī ndihí jeē taú rō nuū rī, chí ni cahān ndahú ró jín rī.

³³ Te nájñuhun ni cundáhú ni rī rohó, suni súcuan ni jini ñuhún cundáhú ni rō jñahan mozo rō nuú, áchí de.

³⁴ Te ni quiti ndasí ni patrón, te ni ndacu de jññu jeē na quiví vecāa nde nachunaa ndihí jeē taú nuū de.

³⁵ Te ni jínu ni cahān yā, te áchí yá:

Nájñuhun ni sáha rey un jín mozo de, suni súcuan sáha maá Tátá rī andiví jín táca rōhó nūu tu cone cáhnu ni rō nuū jñahan ró nde jín ini jín ánuá rō, nūu na-ni cuéchi sáha i nuū rō. Achí yá jín de jññahan de.

Siquī jeē ma stóo jñahan tēe jín ñahan
(Mr. 10.1-12; Lc. 16.18)

19

¹ Te nūu ní ndihí ni cahān Jesús táca jñuhun yáha, te ni quenda ya Galilea cuahān yā. Te ni jinū yā región Judea, inga lado yūte Jordán, ichi nūu cáne niāndi.

² Te cuehē ñayuu ni candiquñ i ya, te yūcuán ní nasávāha ya ñayuu cácuñ.

³ Yūcuán na te ni quecoo jecu tēe grupo fariseo nuū yā, chí cácu ni de coto ndee de ya núu ndese cahān yā. Te ni cacajñuhún de ya:

¿A iyó ley jeē cuu ndusín ñin tēe jíin ñasihí de núu na-ni siquí cúu, chí naún? áchí de.

⁴ Te ni cahān yā:

¿A tu ní cácahu ró tutu ñi ndese ni sáha Yaā Dios ñayuu nde xihna ñuhún? Chí tēe jíin ñahan ni sáha ya, achí.

⁵ Te suni ni cahān Yaā Dios: Jeē yúcuan cúu jeē stóo tēe tátá de náná de, te quijnáhan de jíin ñasihí de, te ñin na cuu ndindúú de, áchí Yaā Dios, achí tutu.

⁶ Núu súcuan te tuá cúu uū jnáhan de, chí ñin na cúu. Jeē yúcuan tu iyó váha jeē stóo jnáhan, chí jeē ni squíjnéhan Yaā Dios cúu, áchí yá.

⁷ Te ni cacajñuhún de ya:

Núu súcuan ¿te naun ni ndacu Moisés jniñu jenahán jeē núu stóo ñin tēe ñasihí de, te na cúváha acta jeē ndusín de jíin ña? áchí de.

⁸ Te ni cahān yā jíin de:

Siquí jeē ñihni ni ró jnjáhan ró, jeē yúcuan ní jēhe Moisés jñuhun jeē stóo ró ñasihí ró. Te nde xihna ñuhún chí nasūu súcuan ní cuu.

⁹ Te ruhū chí cáhan rí jíin ró, núu ñin tēe stóo de ñasihí de, te núu nasūu jéē tjíni ní ña, te quijnáhan de jíin inga ñahan, núu súcuan te cásiquí ndéē de ña. Te núu ñin tēe condeca de ñahan ní ndusín, suni cásiquí ndéē de ña, áchí yá.

¹⁰ Yūcuán na te ni cacahān tēe cáscuáha jíin yá:

Te núu ma cúu stóo tēe ñasihí de, núu súcuan te váha ga ma cóndeca de ñahan, áchí de.

¹¹ Te ni cahān yā jíin de:

Jñuhun ni cahān ró yáhá, tu ñihín jniñu nuū ndihí tēe, chí máá nene tēe jeē ní sáha Yaā Dios jeē ñihín jniñu nuū.

¹² Chí iyó tjíni siquí jeē jési jeē ma cóndeca tēe ñahan. Chí sava tēe ni cacacu de jeē ma cúu condeca de ñahan. Te sava ga tēe ni sáha ñayuu jeē ma cúu condeca de ñahan. Te sava ga tēe ni cajeni ni máá de jeē ma cóndeca de ñahan siquí jeē ndihví ni de jíin jniñu jeē ndácu Yaā andiví nuū de. Tēe jeē cúu cuatáhú jñuhun jeē ma cóndeca de ñahan, na cuatáhú de núu súcuan. Achí yá.

Jeē ní jícān tahú Jesús jehē sūchi lúli
(Mr. 10.13-16; Lc. 18.15-17)

¹³ Yūcuán na te ni quecoo ñayuu jíin sūchi lúli, jéē na sóo yá ndaha ya xini i te cacān tahú yá jehé i. Te tēe cáscuáha jíin yá, ni cacahān de nuū ñayuu vējicoo jíin i.

¹⁴ Te ni cahān Jesús:

Cuáha jñuhun na quíjicoo sūchi lúli jíin nuū rí, te ma cásí ró jeē quíjicoo i. Chí ñayuu jeē ndiío cóo ni i caní ni i nájñuhun sūchi yáha,

suu i quíví ndaha Yaā andiví jéē ndacu ya jniñu nuū i, áchí yá.

¹⁵ Te ni sóo yá ndaha ya xini i jijnáhan i. Te ni quenda ya yúcuan cuáhān yā.

Jñuhun tēe cúca

(Mr. 10.17-31; Lc. 18.18-30)

¹⁶ Te ñin tēe suchí ní quee de nuū Jesús, te ni cajñuhún de ya:

Tēe váha cúu ní Maestro. Te cachi ní, ¿na jniñu váha sáha ná te ñihín tahú na cotecu na ñí cáni andiví? áchí de.

¹⁷ Te ni cahān yā jíin de:

¿Naun cáhan ró jeē tēe váha cúu rí? Tú ni ñin tēe váha iyó, chí máá ñin-ni Yaā Dios. Te núu cúni ró cotecu ró ñí cáni, te squícu ró jniñu ní ndacu ya. Achí yá.

¹⁸ Te ni cahān de:

¿Ndé-ni jniñu cúu núu súcuan?

Te ni cahān yā:

Ma cáni ró ndíyi. Ma cosiquí ndéē jnáhan ró. Ma sacuíhna ró. Ma sajñuhún ró.

¹⁹ Cuatáhú ró nuū tátá ró nuū naná ró. Te cundáhú ní ró jnáhan ró nájñuhun cundáhú ní ró máá ró, achí yá.

²⁰ Te ni cahān tēe suchí un:

Táca jniñu yáha je ni squícu ná ndé ná lúli ná. ¿Te na vé cumaní gā sáha ná núu súcuan?

²¹ Te ni cahān Jesús:

Núu cúni ró squícu ndihí ró, cuáhán te xico ró ndihí jeē névaha ró, te cuáha ró nuū ñayuu ndahú. Te nde andiví cuáha ya jeē ndetū ndasí coo ró. Yūcuán na te quiji ró condiquín ró ruhū quihín yō, achí yá.

²² Te tēe suchí un, ná ni jini sōho de jñuhun yáha, te ni cucuíhyá ni de te cuahān de, chí cúca ndasí de.

²³ Yūcuán na te ni cahān Jesús jíin tēe cáscuáha jíin yá:

Jendaá cáhan rí jíin ró, tēe cúca chí yōhoyo yí quívicoo de ndaha Yaā andiví jéē ndacu ya jniñu nuū de.

²⁴ Te cáhan tucu rí jíin ró jeē yachí gā yáha ñin camello yaū yutícuí, vēsú jeē quíví ñin ñayuu cucá ndaha Yaā Dios jeē ndacu ya jniñu nuū i, áchí yá.

²⁵ Te tēe cáscuáha jíin yá, yōhoyo ni canaa ni de jeē ní cajini de jñuhun yáha, te ni cacajñuhun jnáhan de:

¿Ndé ñayuu cúu jeē cácu núu súcuan?

²⁶ Te ni ndacoto Jesús nuū de, te ni cahān yā:

Ñayuu chí ma cúu squíví i máá i ndaha Yaā Dios, te máá yá chí ndihí-ni cuu sáha ya, achí yá.

²⁷ Yūcuán na te ni cahān Pedro:

Saña jijnáhan ná ní castóo ná ndihí jeē cánevaha ná, te cándiquín na ñihín. ¿Te na vé ñihín na núu súcuan? áchí de.

²⁸ Te ni cahān Jesús jíin de:

Ruhū, Yaā ní nduu tēe, jendaá cáhan rí jíin ró jijnáhan ró jéē ñin quíví conene rí mesa

ndacu ri jniñu, te yōhyo luu cujéhu ri ini ñayivi jée. Te quiví ún te máá ró jeé ni cacondiquin rō ruhū, suni coyūcu ró nuū uxí uū mesa ndacu ró jniñu. Te sándaā rō jniñu ndihúxi uū yucūn ñayuu Israel.

²⁹ Te táca ñayuu jeé ni stóo vehe, chí ñani, chí cuáha, chí tátá, chí náná, chí ñasihí, chí séhe, chí ñuhun, siquí jeé cóndiquin i ruhū, te nanihín i ñin ciento gā jeé súcuan. Te suni nihín tahú i cotecu i ní cáni.

³⁰ Te cuehē ñayuu jeé vijna cácuu i nuū, nduu i sandihí. Te ñayuu jeé vijna cácuu i sandihí, nduu i nuū. Achí yá.

Jñuhun yátá siquí tēe casájniñu

20

¹ Te suhva cúu jeé ndácu Yaā andiví jniñu nuū ñayuu: Cúu nájñuhun ñin tēe chí ñuhun. Te ñin nehen ni quenda de, ndúcú de tijni mozo jeé taxín ndéhē uva de.

² Te ni sándaā de jín mozo un jée chúnaa de ñin denario jeé quiví. Te ni tají de tēe un cuángoo jeé taxín uva de.

³ Yūcuán na te ni quenda tucu de nájñuhun cahñin. Te ni jito de nuū sava ga tēe cáyūcu sáá-ni de nuū yáhu.

⁴ Te ni cahñ de jín: Róhó jijnáhan ró, cuángoo taxín ró uva rí, te chunaa váha ri yáhu ró, áchí de. Te tēe un cuángoo de.

⁵ Te ni quenda tucu de jeé cuácuu cahuxí uū jín jée cuácuu cahuní, te suni súcuan ni nihín tucu de mozo.

⁶ Te jeé cuácuu cahuhún ni quenda tucu de. Te ni nihín tucu de jecu gā tēe cáyūcu sáá-ni nuū yáhu. Te ni cahñ de jín: ¿Najehē cahñin sáá-ni ró yáha ní ndiáca? áchí de.

⁷ Te ni cacahñ tēe ún: Siquí jeé tú ni ñin ní cána sáña jée sájniñu ná. Te ni cahñ de jín tēe ún: Núu súcuan te suni máá ró quingoo ró taxín ró ndehē uva rí, chí chunaa váha ri yáhu ró, áchí de.

⁸ Te nuū ní ini, te tēe chí ñuhun ni cahñ de jín tēe cujéhu nuū mozo de: Cana xiní tēe casájniñu te chunaa rō yáhu de, te xihna gā tēe ni quívicoo sandihí, te sáá te tēe ni quívicoo xihna ñúhún, áchí de.

⁹ Te ni quecoo tēe jeé ni quívicoo cahuhún. Te ñin denario ni caquihin ñin ñin de.

¹⁰ Yūcuán na te ni quecoo tēe jeé ni quívicoo xihna ñúhún. Te cájeni ni de jeé cuehē gā quiyáhu de. Te ñin-ni denario ni caquihin ñin ñin de.

¹¹ Te nuū ní caquihin de, te ni caquejée de cacahñ sóo de siquí tēe chí ñuhun, áchí de:

¹² Máá ná jijnáhan ná, ndiáca ni casájniñu ná, te ni candoho ná jée jihní. Te tēe yáha jée ni quívicoo sandihí, chí máá ñin hora-ni ni casájniñu de. Te inuú-ni ni chiyáhu ní sáña jín de, áchí de.

¹³ Te tēe chí ñuhun ni cahñ jín ñin de: Amigo, nasūu jée tú váha sáha ri jín ró. ¿A tu

ní sándaā yō jeé ñin denario quiyáhu ró, chí naún?

¹⁴ Núu súcuan te quihin yáhu ró te quinhun rō. Chí cúní rí jeé tēe ni quívicoo sandihí yáha, inuú quiyáhu de jín máá ró.

¹⁵ ¿Te á tu cuu sáha ri ndese cúní rí jín xuhun máá rí? ¿Te chí cúcuésún ni rō jeé ní chiyáhu váha ri de jijnáhan de siquí jeé váha ni rí? áchí de.

¹⁶ Te nájñuhun ni sáha tēe chí ñuhun, suni súcuan sáha Yaā Dios. Chí ñayuu cácuu sandihí, nduu i nuū. Te ñayuu cácuu nuū, nduu i sandihí. Chí cuehē ñayuu cána ya jeé candije i ya. Te jecu-ni i cándije, te nacáji ya máá i jeé ndúu i séhe ya. Achí yá.

Jeé ni cáhñ tucu Jesús jeé cúu yā

(Mr. 10.32-34; Lc. 18.31-34)

¹⁷ Yūcuán na te ná ni quihin Jesús ichi cuahñ yá ñuu Jerusalén, te ni cana sán ya ndihúxi uū tēe cáscuáha jín yá. Te ni cahñ yā jín de:

¹⁸ Cuni sōho ró, chí je cuángoo yó ñuu Jerusalén vijna, te yūcuán nastúu ñayuu ruhū, Yaā ní nduu tēe, nuū sutú cácujeñu jín núu tēe cástéén tutu ley. Te ndonda de siquí rí jeé cúu rí.

¹⁹ Te squívi de ruhū nuū tēe nación Roma jeé cáyūcu Jerusalén cándacu jniñu. Te táca tēe un sácatā de nuū rí. Te caní de ruhū, te sáá te cahni de ruhū jicá cruz. Te nuū uní quiví te natecu rí. Achí yá.

Jeé ni jicān naná Jacobo jín Juan ñin favor nuū yā

(Mr. 10.35-45)

²⁰ Yūcuán na te ni quee ñasihí Zebedeo nuū yā jín séhe ña Jacobo jín Juan. Te ni jecuiñi yití ña nuū yá, jicān ña ñin favor nuū yá.

²¹ Te ni cajñuhun yá ña:

¿Na vé cuní rō?

Te ni cahñ ña:

Cuáha ní jñuhun jeé quiví ndácu ní jniñu te conēne ndindúú séhe ná yáha xiin ní, ñin i lado yáha ní, te inga i lado jecó ní, achí ña.

²² Yūcuán na te ni cahñ Jesús jín Jacobo jín Juan:

Tu cájini rō na vé cúu jeé cájicān rō. ¿A cuu ndoho ró jñundóho nájñuhun jeé quíji siquí rí? ¿Te á cana ró ndoho xeēn rō nájñuhun ndoho rí? Achí yá.

Te ni cacahñ de:

Cuu sáha ná.

²³ Te ni cahñ yā jín de:

Jendaá jeé ndoho ró jñundóho nájñuhun jeé quíji siquí rí, te ndoho xeēn rō nájñuhun ndoho rí. Te jeé conēne ró lado váha ri jín lado jecó rí, nasūu ruhū cúu jeé cuáha jñuhun. Chí je íyó túhva cuu táca tēe jeé ní nacáji Tátá rí, te tēe un nihín. Achí yá.

²⁴ Te uxí gā tēe cáscuáha jín yá ní cájini de jñuhun yáha. Te ni caquití ni de nuū uú ñani ún.

²⁵ Te Jesús ni cana ya de, te ni cahān yā jīn de:

Cájini rō ndese cásáha tēe cácujuhnu nuū ñáyuu tǎcá nación. Chi cándacu nihin de jniñu nuū i, te máá de cáhí ndese coo.

²⁶ Te máá rō jijnáhan rō, chí ma sáha rō súcuan. Chi núu ndé ñn rō cúní cujéhnú, sa suhva cuajniñu rō núu jnāhan rō.

²⁷ Te núu ndé ñn rō cúní cuu nuū, sa suhva sáha rō máá rō mozo nuū jnāhan rō.

²⁸ Chi suni súcuan sáha ruhū, Yāá ní nduu tēe, chí nasūu jēē véji rí jēē cuajniñu ñayuu nuū rí, chí sa suhva véji rí jēē cuajniñu rí nuū ñáyuu. Te cuāha rí máá rí cuu rí návāha jnama rí cuehē ñayuu, achí yá.

Jeē ní nasávāha ya uū tēe cuáá

(Mr. 10.46-52; Lc. 18.35-43)

²⁹ Yūcuán na te ni quenda ya jīn de ñuu Jericó. Te cuehē ndasí ñáyuu ni candiquin i ya.

³⁰ Te yuhíchi un cáyūcu uū tēe cuáá. Te ni cajini de jñuhun jee yáha Jesús cuahān yā, te ni cacana jee de:

Máá ní jēē cúu ní Séhe yucūn David, cundáhú ní ní sáña, áhí de.

³¹ Te ñayuu un ní cacahān i nuū de jēē na cási de yuhu de. Te víhyá gā ní cacana jee de:

Máá ní jēē cúu ní Séhe yucūn David, cundáhú ní ní sáña ví, achí de.

³² Te ni jecuiñi Jesús, te ni cana ya ndándúú tēe cuáá un, te ní cajñūhun yá de:

¿Na vé sáha rí jīn rō cácuñi rō?

³³ Te ni cacahān de jīn yá:

Jēē na ndúndjin tinūu ná cácuñi ná, áhí de.

³⁴ Te ni cundáhú ní yā de. Te ni tee ya ndaha ya tinūú de. Te ni candundijin-ni tinūú de. Te ni candiquin de ya cuango de jīn yá.

Jeē ní quávi Jesús ñuu Jerusalén

(Mr. 11.1-11; Lc. 19.28-40; Jn. 12.12-19)

21

¹ Te nuū cuácuyajni ya ñuu Jerusalén, te ni jini yá jīn tēe cáscuáha jīn yá ñuu Betfagé, jēē íne jehē yucu Olivos. Te ni tají yá uū tēe cáscuáha jīn yá jēē quíngoo de.

² Te áhí yá jīn de:

Cuáhān ñuu lulí íne ichi núu. Te yūcuan nihin rō ñn burra, núhni tí jīn ñn burro lulí. Te ndají rō tí, quijicoo rō jīn tí nuū rí.

³ Te núu ndé ñn cahān jīn rō, te cachi rō nuū: Máá Jitoho yō jini ñuhūn yá tí, achí rō. Yūcuán na te siáá-ni i tí, quiji rō jīn tí, achí yá.

⁴ Te súcuan ni cuu tǎcá jniñu yáha návāha squícu jñuhun ni cahān tēe ni nacani jñuhun Yāá Dios nde jenahān, yósó núu tútu:

⁵ Cachi rō nuū ñáyuu ñuu Jerusalén jēē nani ñuu Sión:

Yáhá condēhe rō jēē véji Rey rō.

Tu sájéhnú ya maá yá, chí máá burra-ni yósó yá,

jīn burrito, sēhe quiti ndíós. Achí tutu.

⁶ Yūcuán na te tēe cáscuáha un cuángoo de, te ni casáha de nájñuhun ni ndacu Jesús jniñu nuū de.

⁷ Te ndéca de burra jīn sēhe tí, ni ndecoo de nuū yá. Te ni casoó de sahma de siquí tí, te ni jecosó yá tí.

⁸ Te cáhiin cuehē ñayuu, te ni cascáa i sahma i ini ichi. Te sava ga i ni cajehnde ndaha ñúú, te ni cachucun i ini ichi.

⁹ Te ñayuu cuango ichi núu jīn ñáyuu cuango ichi yátá, cácana jee i:

Yōhó cújéhnú Yāá cúu Séhe yucūn rey David. Yōhó vāha Yāá cúu Yāá jēē véji jīn jniñu máá Jitoho yō Yāá Dios. Te yōhó cújéhnú máá Yāá Dios. Achí i.

¹⁰ Te nuū ní quívi ya ñuu Jerusalén, te ndihi ñayuu ñuu un ní cacuvaá i, te cuehē i cájnūhun jnāhan:

¿Ndé tēe cúu tēe yáha? áhí i.

¹¹ Te ní cacahān ñayuu véjicoo jīn yá:

Yāha cúu Jesús jēē nácani jñuhun Yāá Dios, jēē véji nde ñuu Nazaret ndañúú Galilea. Achí i.

Jeē ní quenehen ya ñayuu ini templo

(Mr. 11.15-19; Lc. 19.45-48; Jn. 2.13-22)

¹² Yūcuán na te ni quívi Jesús ini templo cáhnu Yāá Dios. Te ni quenehen ya táca ñáyuu cájeen quiti te cáxaxico núu ñáyuu jee socó i. Te ni scotúú ndeyi ya táca mesa tēe cástáyi xūhūn, jīn silla tēe cáxíco paloma.

¹³ Te áhí yá jīn i:

Yósó núu tútu ñi jēē cahān Yāá Dios: Vehe rí chí vehe nuū cájicān tahú cúu, áhí Yāá Dios. Te máá rō jijnáhan rō, chí nájñuhun yaú cava ñacuñhá ní canasáha rō. Achí yá.

¹⁴ Yūcuán na te sava ñayuu cuaa jīn ñáyuu chacuá ní quecoo i nuū yá ini templo un. Te ní nasávāha ya i.

¹⁵ Te sutú cácujuhnu jīn tēe cástéén tutu ley Yāá Dios, ní cajito de tǎcá jniñu jéhnú sáha ya, te ni cajini de jēē cácana jee sūchi lulí ini templo: Yōhó cújéhnú Yāá cúu Séhe yucūn rey David, achí i. Te ní caquítí ni de.

¹⁶ Te ní cacahān de jīn yá:

¿A tu jini rō jēē súcuan cácahān sūchi yáha? áhí de.

Te ní cahān Jesús jīn de:

Jini rí. ¿Te á ná tu cahu rō jēē yosó núu tútu ñi jēē suhva cahān ñn tēe jīn Yāá Dios?

Sáha ní jēē táca sūchi lulí jīn sūchi cájexin, vāha ndasí cáhān i jēē Yāá cujéhnú cúu Cristo. Achí.

¹⁷ Te ní stóo ya de. Te ni quenda ya ñuu Jerusalén, cuahān yā nde ñuu Betania. Te yūcuan ní ndóo ya jecuáá ún.

Jeē ní cahān yá nuū yújnu higo

(Mr. 11.12-14, 20-26)

¹⁸ Te jenéhen inga quiví cuanuhun yā ñuu Jerusalén, te jíí yā sōco.

¹⁹ Te ni jito ya ñn nundēhe higo, ñn yuhíchi. Te ni jehēn yā jehē. Te tú na ndehē ni ñihín yā, chí máá ndaha-ni ñn. Te ni cahān yā jíín: Vijnā te ma cúun cuítī gā ndehē xiní rō, achí yā.

Te ni ichí-ni yujnu higo ún.

²⁰ Te tēe cáscuáha jíín yá, ni canaa ni de cájito de. Te ni cacajnūhún de ya:

¿Nde se ni sáha ní jéé yachi-ni ni ichí yujnu higo? achí de.

²¹ Te ni cahān yā jíín de:

Jendaá cahān rī jíín rō, núu candíje rō te tú cani síquí ni rō, te cuu sáha rō jniñu jéhu nájñuhun ni sáha rī jíín yujnu higo. Te nde jniñu jéhu ga cuu sáha rō, chí nde cuu cahān rō jeé cújiyo yucu yáha, quihín nuū mar, te sáha nájñuhun cahān rō.

²² Te táca jéé cacán tahu rō jijnáhan rō, te núu candíje rō jéé ñihín rō, te ñihín rō. Achí yā.

*Siquí jeé ndíso jniñu Jesús
(Mr. 11.27-33; Lc. 20.1-8)*

²³ Te ni quiví tucu ya ñni templo cáhnu. Te ñini stéen yā jñuhun, te sutú cácujeñnu jíín táca tēe jéhu jeé cándacu jniñu nuū ñáyyu hebreo, ni quecoo de nuū yā. Te ni cacajnūhún de ya:

¿Ndé ní ñihín jniñu rō jéé sáha rō jniñu yáha? ¿Te ndé ñn ni tee jniñu síquí rō jeé sáha rō súcuan? Achí de.

²⁴ Te ni cahān Jesús:

Suni ruhū, cajñuhun rī rohó ñn jñuhun jijnáhan rō, te núu cuu stío cuñí rō, yūcuán na te cachi rī nuū rō ndé ní ñihín jniñu rī jeé sáha rī jniñu yáha.

²⁵ ¿Ndé ñn ni tee jniñu síquí Juan jeé ni scuándute de? ¿A Yaā Dios chí táca tēe? achí yā jíín de.

Yūcuán na te ni candajnūhun máá de:

Núu cahān yō jeé Yaā Dios ni tee ya jniñu un síquí Juan, te cahān de jíín yó: Núu súcuan ¿te najehē tu ní cácuandíje rō de?

²⁶ Te núu cahān yō jeé ñáyyu ni catee jniñu un síquí de, te cáyūhu yó ñayuu, chí ndívií i cácuandíje i jeé tēe ni nacani jñuhun Yaā Dios ni cuu ndíje Juan. Achí de cácahān maá de.

²⁷ Te ni cacahān de jíín Jesús:

Tu cájini rī, achí de.

Yūcuán na te ni cahān yā jíín de:

Ni ruhū, suni ma cáchi rī nuū rō ndé ñn ni tee jniñu síquí rī sáha rī jniñu yáha, achí yā.

Jñuhun yátá síquí uú sēhe yíí

²⁸ Te ni cahān gā yā jíín de:

Cuni nahín rō jñuhun yátá yáha: ñn tēe ni iyo uú sēhe yíí de. Te ni cahān de jíín ñn i: Séhē, quihín rō taxín rō ndehē uva rī vijnā, achí de.

²⁹ Te ni cahān i: Ma quihín na, achí i. Te ni cunúu, te ni nacani ni i, te cuahān i nuū jniñu ún.

³⁰ Te tēe un ní jehēn de nuū inga sēhe de, te suni súcuan ni cahān de jíín i. Te ni cahān i: Cuu núu súcuan, te quihín na, achí i. Te tu ní jehén i.

³¹ ¿Te ndese cájeni ni rō? Jeé ndindúú i, ¿ndé ñn i ni squícu jniñu cúni tatá i? achí yā.

Te ni cacahān de:

Súchi jéé ni cáhān de jíín xíhna gā, achí de.

Te ni cahān Jesús jíín de:

Súcuan cúu, te jendaá cahān rī jíín rō jeé tēe cástútú xúhun renta jíín ñahan cájica jnéni, yachi cácanani ni i jeé stío i cuēchi i te quívicoo i ndaha Yaā Dios jeé ndacu ya jniñu nuū i, te máá rō jijnáhan rō chí ma quiví rō.

³² Chí ni quíji Juan, ni steén de ndese condiquín rō jñuhun ndaa, te tu ní cácuandíje rō jñuhun ni cahān de. Te sa suhva tēe cástútú xúhun renta jíín ñahan cájica jnéni, ni cacandíje i jñuhun ni cahān de. Te máá rō, vésu ni cajito rō jéé ní cacandíje i, te tu ní cácanani cuítī ni rō jeé candíje rō. Achí yā.

Jñuhun yátá síquí tēe néé cásjniñu nuū uva

(Mr. 12.1-12; Lc. 20.9-19)

³³ Cuni sōho inga jñuhun yátá jijnáhan rō: Ni iyo ñn tēe chíí ñuhun. Te ni nachuhun de cuéhē ndehē uva. Te ni jesi de corral, te ni sáha de ñn nuū cúhun ndehē un táxín. Te ni jeni de ñn vehe súcún náváha cuu coto de ñí cáhnu.

Te ni stío de nuū sava tēe sájniñu nuū, te cuu sava de ndehē jíín. Te ni tee de ichi cuahān jíca de.

³⁴ Te máá tiempo ndutútú uva, te ni tají de jecu mozo cuanuquihín sava uva nuū tēe cásjniñu ún.

³⁵ Te tēe un ní cajñi de mozo un. Te ñn i ni cacani de, te inga i ni cajehni de, te inga i ni cajēhe de yuú xiní.

³⁶ Te tēe chíí uva ni tají tucu de jecu gā mozo cuango, cuéhē gā vésu jeé xíhna ñuhún. Te suni súcuan ni casáha tēe un jíín ndíhi mozo un.

³⁷ Te jeé sándíhi na te ni tají de sēhe de cuahān. Te jéni ni de: Tēe ún chí cuatáhú de jijnáhan de nuū sēhe rī.

³⁸ Te tēe cásjniñu ún, núu ní cajito de nuū sēhe tēe chíí uva, te ni cacahān maá: Tēe chíí táhú cúu jeé yáha. Na cáhni yō de, te ndōo tahu de cuu yó, achí.

³⁹ Te ni cajñi de i, te ni caquenehen de i inga lado, te ni cajehni de i. Achí yā.

⁴⁰ Yūcuán na te ni cajñuhun yá de:

Núu súcuan te núu na quíji tēe chíí uva un, ¿te ndese sáha de jíín tēe cásjniñu ún? achí yā.

⁴¹ Te ni cacahān de jíín yá:

Ma cundáhu cuiti ni de tāca tée cásáha jniñu neé un, chí cahni de. Te cuáha de ñuhun cáá uva un núu inga sava tēe sájniñu nuū, cuu sava de ndehē jíin. Te quiví ndutútú ndehē, te tēe ún nacuáha de sava ndehē nuū tēe chíu uva. Achí de.

⁴² Te ni cahān Jesús jíin de:

¿Te á ná tu cahu ró jnúhun yáha jeē yosó núu tútu ñi, jeē ruhū cúu nájnūhun ñin yuū? Chí áchí tutu:

Yuū jeē ní casquéhichí tēe cájeni vehe,

yuū yáha nduu jeē quítuu vehe.

Máá Jítoho yō Yaā Dios ní sáha ya súcuan,

te cánaa ní yō jíto yó jniñu yáha.

Achí tutu.

⁴³ Núu súcuan te cáhán rí jíin ró jeē cujiyo-ni jeē ndácu Yaā Dios jniñu nuū rō jijnáhan ró, te nacuáha ya jniñu un núu inga ñayuu jeē squícu váha i jniñu ndácu ya nájnūhun cúni yā.

⁴⁴ Te ñayuu tu cácandíje, ndoho i nájnūhun ndóho ñayuu jeē cotúu siquí yuū te jnánhú i. Te quiví sándaā Yaā Dios cuēchi, te ñayuu tu cácandíje, ndoho i nájnūhun ndóho ñayuu jeē nínga yuū siquí i te cundiñi i sáha. Achí yá.

⁴⁵ Te sutū cácujuhnu jíin tēe grupo fariseo ni cajini sōho de tāca jnúhun yátá ní cahān yā. Te ni cajecūhun ni de jeē siquí maá de cúu jnúhun yátá ní cahān yā siquí tēe cásájniñu nuū uva jíin tēe cájeni vehe.

⁴⁶ Te ni canducú de modo jni de ya. Te cáyūhú de jeē quítu ní ñayuu, chí cájeni ni i jeē tēe nácani jnúhun Yaā Dios cúu ya.

Jnúhun yátá siquí vico nándāha

22

¹ Yūcuán na te ni cahān tucu Jesús inga jnúhun yátá jíin de jijnáhan de:

² Súcuan cúu jeē ndácu Yaā andiví jniñu nuū ñayuu: Cúu nájnūhun ñin rey jeē sáha de ñin vico jeē nándāha sēhe yí de.

³ Te ni tají de tāca mozo de cuacana ñayuu jeē ní cahān de jíin jéé quíjicoo. Te ñayuu ún tu ní cáculi i quíjicoo i.

⁴ Te ni tají tucu de jecu gā mozo quingoo, te áchí de jíin: Cahān jíin ñayuu ní cana ri un jéé iyó túhva ndeyu. Chí je ní jehni ri siquí ri jíin táca gá quiti ní nduu, te ndihi je iyó túhva. Nehen jijnáhan ró vico nándāha. Achí rō jíin i. Achí de.

⁵ Te ñayuu ní cana de ún tu ní cásáha i cuenta. Chí ñin i cuahān nuū itu i, te inga i cuahān nuū jniñu sáha i.

⁶ Te sava ga i ni cajni i tāca mozo rey, te ni casácatā i nuū, te ni cajehni i.

⁷ Yūcuán na te yōhoyo ní quítu ni rey. Te ni tají de soldado de ní jengoo, ni cajehni de ñayuu ní cajehni ndiyí ún, te ni cajehmu de ñuu i.

⁸ Yūcuán na te ni cahān de jíin sava ga mozo de: Ndihi je iyó túhva jeē cóo vico

nándāha. Te ñayuu ní cana ri ún, tu iyó váha jeē quíjicoo i chí nasūu ñayuu váha cácuu i.

⁹ Núu súcuan te cuáhán jijnáhan ró táca núu náquijnáhan calle. Te cana ró núu nasaa ñayuu niñin rō, na quíjicoo i vico nándāha. Achí de.

¹⁰ Te ni quendacoo mozo un cuángoo tāca ichi. Te ni castútú de ndihi ñayuu ní canihin de, cúu ñayuu cunéé, cúu ñayuu váha. Te súcuan te ni chitú ñayuu ini vehe nuū iyó vico nándāha.

¹¹ Te ni quiví rey ini vehe jeē cahán de jíin ñayuu ní cutútú. Te ni jito de nuū ñin tēe jeē tu ñuhun sahma jeē ní jéhe de cuhun ñayuu quíjicoo vico nándāha.

¹² Te ni cahān de jíin tēe ún: Amigo, ¿ndese ni quiví ró yáha jéé tu ñuhun ró sahma vico nándāha? áchí de. Te máá tēe ún tu ní cahān cuiti de.

¹³ Yūcuán na te ni cahān rey jíin tēe cájeni cohō: Jni de te cuhni rō ndaha de jehē de, te quenehen ró de na quíhín de nuū quéhe nuū neé. Te yūcuan ndáhyū de te nacayihí yuhu de jeē ndóho xeēn de. Achí rey.

¹⁴ Chí cána Yaā Dios cuéhē ñayuu jeē na cándíje i. Te jecu-ni i cándíje, te máá i nácaji ya jeē ndúu i sēhe ya. Achí Jesús.

Siquí xúhun renta

(Mr. 12.13-17; Lc. 20.20-26)

¹⁵ Yūcuán na te cuangoo tēe grupo fariseo. Te ni candajnūhún de núu ndese sáha de návaha cahān yā ñin jnúhun jeē niñin de cuēchi siquí yā.

¹⁶ Te ni cataji de jecu tēe cáscuáha jíin máá de jíin tēe grupo Herodes cuangoo de. Te ni cacahān de jíin yá:

Maestro, cájini na jéé tēe cáhán ndaā cúu ní, te stéén ndaā ní ndese squícu ñayuu nuū Yaā Dios. Te tu yúhú ní jeē cahán ní ñin ñayuu siquí ní, chí tu sáha ní cuenta ndese cúu ñin ñin i, chí inuú-ni sáha ní jíin i.

¹⁷ Núu súcuan te cahān ní ndese jéni ni ní: ¿A iyó váha jeē chúnaa yō renta nuū rey nación Roma jeē jniñi nación yō, chí tuú? áchí de.

¹⁸ Te ni jini Jesús jeē cájito ndee de ya. Te ni cahān yā jíin de:

Tēe stáhú-ni cácuu ró. ¿Najehē cájito ndee rō ruhū?

¹⁹ Stéén xúhun jéé jéconaa renta na cóto ri, achí yá.

Te ni castéén de ñin denario nuū yā.

²⁰ Te ni jito ya, te ni cajnūhun yá de:

¿Ndé ñin nuū cúu jeē ndeé nuū xúhun yáha, te ndé síhví cúu jeē ndeé yáhá?

²¹ Te ni cacahān de jíin yá:

Nuū jíin síhví rey un cúu, áchí de.

Yūcuán na te ni cahān yā jíin de:

Núu súcuan te nacuáha ró núu rey un jéé yíhi cuenta nuū de, te nacuáha ró núu Yaā Dios táca jéé yíhi cuenta nuū maá yá, achí yá.

²² Te nuū ní cajini de jeē ndichí ní cahān yā jñuhun yáha, te ni canaa ni de, te ni castóo de ya, te cuango de.

Jeē ní cacajñuhún de siquī jeē nátecu ndīyi (Mr. 12.18-27; Lc. 20.27-40)

²³ Te suni quivī un ní quecoo jecu tēe grupo saduceo nuū yā. Te tēe un cácahān jeē tu nátecu cuiñi ndīyi. Te ni cacahān de jíin yā siquī iin jñuhun, achí de:

²⁴ Maestro, Moisés ni cahān de jeē núu iin tēe cuu de, te ndōo ñasihí de, te núu tú sēhe de ní iyo jíin ña, núu súcuan te cánuú jeē ñani de naquihñ ñasihí de, te sēhe de jeē cácu jíin ña nucuñiñ nuū ndīyi ñani de. Achí Moisés.

²⁵ Te ñuu na ní iyo uxā ñani. Te tēe núu ní quijnáhan de jíin ñahan. Te ni jihí de. Te jeē tú sēhe de ní iyo, te ni ndōo ñasihí de nuū ñani de.

²⁶ Te tēe ún suni ní jihí de, te tú na sēhe de ní iyo tucu. Te suni súcuan tēe unī, nde jíin ndihúxá de.

²⁷ Te nuū ní ndihí de ni cajihí, te suni ní jihí ñahan ún.

²⁸ Núu súcuan te quivī nátecu ndīyi, ¿ndé iin de cuu ña ñasihí de? Chi ndihúxá de ni condeca de ña. Achí de jíin yā.

²⁹ Yūcuán na te ni cahān yā jíin de:

Yōhyo cástívi ró jñuhun siquī jeē tu cájecūhun ni ró jeē cahān tutu ī, ni tu cájini ró jeē iyó poder Yaa Dios jeē nastécu yā ndīyi.

³⁰ Chi quivī nátecu ndīyi, te tuá na jñuhun quijnáhan tēe jíin ñahan coo. Chi coo i nájñuhun ndajéhé Yaa Dios andiví.

³¹ Te siquī jeē nátecu ndīyi, ¿á tu ní cácahu ró tutu jñuhun jeē cahān Yaa Dios jíin ró?

³² Máá rí cúu Yaa Dios Abraham jíin Isaac jíin Jacob, achí Yaa Dios. Chi vesú je ni cajihí de, te cátecu de nuū iyó máá yá, chí cúu ya Yaa sáha jeē técu ñayuu ní cáni. Achí yá jíin de.

³³ Te ñayuu un ní canaa ni i cájini nahún i jñuhun stéén yā.

Jniñu cánuú ndasí gá jeē ní ndacu Yaa Dios

(Mr. 12.28-34)

³⁴ Yūcuán na te tēe grupo fariseo ni cajini de jeē ní cajesí tēe saduceo yuhu de ni sáha ya. Te ni candutútú de nuū yā.

³⁵ Te iin de jeē cúu tēe stéén tutu ley Yaa Dios, ni cajñuhún de ya, chí coto ndee de ya cuní de:

³⁶ Maestro, ¿ndé iin cúu jñuhun ndácu jniñu cánuú ndasí gá nuū tútu ley? achí de.

³⁷ Te ni cahān Jesús jíin de:

Coo manī ndasí ró jíin máá Jítoho ró Yaa Dios, nde jnáá ndasí ró sáha ró ndihí jeē cúsiñ ni yā, nde jíin ini jíin ánuá ró, jíin ní jéé nijnñuní ró, achí tutu.

³⁸ Yáha cúu jniñu ndácu ya jeē cujéhu ga te cánuú ndasí gá.

³⁹ Te jniñu uū jeē ní ndacu ya, suni súcuan cáhān: Cundáhú ni ró jñahan ró nájñuhun cundáhú ni ró maá ró.

⁴⁰ Te chíjñi ndindúú jñuhun yáha ní quenda ndihí ley jeē ní tee Moisés, jíin ndihí jeē ní castéén tēe ni canacani jñuhun Yaa Dios, achí yá.

Siquī jeē cúu Cristo sēhe yucūn David (Mr. 12.35-37; Lc. 20.41-44)

⁴¹ Te níni cáyūcu tútu gá tēe fariseo un, te Jesús ni cajñuhun yá de:

⁴² ¿Nde se cájeni ni ró siquī Cristo? ¿Sēhe ndé yucūn cúu ya?

Te ni cacahān de:

Sēhe yucūn David, achí de.

⁴³ Te ni cahān yā jíin de:

Núu súcuan ¿te ndese cúu jeē David ni cahān de Jítoho de ya, ni sáha Espiritu Santo nde jehañ? Chi ni cahān de:

⁴⁴ Máá Jítoho yō Yaa Dios ni cahān yā jíin Jítoho rī, Yaa quiji:

Cucōo ró lado váha ri nuū cujéhu ró, te na sáha ri jeē quende ró poder táca jéé cájito uhú rohó.

Achí Yaa Dios. Achí David.

⁴⁵ Te núu sēhe yucūn David cúu Cristo, ¿te ndese cúu jeē ni cahān de jeē Jítoho de cúu ya? achí yá.

⁴⁶ Te ni iin de tu ní cúu stió cuiñi cuiti de jñuhun nuū yā. Te nde quivī ún tuá ni iin de ní chúndeyí ni de cajñuhún de ya.

Jeē ni cahān yā jeē iyó cuéchi de jññahan de (Mr. 12.38-40; Lc. 11.37-54; 20.45-47)

23

¹ Yūcuán na te ni cahān Jesús jíin ñayuu jíin tēe cácuáha jíin yá:

² Tēe cástéén tutu ley Yaa Dios jíin tēe grupo fariseo, cájeni ni de jeē ndiso jniñu de jeē steén de ley jeē ni jéhe ya nuū Moisés.

³ Núu súcuan te cuatáhú ró te squícu ró táca jéé cándacu de nuū ró. Te ma sáha ró nájñuhun cásaaha máá de. Chi cacahān-ni de, te tu cásquícu de.

⁴ Chi suni cástéén de táca ley ni catava máá de jeē yí sáha, te cátee de siquī ñayuu, te tu cácuñdeyí i squícu i. Te máá de jññahan de, chí ni iin xiní ndáha de tu cáscānda de jeē squícu de.

⁵ Te máni siquī jeē na cuájñuhún ñayuu de cúu ndihí jeē casáha de. Chi cánujñahan ni de cuhni de cuehē jñuhun tutu ī jneē de jíin ndaha de. Te suni cáscácani ga de yuhvá yusáhma de jeē steén jeē cácuñdeyí ga de vesú inga ñayuu.

⁶ Te cánujñahan ni de cucōo de nuū silla yññuhún gá nuū cáyeji ñayuu vico, jíin silla yññuhún gá ini vehe ī sinagoga.

⁷ Te suni cánujñahan ni de jeē cahān yññuhún ñayuu jíin de nuū calle, jíin jéé cahān i maestro jíin de.

8 Te maa ró jijnáhan ró, ma cuáha ró jnúhun jeé cahán ñayuu maestro jiín ró. Chi inuú cácuu ndíhi ró jéé cácuu ró hermano, te iyó iin-ni Maestro ró jeé cúu ruhū, Cristo.

9 Te ma chíñúhún ró ni iin tēe ñayivi yáha jeé cahán ró padre jiín de. Chi iyó iin-ni Tátá ró jijnáhan ró, Yaa ndeé andiví.

10 Te suni ma cuáha ró jnúhun jeé cahán i jitoho jiín ró. Chi iyó iin-ni Jitoho ró, te suu cúu ruhū, Cristo.

11 Te tēe mehñu ró jijnáhan ró jeé jejniñu nuū jnáhan, suu de cúu jeé cujéñu ga.

12 Chi tēe jeé sajhenu de maa de, sa ndululí de. Te tēe jeé sálulí de maa de, sa ndujéñu de.

13 'Nacā xeēn ndoho rōhó tēe cástéén tutu ley jiín rōhó tēe fariseo, chi tēe stáhú-ni cácuu ró. Chi cájesi ró jeé quívi ñayuu ndaha Yaa andiví jéé ndacu ya jniñu nuū i. Chi tu quívicoo maa ró, ni tu cájēhe ro jnúhun quívicoo ñayuu nducú quívi.

14 'Nacā xeēn ndoho rōhó tēe cástéén tutu ley jiín rōhó tēe fariseo, chi tēe stáhú-ni cácuu ró. Chi cáquende ró vehe ñahan ní caquendō ndáhú. Yūcuán na te cájicān tahu nahán ró návaha caní ni ñayuu jeé tú na cuēchi ró. Jeé yúcuán xeēn gā ndoho ró castigo.

15 'Nacā xeēn ndoho rōhó tēe cástéén tutu ley jiín rōhó tēe fariseo, chi tēe stáhú-ni cácuu ró. Chi ní ñuhun íchi jiín ní mar cájica cuu ró cánducú ró iin ñayuu scandíje ró sáhān maa ró. Te núu ni candíje i, te casáha ró jéé vihyá gā cúu cuēchi i jeé quihín i infierno vésú maa ró.

16 'Nacā xeēn ndoho ró, chi cácuu ró nájnūhun tēe cuáá jéé steén ichi nuū ñayuu. Chi cácahān rō: Núu ndé tēe jéjnūhun téyí de, te núu cahān de jeé Yaa Dios jeé ndeé ini templo na cuáha ya castigo núu ma squícu de, yūcuán na te tu cánuú squícu de. Te núu cahān de jeé Yaa Dios jeé chíí oro jeé iyó ini templo, na cuáha ya castigo núu ma squícu de, yūcuán na te cánuú squícu nahín de, cácahān rō.

17 Tēe cánéé tēe cuáá cácuu ró jéé castívi ró jnúhun cácahān rō. ¿Ndé iin cúu jeé cujéñu ga, á oro un chí Yaa Dios jeé ndeé ini templo jeé sáhií oro un?

18 Te suni cácahān rō: Núu ndé tēe jéjnūhun téyí de, te núu cahān de jeé Yaa Dios jeé chíí altar na cuáha ya castigo núu ma squícu de, yūcuán na te tu cánuú squícu de. Te núu cahān de jeé Yaa Dios jeé chíí ndajniñu jeé cásoó nuū altar, na cuáha ya castigo núu ma squícu de, yūcuán na te cánuú squícu nahín de, cácahān rō.

19 Tēe cánéé tēe cuáá cácuu ró jéé castívi ró jnúhun cácahān rō. ¿Ndé iin cúu jeé cujéñu ga, á ndajniñu yúcu nuū altar, chí Yaa Dios jeé sáhií yā ndajniñu ún?

20 Núu súcuán te tēe jéjnūhun téyí, te núu ndácunehen de Yaa Dios jeé chíí altar, núu súcuán te nde jiín ndajniñu yúcu nuū altar ndácunehen de.

21 Te tēe jeé jéjnūhun téyí, te núu ndácunehen de templo, núu súcuán te nde jiín Yaa Dios jeé ndeé ini templo ndácunehen de.

22 Te tēe jéjnūhun téyí, te núu ndácunehen de andiví, núu súcuán te suni ndácunehen de mesa Yaa Dios te nde jiín maa Yaa Dios jeé ndeé nuū mesa un.

23 'Nacā xeēn ndoho rōhó tēe cástéén tutu ley jiín rōhó tēe fariseo, chi tēe stáhú-ni cácuu ró. Chi casáha ró úxí uxí nuñi tamínú jiín yucú anís jiín yucú comino, te cásoó ró iin iin siquí taca úxí un núu Yaa Dios. Te cástóo ró jnúhun cánuú ndasí gā nuū ley, suu jeé cáca ndaā ró, jiín jéé cundáhú ni ró jnáhan ró, jiín jéé candíje ró. Taca jéé yáha cánuú sáha ró núu, te suni ma stóo ró jéé sóó ró taca yūcú ún.

24 Cácuu ró nájnūhun tēe cuáá jéé steén ichi nuū ñayuu. Chi cásquícu ró iin jeé lulí gā un, te cástóo ró jéé cánuú gā. Te suu cúu nájnūhun jeé cátava ró chūcún ndíhi jeé ñuhun nuū ndúxi, te cácoó ró iin quiti cáñu jeé naní camello.

25 'Nacā xeēn ndoho rōhó tēe cástéén tutu ley jiín rōhó tēe fariseo, chi tēe stáhú-ni cácuu ró. Chi nájnūhun jeé cáncate ró yátā vaso jiín yátā cohó. Te ichi íni ró chi ñuhun máni maa jnúhun cuiñá jiín jnúhun ndíyo ni.

26 Tēe cuáá cácuu ró, fariseo. Xihna gā sáha ró jéé coo ndoo ini anuá ró, te yūcuán na te suni coo ndoo taca jéé casáha ró jéé cájito ñayuu nuū.

27 'Nacā xeēn ndoho rōhó tēe cástéén tutu ley jiín rōhó tēe fariseo, chi tēe stáhú-ni cácuu ró. Chi cándāa ró nájnūhun vehe ndíyi nuū panteón jeé cáyaa. Chi ichi yátā jito luu, te ichi íni ñuhun chítú yiquí ndíyi jiín taca jéé tehyú.

28 Te súcuán cácuu maa ró, chi ichi yátā ró casáha ró jeé tēe ndaā cácuu ró núu ñayuu. Te ichi íni ró ñuhun chítú jnúhun stáhú-ni jiín jnúhun néé.

29 'Nacā xeēn ndoho rōhó tēe cástéén tutu ley jiín rōhó tēe fariseo, chi tēe stáhú-ni cácuu ró. Chi casáha ró vehe siquí nuū yíndūji ndíyi jíí ró, tēe ni canacani jnúhun Yaa Dios nde jehañān. Te casáha luu ró vehe siquí nuū yíndūji taca tēe ni Iyo ndaā.

30 Te cácahān rō: Núu jeé suni yúcu yó tiempo jeé ní cotecun ndíyi jíí yó, te ma squívi nduu yó jiín de jeé cáñi yó tēe ni canacani jnúhun Yaa Dios, achí ró.

31 Te súcuán cácahān ndaā ró jeé maa ró cácuu yucún ñayuu ni cajehni tēe ni canacani jnúhun ya.

³² Núu súcuan te tāca cuéchi jeē ní casquéjéé ndáiyi jíi rō, máni un cásáha ga maá rō.

³³ Va sēhe coō cácuu rō, chí xeēn rō nájñuhun coō. ¿Nde se cācu rō jéé ma jnahnú ndetū rō quingoo rō infierno?

³⁴ Núu súcuan te taji rí tāca tée nacani jñuhun Yaā Dios nuū rō, jíin tāca tée ndíchí jéé castéén jñuhun ya. Te sava de cahni rō, te sava de cata caa rō jíicā cruz. Te sava ga de cani rō de ini tācá vehe lí sinagoga, te scúnu rō de quingoo de tācá ñuu.

³⁵ Te súcuan te condee cuéchi siquī maá rō jeē ní cajehni jíi rō tāca tée ndaā, xihna gā nde Abel tēe ndaā, te nde Zacarías sēhe Berequías, tēe ni cajehni de ini templo sava mēhñu cuarto lí jíin altar.

³⁶ Jendaá cahán rí jíin rō jeē tāca cuéchi yáha condee siquī ñáyuu iyó vijna.

*Jeē cuculhyá ni yā jíto ya ñuu Jerusalén
(Lc. 13.34-35)*

³⁷ Róhó ñuu Jerusalén, jéhni rō tēe cánacani jñuhun Yaā Dios, te jéhe ro yúu xiní tēe tájí Yaā Dios vejicoo nuū rō. Te cuehē jínu ní cuni rí nastútú rí sēhe rō, nájñuhun ndují jéé nastútú tí sēhe tí chíji ndijēn tí, te tu ní cúní rō.

³⁸ Núu súcuan te vijna te stóo uun na rí rohó jíin sēhe rō.

³⁹ Chí cahán rí jíin rō jéé ndé vijna te ma cóto cuiti gā rō nuū rí, chí nde quíji quiví jéé cahán sēhe rō: Yóhyo vāha Yaā cúu Yaā véndiji jíin jniñu máá Jítoho yō Yaā Dios, achi i. Achi yá.

*Jeē ní cachi yā jeē nāá templo
(Mr. 13.1-2; Lc. 21.5-6)*

24

¹ Te ni quenda Jesús ini templo cáhnu cuahān yā. Te ni quecoo tēe cáscuáha jíin yá, te ni cacahān de jíin yá siquī tācá vehe jeē ndejnāhan jeē cúu máá templo un.

² Te ni cahān yā jíin de:

Tāca jéé cájito rō yáha, jendaá cahán rí jíin rō jeē quíji quiví jeē ma cóso jnāhan ga ní ñn yúu, chí ndihi jnanú. Achi yá.

*Na seña coo nuū cuácuyajni ndihi ñayiví
(Mr. 13.3-23; Lc. 21.7-24; 17.22-24)*

³ Te ni jehēn yā jíin tēe cáscuáha jíin yá nde yucu Olivos, te ní cucōo ya yūcuán. Te ni quecoo de nuū yā, te ni cacajñuhun sñn de ya:

Castūhun ní ndé quiví coo tāca jéé ní cachi ní jéé coo. ¿Te na seña coo núu ní cuyajni quiví ndíji ní jíin jéé jínu ñayiví? áhí de.

⁴ Te ni cahān Jesús:

Coto rō jéé ma stahú ní ñn de rōhó.

⁵ Chí quíjicoo cuehē tēe jeē stahú jíin síhví rí. Máá rí cúu Cristo, achi de. Te súcuan stahú de cuehē ñayuu.

⁶ Te nihñn rō jñuhun jeē tāca lado iyó guerra, chí je yajni coo guerra. Te ma yūhu rō, chí cánuú coo súcuan. Te ní ná tu jinū quiví ndihi ñayiví.

⁷ Chí ndonda nación siquī inga nación, te ndonda ñuu siquī inga ñuu jeé cuajnáhan. Te coo jnamā jíin cuéhyi xeēn. Te cháha chúcuan jñāa.

⁸ Te tāca jéé yáha cácuu jñundóho quejéé xihna ñúhún gá.

⁹ Yūcuán na te nastúu i rōhó jíjnāhan rō jéé stóho i rōhó te cahni i rōhó. Te ndihi ñayuu quiti ní i nuū rō jeé siquī ruhú.

¹⁰ Te quiví ún chí cuehē ñayuu candíje caca yátá i, te quiti ní i nuū jnāhan i, te nastúu jnāhan i.

¹¹ Te canecoo cuehē tēe stáhú, te cahān de jeē jñuhun Yaā Dios cánacani de, te stáhú de cuehē ñayuu.

¹² Te nducuehē jniñu néé, te jeé yúcuan cuehē i ma cóo maní gā i.

¹³ Te ñayuu cuiñi ñihñn jíin jñuhun rí nde quiví jínu, ñayuu ún chí cácu.

¹⁴ Te jñuhun yáha siquī ndese ndácu Yaā Dios jniñu, cuité núu ní cáhnu ñayiví, návāha cuni ñayuu tācá nación. Yūcuán na te jínu ñayiví.

¹⁵ Te Daniel, tēe ni nacani jñuhun Yaā Dios, ní tee de jñuhun ñn tēe néé jéé quíji. Te rōhó jéé cácahu tutu ún, na jécūhun ní rō. Chí ñn quiví te cuni rō jeé sáha ndevāha de jeé stívi de tācá ndajniñu lí ini templo, te cuiñi de ini lugar lí.

¹⁶ Te núu cuni rō jeé súcuan cúu, te ñayuu cáyūcú región Judea, na cúnu i caa i yucu quingoo i.

¹⁷ Te ñayuu cáyūcu núu quéhe, ma ndívi i ini vehe jeé quēnehen i ndajniñu i, chí cánuú cunu yachí i návāha cácu i.

¹⁸ Te ñayuu cáhñn nuū ítu, ma ndíji i vehe jeé quihñ i sahma i.

¹⁹ Te quiví ún nacá jeē ndahú ñahan cáñuhun sēhe jíin ñahan cándeca yiquín, chí ma cúnihñ ña cunu yachí ña.

²⁰ Te cacān tahú rō jeé ma quíji jñundóho un jéé cunu rō máá tiempo cúun yuhvá ní quiví ndétátú.

²¹ Chí jeé quejéé un te coo cuehē jñundóho xeēn, jeé ná tu coo súcuan nde quiví ní jecōo ñayiví te nde vijna. Te jeé ndhí jñundóho ún te ní ma cóo ga jeé súcuan.

²² Te núu tú nastíyi Yaā Dios tiempo jñundóho ún, te ní ñn ñayuu ma cácu cuiti i. Te jeé siquī ñáyuu cáandíje jeé ní nacáji ya, jeé yúcuan nastíyi ya tiempo un.

²³ Núu súcuan te núu ñn ñayuu cahān jíin rō: Yáha condēhe rō íne Cristo, chí: Yūcuán condēhe rō íne ya, achi i, te ma candíje rō jéé cahān i.

²⁴ Chí canecoo tēe cástáhú jéé achi de jeé Cristo cúu de, chí achi de jeé tēe nácani jñuhun Yaā Dios cúu de. Te sáha de jniñu

jéhnú jeē naa ni ñayuu coto i, návāha stáhú de nde maá ñayuu ní nacāji ya, te núu na cúu.

²⁵ Je ni castūhun rí nuū rō vijna nde ná tu coo.

²⁶ Núu súcuan te núu cahān ñayuu jín rō: Cuácondēhe rō, chí nde nuū ñūhun téhé íne ya, achi i, te ma quihín rō condēhe rō. Chí núu cahān i: Nehen condēhe rō, chí ini vehe yāha íne ya, achi i, te ma candíje rō jínáhan rō.

²⁷ Chí nájñūhun jeē ndíndēe sáha taja te cundíjin nde ichi núu cáne niāndii jín ndé ichi núu queé niāndii, suni súcuan coo quiví ndiji ruhū, Yaā ní nduu tēe, chí ndihi ñayuu coto.

²⁸ Te nájñūhun jeē cututú téji ndé-ni cúu nuū catú quiti ní jhí, suni súcuan coo tāca jéé ní cáhan rí ndé-ni cúu-ni nuū cáhíyo ñayuu.

Ndese coo quiví ndiji Yaā ní nduu tēe

(Mr. 13.24-37; Lc. 21.25-33; 17.26-30, 34-36)

²⁹ Yūcuán na te núu ni ndihi tāca jñúndóho quiví ún, te cojnúú niāndii, te yoō ma ndíi gā. Te ningoo quāmi andiví. Te tāca jéé íin andiví chí quisi i.

³⁰ Yūcuán na te coto ñayuu nuū maá rí, Yaā ní nduu tēe, ndiji rí ichi ándiví. Te ndahyū ñayuu táca nación ní cáhnu ñayiví. Te coto i nuū ruhū, Yaā ní nduu tēe, ndiji rí jín vícō andiví, te condiso rí cuehē poder, te yōhyo luu kujéhnú rí.

³¹ Te tají rí ndajéhé rí quingoo, te tiví nihin ya trompeta. Te quinastutú yá ñayuu ní nacāji rí ndicúún lado ñayiví, nde íin lado ñayiví jín ndé inga lado.

³² Vijna te scuáha rō ndese sáha nundēhe higo: Núu je ní nane numa, te ní najee ndaha, te cájini rō jeé jé ní cuyajni tiempo jhíni.

³³ Te suni súcuan núu ní cajini rō jeé ní quejéé cúu táca jñiñu jeé ní cáhan rí, yūcuán na te na jécūhun ni rō jeé ní cuyajni quiví ndiji rí, te yachí coo.

³⁴ Jendaá cahán rí jín rō jeé ma cúu ndihi ñayuu jeé cóto jñúndóho ún, chí nde squícu ndihi jñiñu ún.

³⁵ Andiví jín ñayiví chí naa, te tāca jñūhun cáhan rí chí ma nāa, chí ndihi squícu.

³⁶ Te quiví jín hora jeé ndíji rí, tú ni íin ñayuu jíní, ní maá ndajéhé cáhíyo andiví, ní maá rí, Sēhe Yaā Dios. Chí maá íin ní Tátá rí Yaā Dios cúu jeé jíní.

³⁷ Chí nájñūhun ní cuu quiví ní íyo Noé, suni súcuan coo quiví ndiji ruhū, Yaā ní nduu tēe.

³⁸ Chí quiví ún, nde ná tu cuun saū xeén, te cáyeji i cájini i, cámandāha i, te cájēhe i sēhe síhí i jeé nándāha, nde ní jinū quiví jeé ní quívi Noé ini barco cáhnu jeé naní arca.

³⁹ Te tu ní cáchandíje ñayuu jeé cuun saū xeén, te ní cuun, te ní ndaa ndute ní cajihí

ndihi i. Te suni súcuan coo núu na ndíji ruhū, Yaā ní nduu tēe.

⁴⁰ Te quiví ún cone uū tēe sájniñu nuū ítu. Te íin de naquihín rí, te inga de ndōo.

⁴¹ Te coo uū ñahan jeé ndíco cáhnu, te íin ña naquihín rí, te inga ña ndōo. Súcuan cuu jeé sava ñayuu naquihín rí te sava i quendōo, chí tu ní cáchandíje i.

⁴² Núu súcuan te ndito na cóo ní rō, chí tu cájini rō na quiví ndiji Jitoho rō.

⁴³ Te na chúhun ní rō jeé cahán jñūhun yátá yáha: Tēe chíi vehe, núu jeé jíní de na hora quiji ñacuíhná, te condito de, te ma cuáha de jñūhun sáculhná ndajniñu vehe de núu.

⁴⁴ Te róhō jínáhan rō, suni súcuan coo tūhva rō, chí maá hora jeé tú na vé cájeni ní rō, te ndiji ruhū, Yaā ní nduu tēe.

Jñūhun yátá síquí mozo

(Lc. 12.41-48)

⁴⁵ Núu súcuan te coo rō nájñūhun íin mozo jeé ndíto xiní te squícu vāha. Te maá patrón ní jeni de mozo un jéé cóto i ñayuu vehe de, návāha scáji i maá hora.

⁴⁶ Te yōhyo ndetu mozo un jéé núu ní ndee patrón, te cuni de jeé súcuan squícu vāha i.

⁴⁷ Jendaá cahán rí jín rō jeé cani de mozo un jéé cóto i ndihi ndajniñu de.

⁴⁸ Te núu mozo sáha néé cúu i, te jéni ní i jeé ma ndíji yachí patrón i,

⁴⁹ te quejéé i cani i jñáhan mozo i, te caji i coho i jín tēe cánañini,

⁵⁰ núu súcuan te ndee-ni patrón quiví jeé tu ndétu i jín hora jeé tú na vé jéni ní i.

⁵¹ Te stóho xeén de i, te squívi de i nuū cáhíin tēe stáhú-ni. Te yūcan ndáhyū i te nacayihí yuhu i jeé ndoho xeén i. Achi yá.

Jñūhun yátá síquí uxí sūchi síhí

25

¹ Te suhva cúu jeé ndácu Yaā andiví jniñu nuū ñayuu: Cúu nájñūhun íin vico nándāha. Te ní íyo uxí sūchi síhí jeé ní caquihín i linterna cándaha i, te ní quendácoo i cuajñahan i íin tēe nandāha.

² Te uhūn i chí tú ndito xiní i, te uhūn i chí ndito xiní i.

³ Te sūchi tú ndito xiní, cándaha i linterna i, te tu cándaha i petróleo jeé náchuhun i.

⁴ Te sūchi ndito xiní, chí cándaha i botella petróleo jín linterna i.

⁵ Te níni cúcuéé quiji tēe nandāha ún, te ní quee máhná, te ní caquixí ndihi i.

⁶ Te nuū ní cuu sava ñuú, te ní cajini i jeé cácana jee: Je vēji tēe nandāha. Cuángoo quijñahan rō de jínáhan rō, áchi.

⁷ Yūcuán na te tāca sūchi síhí un ní candonda i, te ní casátūhva i linterna i.

⁸ Te sūchi tú ndito xiní, ní cacahān i jín sūchi ndito xiní: Cuáha jecu petróleo nuū rí jínáhan rō, chí cuandahvā linterna rí, achí i.

⁹ Te ni cacahān sūchí ndito xinī: Ma cúu, chí ma cānda jeē cúu máá rí jín máá ró. Vāha ga quingoo ró núu cúyāhu, te cuaan ró jée cúu máá ró. Achí i.

¹⁰ Te níní cuāngoo i cuaan i, te ni quee-ni tēe nandāha. Te sūchi cáhiyo túhva un, ní quívicoo i jín de vico nāndāha de. Te ni ndihyū yehyí.

¹¹ Te ni cunúu, te ni quecoo uhūn gā sūchi shí un. Te ni cacahān i jín tēe nāndāha: Nune ní yehyí na quívicoo ná, áchí i.

¹² Te ni cahān maá de: ¿Ndé nuū véjicoo ró? Chi tu jín rí rohó, áchí de. Achí yá.

¹³ Yūcuán na te ni cahān yā:

Núu súcuan te ndito coo ni ró, chí tu cájini ró na quívicoo na hora ndiiji ruhū, Yāá ní nduu tēe. Achí yá.

Jñuhun yátá síquī tēe ní jēhe núu xūhun núu tāca mozo

¹⁴ Te suhva cúu jeē ndácu Yāá andiví jniñu nuū ñáyuu: Cúu nájñuhun in tēe jeē quihín jicá de inga ñuu. Te nde ná tu quihín de te ni cana de mozo de jínáhan, te ní jēhe núu de xūhún de nuū i, jeē na sájñiñu i jín návāha nducuehē.

¹⁵ Te nuū in i ní jēhe de uhūn mil xūhun cáa. Te nuū inga i ní jēhe de uū mil. Te nuū inga i ní jēhe de in mil. Súcuan ní jēhe de, chí jíní de nasaa canda in in i sájñiñu i jín. Yūcuán na te ní quihín de ichi cuahān jicá de.

¹⁶ Te mozo jeē ní quihín uhūn mil xūhún, ní sájñiñu de jín. Te ní nihín de uhūn gā mil síquī.

¹⁷ Te mozo jeē ní quihín uū mil xūhún, suni ní nihín de uū gā mil síquī.

¹⁸ Te mozo jeē ní quihín in mil xūhún, ní jehēn de ní jete de yaū, te ní chisāhí de xūhún patrón de.

¹⁹ Te ní yāha cuehē tiempo, te ní ndee patrón mozo un jínáhan. Te ní nandacān de cuenta nuū i.

²⁰ Te ní quee mozo jeē ní quihín uhūn mil xūhún un, te ní nacuaāha de xūhún un núu patrón de jín uhūn gā mil jeē ní nihín de síquī. Te ní cahān de: Ní jēhe ní uhūn mil nuū ná, te yāha iyó uhūn gā mil jeē ní nihín na síquī. Achí de.

²¹ Te ní cahān patrón jín de: Iyó váha núu súcuan. Yōhoyo váha mozo cúu ró jée squícu váha ró. Chí váha ní squícu ró in jniñu lúli-ni, te víjna te cuāha ri jniñu jéhu ndacu ró. Te quívicoo ró núu cusí ní ró jín rí. Achí de.

²² Yūcuán na te ní quee mozo jeē ní quihín uū mil xūhún un. Te ní cahān de: Ní jēhe ní uū mil nuū ná, te yāha iyó uū gā mil jeē ní nihín na síquī. Achí de.

²³ Te ní cahān patrón jín de: Iyó váha núu súcuan. Yōhoyo váha mozo cúu ró jée squícu váha ró. Chí váha ní squícu ró in jniñu lúli-ni,

te víjna te cuāha ri jniñu jéhu ndacu ró. Te quívicoo ró núu cusí ní ró jín rí. Achí de.

²⁴ Te ní quee mozo jeē ní quihín in mil xūhún un, te ní cahān de jín patrón: Je jíní na níhín jée tēe xeēn cúu ní. Chí cuehē gā cuní ní vésú jeē cúu sáha mozo ní, te cuehē gā nāndacān ní vésú jeē ní jēhe ní.

²⁵ Te jeē yúcuan ní yūhu ná, te ní jehēn na ní chisāhí ná xūhun ní chíji ñuhun. Te yāhá na nácuāha na xūhun ní. Achí de.

²⁶ Te ní cahān patrón jín de: Mozo cuxí cúu ró te máni jniñu neé sáha ró. Chí jení ní ró jeē cuehē gā cuní rí vésú jeē cuu sáha mozo rí, te cuehē gā nāndacān rí vésú jeē ní jēhe rí.

²⁷ Núu jeē ní chūne ró xūhun rí nuū banco nuú, te jeē ní ndee rí te naquihín rí xūhun rí nde jín séhe xūhun núu. Achí de jín i.

²⁸ Te ní cahān de jín táca gá mozo de: Núu súcuan te quende ró mil xūhun jíná nuū i, te cuāha ro núu mozo névāha uxí mil.

²⁹ Chí ñayuu jeē névāha, sa quiji ga nuū i, te coneváha cuehē i. Te ñayuu jeē tu névāha, sa cujiyo-ní vésú jecu jeē névāha i.

³⁰ Te mozo yāha jée tu sájñiñu váha, quenehen ró i na quihín i nuū quéhe nuū neé. Te yúcuan ndáhyū i te nacayihí yuhu i jeē ndoho xeēn i. Achí patrón un.

Siquí jeē cóo juicio tāca nación

³¹ Te ní cahān gā yā:

In quívicoo te ndiiji máá Yāá ní nduu tēe, te cuu ya Rey nuū ñáyuu. Te táca ndajehé yā cuiñí ní xiiñ ya. Te cucóo ya mesa nuū ndácu ya jniñu, te yōhoyo luu cujéhu ya.

³² Te ndutútú ñayuu táca nación nuū yā. Te sásin ya i jínáhan i, nájñuhun cúsin lanchi jín ndixúhú sáha tēe ndíto ti.

³³ Te ñayuu váha jeē cúu nájñuhun lanchi, chucú yá i lado váha ya. Te ñayuu neé jeē cúu nájñuhun ndixúhú, chucú yá i lado jecó yá.

³⁴ Yūcuán na te cahān Rey jín ñayuu cáhín lado váha ya: Nacá ndetú ró jeē ní sáha Tátá rí jín ró. Nehen quívicoo ró núu ndácu ró jniñu. Chí nde quívicoo ní jecóo ñayiví te je ní sátuhva ya nuū ndacu ró jniñu.

³⁵ Chí ní jii rí sóco, te ní cajēhe ro jée ní yeji rí. Ní jichí rí ndute, te ní cajēhe ró jée ní jihí rí. Ní quiji rí nde ñuu jicá, te ní cajēhe núu ró vehe ní ndóo rí.

³⁶ Ní cumaní sahma rí, te ní cajēhe ró. Ní cocuhú rí, te ní jecondēhe ró ruhú. Ní ine rí vecāa, te suni ní jecondēhe ró ruhú. Súcuan cahān yá jín ñáyuu cáhín lado váha ya.

³⁷ Yūcuán na te cahān ñayuu váha un jín yá: ¿Na quívicoo ní cajito ná níhín jée jii ní sóco, te ní cajēhe na jée ní yeji ní, chí jée jichí ní ndute, te ní cajēhe ná ní jihí ní?

³⁸ ¿Te na quívicoo ní cajito ná jée ní quiji ní ndé ñuu jicá, te ní cajēhe núu ná vehe ní ndóo ní, chí jée cúmaní sahma ní, te ní cajēhe ná?

³⁹ ¿Te na quiví ní cajito ná jéé cuhú ni, chí jéé íne ní vecáa, te ní jecondéhe ná nihín? achi i.

⁴⁰ Yücuán na te cahán Rey jín i: Jendaá cahán rí jín ró jéé ná ní casáha ró súcuan jín ñn táca hermano rí jeé cáandje, vesú ñayuu núu ga cúu i, te nuú maá rí ní casáha ró.

⁴¹ Yücuán na te suni cahán Rey jín ñayuu cáhiin lado jecó yá: Ñayuu jnahnú ndetú cácuu ró. Cuiyo quingoo ró núu ñuhún jeé cayú ní cáni, nuú iyó túhva cone jexeén jín táca táchi jeé cájejniñu nuú.

⁴² Chí ní jii rí sóco, te tu ní cájéhe ro jéé cáji rí. Ni jichí rí ndute, te tu ní cájéhe ro jéé coho rí.

⁴³ Ni quiji rí nde ñuu jicá, te tu ní cájéhe núu ró vehe ndóo rí. Ni cumaní sahma rí, te tu ní cájéhe ró. Ni cocuhú rí, ní ine rí vecáa, te tu ní jécondéhe ró ruhú. Súcuan cahán yá jín ñayuu cáhiin lado jecó yá.

⁴⁴ Yücuán na te cahán ñayuu un jín yá: ¿Na quiví ní cajito na nihín jéé jii ní sóco, chí jéé jichí ní ndute, chí jéé ní quiji ní ndé ñuu jicá, chí jéé cúmaní sahma ní, chí jéé cuhú ní, chí jéé íne ní vecáa, te tu ní cájéhe na jéé cúmaní nuú ní? Achi i.

⁴⁵ Yücuán na te cahán yá jín i: Jendaá cahán rí jín ró, jeé tu ní casáha ró súcuan jín ni ñn táca hermano rí jeé cáandje, vesú ñayuu núu ga cúu i. Núu súcuan te suni nuú maá rí cúu jeé tu ní casáha ró, achi yá.

⁴⁶ Yücuán na te quingoo ñayuu un núu ndóho i ní cáni. Te ñayuu váha un quívicoo i nuú cótecu i ní cáni. Achí Jesús.

Jeé ní casquínhan de jñuhun jeé jñi de Jesús

(Mr. 14.1-2; Lc. 22.1-2; Jn. 11.45-53)

26

¹ Te nuú ní ndihi ní cahán Jesús táca jñuhun yáha, te ní cahán yá jín téé cáscuáha jín yá:

² Je cájini ró jeé uú na quiví te coo vico pascua. Te ruhú, Yaá ní nduu téé, nastúu i ruhú jeé cúu rí jicá cruz, achi yá.

³ Yücuán na te sutú cácujeñhu, jín téé cástéén tutu ley, jín táca téé jéñhu jeé cándacu jniñu nuú ñayuu hebreo, ní candutútú de ini patio vehe palacio maá sutú cujeñhu ga jee naní Caifás.

⁴ Te ní candajñuhún de ndese jñi de Jesús jín jñuhun stáhú, te cahni de ya.

⁵ Te ní cacahán de:

Ma jñi yó de máa quíví vico, chí ndonda ñayuu siquí yó, achi de.

Jñuhun ñahan jeé ní chuhun perfume xiní yá

(Mr. 14.3-9; Jn. 12.1-8)

⁶ Te íne Jesús ñuu Betania vehe Simón, téé ní ndoho cuehyí stehyú.

⁷ Te ní quee ñn ñahan nuú yá, ndáhá ña ñn frasco yuú luu jeé ñuhun aceite perfume jeé

yóhyo yahu ndéé. Te ní chuhun ña xiní yá níni jéé yéji yá staa.

⁸ Te ní cajito téé cáscuáha jín yá, te ní caquiti ní de, te ní cacahán de:

¿Najehé cúu jeé náa saá-ni perfume jiñá?

⁹ Chí cuu xico yahu yó núu, te cuáha yo xuhun núu ñayuu ndahú. Achí de.

¹⁰ Te ní jini Jesús jñuhun cacahán de. Te ní cahán yá jín de:

¿Naun casáha ró jéé nácani uhú ní ñahan yáha? Chí ñn jniñu váha cúu jeé ní sáha ña jín rí.

¹¹ Chí níni coyúcu ñayuu ndahú jín ró, te ruhú chí tuá condee rí jín ró.

¹² Chí jeé ní chuhun ña perfume yáha ruhú, suu cúu jeé ní sátúhva ña ruhú nde quiví quínduji rí.

¹³ Jendaá cahán rí jín ró jeé ní cáhnu ñayiví ndé-ni cúu nuú cuité jñuhun yáha jéé jnáma rí ñayuu, suni nacani i jñuhun jeé ní sáha ñahan yáha, návaha cocuhun ní ñayuu ña, áchi yá.

Jeé ní nastúu Judas yá

(Mr. 14.10-11; Lc. 22.3-6)

¹⁴ Yücuán na te ñn jeé ndihúxí uú téé cáscuáha ún, nání de Judas Iscariote, ní jehén de nuú sutú cácujeñhu.

¹⁵ Te ní cahán de jín:

¿Nasaa cuáha ní núu ná, te na nastúu ná de nuú ní? áchi de.

Te ní cájéhe ocó uxí xuhun plata nuú de.

¹⁶ Yücuán na te nde quiví un ní quejéé de ndúcu de modo ndese nastúu de ya nuú sutú jijnáhan.

Jeé ní jequin yá Cena yá

(Mr. 14.12-25; Lc. 22.7-23; Jn. 13.21-30; 1 Co. 11.23-26)

¹⁷ Te máa quíví jeé quejéé vico jeé cáyeji ñayuu pan jeé tú na levadura yíhi, te ní quijicoo téé cáscuáha un núu Jesús. Te ní cacahán de jín yá:

¿Ndé nuú cuní ní jéé quisatúhva ná cuxíni ní vico pascua? áchi de.

¹⁸ Te ní cahán yá:

Cuángoo nde ñuu, vehe téé jeé jé ní cacahán yó, te cahán ró jín de: Achí máa Maestro jeé ní cuyajni quiví cuu yá. Te vijna te caji yá vico pascua ini vehe ní jín téé cáscuáha jín yá, achi ró. Achí yá.

¹⁹ Te téé cáscuáha jín yá, ní casáha de nájñuhun ní ndacu Jesús jniñu nuú de, te ní casatúhva de jeé cuxíni ya vico pascua.

²⁰ Te jeé cuácuaa, te ní quee yá, te ní cocóo ya mesa jín ndihúxí uú téé cáscuáha jín yá.

²¹ Te níni yéji yá jín de te ní cahán yá:

Jendaá cahán rí jín ró jeé ñn róhó nastúu ruhú vijna, áchi yá.

²² Te ní cacucuihyá ndasí ní de. Te ná ñn ná ñn de ní cacajñuhún de ya:

¿A sáña cúu? áchi de.

²³ Te ní cahán yá:

Ĥin r6h6 j6e c6y6ji c6hnu j6in r6 ĥin coh6, suu r6 nast6u ruh6.

²⁴ Te ruh6, Ya6 n6 nduu t6e, jenda6 c6u je6 quih6n r6 cuu r6, n6jn6hun y6s6 jn6hun r6 nu6 t6tu ĥi. Te nac6 xe6n ndoho t6e nast6u ruh6. V6ha ga n6u tu n6 c6cu t6e un n6u, 6ch6 y6.

²⁵ Y6cu6n na te ni cah6n Judas, t6e nast6u ya:

¿A s6ña c6u, Maestro? ach6 de.

Te ni cah6n y6 j6in de:

Suu r6 c6u, 6ch6 y6.

²⁶ Te n6n6 j6e c6y6ji de j6in y6, te ni quihin ya pan, te ni nacuat6h6 y6, te ni tah6 cu6ch6 y6, te ni j6he ya nu6 t6e c6scu6ha j6in y6. Te ni cah6n y6:

Caj6 r6 j6jn6han r6, ch6 y6ha c6u y6qui c6ñu r6, ach6 y6.

²⁷ Y6cu6n na te ni quihin ya ĥin copa nd6xi uva, te ni nacuat6h6 y6, te ni j6he ya nu6 de. Te ni cah6n y6:

Coho j6jn6han r6.

²⁸ Ch6 y6ha c6u n6ñ6 r6 je6 cu6ha ri je6 c6u contrato je6, te cati je6 ndundoo cu6chi cu6h6 ñayuu, te coo jn6hun c6hnu ni nu6 cu6ch6 i.

²⁹ Te c6h6n r6 j6in r6 je6 nd6 vijna te ma coh6 ga r6 nd6xi ndeh6 uva y6h6, ch6 nde quiji quiv6 ndacu T6t6 r6 jni6nu n6 ñay6v6, te s66 te coho tucu ri j6in r6 j6jn6han r6. Ach6 y6.

Je6 ni cachi y6 je6 y6hu Pedro cah6n de je6 j6ni de ya

(Mr. 14.26-31; Lc. 22.31-34; Jn. 13.36-38)

³⁰ Te ni jita ya ĥin yaa ĥi j6in de j6jn6han de. Te ni quenda ya cuah6n y6 j6in de nde yucu Olivos.

³¹ Y6cu6n na te ni cah6n y6:

Nd6vii r6 nay6hu r6 je6 siqu6 ruh6 jecu66 vijna. Ch6 suhva je y6s6 jn6hun r6 nu6 t6tu ĥi, ni cah6n Ya6 Dios: Cu6ha ri jn6hun je6 c6hni ñayuu t6e nd6to lanchi, te lanchi un cuit6 n6u ti je6 y6hu t6, ach6.

³² Te je6 n6tecu r6, te x6hna ruh6 cosn6u r6 quih6n r6 regi6n Galilea, te s66 te najin6coo r6, 6ch6 y6.

³³ Y6cu6n na te ni cah6n Pedro:

V6s6 nd6hi de na nay6h6 de, te m66 n6 ch6 ma nay6h6 cuiti n6, 6ch6 de j6in y6.

³⁴ Te ni cah6n y6 j6in de:

Jenda6 cah6n r6 j6in r6 je6 jecu66 vijna, nde n6 tu cana l6hli, te y6hu r6 je6 jn6 ñayuu roh6, te un6 j6nu cah6n r6 je6 tu j6ni r6 ruh6, ach6 y6.

³⁵ Te ni cah6n Pedro j6in y6:

V6s6 n6u cuu na j6in n6, te ma cah6n cuiti na j6e tu j6ni na nih6n, 6ch6 de.

Te suni s6cuan ni cacah6n nd6hi t6e c6scu6ha j6in y6.

Je6 ni j6c6n tah6 y6 nu6 huerto Getseman6
(Mr. 14.32-42; Lc. 22.39-46)

³⁶ Y6cu6n na te ni j6nu Jes6s j6in t6e c6scu6ha j6in y6 ĥin lugar nu6 nan6 Getseman6. Te ni cah6n y6 j6in de:

Y6h6-ni cuc6o r6, te na quih6n r6 y6cuan cac6n tah6 r6, ach6 y6.

³⁷ Te ni jeca ya Pedro j6in ndind6u6 sehe Zebedeo cuah6n y6 j6in de. Te ni quej6e y6 cucuih6 ndas6 ni y6 te c6xi6 ni y6 je6 quiji jn6nd6ho siqu6 y6.

³⁸ Y6cu6n na te ni cah6n y6 j6in de:

Y6h6 cucuih6 ni r6, te nd6c6 s6ha je6 c6u r6. Y6h6 condetu r6 te condito r6 j6in r6.

³⁹ Te ni jica ya jecu g6, te ni jecuiñ6 yit6 y6 ni jequin ya nu6 y6 nu6 ñ6hun, te ni j6c6n tah6 y6 suhva nu6 Ya6 Dios:

T6t6 ma6 n6, n6u cuu te tejiyo ni jn6nd6ho y6ha j6e ma quiji siqu6 n6. Te nas6u je6 cun6 ma6 n6, ch6 je6 cun6 ma6 ni na coh6, 6ch6 y6.

⁴⁰ Y6cu6n na te ni ndee y6 nu6 ndin6ni t6e c6scu6ha j6in y6, te ni jito ya je6 c6quix6 de. Te ni cah6n y6 j6in Pedro:

¿A tu ni c6nda r6 condito r6 j6in r6 v6s6 ĥin hora?

⁴¹ Coo ndito ni r6 te cac6n tah6 r6 je6 chind6e ñ6h6n y6 roh6 j6e ma s6ha r6 cu6chi je6 coto ndee jenee r6h6. Ch6 cun6 ndije 6nu6 r6 squicu v6ha r6, te y6qui c6ñu r6 ch6 tu fuerza, ach6 y6.

⁴² Te ni jeh6n tucu ya vuelta u6, te suhva ni j6c6n tah6 y6:

T6t6 ma6 n6, te n6u ma c6u cujiyo jn6nd6ho y6ha je6 ma nd6ho n6, te na coh6 je6 cun6 ma6 ni n6u s6cuan, 6ch6 y6.

⁴³ Te ni ndee tucu ya nu6 de, te ni jito ya je6 c6quix6 tucu de, ch6 y6h6 c6j6i de m6h6n6.

⁴⁴ Te ni st6o ya de, te cuah6n tucu ya cuacac6n tah6 y6 vuelta un6. Te suni jn6hun y6cuan ni cah6n y6.

⁴⁵ Y6cu6n na te ni ndee tucu ya nu6 de j6jn6han de, te ni cah6n y6 j6in de:

Vijna te cus6 r6 te ndet6tu r6. Te je ni quee hora, te ruh6, Ya6 ni nduu t6e, nat6u ri te jn6 t6e c6h6yo cu6chi ruh6.

⁴⁶ Ndociu6ñ6 j6jn6han r6, ch6 je v6ji t6e nast6u ruh6, te quih6n y6 j6in de, 6ch6 y6.

Je6 ni c6jn6 de Jes6s

(Mr. 14.43-50; Lc. 22.47-53; Jn. 18.2-11)

⁴⁷ Te s6 cah6n g6 y6 s6cuan, te ni quee-ni Judas, ĥin jn6han je6 ux6 u6 t6e c6scu6ha j6in y6. Te v6jicoo cu6h6 t6e j6in de, c6ndaha de espada j6in yujnu. Ch6 sut6 c6cuj6hnu j6in t6ca t6e j6hnu c6ndacu jni6nu nu6 ñayuu hebreo, ni cataji t6e un6.

⁴⁸ Te Judas, t6e nast6u ya un6, je ni j6he de ĥin seña nu6 t6e un6 j6jn6han, ch6 ni ach6 de:

T6e je6 t6ch6hu r6 un6 c6u. Te jn6 r6 j6jn6han r6, 6ch6 de.

⁴⁹ Te ni quee-ni de nu6 Jes6s, te ni cah6n de:

Ta ni cuaa, Maestro, ach6 de.

Te ni tech6h6 de ya.

⁵⁰ Te ni cahān Jesús jín de:

Amigo, ¿na jniñu vēji ró? áchí yá.

Yūcuán na te ni jinūcoo táca gá tēe ún, te ni cajni de Jesús.

⁵¹ Te in tēe jeē cáhiin jín Jesús, ni tava de espada de, te ni jehnde de sōho in mozo maá sūtū cūjēhnu ga.

⁵² Yūcuán na te ni cahān Jesús jín de:

Nachuvāha espada rō, chí táca jēe cájejnāhan jín espada, suni jín espada cuu.

⁵³ ¿Te á tu cájini rō jeē cuu cacān tahú rí nuū Tatá rí, te vijna nūhún tají yá víhyá gā uxí uū mil ndajéhé andiví jeē jnama ruhū?

⁵⁴ Te núu súcuan, ¿te ndese cuu squícu jnūhun cáhán tutu ií jeē cánuú ndoho rí súcuan? áchí yá.

⁵⁵ Yūcuán na te ni cahān yā jín ñáyuu cuehē ún:

¿Te va tēe cuíhná cúu rí jeē véjicoo ró jín espada jín yujnu jeē jniñ rō rúhū jeē súcuan. Táca quiví ní cucōo rí jín ró jijnāhan ró ini templo cáhnu, ni steén rí jnūhun, te tu ní cájini rō rúhū.

⁵⁶ Te súcuan casáha ró návāha na squícu jeē cáhán tutu ií jeē ní catee tēe ni canacani jnūhun Yāā Dios, achí yá.

Yūcuán na te ndihi tēe cáscuāha jín yá, ni castóo de ya, ni cajinu de cuango de.

Jeē ní indichi Jesús nuū junta tēe cácujeñnu ga

(Mr. 14.53-65; Lc. 22.54-55, 63-71; Jn. 18.12-14, 19-24)

⁵⁷ Te tēe ni cajni Jesús, cuango de jín yá nuū Caifás, tēe cúu sūtū cūjēhnu ga. Te yūcuán cáhiin tūtú tēe cástéén tutu ley jín táca tēe jēhnu cándacu jniñu.

⁵⁸ Te Pedro chí jíca-ni ndiquín de ya, te ni jinū de patio sūtū cūjēhnu ga. Te ni quiví de ini patio, te ni cucōo de jín táca policía, návāha coto de ndese coo síquí yā.

⁵⁹ Te sūtū cácujeñnu jín táca tēe jēhnu jín ndihi tēe casáha junta cūjēhnu ga, ni canducú de tēe cahān jnūhun yáá síquí Jesús, chí cahni de ya cácuni de.

⁶⁰ Te vēsú ní quecoo cuehē ñayuu cácahān yáá, te tu ní cáhiin de cuēchi síquí yā jeē cáhni de ya. Te jeē sándihí te ní quecoo uū testigo jeē cáhán yáá síquí yā.

⁶¹ Te áchí:

Tēe yáha ní cahān de jeē cuu canu de templo Yāā Dios, te nuū uní-ni quiví te nucondichi sáha de, áchí.

⁶² Yūcuán na te ni ndocuiñi maá sūtū cūjēhnu ga, te ni cahān de jín yá:

¿Naun tu cáhán cuiti rō? ¿A íyó ndáa jeē cácahān tēe yáha síquí rō? Achí de.

⁶³ Te Jesús tu ní cáhán cuiti yā. Te ni cahān maá sūtū cūjēhnu ga:

Ndácu rí jniñu nuū rō jeē cahān ndaā rō cuni nahín maá Yāā Dios, Yāā técu. Cachi cají

te núu maá ró cúu Cristo, Sēhe Yāā Dios, achí de jín yá.

⁶⁴ Te ni cahān yā:

Suu rí cúu, nájñuhun cáhán rō. Te na cástūhun rí nuū rō jijnāhan ró jēē táca quiví jeē quíji te coto ró rúhū, Yāā ní nduu tēe, condee rí lado váha Yāā iyó poder. Te coto ró jēē ndíji rí ichi ándiví jín vicō. Achí yá.

⁶⁵ Yūcuán na te sūtū cūjēhnu ga ni jehnde de sahna de jeē quiti ndasí ni de, te ni cahān de:

Tēe yáha chí cáhán de jnūhun ndevāha jeē quiti ní Yāā Dios, chí sáha de maá de Sēhe Yāā Dios. ¿Nde jini nūhún gá yō testigo núu súcuan? Chí je ni cajini rō jnūhun ndevāha cáhán de.

⁶⁶ ¿Te ndese cájini ni rō? achí de.

Te ni cacahān tēe cuehē ún:

Cuechi cúu jeē cáhán de súcuan, te jini nūhún cuu de, áchí.

⁶⁷ Yūcuán na te ni catesihí de nuū yā, te ni cacani de ya. Te sava ga de ni cacatu de nuū yā.

⁶⁸ Te ni cacahān de:

Te núu Cristo cúu ró, te cachi rō ndé in cúu jeē ní cani róhó, áchí de.

Jeē ní cachi Pedro jeē tu jini de ya
(Mr. 14.66-72; Lc. 22.56-62; Jn. 18.15-18, 25-27)

⁶⁹ Te níni jēe súcuan cúu, te Pedro néne de nuū quéhe ini patio. Te ni quee in ñahan jéjniñu vehe ún, te ni cahān ña jín de:

Róhó chí suni ní jica ró jín Jesús tēe Galilea, achí ña.

⁷⁰ Te maá de tu ní cáchi de, chí ni cahān de ní cajini ndihi ñayuu:

Tu jini rí na jnūhun cáhán rō, achí de.

⁷¹ Te ní quenda de yéhyí núu quéhe, te ní jito inga ñahan nuū de. Te ní cahān ña jín ñayuu cáhiin yūcuán:

Tēe yáha chí suni ní jica de jín Jesús, tēe ñuu Nazaret, achí ña.

⁷² Te inga jinu tu ní cáchi tucu de, chí sa ní cahān teyí de:

Tu jini rí tēe ún, achí de.

⁷³ Te ní cunúu jecu gā, te ñayuu cáhiin yūcuán ní quecoo i nuū Pedro, te ní cacahān i:

Jendaá ndije jeē suni jnāhan tēe un cúu ró, chí ndijin cáhán rō jeē tēe Galilea cúu ró, áchí i.

⁷⁴ Yūcuán na te ní quejé de cáhán teyí de jeē na cóndee cuēchi síquí de núu tu cáhán ndaā de:

Tu jini cuiti rí tēe ún, achí de.

Te ní cana-ni líhli.

⁷⁵ Te ní nucūhun ní de jnūhun ní cahān Jesús jín de: Nde ná tu cana líhli, te yūhu ró te cahān rō uní jinu jeē tu jini rō ruhū. Te ní quenda de cuahān de, te yōhyo ní ndahyū de jeē ní cachi de jeē tu jini de ya.

Jeē cuángoo de jíin yá nuū Pilato
(Mr. 15.1; Lc. 23.1-2; Jn. 18.28-32)

27

¹ Yūcuán na te ni cundijin. Te tāca sūtū cácujeñhu jíin tāca tée jéñhu jeē cándacu jniñu nuū ñayuu hebreo, ni casquijnáhan de jñuhun ndese sáha de jeē cuu Jesús.

² Te ni cajihni de ya, te cuango de jíin yá nuū Poncio Pilato, tée cúu gobernador.

Jeē ni jñi Judas

³ Yūcuán na te Judas, tée ni nastúu ya un, ní jito de jeē ní cunihin siquī yá jeē cúu yá. Te ni jnahuhū ni de, te ni nacuaña de ocō uxī xūhun plata jeē ní niñin de nuū sūtū cácujeñhu jíin nuū tāca tée jéñhu.

⁴ Te ni cahān de jíin:

Cuēchi ni sáha ná jéē ní nastúu ná ñin tée cuu de, te tú na cuēchi de.

Te máá sūtū un ní cacahān de:

¿Vé jítū ni ruhū? Cuēchi máá ró cúu. Achí de.

⁵ Te ni scāne Judas xūhún un ini templo. Te ni quenda de cuahān de, te ni scuéhne de máá de.

⁶ Te sūtū cácujeñhu ni canastútū de xūhún un, te ni cacahān de:

Ma cúu chuhun yó xūhun yáha ini yejnū nuū cásocō ñayuu, chí xūhun jéē ní jéconaa jeē cúu ñin tée cúu, áchí de.

⁷ Yūcuán na te ni casándaā de jeē xūhun yúcuán cuaan de ñuhun jeē naní Lugar Ñuhun Quíxin, návaha yūcuán quindūji ñayuu ñuu jicā.

⁸ Jeē yúcuán cúu jeē ndé vijna naní ñuhun ún Lugar Ñuhun Niñi.

⁹ Te súcuán ni squícu jñuhun ni cahān Jeremías, tée ni nacani jñuhun Yaā Dios nde jenahán: Ni caquihin de ndihóco uxī xūhun plata, te súcuán-ni cúu ñin yáhu jeē ní casáha ñayuu Israel cuenta jeē ndeé yá nuū i.

¹⁰ Te jíin xūhun un ní cajeen de ñuhun quíxin, nájñuhun ni ndacu máá Jítoho yō Yaā Dios jniñu nuū rī. Achí Jeremías.

Jeē ní indichi Jesús nuū Pilato
(Mr. 15.2-5; Lc. 23.3-5; Jn. 18.33-38)

¹¹ Te nuū ní jinūcoo de jíin Jesús nuū gobernador, tée cúu Pilato, te ni cajñuhún de ya: ¿A máá ró cúu Rey ñayuu hebreo? achí de. Te ni cahān Jesús:

Suu rī cúu, nájñuhun cáhán rō.

¹² Te sūtū cácujeñhu jíin tée jéñhu cándacu jniñu, ni cacahān de cuēchi siquī yá. Te tú na vé ní cáhán cuiti yá.

¹³ Yūcuán na te ni cahān Pilato jíin yá:

¿A tu jíni ró jéē cáhān de cuehē cuēchi siquī rō? achí de.

¹⁴ Te tu ní cáhán cuiti yá ní ñin jñuhun jíin de. Te nahán ní naa ní gobernador jeē tú na vé ní cáhán yá jíin de.

Jeē ní cundaā jeē cúu yá
(Mr. 15.6-20; Lc. 23.13-25; Jn. 18.38-19.16)

¹⁵ Te iyó costumbre gobernador jeē quivī víco un siaá de ñin tée íne vecāa, núu na-ni tée cácuñi ñayuu.

¹⁶ Te suu quivī un iyó ñin tée íne vecāa, naní de Barrabás, te je ni jítē núu jñuhun jeē ní sáha de cuēchi xeēn.

¹⁷ Te nuū ní candutútū ñayuu, te ni cahān Pilato jíin i:

¿Nde tée cácuñi rō jeē siaá rī vijna: á Barrabás, chí Jesús jeē cúu Cristo, Yaā ní tají Yaā Dios? achí de.

¹⁸ Súcuán ni cahān de chí cúni de siaá de Jesús. Chí je ni jecūhun ni de jeē ní cacucuésun ni tāca sūtū un cájito de ya, te jeē yúcuán ní quijicoo jíin yá nuū de.

¹⁹ Te níni jéē néne Pilato silla nuū sándaā de jniñu, te ñasihí de ní tají ña jñuhun nuū de: Ma quivī nduu rō jíin ñayuu siquī tée ndaa jíñā, chí yóhyo ní siūhu jéni ruhū cuni jeē siquī de, áchí ña.

²⁰ Te sūtū cácujeñhu jíin tāca tée jéñhu, ni cascáhan de ñayuu jeē na cácan i jeē siaá de Barrabás, te na cúu Jesús.

²¹ Yūcuán na te ni cajñuhún tucu gobernador:

Jeē uú de, ¿nde ñin de cácuñi rō jeē siaá rī? achí de.

Te ni cacahān i:

Siaá ni Barrabás, achí i.

²² Te ni cajñuhún Pilato:

Núu súcuán te ¿ndese cácuñi rō jeē sáha rī jíin Jesús, tée cúu Cristo? achí de.

Te ni cacahān ndihi i:

Cata caa ní de jicā cruz, na cúu de, áchí i.

²³ Yūcuán na te ni cahān Pilato:

¿Na cuēchi ní sáha de núu súcuán? achí de.

Te ñayuu un ní cacana jee ndasí i:

Cata caa ní de jicā cruz, na cúu de, áchí i.

²⁴ Te ní jini Pilato jeē tu cūndeyí de jíin ñayuu, chí sa víhyá gā cácuvaā i. Te ni ndacu de jniñu jeē na quíji ndute, te ni nandahá de nuū ñayuu cuehē ún. Te ni cahān de:

Jeē nandahá rī yáha cúu seña jeē tú na cuēchi condee siquī rī jeē cúu tée váha yáha. Chí siquī máá ró jijnáhan ró na cóndee. Achí de.

²⁵ Te ni cacahān ndihi ñayuu:

Suu siquī máá ná jíin siquī séhe ná na cóndee cuēchi jeē cúu de, áchí i.

²⁶ Yūcuán na te ni siaá de Barrabás. Te ni ndacu de jniñu jeē na cáni táca soldado un Jesús, jíin jéē cáta caa de ya jicā cruz.

²⁷ Yūcuán na te soldado un cuango de jíin Jesús ini palacio. Te ni cacana de ndihi jñáhan de ní candutútū núu yá.

²⁸ Te ni caquenehen de sahma ya, te ni cachuhun de ya ñin sahma cuehé jeē cúu sahma rey.

²⁹ Te ní casáha de ñin corona iñu, ni cachuhun de xini yá. Te ní cachihi de ndaha

váha ya ñin yujnu jeē nájñuhun bastón. Te ni casácatá de nuū yá, chí ni cajecuiñi yití de, cásáha de jeē chíñúhún de ya.

Nacá jeē váha rey cúu Rey ñayuu hebreo, achí de.

³⁰ Te ni catesihí de nuū yá. Te ni caquiñin de yujnu jeē ní cachihí de ndaha ya, te ni cacani de xiní yá.

³¹ Te nuū ní cuu ní casácatá de nuū yá, te ni catava de sahma cuehē un, te ni canachuhun de ya sahma máá yá. Te cuango de jíin yá jeē cata caa de ya jicá cruz.

Jeē ní cacata caa de ya jicá cruz

(Mr. 15.21-32; Lc. 23.26-43; Jn. 19.17-27)

³² Te nuū ní quendacoo soldado un jíin yá, te ni canajñahan de jíin ñin tēe ñuu Cirene, naní de Simón. Te ni catejñiñu de tēe un jeē cóndiso de cruz yá.

³³ Te ni jinúcoo de ñin lugar nuū naní Gólgota, jeē cuní cahān Lugar Yiquí Xíní.

³⁴ Te ni cajēhe de vino jeē ní sácá núu jíin ñin jeē uvuá jeē cóho ya. Te nuū ní jito ndee ya, te tu ní cuní yá coho ya.

³⁵ Te nuū ní cuu ní cacata caa de ya jicá cruz, te ni casáha de sorteo jeē siquí ndese nihin ñin ñin de sahma ya. Te súcuan ní squícu jñuhun ní tee tēe ní nacani jñuhun Yaā Dios jenahān: Ní casáha de sorteo siquí ndese nihin ñin ñin de sahma ri, achí yá, achí tutu.

³⁶ Yūcuán na te ní cacucóo de yūcuan jeē cóto de nde cuu yá.

³⁷ Te ní catee de ñin jñuhun xiní cruz yá jeē cahán na siquí ní jíihí yá: Yáha cúu Jesús, Rey ñayuu hebreo, achí.

³⁸ Te suni ní cacata caa de uū tēe cuiñná núu uū gá cruz, ñin de lado váha ya, te inga de lado jecó yá.

³⁹ Te ñayuu cáyáha yūcuan cáscuicó i xiní i, te cacahān neé i:

⁴⁰ Róhó chí cahán rō jeē cánu rō templo cáhnu, te nuū uní quiví te nacani rō. Núu súcuan te jnama ró máá ró vijna. Te núu Sēhe Yaā Dios cúu ró, te nuu ró jicá cruz víi, achí i.

⁴¹ Te sutú cácujeñnu, jíin tēe cástéén tutu ley, jíin tēe grupo fariseo, jíin tēe jēhnu jíinñahan de, suni súcuan ní cacahān catá de, te achí de cacahān máá de:

⁴² Núu inga ñayuu ní jnama de, ¿te naun tu cúu jnama de máá de vijna? Núu Rey ñayuu Israel cúu de, te na núu de jicá cruz, náváha candíje yó de.

⁴³ Ní candíje de Yaā Dios, te na jnáma ya de vijna te núu cundáhú ní yá de, chí ní cahān de jeē cúu de Sēhe ya. Achí de jíinñahan de.

⁴⁴ Te tēe cuiñná jeē cándita caa xiin ya, suni súcuan ní cacahān neé de.

Jeē ní jíihí Jesús

(Mr. 15.33-41; Lc. 23.44-49; Jn. 19.28-30)

⁴⁵ Te nuū ní cuu cahuxí uū, te ní cunee níf cáhnu nde cahuní.

⁴⁶ Te nájñuhun cahuní, te ní cana jee Jesús: Elí, Elí, ¿lama sabactani? achí yá. Te jñuhun un cuní cahān: Yaā Dios máá ná, Yaā Dios máá ná, ¿naun ní stóo ní sáña?

⁴⁷ Te sava ñayuu cáhiin yūcuan ní cajini i jñuhun ún, te ní cacahān i:

Tēe yáha cána de xiní Elías, tēe ní nacani jñuhun Yaā Dios jenahān, achí i.

⁴⁸ Te ní jinú-ní ñin tēe, ní jequiñin de ñin cachí, te ní chundaji de nuū vinagre iyá. Te ní tee de xiní ñin yujnu, te ní tee de yuhu ya jeē coho ya.

⁴⁹ Te sava ga de ní cacahān:

Condetu ró, na cóndēhe yó núu quiji Elías jnama de chí tuú, achí de.

⁵⁰ Te Jesús ní cana jee ya inga jíinu, te ní jíihí-ní ya.

⁵¹ Te sahma ndíta caa jeē ndihyú cuarto ñi ñi templo cáhnu, ní ndatá-ní sava nade xiní te nde nuū jehé. Te ní jñāa, te ní catahū sáva toto.

⁵² Te ní cananune yaū nuū yíndūji ndiyi. Te cuehē ndiyi jeē ní cacandíje i Yaā Dios, ní canatecu i.

⁵³ Te nuū ní natecu Jesús, te ní quendacoo i nuū yíndūji i. Te ní ndivóico i ñi ñi ñi Jerusalén, te cuehē ñayuu ní cajito nuū i.

⁵⁴ Te ná ní jíihí Jesús, te tēe cúu capitán jíin tēe cáhiin jíin de jeē cándito de nde cuu yá, ní cajini de jeē ní jnáa, jíin táca gá jñiñu ní cuu. Te yóhyo ní cayúhú de, te ní cacahān de:

Jendaá ndíje jeē Sēhe Yaā Dios cúu tēe yáha, achí de.

⁵⁵ Te yūcuan cáhiin cuehē ñahan, cándēhe jíca ña. Te suu ñahan un ní candiquín ña Jesús nde Galilea, vėjicoo ña cájeñiñu ña nuū yá.

⁵⁶ Te uní ñahan un cácuu María ñuu Magdala, jíin María naná Jacobo jíin José, jíin náná ndíndúti sēhe Zebedeo.

Jeē ní quíndūji Jesús

(Mr. 15.42-47; Lc. 23.50-56; Jn. 19.38-42)

⁵⁷ Te nuū ní ñi quiví ún, te ní quee ñin tēe cúca, nání de José, te tēe ñuu Arimatea cúu de. Te suni tēe ní scuáha jíin Jesús cúu de.

⁵⁸ Tēe un ní jehēn de nuū Pilato, te ní jíicān de yiquí cúñu Jesús. Te ní ndacu Pilato jñiñu jeē ná cuáha nuū de.

⁵⁹ Te José ní quihin de yiquí cúñu yá, te ní chusúcún de ñin sahma cuitá iyó ndoo.

⁶⁰ Te névaha de ñin yaū jeē ní caan jeé jíca ñin cava, nuū ná tu quíndūji ndiyi. Te yūcuan ní chindūji de ya. Te ní jesi de ñin yuū cáhnu yuhu yaú un, te cuahān de.

⁶¹ Te María ñuu Magdala, jíin inga María, cáyūcú ña ichi núu nuū yíndūji ya.

Jeē ní cacondito soldado nuū yíndūji ya

⁶² Te ní cuu táca jñiñu yáha máá quiví jeé casátuhva ñayuu jeē quiji quiví ndétátú. Yūcuán na te ní cundijin máá quiví ndétátú.

Te sutū cácujeñhu jíin tée grupo fariseo ni jengoo de nuū Pilato.

⁶³ Te ni cacahān de:

Cánucūhun ni na jēē nde na técu tée stáhú neé un te ni cahān de jeē nátecu de nuū uní quiví.

⁶⁴ Núu súcuan te ndacu ní jniñu na cóto vāha tācá soldado yuhu yáú un nde núu ni yāha uní quiví. Chi núu tuú te sanaa te quijicoo tée ni cascuáha jíin de, te tava cuihná de ndíyí ún jecuáa, quingoo de jíin. Yūcuán na te cachi de nuū ñayuu jeē ní natecu téē ún. Te cáhú gá cuu jñuhun stáhú yúcuán vēsú jeē xihna ñúhún. Achí de.

⁶⁵ Te ni cahān Pilato:

Yāha cáhíyo soldado. Cuángoo jíin de, te sácutu vāha ró yuhu yáú un, te coto vāha ró, núu ndese vāha ga cuu sāha ró. Achí de.

⁶⁶ Te cuangoo de, te ni casácutu de yuū jeē ndihyú yuhu yáú nuū yíndūji ya, te ni castán nihin de. Te ni castóo de tācá soldado un cándito.

Jeē ní natecu Jesús

(Mr. 16.1-8; Lc. 24.1-12; Jn. 20.1-10)

28

¹ Te ni yāha quiví ndétátú un, te ni cundi-jin quiví domingo. Te María ñuu Magdala jíin inga María un, ní jecondéhé ña nuū ní yíndūji Jesús.

² Yūcuán na te iin sanaa-ni te ni jñāa nihin ndasí. Chi iin ndajéhé maá Jítoho yō Yaā Dios ni cuun ya ichi ándiví, ní quee ya nuū ní yíndūji Jesús. Te ni stáa ya yuū ndihyú yuhu yáú un, te ni cucōo ya siquū.

³ Te ndíndēe núu yā nájñuhun taja, te sahna ñuhun ya yaa quiyí nájñuhun yuhvá volcán.

⁴ Te soldado cándito yūcuán ní quisi i de jeē cáyuhú de cájito de ya. Te ni cacuu ndíyí de.

⁵ Te ni cahān ndajéhé jíin ndíndúú ñahan ún:

Ma yūhu ró, chi jíin rí jeē vécondēhe ró Jesús, Yaā ní jíhí jícá cruz.

⁶ Tuá yā yāhá, chí je ni natecu yā, nájñuhun ni cahān yā. Nehen condēhe ró nuū ní cachiñdūji de ya.

⁷ Te yachí quingoo ró, te cachi ró nuū téē cáscuáha jíin yá jeē ní natecu yā. Te xihna gā maá yá jíin Galilea, te sáa te najinūcoo de. Te yūcuán coto de nuū yā. Achí ró na cúni de. Je ni castūhun rí nuū ró, achí ndajéhé.

⁸ Te ni quendacoo ña nuū ní yíndūji ya, te yachí cuangoo ña. Te cáyuhú ña, te suni yōhyo cácusí ní ña. Te ní cajinu ña cuacastūhún ña nuū téē cáscuáha jíin yá.

⁹ Te níni cuángoo ña, te ní quee-ni Jesús nuū ña, te ní cahān yā jíin ña. Te ní quecoo ña nde nuū yā, te ní canundee ña jehé yā, te ní cachiñhún ña ya.

¹⁰ Te ní cahān yā jíin ña:

Ma yūhu ró jíinñahan ró. Cuángoo te castūhun ró nuū tācá hermano rí, téē ní cascuáha jíin rí, jeē na nūngoo de nde Galilea, te yūcuán coto de nuū rí. Achí yá.

Jñuhun ní cacahān soldado

¹¹ Te níni cuángoo ña, te sava soldado jeē ní condito ún, cuánungoo de nde ñuu. Te ní cacastūhún de nuū sutū cácujeñhu tācá jniñu jeē ní cuu.

¹² Te sutū cácujeñhu ní candutútú de nuū táca téē jéñhu cándacu jniñu, te ní casquijñahan de jñuhun. Yūcuán na te ní cajéhe de cuehē xūhun núu soldado jíinñahan.

¹³ Te ni cacahān de jíin:

Cahān ró jíinñahan ró jēē téē cáscuáha jíin de ní quijicoo jecuáa, te ní catava cuihna ndíyí un níni cáquixí ró, achí ró.

¹⁴ Te núu na cúni gobernador jñuhun yāha, te maá rí quiscahān rí de, návaha tú nihin ró castigo jíinñahan ró. Achí de.

¹⁵ Te soldado un ní caquihin de xūhún un, te ní cacachi de nájñuhun ni cacahān jíin de. Te nde vijna chí súcuan cácahān ñayuu hebreo nájñuhun ni cacahān soldado un.

Jeē ní tejñíñu ya de nacani de jñuhun

(Mr. 16.14-18; Lc. 24.36-49; Jn. 20.19-23)

¹⁶ Te ndíhúxí iin téē ní cascuáha un cuánungoo de nde Galilea, nde yucu nuū ní cachi Jesús jeē quingoo de.

¹⁷ Te nuū ní cajito de nuū yā, te ní cachiñhún de ya. Te sava de tu cácandíje vāha de jeē maá yá cúu.

¹⁸ Te ní quee ya nde nuū de, ní cahān yā jíin de:

Je ní jēhe Tátá rí ndíhi poder nuū rí jeē ndácu rí jniñu andiví jíin ñáyiví.

¹⁹ Núu súcuan te cuángoo nuū ñayuu tācá nación, te stéén ró jñuhun rí nuū i návaha na cándíje i. Te scuándute ró i jeē ní cacandíje i maá Tátá jíin Séhe jíin Espíritu Santo.

²⁰ Te stéén ró nuū i jeē na cuátáhú i tācá jniñu ní ndacu rí nuū ró. Te cocuhun ní ró jeē maá rí íne rí jíin ró ní cáni nde quiví jíin ñayiví. Achí yá. Te ní cuu. Amén.

JNUHUN VAHA NI TEE SAN MARCOS

Jñuhun Juan tēe scuándute

(Mt. 3.1-12; Lc. 3.1-9, 15-17; Jn. 1.19-28)

¹ Yáha quejéé jñuhun vāha máá Jesucristo Sēhe Yāā Dios, jeē ní quiji ya jeē jnama ya yohó.

² Isaías, tēe ni nacani jñuhun Yāā Dios nde jenahán, súcuan ní tee de jñuhun Juan nuū tútu:

Tají rí tēe nacani jñuhun ri cosnúú de ichi núú rō,

návāha coo túhva ñayuu jeē jinú rō, achí Yāā Dios jíin Cristo.

³ Te tēe ún cana jee de nde nuū ñuhun téhé: Sátúhva ró máá ró jíjnahan ró, chí quee máá Jítóho yō.

Te sáha ró jñiñu ndaā, chí vēji ya, achí de. Achí Isaías.

⁴ Te Juan ní jinū de nde nuū ñuhun téhé, scuándute de ñayuu. Te cáhán de jíin i jeē na nácani ní i jeē stóo i cuēchi i te cuandute i, návāha cone cáhnu ní Yāā Dios nuū cuēchi i.

⁵ Te táca ñayuu región Judea jíin ñayuu ñuu Jerusalén, ní quijioco i nuū de. Te ní nacani ndaā i cuēchi i nuū Yāā Dios, te ní scuándute de i ini yūte Jordán.

⁶ Te sahna ñuhun Juan cúu íxi camello, te núhni ñin cinturón ñin chíji de. Te jeē técu de cúu tíca ndicuehyí jíin ndúxi yocó.

⁷ Te suhva ní nacani de jñuhun:

Quiji máá Yāā cujéhnu ndasí. Chí tú na vé jéhu cuítí cúu ri nuū yā, ní jeē cuajníñu ri nuū yā vesú ñin jñiñu lúli gá nájñuhun jee cuíta ndeyi ri ndají rí correa ndijēn yā.

⁸ Te ruhú chí jíin ndute scuándute rí rohó jíjnahan ró, te Yāā ún chí nájñuhun jee scuándute ya rohó cúu jee cáhva ya Espiritu Santo condee ini anuá rō, achí Juan.

Jeē ní jendute Jesús

(Mt. 3.13-17; Lc. 3.21-22)

⁹ Te ní cuu jecu quiví, te Jesús ní quenda ya ñuu Nazaret ndañú Galilea, te Juan ní scuándute de ya ini yūte Jordán.

¹⁰ Te ná ní quenda ya nuū ndúte, te ní jito ya jeē ní nune-ni andiví, te ní cuun Espiritu Santo ní quee xiní yā, te cáa nájñuhun ñin paloma.

¹¹ Te ichi ándiví ní cahān ñin jñuhun:

Máá ró cúu Sēhe ri jeē maní ndasí rí jíin, te yohyo cúsiñ ní rí jíin ró, achí.

Jeē ní jito ndee jexeñ Jesús

(Mt. 4.1-11; Lc. 4.1-13)

¹² Yūcuán na te ní jinū Jesús nde nuū ñuhun téhé ní sáha Espiritu Santo.

¹³ Te uū xico quiví ní condee yā nuū ñuhun téhé un núú ñin quítí yúcu. Te ní jito ndee

Satanás yā, chí cúní jeē sáha ya cuēchi. Te nuū ní cujiyo Satanás cuahān, te ní quecoo ndajéhé Yāā Dios, ní cajejníñu nuū yā.

Jeē ní quejéé Jesús nácani ya jñuhun

(Mt. 4.12-17; Lc. 4.14-15)

¹⁴ Yūcuán na te ná ní cachune de Juan vecā, te ní jinū Jesús región Galilea, nácani ya jñuhun vāha ndese ndácu Yāā Dios jñiñu.

¹⁵ Te ní cahān yā:

Je ní jinū quiví, te je ní cuyajni jeē ndácu Yāā Dios jñiñu nuū rō. Nacani ní rō jeē stóo ró cuēchi ró jíjnahan ró, te candije ró jñuhun jeē jnáma ya rohó. Achí yā.

Jeē ní cana ya cuñ tēe jñiñu chácá

(Mt. 4.18-22; Lc. 5.1-11)

¹⁶ Te jica Jesús yumar Galilea cuahān yā. Te ní jito ya nuū Simón jíin ñani de Andrés. Te tēe cájñi chácá cácuu de, te cásinga de ñunu de ini mar.

¹⁷ Te ní cahān yā jíin de:

Condiquín ruhú na quíhín yō, te nasáha rí rohó tée nihin cuehē ñayuu candije ruhú, nájñuhun cánihin rō chácá, achí yā.

¹⁸ Yūcuán na te ní castóo-ni de ñunu de, te ní candiquín de ya.

¹⁹ Te ní jica ya jecu gā, te ní jito ya nuū Jacobo jíin ñani de Juan, sēhe Zebedeo, suni cáyucú de ini barco de, cánachijní de ñunu de.

²⁰ Te suni ní cana ya de jeē cóndiquín de ya. Te ní castóo-ni de tátá de Zebedeo ini barco un jíin mozo de, te ní candiquín de ya cuango de.

Jeē ní quenehen ya tachí ini ñin tēe

(Lc. 4.31-37)

²¹ Te ní jinū yā jíin de ñuu Capernaum. Te quiví ndétātu ní quiví ya ini vehe ñi sinagoga, te ní steén yā jñuhun.

²² Te ní canaa ní ñayuu ní cajini i jñuhun stéén yā. Chí ní steén vāha ya nuū i, chí máá yā cúu jeē ndiso jñiñu siquí ndihi. Te tēe cástéén tutu ley Yāā Dios, tu súcuan cástéén de.

²³ Te ini vehe ñi sinagoga ñuu un íne ñin tēe jeē ñuhun tachí ini. Te ní cana cóhó de:

²⁴ ¿Naun vēji ní núu na jíjnahan ná, Jesús ñuu Nazaret? ¿A vēji ní jéé snáá ní sáña, chí naún? Je jíni na ndé ñin cúu ní, chí Sēhe ñi Yāā Dios cúu ní. Achí de.

²⁵ Te Jesús ní cahān xeēn yā jíin táchí ún:

Casi yuhu ró te quenda ró ini de, achí yā.

²⁶ Te tachí ún xeēn ní jehni yíhi tēe ún. Te ní cana cóhó, te ní quenda ini de cuahān.

²⁷ Te ndihi ñayuu ní cayúhú i, te cácajnñuhun jñahan i:

¿Na vé cúu jeē yáha? ¿A ñin jñuhun jéé cúu jeē yáha? Chí tēe yáha cújéhnu de jeē ndácu de jñiñu nde nuū tachí te quéndacoo, achí i.

²⁸ Te yachí ní jité núu jñuhun Jesús cuahān ní cáhnu región Galilea.

Jeē ní nasávāha ya naná chīsó Simón Pedro

(Mt. 8.14-15; Lc. 4.38-39)

²⁹ Te ni quenda ya jiin de jijnáhan de ini vehe i sinagoga. Te Jesús ni jehēn yā jiin Jacobo jiin Juan nde vehe Simón jiin Andrés.

³⁰ Te naná chīsó Simón, cātú ña yíhi quíji ña. Te ni cacastuhun de nuū yā jeē cuhú ña.

³¹ Yūcuán na te ni quindehe ya nuū catú ña, te ni jñi ya ndaha ña, te ni ndonehen ya ña. Te ni quenda-ni quíji ún ña, te ni sáha ña jeē ní cayeji de jiin yá.

Jeē ní nasávāha ya cuehē ñayuu

(Mt. 8.16-17; Lc. 4.40-41)

³² Te ni queē niāndii te ni cuaa. Te ni quecoo ñayuu jiin táca ñayuu cácuñu jiin jéē ñuhun tachí ini.

³³ Te táca ñayuu ñuu un ní cacutútu i yéhyi un.

³⁴ Te ni nasávāha ya cuehē ñayuu cácuñu tijni nuū cuehyí, te ni quenehen ya cuehē tachí un cuángoo. Te tachí chi je cájini un yá, te tu ní jéhe ya jñuhun jeē cástuhun ndé ñin cúa ya.

Jeē ní nacani ya jñuhun región Galilea

(Lc. 4.42-44)

³⁵ Te nehen ndasí ní ndonda ya, nde yínee gā. Te ni quenda ya cuahān sñin ya yatā ñuu nde tú ñayuu, te yūcuan ní jicān tahú yā.

³⁶ Te Simón jiin tēe cáhiin jiin de, ní jenan-ducú de ya.

³⁷ Te ni cananihin de ya, te ni cacahān de jiin yá:

Táca ñayuu cánanducú i nihín, áchi de.

³⁸ Te máá yá ní cahān yā:

Sa suhva na quihín yō táca gā ñuu íne yajni, návāha suni nacani ri jñuhun nuū i, chí jeē yūcuan ní quee rī. Achí yá.

³⁹ Te súcuan te ni jica cuu ya ní región Galilea, ní nacani ya jñuhun ini vehe i sinagoga táca ñuu, te ni quenehen ya tachí ini ñayuu.

Jeē ní nasávāha ya ñin tēe ndóho cuehyí stehyú

(Mt. 8.1-4; Lc. 5.12-16)

⁴⁰ Te ñin tēe ndóho cuehyí stehyú, ni quee de ni jecuiñi yití de nuū yā, te ni cahān de jiin yá:

Jíni na jeē cuu sáha ní jéē nduvāha ná, te núu cúní ní, áchi de.

⁴¹ Te Jesús ní cundáhú ní yā de, te ni soó yá ndaha ya siquí de, te ni cahān yā:

Cúní rī. Te na ndúvāha ró, áchi yá.

⁴² Te ná ní cahān yā súcuan, te ni nduvāha-ni tēe ndóho cuehyí stehyú un.

⁴³ Yūcuán na te nátaji yá de quínuhun de, te ni cahān nihin ya jiin de:

⁴⁴ Ma cáchi cuiti ró nuū ní ñin. Chí quisteén ró maá ró nuū sutú, te condahá ró jeē socó ró nuū Yāá Dios siquí jeē ndúndoo ró núu yā,

nájñuhun ni ndacu Moisés jniñu jenahán. Te súcuan te cuni ñayuu jeē ní nduvāha ró. Achí yá.

⁴⁵ Te ni quenda de cuahān de, te ni quejéé de nácani de jñuhun nuū ndihi ñayuu ndese ni nduvāha de. Te siquí yūcuan tuá ní cúu quívi Jesús táca ñuu, chí cúchitú ndasí ñayuu nuū yā. Te ni jica ya yatā táca ñuu nuū tu cúchitú ñayuu. Te táca lado ní quijicoo ñayuu nuū yā.

Jeē ní nasávāha ya ñin tēe ndóho cuehyí ní íjin

(Mt. 9.1-8; Lc. 5.17-26)

2

¹ Te ni cuu jecu quívi, te ni quívi tucu Jesús ñuu Capernaum. Te ni cajini ñayuu jeē néne ya vehe.

² Te ni cacutútu-ni cuehē ñayuu, te ni chitú vehe jeē ndé yehyí tuá núne. Te ni nacani ya jñuhun Yāá Dios nuū i.

³ Yūcuán na te ni quecoo cuñin tēe nuū yā, cándiso de ñin tēe ndóho cuehyí ní íjin.

⁴ Te tu ní cúu quívicoo de nuū yā siquí jeē chitú ñayuu. Te ní cacoo de siquí véhe, te ní canune de ndaā nuū íin ya, te yaū un ní cascúun de tēe cúhú, cātú de nuū ñin camilla.

⁵ Te ní jini Jesús jeē cácanje de jeē cúu nasávāha ya tēe cúhú un. Te ní cahān yā jiin tēe cúhú un:

Séhē, je íne cáhnu ní rī nuū táca cuéchi ró, áchi yá.

⁶ Te yūcuan cáyucú jecu tēe cástéén tutu ley Yāá Dios, te tēe un ní cajeni ní de siquí yā:

⁷ ¿Naun cáhān tēe yáha súcuan? Cáhān de jñuhun ndevāha jeē quiti ní Yāá Dios, chí nasūu Yāá Dios cúu de jeē cóne cáhnu ní de nuū cuéchi.

⁸ Te ní jini Jesús jeē súcuan cájini ní de, te ní cahān yā jiin de:

¿Naun cájini ní rō jeē cahān ndevāha rí?

⁹ Jeē uú jñuhun yáha, ¿ndé ñin yí gá cáa? ¿A jéé cahān rí jiin tēe cúhú: Je íne cáhnu ní rī nuū táca cuéchi ró? ¿Chí yí gá jeē cahān rī: Ndocuiñi te naquihin ró camilla ró, te caca ró, achí rí?

¹⁰ Te víjna te na stéén rí jeē maá rí, Yāá ní nduu tēe, ndíso jniñu rí ini ñayvi yáha jéé cóne cáhnu ní rī nuū cuéchi.

Yūcuán na te ni cahān yā jiin tēe ní íjin ún:

¹¹ Cáhān rí jiin ró, ndocuiñi te naquihin ró camilla ró, te quínuhun ró vehe ró, áchi yá jiin de.

¹² Yūcuán na te ni ndocuiñi-ni tēe ún, te ni naquihin de camilla de, te ni quenda de cuahān de, jito jínúu ndihi ñayuu. Te ndivi i ní canaa ní í cájito i, te ní cacahān i jeē yóhyo vāha Yāá cúu Yāá Dios. Te áchi i:

Ná tu coto cuiti yō ní ñin jniñu súcuan, áchi i.

*Jeē ní cana ya Leví**(Mt. 9.9-13; Lc. 5.27-32)*

13 Te ni quenda tucu ya cuahān yā nde yumar. Te tāca ñayuu ni jinūcoo i nuū yā, te ni steēn yā jñūhun nuū i.

14 Yūcuán na te ni yāha ya cuahān yā, te ni jito ya nuū Leví sēhe Alfeo, néne de nuū cutútú xúhun renta. Te ni cahān yā jín de:

Condiqūn ruhū na quíhín yō.

Te ni ndocuñi de, te cuahān de jín yā.

15 Yūcuán na te ni jehēn yā ni yeji yā staā vehe de. Te cuehē tēe cástútú xúhun renta jín inga tēe cásaħa cuēchi, suni cáyūcú de cáyeji de staā jín Jesús jín tēe cáscuáħa jín yā, chí iyó cuéhē de jeē cándiquin de ya.

16 Te tēe cástéēn tutu ley Yaā Dios jín tēe grupo fariseo, ni cajito de jeē yeji yā staā jín ndihi tāca tēe ún. Te ni cacahān de jín tēe cáscuáħa jín yā:

¿Naun yeji maestro rō jín tēe cástútú xúhun renta jín inga tēe cásaħa cuēchi? áchí de.

17 Te ni jini Jesús, te ni cahān yā jín de:

Ñayuu cáhīyo váħa, tu jini ñúhún i tēe tájná, chí ñayuu cácuħú cúu jeē jini ñúhún. Te ruhū nasúu jéē véji ri cana ri ñayuu tú cuēchi, jeē cúu i nájnūhun ñayuu cáhīyo váħa. Chí sa suhva véji ri cana ri ñayuu cáhīyo cuēchi, jeē na nácani ni i te stóo i cuēchi i. Áchí yā.

Jeē ní cacajñūhun de ya siquī jeē cóndite ni
(Mt. 9.14-17; Lc. 5.33-39)

18 Te ni cuu in quivī jeē cáhīyo ndite ni tēe cáscuáħa jín Juan, jín tēe cáscuáħa jín grupo fariseo. Te ni quecoo jecu tēe, ni cacahān de jín Jesús:

Tēe cáscuáħa jín Juan jín jéē cascuáħa jín grupo fariseo, tijni jínu cáhīyo ndite ni de. Te tēe cáscuáħa jín máá ní, ¿naun tu cásaħa de súcuan?

19 Te ni cahān Jesús jín de:

¿A cuu condite ni de níni jéē iyó rí jín de? ¿A cuu condite ni ñayuu cáhīn vico nándāħa, te núu níni néne tēe nándāħa? Chí núu néne tēe nándāħa, te ma cúu condite ni i.

20 Te quee quivī jeē cújiyo tēe nándāħa, te quivī ún chí condite ni i.

21 Te ni cahān yā uū jñūhun yátá siquī jeē tu quíjnāħan jñūhun jeē jéē steēn yā jín táca jñūhun jenahán. Achí yā:

Ni in tu náchuhun in pedazo sahma jéē núu in sahma túhú. Chí núu súcuan te ndiyi pedazo jeē un, te tahndé gā jeē tuhú un, te nducáħnu ga nuū cátaħndé un.

22 Te suni tu cáchuhun vino jeē ini ñi túhú. Chí núu súcuan te vino jeē un ndatá ñi ún, te naa vino jín ñi. Jeē yúcuán cánuú jéē chūhun i vino jeē ini ñi jéē.

Jeē ní cataxín de yoco trigo quivī ndétátú
(Mt. 12.1-8; Lc. 6.1-5)

23 Te in quivī ndétátu ní yāħa Jesús cuahān yā mēhñu nuū cáa trigo. Te tēe cáscuáħa

jín yā, cájica de cuahān de, te ni quejéē de cátaxín de yoco trigo cáyeji de.

24 Yūcuán na te tēe grupo fariseo ni cacahān de jín yā:

Condéhé. ¿Najehē casáħa tēe cáscuáħa jín rō súcuan? Chí áchí ley Moisés jeē ma cúu sáħa yó ni in jniñu quivī ndétátú. Achí de.

25 Te ni cahān máá yā jín de:

¿A tu ní cácaħu cuiití rō tutu ndese ni sáħa David, in quivī ní cumanī jeē cáji de, te ni jín de sōco jín tēe cáhīn jín de?

26 Te ni quivī de ini vehe Yaā Dios. Te Abiatar ni cuu sutú cujēħnu ga. Te ni yeji de pan i jeē yosó ndijin nuū Yaā Dios. Te tu na ley jeē cáji ni in tēe, chí máá-ni sutú cuu cají. Te suni ni jēħe de ni cayejí tēe cáhīn jín de. Te tú na cuēchi ní iyó siquī de. Achí yā.

27 Te suni ni cahān yā jín de jínāħan de:

Tu ní jéconāħ ñayuu jeē ndóħo i nuū quivī ndétátú, chí ni jéconāħ quivī un jéē ndétátú i.

28 Núu súcuan te ruhū, Yaā ní nduu tēe, máá rí cúu jeē ndácu jniñu siquī ndese sáħa ñayuu quivī ndétátú, áchí yā.

Jeē ní nduvāħa tēe ni ichī ndaha
*(Mt. 12.9-14; Lc. 6.6-11)***3**

1 Te ni quivī tucu Jesús ini vehe i sinagoga. Te yūcuán íne in tēe ni ichī in ndaha de.

2 Te tēe grupo fariseo cájito yuhu de ya núu nasávāħa ya tēe un quivī ndétátú, návāħa ñiħn de cuēchi siquī yā.

3 Yūcuán na te ni cahān yā jín tēe ni ichī ndaha ún:

Ndocuñi te condichi rō mēhñu yáħa, áchí yā.

4 Te ni cajñūhun yā de jínāħan de:

¿Ndese cáħán ley siquī quivī ndétátú? ¿A jéē sáħa váħa yó, chí sáħa néé yó? ¿A jéē nasávāħa yó ñayuu je yajni cuu, chí sáħa yó jéē cúu i? áchí yā.

Te máá de tú na vé ni cacahān de.

5 Te ni quiti ni yā ni jito ya nuū de jínāħan de, te ni cucuihyá ni yā jeē níħni ni de. Te ni cahān yā jín tēe ni ichī ndaha:

Scáá ndaha rō.

Te ni scaá de, te ni nduvāħa-ni ndaha de.

6 Yūcuán na te ni quendacoo tēe grupo fariseo, te ni casquíjnāħan de jñūhun jín tēe grupo Herodes siquī yā, ndese cahni de ya.

Jeē ní quecoo cuehē ñayuu nuū yā yumar

7 Te Jesús cuahān yā nde yumar jín tēe cáscuáħa jín yā. Te cuehē ñayuu región Galilea ni candiquin i ya.

8 Te suni ñayuu región Judea, jín ñayuu ñuu Jerusalén, jín ñayuu Idumea, jín ñayuu ichi núu cáne niāndii yūte Jordán, jín ñayuu región Tiro jín Sidón, cuehē ndasí ñayuu ni cajini jñūhun i jniñu jēħnu ni sáħa ya, te ni quecoo i nuū yā.

⁹ Te ni cahān yā jīn tēe cáscuáha jīn yá jeē na cóo tūhva ñin barco quīvi ya, návāha ma chítú nihin ñayuu cuehē ún xiin ya.

¹⁰ Chi cuehē ñayuu je ni nasávāha ya, te jeē yúcuān vējicoo cuehē gā ñayuu cándoho tāca núu cuehyi, te chítú nihin i xiin ya jeē quehé i ya cáculi i.

¹¹ Te ñayuu cáñuhun tachī ini, núu ni cajito nuū yā, te cájecuīñi yití núu yā, te cácana cóhó:

Máá ní cúu Sēhe Yaā Dios, achí.

¹² Te ni ndacu nihin ya nuū tachí un jēe ma cahān gā jeē cúu ya Sēhe Yaā Dios.

*Jeē ní nacāji ya uxī uū tēe apóstol
(Mt. 10.1-4; Lc. 6.12-16)*

¹³ Yūcuān na te ni caa ya cuahān yā ñin yucu. Te ni cana ya tāca tēe jeē cuní maá yá caca jīn yá, te ni quecoo de nuū yā.

¹⁴ Te ni jeni ya uxī uū de jeē cuñi de jīn yá, te taji yá de quingoo de nacani de jñuhun.

¹⁵ Te ni sáha ya jeē cóndiso jñiñu de nasávāha de ñayuu cuhú te quenehen de tachí ini ñayuu.

¹⁶ Te yāha cúu ndihúxi uū tēe jeē ní nacāji ya: Simón jeē ní nasnání yá de Pedro.

¹⁷ Te Jacobo jīn ñani de Juan, sēhe Zebedeo. Te ni nasnání yá ndindúu de Boanerges, jeē cuní cahān: Tēe yíhi fuerza nacani jñuhun, nájñuhun yíhi fuerza taja.

¹⁸ Te sava ga de nání de Andrés, Felipe, Bartolomé, Mateo, Tomás, Jacobo sēhe Alfeo, Tadeo, Simón tēe grupo cananista,

¹⁹ jīn Judas Iscariote, tēe jeē ní nastúu de ya.

Jeē ní cacahān ñayuu jeē jejniñu ya fuerza Satanás

(Mt. 12.22-32; Lc. 11.14-23; 12.10)

Yūcuān na te ni quīvi ya ñin vehe jīn tēe cáscuáha jīn yá un.

²⁰ Te ni ndutútú tucu cuehē ñayuu, te ni tuá ni cúu caji yá staá jīn de.

²¹ Te tāca jñáhan vehe ya ni cajini jñuhun jeē súcuān cúu. Te ni quecoo de venūquihin de ya. Chi cácahān de jeē ní sana xiní yā.

²² Te suni tēe cástéēn teú ley Yaā Dios jeē ní quijicoo nde ñuu Jerusalén, ni cacahān de: Tēe yāha ñuhun Satanás ini de, jeē cujéhu nuū tachí. Te jīn fuerza un quénehen de tachí, achí de.

²³ Te ni cana ya de jñáhan de, te ni cahān yā ñin jñuhun yátá jīn de:

¿Ndese cuu quenehen Satanás maá?

²⁴ Chi núu ñin nación sásin maá te cuajnáhan maá, nación un má cúu ga coyūcu cáhnu.

²⁵ Te núu ñayuu ñin vehe sásin maá te cuajnáhan maá, ñayuu un má cúu ga coyūcu cáhnu.

²⁶ Te suni súcuān Satanás jīn jñáhan tachí, chí núu sásin maá te cuajnáhan maá, núu súcuān te ma cóo ga, chí sa suhva naa.

²⁷ Te ni ñin tēe ma cúu quīvi de ini vehe tēe ndacuī jeē quenehen de ndajniñu de. Chí cánuú jeē xihna gā cuhni de tēe ndacuī ún. Te suni súcuān cúu jeē jīhni rī Satanás te quénehen rī tachí.

²⁸ Te jendaá cahān rī jīn ró jeē iyó modo coo jñuhun cáhnu ni nuū tāca cuéchi cásaña ñayuu, te suni nuū tāca jñuhun néé cácahān i.

²⁹ Te núu cahān ndevāha i siquī Espiritu Santo, te ma cóne cáhnu ni Yaā Dios nuū i, chí sa suhva condee cuéchi siquī i ní cáni, áchí yá.

³⁰ Súcuān ni cahān yā, chí ni cacahān i jeē quénehen ya tachí jīn fuerza Satanás.

Náná yā jīn ñani yā

(Mt. 12.46-50; Lc. 8.19-21)

³¹ Yūcuān na te ni quee naná yā jīn táca ñani yā. Te ñin ña nuū quehe, te ni taji ña jñuhun cuahān nuū yā jeē cána ña ya.

³² Te ñayuu cáyūcu ní xiin ya, ni cacahān i jīn yá:

Náná ní jīn táca ñani ní cáhiin nuū quehe, te cáculi cahān jīn ní, áchí i.

³³ Te ni cahān maá yá:

¿Ndé ñin cúu náná rī jīn ñani rī? achí yá.

³⁴ Yūcuān na te ni ndacoto ya nuū ñayuu cáyūcu xiin ya ún, te ni cahān yā:

Suni náná rī jīn ñani rī cácuu táca ñayuu yáha.

³⁵ Chí táca ñayuu casquicu jñiñu cúní Yaā Dios, suu cácuu ñani rī, cuāha rī, náná rī, achí yá.

*Jñuhun yátá siquī tēe jéte trigo
(Mt. 13.1-9; Lc. 8.4-8)*

4

¹ Te yumar ni quejéé tucu Jesús steén yā jñuhun. Te ni cutútú cuehē ndasí ñayuu nuū yā, te jeē yúcuān ní quīvi ya ni cucóo ya ini ñin barco nuū mar. Te tāca ñayuu un cáyūcu i yumar.

² Te jīn jñuhun yátá ni steén yā cuehē jñuhun nuū i, te súcuān ni cahān ya:

³ Cuni nahin jñáhan ró: ñin tēe cate trigo, ni quenda de jeé cáte de.

⁴ Te ná ni quejéé de jéte de, te jecu trigo ni jitē yuhíchi. Te ni quecoo saa, ni cayeji tē.

⁵ Te jecu gā trigo ni jitē nuū ñuhun yuū, nuū tū cuehē ñuhun. Te yachí-ni ni cane, chí tu cóquin ñuhun.

⁶ Te nuū ní cane niāndii, te ni ichí-ni, te ni casun, chí tu ní níhin nuū quihín yoho.

⁷ Te jecu gā trigo ni jitē nuū náne iñu. Te ni jehnu iñu ún, te ni jesí nuū, te tu ní jéhe nuní.

⁸ Te jecu ni jitē nuū ñuhun váha. Te ni cane, te ni jehnu, te ni jéhe cuehē nuní. Sava ni jéhe ocó uxí jeé ñin ñin nuní, te sava ga ni jéhe uní xico, te sava ga ni jéhe ciento. Achí yá.

⁹ Yūcuān na te ni cahān yā jīn de:

Tāca róhó jéé jini sōho, na chúsóhó ró. Achí yá.

Najehē cahán yā máni jnūhun yátá
(Mt. 13.10-17; Lc. 8.9-10)

¹⁰ Yūcuán na te ni quendōo máa na yā, jín ndihúxí uū tēe cáscuáha jín yá, jín jecu gā ñayuu cáhiin jín de. Te ni cacajñuhún de ya na vé cuní cahán jnūhun yátá un.

¹¹ Te ni cahán yā jín de:

Róhó, chí sáha Yāā Dios jeē cájecūhun ni rō jnūhun ni yisáhi yáha, ndese quívicoo ñayuu ndaha ya ndacu ya jniñu nuū i. Te ñayuu jeē cáhiin sín siquī, chí máni jín jnūhun yátá cáhán rī tāca jnūhun jín i.

¹² Súcuán cáhán rī návāha vēsú cájito i, te quendōo i nájñuhun jeē tú na vé ní cájito i. Te vēsú cájini sōho i, te ma jécūhun ní i, te ma násāma ini i quívicoo i nuū rī, te ma cóo jnūhun cáhnu ni nuū cuéchi i, áchí yá.

Jeē ní castūhun cájí yá jnūhun yátá tée jéte trigo

(Mt. 13.18-23; Lc. 8.11-15)

¹³ Te ni cahán gā yā jín de jínñahan de:

Núu tu cájecūhun ni rō jnūhun yátá yáha, ¿te ndese jecūhun ni rō tāca gā jnūhun yátá núu súcuán?

¹⁴ Tēe jéte trigo cúu tēe scuité núu jnūhun Yāā Dios.

¹⁵ Te trigo jeē ni jítē yuhíchi cúu nájñuhun ánuá sava ñayuu. Chí cájini nahín i jnūhun ya, te ná ní cajini i, te quíji-ni Satanás te quénde-ni jnūhun ini anuá i.

¹⁶ Te trigo jeē ni jítē nuū ñuhun yuū, chí cúu nájñuhun ánuá sava ñayuu cájini nahín jnūhun, te yachí-ni cájetáhú i te cácusī ni i jín.

¹⁷ Te tu cúcutú jnūhun ún ini anuá i, te jecu-ni quívi cájetáhú i. Te núu ni quejéé jnúndóho, chí jito xeēn ñayuu i siquī jnūhun ún, te quejéé nácani yátá ni i.

¹⁸ Te jeē ni jítē nuū náne iñu cúu nájñuhun jecu gā ñayuu. Chí vēsú ni cajini sōho i,

¹⁹ te cándihvi ni i siquī jeē iyó ini ñayivi yáha. Te cácani i cucúca i, te stáhú un i jeē cutóo ni i siquī táca ndajniñu. Te ndihi jeē yáha cácuñeñu i jín, te jési nuū jnūhun ya, te tu íje i jín jnūhun ya.

²⁰ Te trigo jeē ni jítē nuū ñuhun váha cúu nájñuhun ñayuu cájini nahín jnūhun, te cájetáhú i, te cáhije i jín jnūhun ya. Te sava i cúu nájñuhun nuní jeē jéhe ocó uxí jeē ún in, te sava i jéhe uní xico, te sava ga i jéhe ciento. Achí yá.

Jnūhun yátá siquī lámpara
(Lc. 8.16-18)

²¹ Suni ni cahán yā jín de:

Núu nástin ñayuu in lámpara, ¿a chúne i chíji in cajón chí chíji jito? Tuú, chí jéni i nuū sucún návāha cundijin.

²² Te suni súcuán, tu iyó ni in jnūhun sáhi jéé ma cúni ñayuu, chí ndihi tāca jnūhun natúu ndijin te cuní ñayuu.

²³ Tāca róhó jéé jini sōho, na chúsohó ró, áchí yá.

²⁴ Te suni ni cahán yā jín i:

Cuni sōho váha ró. Chí cūhva jeē chúsohó ró jnūhun Yāā Dios, suni cūhva un cuáha ya nuū ró, te víhyá gā cuáha ya nuū máa ró jeé chúsohó váha ró.

²⁵ Chí ñayuu je jécūhun ni, stéén gā yā nuū i. Te ñayuu tu cándije, máa jecu jeé jini i ún, sa suhva naa. Achí yá.

Jnūhun yátá siquī trigo jeé jéhu

²⁶ Te ni cahán gā yá:

Súcuán cúu jeē ndácu Yāā Dios jniñu nuū ñayuu: Cúu nájñuhun trigo jeé ní jete in tēe.

²⁷ Yūcuán na te quíxí de te ndóna de, te súcuán jca quívi cuahán. Te trigo un cáne te jéhu. Te máa de tu jini de ndese cúu jeé jéhu.

²⁸ Chí máa ñuhun sáha jeé jéhu trigo, xihna gā yucú, sáa te cáne yoco, yūcuán na te íje máa núní.

²⁹ Te núu ni cuaan trigo un, te quejéé ñayuu cájehnde i, chí je ni jinū quívi tahnde. Achí yá.

Jnūhun yátá siquī ndiquin mostaza
(Mt. 13.31-32; Lc. 13.18-19)

³⁰ Te suni ni cahán yá:

Na cáhán rī in jnūhun yátá návāha cuni rō ndese ndúcuehē ñayuu jeē ndácu Yāā Dios jniñu nuū.

³¹ Ndúcuehē i nájñuhun jéhu in ndiquin mostaza jeé jéquin i nuū ñuhun. Te yūcuán cúu in ndiquin lúlí gā vēsú táca ndiquin jeé iyó.

³² Te ná ní jequin i, te cáne te jéhu ga vēsú táca gā yucú, te cúnahnu ndaha. Te táca saa chí sáha ti tacá ti nuū cuándahú xiní ún. Achí yá.

Jeē máni jnūhun yátá cáhán yā jín i
(Mt. 13.34-35)

³³ Te cuehē jnūhun yátá súcuán ni cahán yā jín ñayuu, núu nasaa cánda i jecūhun ni i.

³⁴ Te táca jéé ni stéén yā, máni máa jnūhun yátá ní cahán yā jín i. Te nuū tēe cáscuáha jín yá chí ni nacastūhun cájí yá jnūhun ún.

Jeē ní jecuíñi tachí nihin jín mar ni sáha ya
(Mt. 8.23-27; Lc. 8.22-25)

³⁵ Te jeé cuácuua quívi ún, te ni cahán yā jín tēe cáscuáha jín yá:

Na yáha yó quíhin yó inga lado mar, achí yá.

³⁶ Te ni casquéndōo de ñayuu cuehē ún, te ni quívicoo de ini barco nuū je íne Jesús, cuangoo de jín yá. Te suni cuangoo jecu gā barco jín de jínñahan de.

³⁷ Te ní jequíhi in tachí nihin, te ní stóna ndute mar, te ní quívi ini barco. Te je yajni chítú ndute ini barco.

³⁸ Te Jesús cātú yá yatā de ini barco, quíxí yā te yhi ñin sahma cástíhi xinī yā. Te ni castónða de ya, te ni cacahān de:

Maestro, ¿á tu sáha ní cuenta jeē quee yó chíji ndute te cuu yō? achí de.

³⁹ Te ni ndocuñí yā, te ni cahān yā nuū tachí ñihin un jíin núu mar:

Jecuiñí te nayúu-ni coo ró, áchí yá.

Te ni jecuiñí tachí, te ni cuu nayúu íi-ni.

⁴⁰ Te ni cahān yā jíin de jíjnāhan de:

¿Naun cáyühú ndasí ró? ¿Naun tu cácandíje ró jeē cácu ró sáha ri?

⁴¹ Te yōhyo ní cayühú de, te ni cacahān de jíin jñahan de:

¿Ndé ñin ga cúu tēe yáha jeē nde tachí ñihin jíin mar cájetáhú jeē cahán de? áchí de.

*Tēe Gadara jeē ndóho tachí
(Mt. 8.28-34; Lc. 8.26-39)*

5

¹ Te ni jinū Jesús jíin de jíjnāhan de inga lado mar, región Gadara.

² Te ná ní quenda ya ini barco un, te ñin tēe ñuhun tachí ini, ni quenda de nde nuū yíndūji ndíyi, te ni quee de nuū yā.

³ Tēe un ndéé de nuū yíndūji ndíyi. Te tu jéñiñu jeē jíhni ñayuu de, ní jíin cadena.

⁴ Chi cuehē jínu ní conuhni jehé de ndaha de jíin cadena. Te tāca jínu jéhnde de, te sácuéchi de. Te tú ní ñin cúndeyí jíin de.

⁵ Te nduú ñuú jíca de yucu jíin núu yíndūji ndíyi, te cána cóhó de, te stúji de máa de jíin yúu.

⁶ Te náa jíca gá vēji Jesús, te ní jito de ya. Te jínu de ní quee de nuū yā, te ní jecuiñí yití de nuū yā.

⁷ Te ni cana cóhó de:

¿Naun vēji ní núu ná, Jesús Sēhe Yaā Dios, Yaā cujéhnu téyí? Cáhān ndahú ná jíin ní, jíni nahín Yaā Dios, ma stóho ní sáña, áchí de.

⁸ Súcuān ní cahān de, chí je ní cahān Jesús: Táchí, quenda ini tēe yáha quíhñin ró.

⁹ Te ní cajñuhun yá de:

¿Na vé naní ró?

Te ní cahān de:

Legión naní ná, chí cuehē tachí ñuhun ini ná, áchí de.

¹⁰ Te ní cahān ndahú ndasí de jíin yá jeē ma táji yá tachí quendacoo región ún.

¹¹ Te yajni yucu yúcuān cáhñin cuehē quíni cájitu tí.

¹² Te tachí jeē ñuhun ini tēe un ní cacahān ndahú jíin yá:

Núu táji ní sáñá, te cuāha ní jñuhun quívicoo ná ini quíni yúcuān, áchí.

¹³ Te Jesús ní jēhe ya jñuhun. Te ní quendacoo tachí ún ini tēe ún, te ní quívicoo ini quíni, te íyó nájnñuhun uū mil tí. Te quíni un ní cajñu tí ní ningoo tí ñin yucáva, ní quívicoo tí nuū mar. Te ní ndaquíhi tí ndute, ní cajihí tí.

¹⁴ Te tēe cándito tí, ní cajinu de cuangoo de jeē ní cayühú de. Te ní jinūcōo de ní castühún de nuū ñáyuu ñuu un jíin ñáyuu tāca rancho. Te cuangoo ñayuu un cuácondēhé i na vé ní cuu.

¹⁵ Te ní jinūcōo i nuū íne Jesús, te ní cajito i nuū tēe ní ñuhun cuehē tachí ini. Te néne de, te ñuhun de sahma, te je ní nducájí xiní de. Te ní cayühú ñáyuu ún.

¹⁶ Te tēe ní cajito, ní canacani de jñuhun nuū ñáyuu, ndese ní nduvāha tēe ní ñuhun tachí ini, jíin ndese ní candoho quíni ún.

¹⁷ Yúcuān na te ní caquejéé i cácahān ndahú i jíin yá jeē na cújiyo ya región yúcuān quíhñin yā.

¹⁸ Te ní ndívi ya ini barco. Te tēe ní ñuhun tachí ini un ní cahān ndahú de jíin yá jeē na cuāha ya jñuhun quíhñin de jíin yá.

¹⁹ Te Jesús tu ní jēhe ya jñuhun, chí ní cahān yā jíin de:

Cuánuhun vehe ró núu jñahan ró, te nacani ró jñuhun nuū i ndese yōhyo jéhnu jniñu ní sáha máa Jítoho ró jíin ró, te ndese ní cundáhú ní yā rohó, áchí yá.

²⁰ Te ní quenda de cuahān de, te ní quejéé de nácani de jñuhun táca ñuu Decápolis ndese yōhyo jéhnu jniñu ní sáha Jesús jíin de. Te ndívi ñayuu un ní canaa ní i cájini nahín i.

Jñuhun sēhe síhi Jairo jíin ñahan ní quehé yusáhma ya

(Mt. 9.18-26; Lc. 8.40-56)

²¹ Te ní nayāha tucu Jesús cuanuhun yā inga lado mar jíin barco. Te ní quecōo cuehē ñayuu nuū yā, nuū íne ya yumar.

²² Te ní quee ñin tēe cújéhnu ini vehe íi sinagoga, naní de Jairo. Te ná ní jito de nuū yā, te ní jecuiñí yití de nuū jehé yā.

²³ Te ní cahān ndahú ndasí de jíin yá:

Sēhe síhi ná je yajni cuu i. Na quíhñin yō vehe ná te soó ní ndaha ní síquí i návāha na ndúvāha i te cotecu i, áchí de.

²⁴ Yúcuān na te cuahān yā jíin de. Te cuehē ñayuu cándiquíni i ya, te ní chítú ñihin i xiin ya cuangoo i.

²⁵ Te méhñu ñáyuu un cuahān ñin ñahan cúhú, jeē ní cuu uxí uū cuiyā ndóho ña cuehyí niñí.

²⁶ Te yōhyo ní ndoho ña, chí ní jexin ña tāca jeē névāha ña jíin cuehē tēe tájñá, te tu ní jéñiñu jeē ndúvāha ña, chí sa suhva víhyá gá sáha.

²⁷ Te ñahan yáha ná ní nihñin ña jñuhun Jesús, te ní quee ña ichi yátá yā méhñu ñáyuu cuehē ún, te ní quehé ña yusáhma ya.

²⁸ Chí ní jeni ní ña: Vésú máa sahma ya na nihñin rí quehé rí, te nduvāha rí, jéni ní ña.

²⁹ Te ní jecuiñí-ni niñí ña, te ní jini ña jeē ní nduvāha ña cuehyí ún.

³⁰ Te Jesús ní jini yá jeē ní nduvāha ñin ñayuu jíin fuerza yā. Te ní ndió cóto ya nuū ñáyuu cuehē, te ní cahān yā:

¿Ndé ñin ni quehé sahma ri? Achí yá.

³¹ Te tée cáscuáha jíin yá, ni cacahān de:

Jító ní jée ñáyuu cuehē yáha ní chitú ñihin i xiin ní te cáquihí i ñihín ní cáni ichi, te cájnūhun ní ndé ñin ni quehé sahma ní.

³² Te máá yá jító ya cháha chúcuan, cúní yá jeē na cáchi ñayuu ní sáha.

³³ Te ñahan un yúhú ña te quísi i ña, te je jíin ña jeē ní nduváha ña. Te ni quee ña, te ni jecuíñi yití ña nuú yá, te ni cachi ña ndihí ndese ni cuu jíin ña.

³⁴ Te ni cahān yá jíin ña:

Séhē, ni candíje ró jée cuu nasávaha ri rohó, te jeē yúcuán ní nduváha ró. Cuáhān te na ndúsiñi ní ró, chí je ni nduváha ró cuehíyí ní ndoho ró, achí yá.

³⁵ Te níiní cáhān gā yá súcuan, te ni quecoo ñayuu cáyúcú vehe tée cújéhu iní vehe ñi sinagoga, te ni cacahān i jíin de:

Je ni jihí séhe síhí ní. Te ma sajnéñu ga ní Maestro, achí i.

³⁶ Te Jesús tu ní sáha ya cuenta jeē súcuan cácahān i, te ni cahān yá jíin tée cújéhu iní vehe ñi sinagoga:

Ma yūhu ró, chí candíje ró jée nastécu rí i, achí yá.

³⁷ Te tu ní jéhe ga yá jnūhun condiquín ñayuu yá, chí máá-ni Pedro jíin Jacobo, jíin Juan ñani Jacobo.

³⁸ Te ni jíin yá vehe tée cújéhu iní vehe ñi sinagoga, te ni jito ya ñayuu, cácuvaá i, te cándahyú i, te cácana cóhó i.

³⁹ Te ni quívi ya, te ni cahān yá:

¿Najehē yōhyo casávaa ró te cándahyú ró? Súchi síhí yáha, tu ní jihí i, chí quixí-ni i, achí yá.

⁴⁰ Te ni cajecú catá i jeē ní cahān yá. Te ni quenehen ndihí ya i cuahān i nuú quehe. Te ni cana ya máá-ni tátá jíin náná súchi síhí un, jíin tée cáhiin jíin yá, te ni quívi ya jíin de nuú catú súchi síhí ní jihí ún.

⁴¹ Te ni jñi ya ndaha i, te ni cahān yá jíin i:

Talita cumí, achí yá. Te jnūhun un cúní cahān: Síhí, cáhān rí jíin ró, ndocuíñi, achí yá.

⁴² Te ni ndocuíñi-ni súchi síhí un, te ni nacaca i, chí je iyó i uxí uú cuiyá. Te yōhyo ní canaa ni ñayuu cájito i.

⁴³ Te ni ndacu ñihin ya jñiñu nuú i jíināhan i jeē ma cáchi cuítí i nuú ní ñin. Te ni cahān yá jeē na cuáha ña jeē cáji súchi síhí.

*Jeē cuánuhun yá ñuu Nazaret
(Mt. 13.53-58; Lc. 4.16-30)*

6

¹ Te ní quenda Jesús yúcuán, te cuanuhun yá ñuu yá. Te tée cáscuáha jíin yá cuango de jíin yá.

² Te máá quívi ndétatu ní steén yá jnūhun iní vehe ñi sinagoga. Te cuehē ñayuu ní canaa ni i cájini nahín i, te ni cacahān i:

¿Ndé nuú ní cutūhva tēe yáha táca jnūhun yáha? ¿Te ndese cúu jeē cahān de jnūhun ndíchí yáha jíin jée sáha de jñiñu jéhu yáha?

³ Chí tēe yáha cúu carpintero, te séhe María cúu de, te ñani Jacobo jíin José jíin Judas jíin Simón cúu de. Te suni cáyūcu cuáha de jíin yó yáha. Achí i.

Te súcuan ní cacujéé ni i nuú Jesús.

⁴ Te ni cahān yá jíin i:

Tāca tēe nácani jnūhun Yāā Dios, iyó yíñúhún ñayuu jíin de, chí máni ñayuu ñuu máá de, jíin jnāhan de, jíin ñayuu vehe de cúu jeē tu iyó yíñúhún jíin de. Achí yá.

⁵ Te tu ní cúu sáha ya cuehē jñiñu jéhu yúcuán. Chí jecu-ni ñayuu cácuñi ní soó yá ndaha ya siquí i, te ni nasávaha ya i.

⁶ Te náá ní yá jító ya jeē tu cácaandíje ñayuu jíināhan i. Yúcuán na te ni jica cuu ya táca ñuu yajni, ní steén yá jnūhun.

Jeē ní taji yá ndihúxi uú de cuanacani de jnūhun

(Mt. 10.5-15; Lc. 9.1-6)

⁷ Te ni cana ya ndihúxi uú tēe cáscuáha jíin yá, te ní taji yá ndihuú ndihuú de quingoo de. Te ní sáha ya jeē cóndiso jñiñu de quenehen de tachí iní ñayuu.

⁸ Te ní ndacu ya jeē tú na vé condiso de jeē cuajñiñu de ichi, ní ñumu, ní staa, ní xūhún. Chí máá vara-ni condahá de.

⁹ Te quíhi de ndíjen, te ma quihín de jíin úu sahma, achí yá.

¹⁰ Te suni ní cahān yá jíin de:

Na-ni vehe núu ní quívicoo ró, te yúcuán coyūcu ró ndé quenda tucu ró quihín ró inga ñuu.

¹¹ Te núu ñin ñuu tu cájetáhu i róhó, ní tu cúní i cuni nahín i jnūhun cahān ró, na quéndacoo ró yúcuán, te scóyo ró ticachá jehé ró, te súcuan steén ró jeē iyó cuéchi i jeē tu ní cájetáhu i. Jendaá cahān rí jíin ró jeē quívi coo juicio te xeén gā coo castigo siquí ñuu casáha súcuan vesú siquí ñuu Sodoma jíin ñuu Gomorra nuú ní casáha ndasi ñayuu cuéchi.

¹² Te ní quendacoo de cuahān de, te ni canacani de jnūhun jeē na nácani ní ñayuu jeē stóo i cuéchi i.

¹³ Te suni ní caquenehen de cuehē tachí iní ñayuu. Te ní cachihi de aceite cuehē ñayuu cácuñi, te ni canduváha i.

Jeē ní jihí Juan tēe scuándute

(Mt. 14.1-12; Lc. 9.7-9)

¹⁴ Te rey Herodes ní jini jnūhun de jnūhun Jesús, chí ní jité núu jnūhun ya ní cáhnu. Te ní cahān de:

Tēe yúcuán cúu Juan tēe ní scuándute, te ní natecu de. Jeē yúcuán iyó poder de sáha de jñiñu jéhu. Achí de.

¹⁵ Te sava ga ñayuu ní cacahān i:

Tēe un cúu Elías jeē ní nacani jnūhun jehān.

Te sava ga i ní cacahān:

Tuú chi ìn tēe nácani jñūhun Yaā Dios cúu de, nájñūhun tēe ni canacani jñūhun ya nde jenahán, áchí i.

¹⁶ Te ná ni jini Herodes, te ni cahán de:

Tuú chi yúcuan cúu Juan jeē ní ndacu ri jniñu ni tahndē xinī, te ni natecu de núu súcuan, áchí de.

¹⁷ Chi máá Herodes ni ndacu de jniñu jeē na quívi Juan vecāa, jíin jēē na cónuhni de jíin cadena. Súcuan ní sáha de jeē siquí Herodías, ñasihí ñani de Felipe. Chi Herodes ni quihín de ña jeē cúu tucu ña ñasihí de.

¹⁸ Te Juan ni cahán de nuū Herodes:

Tu íyó ley jeē cóndeca ró ñasihí ñani rō, achí de.

¹⁹ Te jeē yúcuan Herodías ni jito uhū ña Juan, te cúní ña jeē na cúu de, te tu ní nihín ña modo.

²⁰ Chi Herodes yúhú de cahni de Juan, chi jíni de jeē tēe ndaā tēe ndoo cúu Juan. Te jeē yúcuan ní jesi de jeē nducú ña jeē cúu Juan. Te núnjahan ni de jíni nahín de jñūhun cáhán Juan, vēsú tu jécūhun vāha ni de.

²¹ Te ni quee ìn quívi jeē ní cundeyí Herodías. Chi ní sáha Herodes ìn vico quívi ní cacu de, te ni jēhe de jeē ní cacuxíni tēe cándiso jniñu nuū de, jíin tēe cácuu capitán, jíin tēe cácujeñu región Galilea.

²² Te ni quívi sēhe síhí máá Herodías, ni jita jéhé i nuū chítu un. Te ni cacusí ni rey Herodes jíin tēe cácuuxíni jíin de. Te ni cahán de jíin súchi síhí un:

Cacān na vé cuní rō, te cuāha ri nuū rō, achí de.

²³ Te ni cahán teyí de jeē cuāha de núu na vé cuní i cacān i, vēsú nde sava región jeē yíhi ndaha de.

²⁴ Te ní quenda i, ni jecajñūhún i náná i:

¿Na vé cacān na núu de? áchí i.

Te ni cahán ña:

Xinī Juan tēe scuándute cacān rō nuū de, áchí ña.

²⁵ Yúcuan na te ni ndívi-ni i nuū rey, te ni cahán i:

Cúní na jēē vijna ñūhún-ni cuāha ní xinī Juan tēe scuándute, cone nuū ìn cohō, achí i jíin de.

²⁶ Yúcuan na te ni cucuíhyá ndasí ni rey un jeē ní cundeyí Herodías jeē cúu Juan. Te siquí jeē ní jéjñūhun téyí de, jíin jēē ní cajini sōho tēe cáyeji staā jíin de, jeē yúcuan tu ní cúní de sásahán de jeē ní jícān i.

²⁷ Te ní taji-ni de ìn soldado jeē quíquihin de xinī Juan.

²⁸ Te ní jehēn soldado un vecāa, te ní jehnde de xinī Juan. Te ni quee de jíin xinī Juan, ìne nuū ìn cohō. Te ní jēhe de nuū súchi síhí un, te máá i ni jēhe i nuū naná i.

²⁹ Te tēe cáscuáha jíin Juan ní canihín de jñūhun, te ní jengoo de, ní candonehen de yiqui cúñu Juan, te ní cachindúji de.

Jeē ni scáji yā uhūn mil tēe

(Mt. 14.13-21; Lc. 9.10-17; Jn. 6.1-14)

³⁰ Yúcuan na te tēe cácuu apóstol jeē ní taji yá cuangoo nacani jñūhun, ni ndecoo de nuū Jesús. Te ni canacani de nuū yā tacá jniñu ni casáha de, jíin jñūhun ni castéén de.

³¹ Te ní cahán yā jíin de:

Na quíngoo yó ìn lugar nuū tú ñayuu, te ndetātu yó jecu, achí yá.

Chi cuehē ñayuu cuahán i vēji i nuū yā, te ní tu ní núne ya jeē cáji yā staā jíin de.

³² Yúcuan na te ní quívi ya ìn barco jíin táca tēe apóstol un, te cuangoo sín ya jíin de ìn lugar nuū tú ñayuu.

³³ Te cuehē ñayuu ní cajito i jeē cuahán yā jíin de, te ní canacuni i jeē máá yá cúu. Te nde táca ñuu ní quendacoo i, te yachí cuangoo i, te xilna gā i ní jinūcoo vēsú máá yá.

³⁴ Te nuū ní quenda Jesús ini barco, te ní jito ya ñayuu cuehē ún. Te ní cundáhú ní yā i, chí cúu i nájñūhun lanchi jeē tú jitoho tí. Te ní steén yā cuehē jñūhun nuū i.

³⁵ Te nuū ní ini, te tēe cáscuáha jíin yá, ní quecoo de nuū yā, te ní cacahán de:

Je ní ini, te yáhá chí tú na ñayuu yúcu.

³⁶ Núu súcuan te taji ní ñayuu na quíngoo i táca rancho jíin ñuu yajni, te cuaan i staā caji i, chí tú na vé cándiso i caji i, áchí de.

³⁷ Te ní cahán Jesús jíin de:

Cuāha máá ró jeē cáji i, áchí yá.

Te ní cacahán de:

¿Te ndese cuu? Chi ní ma cúu vēsú núu quícuaan ná ndé uū ciento denario staā caji ñayuu, achí de.

³⁸ Te ní cahán yā jíin de:

¿Nasaa staā cánevāha ró? Cuacondēhe, áchí yá.

Te nuū ní cajini de, te ní cacahán de:

Uhūn-ni staā jíin uū chácá íyó, áchí de.

³⁹ Yúcuan na te ní cahán yā jíin ñayuu jeē na cúcōo sín i cuenta grupo nuū íte.

⁴⁰ Te ní cacucōo sín ciento ciento i, jíin cincuenta cincuenta i.

⁴¹ Te ní quihin ya ndihúhún staā jíin uū chácá un, te ní ndacoto ya ichi ándiví, te ní nacuatáhú yá. Te ní tahú cuéché yá staā ún, te ní jēhe ya nuū tēe cáscuáha jíin yá, te máá de ní casaja de nuū ñayuu cuehē ún. Te suni ní jēhe ya ndindúú chácá, ní casaja de nuū i.

⁴² Te ndívii i ní cayeji, te ní candutú chíji i.

⁴³ Yúcuan na te ní canastutú de pedazo staā jíin chácá jēē ní quendōo, te ní chítu úxi uū jíca.

⁴⁴ Te tēe ní cayeji, chí uhūn mil de cúu.

Jeē ní jica jéhé yá nuū mar

(Mt. 14.22-27; Jn. 6.16-21)

⁴⁵ Yúcuan na te ní cahán-ni Jesús jíin tēe cáscuáha jíin yá jeē na quívicoo de barco, te cosnú de yāha de inga lado mar ñuu

Betsaida. Te máa yá chi natají yá ñayuu quínuhun i, te saá te suni quihín yá.

⁴⁶ Te nuū ní cuu ni natají yá i, te ni caa ya yucu cuacacān tahú yá.

⁴⁷ Te jeē ní cuaa, te barco un je ni cuu sava nuū mar cahān, te máñuhún-ni ya ni quendōo nuū ñuhun íchi.

⁴⁸ Te ni jito ya jeē yóhyo jñundóho cáscaca de barco, chi ñihín vēji tachī ichi núú de. Te jeē yínee gā ni quee ya nuū de, jica jéhé yá nuū mar. Te yāha ya nuū de quihín yá nuū.

⁴⁹ Te ni cajito de jeē jica ya nuū mar, te ni cajeni ni de jeē jihná cúu, te ni cacana cóho de.

⁵⁰ Chi ndihí de ni cajito nuū yá, te ni cayūhú ndasí de. Te ni cahān-ni ya jín de:

Ndeyí coo ni rō, te ma yūhu ró, chi máa rí cúu, áchí yá.

⁵¹ Te ni quívi ya ini barco un, te ni jecuiñ-ni tachī. Te yóhyo ni canaa ni de cájito de.

⁵² Chi cándāa néé gá jeē njñūní de, chi ni jín jniñu jéhu jeē ní nducuehē staa, tu ní cájecūhun ni de jeē máa yá cúu Yaā ní tají Yaā Dios.

Jeē ní nasávāha ya ñayuu cácuñ región Genesaret

(Mt. 14.34-36)

⁵³ Te ni quenda jíyo ya jín de nuū mar ún, ní jinú yá región Genesaret. Te yundúte un ní cajihni de barco.

⁵⁴ Te nuū ní quenda ya jín de ini barco, te ñayuu yúcuan ni canacuni-ni i ya.

⁵⁵ Te yachí ni jengoo i táca ndañúū yūcuán, te ni caquindeca i ñayuu cácuñ, cáyosó i nuū camilla, vējicoo ñayuu nuū ní jito i íne ya.

⁵⁶ Te ndé-ni cúu-ni núu ni quívi ya, núu ñuu lulí, chí ñuu cáhu, chí rancho, te cájequin i ñayuu cácuñ yuhíchi, te cácahān ndahú i jín yá jeē ná quehé i vēsú yusáhma ya. Te táca ñayuu jeē ní caquehé sahma ya, ni canduvāha-ni i.

Siquí ndese cújnehén ñayuu
(Mt. 15.1-20)

7

¹ Yūcuán na te tēe grupo fariseo jín jecu tēe cástéén tutu ley Yaā Dios, ni quendacoo de ñuu Jerusalén, te ni quecoo de nuū Jesús.

² Te tēe un ní cajito de jeē sava tēe cáscuáha jín Jesús, ni cayejí jnehén de staa, chí tu ní cáscuicu de costumbre jeē nándahá de nuū Yaā Dios. Te ní cacahān siquí de.

³ Chi tēe fariseo jín ndihí ñayuu hebreo, névāha i costumbre jenahán jeē ma cáji i staa núu tu nándahá váha i xihna gá.

⁴ Te núu ní ndecoo i jeē ní jéngoo i nuū yáhu, te tu cáyeji i te núu tu nándahá i. Te íyó cuehē gá costumbre jenahán jeē cascuicu i, nájnūhun jeē ndúndoo taza, tindohō, cohō cáa, jín jíto.

⁵ Te tēe fariseo jín tēe cástéén tutu ley Yaā Dios, ni cacajñuhún de ya:

Tēe cáscuáha jín ró, ¿naun tu cáscuicu de costumbre ñayuu jenahán? Chi sa cáyeji jnehén de staa, áchí de.

⁶ Te ni cahān yá jín de:

Ndaā ní nacani Isaías jñuhun siquí rō jijnáhan ró jeē tēe stáhú-ni cácuu ró. Chi súcuan ni tee de jñuhun ni cahān Yaā Dios nde jenahán:

Ñayuu yáha chí máa yuhu-ni i cájetáhú i ruhú,

te nasúu ndé jín ini jín anuá i.

⁷ Te cáchiñuhún saá-ni i ruhú,

chí jñuhun cástéén i cúu jniñu ní candacu tēe, te nasúu jéé ní ndacu máa rí cúu.

Achí Yaā Dios. Achí Isaías.

⁸ Súcuan cácuu ró, chí ni casiáá rō jniñu ní ndacu Yaā Dios nuū rō, te cáscuicu ró costumbre jeē ní cajequin ñayuu, jeē ndúndoo tindohō jín taza. Te cuehē gá costumbre súcuan cáscuicu ró, áchí yá.

⁹ Te suni ní cahān yá:

Cásiáá rō jniñu ní ndacu Yaā Dios, návāha squicu ró costumbre ni cajequin máa ró.

¹⁰ Chí Moisés ni cahān de: Coó yíñuhún ró jín tátá rō jín náná rō. Te núu ndé ñin cahān siquí tátá chí siquí naná, na cúu nahín. Achí Moisés.

¹¹ Te máa ró chí cácahān rō jeē cuu cahān ñin tēe jín tátá de náná de: Ma cúu chindéé ñáhán ná ñihín cuáha na jéé cáji ni jéé cūhun ní, chí ndihí jeē névāha ná, chí Corbán cúu, áchí ró. (Te jñuhun Corbán cuní cahān jeē ní sócō nuū Yaā Dios.)

¹² Te cácahān rō jeē núu súcuan cahān ñin tēe, te tuá cánuú chindéé ñáhán de tátá de náná de.

¹³ Te súcuan cástívi ró jniñu ní ndacu Yaā Dios, jeē siquí costumbre ni cajequin ñayuu jenahán vēji. Te cuehē gá jniñu súcuan cásaá ró, áchí yá.

¹⁴ Te ni cana tucu ya ñayuu cuehē ún, te ni cahān yá jín i:

Cuni sóho váha ró jijnáhan ró, te chuhun ni rō:

¹⁵ Táca jéé iyó, te núu ni quívi yuhu ñayuu te tu cújnehén i sáha. Chí jeé quenda ini anuá ñayuu, yúcuan cúu jeé cújnehén i sáha.

¹⁶ Táca róhó jéé jini sóho, na chúsóhó ró, áchí yá.

¹⁷ Te ni stóo ya ñayuu cuehē ún, te ni quívi ya ini vehe. Te tēe cáscuáha ún, ní cacajñuhún de ya siquí jñuhun yátá yáha jéé ní cahān yá.

¹⁸ Te ni cahān yá jín de:

¿A máa ró suni ná tu jecūhun ni rō, chí naún? ¿A tu cájini rō jeé táca jéé quívi ini ñayuu, ma cúu cújnehén i sáha?

¹⁹ Chí tu quívi ini anuá i, chí chíji i quívi, te quenda-ni cuahān, áchí yá.

Súcuan ni steén yá jeē tāca jéē yéji ñayuu, tu cúnjénén anuá i sáha.

²⁰ Te ni cahān gā yā:

Jeē quénda ini anuá ñayuu, yūcuan cúu jeē cúnjénén i sáha.

²¹ Chi nde ini anuá ñayuu quénda jeē jéni néé ni, jeē casíquī ndéē jnāhan, jeē jíca jnéni, jeē jéhni ndīyi,

²² jeē sacuíhná, jeē ndíyo ni ndajniñu jnāhan, jeē sáha néé, jeē stahú jnāhan, jeē máni cuēchi sáha, jeē cucuésún ni, jeē cahán yāa síquī jnāhan, jeē sandúxi máá, jeē canéé xíni.

²³ Tācá jniñu néé yáha, máni ini anuá ñayuu quénda, te cúnjénén i sáha, áchí yá.

*Ñahan inga nación jeē ní candíje nihin
(Mt. 15.21-28)*

²⁴ Te ni quenda ya yūcuan cuahān yā región Tiro jín Sidón. Te ni quīvi ya ñn vehe, te cúní yā jeē tú ni ñn ñayuu cuní jeē ñe ya yūcuán. Te vésú súcuan, te tu ní cúu cone sáhi yá.

²⁵ Te ñn ñahan íyó séhe síhí ña jeē ñúhun tachí ini i, ni nihin-ni ña jnūhun jeē ñe ya. Te ni quee ña, te ni jecuíñi yití ña nuū jehé yá.

²⁶ Te ñahan ñuu jicá cúu ña, chí nde Sirofenicia cúu nación ña. Te ni cahān ndahú ña jín yá jeē na quénehen ya tachí ini séhe síhí ña.

²⁷ Te ni cahān Jesús jín ña:

Nasū nuū máá ní vēji ná, chí máni nuū ñayuu cácuu séhe Israel. Chí tu íyó váha jeē quénde yō staā séhe te cuāha yó nuū ña, achí yá.

²⁸ Te ni cahān ña:

Jendaá cahán ní Tātā, te chindéé ñahán ní saña vésú cúu ná nájñūhun ina. Chí suni máá tí cáhīn tí chíji mesa, cáhīn tí staā cuechí jeē cóyo yuhu sūchi lúli cáyeji tí, achí ña.

²⁹ Yūcuán na te ni cahān yā jín ña:

Váha ni cahān ní. Cuahán ní nú súcuan, chí je ni quenda tachí ún ini séhe síhí ní, achí yá.

³⁰ Te ni najinū ña vehe ña, te ni jito ña jeē catú séhe síhí ña nuū jito, te je ni quenda tachí ún ini i.

Jeē ní nasávāha ya ñn tēe sóhó cástété

³¹ Te ni quenda tucu ya región Tiro, ni yáha ya Sidón jín táca ñuu Decápolis, te ni jinū yá mar Galilea.

³² Te ni caquindeca i ñn tēe sóhó cástété nuū yá, te ni cacahān ndahú i jín yá jeē na sóy yá ndaha ya síquī de.

³³ Te ni quenehen sñin ya de nuū ñayuu cuehē ún, te ni chune ya xini ndáha ya sōho de, te ni tesihí yá, te ni quehé yá yaá de.

³⁴ Te ni ndacoto ya ichi ándiví, te ni jitu ni yá, te ni cahān yā:

Efata, achí yá, jeē cuní cahān: Nanune.

³⁵ Te ni nanune-ni sōho de, te ni nduvāha yáá de, te ni cacahān váha de.

³⁶ Te ni ndacu ya jniñu nuū ñayuu un jéé ma cáchi i nuū ní ñn. Te vésú ni cahān ñihin ya jín i, te víhyá gā ni cajete i jnūhun.

³⁷ Te yōhyo ni canaa ni i cájito i, te ni cacahān i:

Váha sáha ya táca jniñu, chí nde tēe cásohó, cánacuni sōho de, te tēe cándāa ññhín, cánacahān váha de sáha ya, achí i.

*Jeē ní scáji yā cuñ mil ñayuu
(Mt. 15.32-39)*

8

¹ Te tiempo un ní candutútú cuehē ndasí ñayuu, te tuá na vé caji i. Te ni cana Jesús tēe cáscuáha jín yá, te ni cahān yā:

² Cúndahú ní rí ñayuu yáhá, chí je ni cuu uní quiví cáyucú i jín rí, te tuá na vé caji i.

³ Te núu natajái rí i quinhun ndite i vehe i, te cuita í i sava ichi, chí íyó sava i jeē jicá véjicoo i, achí yá.

⁴ Te tēe cáscuáha un ní cacahān de:

¿Te ndé nuū nihin yō staā caji i jínñahan i? Chí yáhá tú na ñayuu yūcu, achí de.

⁵ Te ni cajñūhun yá de:

¿Nasaa staā cánevāha ró?

Te ni cacahān de:

Uxā-ni, achí de.

⁶ Yūcuán na te ni cahān yā jín ñayuu cuehē un jéé na cúcoo i. Te ni quihin ya ndihúxá staā ún, te ni nacuatáhú yá nuū Yaa Dios. Te ni tahú cuechí yá, te ni jēhe ya nuū tēe cáscuáha jín yá. Te máá de ni casaja de nuū ñayuu cuehē ún.

⁷ Te suni cándiso de jecu chācá lúli. Te ni nacuatáhú yá síquī, te ni cahān yā jeē suni saja de jínñahan de.

⁸ Te ndihi i ni cayeji, te ni candutú chíji i. Yūcuán na te ni canastútú de pedazo jeé ní quendō, te ni chítú úxá jica.

⁹ Te tēe ni cayeji un, íyó nájñūhun cuñ mil de. Te ni nacuatáhú yá nuū ñayuu ún, te cuanungoo i.

¹⁰ Yūcuán na te ni ndīvi-ni ya ini barco jín tēe cáscuáha jín yá, te cuahān yā región Dalmanuta.

*Jeē ní cajicān de ñn jniñu jéhu nuū yā
(Mt. 16.1-4; Lc. 12.54-56)*

¹¹ Yūcuán na te ni quecoo tēe grupo fariseo, te ni caquejéé de stíchí de Jesús. Te cácuni de coto ndee de ya, te ni cajicān de jeé sáha ya ñn jniñu jéhu jeé coo ñn seña ichi ándiví.

¹² Te ni jitu ni yá síquī jeē tu cándíje de jínñahan de, te ni cahān yā:

¿Naun cajicān ñayuu yáha ñn jniñu jéhu nuū rí? Jendaá cahán rí jeé ma steén rí ni ñn jniñu jéhu nuū ñayuu yáhá.

¹³ Te ni squéndōo ya de jínñahan de, te ni ndīvi tucu ya ini barco, te cuahān yā inga lado mar.

*Jnūhun levadura tēe fariseo**(Mt. 16.5-12)*

14 Te tēe cáscuáha jíin yá ni canaa ni de condiso de jeē cáji de, chí ñn-ni pan cáneváha de ñi barco.

15 Te ni ndacu ya jniñu nuū de:

Coto má candíje ró levadura tēe grupo fariseo jíin levadura Herodes, achí yá.

16 Te ni cacahān tēe cáscuáha un jíin táca jnāhan de:

Va siquī jeē tú na staā ndiso yó, jeē yúcuān cáhān yā súcuān, áchí de.

17 Te ni jini Jesús, te ni cahān yā:

¿Najehē cándajnūhun ró jeē ni cáhān rī súcuān siquī jeē tú na staā cándiso ró? ¿A ná tu cuni ró, á ná tu jecūhun ni ró jeē tu ní cáhān rī súcuān siquī jeē tu cándiso ró stāā? ¿A yóhoyo un ni ró candíje ró?

18 Iyó tñūu ró ¿te á tu cájito ró? Iyó sóho ró ¿te á tu cájini ró? ¿Te á tu cáncūhūn ni ró?

19 Chí ná ni tahú cuéchi rí uhūn staā ni cayejí uhūn mil tēe, ¿te nasaa jica ni chitú pedazo staā jeē ní canastútú ró? Achí yá.

Te ni cacahān de:

Uxī uñ jica, áchí de.

20 Te suni súcuān ná ni tahú cuéchi rí uxā staā ni cayejí cuñ mil tēe, ¿te nasaa jica ni chitú pedazo staā jeē ní canastútú ró? Achí yá.

Te ni cacahān de:

Uxā jica, áchí de.

21 Te ni cahān yā jíin de:

Te nde vijna ¿á ná tu jecūhun ni ró jijnāhan ró?

Súcuān ni cahān yatá yá jeē ma cándíje de jnūhun stáhú cástéēn tēe ún.

Jeē ní nasávāha ya tēe cuáá ñuu Betsaida

22 Yúcuān na te ni jinū yā jíin de ñuu Betsaida. Te ni cacuindecá ñayuu ñn tēe cuáá núu yá, te ni cacahān ndahú i jíin yá jeē na tēe ya ndaha ya nuū de.

23 Yúcuān na te ni jniñu ya ndaha tēe cuáá un, te ni quenehen ya de yatá ñūu ún. Te ni tee ya tesñi yá tinūu de, te ni tee ya ndaha ya siquī. Te ni cajñūhun yá de núu cuu coto de jecu.

24 Te ni ndacoto de, te ni cahān de:

Jito ná ñayuu jeē cájica i, te tu jito cájijí ná, chí ná cáa yujnu cáa i, áchí de.

25 Yúcuān na te ni tee tucu ya ndaha ya siquī tinūu de. Te ni ndacoto váha de, te ni nduváha-ni tinūu de, te ni jito cájijí de ndihí-ni.

26 Te ni natajijí yá de quinhun de vehe de, te áchí yá:

Ma quiví ró ñuu, ni ma cáchi cuiti ró nuū ní ñn, áchí yá.

*Jeē ní cahān Pedro jeē Jesús cúu Cristo**(Mt. 16.13-20; Lc. 9.18-21)*

27 Yúcuān na te Jesús jíin tēe cáscuáha jíin yá, cuahān yā táca ndañūu Cesarea Filipo. Te ichi un ní cajñūhun yá de:

Ruhū, ¿ndé ñn cúu rí cáchān ñayuu?

28 Te ni cacahān de:

Sava i cáchān jeē cúu ní Juan tēe ni scuándute. Te sava ga i cáchān jeē cúu ní Elías, tēe ni nacani jnūhun Yaā Dios nde jenahān. Te sava ga i cáchān jeē inga tēe ni nacani jnūhun Yaā Dios cúu ní.

29 Yúcuān na te ni cajñūhun yá de:

Te máá ró, ¿ndé ñn cúu rí cáchān ró?

Te ni cahān Pedro:

Máá ní cúu Cristo, Yaā ní tají Yaā Dios, achí de.

30 Te ni ndacu ya jniñu nuū de jíijnāhan de jeē ma cáchi de jnūhun yáha nuū ní ñn ñayuu.

*Jeē ní castūhūn Jesús jeē cúu yā**(Mt. 16.21-28; Lc. 9.22-27)*

31 Te ni quejéé yá steen yā nuū de:

Máá rí, Yaā ní nduu tēe, cánuú ndoho xeēn rī. Te táca tēe jéhnū jíin sūtū cácujuhūn jíin tēe cástéēn tutu ley, squéhichí de ruhū, te cahni de ruhū. Te nuū uní quiví te natecu rī, achí yá.

32 Te cájijí ní cahān yā jnūhun yáha. Yúcuān na te Pedro, ni cana máñūhūn de ya, te ni quejéé de cáhān de nuū yá jeē ma cuáha ya jnūhun coo súcuān.

33 Te máá yá ni ndió cóto ya ni jito ya nuū tēe cáscuáha jíin yá. Te ni cahān yā nuū Pedro:

Cujiyo quihñ rō, chí cáhān rō ná cáhān Satanás. Chí tu jéni ní ró nájñūhun jéni ní Yaā Dios, chí sa suhva jéni ní ró nájñūhun cájéni ní ñayuu, achí yá.

34 Te ni cana ya tēe cáscuáha jíin yá jíin ñayuu cuehē ún, te ni cahān yā:

Na-ni ñayuu núu cúní i condiquñ i ruhū, na cási i jeē cuní maá i, te na cóndiquñ i ruhū te cuáha i jnūhun ndoho i jnūndóho jeē siquí rī, vésú na cúu i.

35 Chí núu ndé ñayuu cuní i cácu i nuū jnūndóho quiji nuū i jeē siquí ruhū, núu súcuān te jnahnū ndetū i níí cáni. Te núu ndé ñayuu, vésú na cúu i jeē siquí ruhū jíin siquí jeē scáca i jnūhun jeē jnáma rí ñayuu, núu súcuān te cotecu i níí cáni.

36 ¿Chí ndé cuajññu vésú na cúndeyí ñayuu nihñ i níí ñáyiví, te núu quiví i nuū jnahnū ndetū i?

37 Chí tú na jíin cuiti chunaa ñayuu jeē cácu ánuá i.

38 Te ñayuu yáha tu cáccandíje cuiti i, te máni máá cuéchi cása i. Te núu na-ni ñayuu cúcanu i nuū ñayuu yáha jeē siquí ruhū, Yaā ní nduu tēe, jíin siquí jnūhun cáhān rī, suni súcuān cucanu rī jeē siquí máá i, quiví ndíji rí jíin táca ndajéhé ndoo rí. Te quiví ún chí yóhoyo luu cujéhnū rí nájñūhun cújéhnū Tátá rī. Achí yá.

9

¹ Te suni ni cahān yā jín de jínāhan de:
Jendaá cahān rī jín ró jeē sava tēe cáhīn
yāhá, ma cúu de chí nde cuni de jeē ndácu
Yaā Dios jniñu jín poder yā, achí yā.

Jeē tucu ni nduu ya
(Mt. 17.1-13; Lc. 9.28-36)

² Yūcuán na te nuū iñū quivī te Jesús ni jeca
ya Pedro jín Jacobo jín Juan, cuahān sīn
ya jín de iñ yucu súcūn. Te yūcuán, tucu ni
nduu ya nuū de.

³ Te sahna ya ni ndindéé, te ni nducujín
quiyi, nájñuhun yuhvā volcán. Te tú ni iñ
ñayuu ñayivī yāha cuu nacate jeē ndúquiyi
ndasí súcuan.

⁴ Te ni cajito de jeē Elías jín Moisés
cándajnūhún de jín yā.

⁵ Yūcuán na te ni cahān Pedro jín Jesús:
Maestro, nacā jeē yāha jeē cáhīn na yāha.
Te na sāha ná únī vehe ramada, iñ cuu maa
ní, inga cuu Moisés, te inga cuu Elías, achí de.

⁶ Chí yōhyo ni cayūhu tēe cáscuáha ún, te
Pedro tu ní sāha de cuenta na vé cúu jeē
cahān de.

⁷ Te ni quiji vicō nūhun ní jesi-ni nuū de.
Te nuū vicō un ní cahān iñ jñūhun:

Yāha cúu Sēhe ri jeē maní ndasí rí jín. Te
na cūni nahín ró jñūhun cahān yā. Achí.

⁸ Te ni candacoto-ni de, te tuá tēe un ní
cájito de, chí maa iñ na Jesús.

⁹ Te ni cananuu de jín yā yucu ún. Te ni
ndacu nihin ya jniñu nuū de jeē ma cáchi de
nuū ní iñ jeē súcuan ni cajito de, chí nde na
nátecu maa yā, Yaā ní nduu tēe, achí yā.

¹⁰ Jeē yúcan ní cachuvāha de tāca jēé ní
cúu ún, te cácajnūhun jñāhan de na jñūhun
cúu jeē nátecu yā.

¹¹ Te ni cacajnūhún de ya:
Te tēe cástéén tutu ley Yaā Dios, ¿najahē
cācahān de jeē cánuu ndiji Elías xīhna gā, te
sáa te quiji Yaā cúu Cristo? achí de.

¹² Te ni cahān yā:
Jendaá cúu jeē xīhna gā quiji iñ tēe cúu
nájñuhun Elías, te sātūhva de ndihī, achí tutu.
¿Te ndese cáhān tucu tutu iñ siquī ruhū, Yaā
ní nduu tēe? Cahān jeē ndoho xeēn rī, te
sájéé ni i nuū rī.

¹³ Te cáhān rī jín ró jeē jé ní quiji tēe ni cuu
nájñuhun Elías, te ni casáha ndevāha ñayuu
jín de tāca jēé ní cacuu ni maa i, nájñuhun
cahān jñūhun de nuū tútu, achí yā.

Jeē ní nasávāha ya iñ sūchi nūhun tachī inī
(Mt. 17.14-21; Lc. 9.37-43)

¹⁴ Te ni najinū yā jín de nuū sava ga tēe
cáscuáha jín yā, te ni cajito ya ñayuu cuehē
ndasí, ni cajicó ndúu i de. Te suní cáhīn tēe
cástéén tutu ley Yaā Dios, cátejñāhan jín de.

¹⁵ Te nuū ní cajito tāca ñayuu un jéé véji ya,
te ni canaa ni i. Te cájnu i cuango i nuū yā
jeē cahān i jín yā.

¹⁶ Te ni cajñuhun yā i:

¿Na siquī cátejñāhan ró jín de jínāhan de?
achí yā.

¹⁷ Te ni cahān iñ tēe íne yūcuán:

Maestro, vendeca ná séhe ná nuū ní, chí
ñūhūn iñ tachī inī i, te ni cuñhín i ni sāha.

¹⁸ Te ndé-ni cúu nuū íne i, te tachī un
scótúu i, te jēhni yihí-ni i. Te jēe tiñū yuhu i,
te squihñi jñūhun i. Te cuacuxii ndasí i sāha.
Te ni cahān ndahú ná jín tēe cáscuáha jín ní
jeē na quēnehen de tachī ún, te tu ní cúu sāha
de, achí de.

¹⁹ Te ni cahān yā jín de jínāhan de:

Ñayuu tu cándije cuiñi cácuu ró. ¿Nasaa ga
quivī condee rī jín ró? ¿Te nasaa ga quivī
cuandeyí ni rī jín ró? Cuáquihin sūchí un, na
quiji i, achí yā.

²⁰ Te ni caquindeca de i nuū yā. Te nuū ní
jito tachī un nuū yā, te ni jehni yihí-ni i. Te ni
cotúu i, te cónéhén cócáni i, te jēe tiñū yuhu
i.

²¹ Te Jesús ni cajñuhun yā tatá i:

¿Nasaa cuiyā ni cuu jeē sāha súcuan jín i?

Te ni cahān de:

Nde lulí i.

²² Te ni cuu cuehē jínu scótúu táchī ún i
nuū ñuhún nuū ndúte, jeē cáhni i cúní. Te
núu cuu sāha ní, te cundáhú ní ní chindéé
ñāhán ní sāña jēé ndúvāha séhe ná, achí de.

²³ Te ni cahān Jesús jín de:

Núu cuu cándije ró jēé sāha ri, chí ñayuu
cándije te cuu tāca jēé cuní i, achí yā.

²⁴ Te maa tátá sūchí un ní cahān jee de:

Cándije ná, te chindéé ñāhán ní sāña jēé
cándije nihin ga ná, achí de.

²⁵ Te ní jito Jesús jeé ní cututú cuéhē ñayuu
nuū yā. Te ni cahān yā nuū tachī:

Tachī jee sañhín sásóhó, ruhū ndácu ri
jniñu jeé na quénda ró inī sūchi yāha, te ma
ndví ga ró inī i, achí yā.

²⁶ Yūcuán na te ni cana cóhó táchī ún, te
ni jehni yihí tucu i, te ni quenda cuahān.
Te sūchí un ní cuu i nájñuhun ndíyī. Te ni
cacahān cuehē ñayuu jeé jé ní jihí i.

²⁷ Te Jesús ni jñi ya ndaha i, te ni ndone-
hen ya i, te ni nucuiñi-ni i.

²⁸ Yūcuán na te ni quivī ya inī iñ vehe, te
tēe cáscuáha jín yā, ní cacajnūhun sūn de ya:

¿Najahē tu ní cúu quenehen ná tachī un
jínāhan ná? achí de.

²⁹ Te ni cahān yā:

ññ tachī súcuan chí ma quénda cuiñi te núu
tú cacān tahú ró te coo ndite ni ró, achí yā.

Jeē ní cahān tucu ya jeé cúu yā
(Mt. 17.22-23; Lc. 9.43-45)

³⁰ Te ni quenda ya yūcan jín de jínāhan
de, te ni yāha ya ndañū Galilea cuahān yā.
Te tu ní cúní yā jeé cúní ni iñ ñayuu.

³¹ Chí stéén yā nuū tēe cáscuáha jín yā, te
achí yā:

Máá rí, Yaá ní nduu tēe, nastúu i ruhū nuū tāca tēe xeēn. Te cahni de ruhū, te núu ni jihī rī, te nuū uní quivī te natecu rī, achí yá.

³² Te tu ní cájecuhun ni de jnúhun yáha, te cáyuhū de cajnúhun de ya siquī jnúhun ni cahān yā.

*Ndé ñáyyu cúu jeē cújehnu ga
(Mt. 18.1-5; Lc. 9.46-48)*

³³ Te ni jinū yā jiín de ñuu Capernaum, te nuū ni quivī ya iní vehe, te ni cajnúhun yá de:

¿Na jnúhun ni candajnúhun ró ichi véji yó? áchí yá.

³⁴ Te tu ní cacahān cuiti de, chi ichi un ní cacahān de siquī núu ndé ñn de cújehnu ga.

³⁵ Yūcuán na te ni cucōo ya, te ni cana ya ndihúxí uū de, te ni cahān yā:

Núu ndé ñn ró cúní cújehnu ga, na cúu ró tēe núu ga nuū tāca jnāhan ró, te cuajniñu ró núu jnāhan ró.

³⁶ Yūcuán na te ni jni ya ndaha ñn sūchi lúli, te ni jeni ya i mehñū de jijnāhan de. Te ni nundee yā i, te ni cahān yā jiín de:

³⁷ Na-ni ñayuu núu jeē siquī ruhū jetáhú i ñn sūchi lúli nájñuhun sūchi yáha, te ruhū jetáhú i. Te ñayuu jetáhú rúhū, nasūu máá ñn-ni ruhū, chí suni Yaá ní tají rúhū jetáhú i, achí yá.

*Ñayuu tu cáhán siquī yā, ñn i jín yá
(Mt. 10.42; Lc. 9.49-50)*

³⁸ Yūcuán na te ni cahān Juan jiín yá:

Maestro, ni cajito ná ñn tēe jeē jiín síhví ní quēnehen de tachí iní ñayuu. Te ni cajesi ná jéca sáha de, chí tu jíca de jiín yó, achí de.

³⁹ Te ni cahān Jesús jiín de:

Ma cásí ró jeē sáha de. Chí ni ñn tēe jeē jiín síhví rí sáha de jniñu jéhnu, ma cúu nacahān de siquī rī.

⁴⁰ Chí tēe tu cáhán siquī yō, ñn de jiín yó.

⁴¹ Te na-ni ñayuu núu jeē siquī ruhū cuāha i vésú ñn ñajin ndute coho ró, siquī jeē cācandíje ró ruhū, ndaā ndije cúu jeē nihín i tahú i. Achí yá.

*Xeēn coo siquī ñáyyu quivī nuū cuéchi
(Mt. 18.6-9; Lc. 17.1-2)*

⁴² Te núu ñn sūchi lúli yáha cándíje i ruhū, te núu quivī i cuéchi sáha na-ni ñayuu, te vāha ga núu ni conuhni ñn yōso cāhnu sucūn ñayuu ún, te quēe i chíji ndute mar nuū.

⁴³ Te núu ndaha ró sáha jeē quivī ró cuéchi, vāha ga cahnde ró na quihín, návāha tuá sáha ró cuéchi. Chí vāha ga jeē cōndee ñn-ni ndaha ró te quivī ró núu cotecu ró níf cáni, vésú jeē cōndee ndindúú ndaha ró te quivī ró infierno, nuū cayú ñuhūn jeē ma ndahvá cuiti.

⁴⁴ Te yūcuán chí tu cājihī tindacú, te tu ndahvá cuiti ñuhūn.

⁴⁵ Te núu jehē ró sáha jeē quivī ró cuéchi, suni vāha ga cahnde ró na quihín, návāha tuá

sáha ró cuéchi. Chí vāha ga jeē cōo cúhnu ró te quivī ró núu cotecu ró níf cáni, vésú jeē cōndee ndindúú jehē ró te quivī ró infierno, nuū cayú ñuhūn jeē ma ndahvá cuiti.

⁴⁶ Te yūcuán chí tu cājihī tindacú, te tu ndahvá cuiti ñuhūn.

⁴⁷ Te núu tinūu ró sáha jeē quivī ró cuéchi, vāha ga tava ró na quihín, návāha tuá sáha ró cuéchi. Chí vāha ga jeē quivī ró ñuu nuū ndácu Yaá Dios jniñu jiín ñn na tinūu ró, vésú jeē cōndee ndindúú tinūu ró te quivī ró infierno.

⁴⁸ Te yūcuán chí tu cājihī tindacú, te tu ndahvá cuiti ñuhūn.

⁴⁹ Chí nájñuhun quēnda vāha oro sáha ñuhūn, súcuan quēnda vāha ñayuu sáha jñundóho. Te tāca cúñu jeē socó ñayuu nuū yā, cúhuhvuá sáha ññ.

⁵⁰ Vāha iyó ññ, te núu ññ ún na náa jeē uhvuá, ¿te ndese nduu uhvuá tucu sáha ró? Núu súcuan te cuu ró ñayuu vāha, nájñuhun iyó vāha ññ. Te na cōyūcu vāha ró jiín jnāhan ró. Achí yá jiín de.

*Siquī jeē ma stóo jnāhan tēe jiín ñahan
(Mt. 19.1-12; Lc. 16.18)*

10

¹ Te ni quenda ya ñuu Capernaum, te ni jinū yā región Judea, inga lado yūte Jordán, ichi nuū cáne niāndi. Te yūcuán ní cututú tucu ñayuu nuū yā, te ni steén tucu ya jnúhun nuū i, nájñuhun sáha ya.

² Yūcuán na te jecu tēe grupo fariseo ni queeco de nuū yā, chí cáncu de coto ndee de ya núu ndese cahān yā. Te ni cacajnúhún de ya núu iyó ley jeē cuu ndusñn ñn tēe jiín ñasihí de.

³ Te ni cahān yā jiín de:

¿Na jniñū ni ndacu Moisés nuū ró nde jenahán?

⁴ Te ni cacahān de:

Moisés ni jēhe de jnúhun jeē cúvāha ñn acta jeē ndusñn de jiín ña, te ndōo ña, achí de.

⁵ Te ni cahān Jesús jiín de:

Siquī jeē nihni ní ró jijnāhan ró, jeē yūcuán ní ndacu de jniñu yáha núu ró.

⁶ Te nde xihna ñuhún, ná ní sáha Yaá Dios ndihí, chí tēe jiín ñahan ní sáha ya.

⁷ Jeē yūcuán cúu jeē stóo tēe tátá de náná de, te quijnāhan de jiín ñasihí de.

⁸ Te ñn na cuu ndindúú de, achí Yaá Dios. Núu súcuan te tuá cúu uū jnāhan de, chí ñn na cúu.

⁹ Jeē yūcuán tu iyó vāha jeē stóo jnāhan, chí jeē ní squijnāhan Yaá Dios cúu, achí yá.

¹⁰ Te tēe cáscuáha ún nuū ní quivícoo de vehe, te ni cacajnúhún tucu de ya siquī jnúhun ún.

¹¹ Te ni cahān yā jiín de:

Núu ndé tée stóo de ñasihí de te condeca de inga ñahan, núu súcuan te cásiquí ndé de ñasihí de.

¹² Te núu ñin ñahan stóo ña yí ña te condeca ña inga tée, suni cásiquí ndé ña de. Achí yá.

Jeë ni jicán tahu Jesús jehé sūchi lúli
(Mt. 19.13-15; Lc. 18.15-17)

¹³ Yūcuán na te ni quecoo ñayuu jín sūchi lúli, jeë na sóo yá ndaha ya xini i. Te tée cáscuáha jín yá, ni cacahān de nuū ñáyuu vejicoo jín i.

¹⁴ Te ni jito Jesús, te ni quiñi ni yá, te ni cahān yá jín de:

Cuāha jñūhun na quiñicoo sūchi lúli jín nuū rī, te ma cási rō jeë quiñicoo i. Chi ñayuu jeë ndió cóo ni i cani ni i nájñūhun sūchi yáha, suu i quiñi ndaha Yaā andiví jeë ndacu ya jniñu nuū i.

¹⁵ Te jendaá cahān rī jín ró, núu ñin ñayuu tú cuatáhú i jeë ndácu Yaā Dios jniñu nuū i, nájñūhun jétáhú ñin sūchi lúli, ma quiñi cuiñi i ndaha ya, achí yá.

¹⁶ Te ni nundee ya i, te ni sóo yá ndaha ya xini i, te ni jicán tahu yá jehé i jijnáhan i.

Jñūhun tēe cúca
(Mt. 19.16-30; Lc. 18.18-30)

¹⁷ Yūcuán na te ni quiñin tucu ya ichi cuahān yá. Te jinu ñin tēe ni quee de, te ni jecuiñi yí de nuū yá, ni cajñūhun de ya:

Tēe váha cúu ni Maestro. Te cachi ní, ¿na jniñu váha sáha ná te nihñi tahu na cotecu na ní cani andiví? áchí de.

¹⁸ Te ni cahān yá jín de:

¿Naun cáhān rō jeë tēe váha cúu rī? Tú ni ñin tēe váha iyó, chí máa ñin-ni Yaā Dios.

¹⁹ Je jini rō táca jniñu ní ndacu Yaā Dios: Ma cosíquí ndé jñāhan ró. Ma cáhni rō ndíyí. Ma sacuiñá ró. Ma sajnūhūn ró. Ma stahú ró jñāhan ró. Cuatáhú ró nuū tatá ró nuū naná ró. Achí yá.

²⁰ Te ni cahān tēe un jín yá:

Táca jniñu yáha je ni squícu ná ndé ná lúli ná, Maestro, achí de.

²¹ Yūcuán na te ndáhú jito ya nuū de jeé cúsiñi ni yá jín de. Te ni cahān yá:

Ñin na jniñu cúmani sáha ró núu súcuan. Cuahān te xico ró ndihí jeë névāha ró, te cuāha ró núu ñáyuu ndahú. Te nde andiví cuāha ya jeë váha ndasí núu rō. Yūcuán na te quiñi ró condiñin rō ruhū, te cuāha ró jñūhun ndoho ró jñúndóho jeë siquí rī, achí yá.

²² Te ná ni jini sōho de jñūhun yáha, te ni jñahūñi ni de, te cúcuñhí ni de cuahān de, chí cúca ndasí de.

²³ Yūcuán na te Jesús ni ndacoto ya ní xiin ya, te ni cahān yá jín tēe cáscuáha jín yá:

Tēe cúca chí yōho yí quiñicoo de ndaha Yaā Dios jeë ndacu ya jniñu nuū de, achí yá.

²⁴ Te tēe cáscuáha jín yá, yōho ni canaa ni de jeë ni cajini de jñūhun ni cahān yá. Te ni cahān tucu ya jín de:

Séhē, ñayuu tēnuū xūhūn, yōho yí quiñicoo i ndaha Yaā Dios jeë ndacu ya jniñu nuū i.

²⁵ Yachí gā yāha ñin camello yaū yutícuí, vésú jeë quiñi ñin ñayuu cucá ndaha Yaā Dios jeë ndacu ya jniñu nuū i, áchí yá.

²⁶ Te víhyá gā ni canaa ni de cájini de, te ni cacajñūhun jñāhan de:

¿Ndé ñáyuu cúu jeë cácu núu súcuan?

²⁷ Te ni ndacoto ya nuū de, te ni cahān yá:

Ñayuu chí ma cúu squívi i máa i ndaha Yaā Dios, te máa yá chí cuu sáha ya, chí ndihí-ni jniñu cuu sáha ya, achí yá.

²⁸ Yūcuán na te ni cahān Pedro jín yá:

Saña jijnáhan ná, ní castóo ná ndihí jeé cánevāha ná, te cándiquñi na níhñi, áchí de.

²⁹ Te ni cahān Jesús:

Jendaá cahān rī jín ró jijnáhan ró, núu na-ni ñayuu stóo i vehe, chí ñani, chí cuāha, chí tátá, chí náná, chí ñasihí, chí séhe, chí ñuhun, jeë siquí ruhū jín siquí jeé scáca i jñūhun jeë jñama rī ñayuu,

³⁰ núu súcuan te nanihñi i ñin ciento gā jeé súcuan vijna, cúu vehe, cúu ñani, cúu cuāha, cúu náná, cúu séhe, cúu ñuhun, te nde jín jeé cóto xeñ ñayuu i. Te nde inga vida quiñi te cotecu i ní caní.

³¹ Te cuehē ñayuu jeé vijna cácuñhū, nduu i ñayuu núu ga. Te ñayuu jeé núu ga vijna, chí ndujhū i, áchí yá.

Jeë ni cahān tucu ya jeé cúu yá
(Mt. 20.17-19; Lc. 18.31-34)

³² Te cáñuhun de ichi jeé cáca cuahān ñuu Jerusalén. Te Jesús yósnúu yá nuū tēe cáscuáha ún. Te cánaa ni de ni cajini sōho de jñūhun ni cahān yá. Te cáyūhú de cuángoo de jín yá. Yūcuán na te ni cana sín tucu ya ndihúxi uū tēe cáscuáha, te ni quejé yá cástūhūn tucu ya nuū de táca jeé quiñi siquí yá.

³³ Achí yá:

Cuni sōho ró, chí je cuángoo yó ñuu Jerusalén vijna, te yūcuán nastúu ñayuu ruhū, Yaā ní nduu tēe, nuū sutú cácuñhū jín nuū tēe cástéñ tutu ley. Te ndonda de siquí rī jeé cúu rī, te squívi de ruhū nuū tēe nación Roma jeé cáyúcu Jerusalén cándacu jniñu.

³⁴ Te táca tēe un sácatá de nuū rī, te cani de ruhū, te tesihí de nuū rī, te sáa te cahni de ruhū. Te nuū uní quiñi te natecu rī, achí yá.

Jeë ni jicán Jacobo jín Juan ñin favor nuū yá
(Mt. 20.20-28)

³⁵ Yūcuán na te Jacobo jín Juan, ndindúu séhe Zebedeo, ni quecoo de nuū Jesús, te ni cacahān de:

Maestro, cacuní na jéē sāha ní iin jeē cacán na núu ní, áchí de.

³⁶ Te ni cahān yā jīn de:

¿Ndese cacuní rō jeē sāha ri jīn rō? achí yá.

³⁷ Te ni cacahān de:

Cuāha ní jnūhun jeē cōnēne ná xiin ní quívi ndujéhu ní, iin ná lado váha ní, te inga ná lado jecó ní, áchí de.

³⁸ Yūcuán na te ni cahān Jesús jīn de:

Tu cājini rō na vé cūu jeē cājicān rō. ¿A cuu ndoho rō jnūndóho nájñūhun jeē quíji siquī rī? ¿Te á canda rō ndoho xeēn rō nájñūhun ndoho rī? achí yá.

³⁹ Te ni cacahān de:

Cuu sāha ná.

Te ni cahān yā jīn de:

Jendaá jeē ndoho rō jnūndóho nájñūhun jeē quíji siquī rī, te ndoho xeēn rō nájñūhun ndoho rī.

⁴⁰ Te jeē cōnēne rō lado váha ri jīn lado jecó rī, nasūu rúhū cūu jeē cuāha jñūhun. Chi je íyó túhva cuu táca téē jeē ní nacāji Tátá rī, te tēe un níhīn, achí yá.

⁴¹ Te uxī gā tēe cáscuáha un, ní cajini de jñūhun yáha, te ni caquīñí ni de nuū Jacobo jñūhun Juan.

⁴² Te Jesús ni cana ya de, te ni cahān yā jīn de:

Cājini rō ndese cāsáha tēe cajújéhu nuū ñayuu táca nación. Chi cándacu níhīn de jñiñu nuū i, te máá de cāchí ndese coo.

⁴³ Te máá rō jijnáhan rō, chi ma sāha rō sūcuan. Chi núu ndé iin rō cúní cujúéhu, sa suhva cuajniñu rō núu jnāhan rō.

⁴⁴ Te núu ndé iin rō cúní cuu nuū, sa suhva sāha rō máá rō mozo nuū táca jnāhan rō.

⁴⁵ Chi suni sūcuan sāha ruhū, Yāá ní nduu tēe, chi nasūu jéē véji ri jeē cuajniñu ñayuu nuū rī, chi sa suhva véji ri jeē cuajniñu ri nuū ñayuu. Te cuāha ri máá rī cuu rī návāha jnama ri cuehē ñayuu, achí yá.

Jeē ní nasávāha ya Bartimeo tēe cuáá
(Mt. 20.29-34; Lc. 18.35-43)

⁴⁶ Yūcuán na te ni jinū yā ñuu Jericó jīn tēe cáscuáha jīn yá. Te sáá te ni quenda ya yūcuan jīn de jīn ñayuu cuehē ndasí. Te Bartimeo tēe cuáá, sēhe Timeo, néne de yuhíchi, jicán de caridad.

⁴⁷ Te ni jini de jñūhun jeē Jesús ñuu Nazaret véji ya. Te ni quejéé de cána jee de:

Jesús Sēhe yucūn David, cundáhú ní ní sáña, áchí de.

⁴⁸ Te cuehē ñayuu ni cacahān i nuū de jee na cási de yuhu de. Te máá de vihýá gā ni cana jee de:

Máá ní jeē cūu ní Sēhe yucūn David, cundáhú ní ní sáña víi, achí de.

⁴⁹ Yūcuán na te ni jecuiñí Jesús, te ni cahān yā:

Cana de na quíji de.

Te ni cacana i tēe cuáá un:

Ndeyí coo ní rō. Ndocuiñí, na quíhín yō, chí cána ya rohó, áchí i jīn de.

⁵⁰ Yūcuán na te ni scāne de ticāchí de, te yachí ni ndocuiñí de, te ni jinū de nuū Jesús.

⁵¹ Te ni cahān yā jīn de:

¿Na vé cuní rō jeē sāha ri jīn rō?

Te máá de ni cahān de:

Maestro, jeē na ndūndijin tinūu ná cuní na, áchí de.

⁵² Te ni cahān Jesús jīn de:

Cuáhán núu sūcuan. Ni candíje rō jeē cuu nasávāha ri rohó, te jeē yūcuan ní nduvāha rō, áchí yá.

Te ni ndundijin-ni tinūu de, te ni ndiquīn de Jesús cuahān de jīn yá ichi ún.

Jeē ní quívi Jesús ñuu Jerusalén
(Mt. 21.1-11; Lc. 19.28-40; Jn. 12.12-19)

11

¹ Te ni cuyajni ya ñuu Jerusalén, véji ya ñuu Betfagé jīn ñuu Betania, jeē ine jehé yucu Olivos. Te ni tají yá uū tēe cáscuáha jīn yá jeē quingoo de.

² Te áchí yá jīn de:

Cuángoo ñuu lulí ine ichi núu. Te núu ni quívi-ni rō yūcuan, te nihīn rō iin burro núhni tí, jeē ní iin tēe ná tu coso de tí. Te ndají rō tí, quijicoo rō jīn tí.

³ Te núu ndé iin cajñūhūn naun cándají rō tí, te cachi rō: Máá Jitoho yō jini ñūhūn yá tí, te yachí natají yá tí ndiji tí, achí rō. Achí yá jīn de.

⁴ Te cuangoo de, te ni canihīn de burro un núhni tí yehýí núu quéhe nuū náquijnáhan ichi. Te ni candají de tí.

⁵ Te sava ñayuu cáhīn yūcuan ní cacahān jīn de:

¿Na vé cūu jeē casáha rō jeē cándají rō burro jīñá? achí i.

⁶ Yūcuán na te ni cacahān de nájñūhun ni cachi Jesús. Te ni casíáá i tí véjicoo de jīn tí.

⁷ Te ni ndecoo de jīn tí nuū Jesús, te ni casoó de sahma de siquī tí, te ni jecosó yá tí.

⁸ Te cuehē ñayuu ní cascáá i sahma i ini ichi. Te sava ga i ni cajehnde i ndaha ñúu, te ni cachucuan i ini ichi ún.

⁹ Te ñayuu cuangoo ichi núu jīn ñayuu cuangoo ichi yátá, cácana jee i:

Yōhýo cujúéhu ya. Yōhýo váha Yāá cūu Yāá jeē véji jīn jñiñu máá Jitoho yō Yāá Dios.

¹⁰ Te yōhýo luu coo, chí je yajni ndacu ya jñiñu nájñūhun ni ndacu jíi yō rey David. Te yōhýo cujúéhu máá Yāá Dios. Achí i.

¹¹ Te ni quívi Jesús ñuu Jerusalén, jīn ini templo cáhnu. Te ni jito ya nuū táca ndajniñu yūcu níi yūcuan. Te ni quenda ya cuahān yā ñuu Betania jīn ndihúxí uū de, chí je ni ini.

Jeē ní cáhān yā nuū yújnu higo
(Mt. 21.18-19)

¹² Te inga quiví ún, nuú ní quenda ya ñuu Betania cuahān yā jín de, te jín yā sōco.

¹³ Te nde jicá ní jito ya ñn nundēhe higo jeē ín ndaha. Te ni jecondēhe yā núu sanaa te nihín yā ndehē caji yā. Te tú na vé ni nihín yā, chí máá ndaha-ni ín. Chí nasūu tiempo ndehē cúu.

¹⁴ Yūcuán na te ni cahān yā nuú yujnu ún: Tuá na ndehē cuun cuiti xinī rō jeē caji ñayuu, achí yā.

Te tēe cáscuáha jín yā ni cajini de jeē súcuan ni cahān yā.

Jeē ní quenehen ya ñayuu ini templo

(Mt. 21.12-17; Lc. 19.45-48; Jn. 2.13-22)

¹⁵ Te ni najinū yā jín de ñuu Jerusalén. Te ni quívi ya ini templo cáhnu, te ni quenehen ya ñayuu cájeen quití te cánaxico núu ñayuu jeē socó í. Te ni scotúu ndeyí ya táca mesa tēe cástáyí xūhún, jín silla tēe cáxícó paloma.

¹⁶ Te tu ní jēhe ya jñuhun jee yáha ñayuu ini templo jín ndajniñu ndiso í.

¹⁷ Te ni steén yā jñuhun nuú í, achí yā:

Yósó núu tútu í jeē cahān Yaā Dios: Vehe ri chí vehe nuú cájicān tahú ñayuu táca nación cúu, achí yā. Te máá rō jijnáhan rō chí najñuhun yaū cava ñacuñna ní canasáha rō, achí yā.

¹⁸ Te tēe cástéén tutu ley Yaā Dios jín sūtú cácujeñnu, ni cajini de jñuhun yáha, te ni quejéé de cánducú de modo ndese cahni de ya. Chí cáyühú de jeē ndujéñnu ga maá yā vesú maá de, chí táca ñayuu yóhyo cácusí ni í cajini í jñuhun stéén yā.

¹⁹ Te jeē cuácuua, te ni quenda ya ñuu Jerusalén cuahān yā.

Jeē ní ichí nundēhe higo

(Mt. 21.20-22)

²⁰ Te jenéhen inga quiví ní nayáha ya jín de cuahān yā. Te ni cajito de jeē nundēhe higo un je ni ichí nde yoho.

²¹ Yūcuán na te ni nucūhun ní Pedro, te ni cahān de jín yā:

Maestro, cundēhe ní nundēhe higo jeē ní cahān ní núu, te vijna je ni ichí caján, achí de.

²² Te ni cahān Jesús jín de:

Candije rō jēé sáha Yaā Dios jeē jicán rō.

²³ Chí jendaá cahān rí jín rō, núu ndé ñayuu cahān í jeē cújiyo yucu yáha quihín nde nuú mar, te núu tú nacani siquí ní í, chí sa suhva candije í jeē cóo najñuhun ní cahān í, yūcuán na te cundaá jeē ní jicán í.

²⁴ Jeē yūcuán cahān rí jín rō, táca jēé cacán tahú rō, te núu candije rō jēé nihín rō, te nihín rō.

²⁵ Te jeē cájicān tahú rō, te cone cáhnu ní rō nuú ñayuu casáha cuēchi siquí rō, návāha máá Tátá rō jeē ndeé yā andiví, suni cone cáhnu ní yā nuú cuēchi rō.

²⁶ Chí núu tú cone cáhnu ní rō nuú jnáhan rō, te suni máá Tátá rō jeē ndeé yā andiví, ma cóne cáhnu ní yā nuú cuēchi rō, achí yā.

Siquí jeē ndiso jniñu Jesús

(Mt. 21.23-27; Lc. 20.1-8)

²⁷ Yūcuán na te ni najinū tucu ya ñuu Jerusalén. Te jica cuu ya ini templo cáhnu. Te sutú cácujeñnu jín tēe cástéén tutu ley Yaā Dios jín tēe jéñnu cándacu jniñu, ni quecco de nuú yā.

²⁸ Te ni cacajñuhún de ya:

¿Ndé ní nihín jniñu rō jēé sáha rō jniñu yáha? ¿Te ndé ñn ní tee jniñu siquí rō jeē sáha rō súcuan? achí de.

²⁹ Te ni cahān Jesús:

Suni ruhū, cajñuhun rí rohó ñn jñuhun jijnáhan rō. Te núu cuu stío cuñí rō, yūcuán na te cachi rí nuú rō ndé ní nihín jniñu rí jeē sáha rí jniñu yáha.

³⁰ ¿Ndé ñn ní tee jniñu siquí Juan jeē ní scuándute de? ¿A Yaā Dios chí táca tēe? Cachi nuú rí, achí yā.

³¹ Yūcuán na te ni candajñuhun máa de:

Núu cahān yō jeē Yaā Dios ní tee ya jniñu un siquí Juan, te cahān de jín yó: Núu súcuan ¿te najehē tu ní cándanje rō de?

³² Te núu cahān yō jeē ñayuu ní catee jniñu un siquí de, te quití ní ñayuu nuú yō, achí de cácahān maá de.

Chí cáyühú de jeē quití ní ñayuu, chí ndivíi í cándanje í jeē tēe ní nacani jñuhun Yaā Dios ní cuu ndije Juan.

³³ Jeē yūcuán ní cacahān de jín yā:

Tu cajini rí, achí de.

Yūcuán na te ni cahān Jesús:

Ní ruhū, suni ma cáchi rí nuú rō ndé ñn ní tee jniñu siquí rí sáha rí jniñu yáha, achí yā.

Jñuhun yátá siquí tēe néé cásjniñu nuú uva

(Mt. 21.33-46; Lc. 20.9-19)

12

¹ Te ni quejéé yā cahān yā jñuhun yátá jín de jijnáhan de:

ñn tēe ní nachuhun de cuehē uva, te ni jesi de corral, te ní sáha de ñn nuú cúhun ndehē un táxin. Te ní sáha de ñn vehe súcún návāha cuu coto de ní cáhnu.

Te ní stóo de nuú sava tēe sájniñu nuú, te cuu sava de ndehē jín. Te ni tee de ichi cuahān jicá de.

² Te máá tiempo ndutútú uva, te ni tají de ñn mozo de cuanuquihin sava uva nuú tēe cásjniñu ún.

³ Te tēe un ní cajnií de mozo un, te ni cacani de í, te ni canatajé de í cuanuhun í súcuan-ní.

⁴ Yūcuán na te tēe chíí uva un ní tají tucu de inga mozo cuahān. Te tēe cásjniñu un ní cajēhe de yuú xiní mozo un, te ní castújí de, te ní cacahān ndevāha de nuú.

⁵ Te tēe chíí uva ní tají tucu de inga mozo cuahān. Te ní cajehni de í. Te suni súcuan

ni tají de cuehē gā mozo cuahān, te sava i ni cacani de, te sava i ni cajehni de.

⁶ Te tēe chíí uva, íyó ñin sēhe de jeē maní ndasí de jíin. Te jeē sándihí na ni tají de sēhe de un cuahān nuū tēe cásajniñu. Te jéni ni de: Tēe ún chíí cuatáhú de jíjnáhan de nuū sēhe ri.

⁷ Te tēe cásajniñu un ní cacahān maá: Tēe chíí táhū cúu jeē yáha. Na cáhni yō de, te ndōo tahū de cuu maá yó, achí.

⁸ Te ní cajniñi de i, ni cajehni de i, te ni cascāne de i inga lado. Achí yá.

⁹ Yūcuán na te ni cajniñuhun yá de:

Núu súcuan ¿te ndese sáha tēe chíí uva un? Ndjii de te cahni de tēe cásajniñu ún, te cuāha de ñuhun cáá uva un núu inga sava tēe sájniñu nuū.

¹⁰ ¿Te á ná tu cahu ró jnūhun yáha jéé yosó núu tútu ñi, jeē ruhū cúu nájniñuhun ñin yuū? Chí achí tutu:

Yuū jeē ní casquéhichí tēe cájeni vehe, yuū yáha nduu jeē quítuu vehe.

¹¹ Maá Jitoho yō Yaā Dios ni sáha ya súcuan, te cánaa ni yō jito yō jniñu yáha. Achí tutu, achí yá.

¹² Yūcuán na te ni canducú de modo jniñi de ya. Chí ni cajecūhun ni de jeē siquī maá de cúu jnūhun yátá ní cahān yā siquī tēe cásajniñu nuū uva jíin tēe cájeni vehe. Te siquī jeē cáyuhú de jeē quítu ni ñayuu, te ni castóo de ya te cuango de.

Siquī xūhun renta

(Mt. 22.15-22; Lc. 20.20-26)

¹³ Yūcuán na te ni catají de sava tēe grupo fariseo jíin tēe grupo Herodes cuango de nuū yá, ndúcú de ndese sáha de návāha cahān yā ñin jnūhun jeē nihín de cuēchi siquī yá.

¹⁴ Te ni quecoo de, te ni cacahān de jíin yá:

Maestro, cájini na jéé tēe cahān ndaā cúu ní, te tu yuhú ní jeē cahān ní ñin ñayuu siquī ní. Chí tu sáha ní cuenta ndese cúu ñin ñin i, chí inuú-ni sáha ní jíin i. Te stéén ndaā ní ndese squícu ñayuu nuū Yaā Dios. ¿Te á íyó váha jeē chúnaa yō renta nuū rey nación Roma jeē jnāi nación yō, chí tuú? ¿A chúnaa yō, chí má chúnaa yō? Achí de jíin yá.

¹⁵ Te maá yá jini yá jeē stahú-ni de, te ni cahān yá jíin de:

¿Najehē cájito ndee ró ruhū? Cuāha ñin xūhún na cóto ri, achí yá.

¹⁶ Te ni cajēhe de xūhún. Te ni jito ya, te ni cajniñuhun yá de:

¿Ndeé ñin nuū cúu jeē ndeé nuū xūhun yáha, te ndé síhví cúu jeē ndeé yāhá?

Te ni cacahān de jíin yá:

Nuū jíin síhví rey un cúu, achí de.

¹⁷ Yūcuán na te ni cahān yá jíin de:

Núu súcuan te nacūaha ró núu rey un jéé yíhi cuenta nuū de, te nacūaha ró núu Yaā Dios táca jéé yíhi cuenta nuū maá yá, achí yá.

Te ni canaa ni de ni cajini de jeē ndichí ní cahān yá.

Jeē ní cacajniñuhún de siquī jeē nátecu ndíyi
(Mt. 22.23-33; Lc. 20.27-40)

¹⁸ Yūcuán na te jecu tēe grupo saduceo ni quecoo de nuū yá. Te tēe un cácahān jeē tu nátecu cuiti ndíyi. Te ni cacahān de jíin yá siquī ñin jnūhun, achí de:

¹⁹ Maestro, Moisés ni tee de nuū tútu jeē cánevāha yó: Núu ñin tēe cuu de, te ndōo ñasihí de, te núu tu ní íyo sēhe de jíin ña, núu súcuan te cánuú jeē ñani de naquihín ñasihí de, te sēhe de jeē cácu jíin ña nucuñi i nuū ndíyi ñani de, achí tutu.

²⁰ Núu súcuan te ni íyo uxā ñani. Te tēe núu ní quijnáhan de jíin ñahan. Te ni jihí de, te tú sēhe de ní íyo.

²¹ Te tēe uū ni naquihín de ña, te suni ni jihí de, te tú sēhe de ní íyo. Te suni súcuan tēe uní.

²² Te ndihúxá de ni condeca de ña, te ni ñin de tú sēhe de ní íyo. Te jeē sándihí te suni ni jihí ñahan ún.

²³ Núu súcuan te núu na nátecu de jíjnáhan de quiví nátecu ndíyi, ¿te ndé ñin de cuu ña ñasihí de? Chí ndihúxá de ni condeca de ña. Achí de jíin yá.

²⁴ Yūcuán na te ni cahān yá jíin de:

Yōhyo cástivi ró jnūhun siquī jeē tu cájecūhun ní ró jeē cahān tutu ñi, ni tu cájini ró jeé íyó poder Yaā Dios jeē nastécu yá ndíyi.

²⁵ Chí quiví nátecu ndíyi, te tuá na jnūhun quijnáhan tee jíin ñahan coo. Chí coo i nájniñuhun ndajéhé Yaā Dios andiví.

²⁶ Te siquī jeē nátecu ndíyi, ¿á tu ní cácahu ró tutu ní tee Moisés, ndese ni cahān Yaā Dios jíin de mēhñu yúcū jeé cayú yáñuhún? Máá rí cúu Yaā Dios Abraham jíin Isaac jíin Jacob, achí yá jíin Moisés.

²⁷ Chí vésú je ní cajihí de, te cátecu de nuū íyó maá yá, chí cúu ya Yaā sáha jeé técu ñayuu ní cáni. Yōhyo cástivi ró jnūhun núu súcuan. Achí yá jíin de.

Jniñu cánuú ndasí gá jeē ní ndacu Yaā Dios

(Mt. 22.34-40)

²⁸ Te ni quee ñin tēe stéén tutu ley Yaā Dios, te ni jini de jeé castichí jnāhan tēe un jíin Jesús. Te ni jini de jeé váha ní nastió cuñí yá jnūhun. Te ni cajniñuhún de ya:

¿Ndeé ñin cúu jnūhun ndácu jniñu cánuú ndasí gá nuū táca gá jniñu ní ndacu ya jehāhán? achí de.

²⁹ Te ni cahān Jesús jíin de:

Yáha cúu jniñu jeé cánuú ndasí gá nuū táca gá. Achí tutu: Ñayuu Israel, cuni nahín ró. Máá Jitoho yō Yaā Dios, maá ñin-ni ya íyó.

³⁰ Núu súcuan te coo maní ndasí ró jíin maá Jitoho ró Yaā Dios, nde jnāi ndasí ró sáha ró ndihí jeé cúsi ní yá, nde jíin ñi jíin ánuá ró,

jiin ní jeē níjnūnī rō, jiin ní fuerza rō. Yāha cūu jniñu ndacu ya jeē cánuú ndasí gá.

³¹ Te jniñu uū jeē ní ndacu ya, suni súcuan cáhán: Cundáhú ní rō jnánhan ró nájnūhun cundáhú ní rō maá ró. Tuá inga jnūhun ndacu jniñu cánuú gá iyó, chi suu máá jéé yáha-ni. Achí yá jiin de.

³² Yūcuán na te ni cahán tēe stéén tutu ley jiin yá:

Yāha ni cahán ní, Maestro. Chi ndaā chi iyó iin-ni Yāa Dios, te tuá na inga yā iyó.

³³ Te cánuú jeē coo maní ndasí yó jiin yá nde jiin ini jiin ánuá yó, jiin ní jeē níjnūnī yó, jiin ní fuerza yó, te cundáhú ní yó jnánhan yó nájnūhun cundáhú ní yó maá yó. Te cánuú ndasí gá jeē yáha vésú jeē cáhmu yó quití jiin táca gá jeē sócō yó nuū yá. Achí de jiin yá.

³⁴ Yūcuán na te ni jini Jesús jeē váha ni stió cuñí de, te ni cahán yā jiin de:

Je yajni cuu quívi ró ndaha Yāa Dios jeē ndacu ya jniñu nuū rō, achí yá.

Yūcuán na te ni iin ga de, tuá ni chūndeyí ni de cajnúhún de ya.

*Siquí jeē cúu Cristo sēhe yucūn David
(Mt. 22.41-46; Lc. 20.41-44)*

³⁵ Te stéén Jesús jnūhun ini templo, te ni cahán yā:

¿Ndesé cúu jeē cácahán tēe cástéén tutu ley Yāa Dios jeē Cristo cúu sēhe yucūn David?

³⁶ Chi máá David suhva ni cahán de jnūhun ya ni sáha Espíritu Santo nde jehánhan:

Máá Jítoho yó Yāa Dios ni cahán yā jiin Jítoho rí, Yāa quiji:

Cucōo ró lado váha ri nuū kujéhnu ró, te na sáha ri jeē quende ró poder táca jéé cájito uhú rohó.

Achí Yāa Dios. Achí David.

³⁷ Te núu sēhe yucūn David cúu Cristo, ¿te ndese cúu jeē ni cáhán de jeē Jítoho de cúu ya? áchí yá.

Te ñayuu cuehē, cánujnahan ni i cájini nahín i táca jnūhun cáhán yá.

*Jeē ni cáhán yā jeē iyó cuéchi de jijnánhan de
(Mt. 23.1-36; Lc. 11.37-54; 20.45-47)*

³⁸ Te stéén yā jnūhun, te ni cahán yā jiin i:

Coto má candíje ró táca tēe cástéén tutu ley. Chi cácusí ni de cáñuhun de sahna cáni jeē stéén jeē kujéhnu de, cájica cuu de jiin. Te cánujnahan ni de jeē cahán yiñúhún ñayuu jiin de ini calle.

³⁹ Te cánujnahan ni de cucōo de nuū silla yiñúhún gá ini vehe i sinagoga, jiin silla yiñúhún gá nuū víco cáyeji ñayuu.

⁴⁰ Te cáquende de vehe ñahan ní caquendōo ndáhú. Te nahán cájicán tahú de návāha cani ni ñayuu jeē tú na cuéchi de. Tēe yáha jijnánhan de chi xeén gá ndoho de castigo. Achí yá.

*Jeē ni sócō ñahan viuda xūhún
(Lc. 21.1-4)*

⁴¹ Te iin quívi néne Jesús ini templo ichi núú táca yejnū nuū cásocō i xūhún. Te jito ya ndese cáchuhun ñayuu xūhún ini yejnū ún. Te cuehē ñayuu cucá ní cachuhun i cuehē xūhún.

⁴² Te ni quee iin ñahan viuda jeē ndóho ndáhú. Te ni chuhun ña uū centavo lulí ini yejnū ún.

⁴³ Yūcuán na te ni cana ya tēe cáscuáha jiin yá, te ni cahán yā jiin de:

Jendaá cahán rí jiin ró jeē cuehē gá cúu jeē ní sócō ñahan viuda ndahú yáha, vésú jeē ní casocō táca ñayuu cucá.

⁴⁴ Chi táca i ni casocō i jeē ni ndóo siquí xūhun cuehē i. Te ñahan yáha, vésú ndahú ndóho ña, te ni chuhun ndihi ña jeē cótecu ña. Achí yá jiin de.

*Jeē ní cachi yā jeē náa templo
(Mt. 24.1-2; Lc. 21.5-6)*

13

¹ Te ni quenda Jesús ini templo cáhnu, te iin tēe scuáha jiin yá ni cahán de:

Maestro, condēhe ní na luu jito táca vehe yáha jéé cúu templo, jiin táca yūú jeē ní cuvāha, áchí de.

² Te ni cahán yā jiin de:

Táca vehe nahnu yáha jéé cájito ró, chi ma cóso jnánhan ga ni iin yuú, chi ndihi jnanū. Achí yá.

*Na seña coo nuú cuácuyajni ndihi ñayívi
(Mt. 24.3-28; Lc. 21.7-24; 17.22-24)*

³ Te ni jehén yā jiin de yucu Olivos jeē íne ichi núú templo cáhnu. Te ni cucōo ya yūcuán. Te Pedro jiin Jacobo jiin Juan jiin Andrés ni cacajnúhún sáin de ya:

⁴ Castúhun ní nuú ná, ¿ndé quívi coo táca jéé ní cachi ní jéé coo? ¿Te na seña coo núu cuacuyajni squícu táca jéé ni cáhán ní? áchí de.

⁵ Te ni cahán yā jiin de:

Coto ró jéé ma stahú ni iin de róhó.

⁶ Chi quijicoo cuehē tēe jeē stahú jiin síhvi rí. Máá rí cúu Cristo, achí de. Te súcuan stáhú de cuehē ñayuu.

⁷ Te nihín ró jnūhun jeē táca lado iyó guerra, chí je yajni coo guerra. Te ma yūhu ró, chí cánuú coo súcuan. Te ni ná tu jinú quívi ndihi ñayívi.

⁸ Chi ndonda nación siquí inga nación, te ndonda ñuu siquí inga ñuu jeē cuajnánhan. Te cháha chúcuán jnāa, te coo jnamā, te ndonda ñayuu siquí jnánhan i. Te táca jéé yáha cácuu jnūndóho quejéé xihna iñúhún gá.

⁹ Te condito ró máá ró, chi nastúu i róhó núú táca tóhó, te ini táca vehe i sinagoga cani i róhó. Te quindecia i sava ró núú táca gobernador jiin núú táca rey, te cahán i cuéchi siquí ró siquí jeē cácaníje ró rúhú. Te súcuan te cuu nacani ró jnūhun ri nuú de.

¹⁰ Te jíni ñúhún jéē xíhna gā cuitē núu jñuhun nuũ táca nación ndese jnáma ri i, te sáá te ndíhi quiví.

¹¹ Te núu ni cajni de róhó cuángoo de jíin ró nuũ táca tóhó, te ma nácani ni ró xíhna gā ndese stíó cuiñí ró nuũ de te cācu ró. Chi máá hora un te máá Yaā Dios cuāha ya jñuhun nuũ rō ndese cahān rō, te jñuhun ún cahān rō. Chi nasūu máá ró cúu jeē cahān, chi Espíritu Santo cúu jeē cahān.

¹² Te ñani jíin ñani nastúu jñahan jeē na cúu. Te tátá nastúu sēhe jeē cúu. Te sēhe ndonda siquí tátá jíin náná jeē cahni.

¹³ Te táca ñáyuu quiví ni i nuũ rō jeē siquí ruhū. Te ñayuu cuiñí nihin jíin jñuhun ri nde quiví jínu, chí cācu i.

¹⁴ Te Daniel, tēe ni nacani jñuhun Yaā Dios, ni tee de jñuhun ñin tēe néé jéē quiji. Te róhó jéē cácahu tutu ún, na jécūhun ní rō. Chi ñin quiví te cuni rō jeē sáha ndevāha de jeē stíví de táca ndajniñu ñi ini templo, te cuiñí de nuũ tú na ley cuiñí de. Te núu cuni rō jeē súcuan cúu, te ñayuu cáyūcu región Judea, na cúnu i caa i yucu quingoo i.

¹⁵ Te ñayuu cáyūcu núu quēhe, ma ndívi i ini vehe jeē quēnehen i ndajniñu i, chí cānuú cunu yachí i návāha cācu i.

¹⁶ Te ñayuu cáhlin nuũ ítu, ma ndíji i vehe jeē quihín i sahna i.

¹⁷ Te quiví ún nacā jeē ndahú ñahan cáñuhun sēhe jíin ñahan cándeca yiquín, chí ma cúnihin ña cunu yachí ña.

¹⁸ Te cacān tahú rō jeē ma quiji jñundóho un jéē cunu ró máá tiempo cúun yuhvā.

¹⁹ Chi jeē quejéé un te coo cuehē jñundóho xeēn, jeē ná tu coo súcuan nde quiví ní sáha Yaā Dios ñayiví te nde vijna. Te jeē ndíhi jñundóho ún te ni ma cóo ga jeē súcuan.

²⁰ Te núu tú nastívi máá Jítoho yō Yaā Dios tiempo jñundóho ún, te ni ñin ñayuu ma cácu cuiñí i. Te jeē siquí ñáyuu cácandíje jeē ní nacāji ya, jeē yúcuan nastívi ya tiempo un.

²¹ Núu súcuan te núu ñin ñayuu cahān jíin ró: Yáhá condēhe ró íne Cristo, chí: Yūcuán condēhe ró íne ya, achi i, te ma candíje ró jéē cahān i.

²² Chi canecoo tēe cástáhú te cahān de jeē Cristo cúu de, chí cahān de jeē tēe nácani jñuhun Yaā Dios cúu de. Te sáha de jñiñu jéhu jeē naa ni ñayuu coto i, návāha stáhú de nde máá ñayuu ní nacāji ya, te núu na cúu.

²³ Te ndito na cóo ni rō, chí je ni castūhun rí nuũ rō vijna nde ná tu coo.

*Ndese coo quiví ndíji Yaā ní nduu tēe
(Mt. 24.29-35, 42-44; Lc. 21.25-36)*

²⁴ Te quiví ún, núu je ni ndíhi jñundóho ún, te cunjúu niándi, te yoó ma ndíi gā.

²⁵ Te ñingoo quāmi ñin andíví. Te táca jéē ñin andíví chí quisi i.

²⁶ Yūcuán na te coto ñayuu nuũ maá rí, Yaā ní nduu tēe, ndíji rí jíin vícō, te condiso rí cuehē poder, te yōhoyo luu cujéhu rí.

²⁷ Yūcuán na te tají rí ndajéhé rí quinastútú yá ñayuu ní nacāji rí ndicúún lado ñayiví, nde nuũ ndíhi ñayiví te nde nuũ ndíhi andíví.

²⁸ Vijna te scuáha ró ndese sáha nundēhe higo: Núu je ni nane numa, te ni najee ndaha, te cājini rō jeē jé ni cuyajni tiempo jihní.

²⁹ Te suni súcuan núu ni cajini rō jeē ní quejéé cúu táca jñiñu jeē ni cáhān rí, yūcuán na te na jécūhun ni rō jeē ní cuyajni quiví ndíji rí, te yachí coo.

³⁰ Jendaá cahān rí jíin ró jeē ma cúu ndíhi ñayuu jeē cóto jñundóho ún, chí nde squícu ndíhi jñiñu ún.

³¹ Andíví jíin ñayiví chí naa, te táca jñuhun cahān rí chí ma náá, chí ndíhi squícu.

³² Te quiví jíin hora jeē ndíji rí, tú ni ñin ñayuu jíni, ni máá ndajéhé cáhiyo andíví, ni máá rí, Sēhe Yaā Dios. Chi máá ñin ni Tátá rí cúu jeē jíni.

³³ Núu súcuan te na cócuhun ni rō táca jñuhun yáha, te ndito na cóo ni rō, te cacān tahú rō, chí tu cājini rō na quiví ndíji rí.

³⁴ Chí coo nájñuhun ñin tēe jeē quihín jicá de, te nde ná tu quenda de vehe de, te ni ndacu de jñiñu nuũ táca mozo de ndese sáha ñin ñin de. Te ni ndacu de jñiñu nuũ tēe ndíto yéhyí jéē na cóndito de.

³⁵ Te suni súcuan róhó jíjnahan ró, ndito na cóo ni rō. Chí cúu rí nájñuhun jítoho vehe ún, te tu cājini rō na hora ndíji rí, á jéē cuácuaa, chí ñuú, chí jéē cána líhli, chí jénēhen.

³⁶ Chí ñin sanaa-ni te ndíji rí, te coto ró jéē ma nánihin rí rohó jéē tu ndíto rō.

³⁷ Te jñuhun cahān rí jíin ró jíjnahan ró, suni cahān rí jíin ndívi ñayuu: Ndito na cóo ni rō jíjnahan ró. Achí yá.

Jeē ní casquínahan de jñuhun jeē jñi de Jesús

(Mt. 26.1-5; Lc. 22.1-2; Jn. 11.45-53)

14

¹ Te cúmaní uū gā quiví te quejéé vico pascua jeē cáyeji ñayuu hebreo pan jeē tú na levadura yíhi. Te sutú cácujeñu jíin tēe cástéén tutu ley, ni canducú de modo ndese jñi de Jesús jíin jñuhun stáhú, te cahni de ya.

² Te ni cacahān de:

Ma jñi yó de máá quiví víco, chí ndonda ñayuu siquí yó, achí de.

Jñuhun ñahan jeē ní chuhun perfume xini yā

(Mt. 26.6-13; Jn. 12.1-8)

³ Te íne Jesús ñuu Betania vehe Simón, tēe ni ndoho cuehyí stehyú. Te níni yéji yā staā, te ni quee ñin ñahan nuũ yā, ndáhá ña ñin frasco yuú luu jeē ñuhun aceite perfume, jeē

maní ita nardo cúu, te yōhoyo yahu ndéé. Te ni tahú ña frasco un, te ni chuhun ña xiní yá.

⁴ Te sava tēe cáhiin yūcuan ní cacuítĩ ní de, te ni cacahān de:

¿Najehē cúu jeē náa saá-ni perfume jiñā?

⁵ Chi cuu xīcō yahu yó víhyá gā uní ciento denario, te cuāha yo núu ñayuu ndahú núu, áchí de.

Te ni cacahān sōo de jíin ña.

⁶ Te ni cahān Jesús:

Ma stáhān rō ña. ¿Naun cásáha rō jēē nácani uhū ní ña? Chi ñin jniñu váha cúu jeē ní sáha ña jíin rí.

⁷ Chi níni coyūcu ñayuu ndahú jíin rō, te núu cáuni rō te cuu sáha váha rō jíin í. Te ruhū chi tuá condee rí jíin rō.

⁸ Chi ní sáha ña ndihí jeē cuu sáha ña jeē maní ña jíin rí. Chi nde ná tu quindūji rí te je ní sátuhva ña ruhū jeē ní chuhun ña perfume ruhū.

⁹ Jendaá cahān rí jíin rō jeē ní cáhnu ñayivi ndé-ni cúu nuū cuité núu jñuhun jeē jnāma rí ñayuu, suni nacani i jñuhun jeē ní sáha ñahan yáha, návāha cocuhun ní ñayuu ña, áchí yá.

Jeē ní nastúu Judas yá

(Mt. 26.14-16; Lc. 22.3-6)

¹⁰ Yūcuán na te Judas Iscariote, ñin jeē ndihúxí uū tēe cáscuáha un, ní jehēn de nuū sutú cácujeñhu, ní sándaá de jíin jēē nastúu de Jesús nuū jijnáhan.

¹¹ Te nuū ní cajini sōho sutú un jeē cahān de, te ni cacusiñ ní, te ni cajejnūhun jeē cuāha xūhun núu de. Te nde quiví un ní nducú de modo ndese nastúu de ya.

Jeē ní jequin yá Cena yá

(Mt. 26.17-29; Lc. 22.7-23; Jn. 13.21-30; 1 Co. 11.23-26)

¹² Te ni quee máa quiví jeē quejéé vico pascua jeē cáyeji ñayuu pan jeē tú na levadura yñi, te suni quiví un cájehni i londe nájñuhun ní ndacu Yaā Dios jniñu jeē sáha i vico pascua un. Te tēe cáscuáha un ní cacajnūhún de ya:

¿Nde núu cuní ní jēē quísátuhva ná cuxini ní vico pascua? áchí de.

¹³ Te ní tají yá uū tēe cáscuáha ún quingoo de, te áchí yá jíin de:

Cuángoo nde ñuu, te yūcuán najnáhan rō jíin ñin tēe ndíso quiví ndute. Te condiquín rō de quihín rō jíin de.

¹⁴ Te vehe jeē ndívi de, yūcuan cáhān rō jíin tēe chíi vehe: Achí máa Maestro: ¿Nde ñin cúu cuarto vehe ní cuāha núu ní núu cuxini ya vico pascua jíin tēe cáscuáha jíin yá? áchí rō.

¹⁵ Te máa de stéen de ñin cuarto cáhnu nde xiní vehe jeē je iyó túhva. Te yūcuan sátuhva rō jēē cuxini yó, áchí yá jíin de.

¹⁶ Te cuangoo tēe cáscuáha ún, te ní jinūcoo de ñuu, te ní canihín de nájñuhun ní cahān yá

jíin de. Te ni casátuhva de jeē cuxini ya vico pascua.

¹⁷ Te jeē cuácuaa, te ni quee ya jíin ndihúxí uū de.

¹⁸ Te ni cacucōo de mesa cáyeji de staā, te ni cahān yá:

Jendaá cahān rí jíin rō jeē ñin rōhó jēē yéji jíin rí, nastúu ro ruhū, áchí yá.

¹⁹ Yūcuán na te ni cacucuíhyá ní de, te ná ñin ná ñin de ní cacajnūhún de ya:

¿A sáña cúu? áchí ñin de.

Te suni súcuan inga de:

¿A sáña cúu? áchí ñin ñin de.

²⁰ Te ni cahān yá jíin de:

Ñin jeē uxí uū rō jeē cáyeji cáhnu jíin rí ñin cohō, suu nastúu ruhū.

²¹ Te ruhū, Yaā ní nduu tēe, jendaá cúu jeē quihín rí cuu rí, nájñuhun yósó jñuhun rí nuū tútu í. Te nacá xeēn ndoho tēe nastúu ruhū. Váha ga núu tu ní cácu tēe un núu, áchí yá.

²² Te níni cáyeji de jíin yá, te ní quihín ya pan, te ni nacuatáhu yá, te ni tahú cuéché yá, te ní jehé ya nuū tēe cáscuáha jíin yá. Te ní cahān yá:

Caji rō jijnáhan rō, chí yáha cúu yiqui cúñu rí, áchí yá.

²³ Yūcuán na te ní quihín ya ñin copa ndūxi uva, te ni nacuatáhu yá, te ní jehé ya ní cajihí ndihí de.

²⁴ Te ni cahān yá jíin de:

Yáha cúu niñí rí jeē cuáha rí jeē cúu contrato jeé, te cati jeē ndundoo cuéchi cuehē ñayuu.

²⁵ Te jendaá cahān rí jíin rō jeē ndé vijna te ma cóho ga rí ndūxi ndehē uva yáha, chí nde quiji quiví ndacu Yaā Dios jniñu ní ñayiví, te sáa te coho tucu rí jíin rō jijnáhan rō. Achí yá.

Jeē ní cachi yá jeē yūhu Pedro cahān de jeē jini de ya

(Mt. 26.30-35; Lc. 22.31-34; Jn. 13.36-38)

²⁶ Te ní jita ya ñin yaa í jíin de jijnáhan de. Te ní quenda ya cuahān yá jíin de nde yucu Olivos.

²⁷ Yūcuán na te ní cahān yá:

Ndívi rō nayūhu rō jeē siquí ruhū jecuáa vijna. Chí suhva je yósó jñuhun rí nuū tútu í, ní cahān Yaā Dios: Cuāha rí jñuhun jeē cáhni ñayuu tēe ndíto lanchi, te lanchi un cuité núu tí jeē yūhu tí, áchí.

²⁸ Te jeē nátecu rí, te xihna ruhū cosnūu rí quihín rí región Galilea, te sáa te najinūcoo rō, áchí yá.

²⁹ Yūcuán na te ní cahān Pedro:

Vésú ndihí de na náyūhú de, te máa ná chí ma náyūhú cuiti ná, áchí de jíin yá.

³⁰ Te ní cahān yá jíin de:

Jendaá cahān rí jíin rō jeē jecuáa vijna, nde ná tu cana líhli uū jíinu, te yūhu rō jeē jñiñ ñayuu rohó, te uní jínu cahān rō jeē tu jíni rō ruhū, áchí yá.

³¹ Te ni cahān teyí de jíin yá:
Vēsú núu cuu na jíin ní, te ma cahān cuiti na jée tu jíin na níhin, áchí de.
Te suni súcuan ni cacahān ndihi de.

Jeē ni jicān tahu yā nuū huerto Getsemaní
(Mt. 26.36-46; Lc. 22.39-46)

³² Yūcuán na te ni jíin Jesús jíin tée cáscuáha jíin yá in lugar nuū naní Getsemaní. Te ni cahān yā jíin de:

Yāhá-ni cucōo ró, te na quihín rī cacān tahu rī, achí yá.

³³ Te ni jeca ya Pedro jíin Jacobo jíin Juan, cuahān yā jíin de. Te ni quejee yá cucuíhyá ndasí ni yā te cúxí ni yā jeē quiji jnūndóho siquī yā.

³⁴ Te ni cahān yā jíin de:

Yōhyo cucuíhyá ni rī, te ndúcú sáha jeē cúu rī. Yāhá condetu ró te condito ró, áchí yá.

³⁵ Te ni jica ya jecu gā, te ni jecuiñī yití yá ni jequin ya nuū yā nuū ñúhun. Te ni jicān tahu yā nuū Yā Dios jeē núu cuu te ma ndóho ya jnūndóho jeē quejee quiji siquī yā.

³⁶ Te suhva ni cahān yā:

Tátá maá ná, ndihi-ni níñu cuu sáha máa ní. Te tejiyo ní jnūndóho yáha jée ma quiji siquī ná. Te nasūu jée cuní maá ná, chí jeē cuní maá ní na cóo, áchí yá.

³⁷ Te ni ndee yā nuū ndinúni tée cáscuáha jíin yá, te ni jito ya jeē cáquixí de. Te ni cahān yā jíin Pedro:

Simón, ¿á quixí ró? ¿A tu ní cánda ró condito ró jíin rī vēsú in hora?

³⁸ Coo ndito ni ró te cacān tahu ró jeē chindéé ñáhan yá rohó jeē ma sáha ró cuéchi jeē coto ndee jeneé róhó. Chí cuní ndije ánuá ró squícu vāha ró, te yiqui cúñu ró chí tu fuerza, achí yá.

³⁹ Te ni jehēn tucu ya, ni jicān tahu yā, te suni jnūhun yúcuan ní cahān yā.

⁴⁰ Te ni ndee ya nuū de, te ni jito ya jeē cáquixí tucu de, chí yōhyo cáji de máhná. Te tuá ní cánihin de jnūhun stío cuñí de nuū yā.

⁴¹ Te ni ndee yā jeē vuelta unī, te ni cahān yā jíin de:

Vijna te cusū ró te ndetātu ró. Te tuú chí je ní cuu, chí je ní quee hora, te ruhū. Yāá ní nduu tēe, natūu rī te jni tēe cáhīyo cuéchi ruhū.

⁴² Ndocuiñī jijnáhan ró, chí je vēji tēe nastūu ruhū, te quihín yō jíin de. Achí yá.

Jeē ní cajñi de Jesús
(Mt. 26.47-56; Lc. 22.47-53; Jn. 18.2-11)

⁴³ Te sá cáhán gā yā súcuan, te ni quee-ni Judas, in jnáhan jeē uxí uū tēe cáscuáha jíin yá. Te vējicoo cuehē tēe jíin de, cándaha de espada jíin yujnu. Chí sutū cáscujéhu jíin tēe cástéén tutu ley jíin tēe jéhu cándacu jniñu, ni cataji de tēe ún.

⁴⁴ Te Judas, tēe nástūu ya ún, je ní jēhe de in seña nuū tēe un jíináhan, chí ní cachi de:

Tēe jeē téchūhu rí un cúu. Te jni ró jíináhan ró quihín ró jíin, te ma siaá cuiti ró, achí de.

⁴⁵ Te ni quee de nde nuū Jesús, te ni cahān de jíin yá:

Maestro, Maestro, achí de.

Te ni techūhu de ya.

⁴⁶ Te táca gá tēe un ní cajñi de ya, te cuango de jíin yá.

⁴⁷ Te in tēe ine jíin yá ni tava de espada de, te ni jehnde de sóho in mozo maá sūtū cujéhu ga.

⁴⁸ Te ni cahān Jesús jíin ñayuu cuehē ún:

¿Te va tēe cuhñá cúu rī jeē véjicoo ró jíin espada jíin yujnu jni ró ruhū jeē súcuan?

⁴⁹ Táca quiví ni ine rī jíin ró jijnáhan ró ini templo cáhnu, ni steén rī jnūhun, te tu ní cájni ró ruhū. Te súcuan cásha ró návaha na squícu jeē cahān tutu in, achí yá.

⁵⁰ Yūcuán na te ndihi tēe cáscuáha jíin yá, ni castóo de ya, ni cajinu de cuango de.

Tēe suchí jeē ní jinu

⁵¹ Te in tēe suchí, ndíquín de ya cuahān de jíin yá. Te ndi de máá in sahma cuitá. Te ni cajñi tēe ún de.

⁵² Te máá sahma cuitá un ní canihin. Te ni jinu máá ñi-ni de cuahān de.

Jeē ní ndichi Jesús nuū junta tēe cáscujéhu ga
(Mt. 26.57-68; Lc. 22.54-55, 63-71; Jn. 18.12-14, 19-24)

⁵³ Yūcuán na te ni jinūcoo de jíin Jesús nuū sutū cujéhu ga. Te táca sūtū cáscujéhu jíin tēe jéhu cándacu jniñu jíin tēe cástéén tutu ley, ni candutútú de.

⁵⁴ Te Pedro chí jíicá-ni ndíquín de ya, te ni jinū de nde ini patio sutū cujéhu ga. Te ni cucōo de jíin táca policia, násaá de ñuhūn.

⁵⁵ Te sutū cáscujéhu jíin ndihi tēe cásha junta cujéhu ga, ni canducú de cuéchi siquī Jesús, chí cahni de ya cácuni de. Te tu ní cánihin de.

⁵⁶ Chí cuehē de ni cacahān yaá siquī yā, te tu ní quijnáhan jnūhun ni cacahān de.

⁵⁷ Yūcuán na te ni candocuiñī sava de, te ni catee de cuéchi siquī yā, achí de:

⁵⁸ Máá ná ní cajini ná cáhán de jeē canu de templo yáha jée ní cuvāha ni casáha tēe, te nuū uní quiví te nacani de inga jeē násūu jíin ndaha tēe cuvāha, achí de. Achí jijnáhan.

⁵⁹ Te ni jnūhun yáha tu ní quijnáhan tucu jeē cacahān de siquī yā.

⁶⁰ Yūcuán na te sutū cujéhu ga ni ndocuiñī de nuū ñayuu cuehē ún, te ni cajñihún de Jesús:

¿Naun tu cáhán cuiti ró? ¿A iyó ndáa jeē cacahān tēe yáha siquī ró? achí de.

⁶¹ Te máá yá tu ní cáhán cuiti yā, chí tú na vé ní stío cuñí yā. Te sutū cujéhu ga ni cajñihún tucu de ya:

¿A máá ró cúu Cristo, Sēhe Yāá vāha jeē cujéhu? achí de jíin yá.

62 Te ni cahān yā:

Suu ri cúu. Te coto ró jéē ruhū, Yāā iyó poder, te ndiji ri ichi ándiví jín vicō, achí yá.

63 Yūcuán na te sutū cujéhu ga ni jehnde de sahma de jeē quití ndasí ni de, te ni cahān de:

¿Ndé jíni ñúhún gá yō testigo núu súcuan?

64 Chí je ni cajini ró jéē cahān de jñūhun ndevāha jeē quití ni Yāā Dios, chí sáha de máá de Sēhe Yāā Dios. ¿Te ndese cájeni ni ró? Achí de.

Te ndihi de ni cacahān jeē na cúu yā.

65 Te sava de ni catesihí de nuū yā, te ni cajesi de sahma nuū yā, te ni cacani de ya. Te cacahān de jín yá:

Cachí ndé ñn cúu jeē ní caní róhó, achí de. Te táca téé policia ní cacani de nuū yā.

Jeē ní cachi Pedro jeē tu jíní de ya

(Mt. 26.69-75; Lc. 22.56-62; Jn. 18.15-18, 25-29)

66 Te íne Pedro ini patio ichi chíji nuū cáhiin de jín Jesús. Te ni quee ñn ñahan jéjñíñu vehe sutū cujéhu ga ún.

67 Te ni jito ña nuū de jeē néne de násaá de yuñúhún. Te ni jito váha ña nuū de, te ni cahān ña:

Róhó chí suni ni jica ró jín Jesús, téē ñuu Nazaret, achí ña.

68 Te máá de tu ní cáchi de, chí ni cahān de: Tu jíní rí de, ni tu jíní rí na jñūhun cáhān rō, achí de.

Te ni quenda de yéhyí núu quéhe. Te ni cana-ni líhli.

69 Te ñahan jéjñíñu un ní jito tucu ña nuū de, te ni quejéé ña cáhān ña jín ñayuu cáhiin yūcuán:

Téē yáha suni jñāhan táca téé un cúu, achí ña.

70 Te máá de tu ní cáchi tucu de. Te ni cunúu jecu gā, te ñayuu cáhiin yūcuan ní cacahān tucu i jín Pedro:

Jendaá ndije jeē suni jñāhan de cúu ró, chí téē Galilea cúu ró, te inuú-ni cáhān rō jín de jññāhan de. Achí í.

71 Yūcuán na te ni quejéé de cáhān teyí de jeē na cōndee cuēchi siquí de núu tu cáhān ndaā de:

Tu jíní rí téē un jéē cacahān rō jñūhun de, achí de.

72 Yūcuán na te ni cana-ni líhli vuelta uū. Te ni nucūhun ni de jñūhun ni cahān Jesús jín de: Nde ná tu cana líhli uū jínu, te yūhu ró te cahān rō uní jínu jeē tu jíní rō ruhū. Te ni nacani ni de siquí jñūhun ún, te ni ndahyū de.

Jeē ní indichi Jesús nuū Pilato

(Mt. 27.1-2, 11-14; Lc. 23.1-5; Jn. 18.28-38)

15

1 Te jeē ní cundjijn, te sutū cácujehu ni candutútú de jín téē jéhu cándacu jñíñu, jín téē cástéén tutu ley, jín ndihi téē casáha junta cujéhu ga, te ni casqujñāhan de jñūhun. Te ni cajihni de Jesús, te cuango de jín yá nuū Pilato, téē cúu gobernador.

2 Te Pilato ní cajñūhún de ya:

¿A máá ró cúu Rey ñayuu hebreo? achí de. Te ni cahān yā:

Suu ri cúu, nájñūhun cáhān rō.

3 Te sutū cácujehu un ní cacahān de cuehē cuēchi siquí yā.

4 Te Pilato ní cajñūhún tucu de ya:

¿Naun tu cáhān cuiti rō? ¿A tu jíní ró jéē cuehē cuēchi cácahān de siquí rō? achí de.

5 Te tu ní cáhān cuiti yā ní ñn jñūhun jín de. Te nahān ní naa ní Pilato ndéhé de nuū yā.

Jeē ní cundaā jeē cúu yā

(Mt. 27.15-31; Lc. 23.13-25; Jn. 18.38-19.16)

6 Te iyó costumbre Pilato jeē quiví víco un siaá de ñn téē íne vecāa, núu na-ni téē cácuni ñayuu.

7 Te iyó ñn téē nání Barrabás, íne de vecāa jín táca jñāhan de siquí jeē ní candona de siquí tohō te ni cajehni de ndiyi.

8 Te ni quecoo ñayuu cuehē, te ni cacahān i jín Pilato jeē na sáha de nájñūhun iyó costumbre de.

9 Te ni cahān Pilato jín i:

¿A tu cácuni rō jeē siaá rí téē cúu Rey rohó ñayuu hebreo? achí de.

10 Súcuan ní cahān de, chí cúní de siaá de Jesús. Chí je ni jecūhun ni de jeē ní cacucueúsún ní táca sūtū un cájito de ya, te jeē yūcuan ní quijicoo jín yá nuū de.

11 Te sutū cácujehu un ní cascáhān de ñayuu cuehē un jéē váha ga na cácan i jeē siaá Pilato Barrabás.

12 Yūcuán na te ni cajñūhún tucu Pilato:

Núu súcuan ¿te ndese cácuni rō jeē sáha ri jín téē jeē cácahān rō jeē cúu de Rey rohó ñayuu hebreo? achí de jín i.

13 Te ni cacana jee i:

Cata caa ní de jicā cruz, na cúu de, achí i.

14 Te ni cahān Pilato:

¿Na cuēchi ní sáha de núu súcuan?

Te ñayuu un ní cacana jee tucu i:

Cata caa ní de jicā cruz, na cúu de, achí i.

15 Te Pilato cuní de jeē na cúsi ní ñayuu jín de, te ni siaá de Barrabás. Yūcuán na te ni ndacu de jñíñu jeē na cáni táca soldado Jesús, jín jéē cata caa de ya jicā cruz.

16 Yūcuán na te soldado un cuángoo de jín yá ini patio palacio, jeē sácatā de nuū yā. Te ni canastutú de ndihí jñāhan de.

17 Te ni cachuhun de ya ñn sahma cuehé ndihí jéē cúu sahma rey. Te ni casáha de ñn corona íñu, ni cachuhun de xiní yā.

18 Yūcuán na te ni cacana de:

Nacā jeē váha rey cúu Rey ñayuu hebreo, achí de.

¹⁹ Te ni cacani de yujnu xinī yā, te ni catesihí de nuū yā, te ni cajecuiñi yití de nuū yā, casáha de jeē chiñuhún de ya.

²⁰ Te nuū ní cuu ní casacatā de nuū yā, te ni catava de sahma cuehé ndíhí un, te ni canachuhun de ya sahma máá yā. Te ni caquenehen de ya jeē cata caa de ya jicā cruz.

*Jeē ní cacata caa de ya jicā cruz
(Mt. 27.32-44; Lc. 23.26-43; Jn. 19.17-27)*

²¹ Te ñin tēe nání Simón ñuu Cirene, tēe cúu tátá Alejandro jín Rufo, vendijí de jeē ní jēhen de rancho. Te ni yāha de yūcuán, te ni catejñiñu soldado un de jeē cóndiso de cruz yā.

²² Te cuangoo de jín yā ñin lugar nuū naní Gólgota, jeē cuní cahān Lugar Yiqui Xiní.

²³ Te ni cajēhe de vino jeē ní sácá núu jín sūje uvuā jeē cóho ya, te tu ní jhí ya.

²⁴ Te ni cacata caa de ya jicā cruz. Te ni casáha de sorteo jeē siquí ndese nihñ ñin ñin de sahma ya.

²⁵ Te cahñ ni cacata caa de ya.

²⁶ Te jñuhun ní catee de xiní cruz cahān na siquí ní jihí yā: Yāha cúu Rey ñayuu hebreo, achí.

²⁷ Te suni ní cacata caa de uū tēe cuihná núu uū gā cruz, ñin de lado váha ya, te inga de lado jecó yā.

²⁸ Te ni squicu jñuhun cáhán tutu ñi: Ni casquijnáhan de ya jín tēe casáha neé, achí.

²⁹ Te ñayuu cáyāha yūcuán cáscuicó i xiní i, te cacáhan neé i:

Jajañ. Róhó chí cáhán rō jeē cánu rō templo cáhnu, te nuū uní quiví te nucondichí sáha rō.

³⁰ Núu súcuan te jnama ró máá ró, te nuu ró jicā cruz vñ, achí i.

³¹ Te suni súcuan ní cacahān catá sutū cácujeñnu jín tēe cástēen tutu ley, te achí de cacahān máá de:

Núu inga ñayuu ní jnama de, ¿te naun tu cúu jnama de máá de vijna?

³² Núu na cūni yō jeē Cristo, Rey ñayuu Israel, nuu de jicā cruz vijna, yūcuán na te candije yó, achí de jijnáhan de.

Te tēe cándita caa jín yā, suni súcuan ní cacahān neé de.

*Jeē ní jihí Jesús
(Mt. 27.45-56; Lc. 23.44-49; Jn. 19.28-30)*

³³ Te nuū ní cuu cahuxí uū, te ni cunee ní cáhnu nde cahuní.

³⁴ Te nuū ní cuu cahuní, te ni cana jee Jesús:

Eloi, Eloi, ¿lama sabactani? achí yā. Te jñuhun un cūni cahān: Yāa Dios máá ná, Yāa Dios máá ná, ¿naun ní stóo ní sáña?

³⁵ Te sava ñayuu cáhñin yūcuán, ní cajini i jñuhun ún, te ní cacahān i:

Cuni nahín, chí cána de xiní Elías, tēe ní nacani jñuhun Yāa Dios jenahán, achí i.

³⁶ Te ní jinu ñin tēe, ní jechundaji de cachí nuū vinagre iyá. Te ní tee de xiní ñin yujnu, te ní tee de yuhu ya jeē cóho ya. Te ní cahān de:

Na cóndēhe yó núu quiji Elías nasnúu de, achí de.

³⁷ Te máá Jesús ní cana jee ya, te ní jihí-ni ya.

³⁸ Yūcuán na te sahma ndíta caa jeē ndi-hyú cuarto ñi ini templo cáhnu, ní ndatá sava sava nde xiní te nde nuū jehé.

³⁹ Te tēe ñuu Roma jeē cúu capitán, índichi de nuū yā, te ní jini de jeē ní cana jee ya te ní jihí yā. Te ní cahān de:

Jendaá ndije jeē Séhe Yāa Dios cúu tēe yāha, achí de.

⁴⁰ Te suni cáhñin sava ñahan, cándēhe jicá ña. Te uní ña cácuu María ñuu Magdala, jín María naná José jín Jacobo suchí, jín ñahan nání Salomé.

⁴¹ Te ñahan yāha ní candiquñ ña ya, ní cajejñiñu ña nuū yā nde náa jicā ya Galilea. Te suni cáhñin cuehé gā ñahan jeē ní jéngoo jín yā ñuu Jerusalén.

*Jeē ní quindūji Jesús
(Mt. 27.57-61; Lc. 23.50-56; Jn. 19.38-42)*

⁴² Te ní ini quiví ún. Te quiví sátuhva cúu, chí sajnē cúu quiví ndétátú.

⁴³ Te ní quee José, tēe ñuu Arimatea. Te cúu de ñin tēe cújeñnu nuū junta cújeñnu ga. Te suni ñuhun ní de jeē quiji quiví jeē ndacu Yāa Dios jñiñu. Te tu yuhú de chí ní quiví de nuū Pilato, ní jicān de yiqui cúñu Jesús.

⁴⁴ Te Pilato chí náa ní de jeē yachí ní jihí yā. Te ní cana de capitán, te ní cajñuhún de tēe un núu je ní jihí yā.

⁴⁵ Yūcuán na te ní cucáhnu ní de jeē ní cáhñin capitán jín de, te ní jēhe de jñuhun jeē quihñ José yiqui cúñu yā.

⁴⁶ Te José ní jeen de ñin sahma cuitá váha. Te ní snúu de yiqui cúñu yā, te ní chusúcun de sahma ún. Te ní chindūji de ya ñi ñin yāu jeē quindūji ndiyí, jeē ní caan jicā ñin cava. Te ní jesi de ñin yūu yuhu yá un.

⁴⁷ Te María ñuu Magdala, jín María naná José, ní cajito ña nuū ní cachindūji de ya.

*Jeē ní natecu Jesús
(Mt. 28.1-10; Lc. 24.1-12; Jn. 20.1-10)*

16

¹ Te ní ini quiví ndétátú, te María ñuu Magdala, jín María naná Jacobo, jín Salomé, ní cajeen ña táca perfume jeē quíchuhun ña yiqui cúñu yā.

² Te jenēhen quiví domingo, jeē ní cane níandii, te ní jinūcoo ña nuū ní yindūji ya.

³ Te cacahān ña:

¿Ndé nihñin yō tēe tejiyo yūu ndihyú yuhu yáú? achí ña.

4 Te ni candacoto ña, te ni cajito ña jeē jé ni cujiyo yuū cáhnu un cuáhān.

5 Te ni quivicoo ña ini yaū ndāyi. Te ni cajito ña iin ndajéhé Yaā Dios jeē cáa nájñuhun tēe suchí, néne ya ichi lado váha, ñuhun ya iin sahma cuijín cáni. Te ni cayūhú ña.

6 Te ni cahān yā jín ña:

Ma yūhu ró jijnáhan ró. Chi vecondēhe ró Jesús ñuu Nazaret, Yaā ni jíhi jicā cruz. Tuá yā yāhá, chi je ni natecu yā. Yāhá condéhé ró nuū ní cachindūji de ya.

7 Cuánungoo te cachi rō nuū tēe cáscuáha jín yá, jín nú Pedro, jeē xihna gā maá yá jinū Galilea, te sáa te najinūcoo de. Te yūcuán coto de nuū yā, nájñuhun ni cahān yā jín de nde saá, áchí yá jín ña.

8 Yūcuán na te ñahan un ní quendacoo ña nuū ní yindūji ya, te cájinu ña cuangoo ña. Chi quisi i ña jeē cáyūhú ña. Te tu ní cácachi cuiti ña nuū ní iin, chí cáyūhú ña.

Jeē ní nane Jesús nuū María ñuu Magdala (Jn. 20. 11-18)

9 Te Jesús ni natecu yā jenéhen quiví domingo. Te xihna gā ni nane ndijin yā nuū María ñuu Magdala, ñahan jeē ní quenehen ya uxā tachī ini.

10 Te cuahān ña cuacastūhún ña nuū tāca tēe ni cajica jín yá jeē ní nane ya nuū ña. Te cácuquíhá ni de te cándahyū de.

11 Te nuū ní cajini de jñuhun jeē ní jito ña nuū yā jeē tēcu yā, te tu ní cácandíje de jñuhun cáhān ña.

Jeē ní nane ya nuū uū tēe cáscuáha jín yá (Lc. 24.13-35)

12 Yūcuán na te ni quendacoo uū jnáhan tēe ún, cájica de cuahān de ichi rancho, te sán modo ni nane ndijin yā nuū de.

13 Te ni canandicó de, ni cacastūhún de nuū tāca gá jnáhan de. Te ni tu ní cácandíje tucu jnáhan de jeē cácahān ndindúú de.

Jeē ní tejnūu ya de nacani de jñuhun (Mt. 28.16-20; Lc. 24.36-49; Jn. 20.19-23)

14 Te cúcuéé gá te ni nane ndijin yā nuū ndihúxi iin de jeē cáyūcú de mesa cáyeji de staā. Te ni cahān yā nuū de, chí nīhni ni de jeē tu cácandíje de jeē cácahān jnáhan de un, jéé ní natecu yā ni cajito de ya.

15 Te ni cahān yā jín de:

Cuángoo jijnáhan ró ní ñayiví, te nacani ró jñuhun rí nuū tāca ñayuu ndese jnáma rí i.

16 Te ñayuu candíje te cuandute i, chí cácu i. Te ñayuu tú candíje, chí jnahnú ndetú i.

17 Te ñayuu candíje, sáha i tācá jniñu jéhu yáha jeē steén jeē iyó rí jín i: Jín síhví rí quenehen i tachī ini ñayuu. Te cahān i tijni yuhu jéé.

18 Te núu ni jñi sanaa i coō, chí núu ni jñi i veneno, te ma sáha daño jín i. Te sumí soó i ndaha i siquí ñayuu cácuñú, te nduváha. Achí yá jín de.

Jeē ní ndaa ya cuanuhun yā andiví (Lc. 24.50-53)

19 Yūcuán na te nuū ní ndihí ni cahān maá Jítoho yō jín de jijnáhan de, te ni ndaa ya cuanuhun yā andiví, te ni cucōo ya lado váha Yaā Dios nuū cujéhu ya.

20 Te maá de ni quendacoo de, ni canacani de jñuhun ya tāca lado ndese jnáma ya ñayuu. Te maá Jítoho yō ni chindéé ñáhán yá de. Te ni jéhe ya fuerza jeē sáha de tācá jniñu jéhu jeē steén jeē iyó ndáa jñuhun cánacani de. Te ni cuu. Amén.

JNUHUN VAHA NI TEE SAN LUCAS

¹ Cuehē tēe ni cajicu de ni catee yúcun de historia Jesús, tãcã jniñu jeē ni sãha ya ni cajito yõ.

² Te ni catee de tãca jnũhun jeē ni cacastũhun ñayuu nuũ yõ, jeē ní cajito i jniñu yúcuan nde ná ni quejéé, te ni canacani i jnũhun ya.

³ Te máã ná, suni ni nanducú yúcun ná tãca jnũhun ya, nde nuũ ní quejéé. Te ni jeni ni na jéé suni iyó váha jeē tēe cáji ná tãca jnũhun yáha nuũ ní, amigo Teófilo.

⁴ Te súcuan te cuni ni jéé iyó ndãã tãca jnũhun jeē ní cacastũhũn i nuũ ní.

Jeē ní cachi ndajéhé jeē cacu Juan tēe scuãndute

⁵ Tiempo jeē ní cuu Herodes rey región Judea, te ni iyo ñn sutũ ñayuu hebreo, naní de Zacarías, te grupo Abías cúu de. Te ñasihí de nání ña Elisabet, te suni sēhe yucũn maã sutũ Aaron cúu ña.

⁶ Te ndindúú de cahĩyo ndaã de nuũ Yaã Dios, te ndaã váha cãsquicu de jniñu ndãcu ley maã Jitoho yõ Yaã Dios, cájito tãca ñayuu.

⁷ Te tú sēhe de iyó, chí ñahan númã cúu Elisabet, te je jéhu ndindúú de.

⁸ Te ñn quivĩ te jéjniñu Zacarías nuũ jniñu jeē cúu de sutũ nuũ Yaã Dios, chí ni quee quivĩ jeē ndívi grupo de.

⁹ Te ni casáha de sorteo, nájñũhun iyó costumbre sutũ. Te ni sãha tocar Zacarías jeē quivĩ de ini cuarto ñ templo Jitoho yõ Yaã Dios, te cahmu de sũje cütũ.

¹⁰ Te hora jeē cayú sũje cütũ, te tãca ñayuu cuehē cáhĩn i fuera, cájicãñ tahú i.

¹¹ Te ni cane ñn ndajéhé maã Jitoho yõ nuũ de, ñn ya lado váha altar nuũ jéhu de sũje cütũ.

¹² Te ni cunéé ni Zacarías ni jito de nuũ yã, te yõho ni yühú de.

¹³ Te ni cahãñ ndajéhé un jíin de:

Zacarías, ma yũhu ró, chí je ni chíhi Yaã Dios cuenta jeē ni jíicãñ tahú ró. Te ñasihí ró Elisabet, scãcu ña ñn sēhe yí, te snání ró i Juan.

¹⁴ Te yõho cusĩñ ní ró. Te cuehē ñayuu cusĩñ ni jeē cácu i.

¹⁵ Chí cujéhu sēhe ró sãha máã Yaã Dios. Te ma cóho i vino ni ndixi cuiĩ. Te cunuũ máã Espĩritu Santo jíin i, nde ná tu cacu i.

¹⁶ Te sãha i jeē cuehē ñayuu nacióñ ró Israel ndívicoo i nuũ Jitoho i Yaã Dios.

¹⁷ Te xihna gã Juan quiji nacani jnũhun Jitoho yõ Jesús, te sáã te quiji ya. Te sãha i nájñũhun ni sãha Elías, tēe ni nacani jnũhun Yaã Dios jenahãñ, te conevãha i poder jeē nãcani i jnũhun, nájñũhun ni conevãha Elías.

Te sãha i jeē tãca tátã ndumanĩ de jíin sēhe de. Te suni sãha i jeē ñayuu ññni ni cuatãhú i nuũ Yaã Dios, nduu i ñayuu ndaã. Súcuan sãtũhva i ñayuu nãváha candíje i máã Jitoho yõ jeē quiji ya. Achí ndajéhé.

¹⁸ Te Zacarías ni cajñũhũn de ya:

¿Ndesee cucãhnu ni na núu jendaã cúu? Chí tēe jéhu cúu ná, te suni jéhu ñasihí ná, achí de.

¹⁹ Te ni cahãñ ndajéhé un jíin de:

Máã rí cúu Gabriel, te ñne rí nuũ Yaã Dios, jejniñu rí nuũ yã. Te ni tají yã ruhú vëji rí cahãñ rí jíin ró, te nãcani rí jnũhun váha yáha núu ró.

²⁰ Te jeē tu ní candíje ró jnũhun ni cahãñ rí, te cuñĩhĩn ró, te ma cúu cahãñ ró, chí nde na cácu sēhe ró. Te squicu nahĩn jnũhun cáhãñ rí yãhá, na quée quivĩ, achí ndajéhé.

²¹ Te ñayuu cáhĩn ichi fuera, cándetu i Zacarías, te cájeni ni i na vé ni cuu jeē cucuée de ini cuarto ñ templo.

²² Te nuũ ní quenda de, te tuã ni cúu cahãñ de jíin i. Te ni cajecũhun ni i jeē ini templo ni jito ndijin de ñn jeē ní stéen yã nuũ de. Te máã seña na ni sãha de nuũ i, chí ni cuñĩhĩn de.

²³ Te nuũ ní jínu quivĩ ni jejniñu de ini templo, te cuanuhun de vehe de.

²⁴ Te ni cuu jecu quivĩ, te ñasihí de Elisabet ni jecũhun sēhe ña. Te ni iyo ña vehe ña uhũn yõ jeē tuã nde ní jéheñ ña. Te jéni ni ña:

²⁵ Súcuan ni sãha máã Jitoho yõ jíin rí, te ni tejiyo ya jnũhun jeē cúcanu rí nuũ ñayuu jeē tú sēhe rí, jéni ni ña.

Jeē ní cachi ndajéhé jeē cacu Jesús

²⁶ Te nuũ iñũ yõ, te ni tají Yaã Dios ndajéhé yã Gabriel, ni jehẽn yã ñn ñnuu naní Nazaret, ndañũũ Galilea.

²⁷ Te ni jehẽn yã nuũ ñn sũchi sħí nání María. Te je ni cundaã jeē quijnãhan ña jíin ñn tēe nání Josẽ, te sēhe yucũn rey David cúu de.

²⁸ Te ni quivĩ ndajéhé un núu ndeã ña, te ni cahãñ yã:

Tandũ, nacã ndetũ cúu ró. Chí máã Jitoho yõ Yaã Dios iyó yã jíin ró, te ni sãha ya jeē yõho ndetũ gã cúu ró núu tãca gã ñahan, achí yã.

²⁹ Te nuũ ní jito ña nuũ yã, te ni cunéé ni ña jeē súcuan cáhãñ yã, te jéni ni ña naun cáhãñ yã súcuan jíin ña.

³⁰ Te ni cahãñ gã ndajéhé un jíin ña:

Ma yũhu ró María, chí ni sãha Yaã Dios jeē váha jíin ró.

³¹ Te jecũhun sēhe ró te scãcu ró ñn sēhe yí, te snání ró i Jesús.

³² Te cujéhu i, te conaní i Sēhe Yaã cujéhu téy. Te máã yã jeē cúu ya Jitoho yõ Yaã Dios, sãha ya jeē cuu i rey, nájñũhun jí i David ni cuu de rey.

³³ Te ní cáni ndacu i jniñu nuū ñáyuu nación Israel. Te ma ndáhi cuiti jeē ndacu i jniñu. Achí ndajéhé.

³⁴ Yūcuán na te ni cajñuhún María:

¿Ndese coo jeē ni cahān ní? Chi ná tu coo yíi ná, áchí ña.

³⁵ Te ni cahān ndajéhé un:

Máá Espíritu Santo quiji siquī rō, te poder maá Yaā kujéhu téyí sáha iin jniñu jéhu jín rō. Te jeē yúcuan máá súchi íi jeē cácu, quíhi cuenta i nuū Yaā Dios, te cahān ñayuu jeē Séhe Yaā Dios cúu i.

³⁶ Te suni cástūhun rí nuū rō jeē jnāhan rō Elisabet, suni scácu ña iin sēhe vésú je jéhu ña. Te vijna iyó íñu yoō jeē tuá cácahān ñayuu jeē cúu ña ñahan númá.

³⁷ Chi ndíhi-ni cuu sáha Yaā Dios, te tu iyó ni iin jeē ma cúu sáha ya, achí ndajéhé un.

³⁸ Yūcuán na te ni cahān María:

Cuu núu súcuan, chí sáha ná táca jniñu ndácu Jítoho yō Yaā Dios, te na cóo jín ná nájnūhun ni cachi ní, áchí ña.

Te máá ndajéhé un cuahān-ni ya.

Jeē ní jécondēhé María Elisabet

³⁹ Te ni cuu jecu quiví, te yachí cuahān María, ni caa ña yucu cuahān ña iin ñuu región Judea.

⁴⁰ Te ni jín ña vehe Zacarías, te ni cahān ña jín Elisabet.

⁴¹ Te nuū ní jini Elisabet jeē cahān María jín ña, te súchi ñūhun chíji ña ni canda-ni i. Te ni cunuú Espíritu Santo ini anuá ña.

⁴² Te ni cahān jee ña:

Ni sáha Yaā Dios jee yóhoyo ndetū gā cúu rō núu táca gā ñahan, jín jéé yóhoyo ndetū sēhe rō.

⁴³ ¿Te ndese cúu jeē ní quee naná máá Jítoho rí nuū rí? Chi tu cújéhu cuiti rí.

⁴⁴ Chi jeē ní jini-ni rí jñūhun ni cahān rō jín rí, te súchi ñūhun chíji rí ni canda i jee cúsiñ ni i.

⁴⁵ Te nacā ndetū rō jeē ní candíje rō, chí squícu nahín táca jñūhun ni cahān máá Jítoho yō jín rō. Achí Elisabet.

⁴⁶ Yūcuán na te ni cahān María:

Cahān rí jeē kujéhu ndasí máá Jítoho yō Yaā Dios,

⁴⁷ te cúsiñ ni rí jín Yaā Dios, Yaā jnáma ruhū.

⁴⁸ Chi ní sáha ya cuenta ruhū, vésú tu cújéhu rí.

Te na squícu rí jniñu ndácu ya.

Te nde vijna te táca ñayuu jeē nácacu, cahān i jeē yóhoyo ndetū rí.

⁴⁹ Chi Yaā jnái ndíhi poder, ni sáha ya jniñu jéhu jín rí.

Te Yaā íi ndoo cúu ya.

⁵⁰ Te ní cáni cundáhú ni yā táca ñayuu ndíso iyo nuū ya.

⁵¹ Ni sáha ya jniñu jéhu jín poder yā, chí ni scúnu ya ñayuu casándúxí máá,

⁵² te ñayuu cácujeñhu, ni quende ya jeē cújéhu i.

Te ñayuu ndahú chí ni sajeñhu ya i,

⁵³ te ñayuu cáji sōco ni jéhe ya jeē cáji vāha i.

Te ñayuu cucá ní natají yá i súcuan-ni.

⁵⁴ Te ni chindéé ñahán yá yohó, ñayuu nación Israel, jeē cácuu yó mozo yā, te tu náa ni yā jeē cundáhú ni yā yohó.

⁵⁵ Chí súcuan ni jejnūhun ya nuū táca jín yō, nuū Abraham jín táca yúcūn de jeē cóo ní cáni.

Achí María.

⁵⁶ Te ni condee ña jín Elisabet nájnūhun uní yoō. Yūcuán na te cuanuhun ña vehe ña.

Jeē ní cacu Juan tēe scuándute

⁵⁷ Te ni jín quiví jeē scácu Elisabet sēhe ña, te ni scácu ña iin sēhe yí.

⁵⁸ Te táca ñayuu ndeé yajni jín ña jín táca jnāhan ña, ni cajini i jeē yóhoyo ni cundáhú ni Yaā Dios ña, te ni jengoo i ni cacahān i jñūhun sñ ni jín ña.

⁵⁹ Yūcuán na te nuū uná quiví jeē ní cacu i, te ni jengoo ñayuu ni sáha i circuncidar súchi yíquín un. (Te yúcuan cúu iin jñuní nuū yiqui cúñu táca súchi yí hebreo jeē steén jeē cácuu i ñayuu Yaā Dios.) Te snání i súchi un sñví tátá i Zacarías nuú.

⁶⁰ Te ni cahān naná i:

Ma cúu, chí Juan conaní i, áchí ña.

⁶¹ Te ni cacahān i jín ña:

¿Te naun? Chí tú ni iin jnāhan rō nání súcuan, áchí i.

⁶² Yūcuán na te jín seña ni cacajnūhún i tátá súchi un ndese cúní de jeē cónaní i.

⁶³ Te máá de ni jicān iin tutu, te ni tee de: Juan conaní i. Te táca ñayuu un ní canaa ni i cájito i.

⁶⁴ Te ni nduvāha Zacarías jeē ní cuñhín de, te ni quejéé de cahān de jeē yóhoyo vāha Yaā cúu Yaā Dios.

⁶⁵ Te táca ñayuu ndeé yajni jín de, yóhoyo ni canaa ni i. Te ní yucu región Judea ni jité núu táca jñūhun yáha jeē súcuan ni cuu.

⁶⁶ Te táca ñayuu jeē ní cajini jñūhun, ni quejéé i cánacani ni i, te cácajnūhun jnāhan i: ¿Ndese coo na cuéñhu súchi yáha? áchí i.

Chí máá Jítoho yō yóhoyo ni sáha ya jeē vāha jín i.

Jñūhun luu jeē ní nacani Zacarías

⁶⁷ Te tátá i Zacarías ni cunuú Espíritu Santo jín de, te ni nacani de jñūhun ni steén Yaā Dios nuú de:

⁶⁸ Yóhoyo vāha Yaā cúu máá Jítoho yō, Yaā Dios yohó ñayuu Israel,

chí ni quiji ya nuú yō jeē cácuu yó ñayuu yā, te ni jnama ya yohó.

⁶⁹ Te ni jeni ya iin Yaā iyó poder jeē jnáma ya yohó, te Yaā ún cacu yucūn mozo yā rey David.

70 Chi súcuan ni jejnūhun ya, ni cacahān tāca tēe ndoo ánuá jeē ní canacani de jnūhun ya jenahán.

71 Chi ni cacahān de jeē jnāma ya yohó nuū jeē cájito uhū yohó, jín nuū jeē cáquiti ni nuū yō.

72 Chi ni cundáhū ni yā tāca jí yō jijnáhan, te tu ní náā ni yā contrato í yā.

73 Chi suu un ní jejnūhun téyí yá nuū jí yō Abraham,

74 suu jeē jnāma ya yohó nuū ñáyuu cájito uhū yohó,

návāha cuajníñu yó nuū yā, te ma yūhu yó i.

75 Te coo ndaá coo ndoo ánuá yō, cuajníñu yó nuū yā tāca quiví jeē cótecu yō.

76 Te róhó sūchi lúli, cuu ró tēe nacani jnūhun Yaā cujéñu téyí.

Chi cosnúu ró ichi núu maá Jítoho yō, návāha sātūhva ró ñáyuu, te sáa te quiji ya.

77 Te castūhun ró nuū ñáyuu maá yá jeē jnāma ya i,

jín jeē cóne cáhnu ni yā nuū tāca cuéchi i.

78 Chi Yaā Dios maá yó, vāha ni yā te cundáhū ni yā yohó.

Jeē yúcuan tají yá maá Yaā jeē sáha jeē cundijin ini anuá yō, quiji ya nde andiví,

79 návāha jecūhun ni yohó jeē cáyūcu nájñūhun nuū nēē nuū jé yajni cuu yō.

Te chuhun ya yohó ichi nuū cóo ndeyí coo síi ni yō.

Achí Zacarías.

80 Te sūchi lúli un ní jehnu i te ni ije i jín jnūhun ya. Te ni condee i nde nuū ñūhun téhé ndé quiví ní quenda ndijin i nuū ñáyuu Israel.

*Jeē ní cacu Jesús
(Mt. 1.18-25)*

2

1 Te ni cuu jecu quiví, te Augusto, tēe cúu rey, ni ndacu de jniñu jeē coo censo jeē núcosō síhví ndivii ñáyuu ní cáhnu nuū ndácu de jniñu.

2 Yāha cúu censo xīhna ñūhún jeē ní casáha de ná ni cuu Cirenio gobernador nación Siria.

3 Te ndivii ñáyuu cuanungoo i ná ñuu ná ñuu maá i jeē nácuāha i síhví i.

4 Te suni José ni quenda de ñuu Nazaret, ndañū Galilea. Te cuanuhun de región Judea, te ni najinū de ñuu Belén, jeē cúu ñuu nuū ní cacu rey David jenahán. Chi sēhe yucūn David cúu de.

5 Te ni jehēn de návāha nacuāha de síhví de jín María, chi je yajni quijnáhan ña jín de. Te ñūhun sēhe ña ní sáha Espíritu Santo.

6 Te níni cáhñin de yūcuán te ni jinū quiví jeē cácu sēhe ña.

7 Te ni scácu ña sēhe yí núu ña, te ni chusúcun ña i sahma cuitá, te ni jequin ña i ini ñn nundōo núu yéji quiti, chí tuá núne mesón condee ña.

Jeē ní canecoo ndajéhe yā nuū pastor

8 Te yajni ñuu Belén cáhñin tēe cácuu pastor, te cándito de lanchi de ñí ñiñu jecuāa nde yucu ún.

9 Te ñn sanaa-ni te ni cane ñn ndajéhe maá Jítoho yō nuū de, te nduva maá Jítoho yō ni ndindēe ní núu cáhñin de. Te yōhyo ni cayūhú de.

10 Te ni cahān ndajéhe un jín de:

Ma yūhu ró jijnáhan ró, chí véji ri castūhun rí jnūhun vāha nuū ró, te sáha jeē cúsiñ ndasí ní tāca ñáyuu:

11 Chi vijna nde ini ñuu David ni cacu ñn Yaā jnama róhó, te maá Jítoho yō Cristo cúu ya.

12 Te súcuan nacuni ró sūchi yíquín un, chí ñúsúcun i sahma cuitá te cátú i ini ñn nundōo núu yéji quiti. Achí yá.

13 Te ñn sanaa-ni te ni canecoo cuehē gā ndajéhe andiví, cáhñin ya jín ndajéhe un, te cacahān yā jeē yōhyo vāha Yaā cúu Yaā Dios. Te achí yá:

14 Yōhyo luu cújéñu Yaā Dios nde nuū sucún. Te na ndúvāha ní tāca ñáyuu ñayiví, sáha ya jeē cúsiñ ní yā jín i.

Achí tāca ndajéhe.

15 Yūcuán na te cuanungoo ndajéhe un andiví. Te tēe cácuu pastor ní cacahān de jijnáhan de:

Na quíñin yō nde ñuu Belén, te cuni yō na vé ní cuu jeē ní castūhun maá Jítoho yō nuū yō, achí de.

16 Te yachí cuangoo de, te ni nanihñ de María jín José jín sūchi yíquín un, cátú i ini nundōo núu yéji quiti.

17 Te nuū ní cajini de nuū i, te ni canacani de jnūhun jeē ní cachí ndajéhe yā nuū de siquí sūchi yíquín un.

18 Te ni canaa ní tāca ñáyuu cájini nahín i jnūhun cácahān tēe cácuu pastor.

19 Te María, ní quendōo tāca jnūhun yáha nuū jeē nijnūni ña, te nácani ní ña siquí.

20 Te tēe cácuu pastor cuanungoo de, te ni cacahān de jeē yōhyo vāha Yaā cúu Yaā Dios siquí tāca jeē ní cajini sóho de jín jeē ní cajito de, chí ní squicu nahín nájñūhun ní cahān ndajéhe yā jín de.

Jeē ní castéén de i nuū Yaā Dios ini templo

21 Te ni cuu uná quiví jeē ní cacu ya, te ni casáha de circuncidar sūchi yíquín un. Te ni casnání de i Jesús, chí síhví yúcuan ní cachí ndajéhe yā nuū María nde ná tu jecūhun i.

22 Te ní jinū quiví jeē casquicu ña costum-bre jeē ndúndoo ña nuū Yaā Dios jijnáhan ña, nájñūhun cáhān ley jeē ní jéhe ya nuū Moisés. Te ní jengoo de jín i ñuu Jerusalén jeē nácuāha de i nuū maá Jítoho yō Yaā Dios.

²³ Súcuan ni casáha de, chi yósó núú tútu ley yá: Táca sūchi yí núú jéé cácacu, quihi cuenta i nuú Jítoho yō Yaā Dios, achí tutu.

²⁴ Te suni cuasocō de nájñuhun cáhán ley maá Jítoho yō: Socō rō uū lívi chí úu paloma, achí tutu.

²⁵ Te ni iyo ñn tēe nání Simeón, ndéé de ñuu Jerusalén tiempo un. Te tēe ndaā, tēe chíñúhún váha nuú Yaā Dios cúu de. Te ñúhun ni de jeé quée maá Yaā jnama ñayuu nación de Israel. Te maá Espíritu Santo íyó yá jíin de.

²⁶ Te je ni castúhun yá nuú de jeé ma cúu cuiti de chí nde coto de nuú Cristo jeé tají maá Jítoho yō Yaā Dios.

²⁷ Te ni steén yá nuú de jeé quihín de templo quiví ún. Te suni tátá naná sūchi yiquín Jesús, ni quivícoo de ini templo jíin i, jeé nácuaha de i nuú Yaā Dios nájñuhun cáhán ley Moisés.

²⁸ Te Simeón ni ñunundee de i, te ni cahán de jeé yóhoyo váha Yaā cúu Yaā Dios, te áchí de:

²⁹ Tátá Yaā Dios, vijna te cuu cuāha ni jñúhun jeé cuu ná, chí je ni cusí ni ná.

Chí je ni squícu ní jñúhun ni jejnúhun ní núú sáña jéé cúu ná mozo ní.

³⁰ Chí ni jito jíinúú na núú Yaā jnama sáña jíinán ná.

³¹ Chí ni jeni ní yá jeé jnama ya táca ñáyuu ñayíví.

³² Te maá yá sáha jeé cúndijin ini anuá ñayuu táca nación,

návaha jecúhun ni i siquí ní.

Te sáha ya jeé cujúhnu ñayuu maá ní Israel. Achí Simeón.

³³ Te José jíin náná i cánaa ni de cájini nahín de jñúhun ni cahán Simeón siquí i.

³⁴ Te ni jíicán tahú Simeón jehé de jíinánhan de, te ni cahán de jíin náná i María:

Sūchi yáha vēji i jeé candíje cuehē ñayuu nación yō Israel, te cācu i jíinánhan i. Te sava i ma candíje i, te jnahnū ndetū i. Chí cúu i Yaā ní tají Yaā Dios, te sa squéhichí ni cuehē ñayuu i.

³⁵ Te súcuan te quenda ndijin ndese cájeni ni táca ñáyuu. Te maá ró chí jnahunū ndasi ró ró coto ró jéé ndóho i. Achí Simeón.

³⁶ Te suni íne ñn ñahan nácani jñúhun Yaā Dios, naní ña Ana. Te sēhe Fanuel, yucūn Aser cúu ña. Te je jéhu ndasí ña. Te nde ná lulí ña te ni condee ña jíin yí ña uxá cuiyā.

³⁷ Yūcuán na te ni quendōo ndáhú ña, te ni cuu cuñn xico cuñn cuiyā ña. Te tu cújiyo ña ini vehe íi, chí jéjñíñu ña nuú Jítoho yō Yaā Dios nduú ñuú, te ndite ni ña te jíicán tahú ña.

³⁸ Te suni hora un ní quee ña, te ni nacuatáhú ña nuú Yaā Dios. Te ni cahán ña jñúhun sūchi yiquín un jíin táca ñáyuu Jerusalén jeé cáñuhun ni i jeé quée Yaā jnama i.

Jeé cuánungoo de ñuu Nazaret

³⁹ Te ni jínu ni casquícu de táca jíniñu ndácu ley maá Jítoho yō Yaā Dios, te cuanungoo de ñuu de Nazaret, ndañúú Galilea.

⁴⁰ Te sūchi lúli un ní jehnu i, te ni ije i, te ni cundichí gá i. Te ni sáha Yaā Dios jeé váha ndasí jíin i.

Jeé íne sūchi lúli Jesús ini templo

⁴¹ Te ndijnahan cuiyā jéngoo tátá i náná i ñuu Jerusalén, jeé cúu vico pascua.

⁴² Te nuú ní cuu uxí uū cuiyā i, te cuangoo tucu de Jerusalén, nájñuhun sáha sáha de quiví vico ún.

⁴³ Te ni yáha vico, te cuanungoo de. Te sūchi lúli Jesús, ni quendōo i Jerusalén, te tu ní cájini José jíin náná i.

⁴⁴ Te cájeni ni de jeé cuahán i mēhñu ñáyuu cájica ichí ún. Te ní cajica de ñn quiví, te sáa te ní cananducú de i mēhñu táca jñáhan de jíin ñáyuu cájini jñáhan de jíin.

⁴⁵ Te tu ní cánanihin de i. Te ni canandicó de cuangoo de Jerusalén, cuananducú de i.

⁴⁶ Te nuú uní quiví te ni cananihin de i ini templo, néne i mēhñu tēe cástéén tutu ley Yaā Dios, te jíni nahín i jeé cácahán de te cájñuhún i de siquí jñúhun ún.

⁴⁷ Te táca ñáyuu cájini jñúhun cáhán i, cánaa ni cájito jeé váha cájí xíní i te váha nástíio cuñí i jñúhun.

⁴⁸ Te nuú ní cajito tátá i náná i nuú i, te ni canaa ni de. Te ni cahán naná i jíin i:

Séhē, ¿naun ni sáha ró súcuan jíin rí? Chí ruhú jíin tátá ró, yóhoyo ni canacani ní rí cánanducú rí rohó, achí ña.

⁴⁹ Yūcuán na te ni cahán i:

¿Naun cánanducú ní sáña? ¿A tu cájini ní jéé cánuú cocu ná jíin jíniñu Tátá na Yaā Dios? Achí i.

⁵⁰ Te tu ní cájecúhun ni tátá i náná i jñúhun ni cahán i.

⁵¹ Yūcuán na te cuanuhun i jíin de jíinánhan de ñuu Nazaret, te ni jendíje i nuú de. Te náná i, ni quendōo táca jñúhun yáha núú jeé níjñúni ña.

⁵² Te Jesús ni jehnu ga i, te ni cundichí gá i, te cusí ni Yaā Dios jíin i, te suni súcuan táca ñáyuu.

Jñúhun Juan tēe scuándute

(Mt. 3.1-12; Mr. 1.1-8; Jn. 1.19-28)

3

¹ Te ni cuu xahún cuiyā jeé ndácu Tiberio jíniñu ní nación. Te Poncio Pilato cúu de gobernador Judea, te Herodes cúu de gobernador Galilea, te ñani de Felipe cúu de gobernador Iturea jíin Traconite, te Lisaniás cúu de gobernador Abilinia.

² Te sutú cujúhnu ga cácuu Anás jíin Caifás. Te ni quee jñúhun Yaā Dios nuú Juan sēhe Zacarías, jeé íne de nuú ñúhun téhé.

³ Te ni jica nuu de táca ñuu jeē iyó yajni yūte Jordán. Te cáhán de jíin ñáyyu jeē na nácani ni i jeē stóo i cuēchi i te cuandute i, návaha cone cáhnu ni Yaā Dios nuū cuēchi i.

⁴ Te súcuan ni squícu jnūhun Juan jeē yosó nuū tútu ni tee Isaiás, tēe ni nacani jnūhun Yaā Dios nde jenahán:

Coo ñin tēe cana jee nde nuū ñūhun tēhé:

Sátūhva ró máá ró jíjnáhan ró, chí quee maá Jítóho yō.

Te sáha ró jniñu ndaā, chí vēji ya.

⁵ Te táca xéhvā na ndúndaā, te táca yucu jíin loma na ndúnduhvā, te na ndúyóhó ichi yácuá, te na ndúlii ichi ndáyí.

Te ndihi un cúu jeē ndúvaha ndundaā anuá ñáyyu nuū yā.

⁶ Te ndihi i cuni i jeē jnáma Yaā Dios i.

Súcuan cahān Juan, achí tutu.

⁷ Te ni quendacoo cuehē ñáyyu, cuahān i nuū de jeē scuándute de i. Te ni cahān de nuū i:

Va sēhe coō cácuu ró, chí xeēn rō nájnūhun coō. ¿A cájeni ni rō jeē cuu cunu ró cācu ró nuū castigo xeēn jeē quíji?

⁸ Nūu súcuan te sáha ró jniñu váha, te súcuan stéén rō jeē ní nacani ndije ni rō jeē stóo ró cuēchi ró. Te ma cáni ni rō cahān rō jeē cuu cácu ró síquí jeē cácuu ró yúcūn Abraham. Chí cáhán rī jíin ró jeē cuu sáha Yaā Dios jeē táca yúu yáha nduu sēhe Abraham jeē candíje váha, te núu cúní yā.

⁹ Te cácuu ró nájnūhun tandéhé jeē tu jéhe ndehē váha. Te vijna je iyó túhva Yaā Dios jeē cuáha ya castigo xeēn, nájnūhun je iyó túhva ñin cāa jeē cahnde nde yoho yujnu. Nūu súcuan te sáha ya jíin ró nájnūhun jíin táca yujnu jeē tu cúun ndehē váha, jeē tahndé te cayū nuū ñuhún. Achí de.

¹⁰ Te ñáyyu un ní cacajñūhún i de:

¿Te ndese sáha ná nūu súcuan? Achí i.

¹¹ Te ni cahān de:

Róhó jéé cánevāha uū sahma, na cuáha ró ñin nuū jeē tu névaha. Te róhó jéé cánevāha jeē yéji, suni súcuan na sáha ró, achí de jíin i.

¹² Te suni jecu tēe cástútu xūhun renta, ni quecoo de jeē cuándute de. Te ni cacajñūhún de Juan:

Maestro, te máá ná, ¿ndese sáha ná jíjnáhan ná?

¹³ Te ni cahān Juan jíin de:

Ma scaá ró cácan rō xūhún, chí máá cúhva-ni jeē ní ndacu jniñu nuū rō, achí de.

¹⁴ Te suni ni cacajñūhún jecu soldado:

Te máá ná, ¿ndese sáha ná jíjnáhan ná? achí de.

Te ni cahān Juan jíin de:

Ma quénde rō ndajniñu ni ñin jíin jnūhun siúhú ni jíin jnūhun stáu yáhu, te cusí ni rō jíin yáhu ró, achí de.

¹⁵ Te táca ñáyyu cándetu i jeē quíji Cristo, Yaā jeē tají Yaā Dios, te cájeni ni i jeē sanaa te suu cúu Juan.

¹⁶ Te ni cahān Juan jíin i jíjnáhan i:

Ruhū chí jíin ndute scuándute ri rohó. Te vēji ñin Yaā jeē nájnūhun scuándute ya rohó cúu jeē cuáha ya Espíritu Santo condee ñin anuá rō, te poder yā cúu nájnūhun ñuhún. Te cújéhnu ndasi yá, chí tú na vé jéhnu cuiti cúu ri nuū yā, ni jeē cuajniñu ri nuū yā vēsú ñin jniñu lúli gá nájnūhun jeē ndají rí vēsú correa ndijēn yā.

¹⁷ Te sáha ya nájnūhun sáha tēe scánda trigo, chí sásin ya ñáyyu váha jíin ñáyyu cunéé, nájnūhun cúndoo trigo jeē quénda sáin paja. Te nastútú yá trigo yā ndiví ñin yacā yā. Te paja chí jnaa yā nuū ñuhún jeē ma ndahvá cuiti. Achí Juan.

¹⁸ Te súcuan te jíin cuehē gā jnūhun ni stihví ni de ñáyyu un, ní nacani de jnūhun váha Yaā Dios nuū i.

¹⁹ Te suni ni cahān xeēn de nuū Herodes, tēe cúu gobernador, chí tēe un ní nacueca de Herodías, ñasihí ñani de Felipe. Te cuehē gā jniñu néé súcuan ni sáha Herodes.

²⁰ Te sa vihýá gā ni sáha de jeē neé gá, chí ni chune de Juan vecāa.

Jeē ní jendute Jesús

(Mt. 3.13-17; Mr. 1.9-11)

²¹ Te nde ná tu quívi Juan vecāa, ná ni ñine de ni scuándute de táca ñáyyu, te suni ni scuándute de Jesús. Te jícan tahú yā, te ni nune-ni andiví.

²² Te ni cuun Espíritu Santo ni quee xiní yā, te cáa nájnūhun ñin paloma. Te ichi andiví ní cahān ñin jnūhun:

Máá ró cúu Sēhe ri jeē maní ndasi rí jíin, te yóhyo cúsiñi ni rí jíin ró, achí.

Lista ñáyyu yucūn ní quiji Jesucristo

(Mt. 1.1-17)

²³ Te ná ni quejéé Jesús steén yā jnūhun, te iyó yá nájnūhun ocō uxí cuiyā. Te cájeni ni ñáyyu jeē sēhe José cúu ya. Te José ni cuu sēhe Elí,

²⁴ te Elí ni cuu sēhe Matat, te Matat ni cuu sēhe Leví, te Leví ni cuu sēhe Melqui, te Melqui ni cuu sēhe Jana, te Jana ni cuu sēhe José,

²⁵ te José ni cuu sēhe Matatías, te Matatías ni cuu sēhe Amós, te Amós ni cuu sēhe Nahum, te Nahum ni cuu sēhe Esli, te Esli ni cuu sēhe Nagai,

²⁶ te Nagai ni cuu sēhe Maat, te Maat ni cuu sēhe Matatías, te Matatías ni cuu sēhe Semei, te Semei ni cuu sēhe José te José ni cuu sēhe Judá,

²⁷ te Judá ni cuu sēhe Joana, te Joana ni cuu sēhe Resa, te Resa ni cuu sēhe Zorobabel, te Zorobabel ni cuu sēhe Salatiel, te Salatiel ni cuu sēhe Neri,

²⁸ te Neri ni cuu sêhe Melqui, te Melqui ni cuu sêhe Adi, te Adi ni cuu sêhe Cosam, te Cosam ni cuu sêhe Elmodam, te Elmodam ni cuu sêhe Er;

²⁹ te Er ni cuu sêhe Josué, te Josué ni cuu sêhe Eliezer, te Eliezer ni cuu sêhe Jorim, te Jorim ni cuu sêhe Matat,

³⁰ te Matat ni cuu sêhe Levi, te Levi ni cuu sêhe Simeón, te Simeón ni cuu sêhe Judá, te Judá ni cuu sêhe José, te José ni cuu sêhe Jonán, te Jonán ni cuu sêhe Eliaquim,

³¹ te Eliaquim ni cuu sêhe Melea, te Melea ni cuu sêhe Mainán, te Mainán ni cuu sêhe Matata, te Matata ni cuu sêhe Natán,

³² te Natán ni cuu sêhe David, te David ni cuu sêhe Isaí, te Isaí ni cuu sêhe Obed, te Obed ni cuu sêhe Booz, te Booz ni cuu sêhe Salmón, te Salmón ni cuu sêhe Naasón,

³³ te Naasón ni cuu sêhe Aminadab, te Aminadab ni cuu sêhe Aram, te Aram ni cuu sêhe Esrom, te Esrom ni cuu sêhe Fares, te Fares ni cuu sêhe Judá,

³⁴ te Judá ni cuu sêhe Jacob, te Jacob ni cuu sêhe Isaac, te Isaac ni cuu sêhe Abraham, te Abraham ni cuu sêhe Taré, te Taré ni cuu sêhe Nacor;

³⁵ te Nacor ni cuu sêhe Serug, te Serug ni cuu sêhe Ragau, te Ragau ni cuu sêhe Peleg, te Peleg ni cuu sêhe Heber, te Heber ni cuu sêhe Sala,

³⁶ te Sala ni cuu sêhe Cainán, te Cainán ni cuu sêhe Arfaxad, te Arfaxad ni cuu sêhe Sem, te Sem ni cuu sêhe Noé, te Noé ni cuu sêhe Lamec,

³⁷ te Lamec ni cuu sêhe Matusalén, te Matusalén ni cuu sêhe Enoc, te Enoc ni cuu sêhe Jared, te Jared ni cuu sêhe Mahalaleel, te Mahalaleel ni cuu sêhe Cainán,

³⁸ te Cainán ni cuu sêhe Enós, te Enós ni cuu sêhe Set, te Set ni cuu sêhe Adán, te Adán ni cuu sêhe Yaá Dios, chi ni sáha ya de.

*Jeē ní jito ndee jexeén Jesús
(Mt. 4.1-11; Mr. 1.12-13)*

4

¹ Te Jesús ni cunuú Espíritu Santo ini yá, te ni quenda ya yúte Jordán cuahán yá. Te ni jinū yá nde nuū ñuhun téhé ní sáha Espíritu Santo.

² Te ni ine ya yūcuan úu xico quiví, te ni jito ndee jexeén yá, chi cúní jeē sáha ya cuēchi. Te táca quiví ún tu ní yéji cuiti yá, te ná ni yáha quiví ún, te jí yá sóco.

³ Yūcuán na te ni cahán jexeén un jíin yá: Nū máá ró cúu Sêhe Yaá Dios, te cahán ró jeē yuū yáha na ndúu staá caji rô, achí.

⁴ Te ni cahán Jesús jíin:

Tuú chi yósó nuū tútu íi: Nasūu máni máá jíin stáá cátecu ñayuu, chi suni jíin táca jnūhun cáhán Yaá Dios, achí yá.

⁵ Yūcuán na te cuahán jexeén un jíin yá nde xiní ñn yucu súcun, te ñn núnúu-ni ní steén nuū yá táca naciún ní cáhnu ñayiví.

⁶ Te ni cahán jíin yá:

Nuū máá ró cuáha ri jeē cujéhnú ró nuū ndiví naciún yáha, chi yóhó lúu cáa. Chi máá rí jnā ndihí, te cuu cuáha ri nuū ndé ñn cúní rí.

⁷ Nū súcuan te nū cuiñi yítí ró chiñúhún ró ruhū, te cuáha ndihí ri nuū rô. Achí jexeén.

⁸ Te ni cahán Jesús jíin:

Satanás, cujiyo quihñ rō, chi yósó nuū tútu jeē chiñúhún ñayuu máá Jítoho i Yaá Dios, te nuū má-ni ya cuajñiñu i. Achí yá.

⁹ Yūcuán na te cuahán jexeén un jíin yá nde ñuu Jerusalén. Te ni jeni ya xiní torre templo. Te ni cahán jíin yá:

Te nū Sêhe Yaá Dios cúu ró, te síngava ró máá ró nde nuū ñúhún, chi jnama ya rohó.

¹⁰ Chi yósó nuū tútu:

Tejñiñu ya ndajéhé yá quijicoo coto rohó.

¹¹ Te cunundee yá rohó jíinñahan ya, návaha ma cáchihí ró jéhé rô nuū yuú.

Achí tutu. Achí jexeén.

¹² Te ni cahán Jesús:

Tuú chi suni yósó nuū tútu jeē ma cóto ndee ñayuu Jítoho i Yaá Dios, nū jnama ya i chí tuú, áchí yá.

¹³ Te tuá ni níhñ jexeén modo coto ndee Jesús quiví ún, te ni cujiyo cuahán jecu-ni tiempo.

Jeē ní quejéé Jesús nácani ya jnūhun región Galilea

(Mt. 4.12-17; Mr. 1.14-15)

¹⁴ Te ni cunuú fuerza Espíritu Santo ini Jesús, te cuanuhun yá Galilea. Te ní región yajni yūcuan ní jite nū jnūhun ya.

¹⁵ Te ni steén yá jnūhun ini táca vehe íi sinagoga, te ndihí ñayuu ni cajejñúhún i ya.

Jeē cuánuhun yá ñuu Nazaret

(Mt. 13.53-58; Mr. 6.1-6)

¹⁶ Te ni najinū yá ñuu Nazaret nuū ní jehnu ya. Te quiví ndétátú ní quiví ya ini vehe íi sinagoga, nájñuhun sáha sáha ya. Te ni ndocuiñi yá jeē cahu ya tutu íi.

¹⁷ Te ni cajéhe de tutu ni tee Isaías, téé ni nacani jnūhun Yaá Dios nde jenahán. Te ni nune ya tutu ún, te ni nanihñ yá nuū yosó jnūhun ni cahu ya:

¹⁸ Espíritu máá Jítoho yō Yaá Dios iyó yá jíin rí,

chi ní tejñiñu ya ruhū jeē nácani ri jnūhun vāha nuū ñayuu ndahú.

Te ni tají yá ruhū vèji ri jíin jnūhun jeē ndúvāha ní ñayuu cácuicuhá ní.

Te castūhun rí nuū ñayuu cáyihí ndaha jexeén jeē coo libre i.

Te sáha ri jeē ndúndijin ini anuá ñayuu tu cájecūhun ni,

te jnama ri ñayuu jeē cándoho i sáha jnāhan i.

19 Te nacani ri jñuhun jeë ní quee tiempo jeë sáha Jítoho yō Yaā Dios jeë váha ñayuu. Achí tutu ní cahu ya.

20 Te ni nacasi yā tutu ún, te ni nacuāha ya nuū tēe jéjnífū ini sinagoga, te ni nucōo ya jeë steén yā jñuhun nuū ñayuu cáhīn ini sinagoga. Te táca i cájito váha i nuū yā.

21 Te ni quejéé yá cahán yā jíin i:

Vijna te ni squícu jñuhun cáhán tutu i yāha ní cajini sōho ró, áchí yá.

22 Te ndívii i ni cacahān jeë váha tēe cúu ya, te cánaa ni i jeë ní cajini i táca jñuhun luu ní cahān yā. Te ni cacajñuhun jñáhan i:

¿A násūu séhe José cúu tēe yáha?

23 Te ni cahān yā jíin i:

Jíni váha ri jeë cájeni ní rō cahān rō jñuhun yátá yáha jíin rí: Tēe tájné, sátájné ró maá ró núu súcuan. Te jñuhun yáha cúní cahān jeë nájnñuhun ní nasáváha ri cuehē ñayuu cácuñū ini ñuu Capernaum ní canihīn rō jñuhun, suni súcuan na sáha ri ñuu yō yáhá náváha candíje rō cájeni ní rō. Achí yá jíin i.

24 Te ni cahān gā yá:

Jendaá cahán rí jíin ró, ní ñin tēe nácani jñuhun Yaā Dios, tu cájetáhú ñayuu ñuu maá de nuū de.

25 Te suni jendaá cahán rí jíin ró jeë ní íyo cuehē ñahan ní ndóo ndáhú ini nación yō Israel, tiempo ní cotecu Elías, tēe ní nacani jñuhun Yaā Dios. Te tiempo un tu ní cúun cuítí saú uní cuiyá yosáva, te ni íyo ñin jnamá xeén ní cáhnu nación.

26 Te tu ní táji Yaā Dios Elías quihīn de nuū ní ñin ñahan viuda nación yō Israel, chí nuū máá ñin ní ñahan viuda jeë ndeé ñuu Sarepta ndañū Sidón, ní jehēn de ní jito de jeë ní yeji ña.

27 Te ini nación yō Israel suni ní íyo cuehē tēe ní candoho cuehyí stehyú, tiempo jeë ní cotecu Eliseo, tēe ní nacani jñuhun Yaā Dios. Te ní ñin de tu ní cándíje jeë ndúváha de sáha Eliseo, chí sa suhva máñúhūn-ni Naamán, tēe nación Siria ní nduváha. Achí yá.

28 Yūcuán na te táca ñayuu cáhīn ini sinagoga, yōhyo ní caquítí ní jñuhun ní cahān yā.

29 Te ní candocuñí i, te ní caquenehen i ya yatá ñúú ún, cuahān i jíin yá xíní yúcu íne ñuu ún, chí cácuni i chundahá i ya ñinga ya cava ún.

30 Te tu ní cúu sáha i, chí ní yáha-ni ya mēñū i cuahān yā.

Jeë ní quenehen ya tachí ini ñin tēe
(Mr. 1.21-28)

31 Yūcuán na te cuahān Jesús ñuu Capernaum región Galilea. Te quiví ndétātu ní steén yā jñuhun nuū ñayuu.

32 Te ní canaa ní i cájini i jñuhun steén yā. Chí ní steén váha ya nuū i, chí jíni váha máá ya.

33 Te ini vehe sinagoga un íne ñin tēe jeë ñuhun tachí xeén ini de. Te tēe un ní cana cóhó de:

34 Cuijiyo ní. ¿Naun véji ní núu na jíjnáhan ná, Jesús ñuu Nazaret? ¿A véji ní jée snáa ní sáña, chí naún? Je jíni na ndé ñin cúu ní, chí Séhe í Yaā Dios cúu ní. Achí de.

35 Te Jesús ní cahān xeén yā nuū tachí ún:

Casi yuhu ró te quenda ró ini tēe yáha, áchí yá.

Te ni cotúú-ni tēe un núu táca ñayuu, ní sáha tachí ún. Te ni quenda ini de cuahān, te tú na vé ní sáha ga jíin de.

36 Te ndíhi ñayuu un ní cayúhú i, te ni cacahān i jíin jñáhan i:

¿Na jñuhun cúu yáha jéé ní cuu súcuan? Chí cújéhnu tēe yáha jéé ndácu ñihin de jniñū nuū tachí, te quendacoo-ni, áchí i.

37 Te jñuhun ya ní jitē núu cuahān ní cáhnu región yūcuán.

Jeë ní nasáváha ya naná chíso Simón Pedro

(Mt. 8.14-15; Mr. 1.29-31)

38 Yūcuán na te ni quenda Jesús ini vehe í sinagoga, te cuahān yā te ní jinú yā vehe Simón. Te naná chíso Simón, yíhi xeén quíji ña, te ni cacahān ndahú de jíin yá jehé ña.

39 Te ní jita ndeyi ya nuū ña, te ní cahān yā jeë na ndíco quíji ún. Te ní nduváha-ni ña. Te ní ndocuñí-ni ña, te ní sáha ña jeë ní yeji yá jíin de.

Jeë ní nasáváha ya cuehē ñayuu
(Mt. 8.16-17; Mr. 1.32-34)

40 Te jeë ní quee niándii, te táca ñayuu jeë iyó jñáhan i cácuñū ndínuú cuehyí, ní caquindeca i jñáhan i un núu yā. Te ní soó yá ndaha ya siquí ñin i, te súcuan ní nasáváha ya i.

41 Te suni cuehē ñayuu ní quendacoo tachí ini i, te cácana cóhó táchí ún:

Máá ní cúu Séhe Yaā Dios, achí.

Te ní cahān xeén yā nuū, te tu ní jéhe ya jñuhun jeë cahān gā súcuan, chí cájini jeë maá yá cúu Cristo, Yaā ní táji Yaā Dios.

Jeë ní nacani ya jñuhun región Galilea
(Mr. 1.35-39)

42 Te nuū ní cundijin, te ni quenda ya cuahān sán ya yatá ñúú nuū tú ñayuu. Te táca ñayuu cánanducú i ya, te ní jinúcoo i nuū íne ya. Te cástétu i ya jeë tú cuijiyo ya nuū i.

43 Te ní cahān yá jíin i:

Suni cánuú jéé nacani ri jñuhun váha nuū táca gá ñuu siquí ndese ndácu Yaā Dios jniñū, chí jeë yúcuán ní táji yá ruhú veji ri. Achí yá.

44 Te ní jica cuu ya ní región Galilea, nácani ya jñuhun ini táca vehe í sinagoga.

Jeë ní canihīn de cuehē chácá ní sáha ya
(Mt. 4.18-22; Mr. 1.16-20)

5

¹ Te ñin quivĩ te ñe Jësuyumar Genesaret. Te ni quecoo cuehẽ ñayuu, te ni chitú nhĩn i nuũ yã, chi cáconi i cuni nahĩn i jnũhun Yaa Dios.

² Te ni jito ya jeẽ yúcu uũ barco yajni yumar. Te tẽe cájniĩ chãcã, je ni quendacoo de ini barco, te cáncate de ñunu de.

³ Te ni quivĩ ya ini ñin barco jeẽ cúu barco Simón. Te ni cahãn yã jiĩn de jeẽ na scãca yátã de quihĩn jecu gã nuũ ndúte. Te ni cucõo ya, te nde ini barco un ní steén yã jnũhun nuũ ñayuu cuehẽ jeẽ yúcu i yundúte un.

⁴ Te nuũ ni jínu ni steén yã, te ni cahãn yã jiĩn Simón:

Scãca ró barco na quihĩn yõ nde nuũ iyó cúnú ndute, te sĩnga ró ñunu ró jniĩ ró chãca, áchí yã.

⁵ Te ni cahãn Simón:

Maestro, ní niñu ni casĩnga ná ñunu jeẽ jniĩ ná tí, te tu ní nhĩn cuiĩtĩ ná ni ñin tí. Te jeẽ cahãn maá ní súcuan, te na sĩnga tucu ná ñunu, áchí de.

⁶ Te ni casĩnga de, te ni quĩvicoo cuehẽ ndasĩ chãca, nde nducú táhndẽ ñunu de.

⁷ Te ni cacaja ndahã de nuũ jnahãn de cáhĩn ini inga barco, na quijicoo chĩndéẽ ñãjnãhan jíin de. Te ni quecoo de, te ni cascátú ndã de tí ndĩndúu barco, te nde je yajni quee barco.

⁸ Te ni jito Simón Pedro jeẽ súcuan ni cuu. Te ni jecuiĩĩ yitĩ de nuũ Jesús, te ni cahãn de: Cuijyo ní núu ná, chi tẽe iyó cuéchi cúu ná, áchí de.

⁹ Chi maá de jíin táca tẽe cáhĩn jíin de, ni cayũhú de jeẽ ní canihĩn de cuehẽ chãcã un ní sãha ya.

¹⁰ Te suni ni cayũhú Jacobo jíin Juan, ndĩndúu séhe Zebedeo, chi tẽe chĩndéẽ ñãjnãhan jíin Simón cácuu de. Te ni cahãn Jesús jíin Simón:

Ma yũhu ró, chi nde vijna te sãha rĩ jeẽ nihĩn ró cuehẽ ñayuu candĩje ruhũ, nájnũhun ni nhĩn ró cuehẽ chãcã. Achí yã.

¹¹ Yũcuán na te nuũ ní jĩnũcoo de jíin barco nuũ ñũhun íchi, te ni castõo de ndihĩ nda-jniñu de, te ni candiquĩn de ya cuangoo de.

Jeẽ ní nasávãha ya ñin tẽe ndóho cuehyĩ stehyú

(Mt. 8.1-4; Mr. 1.40-45)

¹² Yũcuán na te ñe Jesús ini ñin ñuu, te ni quee ñin tẽe ndóho cuehyĩ stehyú. Te ni jito de nuũ Jesús, te ni jecuiĩĩ yitĩ de ni jecuĩn de nuũ de nde nuũ ñũhun, te ni cahãn ndahú de jíin yã:

Jiniĩ na jéẽ cuu sãha ní jéẽ nduvãha ná, te núu cúni ní, áchí de.

¹³ Yũcuán na te ni soó yã ndaha ya siquĩ de, te ni cahãn yã:

Cúni rĩ. Te na ndúvãha ró, áchí yã.

Te ná ni cahãn yã súcuan, te ni nduvãha-ni tẽe ndóho cuehyĩ stehyú un.

¹⁴ Te ni ndacu ya jniñu nuũ de jeẽ ma cáchi cuiĩtĩ de nuũ ní ñin. Te áchí yã:

Quisteén ró maá ró nuũ sutú, te condahã ró jeẽ socó ró nuũ Yaa Dios siquĩ jeẽ ndũndoo ró núu yã, nájnũhun ni ndacu Moisés jniñu jenahãn. Te súcuan te cuni ñayuu jeẽ ní nduvãha ró. Achí yã.

¹⁵ Te víhyã gã ní jitẽ núu jnũhun ya cuahãn. Te ni cataca cuehẽ ñayuu jeẽ cúni nahĩn i jnũhun steén yã, jíin jéẽ nasávãha ya i nuũ táca cuéhyĩ cándoho i.

¹⁶ Te maá yã cuahãn sãn ya nuũ tú ñayuu, te ni jicãn tahú yã.

Jeẽ ní nasávãha ya ñin tẽe ndóho cuehyĩ ni íjin

(Mt. 9.1-8; Mr. 2.1-12)

¹⁷ Te ñin quivĩ te steén yã jnũhun, te jecu tẽe grupo fariseo jíin tẽe cástéen tutu ley Yaa Dios, cáyúcú de yũcuán. Te tẽe un ní quecoo de nuũ yã jeẽ véjicoo de táca ndañũ Galilea, jíin ndañũ Judea, jíin ñuu Jerusalén. Te poder maá Yaa Dios iyó jíin yã jeẽ nasávãha ya ñayuu cácuhũ.

¹⁸ Yũcuán na te ni quecoo jecu tẽe, cándiso de ñin tẽe ndóho cuehyĩ ni íjin, cátú de nuũ ñin camilla. Te cánducú de squĩvi de tẽe ún ini vehe, te caquin de nuũ ñe ya.

¹⁹ Te tu ní cánhĩn de modo quĩvicoo de jíin tẽe un, chi cáyúcú chitú ñayuu. Te ni cacoo de siquĩ véhe, te ni canune de teja. Te ni cascúun de tẽe cúhu un jíin camilla de nde nuũ ñe Jesús mẽhũ ñayuu.

²⁰ Te ni jini Jesús jeẽ cácandĩje de jeẽ cúu nasávãha ya tẽe cúhu un. Te ni cahãn yã jíin tẽe cúhu un:

Róhó, je ñe cáhnu ni rĩ nuũ táca cuéchi ró, áchí yã.

²¹ Yũcuán na te tẽe cástéen tutu ley Yaa Dios jíin tẽe grupo fariseo, ni quejéẽ de cájeni ni de siquĩ yã: ¿Ndé ñin cúu tẽe yãha jéẽ cahãn de jnũhun ndevãha jeẽ quitĩ ní Yaa Dios? Chi nasũu Yaa Dios cúu de jeẽ cóne cáhnu ni de nuũ cuéchi.

²² Te ni jini Jesús jeẽ súcuan cájeni ni de, te ni cahãn yã jíin de:

¿Naun cájeni ní ró jeẽ cahãn ndevãha rĩ?

²³ Jeẽ uú jnũhun yãha, ¿ndé ñin yĩ gã cáa? ¿A jéẽ cahãn rĩ jíin tẽe cúhu: Je ñe cáhnu ni rĩ nuũ táca cuéchi ró? ¿Chí yĩ gã jéẽ cahãn rĩ: Ndocuiĩĩ te caca ró, chi je ni nduvãha ró, achí rĩ?

²⁴ Te vijna te na steén rĩ jeẽ maá rĩ, Yaa ní nduu tẽe, ndiso jniñu rĩ ini ñayĩvi yãha jéẽ cóne cáhnu ni rĩ nuũ cuéchi.

Yũcuán na te ni cahãn yã jíin tẽe ni íjin ún:

Cáhãn rĩ jíin ró, ndocuiĩĩ te naquihĩn ró camilla ró, te quinhun ró vehe ró, áchí yã jíin de.

25 Te ni ndocuiñi-ni tēe ún, jító jínúñ ñayuu. Te ni naquihin de camilla nuñ ni cátu de, te cuanuhun de vehe de. Te nácuatáhú de nuñ Yaā Dios.

26 Te yōhyo ni canaa ni táca ñáyuu cájito i, te ni cacahān i jeē yōhyo vāha Yaā cúu Yaā Dios. Te suni yōhyo cáyühú i, te cácahān i:

Vijna te ni cajito yó jniñu jéhnu téyí, áchí i.

Jeē ní cana ya Levi

(Mt. 9.9-13; Mr. 2.13-17)

27 Yūcuán na te ni quenda ya cuahān yā, te ni jito ya nuñ ñin tēe stútú xúhun renta, naní de Leví, néne de nuñ cutútú xúhun renta. Te ni cahān yā jíin de:

Condiqñin ruhū na quíhín yō.

28 Te ni ndocuiñi de, te ni stóo de ndihi ndajniñu de, te cuahān de jíin yā.

29 Yūcuán na te ni sáha Leví ñin vico cáhnu vehe de, jeē cúsi ni de jíin Jesús. Te cuehē tēe cástútú xúhun renta jíin sava ga tēe, cáyūcú de mesa cáyeji de staā jíin yā.

30 Te tēe grupo fariseo jíin tēe cástéén tutu ley Yaā Dios, ni quejéé de cácahān de siquí tēe cáscuáha jíin yā, te ni cacajñuhun de:

¿Najehē cáyeji rō cájiti rō jíin tēe cástútú xúhun renta jíin tēe cása ha cuēchi? áchí de.

31 Te ni cahān Jesús:

Ñayuu cáhíyo vāha, tu jíni ñühún i tēe tájna, chí ñayuu cácuñú cúu jeē jíni ñühún.

32 Te ruhú nasúu jéé véji ri cana ri ñayuu tú cuēchi, jeē cúu i nájnūhun ñayuu cáhíyo vāha. Chí sa suhva véji ri cana ri ñayuu cáhíyo cuēchi, jeē na nácani ni i te stóo i cuēchi i. Achí yā.

Jeē ní cacajñuhun de ya siquí jeē cóndite ni

(Mt. 9.14-17; Mr. 2.18-22)

33 Yūcuán na te ni cacahān de jíin yā:

Tēe cáscuáha jíin Juan, jíin tēe cáscuáha jíin grupo fariseo, cuehē jínu cáhíyo ndite ni de te cájicān tahu de. Te tēe cáscuáha jíin máá ní, ¿naun tu cása ha de súcuan? Chí cáyeji de cájiti de.

34 Te ni cahān yā jíin de:

¿A cuu condite ni de níni jéé iyó rí jíin de? ¿A cuu sáha rō jéé condite ni ñayuu cáhíin vico nándaha, te núu níni néne tēe nándaha?

35 Te quee quiví jeē cújiyo tēe ni nándaha, te quiví ún chí condite ni i. Achí yā.

36 Te suni ni cahān yā uñ jñuhun yátá siquí jeē tu quíjnahan jñuhun jeé jéé steen yā jíin táca jñuhun jenahan. Achí yā:

Ni ñin ñayuu tu jéhn de i ñin pedazo sahma jéé i, te nachuhun i nuñ ñin sahma túhú i. Chí núu súcuan te stívi i sahma jéé i, te suni tu quíjnahan jeé jeé un jíin jéé túhú.

37 Te tú ni ñin chūhun vino jeé ñi ñi túhú. Chí núu súcuan, te vino jeé un ndatá ñi, te naa vino jíin ñi.

38 Chí canúu jéé cúhun vino jeé ñi jéé, te súcuan te quéndōo vāha ndindú.

39 Te ñayuu cájiti vino áva, tu cúní i coho i jeé jeé, chí jeé áva cúu jeé vāha ga, achí i. Achí yā.

Jeē ní cataxín de yoco trigo quiví ndetátú

(Mt. 12.1-8; Mr. 2.23-28)

6

1 Te ñin quiví ndetátú ní yāha Jesús cuahān yā mēhñú nuñ cáa trigo. Te tēe cáscuáha jíin yā ni cataxín de yoco trigo, te ni caquñin de ini ndaha de, te ni cayeji de.

2 Te sava tēe grupo fariseo ni cacajñuhun de:

¿Najehē cása ha ró jniñu jeé tu iyó vāha sáha ró quiví ndetátú?

3 Te ni cahān Jesús jíin de:

¿A tu ní cácahu cuiti rō tutu ndese ni sáha David, ñin quiví jeé ni jíi de sóco jíin tēe cáhíin jíin de?

4 Te ni quiví de ini vehe Yaā Dios, te ni quihin de pan íi jeé yosó ndijin nuñ Yaā Dios. Te ni yeji de, te suni ni jēhe de ni cayeji tēe cáhíin jíin de. Te tú na ley jeé cáji ni ñin tēe, chí máá-ni sutú cuu caji. Te vésú súcuan te tú na cuēchi ní iyó siquí de. Achí yā.

5 Te ni cahān gā yā jíin de:

Ruhū, Yaā ni nduu tēe, máá rí cúu jeé ndácu jniñu siquí ndese sáha ñayuu quiví ndetátú, achí yā.

Jeē ní nduvāha tēe ni ichí ndaha

(Mt. 12.9-14; Mr. 3.1-6)

6 Te inga quiví ndetátú, suni ni quiví ya ini vehe íi sinagoga, te ni steen yā jñuhun. Te yūcuan íne ñin tēe ni ichí ndaha vāha de.

7 Te tēe cástéén tutu ley jíin tēe grupo fariseo, cájito yuhu de ya núu nasávāha ya tēe un quiví ndetátú, návāha nihín de cuēchi siquí yā.

8 Te máá yā je jíni yā ndese cájeni ni de. Te ni cahān yā jíin tēe ni ichí ndaha ún:

Ndocuiñi, te condichi rō mēhñu yāha, achí yā.

Te ni ndocuiñi de, te ni jecondichi de mēhñú.

9 Yūcuán na te ni cahān yā jíin de jíjnahan de:

Na cájnūhun rí rohó ñin jñuhun: ¿Ndese cáhán ley siquí quiví ndetátú? ¿A jéé sáha vāha yó, chí sáha néé yó? ¿A jéé nasávāha yó ñayuu je yajni cuu, chí sáha yó jéé cúu i? Achí yā.

10 Te ndéhé yā nuñ de jeé cáyūcú de nñi xiin ya. Te ni cahān yā jíin tēe cúhú un:

Scáá ndaha rō.

Te ni scaá de, te ni nduvāha-ni ndaha de.

11 Te yōhyo ni caquiti ni táca tēe un, te ni quejéé de cándajñuhun de siquí Jesús, ndese cahni de ya.

Jeē ní nacāji ya uxí uñ tēe apóstol

(Mt. 10.1-4; Mr. 3.13-19)

¹² Te ni cuu jecu quiví, te ni quenda ya cuacacān tahú yā nde yucu. Te nái niñu ni jicān tahú yā nuū Yaā Dios.

¹³ Te nuū ní cundijin, te ni cana ya tāca tēe cāscuáha jíin yá. Te ni nacāji ya uxí uū de, te ni cahān yā jeē cuu de apóstol, condiso jniñu de nacani de jñuhun ya.

¹⁴ Te yāha cúu síhví de jíjnāhan de: Simón jeē ní nasnání yá de Pedro, jíin ñani de Andrés, te suni Jacobo jíin Juan, Felipe jíin Bartolomé,

¹⁵ Mateo, Tomás, Jacobo sēhe Alfeo, Simón tēe grupo cananista,

¹⁶ Judas ñani Jacobo, jíin Judas Iscariote, tēe jeē ní nastúu de ya.

Jeē ni stéén yā nuū ñayuu cuehē
(Mt. 4.23-25)

¹⁷ Te ni nanuu ya yucu jíin tāca tēe un jéē cascuáha jíin yá, te ni jecuiñi yā ñin nduhvá jíin de. Te cuehē ñayuu ní región Judea jíin ñuu Jerusalén, jíin ñayuu yumar ñuu Tiro jíin ñuu Sidón, ni quecoo i jeē cúni nahín i jñuhun stéén yā, jíin jéē ndúvāha i cuehyí cándoho i.

¹⁸ Te ñayuu jeē ñuhun tachí ini i, suni ni canduvāha i ní sáha ya.

¹⁹ Te ndivíi ñayuu cáculi i quehé i ya, chi súcuan ndúvāha i sáha ya jíin poder yā.

Jñuhun ñayuu yōhyo ndetū jíin ñayuu jeē xeēn ndoho
(Mt. 5.1-12)

²⁰ Te ni ndacoto ya nuū tēe cāscuáha jíin yá un, te ni cahān yā:

Yōhyo ndetū rohó jéē cándoho ndáhú, chi quiví ró ñuu nuū ndácu Yaā Dios jniñu.

²¹ Yōhyo ndetū rohó jéē cāji sōco vjna, chi quiiji quiví jeē ndutú chíji ró.

Yōhyo ndetū rohó jéē cándahyū ró vjna, chi quiiji quiví jeē cuecú ró.

²² Yōhyo ndetū ró te núu cáquiti ní ñayuu nuū ró jeē siquí ruhū, Yaā ní nduu tēe, te cāscuéhichí i rohó, te cācahān neé i nuū ró, te cācahān i jeē ñayuu casáha jniñu neé cácuu ró.

²³ Te na cóo síñ ní ró quiví sáha i súcuan, te víhyá gā na cúsiñ ní ró, chí cáhnu téyí coo tahú ró nde andiví. Chí suni súcuan ní casáha uhū tāca jíi i jíin tēe ní canacani jñuhun Yaā Dios nde jenahán.

²⁴ Te nacā jeē xeēn ndoho rohó ñayuu cucá, chí vjna-ni cúu jeē cáhíyo síñ ní ró.

²⁵ Nacā jeē xeēn ndoho rohó ñayuu jeē vjna cáhíyo vetú chíji ró, chí quiiji quiví jeē cuu ró sōco.

Ñacā jeē xeēn ndoho rohó ñayuu jeē vjna cájecú ró, chí quiiji quiví jeē nducuíhyá ní ró te ndahyú ró.

²⁶ Nacā jeē xeēn ndoho tāca ró núu cájéjñuhún ñayuu rohó, chí suni súcuan ní cajejñuhún jíi i tāca tēe ní canacani jñuhun stáhú ndé jenahán.

Jñuhun jeē cundáhú ní yō ñayuu cájito uhū yohó

(Mt. 5.38-48; 7.12)

²⁷ Te cāhán rí jíin rohó jeē cájini sōho: Cundáhú ní ró ñayuu cájito uhū rohó. Te sáha vāha ró jíin ñayuu cáquiti ní nuū ró.

²⁸ Te cacān ró jeē vāha coo ñayuu cācahān ndevāha síquí ró. Te cacān tahú ró jehē ñayuu cācahān neé núu ró.

²⁹ Te núu ndé tēe cani de ñin lado yiqui núu ró, te vāha ga suni cuāha ró inga lado cani de, vésu jeē nácuāha ró jéē ndútahú de. Te núu ndé tēe cúni de quende de ticāchi ró, suni cuāha ró jñuhun jeē na quihín de jíin ndé camisa ró.

³⁰ Te na-ni ñayuu jicān nuū ró, te cuāha ró núu i. Te ñayuu quihín ndajniñu ró, ma nándacān ró.

³¹ Te nájnñuhun cáculi ró jeē sáha vāha ñayuu jíin ró, suni súcuan na sáha vāha ró jíin i.

³² 'Chi núu íyó mání ró jíin máa-ni ñayuu jeē maní jíin ró, ¿te na vé jeē vāha ga sáha ró núu súcuan? Chí nde tēe cásáha cuēchi, suni maní de jíin tēe maní jíin máa de.

³³ Te núu sáha vāha ró jíin máa-ni ñayuu jeē casáha vāha jíin ró, ¿te na vé jeē vāha ga sáha ró núu súcuan? Chí nde tēe cásáha cuēchi, suni súcuan casáha de.

³⁴ Te núu cuāha núu ró núu máa-ni ñayuu jeē ñuhun ní ró nacuāha i nuū ró, ¿te na vé jeē vāha ga sáha ró núu súcuan? Chí nde tēe cásáha cuēchi, suni jéhe núu de nuū tāca gá tēe cásáha cuēchi, návāha naniñin tucu de.

³⁵ Núu súcuan te cundáhú ní ró ñayuu cájito uhū rohó, te sáha vāha ró jíin i, te cuāha núu ró núu i. Te ma cuāha ró máa síquí jeē cani ní ró jeē suni nacuāha i nuū ró. Te súcuan te cáhnu coo tahú ró, te stéén ró jeē cácuu ró séhe Yaā kujéhnu téyí. Chí máa yā vāha ní yā jíin ñayuu tu nácuatáhú núu yā jíin ñayuu casáha neé.

³⁶ Núu súcuan te cundáhú ní ró ñayuu, nájnñuhun máa Tátá ró cundáhú ní yā i.

Ma cahán yō siquí cuēchi jñahan yó
(Mt. 7.1-5)

³⁷ 'Ma cahán ró siquí cuēchi ñayuu ndese sáha i, návāha suni ma cahán Yaā Dios cuēchi siquí ró jeē casáha ró súcuan. Ma cahán xeēn ró siquí i jeē tú vāha sáha i, návāha suni ma cahán Yaā Dios súcuan siquí ró. Cone cáhnu ní ró nuū i, te suni cone cáhnu ní yā nuū ró.

³⁸ Cuāha ró núu ñayuu, te suni súcuan cuāha Yaā Dios nuū ró. Chí vāha ndasi cuāha ya nuū ró, nájnñuhun jeē chícuāha vāha ya, quisí ya, sáníhin ya, te nde scáa ya cuāha ya nuū ró. Chí cūhva jeē cájéhe ró núu ñayuu, suni cūhva un cuāha ya nuū ró. Achí yá.

³⁹ Te ni cahān yā ñin jñuhun yátá jíin i:

Tēe cástéén jñuhun tú ndaā, cácuu de nájnñuhun tēe cuáá. Te ñin tēe cuáá, ¿á cuu

stéén de ichi nuū inga tēe cuáá? ¿A tú ningava ndindúú de ini xehvá?

⁴⁰ In tēe scuáha, tu cújéhu de nuū maestro de. Te tēe scuáha ún, núu je ni cutúhva váha de, te jinū de coo de nájnūhun maestro de.

⁴¹ Te cuēchi jnáhan ró cúu nájnūhun jeē íne ñn yāca lúli tinūú i. ¿Te naun cásáha ró cuenta jeē súcuan, te tu cásáha ró cuenta cuēchi máá ró jeē cúu nájnūhun jeē íne ñn nduhu tinūu máá ró?

⁴² ¿Te naun cacahān rō jín jnáhan ró: Condetu, na táva rī yāca íne tinūu ró, te tu cáncani ní rō jeē íne ñn nduhu tinūu máá ró? Tēe stáhú-ni cácuu ró núu súcuan. Xihna gā tinūu máá ró tava rō nduhu, te yūcuán na te cuu condēhe váha ró jēé táva rō yāca tinūu jnáhan ró.

Jín jniñu cásáha ñayuu te náncuni yō ndese ñayuu cácuu i

(Mt. 7.17-20; 12.34-35)

⁴³ Tu iyó yujnu váha jeē jéhe ndehē neé, te ni tu iyó yujnu neé jéé jéhe ndehē váha.

⁴⁴ Chi jín ndehē jeē jéhe ñn ñn yujnu, te jín yō núu yujnu váha cúu. Chi tu scóyo yó ndehē higo xiní íñu, ni tu scóyo yó ndehē uva xiní yucú zarza.

⁴⁵ Te suni súcuan tēe váha, cáhán de jnūhun váha, chi váha ánuá de. Te tēe sáha neé cáhán de jnūhun neé, chi cánéé ánuá de. Chi modo ndese iyó ánuá ñayuu, máni jeē yúcuán cúu jeē cacahān i.

Siquí uú vehe

(Mt. 7.24-27)

⁴⁶ ¿Najehē cacahān yifñuhún ró jín rí: Jitoho ná, áchí ró, te tu cásquicu ró jniñu ndácu rí?

⁴⁷ Táca ñayuu vēji nuū rí te jín sōho jnūhun cáhán rí te squícu, na stéén rí nuū rō ndese cúu i.

⁴⁸ Cúu i nájnūhun ñn tēe jeē ní jeni de vehe de, te ni jete cúnú de nde ni nihín de toto, te ni jeni de siquí. Te nuū ní ndaa yūte, te ni chundahá vehe ún, te tu ní cánda cuíti sáha, chi siquí toto íñ.

⁴⁹ Te táca ñayuu jín sōho jnūhun cáhán rí, te tu squícu i, cúu i nájnūhun ñn tēe ni jeni de vehe de nuū ññun, te tu yítuu jehē. Te nuū ní ndaa yūte, te ni chundahá vehe ún, te ni cotúú-ni, te ni naa ñ-ni. Achí yá jín i jñjñáhan i.

Jeē ní nasávaha ya mozo capitán

(Mt. 8.5-13)

7

¹ Te nuū ni jínu ni cahān yā ni cajini nahín ñayuu ún, te cuahān yā ñuu Capernaum.

² Te ñn tēe nación Roma jeē cúu capitán, iyó ñn mozo de jeē maní ndasí de jín. Te mozo un cúhú i te je yajni cuu i.

³ Te ni jini capitán jnūhun Jesús. Te ni tají de jecu tēe jéhu cáncacu jniñu nuū ñayuu hebreo, cuangoo de nuū yā jeē cahán ndahú de jín yá jeē na quíji ya sávaha ya mozo de.

⁴ Te ni jinūcoo tēe un núu Jesús, te ni cacahān ndahú ndasi de jín yá:

Chindéé ñahán ní tēe cúu capitán, chi tēe váha cúu de.

⁵ Chi maní de jín nación yō, te máá de ni ndacu jniñu ní cuvāha ñn vehe sinagoga cuu yó. Achí de.

⁶ Yūcuán na te cuahān Jesús jín de jñjñáhan de. Te nuū ní cuyajni ya vehe capitán, te ni tají de jecu amigo de cuajnahān yā. Te ni cacahān de jín yá:

Achí capitán jeē tu cúní de sájnēñu de nihín, chi tu cújéhu de jeē quihín ní quívi ní vehe de.

⁷ Jeē yúcuán tu ní sájeñu de máá de jeē quíji de nuū ní, áchí de. Te máá jéé cahán-ni ní, te na ndúvaha-ni mozo de, áchí de.

⁸ Chi máá de suni ndíso jniñu de ni casáha tēe cácujeñu ga. Te cújéhu de nuū táca soldado de, áchí de. Te núu cáhán de jín ñn tēe jeē na quihín de, te cuahān de. Te núu cáhán de jín inga tēe jeē na quíji de, te quíji de. Te núu ndácu de ñn jniñu nuū mozo de, te sáha i, áchí de. Achí táca tēe un jín yá.

⁹ Te jeē ní jini Jesús jnūhun yáha, te ni naa ni yā. Te ni ndíó cóto ya ní cahān yā jín ñayuu cuehē cánciquin yatá yā:

Jendaá cahán rí jín ró jeē ní nación yō Israel tu ní nihín rí ní ñn ñayuu candíje nihín súcuan, nájnūhun cáncíje tēe ún, vésú tēe nación tu jín jnūhun Yāá Dios cúu de. Achí yá.

¹⁰ Te tēe ni tají capitán nuū yā, ni najinūcoo de vehe, te ni cajito de jeē jé ní nduvāha mozo un.

Jeē ní nastécu yā sēhe yí ñahan viuda

¹¹ Yūcuán na te cuahān yā ñn ñuu naní Naín. Te tēe cácuáha jín yá, jín ñayuu cuehē, suni cuangoo i jín yá.

¹² Te ná ní cuyajni ya yuñú ún, te yūcuán ní quendacoo ñayuu jeē quichindūji i ñn tēe suchí jéé ní jñí. Te máñuhún-ni i nuū naná i, te ñahan viuda cúu ña. Te cuehē ñayuu ñuu un véjicoo jín ña.

¹³ Te ná ní jito máá Jitoho yō nuū ña, te ni cundahú ní yā ña, te ni cahān yā jín ña:

Ma ndahyu ní, áchí yá.

¹⁴ Yūcuán na te ni jinū yā nde nuū ndíyí ún, te ni jñi ya jeñú, te ni cajecuñí tēe cánciso ún. Te ni cahān yā jín suchí ní jñí:

Cáhán rí jín ró, ndocuñí, áchí yá.

¹⁵ Yūcuán na te ni nucōo suchí ní jñí ún, te ni quejéé i nácahān i. Te ni nacuaña ya i nuū naná i.

¹⁶ Te ndiví ñayuu ní cayūhú i jeē ní cajito i, te ni cacahān i jeē yóhoyo váha Yāá cúu Yāá Dios. Te cacahān i:

Mēhñu yó ni quee ñin tēe cújehnu nácani jñuhun Yaā Dios.

Te suni cácahān i:

Máá Yaā Dios ni quejéé yá chindéé ñáhān yá ñayuu yā. Achí i.

¹⁷ Te ni jítē núu jñuhun ya ní cáhnu región Judea jíin táca región yajni yūcuán.

*Jeē ní tají Juan uū tēe nuū yā
(Mt. 11.2-19)*

¹⁸ Te ine Juan vecāa, te tēe cáscuáha jíin de ni cacastuhun núu de jeē súcuan ni cuu táca jíin yáha.

¹⁹ Te ni cana Juan uū tēe ún, te ni tají de cuango nuū Jesús, návāha cajñuhún de ya núu máá yá cúu ndije Cristo jeē ní cachi Yaā Dios jeē tají yá, chí núu nasúu yá cúu te condetu de inga.

²⁰ Te ni jinúcoo tēe un núu yā, te ni cacahān de:

Juan tēe scuándute ni tají de sãña véjicoo ná cajñuhun ná nihín núu máá ní cúu Cristo jeē achí tutu jeē quíji, chí condetu yó inga tēe quíji. Achí de.

²¹ Te máá hora un ní nasávāha ya cuehē ñayuu cácuñu, jíin ñayuu cándoho cuehyí xeēn, jíin ñayuu ñuhun tachí ini. Te suni cuehē ñayuu cuaá ní ndundijin tinúu i ní sáha ya.

²² Te ni cahān yā jíin de:

Cuango te castuhun ró nuū Juan táca jñiñu ní cajito ró jíin jñuhun ní cajini ró. Te cachi ró nuū de jeē ñayuu cuaá cánanune tinúu i, te ñayuu yacuá cáncacaca i, te ñayuu ndóho cuehyí stehyú cánduvāha i, te ñayuu sohó cánanune sōho i, te ñayuu jíihí nátecu i sáha ri. Te suni nácani ri jñuhun nuū ñayuu ndahú jéé jnama Yaā Dios i.

²³ Te yōhoyo ndetú tēe jeē ma nácani yátá ni de jeē ruhú cúu Cristo. Súcuan cachi ró nuū Juan. Achí yá jíin de.

²⁴ Te ná cuanuhun ndindúú tēe ún, te ni quejéé Jesús cahān yā jñuhun Juan jíin ñayuu:

¿Na vé ni jécondēhe ró jíināhan ró ndé nuū ñuhun téhé? ¿A ñin tēe jéni ñin jéni uū ni, nájnūhun ite jeē cánda sáha tachí?

²⁵ Te núu tuú, ¿te na vé ni jécondēhe ró núu súcuan? ¿A ñin tēe cúní cújehnu jeē ñuhun sahma lúu? Tuú chí cajini ró jeē tēe cáñuhun sahma lúu te cánducú táca jéé cúsiñi ni, máni ini vehe rey cáyucú de.

²⁶ ¿Te na vé ni jécondēhe ró núu súcuan? ¿A ñin tēe nácani jñuhun Yaā Dios? Cáhan rí jíin ró jeē suu ni jécondēhe ró. Te cújehnu ga Juan yáha vésú táca gá tēe ni canacani jñuhun Yaā Dios.

²⁷ Chí jñuhun Juan cúu jeē ní cahān Yaā Dios jeē yosó núu tútu ii:

Tají rí tēe nacani jñuhun ri cosnúu de ichi núu Cristo, návāha coo túhva ñayuu jeē jinú yá.

Achí Yaā Dios, achí tutu.

²⁸ Te cáhan rí jíin ró jeē ini ñayivi yáha cújehnu ga Juan tēe scuándute vésú táca gá tēe jeē ní iyo ini ñayivi. Te vésú súcuan te táca tēe núu ga ini ñuu nuū ndacu Yaā Dios jñiñu, cújehnu ga de vésú Juan. Achí yá.

²⁹ Te táca ñayuu jíin táca tēe cástútú xuhun renta, ní cajini i jñuhun cáhan yā, te ní ca-jetáhú i jeē Yaā ndaá cúu Yaā Dios, chí je ní cajendute i nuū Juan.

³⁰ Te tēe grupo fariseo jíin tēe cástéén tutu ley, ní casquéhichí de jñuhun jeē cuní Yaā Dios sáha ya jeē váha de, chí tu ní cájendute de nuū Juan.

³¹ Te ni cahān gā máá Jítoho yó:

Yáhá cachi rí ñin jñuhun yátá návāha na cúní ró ndese cúu ñayuu tiempo vijna.

³² Cúu i nájnūhun sūchi lúli cáhñin nuū yáhu cácasiquí i. Te cácana ndee i xiní jñahan i: Ni cativi rí scuillí, te tu ní cájita jéhé ró. Te ní cajita rí yaa jeé cuihyá jita, te tu ní cándahyú ró, achí i. Te nájnūhun cándāa sūchi lúli un jéé tu ní núnjahan ni i ni ñin, suni súcuan cándāa ró.

³³ Chí ni quíji Juan tēe scuándute, te cuehē jíin ní iyo ndite ni de, tu ní yéji de staā ní tu ní jíhi de vino. Te tu ní cánujñahan ní ró, chí ni cacahān ró jeē ñuhun tachí ini de.

³⁴ Yūcuán na te ní quee máá rí, Yaā ní nduu tēe, te yéji rí jíhi rí, te tu cánujñahan ní ró, te chísoó jñuhun ró cácahān ró jeé máni máá jéé yéji rí jíhi rí vino. Te quíjñahan rí jíin tēe cástútú xuhun renta jíin táca gá tēe cása ha cuēchi, achí ró.

³⁵ Te núu cúndichí ñin tēe jíin jñuhun Yaā Dios, te jíin jñiñu sáha de te cájini táca gá tēe ndichí jeē ndichí de. Achí yá.

Jeē ine Jesús vehe Simón tēe fariseo

³⁶ Te ñin tēe fariseo ní cana de Jesús jeē cáji yá staā jíin de. Te ní jinú yá vehe de, te ní cucúo ya mesa jeé cáji yá staā.

³⁷ Yūcuán na te ñin ñahan sáha cuēchi, ndéé ña ñuu yúcuán, te ní jini ña jeē ní jíin Jesús vehe tēe fariseo un, yéji yá staā. Te ní quee ña jíin ñin frasco yuú luu jeē ñuhun chítú aceite perfume.

³⁸ Te ín yítí ña nuū jehé yá, te ndáhyú ña. Te ní quejéé ña stáji ña jehé yá jíin ndute tinúu ña, te ní nasíchí ña jíin ixi xíní ña. Te ní techuhú ña jehé yá, te ní chuhun ña perfume un.

³⁹ Te tēe fariseo un jeē ní cana de ya, ní jito de jeē súcuan ní sáha ña, te ní jeni ní de: Núu tēe nácani jñuhun Yaā Dios cúu tēe yáha, te cuní de ndese ñahan cúu ñahan yáha jeé quehé ña de, chí ñahan sáha cuēchi cúu ña, jéni ní de.

⁴⁰ Yūcuán na te ní cahān Jesús jíin de:

Simón, cúní rí cahān rí jíin ró ñin jñuhun.

Te ní cahān máa de:

Cahān ní, Maestro.

41 Te ni cahān Jesús:

Īn tēe jēhe núu xūhūn, ni ĩyo uū tēe táu nuū de. Īn de ni cotaū uhūn ciento denario, te inga de ni cotaū uū xico uxī denario.

42 Te tú na vé cánevāha tēe un jēē náchunaa de. Te tēe jēhe núu xūhūn ní ine cáhnu ni de nuū ndindúú tēe ún. Núu súcuan te cachi rō: Jeē ndindúú tēe ún, ¿ndé ĩn de coo manī gā jīn de? Achí yá.

43 Te ni cahān Simón:

Jéni ni na jēē tēe ni cotaū cuehē gā, achí de. Te ni cahān yā jīn de:

Ndaā cahán rō, achí yá.

44 Te jito ya nuū ñahan ún, te ni cahān gā yā jīn Simón:

¿A jito ró na vé sáha ñahan yáha? Jeē ní quee rī vehe ró, te tu ní jēhe ró ndute jeē ndúndoo jehē rī nájñūhun íyó costumbre. Te ñahan yáha ní stáji ña jehē rī jīn ndute t́núú ña, te ni nasíchí ña jīn ixi xíní ña.

45 Te tu ní téchūhu ró ruhū nájñūhun íyó costumbre. Te ñahan yáha, nde jeē ni quívī rī vehe ró, tu jécuiñī ña jeē téchūhú ña jehē rī.

46 Te tu ní chūhūn ró aceite xinī rī nájñūhun íyó costumbre. Te ñahan yáha ní chuhūn ña aceite perfume jehē rī.

47 Núu súcuan te cahán rī jīn ró jeē ni stéén ña jeē yóhoyo manī ña jīn rī siquī jeē ine cáhnu ní rī nuū táca cuéchi ña, vésú cuehē cúu. Te núu cone cáhnu ní rī nuū ĩn ñayuu íyó jecu-ni cuéchi, te jecu-ni stéén i jeē manī i jīn rī, achí yá.

48 Te ni cahān yā jīn ña:

Je ine cáhnu ní rī nuū táca cuéchi ró, achí yá.

49 Yūcuán na te ñayuu cayeji staa jīn yá, ni quejéé i cácahan maá i:

¿Nde ĩn ga cúu tēe yáha jéē cahán jeē ine cáhnu ni nuū cuéchi? Achí i.

50 Te Jesús ni cahán gā yā jīn ñahan ún:

Ni candíje ró rúhū, te jeē yūcuan ní jnama rī rohó. Cuáhán te na ndúsī ní rō. Achí yá.

Jñūhun ñahan ní cajejñūnu nuū yā

8

1 Yūcuán na te ni cuu jecu quívī, te ni jica cuu Jesús táca ñuu náhnu jīn ñuu lulí. Te nácani ya jñūhun váha te cástūhun yá ndese ndácu Yaā Dios jñiñu. Te ndihúxí uū tēe cácuu apóstol, cájica de jīn yá.

2 Te suni íyó jecu ñahan cájica jīn yá, jeē ní quenehen ya tachī ini sava ña, te ni nasávāha ya sava ña jeē cándoho cuehyī. Te ĩn ña cúu María ñuu Magdala, te ini ñahan un ní quenehen ya uxā tachī.

3 Te inga ña cúu Juana, ñasihí Chuza, tēe ndiso jñiñu ini vehe Herodes. Te inga ña cúu Susana, jīn cuéhe gā ñahan jeē cáchindéé ñáhán ña, jēhe ña táca jéē jini ñúhūn yá jīn de jijnáhan de.

Jñūhun yátá síquī tēe jéte trigo

(Mt. 13.1-9; Mr. 4.1-9)

4 Te cuehē ñayuu táca ñuu yūcuan ní jñūcoo i nuū Jesús. Te ni cacutútu cuéhe ndasí ñayuu, te ni cahán yā ĩn jñūhun yátá jīn i:

5 ĩn tēe cate trigo, ni quenda de jeē cate de. Te ná ni quejéé de jéte de, te jecu trigo ni jité yuhíchi. Te ni cajeñū ñayuu siquī, te ni cayeji saa.

6 Te jecu gā ni jité nuū ñūhūn yūū. Te ni cane, te ni ichī-ni, chí tú cuehē cajin.

7 Te jecu gā ni jité nuū náne ĩñu. Te ĩnuú-ni ni canecoo ĩñu jīn, te ni jesi nuū.

8 Te jecu ní jité nuū ñūhūn váha. Te nuū ní jehnu, te ni jēhe cuehē nunī, chí jeē ĩn ĩn ni jēhe nde ciento. Achí yá.

Yūcuán na te ni cahán jee ya:

Tāca rohó jéē jini sōho, na chúsóhó ró, achí yá.

Najehē cahán yā máni jñūhun yátá

(Mt. 13.10-17; Mr. 10-12)

9 Te tēe cáscuáha jīn yá ní cacajñūhún de ya na vé cuní cahán jñūhun yátá yáha.

10 Te ni cahán yā:

Róhó jijnáhan ró, chí sáha Yaā Dios jeē cájécūhūn ní rō jñūhun ní yisāhi yáha, ndese quívicoo ñayuu ndaha Yaā Dios jeē ndacu ya jñiñu nuū i. Te máni jīn jñūhun yátá cahán rī jīn sava ga i, návāha vésú cájito i, te quéndōo i nájñūhun jeē tú na vé ní cájito i. Te vésú cájini sōho i, te ma jécūhūn ni i.

Jeē ní castūhūn cájī yá jñūhun yátá tēe jéte trigo

(Mt. 13.18-23; Mr. 4.13-20)

11 Jñūhun yátá yáha cúni cahán: Trigo un cúu jñūhun Yaā Dios.

12 Te trigo jeē ní jité yuhíchi cúu nájñūhun ñayuu cájini sōho jñūhun, te quíji-ni jexeén te quénde-ni jñūhun ĩni anuá i, návāha ma candíje i te ma jnāma rī i.

13 Te trigo jeē ní jité nuū ñūhūn yūū cúu nájñūhun ñayuu cájini jñūhun, te cájetáhú i te cácusī ní i jīn. Te tu cúcutú jñūhun ún ĩni anuá i. Te jecu-ni quívī cáchandíje i, te núu ní quejéé jñúndóho, te cájica yátá i.

14 Te trigo jeē ní jité nuū náne ĩñu cúu nájñūhun ñayuu cájini jñūhun, te cuangoo i te cácuñéñu i jīn jñiñu i jīn jéē cuní i cucúcá i te coo sī ní i. Te tu ĩje i jīn jñūhun ya.

15 Te trigo jeē ní jité nuū ñūhūn váha cúu nájñūhun ñayuu cájini nahín jñūhun ya, te cájniñi váha i, chí íyó váha íyó ndāā anuá i. Te cáhije i jīn jñūhun ya, chí cáchandíje váha i.

Jñūhun yátá síquī lámpara

(Mr. 4.21-25)

16 Núu nástān ñayuu ĩn lámpara, te tu jési i ní ĩn siquī, ní tu jéni i chíji jito. Chí sa suhva jéni i nuū sucún, návāha cundijin nuū ñayuu quívicoo vehe.

¹⁷ Te suni súcuan tu iyó ni ñin jñuhun sāhi jéē ma cūni ñayuu, chi ndihi tāca jñuhun cácahān i nane ndijin te cuni ñayuu.

¹⁸ Nūu súcuan te na cūni sōho vāha ró, chi ñayuu je jécūhun ni, stéén gā yā nuū i. Te ñayuu tu cándije, máa jecu jeē jéni ni i jeē jini i, sa suhva naa. Achí yá.

*Náná yā jín ñani yā
(Mt. 12.46-50; Mr. 3.31-35)*

¹⁹ Yūcuán na te ni quee naná yā jín tāca ñani yā nuū íne ya. Te tu ní cúu quívicoo ña nuū yā siquī jeē chitú ñayuu.

²⁰ Te ñin ñayuu ni castūhun nuū yā:
Náná ni jín tāca ñani ni cáhiin nuū quéhe, te cácuni cahān jín ní, áchí i.

²¹ Te ni cahān maá yá:
Suní náná rí jín ñani rí cácuu ñayuu cájini sōho jñuhun Yaā Dios te cáscuicu i, áchí yá jín i.

*Jeē ní jecuñi tachí níhin jín mar ní sáha ya
(Mt. 8.23-27; Mr. 4.35-41)*

²² Te ñin quiví ni quiví ya ñin barco jín téé cáscuáha jín yá, te ni cahān yā jín de:

Na yáha yó quihín yó inga lado mar.
Te ni cáscáca de barco cuangoo de.

²³ Te níni cáscáca de barco, te ni quixí yā.
Te ni jecuñi ñin tachí níhin nuū mar, te je yajni chitú ndute ini barco, te ndúcú quéé barco.

²⁴ Te ni castóna de ya, te ni cacahān de:
Maestro, Maestro, vijna te queē yó chíji ndute te naa yó, achí de.

Te ni ndocuiñi-ñi ya, te ni cahān yā nuū tachí níhin jín nuū mar. Te ni cajecuñi-ñi, te ni cuu nayúú í-ñi.

²⁵ Te ni cahān yā jín téé cáscuáha jín yá:
¿Naun tu cácañije ró?
Te máá de yōhyo ni cayúhú de, te cánaa ni de, te cácahān de jín jnáhan de:

¿Ndé ñin ga cúu téé yáha jéē nde nuū tachí níhin jín nuū ndúte ndácu de jniñu te cájetáhú jéé cahān de? Achí de.

*Tēe Gadara jeē ndóho tachí
(Mt. 8.28-34; Mr. 5.1-20)*

²⁶ Yūcuán na te ni cane ya jín de región Galilea, te cuahān yā región Gadara jeē íne inga lado mar Galilea.

²⁷ Te nuū ní nanuu ya nuū ñuhun íchi, te ñin téé ñuu un ní quee de nuū yā. Te je ni cuu cuehē cuiyā ñuhun cuehē tachí ini de. Te tu ñuhun cuiti de sahma, ni tu ndéé de vehe, chi sa suhva nuū cáyindūji ndiyi ndeé de.

²⁸ Te ná ni jito de nuū Jesús, te ni jecuñi yiti de nuū yā, te ni cana cóhó de:

¿Naun vēji ní nuū ná, Jesús Sēhe Yaā cujéhuu téyi? Cáhan ndahú ná jín ní jeē ma stóho ní saña, áchí de.

²⁹ Súcuan ni cahān de, chi je ni ndacu ya jniñu nuū tachí un jéē na quéndacoo ini de. Te ni cuu cuehē jinu sáha xeēn tachí jín

de. Te cájihni ñayuu ndaha de jehē de jín cadena, návāha tú na vé sáha de. Te ndihi-ni jéhn de, te jínu de jéhén de nde nuū ñuhun téhé sáha tachí ún.

³⁰ Te Jesús ni cajñuhun yá de:

¿Na vé nani ró?

Te ni cahān de:

Legión nani ná.

Súcuan ni cahān de jeē nani de, chi ñuhun cuehē tachí ini de.

³¹ Te ni cacahān ndahú táchi un jín yá jeē ma tají yá quihín ini túhnchi cúnú.

³² Te yucu yúcuan cáhiin cuehē quini cájitu ti. Te tachí jeē cáñuhun ini téé un ní cacahān ndahú jín yá jeē na cuáha ya jñuhun quívicoo ini quini ún. Te ni jēhe ya jñuhun.

³³ Te ni quendacoo tachí ún ini téé ún, te ni quívicoo ini quini. Te quini un ní cajinu ti ní ningoo ti ñin yucáva, ní quívicoo ti nuū mar, te ni ndaquihí ti ndute, ni cajihí ti.

³⁴ Te téé cándito ti ní cajito de jeē súcuan ní cuu, te ní cayúhú de. Te ní cajinu de cuacastūhun de nuū ñayuu ñuu un jín ñayuu táca rancho.

³⁵ Te cuangoo ñayuu un cuácondéhé i na vé ní cuu. Te ní jinúcco i nuū íne Jesús. Te ní cajito i nuū téé ní quendacoo tachí ini, néne de nuū jehé Jesús, te ñuhun de sahma, te je ní nducájí xini de. Te ní cayúhu ñayuu ún.

³⁶ Te téé ní cajito ní canacani de jñuhun nuū ñayuu, ndese ní nduvāha téé ní ñuhun tachí ini.

³⁷ Yūcuán na te táca ñayuu ní región Gadara, ní caquejéé i cacahān ndahú i jín yá jeē na cújiyo ya quihín yā, chí yōhyo cáyuhú i. Te ní ndivi ya ini barco jeē quínuhun yā.

³⁸ Te téé jeē ní quendacoo tachí ini, ní cahān ndahú de jín yá jeē na cuáha ya jñuhun quihín de jín yá. Te Jesús ní cahān yā jeē na quéndoo de, te áchí yá:

³⁹ Cuánuhun vehe ró, te nacani ró jñuhun ndese yōhyo jéhuu jniñu ní sáha Yaā Dios jín ró, achí yá jín de.

Te cuahān de, te ní nacani de jñuhun ní ñuu ún, ndese yōhyo jéhuu jniñu ní sáha Jesús jín de.

Jñuhun sēhe síhi Jairo jín ñahan ní quehé yusáhma ya

(Mt. 9.18-26; Mr. 5.21-43)

⁴⁰ Te nuū ní najinū Jesús inga lado mar, te ñayuu un ní cacusiñi ní i jeē ní najinū yā, chí ndihi i cánduto i ya.

⁴¹ Te ní quee ñin téé cújéhuu ini vehe íi sinagoga, nani de Jairo. Te ní jecuñi yiti de nuū jehé yá, te ní cahān ndahú de jín yá jeē na quihín yā jín de vehe de.

⁴² Chí iyó ñin sēhe síhi de jeē mañuhún-ni i nuū de, te iyó i nájñuhun uxí uū cuiyā. Te sūchí un je yajni cuu i. Te cuahān yā jín de. Te cuehē ñayuu cándiqui i ya, te ní chitú níhin i xiin ya cuangoo i.

⁴³ Te mēhñu ñayuu un cuahān ñin ñahan cūhú jeē ní cuu uxī uū cuiyā ndóho ña cuehyī niñī. Te ni jexin ña tāca jēē névāha ña jíin téē tájñá, te tu ní ndúvāha ña sāha ni ñin de.

⁴⁴ Te ni quee ña ichi yátá yā, te ni quehé ña yusáhma ya. Te ni jecuiñī-ni niñī ña.

⁴⁵ Yūcuán na te ni cahān Jesús:

¿Ndé ñin ni quehé sahma ri? achí yá.

Te ndivii i ni cacahān jeē tu ní quehé i. Te Pedro jíin téē cáhñin jíin de, ni cacahān de:

Maestro, jito ní jeē ñayuu cuehē yāha ní chitú nihin i xiin ní, te cáquihī i níhín, te cájnūhun ní ndé ñin ni quehé sahma ní.

⁴⁶ Te ni cahān Jesús:

Tuú chí ñin ñayuu ni quehé sahma ri, chí ni jini rī jeē jíin fuerza rī ni nduvāha ñin ñayuu, achí yá.

⁴⁷ Te ni jini ñahan un jeē tu ní cúu coo yuhu jeē ní sāha ña. Te quísí i ña ni quee ña, te ni jecuiñī yití ña nuū jehé yá. Te jito jínūū tāca ñayuu, te ni cachi cají ña najehē ni quehé ña yusáhma ya, jíin jeē ní nduvāha-ni ña.

⁴⁸ Te ni cahān yā jíin ña:

Séhe, ni candíje ró jeē cuu nasávāha ri rohó, te jeē yúcuán ní nduvāha ró. Cuáhán te na ndúsī ni rō, achí yá.

⁴⁹ Te níni cáhán gā yā súcuán, te ni quee ñin téē veji vehe Jairo, téē cújehnu ini sinagoga, te ni cachi nuū de:

Je ni jihī séhe síhī ní. Te ma sájneñu ga ní Maestro, achí de.

⁵⁰ Te ni jini Jesús jñūhun yāha, te ni cahān yā jíin Jairo:

Ma yūhu ró, chí candíje-ni ró, te nastécu rī séhe ró, achí yá.

⁵¹ Te ni jinū yā vehe, te tu ní jéhe ya jñūhun quiví ñayuu jíin yá, chí máá-ni Pedro jíin Juan jíin Jacobo jíin tátá naná sūchi síhī un.

⁵² Te cácuulhyá ni ndihī ñayuu cáyucú ini vehe, te cándahyū i jehē sūchí un. Te ni cahān yā:

Ma ndahyū ró jijnáhan ró. Tu ní jíhí i, chí quixí-ni i, achí yá.

⁵³ Te ni cajecú catá i jeē ni cahān yā, chí cájini i jeē ní jíhí sūchi síhī un.

⁵⁴ Yūcuán na te ni jniñ ya ndaha i, te ni cahān jee ya jíin i:

Síhī, ndocuiñī, achí yá.

⁵⁵ Te ni natecu i, te ni ndocuiñī-ni i. Te ni ndacu ya jniñu jeē na cuāha ña jeē cáji i.

⁵⁶ Te tátá i naná i yōhyo ni canaa ni de cájito de. Te ni ndacu nihin ya jniñu nuū de jeē ma cáchi de nuū ni ñin jeē súcuán ni cuu.

Jeē ní tají yá ndihúxí uū de canacani de jñūhun

(Mt. 10.5-15; Mr. 6.7-13)

9

¹ Te ni nastútú yá ndihúxí uū téē cáscuáha jíin yá, te ni sāha ya jeē cóndiso jniñu de te coo

poder de jeē quénehen de tachī ini ñayuu, jíin jeē nasávāha de ñayuu cácuñu.

² Te ni tají yá de quingoo de jeē nácani de jñūhun ndese ndácu Yāa Dios jniñu, jíin jeē nasávāha de ñayuu cácuñu.

³ Te ni cahān yā jíin de:

Ma cóndiso ró jeē cuajniñu ró ichi, ni vara, ni ñunu, ni staā, ni xūhún. Te quihñ rō jíin ñin-ni camisa, te ma cóndiso ró inga.

⁴ Te na-ni vehe núu ni quívicoo ró, te yūcuán coyūcu ró nde quenda tucu ró quihñ rō inga ñuu.

⁵ Te núu ñin ñuu tu cájetáhú i rōhó, na quéndacoo ró yúcuán, te scóyo ró tícachā jehē rō, te súcuán stéén rō jeē iyó cuéchi i jeē tu ní cájetáhú i. Achí yá.

⁶ Te ni quendacoo de cuahān de, ni cajica nuu de táca ñuu, ni canacani de jñūhun jñāma Yāa Dios ñayuu. Te tāca lado ni canasávāha de ñayuu cácuñu.

Jeē ni jihī Juan téē scuándute

(Mt. 14.1-12; Mr. 6.14-29)

⁷ Te Herodes, téē cúu gobernador, ni jini jñūhun de táca jniñu sāha Jesús. Te ni cunéé ni de, chí cájeni ni sava ñayuu cácahān i jeē Juan ni natecu de.

⁸ Te sava ga i cácahān jeē ní nane Elías, téē ni nacani jñūhun Yāa Dios nde jehán. Te sava ga i cácahān jeē inga téē ni nacani jñūhun ya nde jehán, ní natecu de.

⁹ Te ni cahān Herodes:

Juan chí ni ndacu rī jniñu ni tahndē xinī. Núu súcuán ¿te ndé téé cúu téē yāha jeē jini jñūhun ri jeē sāha de jniñu jéhu? Achí de.

Te ni nducú Herodes modo coto de nuū Jesús.

Jeē ni scáji yá uhūn mil téē

(Mt. 14.13-21; Mr. 6.30-44; Jn. 6.1-14)

¹⁰ Te ni ndecoo téē cácuu apóstol jeē ní tají yá ni canacani jñūhun. Te ni cacachi de nuū yā táca jniñu ni casáha de. Te ni jeca ya de cuahān sñin ya jíin de ñin lugar nuū tú ñayuu, yajni ñuu Betsaida.

¹¹ Te ni cajini ñayuu, te suni cuangoo i. Te ni jetáhú yá i, te ni nacani ya jñūhun ndese ndácu Yāa Dios jniñu, te ni nasávāha ya ñayuu cácuñu.

¹² Te nuū cuáhini, te ni quecoo ndihúxí uū téē cáscuáha jíin yá, te ni cacahān de jíin yá:

Tají ní ñayuu cuehē yāhá na quingoo i táca ñuu jíin táca rancho yajni yāhá, te nducú i nuū ndóo i te cuaan i jeē cáji i, chí tú na vé iyó yāha, achí de.

¹³ Te ni cahān yā jíin de:

Cuāha máá ró jeē cáji i, achí yá.

Te ni cacahān de:

Tú na vé cánevāha ná, chí uhūn-ni staā jíin úu-ni chācá. Te vésú núu quicuacan ná staā cají ndihī ñayuu cuehē yāha, te ni ma cúu, achí de.

14 Chi iyó nájñuhun uhün mil tēe. Te ni cahān yā jín tēe cáscuáha ún:

Cahān jín ñáyyu na cúcōo sñn cincuenta cincuenta i, áchí yá.

15 Te súcuan ni casáha de, te ni cacucōo ndihi ñayuu.

16 Te ni quihin ya ndihúhún staa jín úu chácá un, te ni ndacoto ya ichi ándiví, te ni nacuatáhú yá. Te ni tahú cuéchi yá staa ún, te ni jēhe ya nuú tēe cáscuáha jín yá, te ni casaja de nuú ñayuu cuehe.

17 Te ndivii i ni cayeji, te ni candutú chíji i. Te ni canastútú de pedazo staa jee ni quendōo, te ni chítú úxí uú jica.

Jeē ní cahān Pedro jeē Jesús cúu Cristo
(Mt. 16.13-19; Mr. 8.27-29)

18 Te iin quiví ni cusñn Jesús, jícán tahú yá, te máá-ni tēe cáscuáha un cáhiin de jín yá. Te ni cajñuhun yá de:

Ruhū, ¿ndé iin cúu ri cácahān ñayuu? achí yá.

19 Te ni cacahān de:

Sava i cácahān jeē cúu ní Juan tēe ni scuándute. Te sava ga i cácahān jeē cúu ní Elías, tēe ni nacani jñuhun Yaā Dios nde jenahán. Te sava ga i cácahān jeē inga tēe ni nacani jñuhun ya ni natecu de.

20 Yūcuán na te ni cajñuhun yá de:

Te máá ró, ¿ndé iin cúu ri cácahān ró?

Te ni cahān Pedro:

Máá ní cúu Cristo, Yaā ní tají Yaā Dios, achí de.

Jeē ní castühún Jesús jeē cúu yá
(Mt. 16.20-28; Mr. 8.30-9.1)

21 Yūcuán na te ni ndacu ñihin ya jñiñu nuú de jee ma cáchi de jñuhun yáha nuú ní iin ñayuu.

22 Te ni cahān yá:

Máá rí, Yaā ní nduu tēe, cánuú ndoho xeēn rí. Te táca tēe jéhu jín sūtú cácujeñu jín tēe cástéén tutu ley, squéhichí de ruhū. Te cahni de ruhū, te nuú uní quiví te natecu rí, achí yá.

23 Yūcuán na te ni cahān yá jín ndihi de:

Na-ni ñayuu núu cúní i condiquín i ruhū, na cási i jee cuní máá i, te na cóndiquín i ruhū táca quíví, te cuáha i jñuhun ndoho i jñúndóho jeē siquí rí, vésú na cúu i.

24 Chi núu ndé ñayuu cuní i cácu i nuú jñúndóho quiji nuú i jee siquí ruhū, núu súcuan te jñahnú ndetú i ní cáni. Te núu ndé ñayuu, vésú na cúu i jee siquí ruhū, te cotecu i ní cáni.

25 ¿Chi ndé cuajñiñu vésú na cúndeyí ñayuu niñn i ní ñáyiví, te núu squíví i máá i nuú jñahnú ndetú i ní cáni?

26 Chi núu na-ni ñayuu cúcanu i jee siquí ruhū, Yaā ní nduu tēe, jín siquí jñuhun cáhān rí, suní súcuan cúcanu rí jee siquí máá i, quiví ndíji rí. Te quiví ún chí yóhyo luu

cujéhu ri, nájñuhun cújéhu Tátá rí, te suní cácujeñu ndajéhé ndoo ya sáha ya.

27 Te jendaá cahān rí jín ró jee sava tēe cáhiin yáha, ma cúu de chi nde cuni de jee ndácu Yaā Dios jñiñu jín poder yá. Achí yá.

Jeē tucu ni nduu ya
(Mt. 17.1-8; Mr. 9.2-8)

28 Yūcuán na te nájñuhun nuú uná quiví jee ni cáhān yá jñuhun yáha, te ni caa ya iin yucu, cuacacān tahú yá. Te Pedro jín Jacobo jín Juan cuango de jín yá.

29 Te níni jícán tahú yá, te tucu ni nduu nuú yá, te sahna ya ni nducujín quiví, te ndíndéé.

30 Yūcuán na te ni canecoo uú tēe, cándajñuhún de jín yá. Te cúu de Moisés jín Elías, tēe ni cahíyo jenahán.

31 Te luu ndíndéé de cáhiin de, te ni cacahān de jín yá siquí jee ní cuyajni cuu yá ñuu Jerusalén.

32 Te Pedro jín tēe cáyūcu jín de, yóhyo cájií de máhná, te vésú súcuan te tu ní cáquixí de. Te ni cajto de jee lúu ndíndéé yá jín ndíndúú tēe cáhiin de jín yá.

33 Te nuú ní cacujiyo tēe un núu yá, te ni cahān Pedro jín yá:

Maestro, nacā jee váha jee cáhiin ná yáha. Te na sáha ná úní vehe ramada, iin cuu máá ní, inga cuu Moisés, te inga cuu Elías, achí de.

Te tu sáha de cuenta na vé cúu jee cahān de.

34 Te níni cáhān de súcuan, te ni quee vicó ñuhun ní jesí nuú de jijnáhan de. Te ni cayūhú de jee cáhiin de chíji vicó ún.

35 Te nuú vicó un ní cahān iin jñuhun:

Yáha cúu Sēhe ri jee maní ndasí rí chíi. Te na cúní nahún ró jñuhun cáhān yá, achí.

36 Te nuú ní jínu ni cahān jñuhun ún, te máá iin na Jesús iin ya nuú de. Te máá de tu ní cácahān cuiti de, te táca quíví ún tu ní cácachi de nuú ní iin jee súcuan ni cajto de.

Jeē ní nasávaha ya iin sūchi ñuhun tachí ini
(Mt. 17.14-21; Mr. 9.14-29)

37 Te inga quiví un ní nanuu ya yucu jín de. Te cuehé ñayuu ni jejnahan i ya.

38 Te méhñu ñayuu cuehē un ní cana jee iin tēe:

Maestro, jícán tahú na núu ni jee condēhe ní sēhe yí ná, chí máñuhún i nuú ná.

39 Te máni jee sáha xeēn tachí jín i, te cána cóhó i sáha, te jéni yíhí i, te jee tiñu yuhu i. Te yóhyo stóho i, te yóhyo uhú siaá i.

40 Te ni cahān ndahú ná jín tēe cáscuáha jín ní jee na quénehen te tachí ún, te tu ní cúu sáha de, achí de.

41 Te ni cahān yá jín de jijnáhan de:

Ñayuu yóhyo niñni ni cácuu ró, chí tu cácandíje ró jee cuu nduváha i. ¿Nasaa ga quiví condee rí jín ró jee cuándeýí ní rí jín ró? Cuáquihin sēhe ró na quiji i, achí yá.

42 Te níni véji i nuū yā, te ni cotúú i ni sáha tachí, te ni jehni yíhí i. Te Jesús ni cahān xeēn yā nuū tachí un, te ni nasávāha ya sūchí un, te ni nacuāha ya i nuū tatá i.

43 Te ndivii ñayuu nahān ní canaa ni i cájito i jeē yóhyo jéhnú jniñu sáha Yāā Dios.

*Jeē ni cáhān tucu ya jeē cúu yā
(Mt. 17.22-23; Mr. 9.30-32)*

Te níni cánaa ni i cájito i tācā jniñu ni sáha Jesús, te ni cahān yā jín tēe cáscuáha jín yā:

44 Chuhun vāha ni rō jnūhun cáhān rī yāhá, te ma nāā ni rō, chí ruhū. Yāā ní nduu tēe, nastúu i ruhū quīvī ri ndaha tāca tēe xeēn, achí yā.

45 Te tu ní cájecūhun ni de jnūhun cáhān yā, chí tu ní cúu cuiti jecūhun ni de. Te ni cayūhú de cajnūhún de ya siquī jnūhun ni cahān yā.

*Ndé ñáyuu cúu jeē cújéhu ga
(Mt. 18.1-5; Mr. 9.33-37)*

46 Yūcuán na te tēe cáscuáha jín yā ni caquejé de cácahān de siquī núu ndé ñin de cújéhu ga.

47 Te Jesús ni jini yā jeē súcuan cájeni ni de. Te ni jni ya ndaha ñin sūchí lúli, te ni jeni ya i xiin ya.

48 Te ni cahān yā jín de:

Na-ni ñayuu núu jeē siquī ruhū jetáhu i sūchí lúli yáha, te ruhū jetáhu i. Te ñayuu jetáhu ruhū, suni jétáhu i Yāā ní tají ruhū vēji rí. Te ñayuu núu ga mēñu ró, máá i cújéhu ga, achí yā.

*Ñayuu tu cáhān siquī yā, ñin i jín yā
(Mr. 9.38-40)*

49 Yūcuán na te ni cahān Juan:

Maestro, ni cajito ná ñin tēe jeē jín síhví ní quénehen de tachí ini ñayuu. Te ni cajesi na jéē sáha de, chí tu jica de jín yó, achí de.

50 Te ni cahān Jesús jín de:

Ma cási ró jeē sáha de, chí tēe tu cáhān siquī yó, ñin de jín yó, achí yā.

Jeē ni cáhān yā nuū Jacobo jín Juan

51 Te ni cuyajni quivī jeē quínuhun yā andiví, te ni tee téyí ni yā jeē quihín yā ñuu Jerusalén.

52 Te ni tají yā sava tēe yósnúu de jín jnūhun jeē jín yā. Te cuango de ñin ñuu Samaria návāha nducú de nuū ndóo ya.

53 Te ñayuu Samaria un tu ní cájēhe i vehe ndóo ya, chí ni cajini i jeē ndé Jerusalén quihín yā.

54 Te Jacobo jín Juan, tēe cáscuáha jín yā, ni cajini de jeē súcuan cúu, te ni cacahān de jín yā:

¿A cúni ní jéē ndácu yó jniñu quiji ñuhūn nde andiví, nájñuhun ni sáha Elías, návāha naa ñayuu yáha? Achí de.

55 Yūcuán na te ni ndió cóto Jesús nuū de, te ni cahān yā nuū de:

Tu cájini ró na nuū vēji jnūhun cácahān ró.

56 Chí ruhū, Yāā ní nduu tēe, tú vēji ri jeē snāā rī ñayuu, chí sa suhva jeē jnáma rī ñayuu, achí yā.

Yūcuán na te cuahān yā jín de inga ñuu.

*Siquī ñáyuu jeē cácuni i condiquín i ya
(Mt. 8.19-22)*

57 Te níni jica ya ichi jín de, te ni cahān ñin tēe jín yā:

Condiquín na níhín quihín yó ndé-ni cúu-ni nuū quihín ni, achí de.

58 Te ni cahān Jesús jín de:

Tāca ñucuii, iyó yáú cava cáñuhun tí. Te suni saa, iyó tācā tí. Te ruhū, Yāā ní nduu tēe, tú nuū cusú rí, achí yā.

59 Te ni cahān yā jín inga de:

Condiquín ruhū na quihín yó.

Te máá tēe un ní cahān de:

Condetu ní ndé na quíchindūji ná tátá na xihna gā. Yūcuán na te condiquín na níhín, achí de.

60 Te ni cahān Jesús jín de:

Stóo tāca ndíyí na chindūji jnāhan ndíyí, chí ndíyí cácuu ñayuu tu cácandíje. Te róhó, cuahān te nacani ró jnūhun ndese ndácu Yāā Dios jniñu, achí yā.

61 Yūcuán na te suni ni cahān inga de:

Cúni na condiquín na níhín, te cuāha ní jnūhun jeē xihna gā quicahān na jín ñayuu cáyūcú vehe ná, achí de.

62 Te ni cahān Jesús jín de:

Núu na-ni tēe quejé de condiquín de ruhū, te núu máni jeē nácani cuíhyá ní de siquī tāca jéē ní stóo de, núu súcuan te cúu de nájñuhun ñin tēe jitu jín yátá, te jicó cóto de ichi vehe de. Te ma cuajniñu de condiquín de ruhū siquī jniñu ndácu Yāā Dios, achí yā.

Jeē ní tají yā unī xico uxí de

10

1 Te ná ni cuu tācā jniñu yáha, te máá Jítoho yó ni nacāji ya unī xico uxí gā de. Te ni tají yā ndihuū ndihuū de jeē cósnúu de nuū yā, quingoo de tācā ñuu jín tāca lugar nuū je yajni quihín máá yā.

2 Te ni cahān yā jín de:

Ñayuu yáha cácuu i nájñuhun trigo jeē tah-ndé, te ndāā jeē cuehé cúu, te tēe cahnde chí jecu-ni de cúu. Núu súcuan te cacān tahú ró nuū máá Jítoho ró Yāā Dios jeē na tají yā cuehé tēe na quingoo de cahnde de trigo, cúu jeē nacani de jnūhun ya nuū ñayuu.

3 Te cuango jijnáhan ró, te na cástūhun rí nuū ró jeē tají rí rohó quingoo ró nájñuhun londe mēñu yíhí.

4 Te ma cóndiso ró ñuu, ni yijni xūhún, ni ndijēn. Te ichi ma cucuéé ró ndajñuhun ró jín ni ñin.

5 Te na-ni vehe núu ni quiví ró, te xihna gā cahān ró: Na quiji jnūhun ndeyí jnūhun sñ ni nuū rohó, ñayuu vehe yáha, achí ró.

⁶ Te núu vehe yúcuau iyó ñáyuu vāha, te jñūhun ndeyí ní cahān rō jñū siquī i. Te núu tuú, te jñūhun ndeyí ní cahān rō ma jñū siquī i.

⁷ Te suni vehe yúcuau coyūcu ró, te caji rō coho rō jēē cuāha ñayuu nuū rō. Chi siquī jñiñu jēē nácani ró jñūhun nuū ñáyuu, te cánuú coto i rōhó. Ma quéndōo ró tijni vehe, chí ñin-ni vehe.

⁸ Te na-ni ñuu núu ni quivícoo ró, te núu cuatáhu i rōhó, te caji rō tāca jēē cuāha i nuū rō.

⁹ Te nasávāha ró ñáyuu cácuñū ñuu yūcuán. Te cachi rō nuū i: Je ni cuyajni Yaa Dios jēē ndacu ya jñiñu nuū rō, achí rō.

¹⁰ Te na-ni ñuu núu ni quivícoo ró, te núu tu ní cájetáhu i rōhó, te quendacoo ró ini calle yūcuán, te cahān rō:

¹¹ Nde ticachā ñuu rō yāha jēē ni jñū jehē rī, na nácóyo ri jēē cúu seña jēē iyó cuéchi rō jēē tu ní cájetáhu ró. Te na cónahán ró jēē Yaa Dios je ni cuyajni ya jēē ndacu ya jñiñu nuū rō nuú.

¹² Te cahán rī jñū ró jēē quiví juicio te xeēn gā coo castigo siquī ñuu casáha súcuau vēsú siquī ñuu Sodoma nuū ní casáha ndasí ñáyuu cuéchi.

Jeē ní cuxeēn yā nuū sava ñuu nñhi ní
(Mt. 11.20-24)

¹³ 'Nacā jēē xeēn ndoho ró, ñáyuu ñuu Corazín. Te nacā jēē xeēn ndoho ró, ñáyuu ñuu Betsaida. Chi núu ini ñuu Tiro jñū ñuu Sidón ní sáha ri jñiñu jéhu jēē ní sáha ri ini ñuu maá ró, te yachí nacani ní ñayuu ñuu un jēē stóo i cuéchi i núu. Te sáha i seña jēē steén jēē nácani ní i siquī cuéchi i, chí cuhan i sahma jnúú te cuhan i yaā xini i núu.

¹⁴ Núu súcuau te quiví coo juicio te xeēn gā coo castigo siquī rō jñiñáhan ró vēsú jēē ní iyó siquī ñuu Tiro jñū ñuu Sidón.

¹⁵ Te rōhó ñáyuu ñuu Capernaum, ¿á cájeni ní rō jēē cujéhu ró nájñūhun ñin jēē cáca cahān ichi ándiví? Tuú chí sa nanuu ró ndé lugar nuū cáyūcu ánuá ndiyi. Achí yá.

¹⁶ Te ní cahān gā yā jñū tēē jēē tají yá quingoo:

Ñayuu chusóhó jñūhun cahān rō, nuū maá rí chusóhó i. Te ñayuu squéhichí rohó, suni ruhū squéhichí i. Te ñayuu squéhichí ruhū, suni squéhichí i Yaa ní tají rúhū vēji ri. Achí yá.

Jeē ní ndecoo tēē ní tají yá

¹⁷ Te ní ndecoo uní xico uxí tēē un, cácusñi ní de te cácahān de jñū Jesús:

Nde tachí cájetáhu núu na jēē jñū síhví ní, chí quéndacoo ini ñayuu, achí de.

¹⁸ Te ní cahān yā jñū de:

Súcuau cúu, chí ní jito rí jēē nájñūhun ñin taja ní ñingava Satanás ichi ándiví, chí ní quende rí ndihi poder un.

¹⁹ Te vijna te je ní jēhe ri fuerza nuū rō jēē cueñū rō nájñūhun siquī tāca cóo jñū tísuhma, te cundeyí ró siquī tāca fuerza maá jēē jito uhū yohó, te tú na vé sáha ga jñū rō.

²⁰ Te ma cúsiñi ní rō maá-ni jēē cájetáhu táchi nuū rō, chí sa cusñi gā ní rō jēē yosó síhví ró nde ándiví. Achí yá.

Jeē ní cusñi ní Jesús

(Mt. 11.25-27; 13.16-17)

²¹ Te suni hora un ní cusñi ní Jesús, ní sáha Espiritu Santo, te ní cahān yá:

Na cúthau na nuū ní Tátá, Jítoho ándiví jñū ñáyiví. Chi ní jesí ní táca jñūhun ndíchí ní, jēē ma cúni ñayuu ndíchí jñū ñayuu túhva cuenta ñáyiví yáha. Te ní steén ní nuū ñayuu cácuu nájñūhun súchi lúli. Chí súcuau ní nujnahan ní ní Tátá, achí yá.

²² Te ní cahān gā yá:

Ndivi ní jēhe Tátá rí nuū rí. Te tu cájini ñayuu ndé ñin cúu ruhū, Séhe Yaa Dios, chí maá-ni Tátá rí cúu jēē jini yá ruhū. Ní tu cájini ñayuu ndese Yaa cúu maá Tátá, chí maá-ni Séhe cúu jēē jini. Te iyó ñayuu jēē cuni maá Séhe steén yá nuú i ndese Yaa cúu Tátá yá, te maá i suni cuni i. Achí yá.

²³ Yúcuán na te jito ya nuú tēē cáscuáha ún, te ní cahān yá jñū maá-ni de:

Yohyo ndetú ñayuu cájito jñiñu jéhu jēē cájito maá ró.

²⁴ Chí cahān rí jñū ró jēē cuehē tēē ní canacani jñūhun Yaa Dios, jñū táca rey, ní cacuni de coto de jēē cájito maá ró, te tu ní cájito de. Te suni ní cacuni de cuni sōho de jēē cájini sōho maá ró, te tu ní cájini de. Achí yá.

Jñūhun ñin tēē vāha ní nación Samaria

²⁵ Yúcuán na te ñin tēē steén tutu ley Yaa Dios, ní ndocuiñi de ní jecahān de jñū Jesús, chí cúni de coto ndee de ya. Te ní cajñuhún de:

Maestro, ¿na vé sáha ná te nihñi tahu ná cotecu na ní cáni ándiví? áchí de.

²⁶ Te ní cahān yá jñū de:

¿Ndese yosó nuú tutu ley? ¿Ndese cáhān cáhu ró? Achí yá.

²⁷ Te maá tēē un ní cahān de jēē cahān nuú tutu:

Coo maní ndasí ró jñū maá Jítoho ró Yaa Dios, nde jñāá ndasí ró sáha ró ndihi jēē cúsiñi ní yá, nde jñū ini jñū ánuá ró, jñū ní fuerza ró, jñū ní jēē níjñūni ró. Te cundáhu ní rō jñāhan ró nájñūhun cundáhu ní rō maá ró, achí. Achí de.

²⁸ Te ní cahān yá jñū de:

Vāha ní cahān rō. Te núu cuu sáha ró súcuau te nihñi tahu ró cotecu ró ní cáni, áchí yá.

²⁹ Te maá tēē un cúni de jēē quéndōo ndaá de nuú yá jñū jñūhun ní cajñuhún de, te ní cahān de:

¿Te ndé ñayuu cácuu jñāhan ná? áchí de.

³⁰ Te ni cahān Jesús:

Īn tēe ni quenda de űuu Jerusalén, ni cuun de cuahān de űuu Jericó. Te ichi un ní canecoo ñacuihna núu de, te ni caquende ndihi ndajniñu de, te nde sahma ñuhun de. Te ni cacani ndevāha ún de jeē jé yajni cuu de núu. Te ni castóo ún de, te cuangoo.

³¹ Te ni cuu jeē ichi un yāha ĩn sutū quihĩn de, te ni jito de nuū tēe ún, te ni síyo-ni de cuahān de.

³² Te suni súcuan ĩn tēe grupo levita jeē cájejniñu ini templo, vēji de ichi ún, te ni jito de nuū tēe ún, te ni yāha jicá-ni de cuahān de.

³³ Te ĩn tēe nación Samaria, suni vēji de ichi ún, te nuū ní jito de, te ni cundáhú ni de tēe ún.

³⁴ Te ni quee de nde nuū catú tēe ún, te ni chuhun de aceite jĩn vino nuū ni túji tēe ún, te ni jĩhni de sahma nuū. Te ni soó de tēe un síquĩ quiti de, te cuahān de jĩn tēe un ndé ĩn mesón, te ni condito de.

³⁵ Te inga quivĩ ún, hora jeē quihĩn de, te ni tava de uũ xũhun cáa, ni jēhe de nuū tēe chíi mesón. Te ni cahān de: Coto ní tēe yāha, te nuū cacĩn gā ni xũhun ní jĩn de, te nuū nándicó ná te nachunaa ná nuū ní, áchí de.

³⁶ Núu súcuan ¿te ndese jéni ní rō? Jeē ndinúni tēe ún, ¿ndé ĩn de ni chihu cuenta jeē jnāhan de cúu tēe ni canecoo ñacuihna núu? Achí yá jĩn tēe stéén tutu ley.

³⁷ Te ni cahān de:

Tēe jeē ní cundáhú ni tēe ni tujĩ, vēsú tēe űuu jicá cúu de.

Yũcuán na te ni cahān Jesús jĩn de:

Cuáhán núu súcuan, te suni súcuan cundáhú ní rō táca ñáyuu, achí yá.

Jeē ni ĩne ya vehe Marta jĩn María

³⁸ Yũcuán na te ni quihĩn tucu ya ichi cuahān yā, te ni jinũ yā ĩn űuu lulí. Te ĩn ñahan nání Marta, ni cana ña ya ni jehēn yā vehe ña.

³⁹ Te Marta, iyó ĩn cuhũ ña nání María. Te María ni cucóo ña nuū jehé Jesús, jĩni nahĩn ña jnũhun cáhán yā.

⁴⁰ Te Marta chí cúnéé máá ña jĩn cuéhē jniñu sáha ña. Te ni quee ña nuū yā, te ni cahān ña:

¿A tu sáha ní cuenta jeē cuhũ na ní stóo máñuhún ña sáña núu jniñu? Te cahān ni jĩn ña na chĩndéé ñahán ña sáña, áchí ña.

⁴¹ Te ni cahān Jesús jĩn ña:

Marta, yóhoyo ndíhvĩ ní rō jĩn cuéhē jniñu, te yóhoyo stóho ró máá ró jĩn.

⁴² Te iyó ĩn-ni jniñu cánuú. Te María chí ni nacáji ña jniñu cánuú, suu jeē ndíhvĩ ní ña síquĩ jnũhun Yaa Dios, te ma quénehen yó ña nuū ún. Achí yá.

*Jeē ni stéén yā ndese cacān tahú yó
(Mt. 6.9-15; 7.7-11)*

11

¹ Te ĩn quivĩ ĩne Jesús ĩn lugar jicán tahú yā. Te nuū ní ndihi ní jicān tahú yā, te ĩn tēe scuáha jĩn yá, ni cahān de:

Stéén ní núu ná ndese cacān tahú na jijnáhan ná, nájnũhun ní steén Juan nuū tēe ní cascuáha jĩn de, áchí de.

² Te ni cahān yā jĩn de:

Jeē cacān tahú rō, te suhva cahān rō:

Tátá maá ná jijnáhan ná jéē ndeé ní andivĩ, níni na cóo yĩñuhún ná nuū ní, chí Yaa ĩi cúu ní.

Te ñuhun ni na jéē yachĩ quiji quivĩ ndacu ní jniñu ní ñáyivĩ yāha.

Te na cóo táca jniñu nújnahan ni ní, nájnũhun iyó ini andivĩ, súcuan na cóo ini ñáyivĩ.

³ Staā jeē cátecu na táca quivĩ, cuāha ní núu ná vijna.

⁴ Te cone cáhnu ni ní núu táca cuéchi cásaña ná núu ní,

nájnũhun cáhine cáhnu ni na núu ñáyuu casáha cuéchi nuū ná.

Te ma cuāha ní jnũhun jeē coto ndee jexeén sáña,

chí sa suhva jnama ní sáña nuū táca jéē neé. Achí rō jijnáhan ró. Achí yá.

⁵ Te ni cahān gā ya:

Núu ndé ĩn róho iyó ĩn amigo rō, te núu quihĩn rō vehe de sava űuu te cahān rō jijn de: Amigo, cuāha núu unĩ staā nuū rĩ.

⁶ Chí ĩn amigo rĩ jeē jicá de viaje, ni quee de vehe rĩ, te tu na vé névāha rĩ jeē cuāha rĩ caji de. Achí rō.

⁷ Te núu cahān tēe ĩne ini vehe: Ma stáhān rō ruhũ, chí ndíhyu yehyĩ rĩ, te je cáquixĩ séhe rĩ jĩn rĩ, te ma cúu ndonda rĩ jeē cuāha rĩ nuū rō, achí de.

⁸ Te cáhán rĩ jĩn ró, vēsú ma ndóna de cuāha de nuū rō síquĩ jeē cúu de amigo rō, te jeē yóhoyo stáhān rō de, jeē yúcuun ndonda de cuāha de ndihi jeē jini ñuhún ró.

⁹ Núu súcuan te cáhán rĩ jĩn ró jijnáhan ró jeē suni súcuan cacān tahú rō nuū Yaa Dios, te cuāha ya nuū rō. Te nducú ró táca jéē váha iyó núu yā, te nihĩn ró sáha ya. Te cacān tahú rō nde nihĩn rō, nájnũhun sáha ñáyuu cahān yehyĩ ndé nune quivĩ i.

¹⁰ Chí táca ñáyuu jicán, cuāha ya nuū i. Te ñáyuu nducú, suni nihĩn i. Te ñáyuu cahán, nune ya ichi nihĩn i jeē cuní i.

¹¹ ¿Te ndé ĩn ró cúu tátá, te núu séhe ró jicán i staā nuū rō, te á cuāha ró ĩn yuũ nuū i? Te núu jicán i chácá, ¿te á cuāha ró ĩn coó nuū i?

¹² Chí núu jicán i ĩn ndivĩ, ¿te á cuāha ró ĩn tisuhma nuū i? Tú cuiti súcuan.

¹³ Núu súcuan te máá ró jijnáhan ró, vēsú ñáyuu iyó cuéchi cácuu ró, te cájini rō cuāha ró jéé váha nuū séhe ró. Te nagá ni cuu máá Tátá rō andivĩ jéē ma cuāha ya Espiritu Santo nuū ñáyuu jicán nuū yā. Achí yá.

Jeē ní cacahān de jeē jejniñu ya fuerza Satanás

(Mt. 12.22-30; Mr. 3.19-27)

¹⁴Te quénehen ya iin tachī ini iin tēe, jeē ni cuñihín de ni sáha. Te nuū ní quenda tachī, te ni nacahān tēe ni cuñihín un. Te ni canaa ni ñayuu cájito i.

¹⁵Te sava ñayuu ún chi ni cacahān i:

Jiín fuerza Satanás jeē cujéhu nuū tachī, quénehen tēe yáha táca táchi ini ñayuu, achí i.

¹⁶Te sava ga i cúní i coto ndee i ya, te ni cajicān i jeē sáha ya jeē coo iin seña ichi ándiví.

¹⁷Te máa yá jini yá jeē súcuan cájeni ni i, te ni cahān yá:

Táca nación jeē sasún máa te cuajnáhan máa, núu súcuan te snáa jeē iyó váha máa. Te núu ñayuu iin vehe sasún máa te cuajnáhan máa, núu súcuan te ma cúu ga coyūcu cáhnu.

¹⁸Te suni súcuan Satanás, núu sásún máa jiín jnáhan tachī, ¿te ndese cuñi nihin jeē ndacu jniñu núu súcuan? Chi cacahān rō jeē jiín fuerza Satanás quénehen ri tachī ini ñayuu.

¹⁹Te núu súcuan cúu núu, te ñayuu cascuáha jiín máa rō jijnáhan rō, ¿na jiín fuerza cáquenehen máa i tachī, cájeni ni rō? Núu súcuan te máa i jijnáhan i cachí jeē ní castívi ndasí rō ni cacahān rō jeē cáquenehen ri tachī jiín fuerza Satanás.

²⁰Te tuú chi sa suhva jiín fuerza Yaa Dios cúu jeē quénehen ri tachī. Núu súcuan te je ndéé Yaa Dios méñhu rō jéé ndacu ya jniñu.

²¹Te núu iin tēe ndacuí, ndíto de vehe de jiín nújii de, núu súcuan te tú ni iin ndajniñu de ndoñuhún.

²²Te núu quiji inga tēe ndacuí gā, te cundeyí jiín tēe ún, núu súcuan te quende nujii de jeē ndíto de vehe de, te sáha de ndese cúní máa de jiín ndajniñu jeē quénde de. Te nájnūhun tēe ndacuí gā ún, súcuan cúu máa rí nuū Satanás.

²³Te ñayuu tu iyó mání jiín rí, núu súcuan te jito uhū i ruhū. Te ñayuu tu nástútú jiín rí, núu súcuan te sa jéte núu i ñayuu vējicoo nuū rí.

Tachī jeē nastútú jnáhan ndávi ini ñayuu
(Mt. 12.43-45)

²⁴Núu ni quenda iin tachī ini iin tēe tu cándije, te jica cuu nuū ñūhun téhé, ndúcú núu ndétátú, te tu nínhi, yūcuán na te jeni ni maá: Na quínuhun rí vehe nuū ní quenda rí.

²⁵Te núu ni ndee tucu, te jito jeē tēe tu cándije un cúu de nájnūhun iin vehe jeē ní ndundoo.

²⁶Yūcuán na te jéquihin uxá gā tachī xeén gā vēsú máa. Te quívicoo ini tēe un jéé cóyūcu yūcuán. Núu súcuan te xeén gā ndoho tēe un jéé sándihí vēsú jeē xihna ñūhún. Achí yá.

Yōhoyo ndetū ñayuu cájini nahín jnūhun ya

²⁷Te níní cáhán yá jnūhun yáha, te iin ñahan íne méñhu ñayuu cuehē un, ní cahān jee ña jiín yá:

Yōhoyo ndetū ñahan ní scácu nihin te ni scáxin ña nihin, achí ña.

²⁸Te ni cahān yá:

Sa suhva yōhoyo ga ndetū ñayuu cájini nahín jnūhun Yaa Dios te cásquicu í, achí yá.

Jeē ní cajicān ñayuu tu cácandije iin jniñu jéhu

(Mt. 12.38-42; Mr. 8.12)

²⁹Te ni cataca cuehē gā ñayuu nuū Jesús, te ni quejéé yá cahán yá:

Ñayuu iyó vijna máni cásáha néé i. Te cájicān i iin jniñu jéhu jeē steén núu Yaa ní tají Yaa Dios cúu rí. Te tú na inga jniñu jéhu steén rí nuū i, chi máa-ni jniñu jéhu nájnūhun ni cuu jiín Jonás, tēe ni nacani jnūhun Yaa Dios nde jenahán.

³⁰Chi nájnūhun ni cajini ñayuu ñuu Nínive jeē ní cuu iin jniñu jéhu jiín Jonás, suni súcuan cuni ñayuu tiempo yáha jeē coo iin jniñu jéhu jiín ruhū, Yaa ní nduu tēe, jeē quijnáhan jiín modo ni ndoho Jonás.

³¹Te reina jeē ní cujéhu nación ichi sur, natecu ña jiín ñayuu tiempo yáha, quiví juicio jeē sándaá yá cuéchi, te cahān ña cuéchi siquí i. Chi nde jicá téyí ní quiji ña ni jini nahín ña jnūhun ndíchí ní cahān rey Salomón. Te vijna chi cújéhu ga ruhū, Yaa íne yáhá vēsú Salomón, te tu cácandije rō ruhū.

³²Te táca ñayuu ñuu Nínive nuū ní nacani Jonás jnūhun, natecu i jiín ñayuu tiempo yáha, quiví juicio jeē sándaá yá cuéchi, te cahān i cuéchi siquí ñayuu yáha. Chi máa i ni canacani ni i ni castóo i cuéchi i quiví ní nacani Jonás jnūhun nuū i. Te vijna chi cújéhu ga ruhū, Yaa íne yáhá vēsú Jonás, te tu cácandije rō ruhū.

Jnūhun yátá síqui lámpara
(Mt. 5.15; 6.22-23)

³³Núu nástūn ñayuu iin lámpara, tu chísahí i, ni tu chūne i chíji iin cajón. Chi sa suhva jeni i nuū sucún, návaha cundijin nuū ñayuu quívicoo vehe.

³⁴Te tinūu rō cúu nájnūhun lámpara nuū yiqui cúñu rō. Núu súcuan te núu tinūu rō iyó ndijin, te nái-ni yiqui cúñu rō cúndijin. Te núu tinūu rō tu iyó ndijin, te nái-ni yiqui cúñu rō iyó nee.

³⁵Te suni súcuan cúu ánuá rō, te coto rō jéé ma cáni néé ni rō, návaha tú coo nee ini anuá rō.

³⁶Chi núu máni jniñu váha cásáha rō, te tú na jniñu néé cásáha rō, núu súcuan te luz yá cúndijin váha ini anuá rō, nájnūhun iin lámpara jeé sáha jeé cúndijin váha. Achí yá.

Jeē ní cahān yá jeē iyó cuéchi de jijnáhan de
(Mt. 23.1-36; Mr. 12.38-40; Lc. 20.45-47)

³⁷ Te nuū ní cuu ni cahān yā, te ʔn tēe grupo fariseo ni cana de ya jeē caji yā staaʔ vehe de. Te ni quivī ya, te ni cucōo ya mesa jeē caji yā staaʔ.

³⁸ Te tēe fariseo un nāā ni de jito de jeē tu squīcu ya costumbre jeē nandahá yá te caji yā staaʔ.

³⁹ Te ni cahān maá Jítoho yō jín de:

Róhó tēe fariseo jijnáhan ró, chí nájnuhun jeē cánacate ró yátá vaso jín yátá cohó cúu jeē nándahá ró. Te ichi ini ró chí nūhun máni máá jnúhun cuihná jín jnúhun néé.

⁴⁰ Tēe cánéé cácuu ró. ¿A tu caji ni ró jeē Yaa ni sáha yiqui cúnu ró, suni ni sáha ya anuá ró?

⁴¹ Te jeē cájēhe ró caridad nuū ñayuu ndahú, na sáha ró siquī jeē cundáhu ndije ni ró i. Te súcuu te coo ndaaʔ anuá ró.

⁴² 'Nacā xeēn ndoho róhó tēe fariseo, chí cásquīcu ró táca jniñu lúli, te tu cásquīcu ró jniñu cánuú. Chí cásáha ró úxi uxī nuhnī tamīnu jín ruda jín táca yucū, te cásocō ró ʔn ʔn siquī táca úxi un núu Yaa Dios. Te tu cásáha cuiñi ró jniñu ndaaʔ, ni tu cáhiyo manī ró jín Yaa Dios. Táca jēe yáha cánuú sáha ró núu, te suni ma stóo ró jēe socó ró táca yucū ún.

⁴³ 'Nacā xeēn ndoho róhó tēe fariseo, chí máni cánujnahān ni ró cucōo ró núu silla yñúhún gá ini vehe i sinagoga. Te cánujnahān ni ró jeē cahān yñúhún ñayuu jín ró nuū calle.

⁴⁴ 'Te nacā xeēn ndoho róhó tēe cástéén tutu ley Yaa Dios, jín róhó tēe fariseo, chí tēe stáhu-ni cácuu ró. Chí cándaa ró nájnuhun yaū ndīyī jeē tú ndijin, chí cásnāá ró anuá ñayuu, te tu jín i jeē súcuu cásáha ró jín i. Achí yá jín de.

⁴⁵ Yūcuán na te ni cahān ʔn tēe stéén tutu ley:

Maestro, jeē ni cahān ni táca jnúhun yáha, suni nde siquī maá ná jijnáhan ná ní cahān ni, áchí de jín yá.

⁴⁶ Te ni cahān yā:

Suni nacā xeēn ndoho róhó tēe cástéén tutu ley. Chí suni cástéén ró táca ley ni catava maá ró jeē yí sáha, te tu cácuudeyí ñayuu squīcu i. Te maá ró, chí ni ʔn xini ndáha ró tu cáscánda ró jēe squīcu ró.

⁴⁷ 'Nacā xeēn ndoho ró jijnáhan ró. Chí cásáha ró vehe siquī nuū yíndūji ndīyī jín ró, tēe ni canacani jnúhun Yaa Dios nde jenahán. Te suni táca jín ró ni cajehni de tēe ún.

⁴⁸ Te jeē casáha ró súcuu cúu jeē cáquijnáhan ró jín de siquī jniñu ní casáha de. Chí máa de ni cajehni tēe ún, te maá ró cásáha ró vehe ndīyī ún.

⁴⁹ 'Jeē yúcuu nde jenahán ní cahān Yaa Dios ʔn jnúhun ndíchí: Tají rí táca tēe nacani jnúhun rí jín táca tēe apóstol quingoo de nuū

i. Te sava de cahni i, te sava ga de coto xeēn i, áchí Yaa Dios.

⁵⁰ Te súcuu te siquī ñayuu tiempo yáha na cóndee cuēchi jeē ní cajehni jín i tēe ni canacani jnúhun Yaa Dios, nde quivī ni jécōo ñayiví te nde vijna,

⁵¹ nde Abel xihna gā te nde Zacarías, tēe ni cajehni de ini templo sava mēhñu cuarto i jín altar. Núu súcuu te cáhān rí jín ró jeē siquī ñayuu tiempo yáha cōndee táca cuēchi ún.

⁵² 'Nacā xeēn ndoho róhó jēe castéén tutu ley, chí cajesi ró ichi jeē jécūhun ni ñayuu jnúhun ya. Chí ni máá ró tu cácuu ró jecūhun ni ró, ni tu cájēhe ró jnúhun jeē jecūhun ni ñayuu cácuu. Achí yá.

⁵³ Te jeē ni cáhān yā jnúhun yáha, te tēe cástéén tutu ley Yaa Dios jín tēe fariseo, yōhyo ni caquitī ni de nuū yā. Te ni caquejé de cástíchí de ya siquī cuehē gā jnúhun.

⁵⁴ Chí yuhu-ni cánducú de núu sanaa te stívi yá jnúhun cahān yā, návāha nihñ de cuēchi siquī yā.

Siquī jnúhun stáhu cácahān tēe fariseo

12

¹ Te níní súcuu cúu, te ni cacutútú cuēhē mil ñayuu, chí nde cájēñu i siquī jehé jnāhan i. Te xihna gā ni quejé yá cahān yā jín tēe cácuáha jín yá:

Coto má candíje ró levadura tēe grupo fariseo, chí suu cúu jnúhun stáhu cácahān de. Chí jíté núu nuū ñayuu, nájnuhun ndécava levadura nuū ñújen pan.

² Chí jnúhun stáhu un má quéndōo sáhi cuiñi, chí ndihni natūu ndijin, te cuni ñayuu.

³ Núu súcuu te suni máá ró, táca jnúhun ni cacahān ró jeē tu ní jín ñayuu, ʔn quivī te cuni váha i. Te táca jnúhun ni cacahān sáhi ró jeē ndihyú yehyí, ʔn quivī te cahān jee ñayuu yátá táca vehe.

Jeē ní cachi yā ndé ʔn cúu jeē yūhu yó (Mt. 10.28-31)

⁴ 'Cáhān rí jín ró jijnáhan ró, amigo: Ma yūhu ró coto ró ñayuu cahni yiqui cúnu ró, chí núu ni cajehni i róhó, te tuá na vé cúu sáha ga i.

⁵ Te na cáchi rí nuū ró ndé ʔn yūhu ró coto ró: Jeē yūhu ró coto ró cúu Yaa Dios jeē núu sáha ya jeē cúu ró, te iyó poder yá chune ya rohó infierno. Suu máá yá cúu jeē yūhu ró jeē ma stívi ró nuū yā.

⁶ 'Te táca saa chí tú yahu ndéé tī, chí nde uhūn tī jeē uú centavo lúli. Te ni ʔn tī tu nāā ni Yaa Dios jeē tu ndíto ya.

⁷ Te nagā ni cuu róhó jijnáhan ró, chí nde ndihni ixi xini ró je ni cahu ya. Núu súcuu te ma yūhu ró jijnáhan ró, chí cánuú ndasí gá ró nuū yā vesú cuehē táca saa.

Ñayuu jejnúhún Jesucristo nuū inga ñayuu (Mt. 10.32-33; 12.32; 10.19-20)

⁸ Te cáhán rí jín ró, táca ñayuu jeē cuajnúhún rúhú nuū inga ñayuu, suni súcuan ruhú, Yaā ní nduu tée, cuajnúhún rí i nuū táca ndajehé Yaā Dios.

⁹ Te táca ñayuu jeē ma cuajnúhún rúhú nuū inga ñayuu, suni súcuan ma cuajnúhún rí i nuū táca ndajehé Yaā Dios.

¹⁰ Te núu ndé ñayuu cahān i siquī ruhú, Yaā ní nduu tée, cone cáhnu ni Yaā Dios nuū i. Te núu ndé ñayuu cahān ndevāha i siquī Espiritu Santo, ma cone cáhnu ni Yaā Dios nuū i.

¹¹ Te núu cuandeca i röhó táca vehe i sinagoga nuū tée cásandaā cuēchi, jín núu tée cácuu tohó, te ma nácani ndasí ni rō ndese stío cuñí rō jnúhun nuū de.

¹² Chi máá hora un te Espiritu Santo steén yā nuū rō ndese cahān rō. Achí yá.

Siquī jeē ma tēnuū yō ndajniñu cúca

¹³ Yūcuán na te iin tēe ine nuū ñayuu cuehē un ní cahān de jín Jesús:

Maestro, cahān ní jín ñani na jée na táhú sáva de tahū na jín de, áchí de.

¹⁴ Te ní cahān yā jín de:

¿Ndé iin ní jeni ruhú jeē ndacu ri jniñu tahú sáva tahū rō? Achí yá.

¹⁵ Te ní cahān gā yá:

Condito ró máá ró jijnáhan ró jée ma ndíyo ní rō xúhun jín táca gá. Chi vēsú cuehē ndasí ndajniñu névāha iin tēe, te nasūu jée yúcuan sáha jeē quēndōo ndetū de, áchí yá.

¹⁶ Yūcuán na te ní cahān yā iin jnúhun yátá jín i:

Ni iyo iin tēe cúca jeē névāha ñuhun jeē cúu vāha ndasí itu.

¹⁷ Te tēe cúca un ní nacani ni de: ¿Ndese sáha rí? Chi tuá ndé cahun niñi ri. Achí de.

¹⁸ Te ní jeni ní de: Suhva na sáha ri. Na cánu rí táca yácá rí, te nasáha ri jeē náhnu ga. Te yūcuán chuvāha ndiñi ri niñi ri jín táca ndajniñu ri.

¹⁹ Yūcuán na te cahān rí jín ánuá rí: Vijna te cuehē teyí névāha yó jée canda cuehē cuiyá. Na ndétātu yó te caji yō coho yó, te na cúsiñi ni yō, ní jeni ní de.

²⁰ Te ní cahān Yaā Dios jín de: Tēe cánée cúu ró. Chi jecuáá vijna cuu rō, te táca jée ní chuvāha ró, ¿ndé tēe cuu? Achí Yaā Dios jín de.

²¹ Te súcuan ndoho táca tēe jeē sacúca de máá de, te tu ndúcu de jee quēndōo ndetū de sáha Yaā Dios. Achí yá.

Yaā Dios ndíto ya yohó (Mt. 6.25-34)

²² Te ní cahān yā jín tēe cáscuáha jín yá:

Núu súcuan te cáhán rí jín ró: Ma nácani ndasí ní rō siquī jeē cótecu rō, núu ndese cahun rō, ní siquī sahma, núu ndese cahun rō.

²³ Chi Yaā Dios ní sáha ya jeē tēcu rō jín yiqui cúhu rō, te nagā ní cuu jeē ma cuáha ya jeē cáji rō jín jée cúhun rō.

²⁴ Condēhe ró ndese cátecu quiti cácuu nájnhun cálu, chi tu cátaji tí, ní tu cánastrú tí jeē chūvāha tí, ní tú yacá tí. Te vēsú súcuan te máá Yaā Dios scáji yā tí. Te cánuu ndasí gá ró jijnáhan ró vēsú táca quiti ún.

²⁵ ¿Te ndé iin ró, á cuu scuēhnu ró máá ró sava metro gā, vēsú na nácani ndasí ní rō?

²⁶ Te núu ma cúu sáha ró vēsú iin jniñu lúli súcuan, ¿te najehē cáncani ndasí ní rō siquī jeē cáji rō jín jée cahun rō?

²⁷ Condēhe jijnáhan ró ndese jée ita táca yúcú. Chi tu sájniñu, ní tu táu. Te cáhán rí jín ró jeē ní rey Salomón, quiví ní ñuhun de sahma váha ndasí, tu ní ñuhun de sahma lúu súcuan nájnhun ita ún.

²⁸ Te núu súcuan jéhe Yaā Dios sahma lúu ita un jée jée vijna te sajnē cayū nuū ñuhún, te nagā ní cuu röhó jijnáhan ró jée ma sáha ya jeē niñiñ rō sahma. ¿Te naun tu cácandije niñiñ ró jée ndíto ya rohó?

²⁹ Núu súcuan te ma nácani cuihyá ní rō ndese caji rō ndese coho ró.

³⁰ Chi táca ñayuu ñayivi jée tu cácandije cúu jeē máni siquī jeē yáha cándihví ní i. Te máá ró jijnáhan ró, chí iyó Táta ró andiví, te jini yá jeē cájini ñuhún ró táca jée yáha.

³¹ Te sa suhva cánuu gá jeē cóndihví ní rō siquī jniñu jeē ndácu Yaā Dios nuū rō. Yūcuán na te sáha ya jeē niñiñ ró táca jée yáha.

Ndese coo cúca yó nde andiví (Mt. 6.19-21)

³² Ma yúhu ró jijnáhan ró chí cácuu ró nájnhun lanchi ri. Chi vēsú jecu-ni cácuu ró, te máá Táta ró cúsiñi ní yá jeē quívicoo ró ñuu nuū ndácu ya jniñu.

³³ Xico ró jeē cánevāha ró, te cuāha ró xúhun un núu ñayuu ndahú. Te súcuan caya ró tahū rō nde andiví núu ma cútúhú, nájnhun jeē chūvāha ró xúhun ini yijni. Chi nde andiví te ma náā jeē váha coneváha ró. Chi yúcuan má quíví ñacuñhá, ní ma cúu stívi tiquixin.

³⁴ Chi nde nuū niñiñ ró tahū váha ró, yúcuan cúu nuū cóndihví ní rō siquī.

Jeē na cóo túhva yó jee ndée yá

³⁵ Coo túhva ró jijnáhan ró jée ndée Jitoho ró, te coo ró nájnhun mozo jeē nastáin i lámpara i.

³⁶ Chi iyó túhva i te cándetu i jeē ndée patrón i jeē cuahán de vico nándāha. Chi núu ní ndee de te cahān de, te nune-ni i yéhyí jijnáhan i.

³⁷ Te yóhoyo ndetū mozo un núu ní ndee patrón i, te cuni de jeē cándito i. Jendaá cahán rí jín ró jeē máá patrón sátúhva de máá de, te scúcōo de i mesa te caní de cohó i.

³⁸ Te vēsú cucuée de ndee de nde sava ñuú, chí jéé nēé gā, te núu cuni de jeē súcuan cándito mozo de, te yōhyo ndetū i jínáhan i núu súcuan.

³⁹ Te na jécūhun ni rō jeē cahán jñūhun yátá yáha: Tēe chíí vehe, núu ni jini de na hora quiji ñacuihná, te condito de, te ma cuáha de jñūhun jeē sacuihná vehe de núu.

⁴⁰ Te suni súcuan coo tūhva rō jínáhan rō, chí núu tuú, te máá hora jeē tú na vé cájeni ni rō, te ndee ruhū, Yaā ní nduu tēe. Achí yá jín de.

Jñūhun mozo vāha jín mozo tu squícu
(Mt. 24.45-51)

⁴¹ Yūcuán na te Pedro ni cajñūhún de ya:

¿A jín máa-ni ná jínáhan ná cahán ni jñūhun yátá yáha, chí suni cahán ni jín ndihi ga ñayuu? achí de.

⁴² Te ni cahán máá Jítoho yō:

Cahán rī jín ndé-ni ñayuu cúu nájnūhun mozo jeē ndito xinī te squícu vāha. Te máá patrón sáha de jeē condiso jñiñu i coto i ñayuu vehe de, návaha scáji i máá hora.

⁴³ Te yōhyo ndetū mozo un jéé núu ni ndee patrón, te cuni de jeē súcuan squícu vāha i.

⁴⁴ Jendaá cahán rī jín rō jeē cani de mozo un jéé cóto i ndihi ndajñiñu de.

⁴⁵ Te núu jéni ni i jeé ma ndiji yachī patrón i, te quejéé i cani i tēe jín ñahan cácuu jnáhan mozo i, te caji i coho i te najini i,

⁴⁶ núu súcuan te ndee-ni patrón quiví jeé tu ndétu i jín hora jeé tú na vé jéni ni i. Te stóho xeēn de i, te squívi de i ndoho i jín ñayuu tu cásquícu.

⁴⁷ Te mozo jeé jini i ndese núnjahan ni patrón i, te núu tu sátūhva i ni tu squícu i jeé cuni de, ndoho xeēn i jín yujnu xii.

⁴⁸ Te mozo jeé tu jini i ndese núnjahan ni patrón i, te núu sáha i jñiñu jeé cani de i, núu súcuan te cūhva-ni cani de i. Chí ñayuu jeé steén cuehē yá nuū i, suni cuehē nandacān yá nuū i. Te ñayuu jeé cuehē gā jñiñu téjñiñu ya i, suni cuehē gā nandacān yá nuū i.

Jeé siquí Jesús te cusñ iní ñayuu
(Mt. 10.34-36)

⁴⁹ Ni quee rī jeé nájnūhun jeé scuiquín rī ñūhūn iní ñayiví, te suu cúu jeé cusñ iní ñayuu jeé siquí ruhū. Te cúní rī jeé yachī coo súcuan, návaha quivicoo ñayuu ndaha Yaā Dios.

⁵⁰ Te iyó ñin jñūndóho cánuú ndoho ri, te cúcuíhva ndasí ni rī chí nde jñū ndoho ri, te ndusñ ni rī.

⁵¹ ¿A cájeni ni rō jeé véji ri jeé cóyūcu mání ñayuu ñayiví? Cahán rī jín rō jeé tuú, chí sa suhva jeé cusñ iní ñayuu jeé siquí ruhū.

⁵² Chí nde vijna te quejéé jéé uhūn ñayuu ñin vehe, sásñ máá jínáhan, uní siquí uú, te uú siquí uní.

⁵³ Chí tátá cusñ iní jín séhe yí, te séhe yí jín tátá, te náná jín séhe síhí, te séhe síhí jín

náná, te náná chíso jín séhe jēnū, te séhe jēnu jín náná chíso. Achí yá.

Jeé ni cáhān yā siquí seña andiví
(Mt. 16.1-4; Mr. 8.11-13)

⁵⁴ Te suni ni cahán yá jín ñayuu cuehē ún: Núu cájito rō jeé náne vicō ichi núu cáne niāndii, te cácahān rō jeé cuun saū, te súcuan cúu.

⁵⁵ Te núu quée tachí véji ichi sur te cácahān rō jeé nandii, te súcuan cúu.

⁵⁶ Tēe stáhú-ni cácuu rō. Chí cájecūhun ni rō ndese stéén seña andiví jín iní ñayiví, ¿te naun tu cájecūhun ni rō ndé ñin cúu ruhū jeé sáha rī táca jñiñu jēnu tiempo yáha?

Jeé cóndihvī ni yō jeé ma cóndee cuēchi siquí yō
(Mt. 5.25-26)

⁵⁷ ¿Te najehē tu cánacani ni máá rō ndé ñin cúu jñiñu ndaā sáha rō?

⁵⁸ Te núu ñin ñayuu quihīn i jín rō nuū tohó jeé cacán i cuēchi siquí rō, núu súcuan te níni cuáhān rō jín i ichi te condihvī ni rō sándaā rō jín i. Chí núu tuú, te squívi i rōhó núu juez, te juez síaha de rōhó núu policía, te policía chune de rōhó vecā.

⁵⁹ Te jendaá cahán rī jín rō jeé ma quénda cuiti rō yūcuán chí nde chunaa rō ndihi cuiti xūhun cájcān de. Te suni súcuan condihvī ni rō cahán ndahú rō jín Yaā Dios, návaha ma ndácunehen ya cuēchi siquí rō. Achí yá jín de.

Jeé cánuú nacani ni yō jeé stóo yō cuēchi yō

13

¹ Te ñin quiví yúcan ní quecoo jecu tēe, ní canacani de jñūhun nuū yá ndese ni candoho jecu tēe Galilea. Chí ná cájehni de quiti jeé socó de, te ni quecoo mozo Pilato ni cajehni tēe ún.

² Te ni cahán Jesús:

Tēe Galilea un, ¿á cájeni ni rō jeé súcuan ni candoho de siquí jeé xeēn gā ni iyo cuēchi de vēsú táca gā ñayuu Galilea?

³ Cahán rī jín rō jeé tuú. Te rōhó jínáhan rō suni jahnū ndetū rō núu tú nacani ni rō jeé stóo rō cuéchi rō.

⁴ Te xahūn uní tēe jeé ní cotúú torre Siloé siquí de, te ni cajihí de, ¿á cájeni ni rō jeé ní casáha de cuēchi xeēn gā vēsú táca gā ñayuu ñuu Jerusalén?

⁵ Cahán rī jín rō jeé tuú. Te máá rō jijnáhan rō, suni jahnū ndetū rō núu tú nacani ni rō jeé stóo rō cuéchi rō.

Jñūhun yátá nundēhe higo

⁶ Yūcuán na te ni cahán yá jñūhun yátá yáha jéé steén yá ndese cácuu ñayuu tu squícu jñūhun Yaā Dios:

Cácuu i nájnūhun ñin nundēhe higo jeé ñin nuū ñūhun ñin tēe. Te ni jécondéhé de núu ñin ndehé xiní, te tú na vé ñin.

7 Te ni cahān de jín mozo sájniñu nuū ñūhun de: Vjna te je iyó úní cuiyā jeē quiji ri nducú rí ndehē xiní yújnu higo yáha, te tú na vé cūun xiní. Núu súcuan te cahnde rō, chí maá jeē sajnēñu nuū ñūhun, áchí de.

8 Te ni cahān mozo un jín de: Stóo ní na cuiñi ñin na cuiyā, te na nástáyā ná jéhē te chuhun ná jéhen.

9 Te na cóndēhe yó núu tú cuun ndehē inga cuiyā. Te núu tuú, te tahndē, achí mozo. Achí yá.

Jeē ní nasávāha ya ñin ñahan quiví ndétátú

10 Te ñin quiví ndétátú te steén Jesús jñūhun ini vehe ñi sinagoga.

11 Te iyó ñin ñahan jeē ní cuu xahūn uní cuiyā huhú ña. Chí ñin tachí ní sáha jeē jica tñí ña, te tuá cúu cuiñi caca jnuu ña.

12 Te ni jito Jesús nuū ña, te ni cana ya ña, te ni cahān yā jín ña:

Vjna te nduvāha ní jeē huhú ni.

13 Te ni soó yá ndaha ya siquí ña, te ni nucuiñí jnuu-ni ña, te ni nacuatáhú ña nuū Yaā Dios.

14 Te tēe cújéñu ini vehe ñi sinagoga, ni quiñi ní de nuū Jesús jeē ní nasávāha ya ñahan un quiví ndétátú. Te ni cahān de jín ñayuu:

Ñū quiví iyó jeē sájniñu yó, te táca quiví ún quijicoo ró nduvāha ró. Te quiví ndétátú chí ma cúu, áchí de.

15 Yūcuán na te ni cahān maá Jítóho yō jín de:

Tēe stáhú-ni cácuu ró. Quiví ndétátú ¿á tu cándají ró stiquí rō burro ró jeē quiścóho ró tí ndute?

16 Te ñahan yáha jeē cúu ña ñin sēhe yucūn Abraham, chí nájñūhun ní conuhñí ña xahūn uní cuiyā ní sáha Satanás. ¿Te á tu iyó váha jeē nájñūhun nandají rí ña nuū cuehyí ndóho ña quiví ndétátú? Achí yá.

17 Te jeē ní cahān yā súcuan, te táca tēe cájito uhú de ya, ni cacucanu de. Te ndíhi ñayuu ún chí ní cacusiñí ní i jito i táca jñiñu jéñu sáha ya.

Jñūhun yátá siquí ndiquin mostaza

(Mt. 13.31-32; Mr. 4.30-32)

18 Te ni cahān yā:

Nase cáhán rí ñin jñūhun yátá návāha cuni rō ndese ndúcuehē ñayuu ndácu Yaā Dios jñiñu nuū.

19 Ndúcuehē i nájñūhun jéñu ñin ndiquin mostaza jeē jéquin ñin tēe nuū ñūhun de, te ndúu nájñūhun ñin yujnu. Te cúu cáhnu, te táca saa chí casáha tí tacá tí chíji ndaha ún. Achí yá.

Jñūhun yátá siquí levadura

(Mt. 13.33)

20 Te ni cahān tucu ya:

Súcuan cúu jeē ndúcuehē ñayuu jeē ndácu Yaā Dios jñiñu nuū:

21 Cúu nájñūhun levadura jeē ní quiñin ñin ñahan, te ní saca ña jín úní kilo harina, te ní ndaa ndíhi ñujen ní sáha. Achí yá.

Siquí jeē quiví yó yéhyí túú

(Mt. 7.13-14, 21-23)

22 Te jica Jesús jeē cuahán yā ichi nuū Jerusalén, te yáha ya táca ñuu náhnu jín ñuu lulí, te steén yā jñūhun.

23 Te ñin ñayuu ní cajñūhún i ya:

¿A jecu-ni ñayuu jnama Yaā Dios, chí naún? Achí i.

Te ni cahān yā jín i:

24 Condiñví ní rō quivícoo ró ndaha Yaā Dios. Chí cúu nájñūhun ñin yéhyí túú. Te cáhán rí jín ró jeē ñin quiví te cuehē ñayuu nducú i quivícoo i, te ma cúu ga.

25 Te quiví ún te sáha rí nájñūhun ñin tēe chíi vehe jeē ndocuñí de te nacasi de yéhyí. Te ichi yátá véhe cuiñi ró jñnáhan ró, te scáján ró yéhyí, te cahān ró: Nune ní yéhyí na quivícoo ná. Te cahān de jín ró: ¿Ndé nuū véjicoo ró? Chí tu jíní rí rohó, achí de.

26 Yūcuán na te quejéé ró cahān ró jín de: Ni cayeji ná ní cajñi ná jín ní, te ini calle ñuu na ní steén ní jñūhun, achí rō.

27 Te cahān maá de: Cáhán rí jín ró jeē tu jíní rí rohó ndé chí véjicoo ró. Cuijiyo quingoo ró, chí ñayuu casáha jñiñu néé cácuu ró. Achí de.

28 Te quivícoo ró núu ndahyú rō, te nacayihí yuhu ró jeē ndoho xeén rō. Te coto ró núu Abraham jín Isaac jín Jacob jín ndíhi tēe ní canacani jñūhun Yaā Dios, cáyucú de ñuu nuū ndácu ya jñiñu. Te rohó, vésú cácuu ró yúcūn de, te quivícoo ró núu ndoho rō.

29 Te cuehē ñayuu, vésú tu cácuu i yucūn de, te quijicoo i ichi núu cáne niándii jín ichi núu quēe niándii, ichi norte jín ichi sur. Te cucóo i mesa caji i staa ñuu nuū ndácu Yaā Dios jñiñu.

30 Te sava ñayuu jeē vjna cácuu i sandíhí, ichi yúcuán nduu i nuū. Te sava ñayuu jeē vjna cácuu i nuū, ichi yúcuán nduu i sandíhí. Achí yá.

Jeē ní cuculhyá ní yā siquí ñayuu ñuu Jerusalén

(Mt. 23.37-39)

31 Te maá quiví un ní quecoo jecu tēe fariseo, te ní cacahān de jín yá:

Cuijiyo ní quiñin ní inga lado, chí cúni Herodes cahni de níhín, áchí de.

32 Te ni cahān yā:

Cuángoo te castūhun ró nuū tēe mañoso un jeē ná tu jinū quiví cuu rí, chí vjna jín sájnē quenehen rí tachí ini ñayuu, te nasávāha rí ñayuu cácuu. Te isá te jinu jñiñu sáha rí, achí rō.

33 Chí cánuú jeē cáca rí quiñin rí vjna jín sájnē jín isá, te jinū rí Jerusalén. Chí tēe canacani jñūhun Yaā Dios, tu cájñi de inga

lado, chi máa-ni ini ñuu Jerusalén cájehni i de. Achí yá.

³⁴Róhó ñuu Jerusalén, jéhni rō tēe cánacani jñuhun Yaā Dios, te jéhe ró yúu xiní tēe tájí Yaā Dios vējicoo nuū rō. Te cuehē jínu ni cuni rí nastútú rí sēhe rō, nájñuhun ndují jēe nastútú tí sēhe ti chíji ndijēn tí, te tu ní cúní rō.

³⁵Núu súcuan te vjna te stóo uun na ri rohó jín sēhe rō. Te cáhán rí jín rō jēe ndé vjna te ma cóto cuiti gā rō nuū rí, chí nde quíji quiví jēe cahán sēhe rō: Yōhoyo vāha Yaā cúu Yaā vēndiji jín jniñu máá Jítoho yō Yaā Dios, achí i. Achí yá.

Jeē ní nasávāha ya ñin tēe cūhú cuehyí cuiñi

14

¹Te ñin quiví ndétātu ní jehēn yā vehe ñin tēe fariseo cujéhnu, ni jecaji yā staā jín de. Te táca gā tēe fariseo cájito yuhu de ya núu stíví yá.

²Te yúcuan íne ñin tēe cūhú de cuehyí cuiñi, índichí de nuū yá.

³Te ni cajñuhun yá tēe cástéén tutu ley Yaā Dios jín táca tēe fariseo:

¿A íyó ley jēe nasávāha ri ñayuu cácuñu quiví ndétātu, chí tuú? áchí yá.

⁴Te máá de tu ní cácahān cuiti de. Te ni jñi yá tēe cūhú un, te ni nasávāha ya de, te ni cahān yá jēe na nūhun de vehe de.

⁵Te ni cahān yá jín de jijnáhan de:

¿Nde ñin róhó núu burro ró chí stíquī rō ningava tí ini pozo, te á tu yachí natava rō tí vēsú quiví ndétātu cúu, chí naún? Achí yá.

⁶Te tu ní cúu stío cuiñí de ni ñin jñuhun nuū yá jēe súcuan ni cahān yá.

Jñuhun síquī ñayuu jéngoo vico

⁷Te ní jito Jesús jēe tēe ni cataca tá, cáncāji de silla yññuhún gá nuū mesa cucōo de. Te ni cahān yá jñuhun yáha jín de:

⁸Núu ñin tēe cana de jēe quihín rō ñin vico nándāha, te ma cucōo ró lugar nuū yññuhún gá. Chí núu súcuan te sanaa te je ni cana de ñin tēe cujéhnu ga vēsú rohó.

⁹Te quee tēe ni cana róhó, te cahān de jín rō: Ndongda, te na cucōo tēe yáha jín. Yūcuán na te cucuan rō jēe quihín rō cucōo ró ndé sandihí na.

¹⁰Chi sa suhva núu ni cana ñin tēe róhó, te cucōo ró ndé lugar sandihí na. Te núu quee tēe ni cana róhó, te cahān de jín rō: Amigo, nehen cucōo ró ñin lugar nuū yññuhún gá, achí de. Yūcuán na te ñayuu cáyūcu mesa jín rō coto i jēe sajéhnu de róhó.

¹¹Súcuan ni cahān rí jñuhun yáha nāvāha cuni rō jēe táca ñayuu jēe sajéhnu i máá i, nuu i sáha Yaā Dios. Te ñayuu jēe snúu i máá i, ndujéhnu i sáha ya. Achí yá.

¹²Te suni ni cahān yá jín tēe ni cana ya yéji yá staā:

Núu sáha ró ñin vico cúsámá chí jēe cuxíni, te ma cána ró ñayuu cácuu amigo rō, jín ñani rō, jín jnāhan rō, jín ñayuu cucá. Chí núu súcuan te suni máá i nacana i róhó, te súcuan nanihín rō jēe ni jéhe rō.

¹³Chi sa suhva núu sáha ró vico, te cana ró ñayuu ndahú, ñayuu cuhndú, ñayuu chacuá, jín ñayuu cuaá.

¹⁴Te súcuan te quendōo ndetú rō, chí ma cúu nacuáha i nuū rō. Te nihín rō tahū rō quiví nátecu ñayuu ndaā, achí yá.

Jñuhun yátá stíquī vico cuxíni

¹⁵Te ñin tēe yéji staā jín yá, ni jini de jñuhun yáha, te ni cahān de jín yá:

Yōhoyo ndetú ñayuu jēe cáji staā nde ñuu nuū ndácu Yaā Dios jniñu, áchí de.

¹⁶Yūcuán na te ni cahān Jesús ñin jñuhun yátá jēe steén yá jēe cána Yaā Dios ñayuu quivícoo i ñuu nuū ndácu ya jniñu:

Ñin tēe ni sáha de ñin vico cáhu cuxíni, te ni tájí de mozo ni cana cuehē ñayuu.

¹⁷Te máá quiví cuxíni, te ni tájí de mozo de cuacana ñayuu jēe quíjicoo caji staā: Nehen ní jijnáhan ní, chí je iyó túhva ndihi, áchí mozo.

¹⁸Te ndihi i ni cacahān i jēe na cóne cáhu ni de chí ma quíngoo i. Ñin tēe ni cahān de: Sáa ní jeen ri ñin ñuhun te cánuú quícondēhe rí, te na cóne cáhu ni de chí ma jēe rí. Achí de.

¹⁹Te inga de ni cahān: Ni jeen ri uhūn yunta stíquī, te quihín rí coto ndee rí tí, te na cóne cáhu ni de nuū rí chí ma jēe rí, achí de.

²⁰Te inga de ni cahān de: Sáa ní quijnáhan rí, te jēe yúcuan ma cúu jēe rí, achí de.

²¹Te cuanuhun mozo un, te ni castühún de nuū patrón de ndese ni cacahān ñayuu. Yūcuán na te ni quítí ni patrón, te ni cahān de jín mozo de: Yachí quihín rō táca calle nāhnu jín calle lulí, te cana ró ñayuu ndahú, ñayuu cuhndú, ñayuu chacuá, jín ñayuu cuaá, na quíjicoo i vico, áchí de.

²²Te ni jehēn mozo, te ni ndee de, te ni cahān de jín patrón de: Je ni sáha ná jēe ni cahān ní, te cúmani gā ñayuu te chitú vehe ní, achí de.

²³Te ni cahān tucu patrón: Quihín tucu ró táca calle jín ichí, te cana fuerza ró ñayuu na quíjicoo i, nāvāha chitú vehe ri.

²⁴Chi cáhán rí jín rō jēe ni ñin tēe ni cana ri xñha ñuhún, ma cuáha cuiti rí jñuhun jēe cuxíni de vehe ri, achí de. Achí yá.

Jñuhun jēe cánuú nacani vāha ni yō te condiquín yō Cristo

²⁵Te cuehē ndasi ñayuu cándiquín i Jesús cuangoo i jín yá, te ni ndió cóto ya nuū i, te ni cahān yá jín i:

²⁶Núu na-ni ñayuu cuni condiquín ruhū, te núu maní gā i jín tátá i, náná i, ñasihí i, sēhe i, ñani i, cuáha i, vēsú jín ruhū, ma cúu cuu i ñayuu scuáha jín rí. Te núu ndihví gā ni i

siquí jeē cóo vāha máá i vēsú jeē cóndiquín i ruhū, te suni ma cóu tucu.

²⁷ Te na-ni ñayuu núu tu jéhe i jñūhun ndoho i jñūndóho vēsú nde cuu i jeē siquí jeē cóndiquín i ruhū, te ma cóu cuu i ñayuu scuáha jíin rí.

²⁸ Chi núu ndé iin ró cúní rō sáha ró iin vehe cáhnu, zá tu cánuú jéē xíhna gā cucōo ró te tava ró cuenta núu canda xūhun jéē sínu ró?

²⁹ Chi núu tuú, te núu je ni jequin rō cimiento, te tu cānda xūhun ró sínu ró, yūcuán na te tāca ñayuu sácata i coto i róhó.

³⁰ Te cahān i: Tēe yāha ní quejéé de sáha de vehe, te tu ní cānda de sínu de, achi i.

³¹ Te suni sūcuan núu iin rey quihín de cuajnáhan de jíin inga rey jeē véji siquí de, zá tu cánuú jéē xíhna gā cucōo de te nacani ni de núu canda uxí mil soldado jeē cuajnáhan de jíin inga rey jeē véji siquí de jíin ócō mil soldado?

³² Chi núu tú canda de, te níni jíca gá véji inga rey, te tají de tēe cándiso jñíñu, cajñūhūn de na vé cuní inga rey jeē cuáha de nuū, te jecuíñi-ni.

³³ Te máá rō jíjnáhan ró, suni sūcuan cánuú jéē xíhna gā nacani ni rō cahnde ni rō stóo ró ndíhi jeē névāha ró, chi núu tuú te ma cóu cuu ró ñayuu scuáha jíin rí.

Jñūhun yátá siquí ññ
(Mt. 5.13; Mr. 9.50)

³⁴ Te ñayuu cácandíje cácuu i nájñūhun ññ. Vāha iyó ññ, te núu ññ ún na náa jeē uhvuá, ¿te ndese nduu uhvuá tucu?

³⁵ Tuá cuajñíñu cuiñi, ni jeē chūhun ñayuu nuū ítu, ni jeē ndúu jēhen, chi máá cate i-ni i. Tāca róhó jéē jíni sōho, na chúsóhó ró. Achi yá.

Jñūhun yátá siquí lanchi ní sana
(Mt. 18.10-14)

15

¹ Te tāca tēe cástútú xūhun renta jíin táca gá tēe cásáha cuēchi, ni quecoo de nuū Jesús jeē cuní sōho de jñūhun cáhān yā.

² Te tāca tēe grupo fariseo jíin tēe cástéén tutu ley Yaa Dios, ni cacahān de siquí yā:

Tēe yāha jétáhu de tāca tēe cásáha cuēchi te véji de jíin, áchí de.

³ Te ni cahān yā jñūhun yátá yāha jíin de:

⁴ ¿Ndé iin ró núu névāha ró iin ciento lanchi, te núu scuíta ró iin tí, te á tu stóo ró cúñ xico xahūn cuñ gā tí yucu, te quinan-ducú ró quiti ní sana ún ndé nanihín rō tí?

⁵ Te núu ni nanihín rō tí, te coso sūcun ró tí, te cusñ ni rō.

⁶ Te núu ni ndee rō vehe ró, te nastútú ró táca amigo ró jíin ñayuu yúcu yajni jíin ró, te cahān ró jíin i: Na cúsñ ni yō, chi ni nanihín rí lanchi rí jeē ní sana. Achi rō.

⁷ Te cáhān rí jíin ró jeē suni sūcuan cóu nde andiví. Chi cúsñ gá ni yā jíin iin ñayuu iyó cuēchi núu nacani ni i jeē stóo i cuēchi i, vēsú jíin cúñ xico xahūn cuñ ñayuu iyó ndáa jeē tuá jíni ñūhūn nacani ni i.

Jñūhun yátá siquí ñahan ní scuíta xūhūn

⁸ Te núu iin ñahan névāha ña uxí peso cāa, te núu scuíta ña iin, zá tu nastññ ña lámpara te nastáa ña vehe, te nanducú yúcuñ ña nde nanihín ña?

⁹ Te núu ni nanihín ña, te nastútú ña tāca amiga ña jíin ñayuu yúcu yajni jíin ña, te cahān ña jíin i: Na cúsñ ni yō, chi ni nanihín rí xūhun jéē ní scuíta rí. Achi ña.

¹⁰ Te cáhān rí jíin ró jeē suni sūcuan cúsñ ni táca ndajéhe Yaa Dios siquí iin ñayuu iyó cuēchi núu nacani ni i jeē stóo i cuēchi i. Achi yá.

Jñūhun yátá siquí sūchi ní jēhēn jecó

¹¹ Te ni cahān gā yā:

Iin tēe ni iyo uū sēhe yí de.

¹² Te tēe suchí gá ni cahān i jíin tátá i: Tátá, tahú sáva ni ndajñíñu ní, te cuáha ní sava cuu tahú ná, áchí i. Te ni tahú sáva de tahú ndindúú i.

¹³ Te ni cuu jecu-ni quiví, te tēe suchí gá un ní stútú ndíhi i ndajñíñu i. Te ni quenda i cuahān i iin ñuu jíca. Te yūcuan ní snáa i tahú i, chi ni jexín cáhá i.

¹⁴ Te ná ní ndíhi ni jexín i, te ni quee iin jnamā xeén ini ñuu ún, te ni quejéé cúmaní jeē cáji i.

¹⁵ Yūcuán na te cuanducú jñíñu i nuū iin tēe ñuu ún. Te ni tají de i cuahān i rancho de jeē cóto i quini de.

¹⁶ Te cúní i caji i vēsú soō ndúchi jeē cáyeji quini ún, návāha ndutú chíji i. Te ni iin ñayuu tú na vé jéhe nuū i.

¹⁷ Yūcuán na te ni quejéé i nácani ni i: Tāca mozo casájñíñu vehe tátá rí, iyó cuēhe staa cáyeji i. Te ruhū chí jíi rí sóco yáhá.

¹⁸ Na quínuhun rí nuū tátá rí, te cahān rí jíin de: Tátá, ni sáha ná cuēchi nuū Yaa Dios jíin núu máa ní.

¹⁹ Vijna te nasūu gá tēe vāha cóu ná jéé cónani ná sēhe ní. Te cuáha ní jñūhun cuu ná nájñūhun iin mozo ni, achi rí.

²⁰ Yūcuán na te ni naquihin i ichi cuanuhun i vehe tátá i.

Te níni jíca gá véji i, te ni jito tátá i nuū i, te ni cundáhu ní de i. Te jínu de cuajnáhan de i, te ni nundee de sucún i, te ni techúhú de i.

²¹ Yūcuán na te ni cahān i jíin de: Tátá, ni sáha ná cuēchi nuū Yaa Dios jíin núu máa ní. Vijna te nasūu gá tēe vāha cóu ná jéé cónani ná sēhe ní. Achi i.

²² Te máa tátá i chí sa ni cahān de jíin táca mozo de: Cuáquihin sahma vāha ga te chuhun ró i. Te chuhun ró iin xehyu ndaha i, te chíhi ró ndíjēn jēhé i.

²³ Te quiquihin ró becerro xéhen, te cahni ró t̄i na cáji yō, chí sáha yó vico.

²⁴ Chí sēhe yí rí yáha, nájnūhun je ni jihí i, te ni natecu i. Chí tu ní jíní rí ndé chí ní jéhēn i, te ni ndee i, áchí de. Te ni caquejéé de cása de vico.

²⁵ "Te sūchi jévāha, íne i nde rancho, te vëndiji i, te ni cuyajni i yatā véhe. Te ni jini i jeé cúu yaa te cájita jéhé ñayuu.

²⁶ Te ni cana i ñn mozo, te ni cajnūhún i na vé cúu jeé cúu.

²⁷ Te ni cachi mozo un núu i: Ni ndee ñani ró, te tátá ró ni jehni de becerro xéhen, chí ni ndee váha i nuū de, áchí mozo.

²⁸ Yūcuán na te ni quít̄i ni sūchi jévāha, te tu ní cúní i ndívi i. Te ni quenda tátá i, te ni cahān ndahú de jín i jeé na ndívi i.

²⁹ Te ni cahān i jín tátá i: Níní sáha ná jniñu ndácu ní, te tu cúnihni cuiñi ní na núu ní. Te tu jéhe ní vésú ñn lítú núu ná, jeé sáha ná vico caji na jín táca amigo na.

³⁰ Te ni ndee sēhe ní yáha jeé ni jéx̄in cáhá i xūhun ní jín táca ñahan. Te ni jehni ní becerro xéhen caji i, áchí i jín tátá i.

³¹ Yūcuán na te ni cahān de jín i: Séhē, róhó chí níní ndéé ró jín rí, te ndihí jeé néváha rí chí suni cuenta maá ró cúu.

³² Te vijna chí íyó váha jeé sáha yó vico te cus̄i ní yō. Chí ñani ró yáhá, nájnūhun ni jihí i, te ni natecu i. Chí tu ní jíní yō ndé chí ní jéhēn i, te ni ndee i, áchí de. Achí yá.

Jñuhun yatá siquí mozo jeé ni stáhú de patrón de

16

¹ Te suni ni cahān Jesús jín tēe cáscuáha jín yá:

ñn tēe cúcá ní íyo ñn mozo de jeé ndiso jniñu nuū táca gá mozo. Te ni cacahān jín patrón un jéé mozo un snáa cáhá ndajniñu de.

² Te ni cana de mozo un, te ni cahān de jín: ¿Na jñuhun cúu yáha jéé nihín rí siquí ró? Nacuáha cuenta jniñu ndiso ró, chí ma cóndiso jniñu ga ró nuū mozo rí. Achí de.

³ Yūcuán na te jéni ní maá de: ¿Ndesé sáha rí vijna? Chí patrón rí quenehen de jniñu rí. Te tú ndacuí rí jeé cáte rí ñuhun, te jeé cacán rí caridad chí cúcanu rí.

⁴ Núu súcuan te jíní rí ñn jeé sáha rí, návāha ñayuu cájeen nuū patrón rí, cuáha i vehe condee rí núu na quée quiví jeé quenehen de jniñu rí.

⁵ Te ni cana de ná ñn ná ñn tēe jeé cátaū nuū patrón de. Te ni cajnūhún de ñn: ¿Nasaa táú ró nuū patrón rí?

⁶ Te ni cahān tēe ún: ñn ciento barril aceite, achí de. Te ni cahān mozo un: Yáhá na cuáha rí lista ró, te cucōo yachí ró, te na sáha ró inga lista jeé uú xico uxí na, achí de.

⁷ Yūcuán na te ni cajnūhún de inga tēe: Te róhó, ¿nasaa táú ró? Te tēe un ní cahān de: ñn ciento cajón trigo, achí de. Te ni cahān de jín tēe ún: Yáhá na cuáha rí lista ró, te na sáha ró inga lista jeé cuún xico na, achí de.

⁸ Yūcuán na te patrón ni cahān de: Nacā jeé ndichí ní sáha tēe cúnéé un, achí de. Te cahān rí jín ró jeé ñayuu ñayívi yáha, ndichí gá casáha i jeé quendōo váha i nuū jñahan i, vésú ñayuu cácandje nuū Yáa Dios.

⁹ "Núu súcuan te cahān rí jín ró jeé ndichí gá na sáha ró vésú jeé ni sáha mozo ndichí un. Chí ini ñayívi yáha nuū yáhi cuéchi, na sáha ró jniñu váha jín xūhun ró, cuáha ró núu ñayuu ndahú, návāha vésú núu ni ndihí xūhun ró ñayívi yáha, te quivicoo ró andívi núu coo vehe ró ní cáni.

¹⁰ "Tēe jeé squícu váha jín ñn jniñu lúlí-ni, suni squícu váha de jín jniñu cáhnu. Te tēe jeé stáhú jín ñn jniñu lúlí-ni, suni stáhú de jín jniñu cáhnu.

¹¹ Núu súcuan te núu tu squícu váha ró jín xūhun jeé iyó ñayívi yáha nuū yáhi cuéchi, te ma cuáha ya jeé váha cuu ró ní cáni andívi.

¹² Te núu tu squícu váha ró jín ndajniñu jeé ni jéhe núu ya nuū ró ñayívi yáha, te ma cuáha ya tahú cuu ró ní cáni.

¹³ "Ni ñn mozo ma cúu cuajniñu de nuū uū patrón. Chí quít̄i ní de nuū ñn te coo maní de jín inga, chí squícu váha de nuū ñn te sájéé ní de nuū inga. Te suni súcuan ma cúu cuajniñu ró núu Yáa Dios te núu máni siquí xūhun ndíhvi ní ró, achí yá.

¹⁴ Te tēe fariseo ní casacatá de nuū yá jeé ní cajini de táca jñuhun cahān yá, chí tēe cútóo xūhun cácuu de.

¹⁵ Te ni cahān yá jín de:

Maá ró casáha ró jéé tēe ndaā cácuu ró núu ñayuu. Te Yáa Dios chí jini yá ndese cáa ini anuá ró. Chí jniñu cájeni ní ñayuu jeé jniñu jéhu cúu, te nuū Yáa Dios chí jniñu néé cúu.

Siquí ley Yáa Dios jín siquí jeé ndácu ya jniñu

¹⁶ "Nde ná tu quiji Juan tēe scuándute, te ni íyo ley jeé ni jéhe Yáa Dios nuū Moisés, te suni ni castéén táca tēe cácanani jñuhun ya. Yūcuán na te ná ni quiji Juan, te ni quejéé jíté núu jñuhun váha ndese ndácu Yáa Dios jniñu. Te táca ñayuu nducú ndéyí i quivicoo i ndaha ya.

¹⁷ "Te yá gá cúu jeé ná ñn letra nuū tútu ley yá vésú jeé ná andívi jín ñayívi, chí squícu ndihí jñuhun cahān.

Siquí jeé ma stóo jñahan tēe jín ñahan (Mt. 19.1-12; Mr. 10.1-12)

¹⁸ "Núu ñn tēe stóo de ñasihí de te quijnáhan de jín inga ñahan, núu súcuan te cásiquí ndéé de ña. Te núu ñn tēe condeca de ñahan ní ndusñn, suni cásiquí ndéé de ña, achí yá.

Jñuhun tēe cúcá jín Lázaro

19 Te ni cahān gā yā:

Ni Iyo in tēe cūcá, ní ñuhun de sahma lúu váha ndasí. Te ndiqiwiñi ni Iyo váha ndasí jéé ní yeji de.

20 Te suni ni Iyo in tēe ndáhú, nání de Lázaro, néne de yéhyí tēe cūcá un, te ní cāhnu de in ndíhyi.

21 Te máni cúní de jeē ndutú chíji de jíin stáa cuéchi jeē stívi tēe cūcá un. Te quécoco ina te cānyuu ti nuū ndíhyi de.

22 Te ni jihí tēe ndáhú un, te tēcá ndajéhé Yaā Dios cuangoo ya jíin ánuá de nde andiví nuū néne Abraham. Te suni ni jihí tēe cūcá un, te ni quindūji de.

23 Te tēe cūcá un xeēn ndóho de íne de lugar nuū cāyūcu ndíyi tu ní cándije. Te ni ndacoto de, te nde jíca ní jito de nuū Abraham, te néne Lázaro jíin de.

24 Yūcuán na te ni cana cóho de: Tátā Abraham, cundáhú ni ní sáña, te tají ní Lázaro, na quíchundaji de xiní ndáha de nuū ndúte, te quiji de stáji de yáá ná. Chi xeēn ndóho ná nuū yáñuhūn yáhá. Achí de.

25 Te ni cahān Abraham jíin de: Séhē, nucūhun ní rō jeē ní nihīn rō ndíhi jeē váha ná ní cotecu rō, te Lázaro chí sa suhva jñundóho ní nihīn de. Te vijna je ni ndusí ní de yáhá, te róhó chí ndóho rō jíña.

26 Te suni íyó in jeē cunú téyí, íne mēhñu yó jíināhan yó. Te ñayuu cáhīn yáhá, vésú cácu ni yáha i jeē i nuū rō, te ma cúu. Te ni ma cúu yáha máá rō quijicoo rō yáha. Achí Abraham.

27 Yūcuán na te ni cahān tēe cūcá: Núu sūcuan te cáhān ndahú ná jíin ní, Tátā Abraham, tají ní Lázaro na quihín de vehe tátá na.

28 Chí íyó úhūn gā ñani ná, te na quícachi de nuū i jeē na nácani ni i te stóo i cuéchi i, náváha ma quívicoo i nuū ndóho ná yáha, achí de.

29 Te ni cahān Abraham jíin de: Je cáneváha i tutu jeē ní tee Moisés jíin táca tēe ni canacani jñuhun Yaā Dios. Suu yūcuán na chūhun ni i, achí Abraham.

30 Te ni cahān tucu tēe cūcá: Vésú sūcuan, Tátā Abraham, te núu in ñayuu ni jihí quihīn nuū i, yūcuán na te nacani ni i jeē stóo i cuéchi i, achí de.

31 Te ni cahān Abraham jíin de: Núu tu chūhun ni i jñuhun ni nacani Moisés jíin táca tēe ni canacani jñuhun Yaā Dios, suni ma candíje cuiti i núu natecu in ndíyi quihīn nuū i, achí de.

Xeēn coo siquí ñayuu squívi jñáhan nuū cuéchi

(Mt. 18.6-7, 21-22; Mr. 9.42)

17

1 Te ni cahān Jesús jíin tēe cáscuáha jíin yá:

Máni íyó jéé nducú squívi ñayuu nuū cuéchi. Te nacā xeēn ndoho ñayuu jeē squívi jñáhan nuū cuéchi.

2 Váha ga núu ni conuhní in yōso cáhnu sucūn i te quēe i chíji ndute mar, vésú jeē squívi i in sūchi lúli yáha nuū cuéchi.

3 Coto ma sáha rō sūcuan jíināhan rō.

4 Te núu jñáhan rō sáha de cuéchi siquí rō, te cahān rō nuū de. Te núu nacani ni de, te cone cáhnu ni rō nuū de.

5 Te núu uxá jínu jeē in quívi sáha de cuéchi siquí rō, te núu uxá jínu nácani ni de te cahān de jíin rō jeē cone cáhnu ni rō chí ma sáha ga de, te cánuú cone cáhnu ni rō nuū de. Achí yá.

Jeē yóhoyo cújéhnu jñuhun cándije

5 Te tēe cácuu apóstol ni cacahān de jíin Jítoho yō:

Sáha ní jéé nihin ga candíje ná jéé sáha Yaā Dios jeē cájicān na núu yá, achí de.

6 Te ni cahān máá Jítoho yō jíin de:

Núu cácanú rō vésú in tíhli-ni, nájñuhun in ndiquin mostaza jeē tíhli-ni cáa, te cuu cahān rō jeē nuyūhndu yáha na quénda te nucondichi nde nuū mar, te coo nájñuhun cahān rō.

Jeē cánuú squícu váha yó núu yá

7 Nde in rō íyó mozo rō jeē jítu de chí ndíto de quiti ndéca rō, te núu ni najinū de vehe rō, te tu cáhān rō jíin de jeē cúcoco de caji de stáa.

8 Chi sa suhva cáhān rō: Sáha rō ndeyu cuxíni rí, te cani rō cóho rí. Te núu ni cuu ni yeji rí ni jihí rí, yūcuán na te caji máá rō coho rō, cácahān rō.

9 Te cácahān rō jeē tu cánuú nacuatáhú rō nuū mozo núu ni sáha de jñiñu ní ndacu rō, chí jeē cánuú sáha de cúu.

10 Te suni sūcuan máá rō jíināhan rō, cácuu rō mozo Yaā Dios. Te núu ni casquícu rō táca jñiñu ní ndacu ya nuū rō, te cahān rō: Tu cánuú nacuatáhú yá nuū rí, chí ni sáha rí máa-ni jeē cánuú sáha rí, achí rō. Achí yá.

Jeē ní nasáváha ya uxí tēe ndóho cuehyí stehyú

11 Te jíca Jesús ichi cuahān yá ñuu Jerusalén, te ni yáha ya cuahān yá mēhñú región Samaria jíin Galilea.

12 Te ni jinū yá in ñuu, te uxí tēe ndóho cuehyí stehyú ni quendacoo de vejnahan de ya, te jíca ní cajecuiñi de.

13 Te ni cacana jee de:

Jesús, Maestro, cundáhú ni ní sáña, achí de jíināhan de.

14 Te ni jito Jesús nuū de, te ni cahān yá jíin de:

Cuángoo te stéén rō máá rō nuū táca sūtú jeē ní canduváha rō, achí yá.

Te níni cuángoo de te ni canduváha-ni de.

¹⁵ Yūcuán na te ñn-ni de ni nandió cóo de nuū Jesús, te cáhán jee de, nácuatáhú de nuū Yaa Dios jeē ní nduváha de.

¹⁶ Te ni jecuiñi yití de nuū yá, te ni jequin de nuū de nde nuū ñuhun, te ni nacuatáhú de nuū yá. Te tēe Samaria cúu de.

¹⁷ Te ni cahán Jesús:

¿A násúú ndihúxi de ni canduváha? Te ñn gā de, ¿naun tu ní cānandicó de nacuatáhú de?

¹⁸ ¿A máñuhún-ni tēe ñuu jicá yáha cúu jee ní nandicó de nácuatáhú de nuū Yaa Dios?

¹⁹ Te ni cahán yá jín tēe ún:

Ndocuiñi quinuhun rō. Chi ni candíje ró jéu nasáváha ri rohó, te jeē yúcuan ní nduváha ró, áchí yá.

Ndese coo quiví jeē ndíji ya ndacu ya jniñu (Mt. 24.23-28, 36-41)

²⁰ Te tēe fariseo ni cacajñuhún de Jesús ndé quiví quejéé jéé ndácu Yaa Dios jniñu ini ñayiví. Te ni cahán yá jín de:

Ma queé ndijin jeē ndácu Yaa Dios jniñu.

²¹ Ni ma cúu cahán ñayuu: Yáha íne ya ndácu ya jniñu, chí: Yúcuan íne ya, achi i. Chi je ndácu Yaa Dios jniñu mehñu ró jijnáhan ró. Achí yá.

²² Yūcuán na te ni cahán yá jín tēe cáscuáha jín yá:

Quee tiempo jeē yóhyo cúu ni rō coto ró jéé ndiji ruhū, Yaa ní nduu tēe, te ma cóto ró jijnáhan ró.

²³ Te cahán ñayuu jín ró: Yáha íne ya, chí: Yúcuan íne ya, achi i. Te ma quíngoo ró condēhe ró, ni ma cóndiquín rō i.

²⁴ Chi nájnūhun sáha taja jeē ndíndēé ñn lado andiví te cúndijin nde inga lado, suni súcuan cuu quiví ndíji ruhū, Yaa ní nduu tēe, chi ndíhi ñayuu coto.

²⁵ Te jini ñuhún jéé xihna gā ndoho xeēn rī, te ñayuu iyó vijna, squéhichi i ruhū.

²⁶ Chi nájnūhun ni cuu quiví ni íyo Noé, suni súcuan cuu quiví ndíji ruhū, Yaa ní nduu tēe.

²⁷ Chi quiví un ní cayejí i, ni cajihí i, ni canandáha i, ni cajēhe i sēhe síhí i jeē nándaáha, nde ni jinú quiví jeē ní quiví Noé ini barco cáhnu jeē naní arca. Te ni cuun saū xeēn, te ni ndaa ndute ni cajihí ndíhi i.

²⁸ Te suni súcuan ni cuu quiví ni íyo Lot. Ni cayejí i, ni cajihí i, ni cajeen i, ni caxícó i, ni catajé i, ni cajeni i vehe.

²⁹ Te quiví jee ní quenda Lot ini ñuu Sodoma cuahán de, te ni cuun ñuhún jín azufre ichi ándiví, te ni snáa ndíhi ñayuu.

³⁰ Te suni súcuan coo quiví jeē ndíji ruhū, Yaa ní nduu tēe.

³¹ Te quiví ún te ñayuu cáhñin yatá véhe, te ndajniñu i ñuhun ini vehe, cáhán rī jín i jeē ma ndívi i naquihin i, chi cánuú cunu yachí i jeē cácu i. Te suni súcuan ñayuu casájniñu

nuū itu, ma quínuhun i vehe i jeē quíhin i ndajniñu i.

³² Te nucūhun ni rō ndese ni ndoho ñasíhi Lot jeē ní jíhi ña.

³³ Te núu ndé ñayuu cuní i cácu i nuū jnúndóho quiji nuū i jeē síquí ruhū, núu súcuan te jnahnū ndetū i ní cáni. Te núu ndé ñayuu, vesú na cúu i jeē síquí ruhū, te cotecu i ní cáni.

³⁴ Te cáhán rī jín ró jeē quiví ndíji ri te quíxi uū tēe ñn jito jecuaá, te ñn de naquihin rī, te inga de ndóo, chí tu ní cándíje de.

³⁵ Te coo uū ñahan jeē ndíco cáhnu, te ñn ña naquihin rī, te inga ña ndóo.

³⁶ Te uū tēe sájniñu de nuū itu, te ñn de naquihin rī, te inga de ndóo. Achí yá.

³⁷ Te jeē ní cajini de jñuhun yáha, te ni cacajñuhún de ya:

¿Ndé mí coo súcuan nájnūhun ni cahán ní? Achí de.

Te ni cahán yá jín de:

Nájnūhun jeē cutútú téji ndé-ni cúu nuū catú quiti ní jíhi, suni súcuan coo táca jéé ni cahán rī ndé-ni cúu-ni nuū cáhiyo ñayuu.

Jñuhun yatá síquí juez jín ñahan viuda

18

¹ Te ni cahán yá ñn jñuhun yatá jín de jeē cánuú jeē niní cácan tahú de, te ma ndímuu ni de jín.

² Te ni cahán yá:

Ní iyo ñn juez ini ñn ñuu. Te ni tu ndíso iyo de nuū Yaa Dios, ni tu yúhú de nuū ní ñn ñayuu.

³ Te suni ñuu un iyó ñn ñahan ní ndóo ndáhú. Te ñahan un jéhén-ni jéhén-ni ña nuū de, jicán ña jeē na sándaá de síquí ñn ñayuu jeé jito uhú i ña.

⁴ Te cuehē quiví tu ní cúní de sándaá de, te yúcuan na te ni jeni ni de: Vesú tu ndíso iyo rī nuū Yaa Dios, ni tu yúhú rí nuū ní ñn ñayuu,

⁵ te ñahan viuda yáha, yóhyo stáhan ña ruhū, te jeē yúcuan na sándaá rī síquí ñayuu jeé jito uhú i ña. Chi núu tuú, te quejéé rí jnaníní ni rí jeé quíji quíji ña. Achí de. Achí máá Jítoho yó.

⁶ Te ni cahán gā yá:

Súcuan cúu jeē ní cahán juez, tēe tú ndaa.

⁷ Te Yaa Dios, nasúu súcuan cúu ya, chí sándaá yá síquí jniñu ñayuu ní nacáji ya jeé nduú ñuu cácahán ndahú i jín yá. Chi jnama ya i nuū táca jéé cájito uhú i. ¿Te á cueé jnama ya i?

⁸ Cáhán rī jín ró jeé yachí. Te quiví ndíji ruhū, Yaa ní nduu tēe, ¿á níhñ gā rī ñayuu cácañdíje níhin ini ñayiví? Achí yá.

Jñuhun yatá síquí tēe fariseo jín tēe stútu xihun renta

⁹ Te suni ni cahán yá jñuhun yatá yáha jín jecu ñayuu jeé cájeni ni i jeé ñayuu ndaa cácuu

i, te cájeni ni i jeē sava ga ñayuu tu cáhīyu ndaā:

¹⁰ ñin tēe fariseo cuahān de templo jeē cacān tahu de. Te ñin tēe stútú xúhun renta suni cuacacān tahu de templo.

¹¹ Te tēe fariseo, índichi de, te súcuan ni jicān tahu de: Tátā Yaā Dios, na cútahū na núu ní, chí tu cúu ná nájñūhun cándāa sava ga tēe, tēe cuihná, tēe néé, tēe cásiquí ndéē jñāhan cácuu de. Ni tu cúu ná nájñūhun cáa tēe yúcuān jeē stútú xúhun renta jeē scāa ga de jicān de nuū ñayuu.

¹² Te uū jínu jeē semana iyó ndite ni na núu ní, te jéhe ná nuū ní ñin ñin siquí taca úxi ndajñiñu níhín na, áchí de.

¹³ Te tēe stútú xúhun renta, ni jecuiñí jicá de nuū templo, ni tu ní chúndeyí ni de jeē ndonehen de nuū de, chí sa suhva ni cani de yiqui jicá de jeē cucuíhyá ni de. Te ni cahān de: Tátā Yaā Dios, cundáhú ni ni sáña, chí tēe iyó cuéchi cúu ná, áchí de.

¹⁴ Te cáhān rī jín ró jeē tēe stútú xúhun renta, ni jétahú Yaā Dios de, te cuanuhun de vehe de. Te tēe fariseo chí tu ní jétahú yá de. Chí ñayuu jeē sajéñhu i máá i, sa ndululí i. Te ñayuu jeē sálulí i máá i, sa ndujéñhu i. Achí yá.

*Jeē ni jicān tahu Jesús jehē sūchi lúlí
(Mt. 19.13-15; Mr. 10.13-16)*

¹⁵ Te ni quecoo ñayuu jín sūchi lúlí núu Jesús, jeē na sóo yá ndaha ya xiní i. Te tēe cáscuáha un ní cajini de jeē súcuan cúu, te ni cacahān de nuū ñayuu vējicoo jín i.

¹⁶ Te máá Jesús ni cana ya de, te ni cahān yā:

Cuāha jñūhun na quǐjicoo sūchi lúlí jíñā nuū rī, te ma cásí ró jeē quǐjicoo i. Chí ñayuu jeē ndió cóo ni i cani ni i nájñūhun sūchi yáha, suu i quívi ndaha Yaā Dios jeē ndacu ya jñiñu nuū i.

¹⁷ Te jendaá cahān rī jín ró, núu ñin ñayuu tú cuatáhú i jeē ndácu Yaā Dios jñiñu nuū i, nájñūhun jétahú ñin sūchi lúlí, ma quívi cuiti i ndaha ya, achí yá.

*Jñūhun tēe cúcá
(Mt. 19.16-30; Mr. 10.17-31)*

¹⁸ Te ñin tēe cújéñhu ni cajñūhún de ya:

Tēe vāha cúu ní Maestro. ¿Te na jñiñu váha sáha ná te níhín tahu na cotecu na ní cáni andiví? Achí de.

¹⁹ Te ni cahān Jesús jín de:

¿Naun cáhān ró jeē tēe vāha cúu rí? Tú ni ñin tēe vāha iyó, chí máá ñin-ni Yaā Dios.

²⁰ Je jíní ró taca jñiñu ní ndacu Yaā Dios: Ma cosíquí ndéē jñāhan ró. Ma cáhni ró ndíyí. Ma sacuíhná ró. Ma sajñūhún ró. Cuatáhú ró nuū tatá ró nuū naná ró. Achí yá.

²¹ Te ni cahān maá de:

Tácá jñiñu yáha je ni squícu ná ndé ná lúlí ná, achí de.

²² Te Jesús ni jini ya jñūhun yáha, te ni cahān yā jín de:

ñin na jñiñu cúmaní sáha ró núu súcuan. Xicó ndihí jeē névāha ró, te cuāha ró núu ñayuu ndahú. Te nde andiví cuāha ya jeē vāha ndasí núu ró. Yúcuān na te quiji ró condiquín ró ruhū, achí yá.

²³ Te ná ni jini sōho de jñūhun yáha, te yōhoyo ni cucuíhyá ni de, chí cúcá ndasí de.

²⁴ Te jito Jesús jeē súcuan cucuíhyá ni de, te ni cahān yā:

Tēe cúcá chí yōhoyo yí quívicoo de ndaha Yaā Dios jeē ndacu ya jñiñu nuū de.

²⁵ Yachí gā yáha ñin camello yaū yutícuí vesú jeē quívi ñin ñayuu cucá ndaha Yaā Dios jeē ndacu ya jñiñu nuū i, áchí yá.

²⁶ Te tēe ní cajini jñūhun yáha, ní cacahān de:

¿Ndé ñayuu cúu jeē cácu núu súcuan? Achí de.

²⁷ Te ni cahān yā jín de:

Ñayuu chí ma cúu squívi i máá i ndaha Yaā Dios, te máá yá chí cuu sáha ya, achí yá.

²⁸ Yúcuān na te ni cahān Pedro:

Sáña jíñāhan ná ní castóo ná ndihí jeē cánevāha ná, te cándiquín na níhín, achí de.

²⁹ Te máá yá ni cahān yā jín de:

Jendaá cahān rī jín ró jíñāhan ró, núu na-ni ñayuu stóo i vehe, chí tátá, chí ñani, chí ñasihí, chí séhe, jeē siquí jeē scāca i jñūhun jeē ndácu Yaā Dios jñiñu nuū ñayuu,

³⁰ núu súcuan te nanihín cuehē gā i ini ñayívi yáha, te tiempo quiji te cotecu i níf cáni, achí yá.

*Jeē ni cáhān tucu ya jeē cúu yā
(Mt. 20.17-19; Mr. 10.32-34)*

³¹ Te ni cana sún ya ndihíxí uū tēe cáscuáha jín yá, te ni cahān yā jín de:

Vijna je cuángoo yó ñuu Jerusalén. Te yúcuān squícu ndihí jñūhun ndese ndoho ruhū, Yaā ní nduu tēe, nájñūhun ni catee tēe ni canacani jñūhun Yaā Dios nde jengahán.

³² Chí ñayuu nastúu i ruhū nuū tēe nación Roma jeē cáyucú Jerusalén cándacu jñiñu. Te tēe un sácatá de nuū rī, te cahān néé de nuū rī, te tesihí de nuū rī.

³³ Te cani de ruhū, te sáa te cahni de ruhū. Te nuū uní quívi te natecu rī. Achí yá.

³⁴ Te máá de tu ní cájecūhun cuiti ni de taca jñūhun yáha. Chí jñūhun yí cúu, te tu ní cúu jecūhun ni de jeē cahān yā.

*Jeē ní nasávāha ya ñin tēe cuáá ñuu Jericó
(Mt. 20.29-34; Mr. 10.46-52)*

³⁵ Te ni cuyajni ya cuahān yā ñuu Jericó. Te ñin tēe cuáá néne de yuhíchi, jícān de caridad.

³⁶ Te ni jini sōho de jeé yáha cuehē ñayuu cuangoo i, te ni cajñūhún de naun cuángoo i.

³⁷ Te ni cacahān i jín de jeē Jesús, tēe ñuu Nazaret, yáha ya cuahān yā.

³⁸ Yúcuān na te ni cana jee de:

Jesús Sêhe yucûn David, cundáhú ni ni sáña, áchí de.

³⁹ Te ñayuu cuangoo ichi núú yā, ni cacahān i nuū de jeē na cásí de yuhu de. Te máá de víhyá gā ní cana jee de:

Máá ní jeē cúu ní Séhe yucûn David, cundáhú ni ni sáña ví, achí de.

⁴⁰ Yūcuán na te ni jecuíñi Jesús, te ni cahān yā jeē na quíndeca i de. Te nuū ní cuyajni de nuū yā, te ni cajñuhun yā de:

⁴¹ ¿Na vé cuní rō jeē sáha ri jíin rō? achí yā. Te ni cahān de:

Jeē na ndúndijin tinūu ná cuní na, áchí de.

⁴² Te ni cahān Jesús jíin de:

Ndundijin tinūu rō núu súcuan. Ni candíje rō jeē cuu nasávaha ri rohó, te jeē yúcuan ní nduvaha rō, áchí yā.

⁴³ Te ni ndundijin-ni tinūú de, te ni ndiquín de ya, te nácuatáhú de nuū Yaa Dios. Te ndíhi ñayuu jeē ní cajito i, suni ni cacahān i jeē yóhoyo vaha Yaa cúu Yaa Dios.

Jñuhun Zaqueo

19

¹ Te ni quívi Jesús ini ñuu Jericó, te ni yāha-ni ya cuahān yā.

² Te yúcuan iyó ñn tēe cúcá nání de Zaqueo, te cújéhu de nuū tēe cástítú xuhun renta.

³ Te cúni de coto de návaha cuni de ndé ñn cúu Jesús. Te tu ní cúu, chí cuehē ñayuu cuangoo i jíin yā, te ndiqui-ni cáa de.

⁴ Te jínu de ní cosnúú de. Te ni caa de xiní ñn nuyūhndú návaha coto de nuū yā, chí yúcuan yāha ya quihñ ri.

⁵ Te ni jinú yā yúcuan, te ni ndacoto ndaa ya nuū de. Te ni cahān yā:

Zaqueo, yachí nuu rō, chí jíni ñúhún jéé ndóo ri vehe rō víjna, áchí yā.

⁶ Yūcuán na te ni cusí ni de, te yachí ni nanuu de, te ni jeca de ya cuahān de jíin yā vehe de.

⁷ Te ni cajito ñayuu jeē súcuan ni cuu, te ni cacahān i síquí yā jeē cuahān yā ndóo ya vehe ñn tēe sáha cuéchi.

⁸ Yūcuán na te ni ndocuíñi Zaqueo, te ni cahān de jíin máá Jítoho yó:

Vijna te sava ndíhi ndajñíñu ná chí cuāha ná núu ñayuu ndahu. Te núu ní scáa ga na ní jícān na xuhun nuū ñayuu, te nacuāha ná úní gā síquí naquihñ i, áchí de.

⁹ Te ni cahān Jesús:

Vijna te vehe yāha je ni cācu ñn tēe jeē ma jñahnú ndetū de, chí ni candíje de nájnūhun ni candíje jí de Abraham.

¹⁰ Chí ruhū, Yaa ní nduu tēe, ni quiji ri nducú rí ñayuu jeē jñahnú ndetū, te jnama ri i, áchí yā.

Jñuhun yátá síquí uxí mozo jíin xuhun

¹¹ Te nuū ñayuu ní cajini táca jñuhun yāha, ní cahān gā Jesús ñn jñuhun yátá jéé steén yā ndese coo quívi ndíji ya. Chí je ni cuyajni ya

ñuu Jerusalén, te cájeni ni i jeē víjna ñúhún quejéé jéé ndácu ya jñíñu sáha Yaa Dios.

¹² Te ni cahān yā:

Ñn tēe cújéhu cuahān jíca de inga nación, návaha nihñ jñíñu de cuu de rey, te ndíji de ndacu de jñíñu.

¹³ Te nde ná tu quihñ de, te ni cana de uxí mozo de, te nuū ñn ñn i ni jéhe de ñn xuhun jéé ndee yahu ndasí. Te ni cahān de jíin i: Sájniñu rō jéé na ndúcuehē xuhun yāha jíjnáhan rō níni jéé quihñ ri te ndee rí, achí de.

¹⁴ Te ñayuu nación de cáquiti ní i nuū de, te ni catají i jecu tēe cándiso jñíñu cuangoo yatá de jeē cahān: Tu cáunjahan ni ñayuu nación na jéé cuāha ní jñíñu nuū tēe yāha jéé cuu de rey nuū i, áchí.

¹⁵ Te vésú súcuan te ni nihñ jñíñu de cuu de rey, te vendíji de nación de. Te nuū ní ndee de, te ni ndacu de jñíñu jeē na quijicoo mozo jeē ni jéhe de xuhun núu, návaha na cúni de nasaa ní canihñ ñn ñn i síquí.

¹⁶ Te ni quee ñn mozo un núu de, te ni cahān i: ñn xuhun jéé ní jéhe ní núu ná, ni nduu uxí, achí i.

¹⁷ Te ni cahān máa rey: Vaha mozo cúu rō, te vaha ní sáha rō. Chí ní squícu vaha rō jíin ñn jñíñu lúli-ni, te víjna te sáha ri jeē cújéhu rō ndacu rō jñíñu nuū uxí ñuu jñí ri, achí de.

¹⁸ Te ni quee inga mozo, te ni cahān i: ñn xuhun jéé ní jéhe ní núu ná, ni nduu uhún, achí i.

¹⁹ Te suni ni cahān de jíin mozo un: Róhó, cújéhu rō ndacu rō jñíñu nuū uhún ñuu jñí ri, achí de.

²⁰ Te ni quee inga mozo, ni cahān i: Yaha nácuāha ná xuhun ní, chí ni chuvaha ná ini ñn pañuelo.

²¹ Chí ní yūhu ná nihín, chí tēe xeén cúu ní. Chí cuehē gā nándacān ní vésú jeē ní jéhe ní, te cuehē gā cuní ní vésú jeē cúu sáha mozo ní, achí de.

²² Yūcuán na te ni cahān rey: Mozo neé cúu rō núu súcuan, te jíin jñuhun ni cahān rō te sándaá ri jeé iyó cuéchi rō jéé tu ní sájniñu rō jíin xuhun rí. Chí jéni ní rō jeé tēe xeén cúu ri, te cuehē gā nándacān ri vésú jeé ní jéhe ri, te cuehē gā cuní rí vésú jeé cúu sáha mozo rí.

²³ Núu súcuan ¿te naun tu ní chúnre rō xuhun ri vésú nuū banco? Te jeé ní ndee rí te naquihñ ri xuhun rí nde jíin séhe xuhun núu. Achí de.

²⁴ Te ni cahān de jíin ñayuu cáhiñ yūcuán: Quende xuhun jíñá nuū i, te cuāha rō núu mozo jeé névaha uxí, achí de.

²⁵ Te ñayuu un ní cacahān i jíin de: Te ndese, chí je névaha de uxí, achí i.

²⁶ Te ni cahān tucu rey: Cáhán rí jíin rō jeé ñayuu je névaha, sa quiji ga nuū i, te conevaha cuehē i. Te ñayuu jeé tu névaha, sa cujiyo-ni vésú jecu jeé névaha i.

²⁷ Te tēe jeē cájito uhū ruhū, jeē tu ní cānūjnahan ni de jeē cuu ri rey nuū de, cuáquihin de na quíjicoo de yāhá. Te cahni rō de coto ri, achí de. Achí Jesús.

Jeē ní quívi Jesús ñuu Jerusalén

(Mt. 21.1-11; Mr. 11.1-11; Jn. 12.12-19)

²⁸ Te nuū ní ndihi ní cahān yā jñuhun yāha, te ni jica ga yā cuahān yā ñuu Jerusalén.

²⁹ Te nuū ní cuyajni ya ñuu Betfagé jíin ñuu Betania, yajni nuū íne yucu nání yucu Olivos, te ni taji yá uū tēe cáscuáha jíin yá jeé quingoo de.

³⁰ Te achí yá jíin de:

Cuahān ñuu lulí íne ichi nuú. Te núu ni quívi ró, te nihīn rō ñin burro núhni tí, jeē ní ñin tēe ná tu coso de tí. Te ndají rō tí quíji rō jíin tí.

³¹ Te núu ndé ñin cajñuhún naun cándají rō tí, te cahān rō jíin: Máá Jítoho yō jíni ñuhún yá tí, achí rō. Achí yá.

³² Te cuangoo tēe ní taji yá, te ni canihīn de tí nájñuhun ní cahān yā jíin de.

³³ Te jeē cándají de tí, te ni cacahān jítoho tí jíin de:

¿Naun cándají rō burro ri? achí.

³⁴ Te ní cacahān de:

Máá Jítoho yō jíni ñuhún yá tí.

³⁵ Te ní ndecoo de jíin tí nuū Jesús. Te ní caso de sahma de siquí tí, te ní casáha de jeē ní jecosō yá siquí tí.

³⁶ Te ná-ni cuahān yā, sáá cáscáá ñayuu sahma i ini ichi.

³⁷ Te nuū ní cuyajni ya nuū cúun ichi yucu Olivos, te ndihi ñayuu cácandíje jeē cándiquín i ya, ni caquejéé i cácusī ni i, te cácana jee i jeē yóhoyo váha Yaā cúu Yaā Dios siquí táca jñiñu jéhu ní sáha ya ní cajito i.

³⁸ Te achí i:

Yóhoyo váha Yaā cúu Rey jeē véji jíin jñiñu máá Jítoho yō Yaā Dios. Te sáha ya jeē cóo maní yō jíin Yaā Dios andiví. Te yóhoyo cújéhu Yaā Dios, achí i jíjnáhan i.

³⁹ Yūcuán na te jecu tēe fariseo cáhiin mēhñu ñayuu cuehē ún, ní cacahān de jíin yá: Maestro, cahān ní nuū ñayuu cándiquín nihín jéé na cási i yuhu i, achí de.

⁴⁰ Te ní cahān Jesús:

Cahān rí jíin ró jeē núu ñayuu yáha na cási i yuhu i, te táca yúu chí cana jee, achí yá.

⁴¹ Te nuū ní cuyajni ya Jerusalén, te ní jito ya ñuu ún, te ní ndahyū yá siquí.

⁴² Te ní cahān yá:

Róhó ñayuu Jerusalén, yóhoyo ní cuu ní rí jeē na jécūhun ní rō jeē cuu ndumaní rō jíin Yaā Dios sáha ri. Te siquí jeē tu cácandíje rō, te víjna chí ma cúu ga jecūhun ní rō.

⁴³ Chí quee quívi jeē coo jñūndóho, te ñayuu cájito uhū rohó, cuicó ndúu i ñuu rō, te casi cutú i jíin yúu, te táca lado ndonda i siquí rō.

⁴⁴ Te ndihi vehe scótúu i, te cahni i róhó jíjnáhan rō. Te ma stóo i ní ñin vehe jeē cóso jnáhan ga yuū. Chí ní quíji ri nde nuū Yaā Dios jeē jnáma ri rohó, te tu ní cácandíje rō. Achí yá.

Jeē ní quenehen ya ñayuu ini templo

(Mt. 21.12-17; Mr. 11.15-19; Jn. 2.13-22)

⁴⁵ Te ní quívi ya ini templo cáhnu, te ní quejéé yá quenehen ya táca ñayuu cájeen quiti te cánaixo núu ñayuu jeē socó i.

⁴⁶ Te ní cahān yá jíin i:

Yósó núu tútu í jeē cahān Yaā Dios: Vehe ri chí vehe nuū cájicān tahú cúu, achí Yaā Dios. Te máá rō jíjnáhan rō, chí nájñuhun yaū cava ñacuihna ní canasáha rō, achí yá.

⁴⁷ Te ndíquívī ní steen yā jñuhun ini templo. Te sutū cácujeñu jíin tēe cástéén tutu ley Yaā Dios jíin tēe cácujeñu nuū ñayuu ñuu ún, cáncúcu de modo ndese cahni de ya.

⁴⁸ Te tu cánihīn de modo sáha de, chí ndivii ñayuu yóhoyo cájetáhú i cájini nahín i jñuhun cáhān yá.

Siquí jeē ndiso jñiñu Jesús

(Mt. 21.23-27; Mr. 11.27-33)

20

¹ Te ñin quívi steen yā jñuhun nuū ñayuu ini templo, te nácani ya jñuhun jeē jnáma Yaā Dios ñayuu. Te ní quecoo sutū cácujeñu jíin tēe cástéén tutu ley Yaā Dios jíin táca tēe jéhu cáncacu jñiñu.

² Te ní cacahān de:

Castūhún, ¿ndé ní nihīn jñiñu ró jéé sáha ró jñiñu yáha? ¿Te ndé ñin ní tee jñiñu siquí rō jeé sáha ró súcuan? Achí de.

³ Te ní cahān Jesús jíin de:

Suni ruhū cajñuhun rí rohó ñin jñuhun jíjnáhan rō. Castūhun núu rí:

⁴ ¿Nde ñin ní tee jñiñu siquí Juan jeé ní scuándute de? ¿A Yaā Dios chí táca tēe? Achí yá.

⁵ Yūcuán na te ní candajñuhun máá de:

¿Ndeese cahān yō? Núu cahān yō jeē Yaā Dios ní tee ya jñiñu un siquí Juan, te cahān de jíin yó: ¿Najehē tu ní cácandíje rō de núu súcuan?

⁶ Te núu cahān yō jeē ñayuu ní catee jñiñu un siquí de, te ndivii ñayuu cahni i yóhó jíin yúu, chí cácandíje i jeé tēe ní nacani jñuhun Yaā Dios ní cuu ndíje Juan, achí de cácahān maá de.

⁷ Te ní cacahān de jeē tu cájini de ndé ñin ní tee jñiñu siquí Juan jeé ní scuándute de.

⁸ Yūcuán na te ní cahān Jesús:

Ní ruhū, suni ma cáchi rí nuū rō ndé ñin ní tee jñiñu siquí rí sáha rí jñiñu yáha, achí yá.

Jñuhun yátá siquí tēe néé cásjñiñu nuū uva

(Mt. 21.33-44; Mr. 12.1-11)

⁹ Te ní quejéé Jesús cahān yā jñuhun yátá yáha jíin ñayuu ún:

ñin tēe ni nachuhun de cuehē uva nuū ñūhun de. Te ni stóo de nuū sava tēe sájniñu nuū, te cuu sava de ndehē jíin. Te ni tee de ichi jeē cuahān nahán de inga ñuu.

¹⁰ Te máa tiempo ndutútu uva, te ni taji de ñin mozo cuahān nuū tēe sájniñu ún, návāha naquihin de sava ndehē uva un. Te tēe un ní cacani de mozo, te ni canatají de i cuanuhun i súcuan-ni.

¹¹ Te tēe chíi uva ni taji tucu de inga mozo cuahān. Te tēe sájniñu ún, suni ni cacahān ndevāha de nuū i, te ni cacani de i, te ni canatají de i cuanuhun i súcuan-ni.

¹² Te tēe chíi uva ni taji tucu de inga mozo cuahān. Te tēe sájniñu ún, suni ni castúji de mozo un, te ni cascúnu de i.

¹³ Yūcuán na te ni cahān tēe chíi uva; ¿Ndese sáha ri? Na táji ri sēhe ri jeē maní ri jíin, chí sanaa te núu ni cajito de i te coo yíñúhún de nuū i. Achí de.

¹⁴ Te tēe sájniñu ún, ná ni cajito de jeē véji i, te ni cacahān de: Tēe chíi táhu cūu jeē véji ún. Na cáhni yō de, te ndōo tahū de cuu máa yó, achí.

¹⁵ Te ni caquenehen de i inga lado, te ni cajehni de i, achí yá.

Te ni cajñūhun yá de:

Núu súcuan ¿te ndese sáha tēe chíi uva jíin tēe sájniñu ún?

¹⁶ Ndiji de te cahni de tēe un jíjnáhan, te cuāha de ñuhun cáa uva un núu inga sava tēe sájniñu nuū, achí yá.

Te jeē ní cajini ñayuu jñūhun yáha, te ni cacahān i:

Aí, núu ma cóo cuiiti súcuan víi, achí i.

¹⁷ Te ndéhé yá nuū i jíjnáhan i, te ni cahān yā:

Núu súcuan ¿te á cájecūhun ni rō jñūhun yáha jeē yosó núu tútu íi jeē cūu ri nájnūhun ñin yuū? Chí achí tutu:

Yuū jeē ní casquéhichí tēe cájeni vehe,

yuū yáha nduu jeē quítuu vehe.

Achí.

¹⁸ Te ñayuu tu cácadíje, ndoho i nájnūhun ndóho ñayuu jeē cotúu siquī yuū te jnánhú i. Te quiví sándaā Yāā Dios cuēchi, te ñayuu tu cácadíje, ndoho i nájnūhun ndóho ñayuu jeē nínga yuū siquī i te cundihí i sáha. Achí yá.

Siquī xūhun renta

(Mt. 21.45-46; 22.15-22; Mr. 12.12-17)

¹⁹ Yūcuán na te sutū cácujeñhu jíin tēe cástéén tutu ley Yāā Dios, ni cacuni de jñi de ya maá hora un. Chí ni cajecūhun ni de jeē siquī maá de cūu jñūhun yátá ní cahān yā siquī tēe sájniñu nuū uva jíin tēe cájeni vehe. Te tu ní cūu, chí cáyūhú de jeē quítu ni ñayuu.

²⁰ Yūcuán na te ni catají de jecu tēe cuacoto yuhu de ya, te tēe un sáaha-ni de jeē tēe ndaā cácuu de. Te cánducú de sáha de jeē cahán yā ñin jñūhun jeē nihín de cuēchi siquī

yā, te quindecas de ya nuū tēe cūu gobernador.

²¹ Te ni cacahān de:

Maestro, cájini na jeē cahán vāha ní, te stéén ndaā ní. Te tu sáha ní cuenta ndese cūu ñin ñayuu, chí inuū-ni sáha ní jíin i. Te stéén ndaā ní ndese squícu ñayuu nuū Yāā Dios.

²² Núu súcuan te cachí ní: ¿A íyó vāha jeē chúnaa yō renta nuū rey nación Roma jeē jñi nación yō, chí tuú? achí de.

²³ Te ni jini yā jeē cáculi de stáhú de ya, te ni cahān yā jíin de:

¿Najehé cájito ndee rō ruhú?

²⁴ Stéén ñin xūhún na cóto ri. ¿Ndé ñin nuū cūu jeē ndeé nuū xūhun yáha, te ndé síhví cūu jeē ndeé yáha? achí yá.

Te ni cacahān de jíin yá:

Nuū jíin síhví rey un cūu, achí de.

²⁵ Yūcuán na te ni cahān yā jíin de:

Núu súcuan te nacuāha ró núu rey un jeē yíhi cuenta nuū de, te nacuāha ró núu Yāā Dios táca jeē yíhi cuenta nuū maá yá, achí yá.

²⁶ Te táca tēe ún tu ní cūu nihín de cuēchi siquī yā jíin ni ñin jñūhun cáhán yā, cájito jíinú ñayuu. Chí sa ní canaa ni de jeē ndichí ní stió cuiñí yā jñūhun nuū de, te tuá na vé ni cácahān de.

Jeē ní cacajñūhún de siquī jeē nátecu ndíyi
(Mt. 22.23-33; Mr. 12.18-27)

²⁷ Yūcuán na te jecu tēe grupo saduceo ni quecoo de nuū yā. Te tēe un cácahān jeē tu nátecu cuiiti ndíyi. Te ni cacahān de jíin yá:

²⁸ Maestro, Moisés ni tee de nuū tútu jeē cánevāha yó: Núu ñin tēe cuu de, te ndōo ñasihí de, te núu tu ní íyo sēhe de jíin ña, núu súcuan te cánuú jeē ñani de naquihin ñasihí de, te sēhe de jeē cácu jíin ña nucuñí i nuū ndíyi ñani de, achí tutu.

²⁹ Núu súcuan te ni íyo uxā ñani. Te tēe núu ní quijnáhan de jíin ñahan. Te ni jihí de, te tú sēhe de ní íyo.

³⁰ Te tēe uú ni naquihin de ña, te suni ni jihí de, te tú na sēhe de ní íyo.

³¹ Te tēe uní ni naquihin de ña. Te suni súcuan ndihúxá de ní condeca de ña, te ni cajihí ndihí de, te ni ñin de tú sēhe de ní íyo.

³² Te jeē sándihí te suni ni jihí ñahan ún.

³³ Núu súcuan te núu na nátecu de jíjnáhan de quiví nátecu ndíyi, ¿te ndé ñin de cuu ña ñasihí de? Chí ndihúxá de ní condeca de ña. Achí de jíjnáhan de.

³⁴ Yūcuán na te ni cahān yā jíin de:

Ñayiví yáha chí cáquijnáhan tēe jíin ñahan.

³⁵ Te ñayuu vāha jeē nátecu i quivícoo i andiví, ma quijnáhan ga i yūcuán, chí tuá na jñūhun quijnáhan tēe jíin ñahan coo.

³⁶ Ni ma cūu cuiiti gā i, chí coo i nájnūhun ndajehé Yāā Dios. Te sēhe Yāā Dios cuu i, chí je ni canatecu i.

³⁷ Te suni máá Moisés cahán de jeē nátecu ndíyí, chí ni tee de nuū tútu ndese ni cahán yā jíin de mēhñu yúcu jeē cayú yáñuhūn. Chí ni cahán de jeē cúu ya Yaā Dios Abraham jíin Isaac jíin Jacob.

³⁸ Te jeē ni cahán de súcuan cúu jeē ní cachi de jeē cátecu táca ndíyí. Chí vēsú je ni cajihí i, te cátecu i nuū iyó máá yá, chí cúu ya Yaā sáha jeē técu ñayuu ní cání. Achí yá jíin de.

³⁹ Te jecu tēe cástéén tutu ley Yaā Dios ni cacahán de:

Váha ni cahán ní Maestro.

⁴⁰ Te tuá ni cáchundeyí ni de cajñuhún de ya.

Siquí jeē cúu Cristo sēhe yucūn David
(Mt. 22.41-46; Mr. 12.35-37)

⁴¹ Te ni cahán yā jíin de jíinánhan de:

¿Ndese cúu jeē cácahán ñayuu jeē Cristo cúu sēhe yucūn David?

⁴² Chí máá David suhva ni cahán de jñuhun ya nuū tútu Salmo:

Máá Jítóho yō Yaā Dios suhva ni cahán yā jíin Jítóho rí, Yaā quiji:

Cucōo ró lado váha rí nuū kujéhu ró,

⁴³ te na sáha rí jeē quende rō poder táca jéé cájito uhū rohó.

Achí Yaā Dios. Achí David.

⁴⁴ Te núu sēhe yucūn David cúu Cristo, ¿te ndese cúu jeē ni cahán de jeē Jítóho de cúu ya? áchí yá.

Jeē ni cahán yā jeē iyó cuéchi de jíinánhan de
(Mt. 23.1-36; Mr. 12.38-40; Lc. 11.37-54)

⁴⁵ Te ni cahán yā jíin tēe cácuáha jíin yá, te suni ni cajini sōho ndíhi ñayuu:

⁴⁶ Coto má cándíje ró táca tēe cástéén tutu ley. Chí cácusí ni de cáñuhun de sahna cání jeē steén jeē kujéhu de, cájica cuu de jíin. Te cánujnahan ní de jeē cahán yíñuhún ñayuu jíin de nuū yáhu. Te cánujnahan ní de cucōo de nuū silla yíñuhún gá iní vehe ní sinagoga, jíin silla yíñuhún gá nuū víco cáyeji ñayuu.

⁴⁷ Te cáquende de vehe ñahan ní caquendōo ndáhú. Te nahán cájicán tahú de náváha caní ni ñayuu jeē tú na cuéchi de. Tēe yáha jíinánhan de chí xeén gā ndoho de castigo. Achí yá.

Jeē ní sócō ñahan viuda xuhún
(Mr. 12.41-44)

21

¹ Te ná ni iyo ya ini templo, te jító ya nuū ñayuu cucá jéé cáchuhun i cuehē xuhún ini táca yéjñū nuū casocō i.

² Te suni ní jito ya nuū ñin ñahan viuda jeē ndóho ndáhú, te ní chuhun ña uū centavo lúí ini yejñū ún.

³ Te ní cahán yā:

Jendaá cahán rí jíin ró jeē cuehē gā cúu jeē ní sócō ñahan viuda ndahú yáha, vēsú jeē ní casocō táca gá ñayuu.

⁴ Chí táca i ní casocō i jeē ní ndóo siquí xuhun cuehē i. Te ñahan yáha, vēsú ndahú

ndóho ña, te ní chuhun ndíhi ña jeē cótecu ña. Achí yá jíin de.

Jeē ní cachi yā jeē náā templo
(Mt. 24.1-2; Mr. 13.1-2)

⁵ Te sava de ní cacahán de jeē luu cáca templo cáhnu, chí ní cuváha jíin táca yúu luu jíin táca jéé ní casocō ñayuu. Yúcuán na te ní cahán yā:

⁶ Ndíhi jeē cájito ró yáha, quee quiví jeē ma cóso jnánhan ga ní ñin yuū, chí ndíhi jnanū, achí yá.

Na seña coo nuū cuácuyajni ndíhi ñayiví
(Mt. 24.3-28; Mr. 13.3-23)

⁷ Te ní cacajñuhún de ya:

Maestro, ¿ndé quiví coo táca jéé ní cachi ní jéé coo? ¿Te na seña coo nuū cuácuyajni squicu táca jéé ní cahán ní? áchí de.

⁸ Te ní cahán yā:

Coto ró jéé ma stahú i róhó. Chí quijicoo cuehē tēe jeē stahú jíin síhví rí, te cahán de: Máá rí cúu Cristo. Te suni cahán de: Je ní quee quiví ndíhi ñayiví, achi de. Te ma cóndiquín rō de.

⁹ Te núu nihín rō jñuhun jeē táca lado iyó guerra te cándonda ñayuu siquí tohō, te ma yūhu ró, chí cánúu jéé xíhna gā coo súcuan, te ní ma jíinú yachí quiví ndíhi ñayiví. Achí yá.

¹⁰ Te ní cahán gā yā:

Ndonda nación siquí inga nación, te ndonda ñuu siquí inga ñuu jeē cuajnáhan.

¹¹ Te cháha chúcuan jñā téyí, te coo jnamā jíin cuéhyí xeén. Te coo seña jéhuu ichi ándiví jéé yuhú ndasí ñayuu coto i.

¹² Te nde ná tu coo táca jniñu yáha, te coto xeén i róhó, te jñi i róhó. Te quindeca i sava ró táca vehe íi sinagoga jeē cahán i cuéchi siquí rō. Te chune i sava ró vecáa. Te quindeca i sava ró núu táca rey jíin núu táca gobernador, te cahán i cuéchi siquí rō jeē siquí jeé cácañdije ró rúhū.

¹³ Te jeē súcuan coo, te cuitē núu ga jñuhun rí, chí nacani ndaā rō nuū de jíinánhan de.

¹⁴ Núu súcuan te cundaā ní rō jeē ma nácani ní rō xíhna gā ndese stío cuñí rō nuū de te cácu ró.

¹⁵ Chí ruhū cuáha rí jñuhun ndíchí cahán rō, náváha ñayuu jeē cájito uhū rohó, ma cundeyí i jíin ró ní ma cúu cahán i siquí rō.

¹⁶ Te nde tatá rō, naná rō, ñani rō, jnánhan ró, jíin amigo ró, nastúu i róhó núu ñayuu xeén. Te cahni i sava ró.

¹⁷ Te táca ñayuu chí quifí ní i nuū rō jeē siquí ruhū.

¹⁸ Te ní ñin íxi xíní rō jíinánhan ró ma náā, chí coto ya rohó.

¹⁹ Te núu cuñíí nihín ró jíin jñuhun rí, te cotecu rō ní cání.

²⁰ Te núu ní cajito ró jéé ní cajicó ndúu soldado ñuu Jerusalén, te na jécūhun ní rō jeé jé yajni naa ñuu ún.

²¹ Yūcuán na te ñayuu cáyūcú región Judea, na cūnu i caa i yucu quingoo i. Te ñayuu cáyūcú Jerusalén, na quéndacoo i quingoo i. Te ñayuu cáhīn nde rancho, ma náncicó i ñuu ún.

²² Chi táca quiví un cuáha Yaā Dios castigo nuū ñáyuu jeē siquí cuéchi i, návaha squícu táca jnúhun jeē yosó nuū tútu.

²³ Te quiví ún nacā jeē ndahú ñahan cáñuhun sēhe jíin ñahan cándeca yiquín, chi ma cúnihīn ña cunu yachī ña. Chi yōhoyo xeēn coo jnúndóho ini ñayiví, te quiji castigo xeēn siquí ñáyuu yáha.

²⁴ Te sava i cuu nuū guerra, te sava i quingoo preso nde táca inga nación. Te ñayuu táca gá nación ndacu nihini i jniñu nuū ñáyuu ñuu Jerusalén, nde jínu tiempo jeē jéhe Yaā Dios jnúhun ndacu i jniñu.

Ndese coo quiví ndiji Yaā ní nduu tēe
(Mt. 24.29-35, 42-44; Mr. 13.24-37)

²⁵ Yūcuán na te coo seña nuū níandii jíin núu yóó jíin núu quími. Te ini ñayiví te quiji jnúndóho xeēn siquí ñáyuu táca nación. Te cunéé ni i, te yúhú i jeē ñáhn xeēn mar te ndónnda xeēn ndute mar vēji nuū ñúhun.

²⁶ Te cuu sōó sava ñayuu jeē cáyūhú i cándetu i táca jnúndóho quiji siquí ñayiví. Te táca jéé ín andiví chí quisi i.

²⁷ Yūcuán na te coto ñayuu nuū maá rí, Yaā ní nduu tēe, ndiji ri jíin vícō, te condiso ri cuehē poder, te yōhoyo luu cujéhu ri.

²⁸ Te núu ni quejéé táca jniñu yáha, te ndeyí coo ni rō, te cocunuū rō andiví, chí je yajni jnama ya rohó. Achí yá jíin de jíjnáhan de.

²⁹ Te suni ni cahān yā jnúhun yátá yáha: Condēhe jíjnáhan ró ndese sáha nundēhe higo jíin táca gá yujnu.

³⁰ Núu cájito ró jéé ní quejéé náne numa yújnu ún, te cájini ró jeé jé yajni coo tiempo jíhni.

³¹ Te suni súcuan núu ni cajito ró jéé ní quejéé cúu táca jniñu jeē ni cahān rí, yūcuán na te na jécuhun ni ró jeé ni cuyajni quiví ndacu Yaā Dios jniñu ini ñayiví.

³² Jendaá cahān rí jíin ró jeé ma cúu ndihi ñayuu tiempo un, chí nde squícu ndihi jniñu ún.

³³ Andiví jíin ñayiví chí naa, te táca jnúhun cáhān rí chí ma náā, chí ndihi squícu.

³⁴ Te coto ma stívi ró maá ró jíjnáhan ró jéé sáha ró táca cuéchi, jíin jéé najini ró, jíin jéé cujneñu ró jíin táca ndajniñu cotecu ró, návaha tú sanaa ni ró te quee quiví un siquí ró.

³⁵ Chi nájnūhun jeē núu in trampa, súcuan quee jnúndóho siquí ñáyuu cáyūcu ní cáhnu ñayiví.

³⁶ Núu súcuan te ndito coo ni rō, te níni cácan tahú ró, návaha cuu cácu ró núu táca jnúndóho jeé quíji ún, te cuu cuiñi ró núu ruhú, Yaā ní nduu tēe. Achí yá.

³⁷ Te ndiquiví steén yā jnúhun ini templo, te ndijnáhan jecuáá jéndōo ya nde yucu jeé naní Olivos.

³⁸ Te táca jénēhen quécōo ñayuu nuū yā ini templo jeē cúni sōho i jnúhun stéén yā.

Jeé ní casqujñáhan de jnúhun jñi de Jesús
(Mt. 26.1-5, 14-16; Mr. 14.1-2, 10-11; Jn. 11.45-53)

22

¹ Yūcuán na te ni cuyajni vico pascua jeé cáyeji ñayuu hebreo pan jeé tú na levadura yíhi.

² Te sutú cácujeñu jíin tēe cástéén tutu ley, ni canducú yuhu de modo cahni de Jesús, chí cáyūhú de jeé quiví ni ñayuu.

³ Te ni quiví Satanás ini anuá Judas jeé nastúu de ya. Te suni nání de Iscariote, te cúu de in jnáhan jeé ndihúxí uū tēe apóstol.

⁴ Te ni jehēn de ni candajñuhún de jíin táca sūtú cácujeñu jíin tēe cándiso jniñu ini templo, núu ndese nastúu de ya nuū tēe un jíjnáhan.

⁵ Te tēe un ní cacusi ni de, te ni cajejnūhun de jeé cuáha de xūhun núu Judas.

⁶ Te ni jetáhú Judas, te ni nducú de modo ndese nastúu yuhu de ya hora jeé tú na ñayuu iyó.

Jeé ní jequin yā Cena yā

(Mt. 26.17-29; Mr. 14.12-25; Jn. 13.21-30; 1 Co. 11.23-26)

⁷ Te ni quee maá quiví vico jeé cáyeji ñayuu pan jeé tú na levadura yíhi, te suni quiví un cájeñi i londe nájnūhun ni ndacu Yaā Dios jniñu jeé sáha i vico pascua un.

⁸ Te Jesús ni tají yá Pedro jíin Juan quingoo de, te achí yá jíin de:

Cuángoo te sátūhva ró jéé cuxíni yó vico pascua, achí yá.

⁹ Te ni cacajñuhún de ya:

¿Ndé nuū cuní ni jéé quisátūhva ná? achí de.

¹⁰ Te ni cahān yā jíin de:

Cuángoo ñuu yūcuán, te núu ni quivícoo ró te najnáhan ró jíin in tēe ndiso quiyi ndute. Te condiquín ró de quihīn ró jíin de nde vehe nuū ndívi de.

¹¹ Te cahān ró jíin tēe chí vehe ún: Achí maá Maestro: ¿Ndé in cúu cuarto vehe ní cuáha núu ní núu cuxíni ya vico pascua jíin tēe cáscuáha jíin yá, achí ró.

¹² Yūcuán na te stéén de in cuarto cáhnu nde xiní vehe jeé je iyó túhva, te yūcuan sátūhva ró jéé cuxíni yó, achí yá.

¹³ Te cuango de, te ni canihīn de nájnūhun ni cahān yā. Te ni casatūhva de jeé cuxíni ya vico pascua.

¹⁴ Yūcuán na te ni jinū hora jeé cuxíni, te ni quee Jesús, te ni cucōo ya mesa jíin tēe cácuu apóstol.

¹⁵ Te ni cahān yā jíin de:

Yōhō ni cuu ni rī cuxini ri jīn ró jijnáhan ró vico pascua yáha, vjna nde ná tu cuu rī.

¹⁶ Chi cáhan rī jīn ró jeē ma cáji cuiti gā rī vico pascua, chi nde quiji quivī ndacu Yāā Dios jniñu nñ ñayiví, te sáá te caji tucu ri, achí yá.

¹⁷ Te ni quihin ya iin copa ndūxi uva, te ni nacuatáhu yá, te ni cahān yā:

Quihin copa yáha, te coho ró jīn jnāhan ró.

¹⁸ Chi cáhan rī jīn ró jeē ndé vjna te ma cóho ga rī ndūxi uva, chi nde quiji quivī ndacu Yāā Dios jniñu nñ ñayiví, te sáá te coho tucu ri. Achí yá.

¹⁹ Te ni quihin ya pan, te ni nacuatáhu yá, te ni tahú cuéchi yá, te ni jēhe ya nuū de jijnáhan de. Te ni cahān yā:

Yāha cúu yiqui cúñu rī jeē socó rī jeē chunaa rī cuéchi ró jijnáhan ró. Te níni caji ró súcuan jeē cáñuhun ni rō ruhū jeē ni jīhí rī jēhē rō. Achí yá.

²⁰ Te suni súcuan ni sáha ya jīn copa ndūxi uva, ná ni cuu ni cuxini ya. Te ni cahān yā jīn de:

Yāha cúu niñi rī jeē cuáha ri jeē cúu contrato jeé, te cati jeē ndundoo cuéchi ró jijnáhan ró.

²¹ Te vjna chi tēe nastúu ruhū, néne de jīn rī nuū mesa yáha.

²² Chi ruhū, Yāā ní nduu tēe, jendaá cúu jeē quihín rī cuu rī nájñuhun je ni sándaā Yāā Dios jeē súcuan coo. Te nacá xeēn ndoho tēe jeē nastúu ruhū, achí yá.

²³ Yūcuán na te ni caquejéé de cácajnūhun jnāhan de ndé iin de cúu jeē nastúu de ya.

Jeē ní cacahān de siquī ndé iin de cújēhnu ga

²⁴ Yūcuán na te yōhō ni cacahān de siquī ndé iin de cújēhnu ga nuū jnāhan de.

²⁵ Te ni cahān Jesús jīn de:

Rey táca nación chi cándacu niñin de jniñu nuū ñayuu cájni de, te cacahān i jeē tēe casáha vāha cúu jeē cácujeñnu nuū i.

²⁶ Te róhó jijnáhan ró, ma cóo ró súcuan. Chi núu ndé iin ró cújēhnu ga, te sa nasáha lulí ró maá ró. Te núu ndé iin ró ndácu jniñu, te sa nasáha ró maá ró tēe jéjniñu nuū jnāhan.

²⁷ ¿Te ndé iin cúu jeē cújēhnu ga, á tēe yéji nuū mesa, chí tēe jéni cohō? ¿A násuu tēe jeē yéji nuū mesa cúu jeē cújēhnu ga? Te ruhū nasúu súcuan cúu rī, chí ni nasáha rī maá rī nájñuhun tēe jéjniñu nuū rō, chí véji rī sáha rī jeē nihín tahú rō.

²⁸ Te maá ró cácuu tēe jeē níni cáhīn jīn rī táca quivī jeē ndóho rī jñúndóho.

²⁹ Núu súcuan te nájñuhun ni sáha Tátá rī jeē ndácu rī jniñu, suni súcuan sáha rī jeē ndácu ró jniñu jijnáhan ró.

³⁰ Te caji ró coho ró jīn rī ini ñuu nuū ndacu rī jniñu. Te cucóo ró iin iin mesa

jeē sándaā rō jniñu ndihúxí uū yucūn Israel. Achí yá.

Jeē ní cachi yā jeē yūhu Pedro cahān de jeē jini de ya

(Mt. 26.31-35; Mr. 14.27-31; Jn. 13.36-38)

³¹ Te suni ni cahān maá Jítóho yō jīn Simón Pedro:

Simón, cuni sōho ró, chí ni jicān Satanás rohó jijnáhan ró jēe coto ndee rohó nájñuhun jeē síjin trigo, te stúu ndé iin ró cácuu nájñuhun paja jeē nayūhu ró, te ndé iin ró cácuu nájñuhun trigo jeē candije niñin ró.

³² Te ni jicān tahú rī jēhē rō návāha ma nayūhu ró jeē ma cándije ga rō. Te jeē nácandije tucu ró, te sáha ró jēe ije táca jnāhan ró jīn jñuhun rī. Achí yá.

³³ Te ni cahān de jīn yá:

Je iyó túhva ná quihín na jīn ní vecāa te vésu na cuu na jīn ní, achí de.

³⁴ Te ni cahān yā:

Pedro, cáhan rī jīn ró jeē nde ná tu cana líhli vjna, te yūhu ró jeē jniñ ñayuu rohó, te uní jinu cahān rō jeē tu jini rō ruhū, achí yá.

Jeē ní cuyajni coto ya jñúndóho

³⁵ Yūcuán na te ni cajñuhun yá de jijnáhan de:

Ná ni tají rí rohó ní jengoo ró jēe tu ní cóndiso ró ñunu ni yijni xūhún ni ndijēn, ¿te á ní iyo iin jeē ní cumaní nuū rō? Achí yá.

Te ni cacahān de:

Tú ni iin ní cumaní.

³⁶ Te ni cahān yā:

Nde vjna sa cáhan rī jeē cóndiso ró ñunu ró, te suni yijni xūhún. Te tēe jeē tu névāha espada jeē coto de maá de, na xico de ticáchí de te na cuāan de.

³⁷ Chi cáhan rī jīn ró jeē quee quivī ndoho yó jñúndóho, chí cánuu squicu jñuhun yáha jēe cahān nuū tútu siquī rī: Sáha ñayuu jīn yá nájñuhun cáśáha i jīn tēe sáha cuéchi xeēn, achí tutu. Chí táca jñuhun un jēe yosó cáhan siquī rī, chí squicu nahín, achí yá.

³⁸ Yūcuán na te ni cacahān de:

Yáha iyó uū espada, achí de.

Te ni cahān yā jīn de:

Jīn jēe yáha-ni, achí yá.

Jeē ní jicān tahú yā nuū huerto Getsemani
(Mt. 26.36-46; Mr. 14.32-42)

³⁹ Te ni quenda ya cuahān yā yucu Olivos nájñuhun sáha sáha ya. Te tēe cácuáha jīn yá ni candiquin de ya cuangoo de jīn yá.

⁴⁰ Te nuū ni jínú yā yūcuán, te ni cahān yā jīn de:

Cacān tahú rō jijnáhan ró jēe chindéé ñáhan yá rohó jēe ma sáha ró cuéchi núu coto ndee jeneé róhó, achí yá.

⁴¹ Te ni jica ya jecu, cúhva jeē jicá jínú yūū jeē squiín. Te ni jecuiñi yití yá, te suhva ni jicān tahú yá:

42 Tātā, núu cúní ní te tejiyo ní jnündóho yáha jéé ma quíji siquī ná. Te nasūu jéé cuní maá ná, chí jeé cuní maá ní na cóo, áchí yá.

43 Te ni cane iin ndajéhé andiví núu yá, te ni jéhe fuerza nuū yá.

44 Te cúcuhyá ndasí ní yá jeé quiíji jnündóho siquī yá, te ni nducú ndéyí gá yá ní jicān tahú yá. Te ni cane jnañū yá, te tóo nuū ñūhun nájñūhun yúyú náhnu niñí.

45 Te ná ní ndocuiñí yá jeé ní jicān tahú yá, te ni ndee yá nuū téé cáscuáha jíin yá. Te ni jito ya jeé cáquixí de, chí tuá cáhiyo ndeyí ní de cacān tahú de jeé cácuquíhyá ndasí ní de.

46 Te ni cahān yá jíin de:

¿Naun cáquixí rō? Ndongda te cacān tahú rō jeé chindéé ñáhan yá rohó jéé ma sáha rō cuéchi jeé cóto ndee jeneé rohó. Achí yá.

Jeé ní cajñí de Jesús

(Mt. 26.47-56; Mr. 14.43-50; Jn. 18.2-11)

47 Te sá cáhān gá yá súcuan, te ni quecoo cuehē ñayuu. Te téé nání Judas, iin jnáhan jeé uxi uū téé scuáha jíin yá, yósnū de nuū ñayuu un véjí de. Te ni quee de nde nuū Jesús, te ni techúhú de ya, te súcuan ní nastúu de ya.

48 Te ni cahān Jesús jíin de:

Judas, ¿á jíin jéé téchūhú rō ruhú cúu jeé nastúu rō ruhú, Yaa ní nduu téé? Achí yá.

49 Te téé cáhiin jíin yá, ní cajito de jeé ní quejéé cúu, te ní cacajñūhún de ya:

¿A ndonda ná jíinánhan ná siquí de jíin espada? áchí de.

50 Te iin de ní stují de mozo sutū cujéhnu ga, chí ní jehnde de sóho lado váha.

51 Te ni cahān Jesús:

Siáá, na jécuiñí, achí yá.

Te ni tee ya ndaha ya sóho mozo un, te ni nasáváha ya de.

52 Te ni cahān yá jíin sūtū cácuquíhnu jíin téé cándiso jñíñu ini templo jíin táca téé jéhnu jeé ní quecoo de jeé jñí de ya:

¿Te va téé cuihná cúu ri jeé véjicoo rō jíin espada jíin yujnu jeé jñí rō ruhú jeé súcuan?

53 Táca quíví ní ine ri jíin rō jíinánhan rō ini templo cáhnu, te tu ní cájñí rō ruhú. Te vijna te ní quee hora jeé jñí rō ruhú jíin jéé sáha rō táca jñíñu jeé ndácu jeneé jéé ndeé núu néé. Achí yá.

Jeé ní cachi Pedro jeé tu jíin de ya

(Mt. 26.57-58, 69-75; Mr. 14.53-54, 66-72; Jn. 18.12-18, 25-27)

54 Te ni cajñí de ya cuango de jíin yá vehe sutū cujéhnu ga. Te Pedro chí jíicá-ni ndíquín de ya.

55 Te táca policía ní cascáyú de ñūhūn ini patio, te ni condúu de yuñúhún un cáyūcú de. Te suni ní cucóo Pedro jíin de.

56 Te iin ñahan jéjñíñu ini vehe un, ní jito ña nuū de jeé néne de yuñúhún. Te ní jito váha ña nuū de, te ni cahān ña:

Téé yáha suni ní jica de jíin téé ún, áchí ña.

57 Te maá de tu ní cáchi de, chí ní cahān de: Tu jíin rí téé ún, áchí de.

58 Te ni cunúu jecu gá, te ni jito tucu inga ñayuu nuū Pedro, te ni cahān:

Róhó, suni jnáhan táca téé un cúu ró, áchí.

Te ni cahān Pedro:

Nasúu cúu rí, ombre, achí de.

59 Te ni cuu nájñūhun iin hora gá, te ni cahān ñihin inga de:

Jendaá ndije jeé téé Galáha ní jica de jíin téé ún, chí suni téé región Galilea cúu de, áchí de.

60 Te ni cahān Pedro:

Hombre, tu jíin rí na jñūhun cáhān rō.

Te sá súcuan cáhān gá de, te ni cana-ni líhli.

61 Yūcuán na te ní ndió cóto maá Jítoho yó, te ní jito ya nuū Pedro. Te ní nucūhun ní de jñūhun ní cahān yá jíin de: Nde ná tu cana líhli, te yūhu ró te cahān rō uní jínu jeé tu jíin rō ruhú.

62 Te ní quenda de cuahān de, te yóhoyo ní ndahyū de jeé ní cachi de jeé tu jíin de ya.

Jeé ní casacatā de nuū yá

(Mt. 26.67-68; Mr. 14.65)

63 Te táca téé cándito Jesús, ní casacatā de nuū yá, te ní cacani de ya.

64 Te ní cajesi de sahna nuū yá, te ní cacani de nuū yá, te ní cacahān de:

Cachi ndé iin cúu jeé ní caní rohó, áchí de.

65 Te cuehē gá jñūhun súcuan ní cacahān neé de jíin yá.

Jeé ní indichi Jesús nuū junta téé cácuquíhnu ga

(Mt. 26.59-66; Mr. 14.55-64; Jn. 18.19-24)

66 Te jeé ní cundijin, te ní candutútú táca téé jéhnu cándacu jñíñu nuū ñayuu hebreo, jíin sūtū cácuquíhnu, jíin téé cástéén tuntu ley Yaa Dios. Te cuango de jíin yá nuū junta téé cácuquíhnu ga, te yūcuán ní cacajñūhún de ya:

67 Cachi, ¿á maá ró cúu Cristo jeé ní tají Yaa Dios? Achí de.

Te ni cahān yá jíin de:

Vesú na cáhān rí jeé suu ri cúu, te ni ma candíje cuiñí rō.

68 Te suni núu cajñūhun maá rí rohó jíinánhan rō, te suni ma stió cuiñí rō nuū rí, ní ma siaá rō ruhú.

69 Te ruhú, Yaa ní nduu téé, táca quíví jeé quíji conene ri lado váha maá Yaa iyó poder, achí yá.

70 Yūcuán na te ndihi de ní cacajñūhún de ya:

¿A maá ró cúu Sēhe Yaa Dios núu súcuan?

Te ni cahān yá jíin de:

Suu ri cúu, nájñūhun cáhān rō, achí yá.

71 Yūcuán na te ní cacahān de:

¿Na testigo gá jíiní ñūhún yó núu súcuan? Chí ní cajini sóho yó jíin yuhu maá de jeé cáhān ndeváha de jeé cúu de Sēhe Yaa Dios. Achí de jíinánhan de.

Jeē ní indichi Jesús nuū Pilato
(Mt. 27.1-2, 11-14; Mr. 15.1-5;
Jn. 18.28-38)

23

1 Yūcuán na te ni candocuiñi ndihi de, te cuangoo de jín yá nuū Pilato.

2 Te yūcuan ní caquejeé de cácahān de cuēchi siquī yā:

Ni canihñ na tēe yáha jēe stóna de ñayuu siquī tohō. Te cáhān de jeē tú vāha jeē cuāha ná xúhun renta nuū rey nación Roma jeē ndácu jniñu nuū nación na. Te suni cáhān de jeē maá de cúu Cristo, Rey jeē ní tají Yaa Dios. Achí de jijnáhan de.

3 Yūcuán na te Pilato ní cajñuhún de ya:

¿A maá ró cúu Rey ñayuu hebreo?

Te ni cahān yā:

Suu ri cúu, nájñuhun cáhān rō, achí yá.

4 Te ni cahān Pilato jín sūtū cácujeñu jín ñayuu cuehē ún:

Tú ni ññuhun stívi cáhān tēe yáha jēe nihín rī cuēchi siquī de, achí de.

5 Te maá de víhyá gā ní cacahān de:

Tēe yáha stóna ndasí de ñayuu siquī tohō jín jñuhun stéén de ní Judea. Chí ní quejeé de stéén de nde Galilea, te vijna te nde yáha, achí de.

Jeē ní indichi Jesús nuū Herodes

6 Te nuū ní jini sōho Pilato jeē Galilea cácahān, te ni cajñuhún de ñayuu núu tēe región Galilea cúu ya.

7 Te nuū ní cacahān ñayuu jeē cúu ya tēe Galilea, te ni ndacu de jniñu jeē na quingoo de jín yá nuū Herodes, tēe cúu gobernador Galilea. Chí quiví ún suni íne Herodes ñuu Jerusalén.

8 Te nuū ní jito de nuū Jesús, te yōhyo ní cusñi de, chí je ní cuu cuehē tiempo jeē cuní de coto de nuū yā. Chí ní nihín de jñuhun ya, te ññuhun ní de jeē sáha ya ññ jniñu jēhnu coto de.

9 Te ní cajñuhún de ya cuehē jñuhun, te tu ní stío cuñí yā ní ññuhun nuū de.

10 Te suni cáhñi táca sūtū cácujeñu jín tēe cástéén tutu ley, te nihín ní cacahān de cuēchi siquī yā.

11 Yūcuán na te Herodes jín táca soldado de ní cacahān neé de jín yá, te ní casácatā de nuū yā, chí ní cachuhun de ya sahna váha luu jeē cúu sahna rey. Te Herodes ní ndacu de jniñu jeē na quíndeca de ya nuū Pilato.

12 Te maá quiví un ní candumaní jñahan Pilato jín Herodes, chí ichi yátā ní caquiti jñahan ní de.

Jeē ní cundaā jeē cúu yā

(Mt. 27.15-26; Mr. 15.6-15; Jn. 18.39-19.16)

13 Yūcuán na te ní cana Pilato táca sūtū cácujeñu jín táca tēe cándiso jniñu jín táca gā ñayuu, ní candutútū.

14 Te ní cahān de:

Ni caquindeca ró tēe yáha núu rī, jeē cácahān rō jeē stóna de ñayuu siquī tohō. Te je ní stichí rī de, ní cajito jínúu rō. Te tu ní nihín rī ní ññ cuēchi siquī de nájñuhun jeē cácahān rō.

15 Te ní Herodes, tu ní nihín de, chí ní natají tucu de tēe yáha núu rī. Te tú cuiti ní ññ cuēchi ní sáha de jeē cúu de.

16 Núu sūcuan te na cuáha ri castigo de, te siaá rī de quihñ de, achí Pilato.

17 Te íyó costumbre jeē táca vico pascua siaá Pilato ññ preso jeē cuní ñayuu.

18 Te ñayuu cuehē ún, inuú-ni ní cacana jee i:

Na cúu tēe jíñá, te siaá ní Barrabás, achí i.

19 Te Barrabás íne de vecāa siquī jeē ní stóna de ñayuu siquī tohō iní ñuu ún, te ní jehni de ndíyi.

20 Te Pilato cuní de siaá de Jesús, te ní cahān tucu de jín ñayuu.

21 Te maá i víhyá gā ní cacana jee i:

Cata caa ní de jicā cruz, na cúu de, achí i.

22 Te ní cahān tucu de jín i vuelta uní:

¿Na cuēchi ní sáha de núu sūcuan? Tu ní nihín cuiti rī ní ññ cuēchi siquī de jeē cúu de. Núu sūcuan te na cuáha ri castigo de, te siaá rī de quihñ de, achí Pilato.

23 Te víhyá gā ní cacana jee ñayuu un, ní cacahān nihín i jeē na cúu yā jicā cruz. Te maá i jín táca sūtū cácujeñu, ní cacana jee ndasí i. Te ní cacundeýi i ní cascāhñ i Pilato jeē na cúu yā.

24 Yūcuán na te ní ndacu Pilato jniñu jeē na cóo nájñuhun cáculi i.

25 Te ní siaá de tēe jeé ní cajicān i, tēe jeé íne vecāa jeē ní stóna de ñayuu siquī tohō te ní jehni de ndíyi. Te ní jēhe de jñuhun jeē na cúu Jesús nájñuhun cáculi i.

Jeē ní cacata caa de ya jicā cruz

(Mt. 27.32-44; Mr. 15.21-32; Jn. 19.17-27)

26 Te cuangoo táca soldado jín yá jeē cahni de ya jicā cruz. Te ní canihñ de ññ tēe ñuu Cirene, nání de Simón, vendiji de jeē ní jēhē de rancho. Te ní catejñu de tēe un jēe cóndiso de cruz yā quihñ de yatā yā.

27 Te cuehē ndasí ñayuu ndíquin i yatā yā cuangoo i. Te suni cuehē ñahan cuangoo ña, te cándahyū cohō ña jeē cácuclíhyá ní ña jēhē yā.

28 Te ní ndío cóto Jesús nuū ña, te ní cahān yā:

Róhó ñahan Jerusalén jijnáhan ró, ma ndahyú rō jehē rī, chí sa suhva ndahyú rō jehē maá ró jín jēhē sēhe ró jijnáhan i.

29 Chí quee quiví jeē coo jñundóho xeñ siquī rō, te cahān rō: Yōhyo ndetū táca ñahan númá, jín jēe tu ní scácu sēhe, jín jēe tu ní cóndeca yiquín, chí tú sēhe ña jeē jnahuhū ní ña jeē ndóho i, achí ró jijnáhan rō.

30 Quiví ún te quejeé ñayuu cahān i jín táca yucu: Cotúú siquī rī jijnáhan rí návaha cuu rī.

Te suni jíin táca loma: Casi siquī rī jijnáhan rī, achí i.

³¹ Chi núu casáha xeēn i jíin rúhū jeē tú na cuēchi rī, te nagā ni cuu jeē ma cóo xeēn siquī ndíhi ñayuu chí iyó cuēchi i. Achí yá.

³² Te suni cuangoo de jíin ūū tēe ni casáha cuēchi xeēn, jeē suni cuu de jíin yá.

³³ Te ni jinūcoo de lugar nuū naní Yiqui Xíní, te yūcuan ní cacata caa de ya jicā cruz. Te suni ní cacata caa de ndindúú tēe ni casáha cuēchi xeēn un núu uū gā cruz, in de lado váha ya, te inga de lado jecó yá.

³⁴ Te níni jēe súcuan cúu, te ni cahān Jesús: Tátá, cone cáhnu ni ní núu de jijnáhan de, chí tu cájini de na vé casáha de, achí yá.

Te soldado un ní casáha de sorteo jeē siquī ndese nihin in de sahma ya.

³⁵ Te cáhiin ñayuu yūcuan, cájito i nuū yá. Te suni nde tēe cándiso jniñu, cácahān catá de cájito de ya:

Núu inga ñayuu ni jnama de, te na jnáma de máa de vijna, te núu ndaā jeē Cristo jeē ní nacáji Yaā Dios cúu de, achí.

³⁶ Te táca soldado suni ni casácatá de nuū yá, chí ni quecoo de nde nuū yá, te ni cajēhe de vinagre iyá coho ya.

³⁷ Te cácahān de jíin yá:

Núu máá ró cúu Rey ñayuu hebreo, te na jnáma ró máá ró, achí de.

³⁸ Te suni ni iyo jnūhun jeē ndeé xiní cruz yá jeē cahān na siquī ní jihí yá, te suhva yósó jíin yuhu griego jíin latín jíin hebreo: Yáha cúu Rey ñayuu hebreo, achí.

³⁹ Te in jeē ndindúú tēe ni casáha cuēchi xeēn, jeē cándita caa, ni cahān neé de nuū yá:

Núu máá ró cúu Cristo, te na jnáma ró máá ró te suni jnama ró ndindúú rī, achí de.

⁴⁰ Te inga de ni cahān de nuū jnáhan de:

¿A tu yúhú ró Yaā Dios naún? Chi inuú cándoho yó jíin Yaā Dios.

⁴¹ Te máá yó chí vetū-ni cándoho yó, chí yáha cánihin yó castigo siquī jniñu neé ní casáha yó. Te Yaā yáha chí tú ni in cuēchi ní sáha ya, achí de.

⁴² Te ni cahān de jíin yá:

Jesús, nucūhun ni ní saña jéé quéjéé ní ndacu ní jniñu, achí de.

⁴³ Yūcuán na te ni cahān Jesús jíin de:

Jendaá cahān rī jíin ró jeē vijna te condee ró jíin rī nuū jardín andiví, achí yá.

Jeē ní jihí Jesús

(Mt. 27.45-56; Mr. 15.33-41; Jn. 19.28-30)

⁴⁴ Te nuū ní cuu nájnūhun cahuxí uū, te ni cunee ní cáhnu nde cahuní.

⁴⁵ Te ni cujnuú níandii. Te sahma ndíta caa jeē ndihyú cuarto ñi ini templo cáhnu, ní ndatā-ni sava sava.

⁴⁶ Yūcuán na te ní cana jee Jesús:

Tátá, naquihin ní ánuá na, achí yá.

Te súcuan ní cahān yá, te ni jihí-ni ya.

⁴⁷ Te tēe nación Roma jeē cúu capitán ni jito de jeē súcuan ni cuu, te ni cahān de jeē yóhoyo cújéhnu Yaā Dios, te áchí de:

Jendaá ndije jeē tēe tú na cuēchi cúu tēe yáha, achí de.

⁴⁸ Te ndivii ñayuu cáhiin yūcuan ní cajito i táca jéé ní cuu, te cácani i yiqui jicā i jeē cájnahunū ni i, te ni nandió cóo i cuanungoo i.

⁴⁹ Te táca ñayuu cájini jnáhan jíin yá, jíin táca ñahan Galilea jeē ní cajica ña jíin yá, cáhiin jicā ña cájito ña táca jéé ní cuu.

Jeē ní quindūji Jesús

(Mt. 27.57-61; Mr. 15.42-47; Jn. 19.38-42)

⁵⁰ Te ni iyo in tēe váha tēe ndaā, naní de José. Te tēe ñuu Arimatea ndaíuū Judea cúu de. Te cúu de jnáhan táca tēe hebreo cácujeñu ga jeē casáha junta.

⁵¹ Te ñúhun ni de jeē quívi quívi jeē ndacu Yaā Dios jniñu, te suni tu ní núnjahan ni de jeē ní casándaá junta un jéé cúu Jesús.

⁵² Te tēe un ní jehēn de nuū Pilato, ni jicān de yiqui cúñu Jesús.

⁵³ Te ní snúu de ya jicā cruz, te ni chusúcún de ya in sahma cuitá. Te ni chindūji de ya ini in yaū jeē ní caan jicā in cava, nuū ná tu quindūji ndíyi.

⁵⁴ Te quívi un cúu quívi casátūhva ñayuu, chí jehíni un quéjéé quívi ndétátú.

⁵⁵ Te ñahan ní quijicoo jíin yá nde Galilea, ni jengoo ña jíin José, te ni cajito váha ña yaū ún, jíin ndese ní cachindūji de ya.

⁵⁶ Te cuanungoo ña vehe ña, te ni casátūhva ña táca perfume jíin aceite yucú jeén asin. Te ní candetátú ña quívi ndétátú, nájnūhun ndácu ley Yaā Dios jniñu.

Jeē ní natecu Jesús

(Mt. 28.1-10; Mr. 16.1-8; Jn. 20.1-10)

24

¹ Te jenēhen ndasí quívi domingo, te ni jinūcoo tucu ñahan un núu ní yindūji Jesús, te cándahá ña táca perfume jíin aceite ní casátūhva ña. Te suni cuangoo sava ga ñahan jíin ña.

² Te nuū ní jinūcoo ña, te ni cajito ña jeē ní cujiyo yuú ndihyú yuyáú ndíyi.

³ Te ni quívicoo ña yaū ún, te tuá yiqui cúñu Jitoho yó Jesús ní cájito ña.

⁴ Te ni cacunéé ní ña cájito ña jeē tuá ndíyi. Sáa te ni cajito ña uū ndajéhé Yaā Dios jeē cáa nájnūhun tēe, cáhiin ya xiin ña, te cáñūhun ya sahma ndíndéé.

⁵ Te yóhoyo ní cayuhú ña, te ni cajexin ña nuū ña nde nuū ñúhun. Te ni cacahān ndajéhé un jíin ña:

¿Naun sa nuú cáyindūji ndíyi cándacú ró Yaā técu?

⁶ Tuá yá yáhá, chí je ni natecu yá. Te nucūhun ní ró ndese ní cahān yá jíin ró ná ine ga yá región Galilea.

⁷ Chi ni cachi ya jeē maá yá, Yaā ní nduu tēe, cánuú natūu ya nuū tāca tēe cáhīyo cuēchi, jeē jñi de ya cahni de ya jicā cruz, te nuū unī quivī te natecu yā. Achí ndajéhé un.

⁸ Yūcuán na te ni canucūhun ni ña tāca jñūhun ni cahān Jesús.

⁹ Te ni quendacoo ña nuū ní yindūji ya, te cuanungoo ña. Te ni canacani ña tāca jñūhun yáha nuū ndihúxi ñin apóstol jín nuū tāca gá de.

¹⁰ Te ñahan ní canacani jñūhun yáha nuū tēe cácuu apóstol, cúu ña María ñuu Magdala, jín Juana, jín María naná Jacobo, jín sava ga ña.

¹¹ Te tācá apóstol chi cájeni ni de jeē jñūhun cáneé cáñúú cacahān ña, te tu ní cácan dije de.

¹² Te vésú súcuu, te Pedro ni quenda de, te jínu de cuacandéhé de nuū ní yindūji ya. Te ni jito nihni de ini yaū, te ni jito de jeē sahna cuitá un cáyūcu maá na. Te cuanuhun de vehe de, te nahān náa ni de jeē ní jito de jeē tuá yā.

Jeē ní ndajñūhun yá jín ún de ichi cuáhán Emaús

(Mr. 16.12-13)

¹³ Te suu quivī un cuángoo uū jnāhan de ñin ñuu naní Emaús, jeē jicá nájñūhun uxī ñin kilómetro jín ñuu Jerusalén.

¹⁴ Te cándajñūhún de siquī tācá jñiñu jeē ní cuu ún.

¹⁵ Te níni cándajñūhún de te cácajñūhun jnāhan de, te maá Jesús ni cuyajni ya yatá de, te jica ya cuahān yā jín de.

¹⁶ Te ni sáha jín de jeē tu ní cánacuni de ya, vésú cájito de nuū yā.

¹⁷ Te ni cajñūhun yá de:

¿Na jñūhun cándajñūhun ró cájica ró? ¿Te najehē cácuuñhá ní ró? Achí yá.

¹⁸ Te ñin de jeē naní Cleofas ni cahān de jín yá:

Ndihí cuiti ñayuu cájini i tācá jñiñu ní cuu ini ñuu Jerusalén tāca quivī yáha. ¿Te á máñúhún-ni nihín cúu jeē ní quee ní ñuu un jéu tu jín ní na vé ni cuu? Achí de.

¹⁹ Te ni cajñūhun yá de:

¿Te na vé ni cuu? Achí yá.

Te ni cacahān de jín yá:

Jeē ní ndoho Jesús ñuu Nazaret, Yaā ní nacani jñūhun Yaā Dios. Te jín poder Yaā Dios ni sáha ya tācá jñiñu jéhu te ni nacani ya jñūhun, jito jínúu Yaā Dios jín tāca ñáyuu.

²⁰ Te sutū cácujuhnu jín tēe cándiso jñiñu nuú ná, ni canastúu de ya nuú tāca tēe Roma, te tēe un ní casánda de jeē cúu yā jicā cruz.

²¹ Te maá ná ní cañūhun ni na jéé maá yá jnama ya nación na Israel nuū ñáyuu Roma nuú. Te siquī tācá jñiñu yáha, te ni cane ñga jñūhun. Chi vijna je íyo ún quivī jeē ní cuu ún.

²² Te sava ñahan cájini jnāhan ná jín, ni canacani ña ñin jñūhun jeé yóhoyo cánaa ni na

sáha, chi cacahān ña jeē ní natecu yā. Chi jenéhen ndasí ní jengoo ña yaū ndiyi ún.

²³ Te tuá ni cájito ña yiqui cúñu yā. Te ni ndecoo ña nuū na jjnāhan ná, te cacahān ña jeē ní cajito ña jeē ní canecoo ndajéhé Yaā Dios nuū ña, te ni cacahān jeē ní natecu Jesús.

²⁴ Te ni jengoo sava jnāhan ná ndé yaū ndiyi ún, te ni cajito de jeē súcuu íyo, nájñūhun ni cacahān ñahan ún, te tu ní cájito cuiti de nuū yā.

²⁵ Yūcuán na te ni cahān maá yá jín de:

Tēe tu cájecūhun cuiti ní cácuu ró. Yóhoyo uhū cácan dije ró tāca jñūhun Cristo ni cacahān tēe ni canacani jñūhun Yaā Dios nde jenahān.

²⁶ ¿Te á tu súcuu ní jíní ñúhún ndoho Cristo tāca jñúndóho yáha, te sáa te quinhun yā nuū lúu cujéhu ya? Achí yá.

²⁷ Te ni nacani cáji yá tāca jñūhun jeē yosó nuú tútu ñi jeē cahān siquī maá yá. Te ni quejéé yá jín jñūhun ni tee Moisés, te ni cahān gā yā tāca jñūhun jeē ní catee tēe ni canacani jñūhun ya nde jenahān.

²⁸ Te nuū ní jínúcoo de ñuu nuú cuángoo de ún, te Jesús ni sáha ya jeē cáca ga yá quihín yā.

²⁹ Te maá de ni castétu de ya, ni cacahān de jín yá:

Ndōo ní vehe ná, chi je ni ini te je yajni cuaa, achí de.

Yūcuán na te ni quivī ya jeē quéndōo ya jín de.

³⁰ Te nuū ní cucōo ya mesa jeē cáji yā jín de jjnāhan de, te ni quihín ya staā, te ni jicān tahú yā, te ni tahú cuéchi yá, te ni jéhe ya nuú de.

³¹ Te jeē sáha ya súcuu, te nájñūhun ni cananume tinúu de, te ni canacuni de ya. Te ni ndoñúhún-ni ya nuú de cuahān yā.

³² Te ni cacahān maá de:

Jendaá jeē yóhoyo ni cacusiñ ní yō ná ni nacani ya jñūhun nuú yō ichi ún te ni castúhun cáji yá jñūhun cahān tutu ñi. Achí de.

³³ Yūcuán na te yachí ni canaquihín de ichi, ni canandicó de cuanungoo de ñuu Jerusalén. Te ni canajñāhan de jín ndihúxi ñin ga apóstol, cáyūcu tútu de jín sava ga jnāhan de.

³⁴ Te ni cacahān tēe cáyūcu tútu un:

Jendaá ndije jeē ní natecu maá Jítoho yō, te ni nane ndijin yā nuú Simón, achí de jjnāhan de.

³⁵ Yūcuán na te ndindúú tēe un ní canacani de jñūhun ndese ni najñāhan ya jín de ichi, jín ndese ni canacuni de ya ná ni tahú cuéchi yá staā.

Jeē ní nane ya nuú tēe cáscuáha jín yá (Mt. 28.16-20; Mr. 16.14-18; Jn. 20.19-23)

³⁶ Te sá cáhān gā de tāca jnūhun yáha, te ni jecuiñi-ni Jesús mehñú de jijnáhan de. Te ni cahān yā jín de:

Ndeyí sñ coo ni rō jijnáhan ró, áchí yá.

³⁷ Te ni candacoto iyo de, ni cayūhú ndasí de, chí ni cajeni ni de jeē ñn ánuá cúu ya.

³⁸ Te ni cahān yā jín de:

¿Naun cáyūhu ró, te naun cájeni siquí ni rō súcuan?

³⁹ Condēhé ndaha ri jín jēhē rī, te cuni rō jeē maá rí cúu. Jñi ruhū te cuni rō, chí ñn ánuá tu névāha cūñu ni yiqui nájñūhun cájito ró jēē névāha maá rí, achí yá.

⁴⁰ Te jeē ni cáhān yā súcuan, te ni steén yā ndaha ya jehē yā nuū ni yíhi ndūyu cāa.

⁴¹ Te yōhyo ni cacusiñ ni de, te cánaa ni de. Te vēsú súcuan te ná tu candíje vāha vāha de jeē maá yā cúu. Te ni cahān yā jín de:

¿A cánevāha ró jecu jeē cáji rī yāhá? áchí yá.

⁴² Yūcuán na te ni cajēhe de ñn pedazo chācá ní tau nuū yā, jín ñn pedazo ñahmā ndūxi yocō.

⁴³ Te ni quihñ ya, te ni yeji yā nuū de jijnáhan de.

⁴⁴ Te ni cahān yā jín de:

Tāca jēē ní cuu jín rí cúu jeē ni cáhān rí ná ni ine ri jín ró jijnáhan ró ndé saá, jeē cánuú squícu tāca jnūhun ri jeē yosó nuū tútu ley Moisés, jín núu tācá tutu tēe ni canacani jñūhun Yaā Dios, jín núu tútu salmo, achí yá.

⁴⁵ Te ni nune ya jeē nijnūni de, návāha cuu jecūhun ni de tāca jēē cahán tutu ñ.

⁴⁶ Te ni cahān yā:

Súcuan cáhān nuū tútu jeē ruhū Cristo, cánuú cuu rī, te nuū uní quiví natecu rī.

⁴⁷ Te cuitē núu jñūhun ri jeē cánuú nacani ni ñayuu jeē stóo i cuēchi i, te cone cáhnu ni Yaā Dios nuū i. Te ñuu Jerusalén quejéé cuitē núu jñūhun yáha, te quihñ nuū ñayuu tācá nación.

⁴⁸ Te maá ró cácuu tēe nacani jñūhun tācá jñiñu ní cajito ró.

⁴⁹ Te tají rí Espíritu Santo quiji ya nuū rō jijnáhan ró, nájñūhun ni jejnūhun Tátá rī. Te na quéndōo ró ñuu Jerusalén condetu ró ndé nihñ rō poder Espíritu Santo jeē quiji nde andiví. Achí yá.

Jeē ní ndaa ya cuanuhun yā andiví

(Mr. 16.19-20)

⁵⁰ Yūcuán na te ni quenda ya ñuu Jerusalén, cuahān yā nde ñuu Betania jín de jijnáhan de. Te ni ndonehen ya ndindúú ndaha ya, te ni jicān tahu yā jehē de.

⁵¹ Te níni jicān tahu yā jehē de, te ni cujiyo-ni ya nuū de, ni ndaa ya cuanuhun yā andiví.

⁵² Te maá de ni cachññuhún de ya. Te saá te cuanungoo de ñuu Jerusalén, te yōhyo cácusñ ni de.

⁵³ Te níni cáhñin de ini templo cáhnu, cáacuatahú de nuū Yaā Dios. Te ni cuu. Amén.

JNUHUN VAHA NI TEE SAN JUAN

Yaā nani Jnūhun Yaā Dios ni nduu ya tē

¹ Nde xihna űūhún ná ni jecōo ndihi jeē iyó, te je iyó Yaā nani Jnūhun Yaā Dios, chí steén yā ndihi jnūhun ndese Yaā cúu Yaā Dios. Te Yaā nani Jnūhun un ndeé yá jín Yaā Dios, te Yaā Dios cúu ya.

² Máá yá ndeé yá nde jeē xihna űūhún jín Yaā Dios.

³ Te ni sáha Yaā Dios jeē jín máá yá ni jecōo ndihi táca jéé iyó. Te ma jécōo ni ñin jeē iyó núu tu ní sáha máá yá.

⁴ Máá yá sáha jeē técu ndihi-ni, te máá yá cúu luz jeē steén ini anuá ñayuu, cúu jeé sáha ya jeé jécūhun ni i siquí Yaā Dios.

⁵ Te Yaā cúu luz ún ndíndēe núu ñayuu tu cájica ndaā, jeé nájnūhun cáhīyo i nuū néé. Te ñayuu cáhīyo nuū néé tu cúu ndahva i luz yā.

⁶ Te ni iyo ñin tēe jeē ní tají Yaā Dios, nani de Juan.

⁷ Tēe un ní quiji de jeē nacani cájī de jnūhun máá Yaā cúu luz, návaha candíje táca ñayuu jeé jín jnūhun cáhán de.

⁸ Nasūu máá Juan cúu luz ún, chí cúu de ñin jeé ní nacani cájī jnūhun máá luz un.

⁹ Te máá Yaā cúu luz ndíje jeē steén ini anuá táca ñayuu, nde saá ní quiji ya ini ñayví.

¹⁰ Te Yaā cúu Jnūhun Yaā Dios ni condee yā ini ñayví, te vesú jeé jín máá yá ní sáha Yaā Dios ñayví, te ñayuu ñayví tu ní cácuni i cuatáhu i jeé máá yá cúu.

¹¹ Ní quiji ya nuū ñayuu máá yá nación hebreo, te ñayuu ún tu ní cájetáhu i ya.

¹² Te vesú súcuan te sava ñayuu chí ní cajetáhu i ya, te ní cacandíje i jeé sáha ya jehé i. Te nuū máá i ní jēhe ya jnūhun jeé ndúu i sēhe Yaā Dios.

¹³ Te jeé ndúu i sēhe Yaā Dios, nasūu jín modo jeé cácacu ñayuu ini ñayví, ní nasūu siquí jeé cácuni tēe, chí máá Yaā Dios sáha ya jeé ndúu i sēhe ya.

¹⁴ Te máá Yaā cúu Jnūhun Yaā Dios ni nduu ya tēe, te ní condee yá jín yó. Te ní cajito yó jéé yóhōo luu cújéhu ya, chí máñūhún-ni ya cúu Sēhe Tátá yā, Yaā cújéhu súcuan. Te máni máá jéé sáha ya jeé váha yóhōo, te máni máá jnūhun ndaā cáhán yā.

¹⁵ Te Juan ní nacani de jnūhun ya, te ní cahān de:

Yaā váha cúu jeé ní cahān rī náa áhí rí jeé Yaā quiji chí cújéhu ga yá vesú ruhū, chí je iyó yá nde ná tu cacu rí, áhí de.

¹⁶ Te ndihi yó ní canihín yó cuehē ndasí jeé váha íyó núu yā, chí máni jeé váha sáha sáha ya jín yó.

¹⁷ Moisés ní steén de ley Yaā Dios nuū ñayuu jenahán, te Jesucristo chí sáha ya jeé váha yóhōo te steén yā táca jnūhun ndaā Yaā Dios nuū yó.

¹⁸ Tú ní ñin ñayuu ní jito cuiti nuū Yaā Dios. Te máñūhún-ni Sēhe ya jeé ndeé yá jín Tátá yā, suu ya ní steén nuū yó ndese Yaā cúu Yaā Dios.

Jnūhun Jesús jeē ní cahān Juan tēe scuándute

(Mt. 3.11-12; Mr. 1.7-8; Lc. 3.15-17)

¹⁹ Te ñayuu hebreo ñuu Jerusalén, ní catajī i jecu sutū jín tēe grupo levita jeé cájejniñū ini templo, ní jengoo de nuū Juan, návaha cajñūhún de ndé ñin cúu Juan te na jniñū ndíso de.

²⁰ Te Juan cájī ní cachi de:

Nasūu rúhū cúu Cristo, áhí de.

²¹ Te ní cacajnūhún tucu de:

Núu súcuan ¿te ndé ñin cúu ró? ¿A cúu ró Elías, tēe ní nacani jnūhun Yaā Dios nde jenahán, chí naun?

Te ní cahān Juan:

Nasūu de cúu rí.

Te ní cacajnūhún tucu de:

Núu súcuan ¿te á cúu ró tēe nacani jnūhun Yaā Dios jeé áhí tutu ñi jeé quíji?

Tuú, áhí tucu Juan.

²² Te ní cacahān tucu jín de:

¿Te ndé ñin cúu ró núu súcuan? Cachi nuū rí jijnáhan rí, chí jíní űūhún castūhun rí nuū táca tēe ní catajī rúhū vējicoo rí. Cachi na jniñū ndíso ró ví.

²³ Te ní cahān Juan:

Máá rí cúu tēe jeé ní cahān Isaías, tēe ní nacani jnūhun Yaā Dios nde jenahán, jeé quíji rí cana jee rí nde nuū űūhun téhé. Te cahān rí jín ñayuu jee na sátūhva i máá i, chí quiji máá Jítoho yó. Áhí Juan.

²⁴ Te tēe grupo fariseo cácuu jeé ní catajī tēe ní quijicoo ún.

²⁵ Te ní cacajnūhún de Juan:

Núu súcuan ¿te naun scuándute ró te núu nasūu Cristo ní Elías ní máá tēe quiji nacani jnūhun Yaā Dios cúu ró?

²⁶ Te ní cahān Juan:

Ruhū chí jín ndute scuándute rí. Te mēñū ró jijnáhan ró ñe ñin Yaā jeé tu cájini rō.

²⁷ Te Yaā un cúu jeé ní cahān rī jeé quíji ya te cújéhu ga yá vesú ruhū. Chí tú na vé jéhu cuiti cúu rí nuū yā, ní jeé cajñiñū rí nuū yá vesú ñin jniñū lúli gá nájnūhun jeé ndají rí correa ndijēn yā. Áhí de.

²⁸ Súcuan ní cuu jeé ní candajnūhún de jín Juan nde Betábara jeé ñe ichi núu cáne níandii yūte Jordán, nuū scuándute Juan.

Siquí jeē cúu ya Londe Yaā Dios

²⁹ Te inga quiví un ní jito Juan nuū Jesús jeé véji ya nuū de. Te ní cahān de jín ñayuu:

Condēhe jǎjnāhan ró, chí yāha véji Yaā cúu Londe jeē ní tají Yaā Dios, te cuu yā jeē sándoo ya cuēchi ñayuu ñayiví.

³⁰ Yaā yáha cúu jeē ní cahān rī jeē quíji iin Yaā cujēhnu ndasí, chí je íyó yá nde ná tu cacu rī.

³¹ Te nde saá te tu ní jíní rī jeē yāha cúu Yaā ní tají Yaā Dios. Te ní quiji rī jeē scuándute rī ñayuu ñuu yō Israel jíin ndute, návaha stéén rī nuū i jeē suu ya cúu, áchí Juan.

³² Te suni ní cahān gā de jnūhun ya:

Ní jito rī Espírítu Santo, ní cuun ya ichi ándiví, cáa ya nájñūhun paloma, te ní quee ya xiní Jesús.

³³ Te nde saá te ná tu cuni rī jeē Jesús cúu. Te máa Yaā Dios jeē ní tají yá ruhū jeē scuándute rī jíin ndute, ní cahān yā jíin rī: Núu ní jito ró jéé cúun Espírítu Santo te quendōo xiní iin tēe, yūcuan cúu Yaā jeē cuáha Espírítu Santo condee ini anuá ñayuu, achí Yaā Dios.

³⁴ Te je ní jito rí ún, te nácani cájí rí jñūhun jeē máa yá cúu Sēhe Yaā Dios. Achí Juan.

Uū tēe jeē ní cana ya xīhna gā

³⁵ Te inga quiví ún te Juan íne tucu de yūcuan jíin úu tēe cájica jíin de.

³⁶ Te ní jito de nuū Jesús jeē jica ya yūcuán. Te ní cahān de:

Condēhe jǎjnāhan ró, chí yūcuan cúu Yaā cúu Londe jeē ní tají Yaā Dios.

³⁷ Te ndindúú tēe cájica jíin Juan ní cajini sōho de jñūhun yáha, te ní candiquín de Jesús.

³⁸ Te ní ndió cóto Jesús, te ní jito ya jeē candiquín de yatá yā. Te ní cahān yā jíin de:

¿Na vé cánanducú ró?

Te ní cacahān de jíin yá:

Maestro, ¿ndé nuū ndeé ní?

³⁹ Te ní cahān yā jíin de:

Quíngoo yó te cuni ró.

Te ní jengoo de, te ní cajito de nuū ndeé yá. Te ní caquendōo de jíin yá quiví ún, chí nájñūhun cacuñ jehíni cúu.

⁴⁰ Te Andrés, ñani Simón Pedro, cúu iin jeē ndindúú tēe un jéé ní cajini sōho jñūhun ní cahān Juan, te ní candiquín Jesús.

⁴¹ Te Andrés, yachí ní jenanducú de ñani de Simón, te ní cahān de jíin:

Ní caquijnāhan rī jíin Mesías, achí de. Te jñūhun un cúní cahān Cristo, Yaā ní tají Yaā Dios.

⁴² Yūcuán na te cuanuhun de nuū Jesús jíin Simón. Te nuū ní jito Jesús nuū Simón, te ní cahān yā:

Máa ró cúu Simón sēhe Jonás. Te nde vjna te conaní ró Cefas, achí yá. Te jñūhun un cúní cahān Pedro, jeē cúní cahān yuū.

Jeē ní cana ya Felipe jíin Natanael

⁴³ Te inga quiví un cúní Jesús quihín yá región Galilea. Te ní nihín jñāhan ya jíin Felipe, te ní cahān yā jíin de:

Condiquín ruhū na quihín yō.

⁴⁴ Te Felipe cúu tēe ñuu Betsaida, jeē cúu ñuu Andrés jíin Pedro.

⁴⁵ Te ní jenanducú de Natanael, te ní cahān de jíin:

Ní canihín jñāhan rī jíin Yaā jeē yosó jñūhun ya nuū tútu ley jeē ní tee Moisés, jíin núu tútu ní catee tēe ní canacani jñūhun Yaā Dios nde jenahān. Te Jesús sēhe José ñuu Nazaret cúu ya. Achí de.

⁴⁶ Te ní cahān Natanael jíin de:

¿Te ndese cúu cujēhnu iin tēe jeē ní cacu ñuu ndahú Nazaret?

Te ní cahān Felipe:

Quihín yō de cuni ró, achí de.

⁴⁷ Te ní jito Jesús jeē véji Natanael, te ní cahān yā:

Yāha véji iin tēe ndaā jeē cúu ndije yucūn Israel, chí tu stáhú cuiti de, achí yá.

⁴⁸ Te ní cahān Natanael jíin yá:

¿Ndese jíin ní sáña?

Te ní cahān Jesús:

Je ní jito rí rohó ndé ná tu cana Felipe xiní ró, ná íne ró jéhē nundéhe higo, achí yá.

⁴⁹ Yūcuán na te ní cahān Natanael jíin yá:

Maestro, máa ní cúu Sēhe Yaā Dios, máa ní cúu Rey ñuu yō Israel, achí de.

⁵⁰ Te ní cahān Jesús:

¿A máa jéé ní cahān rī jeē ní jito rí rohó ná íne ró jéhē nundéhe higo, te jeē yūcuan cándje ró ruhū naún? Tuú chí coo jñiñu jéhnu ga coto ró vésú jeē yáha, achí yá jíin de.

⁵¹ Te ní cahān gā yā:

Jendaá cahān rī jíin ró jijnāhan ró jéé nde vjna te coto ró jéé nune ándiví, te táca ndajéhé Yaā Dios cánda cánuu nuū ruhū, Yaā ní nduu tēe, achí yá.

Jeē ní jéhēn yā iin vico nándāha ñuu Caná

2

¹ Te ní yāha uní quiví, te ní iyo iin vico nándāha ñuu Caná ndañū Galilea. Te yūcuan íne náná Jesús.

² Te suni ní cacana i Jesús jíin tēe cáscuáha jíin yá, ní jehēn yā vico un jíin de.

³ Te ní ndoco vino. Te náná Jesús ní cahān ña jíin yá:

Ní ndoco vino i, achí ña.

⁴ Te ní cahān Jesús jíin ña:

¿Naun cáhán ní súcuan jíin ná náná? Chí ná tu quee quiví jeē sáha ná jñiñu jéhnu, achí yá.

⁵ Te náná yā chí ní cahān ña jíin ñayuu cájeni cohō:

Sáha ró jǎjnāhan ró táca jéé cahān yā jíin ró. Achí ña.

⁶ Te yūcuan íyó íñu tenéjā yuū jeē ñūhun ndute cájichi ñayuu hebreo jeē ndúndoo i nuū Yaā Dios. Te iin iin tenéjā un cánda cuhun cuñ xico chí ciento litro ndute.

⁷ Te ní cahān Jesús jíin ñayuu cájeni cohō:

Scútú ndí ró táca tenéjā yáha.

Te ni cascútú ndí i.

⁸ Te ni cahān yā jíin i:

Vijna te quēen ró jecu te quindeca ró coto ndee tēe ndító vico, áchí yá.

Te ni cajendeca i nuū de.

⁹ Te ni séyühú de ndute jeē ni nduu vino, te tu jíni de ndé ní canihīn i. Chi máni mozo un cúu jeē cájini, chi máá i ni caquēen ndute ún. Yūcuán na te tēe ndító vico ni cana de tēe nándāha.

¹⁰ Te ni cahān de jíin:

Tāca ñáyuu chi xīhna gā vino váha cájēhe i, te núu je ni cájhi váha ñayuu cáhīn vico, yūcuán na te jēhe de vino ndahú na. Te máá ró tucu ni sáha ró, chi nde jeē sándihí te jēhe ró vino jeē yóhoyo váha ga jíhi, áchí de.

¹¹ Jniñu yáha jēe ni sáha Jesús ini ñuu Caná ndañúú Galilea cúu jniñu jéhuu xīhna ñühún jēe ni sáha ya jeē steén yā poder yā. Te súcuan ni steén yā jeē yóhoyo cújéhuu ya. Te tēe cáscuáha jíin yā ni cacandíje de ya.

¹² Te ná ni yāha jniñu yáha, te cuahān yā ñuu Capernaum jíin náná yā jíin táca ñani yā jíin tēe cáscuáha jíin yá. Te ni coyūcu yā yūcuán jecu quiví.

Jeē ní quenehen ya ñayuu ini templo

(Mt. 21.12-13; Mr. 11.15-18; Lc. 19.45-46)

¹³ Te jeē cuácuyajni vico pascua casáha jnāhan ñuu yā hebreo, te cuahān yā ñuu Jerusalén.

¹⁴ Te ini templo cáhnu ni jito ya ñayuu cáxicó stiquí jíin lanchi jíin paloma, jíin ñáyuu castáyi xūhun, cáyūcú i nuū mesa i.

¹⁵ Te jeē súcuan ni jito ya, te ni sáha ya in cuarta ñi. Te ni scúnu ya táca i ini templo, nde jíin lanchi jíin stiquí. Te ni jete yā xūhun ñáyuu castáyi. Te ni scotúú yá táca mesa i.

¹⁶ Te ni cahān yā jíin ñáyuu cáxicó paloma:

Tava táca quiti yáha. Te ma sáha ró yáhu ini vehe Tátá rí. Achí yá.

¹⁷ Yūcuán na te tēe cáscuáha jíin yá, ni canucūhun ni de jnūhun yósó núu tútu ii: Je yajni cuu na jēe yóhoyo ndíhví ni na síquí vehe ní, áchí yá jíin Tátá yā, achí tutu.

¹⁸ Te tēe ñuu yā hebreo ni cacajñuhún de ya:

¿Na jniñu jéhuu sáha ró jēe steén ró poder ró, te cucáhnu ni rí jeē ndiso jniñu ró sáha ró súcuan? áchí de jíin yá.

¹⁹ Te ni cahān yatá Jesús:

Canu ró templo yáha, te nuū uní quiví te nuondichí sáha rí, achí yá.

²⁰ Yūcuán na te ni cacahān tēe hebreo un:

Uū xico iñu cuiyā te ni jínu ni cuvāha templo yáha. Te róhó, ¿á núu uní-ní quiví te nuondichí sáha ró naún? Achí de.

²¹ Te templo jeē cahān Jesús cúu máá yiqui cúñu yā, chí cahni ñayuu yā te natecu yā nuū uní quiví.

²² Jeē yūcuan cúu jeē ná ni natecu yā jeē ni jíhi yā, te tēe cáscuáha jíin yá ni canucūhun

ni de jeē ni cáhān yā jnūhun yáha. Te ni cacandíje de jnūhun jeē yosó núu tútu ii, jíin jnūhun yáha jēe ni cáhān Jesús.

Jeē jíni Jesús ndese cáa ini anuá ñayuu

²³ Te ná ine Jesús ñuu Jerusalén máá vico pascua, te cuehē ñayuu ni cacandíje i jeē cúu ya Cristo, chí ni cajito i táca jniñu jéhuu sáha ya jeē steén yā poder yā.

²⁴ Te máá Jesús chí tu ní jétahú yá i, chí je jíni yā ndese cáa ini anuá i jíjnāhan i.

²⁵ Te tu jíni ñühún yá jeē cáchi ni in ñayuu nuū yā ndese iyó táca ñayuu, chí máá yá je jíni yā ndese cáa ini anuá i.

Jeē ní candajñuhún Jesús jíin Nicodemo

3

¹ Te ni iyó in tēe grupo fariseo, naní de Nicodemo, te cújéhuu de nuū ñayuu ñuu de hebreo.

² Tēe yáha ní quiji de nuū Jesús in jecuáa, te ni cahān de jíin yá:

Maestro, je cájini na jēe maá Yā Dios ní taji yá nihín jēe steén ni jnūhun ya nuū na jíjnāhan ná. Chí nuu tu iyó Yā Dios jíin ní, te ma cúu sáha ní ni in jniñu jéhuu nájñuhun sáha máá ní jeē steén ní poder ní, áchí de.

³ Te ni cahān Jesús:

Jendaá cahān rí jíin ró jeē núu tu nacacu jeē in ñayuu, te ma cúu quiví i ndaha Yā Dios jeē ndacu ya jniñu nuū i, áchí yá jíin de.

⁴ Te ni cahān Nicodemo jíin yá:

¿Te ndese cuu nacacu in tēe te núu je ni jehnu de? ¿A cuu nucūhun tucu de chíji náná de te nacacu tucu de? áchí de.

⁵ Te ni cahān Jesús:

Jendaá cahān rí jíin ró jeē núu tú nacacu in ñayuu, te ma cúu quiví i ndaha Yā Dios jeē ndacu ya jniñu nuū i. Te jeē nácacu i cúu jeē ndúndoo cuēchi i nájñuhun jíin ndute, te condee Espíritu Santo ini anuá i.

⁶ Jeē cácu sáha ñayuu, chí sēhe ñayuu cúu. Te jeē cácu sáha Espíritu yā, chí sēhe ya cúu.

⁷ Ma náa ní ró cani ní ró ndese cúu jnūhun ni cahān rí jíin ró jeē cánuú jēe nacacu jeē ró jíjnāhan ró.

⁸ Te tachí chí quēe cuahān ndé-ni cúu nuū cuní maá, te jíni sóho ró jēe cáyu, te tu jíni ró ndé nuū véji ní ndé nuū quihín. Te suni súcuan cúu táca ñayuu jeē nácacu sáha Espíritu, chí tu jíni ró ndese sáha ya jniñu ún, áchí yá.

⁹ Te ni cahān tucu Nicodemo:

¿Ndes ga cúu núu súcuan?

¹⁰ Te ni cahān Jesús:

Máá ró cúu in maestro jeē cújéhuu nuū ñayuu ñuu yó Israel, te ¿á tu jécūhun ni ró jnūhun yáha naún?

¹¹ Jendaá cahān rí jíin ró jeē jnūhun cájecūhun ni rí cúu jeē cácahān rí jíin ró. Te cácanani cáji rí jnūhun jniñu ní cajito rí. Te tu cacandíje ró jnūhun cácahān rí.

¹² Chi ni cahān rī jñūhun ndese sáha Yaā Dios ini ñayiví, te tu cáandjé ró. Nú súcuan ¿te ndese candjé ró nú cahān rī jñūhun táca ndese sáha ya nde andiví?

¹³ Chi ni ñn tu ní cáa andiví jeé cūni ndese iyó yúcuan, chi máñúhún-ni ruhú, Yaā ní nduu tēe. Chi andiví ndéé rí, te ni cuun rí vēji ri.

¹⁴ Te nájñūhun ni cata caa Moisés ñn coō cáa nuū ñn yujnu, ná ni cajica ñayuu nuū ñūhun téhé, suni súcuan máá rí, Yaā ní nduu tēe, cánuú jéé cóndita caa ri jicā cruz.

¹⁵ Te súcuan cánuú návaha táca ñayuu jeé candjé i jeé jnáma ri i, ma jñahnú ndetú i, chí sa suhva cotecu i ní cáni andiví.

Yōhyo ni cundáhu ni yā ñayuu ñayiví

¹⁶ Chi Yaā Dios yōhyo ni cundáhu ni yā ñayuu ñayiví. Jeé yúcuan ní tají yá Sēhe ya ni quiji, vēsú mañúhún-ni ya iyó, návaha táca ñayuu jeé candjé i jeé jnáma ya i, ma jñahnú ndetú, chí sa suhva cotecu i ní cáni andiví.

¹⁷ Chi tu ní tají Yaā Dios Sēhe ya ini ñayiví jeé snahnú ndetú yā ñayuu, chí sa suhva jeé jnáma ya ñayuu.

¹⁸ Ñayuu jeé candjé i jeé jnáma ya i, ma jñahnú ndetú i. Te ñayuu tu cándjé, je ni jñahnú ndetú i, chí tu ní cándjé i máá Sēhe Yaā Dios, te máá ñn-ni ya iyó.

¹⁹ Máá Yaā jeé stíndéé ini anuá ñayuu, je ni quee ya ini ñayiví. Te cánujnahan gā ni ñayuu caca i nájñūhun nuū nēé vēsú nuū luz yā, chí jñiñú cásáha i cúu jñiñú nēé. Jeé yúcuan cúu jeé jñahnú ndetú ñayuu tu cáandjé ún.

²⁰ Chi táca ñayuu casáha jñiñú nēé, tu nájñahan cuiti ni i luz yā. Te tu jéhe i jñūhun jeé stíndéé yá ini anuá i, chí tu cúní i jeé natúu jñiñú nēé cásáha i.

²¹ Te ñayuu jeé cájica jíin jñiñú ndaā, jéhe i jñūhun jeé stíndéé yá ini anuá i, návaha natúu ndíjin jeé táca jñiñú cásáha i cúu jñiñú cúní Yaā Dios. Achí yá jíin de.

Jeé ni cáhān tucu Juan jñūhun Jesús

²² Yūcuán na te Jesús jíin téé cáscuáha jíin yá, cuahān yá región Judea. Te ni condee yá yūcuán jecu tiempo jíin de, te cáscuándute de ñayuu.

²³ Te suni scuándute Juan, ine de lugar jeé naní Enón yajni ñuu Salim, chí yúcuan iyó cuéhé ndute. Te ni quijicoo ñayuu nuū de, te ní scuándute de i.

²⁴ Súcuan ni sáha Juan nde ná tu quívi de vecāa.

²⁵ Yūcuán na te sava tēe cáscuáha jíin Juan yōhyo ni cacahān de jíin sava jñáhan de hebreo siquí núu ndé ñn cúu modo vāha ga jeé cuchi ñayuu ndundoo i nuū Yaā Dios.

²⁶ Te ni queeco de nuū Juan, te ni cacahān de:

Maestro, tēe ní ine jíin ní yūte Jordán ichi núu cáne niāndii, jeé ní nacani ní jñūhun de

nuū ná, vijna te scuándute máá de, te ndivii ñayuu cuangoo i nuū de.

²⁷ Te ni cahān Juan:

Ni ñn tēe ma cúu sáha de jñiñú Yaā Dios te núu ma tejñiñú ya de.

²⁸ Máá ró jíinánhan ró chí ni cajini sōho ró jéé ni cáhān cají rí jeé násuu máá rí cúu Cristo, chí cúu ri ñn jeé ní tají Yaā Dios jeé cósnúu nacani jñūhun jeé quíji ya.

²⁹ Te núu cásáha vico quíjñahan, te máá yii cúu jeé ndéca ñasihi. Te amigo yii un ine jíin de, te jíini sōho jñūhun cáhān de. Te yōhyo cúsi ní jíini sōho jñūhun cáhān yii ún. Te suni súcuan ruhú, chí cúu ri nájñūhun amigo yii, chí ni quee máá Cristo, te yōhyo cúsi ní rí jíini sōho ri jñūhun cáhān yá.

³⁰ Te jíini ñúhún jéé ndujéhu ga máá yá te ndululí gá máá rí, achí Juan.

Jeé ní quíji ya nde nuū sucún

³¹ Te Yaā jeé vēji nde andiví, cújéhu ya nuū ndihi. Chí táca jéé ní cacu ini ñayiví yáha, sēhe ñayiví cúu, te máni jñūhun ñayiví cáhān. Te Yaā jeé vēji ichi ándiví, chí cújéhu ya nuū ndihi ñayuu.

³² Te nácani ya jñūhun jeé ní jito ya jíin jéé ní jini sōho ya. Te ñayuu chí tu cáandjé i jñūhun cáhān yá.

³³ Te núu ñn ñayuu candjé i jñūhun cáhān yá, suu cúu jeé jejnúhún i jeé Yaā ndaā cúu Yaā Dios.

³⁴ Chí Yaā ní tají Yaā Dios vēji, máni máá jñūhun Yaā Dios cáhān yá. Chí Yaā Dios tu yícuáha jéhe ya Espiritu yá nuū Yaā ní tají yá.

³⁵ Máá yá jeé cúu ya Tatá, yōhyo maní yá jíin Sēhe ya, te ndivii ni jéhe ya ndaha Sēhe ya jeé ndacu ya jñiñú nuū.

³⁶ Ñayuu jeé candjé máá Sēhe ya jeé jnáma ya i, cotecu i ní cáni andiví. Te ñayuu tu cúní candjé Sēhe ya, ma cótecu i ní cáni andiví, chí sa suhva cuáha Yaā Dios castigo jeé ndoho i ní cáni.

Jeé ni cáhān Jesús jíin ñahan ñúu Samaria

4

¹ Te tēe grupo fariseo, ni canihñ de jñūhun jeé iyó cuéhé gā téé cáscuáha jíin Jesús vēsú jíin Juan, jíin jéé cuéhé gā ñayuu scuándute ya vēsú Juan.

² Te nasúu jéé scuándute máá yá, chí tēe cáscuáha jíin yá cúu jeé cascuándute.

³ Te ná ni jini Jesús jeé súcuan ni canihñ de jñūhun, te ni quenda ya región Judea, te cuanuhun yá región Galilea.

⁴ Te ichi jeé nuhún yá chí yáha región Samaria.

⁵ Te ní jinú yá ñn ñuu región Samaria jeé naní Sicar, yajni ñuhun jeé ní jéhe Jacob nuū séhe de José nde jenahán.

⁶ Te yúcuan ine pozo jeé naní pozo Jacob. Te ní cucóo Jesús xiin pozo un, chí ni cuíta

yá jeé cuahán yá ichi. Te nájñuhun cahuxī uū cúu.

⁷ Te ni quee ñn ñahan Samaria, vēji ña vequihñ ña ndute. Te ni cahān Jesús jín ña: Cuāha ní ndute coho ná, áchí yá.

⁸ Te tēe cáscuáha jín yá, chí je cuango de nde ñuu, cuacuaan de jeé caji de jín yá.

⁹ Te ñahan Samaria un ní cahān ña jín yá: ¿Ndese cúu jeé jicán ni ndute nuū ná coho ní? Chí tēe hebreo cúu ní, te ñahan Samaria cúu ná, áchí ña.

Súcuan ni cahān ña, chí ñayuu hebreo tu cácahān i jín ñayuu Samaria.

¹⁰ Te ni cahān Jesús:

Núu jeé jini ní ndese cúni Yaā Dios sáha ya jeé váha níhñ, jín ndé ñn cúu sáña jéé jicán na ndute nuū ní, yūcuán na te máá ní cacān ni núu ná, te cuāha ná ndute jeé cótecu ní ní cáni sáha, áchí yá.

¹¹ Te ni cahān ña jín yá:

Tátā, yōhyo cúnú pozo yáha, te tú na vé ndahá ní jéé táva ní ndute. Núu súcuan ¿te ndé nuū níhñ ni ndute jeé cótecu na sáha?

¹² ¿Te á cújéhu ga máá ní vēsú jii yō Jacob, chí naún? Chí máá de ni stóo de pozo yáha nuū yō. Te yāha ní cajihí máá de ndute, jín táca séhe de, jín quiti ndéca de. Achí ña.

¹³ Te ni cahān Jesús:

Tāca ñayuu jeé jihí ndute yáha, chí jichí tucu i.

¹⁴ Te ñayuu coho ndute jeé cuāha na núu i, chí ma jichí cuiti gā i. Chí ndute jeé cuāha ná un, cane ini i nájñuhun ndute jeé cáne ñuhún, te sáha jeé cótecu i ní cáni, áchí yá jín ña.

¹⁵ Te máá ña tu ní jécūhun ni ña, te ni cahān ña jín yá:

Tátā, cuāha ní ndute ún coho ná, návāha ma jichí cuiti gā ná, ni tuá jini ñuhun quiquihñ ná ndute pozo yáha, áchí ña.

¹⁶ Te ni cahān Jesús jín ña:

Cuácana ní yñ ní te quiji ní jín de, áchí yá.

¹⁷ Te ni cahān ña:

Tú yñ ná iyó.

Te ni cahān Jesús:

Ndaā cahān ni jéé tú yñ ní iyó.

¹⁸ Chí je ní cuu uhñ yñ ní, te tēe ndéca ní vijna chí nasūú yñ ní cúu de. Yāha cúu jeé ní cahān ndaā ní, áchí yá.

¹⁹ Te jeé súcuan ní cahān yā, te ni cahān ña:

Tátā, ñn tēe nácani jñuhun Yaā Dios cúu ní, jéni ní ná.

²⁰ Tāca jí na ñayuu Samaria, yucu yáha ní cachñuhún i Yaā Dios. Te máá ní ñayuu hebreo, cácahān ni jéé ñuu Jerusalén cúu nuū cánuú chiñuhún yó yā, áchí ña.

²¹ Te ni cahān Jesús jín ña:

Nánā, candíje ní jñuhun cáhān na, chí quee quivī jeé ní nasūú yucu yáha ní nasūú ñuu Jerusalén cúu nuū chiñuhún ní máá Yaā cúu Tátā, chí ndihí-ni lugar te cuu chiñuhún ní yá.

²² Máá ní ñayuu Samaria tu cājini ní ndé ñn cúu jeé cachñuhún ní. Te máá ná jijnáhan ná chí cājini na ndé ñn cúu jeé cachñuhún ná. Chí nde nuū máá ná jijnáhan ná ñayuu hebreo cúu nuū vēji Yaā jnama ñayuu.

²³ Te je ni quee quivī jeé ñayuu cachñuhún ndāā, vijna te chiñuhún ndije i Yaā cúu Tátā nde jín ini jín ánuá i. Chí máá Tátā cúni yá jeé súcuan chiñuhún ñayuu yá.

²⁴ Yaā Dios cúu Espíritu, te ñayuu jeé cuní i chiñuhún i ya, cánuú jéé chiñuhún ndije i ya jín ini jín ánuá i, áchí yá.

²⁵ Te ni cahān ñahan ú:

Jini na jéé quiji Mesías jeé cúu Cristo, Yaā jeé tají Yaā Dios. Te núu ni quee máá yá, te stéen caji yá táca jñuhun nuū yō.

²⁶ Te ni cahān Jesús:

Máá ná jeé cahān jín ní, suu ná cúu Yaā ún.

²⁷ Te sá cáhān gā yā súcuan, te ni ndecoo-ni tēe cáscuáha jín yá. Te ni canaa ni de cājito de jeé ndájñuhun yá jín ñahan yúcuan. Te ni ñn de tu ní cājñuhun de ya núu na vé cājñuhun yá ña chí na vé ndájñuhun yá jín ña.

²⁸ Yūcuán na te ñahan un ní stóo ña quiyi ña, te cuahān ña nde ñuu. Te ni cahān ña jín ñayuu ún:

²⁹ Nehen na quíngoo yó te coto ró ñn tēe jeé ní cachi ndihí táca jéé ní sáha ri. Sanaa te máá yá cúu Cristo, jeé cándetu yó quiji, áchí ña.

³⁰ Yūcuán na te ni quendacoo i ñuu ún, te cuango i nuū íne Jesús.

³¹ Te nde ná tu jinūcōo i, te tēe cáscuáha jín yá ní cacahān ndahú de jín yá:

Maestro, caji ní stāā ví, áchí de.

³² Te ni cahān yā jín de:

Iyó stāā caji rí jeé tu cājini rō ndese cúu.

³³ Yūcuán na te tēe cáscuáha jín yá, ní cacajñuhun jñāhan de:

¿A ní quindeca ñn ñayuu jeé ní yeji yā, chí naún? áchí de.

³⁴ Te ni cahān Jesús:

Jeé ní cachi rí jeé iyó jéé caji rí cúu jeé cúsiñ ní rí sáha rí jñiñu cúní Yaā ní tají rúhū vēji rí, jín jéé sínu rí jñiñu ún.

³⁵ Te cácahān rō jeé cúmaní cuñ gā yoó te tahndé trigo. Te ruhú chí cáhān rí jín rō: Condēhe jijnáhan ró, chí ñayuu cuehē cácuu i nájñuhun trigo jeé jé ní cuaan jeé tahndé, chí je cáhiyo túhva i candíje i ruhú.

³⁶ Te tēe scándíje ñayuu cácuu de nájñuhun tēe cájehnde trigo, te níhñ de yāhu de. Te jeé cánastútú de ñayuu cúu jeé cótecu i ní cáni andiví. Te tēe cáscuíté núu jñuhun rí, inuú-ni cusñ ní de jín tēe cástéén gā jñuhun rí.

³⁷ Chí ndaā jñuhun jeé cahān: ñn tēe jéte, te inga tēe nástútú, áchí.

³⁸ Te suu cúu jeé ní tají rí rohó jijnáhan ró jéé scándíje ró ñayuu jeé jé ní canihñ jñuhun ya ní casáha inga tēe. Chí inga tēe je ni

canacani de jñuhun nuū ñáyuu, te máá ró chi nájñuhun cánastútú ró i cúu jeē scándíje ró i.

³⁹ Te cuehē ñayuu Samaria jeē cáyúcú ñuu ún, ni cacandíje i Jesús jeē ní jini sóho i jñuhun ni cahán ñahan ún. Chi ní cahán ña: Ni cachi ya ndihi táca jéé ní sáha ri.

⁴⁰ Te jeē yúcuau cúu jeē ñayuu Samaria un ní jinúcoo i nuū yá, te ni cacahán ndahú i jíin yá jeē na quéndoo ya ñuu i. Te ni ndoo ya yúcuau úu quiví.

⁴¹ Te cuehē gá i ni cacandíje i ya jíin jñuhun cáhán maá yá.

⁴² Te ni cacahán i jíin ñahan ún:

Tuá niní jéé cahán maá ró te candíje ri yá, chí je ni cajini sóho ri jñuhun cáhán maá yá. Te cajini yō jeē maá yá cúu ndíje Cristo, Yaa jnama ñayuu ñayiví. Achí i.

Jeē ní nasávaha ya sēhe tēe ndíso jñiñu nuū rey

⁴³ Te nuū ni yáha uū quiví ún, te Jesús ni quenda ya Samaria, te ni quihin tucu ya ichi cuanuhun yá región Galilea.

⁴⁴ Chi je ni cahán maá yá jeē tēe canacani jñuhun Yaa Dios, tu cáhíyo yíñhún ñáyuu ñuu de jíin de, te suni súcuau ni cuu jíin máá yá.

⁴⁵ Te ná ni najinū yá Galilea, te ñayuu un ní cajetáhu i ya, chí suni máá i ni jengoo i vico pascua ñuu Jerusalén, te ni cajito i táca jniñu ní sáha ya quiví ní íyo vico ún.

⁴⁶ Yúcuán na te ni jehēn tucu ya ñuu Caná ndañū Galilea, nuū ní sáha ya jeē ndúte ni nduu vino. Te ini ñuu Capernaum ni íyo ñin tēe cújehnu jeē ndíso jniñu nuū rey. Te cúhu sēhe de.

⁴⁷ Tēe un ní jini jñuhun de jeē ní najinū Jesús región Galilea jeē ni jehēn yá región Judea. Te ni jecondēhé de ya, te ni cahán ndahú de jíin yá jeē na quihín yá jíin de vehe de, te nasávaha ya sēhe de, chí je yajni cuu i.

⁴⁸ Te ni cahán Jesús jíin de:

Núu tú coto ró jniñu jéhu jeē náá ní ró sáha, te ma candíje cuiti ró jijnáhan ró, áchí yá.

⁴⁹ Te tēe ndíso jniñu nuū rey, ni cahán de:

Cava váha ni ní na quihín yō, chí núu cucuéé ní te cuu sēhe ná, áchí de.

⁵⁰ Yúcuán na te ni cahán Jesús:

Cuánuhun vehe ró, chí cotecu sēhe ró.

Te tēe un ní candíje de jñuhun ni cahán Jesús, te cuanuhun-ni de.

⁵¹ Te níni jíca de cuanuhun de vehe de, te ni quijicoo mozo de ni caquijnahan i de, te ni cacahán i:

Je ni nduváha sēhe ní, áchí i.

⁵² Te ni cajñuhún de na hora ni quejéé ndúvaha i. Te ni cacahán i jíin de:

Cahán jeē ícu ní quenda quiji i.

⁵³ Yúcuán na te máá tátá i ní sáha de cuenta jeē hora un cúu jeē ní cahán Jesús jíin de jeē

cótecu sēhe de. Te ni candíje de jíin ní hehe de jeē cúu ya Yaa ní tají Yaa Dios.

⁵⁴ Yáha cúu vuelta uū jeē ní sáha Jesús jniñu jéhu jeē ní stéén yá poder yá región Galilea, jeē ní najinū yá jeē ní jehēn yá región Judea.

Jeē ní nasávaha ya ñin tēe catú yuhu pila Betesda

5

¹ Yúcuán na te cuahán tucu Jesús ñuu Jerusalén, chí íyó tucu vico cásáha jnáhan ñuu yá hebreo.

² Te Jerusalén íyó ñin pila ndute yajni yéhyí jéé naní yéhyí lanchi. Te yuhu hebreo naní Betesda. Te nuū íne pila un íyó úhūn corredor.

³ Te ini táca corredor un caca cuehē ñayuu cácuñu, jeē cuaá, jeē chacua, jeē ní íjin. Te cándetu i jeē canda ndute ún.

⁴ Chí íyó quiví jeē cúun ñin ndajéhé yá ini pila un, te scánda ya ndute. Te ñayuu quiví xíhna gá ini pila un ná scánda ya ndute, te ndúvaha i na-ni cuehyí ndóho i.

⁵ Te yúcuau íyó ñin tēe jeē ní cuu ocó xahūn uní cuiyá cúhu de.

⁶ Te ní jito Jesús jeē catú de, te ní jini yá jeē ní cuu cuehē cuiyá cúhu de. Te ní cahán yá jíin de:

¿A cúni ró nduváha ró? áchí yá.

⁷ Te ní cahán tēe cúhu un jíin yá:

Tu níhín na ní ñin tēe squiví sañá ini pila hora jeē canda ndute. Chí táca jínu jeē cuní na quiví ná, te quiví-ni inga ñayuu xíhna gá. Achí de.

⁸ Te ní cahán Jesús:

Ndocuñí te naquihin ró camilla ró te caca ró, áchí yá.

⁹ Te tēe un ní nduváha-ni de. Te ni naquihin de camilla de, te ni quejéé de jíca de. Te quiví ndétatu cúu quiví ún.

¹⁰ Yúcuán na te jnáhan de tēe hebreo un ní cacahán jíin de:

Quiví ndétatu cúu vijna. Te áchí ley jeē ma cúu condiso ró camilla ró.

¹¹ Te ní cahán tēe ní nduváha ún:

Tēe ní nasávaha ruhū, ni cahán de jíin ní jeē náquihin ri camilla ri te caca ri, áchí de.

¹² Yúcuán na te ni cacajñuhún un de:

¿Ndé tēe ní cahán jíin ró jeē náquihin ró camilla ró te caca ró?

¹³ Te tēe ní nduváha ún, tu jíni de ndé ñin cúu jeē ní nasávaha de. Chí cáhíin cuehē ñayuu yúcuán, te Jesús je cuahán yá.

¹⁴ Te cúcuéé gá te ní najnáhan Jesús jíin de ini templo cáhnu. Te ní cahán yá:

Vijna chí je ní nduváha ró. Ma sáha ga ró cuéchi, chí núu tuú, te quiji ñin jñundóho xeēn gá siquí ró, áchí yá.

¹⁵ Yúcuán na te cuahán tēe ún, te ní castuhún de nuū jnáhan de hebreo un jeē Jesús cúu jeē ní nasávaha ya de.

¹⁶ Te siquĩ jeē ní sáha Jesús jniñu yáha quivĩ ndétátú, jeē yúcuán cúu jeē téē hebreo un cájito xeēn de ya, te cácuñi de cahni de ya.

¹⁷ Te ní cahān Jesús jiin de:

Maá Tátá rĩ chí ní cáni te nde vijna sáha ya jniñu váha, te suni súcuán ruhū sáha rĩ jniñu váha.

¹⁸ Te siquĩ jeē ní cahān yā súcuán, te téē hebreo un víhyá gā cácuñi de cahni de ya. Chí nasūu maá ĩn-ni jeē tu squĩcu ya jeē cahān ley siquĩ quivĩ ndétátú, chí suni jeē ní cahān yā jeē Tátá yā cúu Yāā Dios, te súcuán sáha ĩnuú yā maá yā jiin Yāā Dios.

Siquĩ jeē ndíso jniñu Sēhe Yāā Dios

¹⁹ Te ní cahān Jesús:

Jendaá cahān rĩ jiin ró jijnáhan ró: Ruhū jeē cúu Sēhe Yāā Dios, tú na vé cúu sáha rĩ jeē maá rĩ, chí máni sáha rĩ jeē jito rĩ sáha Tátá rĩ. Chí táca jéé sáha Tátá rĩ, suni sáha ruhū jeē cúu rĩ Sēhe ya.

²⁰ Chí maá Tátá rĩ, manĩ yā jiin ruhū jeē cúu rĩ Sēhe ya, te stéén yā nuū rĩ ndihĩ jeē sáha ya. Te jéhu ga jniñu stéén yā vesú jeē ní cuu vijna, jeē naa ní rō coto ró jijnáhan ró.

²¹ Te nájnūhun jeē nastécu maá Tátá rĩ ndiyĩ te cotecu tucu i, suni súcuán ruhū jeē cúu rĩ Sēhe ya, nastécu rĩ ndé-ni cúu jeē cuni maá rĩ.

²² Te maá Tátá rĩ, tu sándaā yā siquĩ ní ĩn ñayuu, chí ní jēhe ya jnūhun jeē sándaā maá rĩ siquĩ táca ñayuu, chí Sēhe ya cúu rĩ.

²³ Te súcuán te coo yĩñúhūn ndihĩ ñayuu nuū rĩ, nájnūhun yĩñúhūn i nuū Tátá rĩ. Te ñayuu tu iyó yĩñúhūn nuū rĩ, núu súcuán te suni tu yĩñúhūn i nuū maá Tátá rĩ jeē ní tajĩ yá ruhū vēji rĩ.

²⁴ Jendaá cahān rĩ jiin ró: Núu ĩn ñayuu chuhun ni i jnūhun cahān rĩ, te candíje i jeē Yāā ndaā cúu Yāā ní tajĩ ruhū vēji rĩ, ñayuu ún cotecu i ní cáni andivĩ, te ma jahnú ndetū i. Chí ma cúu ga i nájnūhun ndiyĩ, chí sa suhva cotecu i ní cáni.

²⁵ Jendaá cahān rĩ jiin ró jeē quiji quivĩ, te vijna je ní quejéé, jeē táca ñayuu cácu nájnūhun ndiyĩ, cuni nahĩn i jnūhun cahān ruhū, Sēhe Yāā Dios. Te ñayuu cuatáhú, chí cotecu i ní cáni.

²⁶ Chí nájnūhun iyó poder maá Tátá rĩ jeē sáha ya jeē técu ndihĩ-ni, suni súcuán ní jēhe ya poder nuū ruhū jeē sáha rĩ jeē cotecu ndihĩ-ni.

²⁷ Te suni ní sáha ya jeē ndíso jniñu rĩ sándaā rĩ siquĩ ñayuu, chí cúu rĩ Yāā ní nduu téē.

²⁸ Ma náā ní rō cani ní rō siquĩ jnūhun cahān rĩ. Chí quee quivĩ jeē táca ndiyĩ cuni sóho i jnūhun cahān rĩ,

²⁹ te quendacoo i nuū yĩndūji. Te ndiyĩ jeē ní casáha jniñu váha, natecu i jeē cótecu i ní cáni. Te ndiyĩ jeē ní casáha jniñu néé, natecu i te quivicoo i nuū jahnú ndetū i.

Nde vé cúu jeē steén jeē ní tajĩ Yāā Dios yā

³⁰ Tú na vé cúu sáha rĩ jeē maá rĩ. Chí nájnūhun ndácu Yāā Dios jniñu nuū rĩ, súcuán sándaā rĩ jniñu. Te ndaā sándaā rĩ, chí tu sáha rĩ jeē cuni maá rĩ, chí sáha rĩ jeē cuni maá Tátá rĩ, Yāā ní tajĩ ruhū vēji rĩ.

³¹ Núu ruhū cahān rĩ jeē cúu rĩ Sēhe Yāā Dios, te cachi ñayuu jeē tu jéniñu jnūhun cahān rĩ.

³² Te iyó inga jeē cahān jeē cúu rĩ Sēhe ya. Te jini rĩ jeē jnūhun un jéé cahān yā, chí níhín jniñu.

³³ Maá ró ní catajĩ ró téē ní cacajnūhún de Juan. Te Juan chí ndaā ní cahān de jnūhun rĩ.

³⁴ Te vesú súcuán te nasūu ruhū cúu jeē jini ñúhūn jeē steén ĩn téē jeē Sēhe Yāā Dios cúu rĩ. Chí maá ró cúu jeē jini ñúhūn návaha candíje ró te cácu ró jijnáhan ró. Jeē yúcuán ní cahān rĩ jeē iyó ndaā jnūhun rĩ jeē ní nacani Juan.

³⁵ Maá Juan ní cuu de nájnūhun ĩn lámpara jeē cayú te cundijin, cúu jeē ní nacani de jnūhun rĩ. Te maá ró, jecu-ni quivĩ ní canuj-nahan ni ró jeē ní stéén de nuū rō.

³⁶ Te iyó jéé steén cajĩ gá jeē cujéhu rĩ vesú jeē ní cahān Juan. Suu jniñu sáha rĩ, jniñu jeē ní tejniñu Tátá rĩ ruhū jeē sáha rĩ, jniñu un stéén ndije jeē maá yā ní tajĩ ruhū vēji rĩ.

³⁷ Te Tátá rĩ jeē ní tajĩ yá ruhū vēji rĩ, suni maá yá cahān nuū tútu ĩi jeē cujéhu rĩ, vesú tu ní cájini sóho cuiti ró jeē cahān yā, ní tu ní cájito ró yá.

³⁸ Te tu ní cáchuhun ní ró jnūhun un jéé ní cahān Tátá rĩ, chí tu cácandíje ró ruhū, Yāā ní tajĩ yá vēji.

³⁹ Cánanducú vīi ró táca jnūhun cahān tutu ĩi, chí cájeni ní ró jeē yúcuán níhín ró jnūhun jeē cótecu ró ní cáni sáha. Te jnūhun siquĩ maá rĩ cúu jeē cahān tutu ún.

⁴⁰ Te vesú súcuán te tu cácuñi ró cuatáhú ró ruhū quivicoo ró ndaha rĩ návaha cotecu ró ní cáni.

⁴¹ Tu chíhi rĩ cuenta jnūhun jeē cácahān ñayuu jeē cujéhu rĩ.

⁴² Chí je jini rĩ ndese cándaā ánuá ró jeē tu cáhiyo manĩ ró jiin Yāā Dios.

⁴³ Ruhū vēji rĩ jiin jniñu cuni Tátá rĩ, te tu cájetáhú ró ruhū. Te núu inga téē quee de jiin jniñu cuni maá de, sa téē un yáchi cuatáhú ró de.

⁴⁴ ¿Ndese cuu candíje ró jijnáhan ró? Chí máni cácuñi ró jeē cujéhu ró sáha jnāhan ró, te tu cánducú ró jeē cujéhu ró sáha Yāā Dios, jeē maá ĩn-ni ya iyó.

⁴⁵ Ma cáni ní ró jeē cáquin rĩ cuēchi siquĩ ró nuū Tátá rĩ. Chí iyó ĩn jeē cáquin cuēchi siquĩ ró, suu Moisés, téē jeē cáñuhun ní ró jeē quendōo ndaā ró jiin ley jeē ní tee de.

⁴⁶ Chí núu ní cácandíje ró jéé ní tee Moisés, te suni candíje ró ruhū nuú, chí jnūhun maá rĩ ní tee de.

⁴⁷ Te núu tu cá candíje ró jnúhun ri jeē ní tee de, ¿te ndese candíje ró jnúhun cáhán maá rí núu súcuan? Achí yá jíin de.

Jeē ní scáji yá uhūn mil tēe
(Mt. 14.13-21; Mr. 6.30-44; Lc. 9.10-17)

6

¹ Yūcuán na te cuahān Jesús inga lado mar Galilea, jeē cúu mar Tiberias.

² Te yōhyo cuehē ñayuu ní candiquin i ya, chí ní cajito i táca jniñu jéhu jeē steén yá poder yá jeē ní nasāvāha ya ñayuu cácuñu.

³ Te ní caa ya iin yucu, te ní cucōo ya yūcuan jíin tēe cáscuaha jíin yá.

⁴ Te ní cuyajni vico pascua jeē cánucūhun ní jnáhan ñuu yá hebreo jeē ní cacācu i nuū ñayuu naciōn Egipto.

⁵ Te ní ndacoto ya, te ní jito ya jeē véjicoo cuehē ndasí ñayuu. Te ní cahān yá jíin Felipe: ¿Ndé nuū cuaan yó jéē cáji ñayuu yáha jíinánhan i?

⁶ Te súcuan ní cahān yá jeē jíto ndee yá de núu ndese cahān de. Chí je jíni maá yá ndese sáha ya.

⁷ Te ní cahān Felipe jíin yá:

Te ní ma cánda uū ciento denario staā, ní vésú jeē cáji i jecu jecu jíinánhan i, achí de.

⁸ Yūcuán na te ní cahān Andrés, ñani Simón Pedro, inga tēe scuáha jíin yá un:

⁹ Yáha íne iin sūchi yí jéē ndíso i uhūn staā cebada jíin uū chácá. ¿Te ndé canda cuiti ún, chí ñayuu cuehē ndasí cúu?

¹⁰ Yūcuán na te ní cahān Jesús:

Cahān jíin ñayuu na cucōo i, achí yá.

Te yūcuan cáa cuehē íte, te ní cacucōo i, te nájñuhun uhūn mil tēe cu.

¹¹ Te ní quihin Jesús staā ún, te ní nacuatáhu yá nuū Yaā Dios. Te ní jēhe ya nuū tēe cáscuaha jíin yá, te maá de ní casaja de nuū ñayuu ní cacucōo ún. Te suni súcuan ní sáha ya jíin chácá, te ní cayejí i nasaa cácuni maá i.

¹² Te nuū ní candutú chíji i, te ní cahān yá jíin tēe cáscuaha ún:

Nastútú ró táca pedazo jeē ní ndóo, návāha tu stíví cuiti yó.

¹³ Te ní canastútú de, te ní chítú úxí uū jíca pedazo jeē ní ndóo siquí ndihúhún staā cebada un jeē tuá ní ndíhi caji ñayuu.

¹⁴ Te ñayuu un ní cajito i jniñu jéhu ní sáha Jesús jeē ní steén yá poder yá. Te ní cacahān i:

Jendaá ndije jeē tēe yáha cúu jeē cahān tutu jeē quíji íni ñayví jéē nácani jnúhun Yaā Dios. Achí i.

¹⁵ Te ní jíni Jesús jeē cácuni i sáfuerza i ya jeē cuu ya rey i núu. Te ní cujiyo tucu maá iin-ni ya, ní caa ya cuahān yá nuū sucún gá yucu.

Jeē ní jica jéhé yá nuū mar
(Mt. 14.22-27; Mr. 6.45-52)

¹⁶ Te nuū cuácuaa, te tēe cáscuaha jíin yá ní nanuu de cuangoo de nde mar:

¹⁷ Te ní ndívicoo de ini barco, te ní cascáca de jeē quíngoo de nde inga lado mar nde ñuu Capernaum. Te je ní cunee, te ná tu ndee Jesús nuū de.

¹⁸ Yūcuán na te ní jequihí iin tachí níhin, te sáha jeē ndónda ndute mar un.

¹⁹ Te jeē ní cuu nájñuhun uhūn chí íñu kilómetro cájica de jíin barco, te ní cajito de jeē jíca Jesús nuū mar, te ní cuyajni ya véji ya nuū barco. Te ní cayuhú de.

²⁰ Te maá yá ní cahān yá jíin de:

Maá rí cúu. Ma yūhu ró jíinánhan ró.

²¹ Te ní cacusi ní de jeē na quíví ya ini barco. Te ní sáha ya jeē yachí-ni ní jínūcōo-ni de ñuhun íchi nuū cuangoo de ún.

Jeē cánanducú ñayuu Jesús

²² Te inga quíví ún, te ñayuu jeē ní caque-ndóo inga lado mar, ní cajini i jeē tēe cáscuaha jíin yá cuangoo de jíin máñuhún-ni barco ní íne yūcuán, jíin jéé tu ní quíví Jesús quíhin yá jíin de jíinánhan de.

²³ Te sava ga barco jeē véjicoo íchi ñuu Tiberias, ní quecoo yajni lugar nuú ní cayejí i staā jeē ní nacuatáhu maá Jítoho yó jéhe.

²⁴ Te jeē ní cajito ñayuu un jéé tuá Jesús íne ya yūcuán, ní tēe cáscuaha jíin yá, te ní quívicoo i táca barco un, te cuangoo i ñuu Capernaum cuananducú i ya.

Jesús cúu staā jeē cótecu yó ní cáni

²⁵ Te nuū ní jínūcōo i nde inga lado mar, te ní naníhin jnáhan i jíin Jesús. Te ní cacajñuhún i ya:

Maestro, ¿na hora ní quee ní yáha?

²⁶ Te ní cahān Jesús:

Jendaá cahān rí jíin ró jeē cánanducú ró ruhú siquí jeē ní cayejí ró nde ní candutú chíji ró, te nasúu siquí jeē ní cajito ró táca jniñu jéhu jeē steén rí poder rí.

²⁷ Ma cóndihví ní ró maá siquí jeē caji ró jeē yachí nataxín, chí sa suhva condihví ní ró siquí jeé níhin ró jeé cótecu ró ní cáni sáha. Te maá rí, Yaā ní nduu tēe, cuāha rí nájñuhun staā jeé cótecu ró ní cáni sáha. Chí Tátá rí Yaā Dios ní jeni ya ruhú jeé sáha rí súcuan. Achí yá jíin i.

²⁸ Yūcuán na te ní cacajñuhún i ya:

¿Ndese sáha ná návāha squícu ná jniñu cúní Yaā Dios?

²⁹ Te ní cahān Jesús:

Jniñu jeé cuní Yaā Dios cúu jeé candíje ró ruhú, Yaā ní tají yá véji.

³⁰ Yūcuán na te ní cacahān i:

Núu súcuan ¿te na jniñu jéhu sáha ní coto ná jíinánhan ná te candíje ná jéé ní tají yá níhin? ¿Na jniñu cúu jeé sáha ní?

³¹ Chí táca jíí yó jenahán ní cayejí de maná jeé ní cuun íchi ándiví ndé nuū ñuhun téhé, nájñuhun yósó núu tútu: Yaā Dios ní jéhe ya

staā ni cuun ichi ándiví, ni cayejí i, áchí tutu. Achí i jíin yá.

³² Te ni cahān Jesús:

Jendaá cahān rī jíin ró: Nasūú Moisés ni jéhe staā un núu de jíināhan de jeē ní cuun ichi ándiví, chi máá Tátá rī ni jéhe. Te máá yá jéhe staā ándiví jéē cōtecu rō ní cāni sáha.

³³ Chi staā jéhe Yaā Dios cúu máá Yaā ní quiji ichi ándiví, te sáha ya jeē ñáyuú ñayiví cotecu i ní cāni ándiví. Achí yá.

³⁴ Te ni cacahān i jíin yá:

Níní cuáha ni staā ún caji na núu súcuan.

³⁵ Te ni cahān Jesús:

Máá rí cúu máá staā jeē cōtecu rō ní cāni sáha. Ndé vé quiví ndaha rí, ma cúu cuiti gā sōco. Te ndé vé candíje ruhū, ma jichí cuiti gā.

³⁶ Te nájnūhun je ni cahān rī jíin ró, tu cá candíje rō ruhū, vesú ni cajito rō núu rí.

³⁷ Táca ñáyuú jeē sáha Tátá rī jeē candíje i ruhū, máá i quívicoo ndaha rí. Te jétáhú rí táca jéē cuní quiví ndaha rí, chi ma squéhichí cuiti rí quihñ.

³⁸ Chi ní quiji rí ichi ándiví návāha sáha rí jniñu jeē cuní Yaā ní tají ruhū, te nasūu jéē sáha rí jeē cuní máá rí.

³⁹ Te jniñu jeē cuní Tátá rí, Yaā ní tají ruhū, cúu jeē ma scuíta rí ni ññ ñayuu ní jéhe ya nuū rí, chi condito rí i te nastécu rí i quiví jíinu ñayiví.

⁴⁰ Te Yaā ní tají ruhū, cuní yá jeē táca ñáyuú jeē nihñ i jñūhun ruhū, Sēhe Yaā Dios, te candíje i ruhū, cotecu i ní cāni ándiví. Chi nastécu rí i quiví jíinu ñayiví. Achí yá.

⁴¹ Yūcuán na te ni caquejéé jñāhan ñuu yā hebreo cácahān de siquí yá, chi ní cahān yá jeē máá yá cúu staā ní quiji ichi ándiví.

⁴² Te ni cacahān de:

¿A násūu téé yáha cúu Jesús, sēhe José? Te cājini yō tatá de náná de. ¿Te ndese cúu jeē cahān de jeē ní quíji de ichi ándiví núu súcuan?

⁴³ Te ni cahān Jesús jíin de:

Ma cahān rō siquí rí jíināhan ró.

⁴⁴ Ni ññ ñayuu ma cúu quiví i ndaha rí núu ma sáha Tátá rí jeē cúu ní i quiví i, chi máá yá ní tají ruhū vēji rí. Te nastécu rí i quiví jíinu ñayiví.

⁴⁵ Te suhva yósó núu tútu ni cateé téé ni canacani jñūhun Yaā Dios: Tācá i chi stéén Yaā Dios nuū i, áchí. Núu súcuan te táca ñáyuú jíni sōho jñūhun cáhan Tátá rí, te jétáhú i jeē stéén yá nuū i, ñayuu ún chi quívicoo i ndaha rí.

⁴⁶ Te tu ní jíto ní ññ ñayuu nuū máá Tátá rí. Chi máñuhún-ni ruhū ní jito rí nuū yā, chi nde nuū máá yá vēji rí.

⁴⁷ Jendaá cahān rī jíin ró jíināhan ró jeē ñayuu jeē candíje i jeē jñāma rí i, máá i cotecu i ní cāni.

⁴⁸ Máá rí cúu staā jeē cōtecu rō ní cāni sáha.

⁴⁹ Táca jíí rō jenahán, ni cayejí de staā maná jeē ní cuun ichi ándiví ndé nuū ñūhun téhé, te tu ní sáha jeē cōtecu de ní cāni ándiví.

⁵⁰ Te staā jeē cahān rí jeē vēji ichi ándiví, chi na-ni ñayuu caji, te cotecu i ní cāni ándiví.

⁵¹ Te suu máá rí cúu staā un jéē ní quiji ichi ándiví jéē sáha jeē cōtecu rō ní cāni. Te ñayuu jeē caji staā yáha, cotecu i ní cāni ándiví. Te staā jeē cuáha rí un cúu yiqui cúñu rí, te cuáha rí návāha ñayuu ñayiví cotecu i ní cāni ándiví. Achí yá.

⁵² Yūcuán na te jñāhan ñuu yā hebreo ni cacahān de jíin táca jñāhan de:

¿Ndese cuu cuáha téé yáha yiqui cúñu de caji yō? achí de.

⁵³ Te ni cahān Jesús jíin de:

Jendaá cahān rī jíin ró: Núu tú candíje ró jéē yiqui cúñu ruhū, Yaā ní nduu téé, cúu nájnūhun staā, te niñí rí cúu nájnūhun ndute, núu súcuan te ma cōtecu rō ní cāni ándiví.

⁵⁴ Chi ñayuu cá candíje jeē yiqui cúñu rí cúu nájnūhun staā te niñí rí cúu nájnūhun ndute, máá i cotecu i ní cāni. Te nastécu rí i quiví jíinu ñayiví.

⁵⁵ Chi yiqui cúñu rí jíin níñí rí cúu ndíje jeē sáha jeē cōtecu i ní cāni.

⁵⁶ Te ñayuu cá candíje jeē yiqui cúñu rí jíin níñí rí cúu nájnūhun staā jíin ndute jeē cōtecu i ní cāni sáha, máá i níñí ndúú i jíin rí, te ndúú rí jíin i.

⁵⁷ Máá Tátá rí, Yaā técu, ní tají yá ruhū vēji rí, te técu rí sáha máá yá. Te suni súcuan, ñayuu cá candíje jeē cúu rí nájnūhun staā i ndute i, suni súcuan cotecu i ní cāni sáha rí.

⁵⁸ Máá rí cúu staā ní quiji ichi ándiví. Te staā jeē cahān rí tu cúu nájnūhun staā maná jeē ní cayejí táca jíí rō jenahán, chi tu ní sáha jeē cōtecu de ní cāni. Te staā jeē cahān rí, chi ñayuu caji, cotecu i ní cāni sáha, áchí yá.

⁵⁹ Táca jñūhun yáha ní stéén Jesús nuū ñayuu ní candutútú ini vehe ññ sinagoga ñuu Capernaum.

Jñūhun cotecu yō ní cāni

⁶⁰ Te cuehē ñayuu cascuáha jíin yá, ni cajini sōho i jñūhun yáha jéē ní stéén yā. Te ni cacahān máá i:

Yōhoyo yí jñūhun cáhan yā yāhá. ¿Ndese cuu cuatáhú yō?

⁶¹ Te ní jini Jesús jeē cácahān i jeē yí cúu jñūhun yāhá, te ní cahān yā jíin i:

¿A yí sáha jñūhun yáha jíin ró jíināhan ró?

⁶² Te ndese sáha rō núu coto ró jéé ruhū, Yaā ní nduu téé, ndaa rí nuhun rí nuū ní cóndee rí xihna ñūhún?

⁶³ Máá ánuá ñayuu cúu jeē sáha jeē técu i. Chi yiqui cúñu i tu jéjnífuu cuiti súcuan. Te táca jñūhun ní cahān rí jíin ró cúu jeē quéndoo vāha ánuá rō, te cotecu rō ní cāni sáha.

⁶⁴ Te sava ró chi tu cá candíje ró. Achí yá.

Chi nde xihna ñuhún je jíni Jesús ndé-ni cúu ñayuu jeé ma cándije, jíni ndé ñin de cúu jeé nastúu de ya.

⁶⁵ Te ni cahān gā yā:

Jeé yúcuān ní cahān rī jíni ró jeé ma cúu quívi ni ñin ñayuu ndaha ri, te núu tu sáha Tátá rī jeé cúu ni i quívi i, áchí yá.

⁶⁶ Te nde quívi ún te cuehē ñayuu cascuáha jíni yá, ni castóo i ya, te tuá ni cájica i jíni yá.

⁶⁷ Yúcuān na te ni cahān yā jíni máa ndihúxi uú tēe cascuáha jíni yá:

¿A suni cácuni máa ró quingoo ró, chí naún?

⁶⁸ Te ni cahān Simón Pedro:

¿Ndé núu gā quingoo ná? Chi máa ní cúu jeé nácani jñuhun jeé cótecu na ñí cáni sáha.

⁶⁹ Te ni cacandije ná te cájini na jéé maá ní cúu Cristo, Sēhe Yāā Dios, Yāā técu, achí de.

⁷⁰ Te ni cahān Jesús:

Te vésú ni nacāji ri ndihúxi uú rō, te íyo ñin ró jeé ní quívi jexeén ini. Achí yá.

⁷¹ Te súcuān ni cahān yā siquí Judas Iscariote, sēhe Simón. Chi máa de nastúu de ya, vésú ñin jñáhan jeé uxí uú tēe cascuáha jíni yá cúu de.

Jeé tu ní cácandije ñani Jesús

7

¹ Yúcuān na te jíca cuu Jesús región Galilea. Chi tu cúní yā caca cuu ya región Judea, chí jñáhan ñuu yā hebreo jeé cáyūcu yúcuān, cácuni de cahni de ya.

² Te cuacuyajni vico jeé casáha ñayuu yā hebreo vehe ramadá, cáyūcú i chíji.

³ Te ñani yā ni cacahān de jíni yá:

¿Naun máa yáha-ni íne ró? ¿Naun tú quihín rō región Judea, návāha tēe yúcuān jéé cácandije de róhó, suni coto de jñiñu jéhuu sáha ró.

⁴ Chi núu cúní ñin tēe jeé cuité núu jñuhun de, te tu sáha yuhu de jñiñu. Te núu sáha nde ró táca jñiñu jéhuu, váha ga na sáha ró jéé cúní ndívií ñayuu.

⁵ Súcuān ní cacahān ñani yā jíni yá, chí ni máa de tu cácandije de ya.

⁶ Yúcuān na te ni cahān Jesús:

Ná tu quee maá quívi jeé quihín rī. Te máa ró jíñáhan ró chí ni-ni quívi-ni te cuu quingoo ró.

⁷ Chí ma quítí ni ñayuu ñayívi núu rō, te máa rí chí quítí ni i jíto i ruhū, chí cáhān rī jeé jíni rī jeé máni jñiñu néé casáha i.

⁸ Cuángoo máa ró vico ún. Te máa rí chí ma quihín rī vijna, chí ná tu quee maá quívi cánuú quihín rī. Achí yá.

⁹ Súcuān ní cahān yā jñuhun yáha jíni de, te ni quendōo ya Galilea.

Jeé ni jéhen Jesús vico vehe ramadá

¹⁰ Te nuú ni yáha ñani yā cuangoo de vico ún, te sáa te suni cuahān máa yá. Te tú cuahān ndijin yā, chí tu ní stéén yā máa yá.

¹¹ Te jñáhan ñuu yā hebreo cánanducú i ya nuú vico ún, te cácahān i:

¿Ndé nuú íne tēe ún? áchí i.

¹² Te yōhyo ni cacahān ñayuu jeé siquí yā, chí sava i cácahān: Tēe váha cúu de. Te sava ga i cácahān: Tuú chí stáhú de ñayuu.

¹³ Te yuhu-ni ni cacahān i jñuhun ya, chí cáyūhú i jeé quítí ni jñáhan i tēe hebreo.

¹⁴ Te jeé ní cuu sava vico, te ni quee Jesús, ni quívi ya templo cáhnu, te ni quejéé yá stéén yā jñuhun.

¹⁵ Te ní canaa ni jñáhan ñuu yā hebreo cájini sōho i, te ni cacahān i:

¿Ndese jíni tēe yáha cuehē jñuhun ndíchí, chí tu ní jíca de escuela? áchí i.

¹⁶ Yúcuān na te ni cahān Jesús:

Jñuhun stéén rī chí nasūu jñuhun máa rí cúu, chí jñuhun jeé ní jéhe máa Yāā ní tají rúhū cúu.

¹⁷ Núu ñin ñayuu cúní i sáha i jñiñu cúní Yāā Dios, ñayuu ún chí jecūhun ni i núu nde nuú Yāā Dios véji jñuhun stéén rī, chí jñuhun jeé jéni ní maá-ni rí cúu.

¹⁸ Tēe cáhān jñuhun jéni ní maá de, tēe un ndúcú de jeé na sájéhuu ñayuu de. Te núu ñin tēe ndúcú de jeé sajeéhuu de Yāā ní tají de, tēe un cúu tēe ndaā, te tú na jñuhun stáhú íyo jíni de.

¹⁹ ¿A násūu jéé ní jéhe Moisés ley yā nuú rō jeé squícu ró? Te ní ñin ró tu cásquícu. Chí sa jeé cácuni ró cahni ró ruhū, ¿te najehé cúu? Achí yá.

²⁰ Te ni cacahān ñayuu cuehē ún:

Tachí ndóho ró. ¿Ndé ñin cúní cahni rohó?

²¹ Te ní cahān Jesús:

Ni nasávāha ri ñin tēe quívi ndétátú, te ndívií rō ní canaa ni rō ní cajito ró jéé quívi ndétátú ní sáha ri jñiñu ún.

²² Te Moisés ní jéhe de ley jeé cúu circuncidar nuú rō. Te casáha ró circuncidar sūchi yí núu uná quívi jeé ní cacu i, vésú quívi ndétátu cúu. (Te nasūu máa Moisés ní jéquin ley un, chí jeé ní íyo nuú táca jíi de.)

²³ Núu súcuān te núu casáha ró circuncidar vésú quívi ndétátu cúu, návāha squícu ró ley Moisés, ¿te najehé cáquiti ní rō jeé ní nasávāha ndihí ri ñin tēe quívi ndétátú?

²⁴ Ma yachí cani ní rō jeé cuéchi cúu jeé sáha ri. Chí sa cani váha ní rō siquí táca jñiñu váha. Achí yá.

Jeé ní cachi Jesús ndé nuú véji ya

²⁵ Yúcuān na te sava ñayuu ñuu Jerusalén ni cacajñuhun jñáhan i:

¿A násūu tēe yáha cúu jeé cánanducú tēe cácuéjhuu jeé cáhni de, chí naún?

²⁶ Te yáha cáhān ndijin de nuú chítú, te tú na jñuhun cácahān jíni de. ¿A sanaa te ní cacundaā ní tēe cácuéjhuu jeé tēe yáha cúu Cristo jeé achí tutu jeé quíji, chí naún?

27 Te tuú chi je cájini yō nuū vēji tēe yáha. Te jeē quíji Cristo, chí ni ìn yó má cūni ndé chí quíji ya. Achí i.

28 Yūcuán na te ni cahān jee Jesús jeē steēn yā jnūhun ini templo:

Cájini rō ruhū, te cájini rō ndé ñuu vēji ri. Te vēsú súcuan te máá Yaā ndaā cúu jeē ní tají ruhū vēji ri, te tú vēji ri jeē cuní máá rí. Te tu cájini rō ndese Yaā cúu ya.

29 Te máá rí chí jíní rí yā, chí nde nuū máá yā vēji ri, te máá yā ní tají ruhū, achí yá.

30 Yūcuán na te ni canducú de jnū de ya. Te ni ìn de tu ní cúu jnū de ya, chí ná tu quee máá quívī jeē jnū de ya.

31 Te cuehē ñayuu chí ni cacandíje i ya, te ni cacahān i:

¿A násūu tēe yáha cúu Cristo, Yaā ndétu yó jēe quíji? Chí cuehē ndasí jnūñu jéhnū sáha ya jeē steēn yā poder yá. Achí i.

Jeē ní catajī de policía jeē jnū de Jesús

32 Te ni cajini tēe fariseo jeē súcuan cacahān ñayuu jnūhun ya. Te máá de jín sūtū cácujeñhu, ní catajī de policía cándito templo jeē jnū de ya.

33 Te ni cahān Jesús:

Jecu na quívī condee rí jín ró jijnáhan rō. Yūcuán na te nuhun rí nuū Yaā ní tají ruhū vēji ri.

34 Te nanducú ró ruhū, te ma nánihīn rō ruhū. Chí ma cúu jinūcoo ró núu cóndee rí. Achí yá.

35 Yūcuán na te máá tēe un ní cacajnūhun jnāhan de:

¿Te ndé nuū quihín tēe yáha jeē ma nánihīn yō de? ¿A quihín de nuū jnāhan yó hebreo jeē ní cajitē núu cáyūcu ndé nación Grecia? ¿Te á steēn de jnūhun nuū ñayuu Grecia, chí naún?

36 ¿Te na jnūhun cúu jeē ni cáhān de jín yó jeē nanducú yó de te ma nánihīn yō de, chí ma cúu jinūcoo yó núu cóndee de? Achí tēe un jijnáhan de.

Siquí ndute jeē cótecu yō ní cáni sáha

37 Te quívī sándihí vico ún te cúu vico cáhnu ga. Te quívī un ní ndocuíñ Jesús, te ni cahān jee ya:

Núu ndé ñayuu jnáa ndasí i táca jéé váha jeē sáha ri jehē i, nájñūhun jeē jichí i ndute, núu súcuan te na quívī i ndaha ri te coho i ndute, cúu jeē nihín i jeé váha ún.

38 Te ñayuu jeē candíje jeē jnáma ri i, chí ini anuá i condee Espíritu Santo, te cuu ya nájñūhun yūte cáne ñuhún jeē sáha ya jeē cótecu i ní cáni, nájñūhun cáhān tutu ì. Achí yá.

39 Te súcuan ni cahān yā jeē ñayuu candíje jeē jnáma ya i, nihín i Espíritu Santo. Chí ná tu quee Espíritu ún, chí ná tu ndaa Jesús quinuñun yā nuū ndujéhnū ya.

Jeē ní cacusān ñayuu siquí yā

40 Te sava ñayuu cuehē ún, ná ni cajini sōho i jnūhun yáha, te ni cacahān i:

Jendaá jeē tēe yáha cúu jeē achí tutu jeē quíji de nacani de jnūhun Yaā Dios, achí i.

41 Te sava ga i ni cacahān:

Tēe yáha cúu Cristo, Yaā ní tají Yaā Dios.

Te sava ga i chí ni cacahān i:

Tuú chí nasūu Galilea quíji Cristo.

42 Chí cáhān tutu ì jeē ndé yucūn rey David cacu Cristo, te cacu ya ñuu Belén, ñuu nuū ní cacu máá David. Achí i.

43 Te súcuan te ni cacusān ñayuu jeē siquí yā.

44 Te sava i cácuni i jnū i ya, te ni ìn i tu ní jnū i ya.

Jeē tu ní cácandíje tēe cácujeñhu

45 Yūcuán na te policía cándito templo tu ní cájni de Jesús, te cuanungoo de nuū táca tēe fariseo jín núu sutú cácujeñhu. Te tēe ún ni cacajnūñun de policía:

¿Najehē tu ní quecoo ró jín de? achí.

46 Te ni cacahān policía un:

Tú cuiti ní ìn tēe cáhān váha ndasí nájñūhun cáhān tēe yūcuan, achí.

47 Te ni cacahān tēe fariseo:

¿Te á suni nde máá ró jijnáhan ró ní stáhú de naún?

48 Ni ìn jnāhan ruhū tēe cácujeñhu jín tēe fariseo, tu cácandíje ri jnūhun cáhān tēe ún, ¿te naun cácandíje máá ró?

49 Te ñayuu cuehē yáhá jéé tu cájecūhun ni i ley Moisés, chí jnahū ndetu i jeē cácandíje i tēe ún, achí de jijnáhan de.

50 Te ni cahān Nicodemo, tēe ni jéhēn nuū yā ñn jecuaá, te suni ìn tēe fariseo cúu de:

51 Cáhān ley yō jeé ma cúu tee yó cuéchi siquí ìn tēe, te núu tú xīhna gā cuni sōho yó ndese cáhān de, návāha cucáhnū ni yō na cuéchi ní sáha de. Achí de.

52 Te ni cacahān jín de:

Te róhó, ¿á suni nde Galilea vēji ró jéé cáhān ró jehē tēe ún? Nanducú váha ró núu tútu ì te cuni ró jeē ndé Galilea tu quénda cuiti ní ìn tēe nácani jnūhun Yaā Dios. Achí jín de.

53 Te cuanungoo de ná vehe ná vehe de.

Jnūhun ñahan ní casiquí ndé jnāhan

8

1 Te ni caa Jesús cuahān yā yucu Olivos.

2 Te jeē cuácundijin inga quívī, te ni ndee tucu ya templo. Te ndihí ñayuu ní quecoo i nuū yá. Te ni cucóo ya, te ni steén yā jnūhun nuū i.

3 Yūcuán na te tēe cástéén tutu ley Yaā Dios jín tēe grupo fariseo, ni quecoo de jín ìn ñahan jeē ní canihín de ña jeé casiquí ndé ña. Te ni cajeni de ña mēhñú.

4 Te ni cacahān de jín ya:

Maestro, ní canihín ná ñahan yáha jéé casiquí ndé ña.

⁵ Te ley Moisés ndácu jniñu nuū yō jeē cuáha yó yūū xinī ñahan cásáha súcuan náváha cuu ña. Te máá ní, ¿ndese cáhán ní?

⁶ Te súcuan ni cacahān de jeē cájito ndee de ya núu cuatáhú yá jeē cahán ley un, chi núu tuú te caquin de cuēchi siquī yā. Te Jesús ni jita ndeyi ya, te ni tee ya nuū ñúhun jíin xíní ndáha ya.

⁷ Te jeē cácajnūhun cácajnūhún de ya, te ni ndonehen ya maá yá, te ni cahān yā jíin de: Núu ndé ñin máá ró tú na cuēchi ró, te xīhna gā maá ró cuáha yuū xinī ña núu súcuan, áchí yá.

⁸ Te ni jita ndeyi tucu ya, te ni tee tucu ya nuū ñúhun.

⁹ Te nuū ní cajini de jeē súcuan ni cahān yā, te ni cajecūhun ni de jeē suni cáhīyo cuēchi de. Te ná ñin ná ñin de ní quendacoo de cuahān de, xīhna gā tēe jéhnú ga te nde nuū ní ndíhi na. Te ni ndōo máá ñin na Jesús jíin ñahan índichi mēhñú un.

¹⁰ Te ni ndonehen tucu ya maá yá, te tuá ni ñin tēe un ní jito ya, chí máá na ñahan ún. Te ni cahān yā jíin ña:

¿Nde chí cuángoo tēe cájequin cuēchi siquī rō? ¿A tú ni ñin de ní ndóna cahān gā cuēchi siquī rō?

¹¹ Te ni cahān ña:

Tú ni ñin de, áchí ña.

Yūcuán na te ni cahān Jesús jíin ña:

Ni ruhū, ma cahán rī cuēchi siquī rō. Cuahán te ma sáha ga rō cuēchi, áchí yá.

Jesús cúu máá luz jeē steén ini anuá ñayuu

¹² Te inga jíinu ni cahān Jesús jíin ñayuu:

Máá rī cúu nájnūhun luz jeē steén ini anuá ñayuu ñayiví, jeē sáha jeē jécūhun ni i siquī Yāā Dios. Ñayuu candíje ruhū chí ma cáca i nájnūhun nuū néé, chí sa suhva coneváha i luz ini anuá i jeē sáha jeē cótecu i ní cáni.

¹³ Yūcuán na te ni cacahān tēe fariseo jíin yá:

Róhó chí cáhán rō jnūhun jehē maá ró, te tu jéjníñu jnūhun cáhán rō.

¹⁴ Te ni cahān Jesús jíin de jíjnāhan de:

Vesú cáhán rī jehē maá rī, te iyó ndáā jnūhun cáhán rī. Chí jíin rī ndé nuū véji rī jíin ndé nuū quihín rī. Te róhó tu cájini rō ndé nuū véji rī ni ndé nuū quihín rī.

¹⁵ Máá ró chí cuenta ñayuu ñayiví cásandaā rō siquī jnūhun cáhán rī. Te ruhū chí tu sándaā mañúhún rī siquī ni ñin ñayuu.

¹⁶ Te núu sándaā rī siquī i, te ndaā sáha rī, chí tu sáha mañúhún rī, chí sándaā rī nde jíin máá Tátá rī, Yāā ní tají ruhū véji rī.

¹⁷ Te yósó núu tútu ley cāneváha ró jeē núu inuú cácahān uū testigo, te jíni ñúhún cuatáhú ró jeē cácahān, chí iyó ndáā jnūhun ún.

¹⁸ Núu súcuan te ruhū cúu ñin jeē cáhán ndaā rī jehē rī. Te inga jeē cáhán ndaā jehē rī cúu máá Tátá rī, Yāā ní tají ruhū. Achí yá.

¹⁹ Te ni cacahān de jíin yá:

¿Nde nuū ndeé Tátá rō?

Te ni cahān Jesús:

Tu cájini rō ruhū ni Tátá rī. Te núu jeē cájini rō ruhū, suni cuni rō Tátá rī nuū.

²⁰ Tāca jnūhun yáha ní cahān Jesús jeē steén yā ini templo nuū cáyūcu yéjñū jeē cásocó i xūhún. Te tú ni ñin de ní jnái de ya, chí ná tu quee maá quiví jeē jnái de ya.

Jeē ni cahān yā jeē ma cúu jinūcoco de nuū cóndee yā

²¹ Te ni cahān tucu Jesús jíin de:

Ruhū chí quihín rī, te nanducú ró ruhū, te ma náminhín rō ruhū, chí quendōo cuēchi ró siquī rō quiví cúu rō. Te jeē yúcuán má cúu jinūcoco ró núu quihín rī, achí yá.

²² Yūcuán na te tēe hebreo un ní cacahān maá de:

¿A cahni tēe yáha máá de, te jeē yúcuán cáhán de jeē ma cúu jinūcoco yó núu quihín de, chí naún? Achí de.

²³ Te ni cahān yá:

Máá ró jíjnāhan ró chí ñayiví yáha véjicoo ró, te ruhū chí nde andiví véji rī. Máá ró cácuu ñayuu ñayiví yáha, te ruhū chí nasūu tēe ñayiví yáha cúu rī.

²⁴ Jeē yúcuán ní cahān rī jeē quendōo cuēchi ró siquī rō quiví cúu rō. Chí núu ma candíje ró jéé maá rī cúu Cristo, te quendōo nahín cuēchi ró siquī rō quiví cúu rō. Achí yá.

²⁵ Te ni cacajñúhún de ya:

Núu súcuan ¿te ndé ñin cúu ró?

Te ni cahān yā:

Je ni cachi rī nuū rō nde xīhna ñúhún ndé ñin cúu rī.

²⁶ Te iyó cuéhē gā jnūhun cuu cahān rī jíin ró te sándaā rī siquī rō. Te ma cahán rī, chí ini ñayiví yáha cáhán rī maá-ni jnūhun jeē ní jíin rī ni cahān Yāā ní tají ruhū véji rī. Te máni jnūhun ndaā cáhán yá. Achí yá.

²⁷ Te tu ní cajecūhun ni de jeē cáhán yā jnūhun Tátá yā andiví jíin de.

²⁸ Jeē yúcuán ní cahān gā yá:

Nde na yáha jeé cáta caa ró ruhū, Yāā ní nduu tēe, jíicā cruz, yūcuán na te cuni rō ndé ñin cúu rī. Te cuni rō jeē tú na vé sáha rī jeē maá rī, chí cáhán rī maá-ni jnūhun ni steén Tátá rī nuū rī.

²⁹ Chí máá Tátá rī, Yāā ní tají ruhū, ndéé yá jíin rī. Te tu stóo mañúhún yá ruhū, chí níni sáha rī jniñu jeē nújñahan ni maá yá. Achí yá.

³⁰ Te jeē ní cáhán yā jnūhun yáha, te cuéhē ñayuu ni cacandíje i ya.

Siquī ndé-ni cúu sēhe Yāā Dios jíin sēhe jexéén

³¹ Yūcuán na te ni cahān Jesús jíin jnāhan ñuu yā hebreo jeē ní cacandíje i ya:

Te núu cuiñi nīhin ró jíin jnūhun steén rī nuū rō, te cuu ndíje ró ñayuu scuáha jíin rī.

³² Te jecūhun ni rō jnūhun ndaā, te jnūhun ndaā un sāha jeē nduu libre rō nuū jeē yāhi rō ndaha.

³³ Te ni cacahān i jīn yá:

Sēhe yucūn Abraham cácuu ri, te tu cáyihī cuiti ri ndaha ni ĩn. ¿Te ndese cúu jeē cahán rō jeē nduu libre ri núu súcuan?

³⁴ Te ni cahān Jesús:

Jendaā cahán rī jīn rō jeē tāca ñáyyu casáha cuēchi, tu iyó libre i, chí yāhi i chíji cuēchi jeē jejniñu cāhá i nuū.

³⁵ Te ñayuu jejniñu cāhá, chí tu cúu i ĩn jnāhan ñayuu vehe nuū jejniñu i. Te ĩn sēhe chí sa suhva cúu ndije i jnāhan ñayuu vehe ún.

³⁶ Núu súcuan te máá rí jeē cúu Sēhe Yaā Dios, núu sāha ri jeē tuá cuajniñu cāhá rō nuū cuēchi, núu súcuan te nduu libre ndije rō jijnāhan rō, te cuu rō sēhe ya.

³⁷ Te jīn rī jeē sēhe yucūn Abraham cácuu rō, te vēsú súcuan te cácuni rō cahni rō ruhū, chí tu cájetáhú rō jnūhun cáhán rī.

³⁸ Ruhū chí cahán rī jnūhun jeē ni stéén Tatá rī nuū rī. Te máá rō chí casáha rō jniñu jeē ni cahān tatá máá rō jijnāhan rō. Achí yá.

³⁹ Te ni cacahān i:

Sēhe yucūn Abraham cácuu ri.

Te ni cahān Jesús:

Núu jeē candije rō nájñūhun ni candije Abraham návāha cuu ndije rō yucūn de, yūcuán na te jniñu váha ni sāha de suni sāha máá rō nuū.

⁴⁰ Te vijna chí cácuni rō cahni rō ruhū, vēsú ni cahān rī jīn rō tāca jnūhun ndaā ni stéén Tatá rī nuū rī. Te Abraham chí tu ní sāha cuiti de súcuan.

⁴¹ Máá rō chí inuū casáha rō jīn tatá máá rō. Achí yá jīn i.

Yūcuán na te ni cacahān i:

Máá rí chí tu cácuu ri sēhe ndáhú jēe tu tátá. Chí iyó ĩn-ni tátá rī, te Yaā Dios cúu ya.

⁴² Te ni cahān Jesús:

Núu Yaā Dios cúu ndije tátá rō, te coo maní rō jīn rí nuū. Chí nde nuū Yaā Dios ni quenda ri vēji ri. Te tú vēji ri jeē cuní máá rí, chí máá yá ni tají ruhū.

⁴³ ¿Te najehē tu cájecūhun ni rō jnūhun cahán rī núu súcuan? Suu siquí jeē tu cácuni rō chusóhó rō jnūhun nácani rī.

⁴⁴ Máá rō jijnāhan rō chí tátá rō cúu jexeén. Te cácuni rō sāha rō máá jēe cuní tátá rō ún. Máá jéxeén ni jehni ndiyi nde jeē xihna ñūhún. Te tu ní ĩn cuiti jīn jnūhun ndaā, te tú cuiti na jnūhun ndaā cahán. Te jeē cahán jexeén jnūhun stáhú cúu jeē súcuan cáa máá. Chí máá un cúu jeē ndíso jnūhun stáhú, te máá un cúu jeē ní squéjéé ndihi jnūhun stáhú.

⁴⁵ Te ruhū chí cahán rī jnūhun ndaā, te jeē yúcuan cúu jeē tu cácandije rō ruhū.

⁴⁶ Te ni ĩn rō ma nihín rō cuēchi siquí rī, chí tú cuiti na cuēchi rī. Te máni jnūhun ndaā cahán rī, ¿te naun tu cácandije rō ruhū?

⁴⁷ Ñayuu cácuu sēhe Yaā Dios, chí cáchusóhó i jnūhun Yaā Dios. Te nasūu sēhe Yaā Dios cácuu rō, te jeē yúcuan tu cácuni rō chusóhó rō. Achí yá jīn de.

Iyó Jesús nde ná tu coo Abraham

⁴⁸ Yūcuán na te ni cacahān jnāhan ñuu yā hebreo un:

Ndaā cacahān rī jeē canéé rō nájñūhun ñayuu Samaria, te ñūhun tachí ini rō.

⁴⁹ Te ni cahān Jesús:

Tu ñūhun tachí ini rī, chí yñūhún rí jīn Tatá rī. Te máá rō jijnāhan rō chí tu cáhiyo yñūhún rō jīn rí.

⁵⁰ Máá rí tu ndúcú rí jeē cujéhu ri. Iyó ĩn jeē sāha jeē cujéhu ri, te máá yá sándaā siquí jnūhun cacahān rō.

⁵¹ Jendaā cahán rī jīn rō, núu ndé ñayuu squícu jnūhun cáhán rī, ma cúu cuiti i. Achí yá.

⁵² Te tēe hebreo un tu ní cájecūhun ni de, te ni cacahān de:

Vijna te ni cacacáhu ni rī jeē ñūhun ndije tachí ini rō. Chí Abraham jīn táca tēe ni canacani jnūhun Yaā Dios nde jengahán, ni cajihī de. Te róhó cahán rō, núu ndé vé squícu jnūhun cáhán rō, te ma cúu cuiti i, achí rō.

⁵³ ¿Te chí jéhu ga rō vēsú jīi yō Abraham naún? Chí ní jihī de, te suni ni cajihī táca tēe ni canacani jnūhun ya. ¿Te ndé ĩn ga sāha rō máá rō núu súcuan? Achí de.

⁵⁴ Te ni cahān Jesús:

Núu ruhū sajéhu ri máá rí, te tu nihín jniñu. Máá Tatá rī cúu jeē sajéhu ruhū. Te cacahān rō jeē máá yá cúu Yaā Dios máá rō.

⁵⁵ Te vēsú súcuan te tu cájini rō ndese Yaā cúu ya. Te ruhū chí jini rí yá. Te núu cahān rī jeē tu jini rí yá, te cuu ri tēe stáhú nájñūhun máá rō jijnāhan rō. Te tuú chí jini ndije ri yá, te squícu rí jnūhun cáhán yá.

⁵⁶ Te jíi rō Abraham ni cusí ni de jeē coto de quiví queé rī. Te je ni jito de, te ni jito ri jeē ní cusí ndasí ni de. Achí yá.

⁵⁷ Yūcuán na te ni cacahān tēe hebreo un jīn yá:

Ni ná tu coo rō uū xico uxí cuiyā, ¿te ndese cúu jeē cahán rō jeē ní jito rō núu Abraham? achí de.

⁵⁸ Te ni cahān Jesús:

Jendaā cahán rī jīn rō jeē nde ná tu cacu Abraham te je iyó rí, achí yá.

⁵⁹ Yūcuán na te ni caquihin de yuū jeē cuáha de xini yá. Te Jesús chí ní quenda sāhi yá ní yāha ya mēhū de, ni quenda ya ini templo cuahān yá.

Jeē ní nasávāha ya ĩn tēe ni cacu cuáá

9

¹ Te jeē jíca Jesús cuahān yā, te ni jito ya nuū ñn tēe ni cacu cuáá.

² Te tēe cáscuáha jíin yá ni cacajñuhún de ya:

Maestro, ¿naun ni cacu cuáá tēe yáha? ¿A cuéchi tátá de náná de cúu, chí cuéchi máa de cúu, chí naún?

³ Te ni cahān Jesús:

Nasūu cuéchi máa de, ni nasūu cuéchi tátá de náná de cúu jeē ní cacu de súcuan, chí sa suhva návāha cuni ñayuu jñiñu jéhnū sáha Yaā Dios jíin de.

⁴ Níní jeē cúu nájñuhun nduú ini ñayiví, te cánuú sáha ri jñiñu Yaā ní tají rúhū. Chí quee tiempo jeē coo nájñuhun jecuáá, jeē tuá cuu sájnñu ni ñn.

⁵ Níní jeē iyó rí ini ñayiví te cúu ri luz jeē cúndijin ini anuá ñayuu ñayiví, návāha jecúhun ni i siquī Yaā Dios. Achí yá.

⁶ Te ná ni cahān yā súcuan, te ni tesíhi yá nuū ññuhun, te ni sáha ya ndehyū jíin tésíhi yá un, te ni tee ya siquī tinūu tēe cuáá un.

⁷ Te ni cahān yā jíin de:

Cuáhān núu pila Siloé te nacate ró tinūu ró, achí yá. Te jñuhun Siloé cuni cahān, ndute ni cascáca de ni quee.

Yūcuán na te cuahān de, te ni nacate de tinūu de, te ni ndundijin-ni, te ni nandicó de vēji de.

⁸ Yūcuán na te ñayuu yúcu yajni jíin de, jíin ñayuu jeē ní cajito jeē cúu de tēe cuáá, ni cacajñuhun jñāhan i:

¿A násūu tēe yáha cúu jeē ndeé-ni yāhá te jicán caridad?

⁹ Te sava i ni cacahān:

Suu de cúu.

Te sava ga i ni cacahān:

Nasūu de cúu, te súcuan cúní coto de.

Te máa de chí ni cahān de:

Suu ri cúu.

¹⁰ Yūcuán na te ni cacajñuhún i de:

¿Te ndese cúu jeē ní nanune tinūu ró núu súcuan?

¹¹ Te ni cahān de:

Tēe nání Jesús ni sáha de ndehyū, te ni tee de tinūu rí, te ni cahān de jíin rí: Cuáhān núu pila Siloé te nacate ró tinūu ró. Te ni jehēn rí, te ni nacate rí, te ni nanune-ni tinūu rí, achí de.

¹² Yūcuán na te ni cacajñuhún i de:

¿Ndeé nuū íne tēe ún? achí i.

Tu jíin rí, achí de.

Jeē ní castíchi tēe fariseo tēe ni cacu cuáá

¹³ Yūcuán na te ni cajendeca i tēe ni iyo cuáá un núu tēe grupo fariseo.

¹⁴ Te quiví ndétātu cúu jeē ní sáha Jesús ndehyū jeē ní nanune ya tinūu de.

¹⁵ Te tēe fariseo un ní cacajñuhún tucu de tēe ún ndese ni nanune tinūu de. Te ni cahān de:

Ni tee de ndehyū siquī tinūu ná, te ni nacate ná, te ni ndundijin-ni tinūu ná, achí de.

¹⁶ Yūcuán na te ni cacahān sava tēe fariseo:

Tēe ún chí nastūu ndé nuū Yaā Dios vēji de, chí tu nēe íi de quiví ndétātu.

Te sava ga de chí ni cacahān:

¿Ndesse cuu sáha tēe un táca jñiñu jéhnū yáha te núu tēe iyó cuéchi cúu de?

Te ni cacusín de siquī yá.

¹⁷ Te ni cacajñuhún tucu de tēe ni iyo cuáá un:

Róhó, ¿ndese cáhān rō siquī tēe ni nanune tinūu ró núu súcuan?

Te máa de ni cahān de:

Ñn tēe nácani jñuhun Yaā Dios cúu de, achí de.

¹⁸ Te tēe hebreo un chí tu ní cácanđije de jeē ní iyo cuáá tēe ún te ni ndundijin tinūu de. Te ni cacana xíní tátá de náná de.

¹⁹ Te ni cacajñuhún de:

¿A yáha cúu sēhe ro jéē ní cacu cuáá cácahān rō? Núu súcuan ¿te ndese ni ndundijin tinūu de vijna? achí.

²⁰ Te ni cacahān tátá de náná de:

Suu sēhe rí cúu tēe yáha jéē ní cacu cuáá.

²¹ Te tu cájini rí ndese ni ndundijin tinūu de vijna, ní tu cájini rí ndé tēe ni nanune tinūu de. Cajñuhun ró maá de, chí je jéhnū de, te na cáchi máa de.

²² Súcuan ni cacahān tátá de náná de, chí cáyühú de cájito de jñāhan de tēe hebreo. Chí je ni casándaá tēe un jéē núu ndé ñayuu cachi i jeē Jesús cūo Cristo, Yaā ní tají Yaā Dios, te quenehen de i jeē ma cúu ga quiví i ini vehe íi sinagoga.

²³ Jeē yúcuán ní cacahān tátá de náná de: Cajñuhun ró maá de, chí je jéhnū de.

²⁴ Yūcuán na te tēe hebreo un ní cacana tucu de tēe ni iyo cuáá un. Te ni cacahān de jíin:

Cachí cají ró nuū rí, jito jíinúu Yaā Dios. Chí cájini rí jeē tēe iyó cuéchi cúu tēe ni nanune tinūu ró.

²⁵ Yūcuán na te ni cahān de:

Tu jíin na núu iyó cuéchi de, chí naún. Te iyó ñn jeē jíiní ná, cúu jeē tēe cuáá ní cuu ná, te vijna chí ni ndundijin tinūu ná. Achí de.

²⁶ Te ni cacajñuhún tucu de:

¿Ndesse ni sáha de jíin rō? ¿Ndesse ni nanune de tinūu ró núu súcuan?

²⁷ Te ni cahān de:

Je ní cuu ní castúhun ná nuū ní, te tu ní cácu ni ní cuatáhú ní. ¿Te najehē cácu ni ní jéē cáchi tucu ná núu ní? ¿Te chí suni cácu ni ní jíināhan ní candíje ní yá naún?

²⁸ Yūcuán na te ni cacahān neé jíin de, te achí:

Máá ró chí cándije ró tēe ún, te máá rí chí cácanđije rí Moisés.

²⁹ Te cájini rī jeē ni cáhān Yaā Dios jíin Moisés. Te tēe yúcuān, ni tu cájini rī ndé nuū véji de.

³⁰ Te ni cahān tēe ni iyo cuáá:

Nāa ni na jēe cácahān ni jēe tu cájini ní jeē véji de nuū Yaā Dios, vēsū ni nanune de tinūu ná.

³¹ Te cájini yō jeē Yaā Dios tu jíni nahín yá jeē cájicān ñayuu iyó cuéchi. Chi jíni nahín yá nuū maá-ni ñayuu jeē cáchiñuhún i ya te cásáha i jeē cuní yá.

³² Te ní véji yó te tu ní jíni sōho cuíti yō jeē ñin tēe nanune de tinūu inga tēe ni cacu cuáá.

³³ Te núu nasūu ndé nuū Yaā Dios véji tēe ún, te ma cúu cuíti sáha de ñin jniñu sūcuān. Achí de.

³⁴ Te ni cacahān tēe hebreo un:

Róhó chí iyó ndasí cuéchi ró ndé quívi ní cacu ró, ¿te á máá ró steén nuū rī naún? áchi.

Te ni caquenehen tēe un yátā vehe ñi sinagoga.

Siquí ñayuu cáhño cuáá ánuá

³⁵ Te ni jíni jñūhun Jesús jeē ní caquenehen de tēe ún. Te ni nihín jñāhan ya jíin de, te ni cahān yá jíin de:

¿A cándije ró Séhe Yaā Dios?

³⁶ Te ni cahān de:

¿Nde ñin cúu ya návāha candije ná yá?

³⁷ Te ni cahān Jesús:

Je ni jito ró núu yā, te suu cúu ruhū jeē cahān jíin ró, achí yá.

³⁸ Yūcuán na te ni jecuiñi yití de nuū yā, te ni cahān de:

Cándije ná jēe nihín cúu Jitoho ná.

³⁹ Te ni cahān Jesús:

Véji rī ñi ñayívi yáha jēe sándaā rī siquí ñayuu. Chi ñayuu jeē nájñūhun cácuáá ánuá, ndundijin ñi ánuá i jeē jécūhun ni i siquí rī. Te ñayuu jeē jéni ni i jeē cájecūhun ni i, nájñūhun nducuáá ánuá i. Achí yá.

⁴⁰ Te sava tēe fariseo jeē cáhīn jíin yá, ná ni cajini de jñūhun yáha, te ni cacahān de jíin yá:

¿Te chí jéni ni rō jeē suni tēe tu cájecūhun ni cácuu máá rī naún?

⁴¹ Te ni cahān Jesús:

Núu jeē cácuu ró tēe tu jécūhun ni nuú, te ma cóo cuéchi ró. Te siquí jeē ní cacahān rō jeē cájecūhun ni rō, te tu cájetáhu ró, jeē yúcuān condee cuéchi siquí rō.

Jñūhun yátā siquí lanchi

10

¹ Jendaá cahān rī jíin ró, núu yíhi lanchi ñi corral cánevāha cáhnu ñayuu, te núu ndé tēe tu quívi de ichi yéhyí corral un, chí sa suhva inga lado cáa de quívi de, tēe un cúu ñacuñhá, chí véji jeē sacuiñhá.

² Te tēe quívi ichi yéhyí, chí tēe un cúu pastor ndíto lanchi.

³ Te tēe ndíto yéhyí, núne de te quívi tēe ún. Te lanchi de cánacuni tī tachí de. Te cána de síhvi lanchi máá de, te táva de tī.

⁴ Te núu ni tava de ndíhi lanchi máá de, te yósnúu de nuū tī cuahān de. Te lanchi un cándiquín tī de, chí nácuni tī tachí de.

⁵ Te ma cóndiquín tī yatā inga tēe, chí sa suhva cunu tī coto tī de, chí nácuni tī jeē nasūu jítoho tī cúu.

⁶ Jñūhun yátā yáha ní cahān Jesús jíin ñayuu, te tu ní cájecūhun ni i na jñūhun cúu jeē ni cáhān yá.

Jesús cúu máá pastor vāha

⁷ Yūcuán na te ni cahān gā Jesús jíin i:

Jendaá cahān rī jíin ró: Máá rí cúu nájñūhun yéhyí corral nuū quívicoo ñayuu cácuu nájñūhun lanchi rī.

⁸ Tāca tēe jeē tu ní táji Yaā Dios, jeē ní quijicoo de nde ná tu quee rī, cácuu de nájñūhun ñacuñhá, chí tu ní cástéén de jñūhun ndaā. Te ñayuu cácuu nájñūhun lanchi rī, tu ní cájetáhu i de.

⁹ Máá rí cúu nájñūhun yéhyí. Te ñayuu jeē jíin máá rí quívicoo, jnama rī i. Te cuu i nájñūhun lanchi jeē ndívicoo tī nuū yíhi vāha tī, te quéndacoo tī nuū cáji vāha tī.

¹⁰ Tēe cuiñhá chí máni véji de jeē sacuiñhá de lanchi, te cahni de, te snāā de. Te ruhū chí véji rī návāha cotecu ñayuu cácuu lanchi rī, te nde yōhoyo vāha ndetū coo i.

¹¹ Máá rí cúu máá pastor vāha. Te pastor vāha chí ndíto vāha de lanchi de, vēsū nde cuu de jeē siquí tī.

¹² Te ñin tēe yíyāhu, nasūu pastor tī cúu de, chí nasūu lanchi máá de cúu tī. Te núu jíto de jeē véji yíhi, te stóo de lanchi, te jínu de cuahān de. Te yíhi chí jñi tī lanchi, te sáha tī jeē jíitē núu lanchi.

¹³ Te tēe yíyāhu ún chí jínu de cuahān de siquí jeē lanchi tátú cúu jeē ndíto de, te jeē yúcuān tu cundáhu ni de tī.

¹⁴ Máá rí cúu máá pastor vāha. Te jíni rī táca ñayuu cácuu nájñūhun lanchi rī, te máá i cájini i ruhū.

¹⁵ Te yáha cúu nájñūhun jeē Tatá rī jíni yá ruhū, te máá rí jíni rī Tatá rī. Te cuu rī jeē siquí ñayuu cácuu lanchi rī.

¹⁶ Te suni iyó gā ñayuu jeē cácuu lanchi rī, te sñin sñin ñayuu cácuu i. Te cánuú jēe suni condeca rī ñayuu ún. Te cuatáhu i jñūhun cáhān rī. Te coyūcu cáhnu-ni ndíhi ñayuu cándije, te coo ñin-ni pastor i.

¹⁷ Te Tatá rī maní ndasí yá jíin rí siquí jeē jéhe rí máá rí jeē cúu rí jehé ñayuu, te natecu tucu rí.

¹⁸ Ni ñin ma cúu cahni ruhū, chí máá rí cúu jeē jéhe jñūhun cuu rī. Jeē cachí máá rí te cuu rí, te jeē cachí máá rí te natecu rí, chí sūcuān iyó poder rí. Sūcuān ni cahān Tatá rí jeē sáha rí. Achí yá.

¹⁹ Te jeē ní cajini jnánhan ñuu yā hebreo jñūhun yáha, te ni cacusfín tucu i.

²⁰ Te cuehē i ni cacahān:

¿Naun cáchusohó ró jeē cahán de? Chi ñūhun tachī ini de, te ni t̄iví xíní de.

²¹ Te sava ga i ni cacahān:

Tu súcuan cáhán tēe ñūhun tachī ini, nájñūhun cáhán tēe yáha. Te tēe ñūhun tachī ini, ¿á cuu nanune de tinūu tēe cuáá naún? Achí.

Jeē ní casquéhichī i Jesús

²² Te tiempo mijin cúu, te ñuu Jerusalén cánasáha ñayuu vico jeē cánucūhun ni i quiví ni cuhíi templo cáhnu.

²³ Te jíca cuu Jesús ini templo, ini corredor jeē naní Salomón.

²⁴ Te jnánhan ñuu yā hebreo ni cacutútú i nuū yā, te ni cacahān i:

¿Nasaa ga quiví sáha ró jeē ma cucáhnu ni rí? Cachi cají nuū rí jijnánhan rí nuū máá ró cúu Cristo.

²⁵ Te ni cahān Jesús:

Je ni castūhun rí nuū rō, te tu ní cá candíje ró. Táca jniñu jeē ní tejñiñu Tátá rí ruhū sáha rí, yūcuan stéén cají jeē máá yá ni tají ruhū.

²⁶ Te tu cá candíje ró, chí nasúú lanchi rí cácuu ró, nájñūhun je ni cahān rí jíin ró.

²⁷ Ñayuu cácuu lanchi rí, chí nácumi i jeē máá rí cúu jeē cahān jíin i. Te jíin rí i, te cándiquñ i ruhū.

²⁸ Te cotecu i ní cáni sáha rí, te ma jnahnú ndetū cuítí i. Te ni ñin ma cúu quende i ndaha rí.

²⁹ Máá Tátá rí ni squiví ya i ndaha rí. Te cújéhnu ga máá yá vésú táca gá. Te ni ñin ma cúu quende i ndaha yá.

³⁰ Máá rí jíin Tátá rí, chí ñin-ni cúu rí, achí yá.

³¹ Yūcuán na te jnánhan ñuu yā hebreo ni caquihin tucu de yuū jeē cuáha de xiní yá.

³² Te ni cahān yá jíin de:

Ni stéén rí cuehē jniñu váha nuū rō jeē ni sáha rí jíin poder Tátá rí. ¿Te á síquī jeē ni sáha rí jniñu váha cúu jeē cuáha ró yúu xiní rí nuū súcuan? Achí yá.

³³ Te ni cacahān de jíin yá:

Nastu síquī jeē ni sáha ró jniñu váha cúu jeē cuáha rí yuū xiní rō, chí síquī jeē cahān ndeváha ró jeē achí ró jeē inuu cúu ró jíin Yāa Dios. Chí tēe-ni cúu ró, te sáha ró jeē inuu cúu ró jíin Yāa Dios. Achí de jíin yá.

³⁴ Te ni cahān Jesús:

Yósó nuū tútu ley cáneváha ró jeē ní cahān Yāa Dios: Nájñūhun yāa cácuu ró, achí Yāa Dios, achí tútu.

³⁵ Chí ñayuu jeē ní cajetáhú jñūhun ya, ni cahān yá jeē cácuu i nájñūhun yāa. Te cájini yō jeē ma cúu cahān yō jeē tú ndaa jñūhun cáhán tútu íi.

³⁶ Núu súcuan ¿te naun cacahān rō jeē jñūhun ndeváha cúu jeē ní cahān rí jeē Séhe

Yāa Dios cúu rí? Chí máá Yāa Dios ni jeni ya ruhū síquī jniñu íi, te ni tají yá ruhū vēji rí ini ñayiví.

³⁷ Núu tu sáha rí jniñu sáha Tátá rí, nuū súcuan te ma candíje ró ruhū.

³⁸ Te núu sáha rí, te vésú tu cá candíje ró ruhū, te na cándíje ró síquī jniñu sáha rí ún. Te súcuan te cucáhnu ni rō jeē ñin-ni cúu Tátá rí jíin rí, te ñin-ni cúu rí jíin Tátá rí. Achí yá.

³⁹ Yūcuán na te cánducú tucu de jniñ de ya. Te ni ndoñúhún-ni ya cuahān yā.

⁴⁰ Te cuanuhun yá yūte Jordán ichi nuū cáne niāndii, nuū ní ñne Juan ni scuándute de. Te ni condee yá yūcuán.

⁴¹ Te ni quijicoo cuehē ñayuu nuū yā, te ni cacahān i jíin táca jnánhan i:

Ndaa chí vésú tu ní sáha Juan ni ñin jniñu jéhnu, te ni cundaā ndihi jñūhun ni cahān de síquī ndese sáha tēe yáha. Achí i.

⁴² Te cuehē ñayuu jeē ní jéngoo nuū yá yūcuán, ni cacandíje i ya.

Jeē ní jhí Lázaro

11

¹ Te ni ñyo ñin tēe cúhú, nání de Lázaro. Te máá de jíin cuáha de María jíin Marta, cácuu de ñayuu ñuu Betania.

² Te María un jéē cúu cuáha Lázaro, suu ña cúu jeē ní chihí aceite perfume jehē Jitoho yō, te ni nasíchí ña jíin íxi xíní ña.

³ Te ndindúú cuáha de un ní catajé ña jñūhun cuahān nuū Jesús:

Tēe jeē maní ni jíin, cúhú de, achí ña, achí mozo.

⁴ Te ná ni jini Jesús jñūhun, te ni cahān yā: Cuehyí yáha chí nasúu cuéhyí jeē ví cuu de cúu. Chí sa suhva sáha Yāa Dios jeē cuni ñayuu ndese cújéhnu ya. Chí ruhū, Sēhe Yāa Dios, jíin cuéhyí yáha te stéén rí jeē suni cújéhnu máá rí. Achí yá.

⁵ Te maní Jesús jíin Marta jíin cúhú ña jíin Lázaro.

⁶ Te vésú súcuan te nuū ni níhín yá jñūhun jeē cúhú de, te ni quendōo ya uū gá quiví nuū ndeé yá un.

⁷ Yūcuán na te ni cahān yá jíin tēe cáscuáha jíin yá:

Na quihín tucu yó región Judea.

⁸ Te tēe cáscuáha un ní cacahān de jíin yá:

Maestro, ná tu cuu quiví jeē ní canducú jnánhan yó hebreo cuáha de yuū xiní ní. ¿Te cúní ni quihín tucu ní yúcuane naún? Achí de.

⁹ Te ni cahān Jesús:

Ma cúu cahni ñayuu ruhū núu ná tu quee máá quiví cuu rí. Chí jeē iyó rí ñayiví yáha cúu nájñūhun jeē iyó úxi uū hora ñin nduú. Te jeē sáha rí jeē cuni Yāa Dios, cúu rí nájñūhun tēe jeē jíca nduú, te tu cáchihí de jehē de, chí cúndijin nuū de ñayiví yáha.

¹⁰ Te tēe jeē tu sáha jeē cuni Yāa Dios, chí nájñūhun jíca de jecuáa, te nájñūhun cáchihí

de jehē de, chi tu cúndijin ini anuá de. Achí yá.

¹¹ Yūcuán na te ni cahān tucu ya:

Amigo yō Lázaro quixí de, te quihñ rī sáha ri jeē nátaḥū ni de. Achí yá.

¹² Yūcuán na te tēe cáscuáha un ní cacahān de:

Núu quixí de te jíní yō jeē nduvāha de.

¹³ Te Jesús chi súcuán ni cahān yā jeē jé ni jihī de. Te cájeni ni tēe cáscuáha jeē quixí ndije de.

¹⁴ Yūcuán na te ni cahān cají yá:

Je ni jihī Lázaro.

¹⁵ Te cúsi ni rī jeē tu ní cóyūcu yó yūcuán, návāha vāha ga candíje ró jéē coto ró jniñu jéḥnu sáha ri. Núu súcuán te na quíngoo yó núu ndíyí ún. Achí yá.

¹⁶ Yūcuán na te Tomás, tēe cúu cuatí, ni cahān de jíin jnāhan de jeē cascuáha jíin yá:

Suni na quíngoo yó návāha cuu yō jíin yá, achí de.

Jesús cúu jeē sáha jeē nátecu te cotecu ní cáni

¹⁷ Te nuū ní quee Jesús, te jíní yā jeē ní cuu cuñ quiví yíndūji Lázaro.

¹⁸ Te yajni-ni íne ñuu Betania jíin ñuu Jerusalén, nájñūhun uū kilómetro yosáva.

¹⁹ Te Marta jíin María, ni quecoo cuehē jnāhan ña hebreo jeē cahán i jñūhun ndeyí ni jíin ña jeē siquí jeē ni jihī cuāha ña.

²⁰ Te nuū ní jini Marta jeē véji Jesús, te ni quenda ña cuajnahān ña ya. Te María chi ni ndōo ña vehe.

²¹ Te ni cahān Marta jíin Jesús:

Núu ní íyo ní yáha, te ma cúu cuāha ná núu.

²² Te vésú súcuán te jíní na jéē tāca jéē cacán ni núu Yaā Dios, te sáha ya, achí ña.

²³ Te ni cahān Jesús jíin ña:

Natecu cuāha ró.

²⁴ Te ni cahān Marta:

Jíní na jéē nátecu de quiví nátecu tāca ndíyí nde quiví jínu ñayiví.

²⁵ Te ni cahān Jesús:

Máá rí cúu Yaā sáha jeē nátecu jíin jéē cótecu ní cáni. Ñayuu candíje jeē jnáma ri i, vésú na cúu i, te natecu i.

²⁶ Te ñayuu cátecu te cándíje i ruhū, cotecu i ní cáni andiví. ¿A cándíje ró jñūhun yáha? Achí yá.

²⁷ Te ni cahān ña:

Cándíje ná jéē maá ní cúu Cristo, Sēhe Yaā Dios, jeē achí tutu jeē quiji ini ñayiví, achí ña.

Jeē ní ndáhyū Jesús nuū yíndūji Lázaro

²⁸ Te ná ni cahān ña súcuán, te cuahān-ni ña, cuacana yuhu ña cuhū ña María:

Máá Maestro ni quee yā, te cána ya rohó, achí ña.

²⁹ Te jeē ní jini María jñūhun yáha, te yachí ni ndocuñi ña, cuahān ña nuū yá.

³⁰ Te ná tu quiví Jesús ñuu, chi ni ndōo-ni ya nuū ní jéjnahan Marta yá.

³¹ Te ñayuu hebreo un jéē cáyūcú ini vehe jíin María, jeē cácahān i jñūhun ndeyí ni jíin ña, ni cajito i jeē yachí ni ndocuñi ña cuahān ña. Te ni candiquin i ña cuango i, chí cájeni ni i jeē cuándahyū ña nde nuū yíndūji ndíyí.

³² Yūcuán na te ni jíin María nuū íne Jesús, te ni jecuiñi yití ña nuū jehé yá, te ni cahān ña:

Núu ní íyo ní yáha, te ma cúu cuāha ná núu, achí ña.

³³ Te ni jito Jesús jeē ndahyū ña jíin jéē cándahyū ñayuu vējicoo jíin ña. Te yōhyo ni nducuihyá ni yá, te ni jnahuhū ni yá jeē cundáhū ni yá i.

³⁴ Te ni cajñūhun yá ña:

¿Nde mí ní cachindūji ró de?

Te ni cacahān ña jíin yá:

Quihñ yō te cuni ní, achí ña.

³⁵ Te ni ndahyū Jesús.

³⁶ Yūcuán na te ni cacahān ñayuu hebreo un:

Condēhe náa yōhyo manī de jíin ndíyí ún.

³⁷ Te sava i chí ni cacahān i:

Tēe yáha jéē ní nanune de tinūu tēe cuáá, ¿á tu ní cúu sáha de jeē ma cúu Lázaro nuū? achí i.

Jeē ní natecu Lázaro

³⁸ Te yōhyo ni jnahuhū ni tucu Jesús, te ni quee yā nde nuū yíndūji ndíyí. Te ñin yaū cava cúu, te yuyáú un ndíhyú ñin yaū.

³⁹ Te ni cahān yá:

Tejiyo yaū un jíjnāhan ró, achí yá.

Te Marta, cuāha ndíyí un, ní cahān ña:

Je jéén xicó de, chí je ni cuu cuñ quiví yíndūji de.

⁴⁰ Te ni cahān Jesús jíin ña:

¿A násūū je ni cahān rī jíin ró jeē núu candíje ró te coto ró jéē yōhyo cújéḥnu Yaā Dios jíin poder yā? achí yá.

⁴¹ Yūcuán na te ni catejiyo i yaū jeē ndési yuyáú ndíyí ún. Te ni ndacoto-ni Jesús ichi ándiví, te ni cahān yá:

Tátā, na cútahū na núu ni jéē sáha ní jéē jicán na.

⁴² Te jíní na jéē niní sáha ní jéē jicán na. Te jeē vāha ñayuu cáñin yáha cúu jeē súcuán cáhān na, návāha na cándíje i jeē maá ní ni taji sáña.

⁴³ Te ná ni cahān yá súcuán, te ni cahān jee ya:

Lázaro, quenda quiji ró, achí yá.

⁴⁴ Te ni quenda-ni tēe ni jihī ún, te ñúsúcún ndaha de sñin de jíin tira sahma. Te nuū de ñúsúcún ñin sahma. Te ni cahān Jesús jíin i:

Nandaji ró sahma ñúsúcún de, návāha cuu caca de, achí yá. Te ni canandaji i.

Jeē ní casqujñāhan de jñūhun jeē cáni de Jesús

(Mt. 26.1-5; Mr. 14.1-2; Lc. 22.1-2)

⁴⁵ Yūcuán na te cuehē ñayuu hebreo jeē ní quijicoo nuū María, ni cacandíje i Jesús, chí ni cajito i jniñu ni sáha ya.

⁴⁶ Te sava i chí cuangoo i nuū tée grupo fariseo, te ni cacastühún i ndese ni sáha Jesús.

⁴⁷ Yūcuán na te tēe fariseo un jíin sūtū cácujeñhu ni candutútú de junta jíin táca gá tēe cácujeñhu. Te ni cacahān de:

¿Ndese sáha yó? Chí tēe ún yōhoyo cuehē jniñu jeñhu sáha de.

⁴⁸ Te núu condēhé-ni yó, te ndivii ñayuu candíje i de. Te quijicoo táca tēe nación Roma jeē cácujeñhu, te canu de templo cáhnu yó, te scuíté núu de ñayuu nación yō, achí de jíjnāhan de.

⁴⁹ Te iin jnāhan de jeē naní Caifás, jeē cúu máa sūtū cujeñhu ga cuiyā ún, ni cahān de:

Róhó chí tu cájini cuiñi rō,

⁵⁰ ni tu cájecūhun ni rō jeē váha ga jeē cúu iin tēe jehē ñayuu nación yō vésú jeē náa ndivii i, achí de.

⁵¹ Te tu ní cáhān de jñuhun yáha jēe jéni ni maá de. Chí siquī jeē cúu de sūtū cujeñhu ga cuiyā ún, te ni sáha Yaā Dios jíin de jeē ni nacani de jñuhun jeē cúu Jesús jehē ñayuu nación hebreo.

⁵² Te nasūu máa iin-ni jehē nación hebreo, chí suni jehē ndivii ñayuu cácuu sēhe Yaā Dios jeē ní cajitē núu táca nación, návāha iin na cuu i jíjnāhan i.

⁵³ Yūcuán na te nde quivī ún te táca tēe hebreo cácujeñhu un, ní casquijnāhan de jñuhun jeē cáhni de Jesús.

⁵⁴ Jeē yūcuán tuá ní jíca ndijin yā nuū jnāhan ñuu yā hebreo un, chí ni quenda ya región Judea, te cuahān yā iin ñuu naní Efraim, nuū iyó yajni ñuhun tēhé. Te ni condee yā yūcuán jíin tēe cáscuáha jíin yá.

⁵⁵ Te ni cuyajni vico pascua jeē cánasáha ñayuu hebreo. Te cuehē ñayuu táca ñuu yūcuán cuángoo i ñuu Jerusalén, návāha squícu i jeē cahān ley jeē cúchi i ndundoo i nuū Yaā Dios, te sáa te quejéé vico pascua.

⁵⁶ Te cánanducú i Jesús, te cácajnūhun jnāhan i ini templo:

¿Ndese cájeni ni rō? ¿A quiji de vico, chí tuú? Achí i.

⁵⁷ Te sūtū cácujeñhu jíin tēe fariseo ni candacu de jniñu jeē núu ndé iin ñayuu jiní ndé nuū íne ya, te na cástühún i, návāha jñi de ya.

*Jeē ní chuhun María perfume jehē Jesús
(Mt. 26.6-13; Mr. 14.3-9)*

12

¹ Te cúmani iñū gá quivī te coo vico pascua. Te ni jehēn tucu Jesús ñuu Betania nuū ndeé Lázaro, tēe ni jíhi te ni nastécu yā de.

² Te ni casáha i iin vico xíni jeē yíñühún i jíin yá. Te Marta ni jeni ña cohō. Te Lázaro

yéji de staā jíin yá nuū mesa jíin táca gá ñayuu.

³ Yūcuán na te María ni quee ña jíin nájñuhun sava litro aceite perfume jeē máni ita nardo cúu, te yōhoyo yahu ndeé. Te ni chuhun ña jehē Jesús, te ni nasíhi ña jíin íxi ña. Te ní ini vehe un ní chitú xícō perfume un.

⁴ Yūcuán na te ni cahān Judas Iscariote sēhe Simón, iin tēe scuáha jíin yá un, te suu de cúu jeē nastúu de ya:

⁵ ¿Najehē tu ní cúyāhu perfume yáha jēe uní ciento denario, te cuāha yó nuū ñayuu ndahú núu. Achí de.

⁶ Súcuán ni cahān de, nasūu jēe cundáhú ndíje ni de ñayuu ndahú, chí sa suhva jeē cúu de tēe cuiñá. Chí máa de ndíso yijni xūhún, te quíhin cuiñá de jeē cájequin táca tēe ún.

⁷ Yūcuán na te ni cahān Jesús:

Ma stāhān rō ña. Chí jeē ni sáha ña yāhá cúu jeē ni sátulva ña ruhū nde quivī jeē quíndūji ri.

⁸ Chí níni cáyūcu ñayuu ndahú jíin ró, te ruhū chí tuá condee rí jíin ró. Achí yá.

Jeē ní casquijnāhan de jñuhun jeē cáhni de Lázaro

⁹ Te cuehē ñayuu hebreo ni cajini jñuhun i jeē néne ya ñuu Betania. Te ni jinūcoo i, te nasūu máa iin jeē cuní i coto i nuū Jesús, chí suni jeē cuní i coto i nuū Lázaro, tēe jeē ní nastécu yā.

¹⁰ Yūcuán na te sūtū cácujeñhu ni casquijnāhan de jñuhun jeē suni cáhni de Lázaro.

¹¹ Chí jeē siquí Lázaro te ni cujiyo cuehē jnāhan ñuu de hebreo nuū de, te cácadíje i Jesús.

Jeē ní quivī Jesús Jerusalén

(Mt. 21.1-11; Mr. 11.1-11; Lc. 19.28-40)

¹² Te inga quivī ún, te ñayuu cuehē jeē ní quecoo vico pascua un, ni cajini jñuhun i jeē véji Jesús ñuu Jerusalén.

¹³ Te ni cajehnde i ndaha ñúu, te ni quendacoo i cuajñahan i ya. Te cácana jee i:

Yōhoyo cújéñhu Yaā Dios. Yōhoyo váha Yaā cúu Yaā jeē véji jíin jniñu máa Jítoho yō Yaā Dios. Yōhoyo váha Yaā cúu Rey nación yō Israel. Achí i.

¹⁴ Te ni nihñ Jesús iin burro, te ni jecosó yā tí, nájñuhun cáhān tutu íi:

¹⁵ Ñayuu ñuu Jerusalén jeē naní ñuu Sion, ma yūhu ró jíjnāhan rō.

Yáhá condēhe rō jeē véji Rey rō, te yósó yá iin burro.

Achí tutu.

¹⁶ Te quivī ún te tēe cáscuáha jíin yá, tu ní cájecūhun ni de jeē súcuán squícu táca jēe yosó núu tútu íi. Te nde ná ni ndujéñhu Jesús jeē cuánuhun yā andiví, te sáa te ni canucūhun ni de táca jñuhun yósó siquí yá, jíin jēe ní casáha de súcuán jíin yá.

17 Te ñayuu ní cahĩn jĩn yá ná ni cana ya xinĩ Lázaro nuũ ní yindũji de, te ni nastecu yá de, ni canacani i jnũhun ndese ni sáha ya.

18 Jeẽ yũcuan ní quendacoo ñayuu cuehẽ un, ní jejnahan i ya, chi ni cajini jnũhun i jeẽ ni sáha ya jniũu jéhnũ un jeẽ ni steén yá poder yá.

19 Yũcuán na te ni cacahãn maá téẽ fariseo:

Vijna te je ni cajito yó jeẽ ma cúa cuiti ga casi yó. Chi jito yó jeẽ ndivĩ cuiti ñayuu cuangoo i jĩn de. Achí de jijnãhan de.

Ñayuu nación Grecia nãnducú i Jesús

20 Te sava ñayuu nación Grecia, suni ni quijicoo i ñuu Jerusalén vico pascua un jeẽ chĩñũhũn i Yaã Dios.

21 Te ni quecoo i nuũ Felipe, téẽ ñuu Bet-saida ndañũũ Galilea. Te ni cacahãn i jĩn de: Tátã, cáculni ná cahãn na jĩn Jesús, achí i.

22 Te ni jehẽn Felipe, ni castũhũn de nuũ Andrés. Te ndindũú de cuacastũhũn de nuũ Jesús.

23 Te ni cahãn Jesús jĩn de:

Je ni quee quivĩ jeẽ ndujéhnũ Yaã ní nduu téẽ.

24 Te jendaá cahãn rĩ jĩn ró, ñn nuni trigo nuũ tú ñingava nuũ ñũhun te quindũji, núu súcuan te quendõo maá ñn-ni. Te núu quindũji, te nacayã cuehẽ ndasí. Te suni súcuan cánuú cuu rĩ quindũji rĩ, návãha coo cuehẽ ñayuu jeẽ ndúu i sehe Yaã Dios.

25 Te na-ni ñayuu núu tu jéhe i jnũhun ndoho i jeẽ siquĩ ruhũ, te jnahnũ ndetũ i. Te ñayuu jeẽ jéhe i jnũhun ndoho i jeẽ siquĩ ruhũ ini ñayivĩ yáha, cotecu i ní cáni andivĩ.

26 Núu ndé ñayuu cunĩ i cuajniũu i nuũ rĩ, na cóndiquĩn i ruhũ. Te nuũ cóndee rĩ, suni yũcuán condee ñayuu jejnĩũu nuũ rĩ. Te ñayuu jejnĩũu nuũ rĩ, chí sáha Tátã rĩ jeẽ cujéhnũ i.

Jeẽ ni cahãn Jesús jeẽ cuu yá

27 Te vijna te cúculhyá ndasí ni rĩ sáha jnũndóho quiji siquĩ rĩ. ¿Te ndese cahãn rĩ? ¿A cahãn rĩ jĩn Tátã rĩ: Jnama ní sãña núu jnũndóho jeẽ quĩji siquĩ ná, achí rĩ? Ma cúa, chí jeẽ siquĩ yũcuan cúa jeẽ vjji rĩ.

28 Tátã, stéén ni jeẽ cujéhnũ ndasí ní jĩn poder ni, achí yá.

Yũcuán na te ichi ándivĩ ní cahãn ñn jnũhun:

Je ni steén rĩ jeẽ cujéhnũ rĩ, te sáha tucu rĩ inga jĩnu, achí yá.

29 Te ni cajini ñayuu cáhĩn yũcuán, te ni cacahãn i jeẽ taja cáhãn. Te sava ga i ni cacahãn:

Ñn ndajéhe Yaã Dios ni cahãn jĩn yá.

30 Te ni cahãn Jesús jĩn i:

Tu ní cahãn jnũhun yáha jeẽ siquĩ ruhũ, chí sa suhva návãha cunĩ ró siquĩ jnũhun jeẽ ni cahãn yá jĩn rĩ.

31 Vijna cúa jeẽ sãndaã Yaã Dios siquĩ cuéchi ñayuu ñayivĩ yáha. Vijna cúa jeẽ scũnu ya jexeén jeẽ ndácu jniũu ini ñayivĩ yáha.

32 Te ruhũ, núu na jĩnu condita caa rĩ cuu rĩ ini ñayivĩ, te sáha rĩ jeẽ jnãã táca ñayuu quivicoo i ndaha rĩ, achí yá.

33 Súcuan ni cahãn yá jeẽ steén yá ndese modo cuu yá.

34 Te ni cacahãn ñayuu jĩn yá:

Ni cajini sõho ná jeẽ cahãn tutu ley Yaã Dios cánevãha yó, jeẽ Cristo cotecu yá ní cáni. ¿Te naun cahãn ni jeẽ Yaã ní nduu téẽ, cánuú condita caa ya cuu yá? ¿Ndé ñn cúa maá Yaã ní nduu téẽ núu súcuan? Achí i.

35 Yũcuán na te ni cahãn Jesús:

Maá jecu na quivĩ condee rĩ jĩn ró jeẽ cúa rĩ luz cundijĩn ini anuá ró. Núu súcuan te vijna jeẽ iyó gá luz rĩ jĩn ró, te caca ró jĩn, chí sanaa ni ró te cuahãn rĩ, te nãjnũhun quendõo ró núu néẽ. Chi ñayuu cájica nãjnũhun nuũ néẽ, tu cájini i ndé nuũ cuãngoo i.

36 Núu súcuan te níni ndéẽ gá rĩ jĩn ró, te candije ró ruhũ jeẽ cúa rĩ luz, návãha nduu ró ñayuu cájica jĩn luz, achí yá.

Súcuan ni cahãn Jesús táca jnũhun yáha, te cuahãn-ni ya, te tuá ni steén yá maá yá nuũ i.

Jeẽ tu ní cáculhyá ñayuu hebreo jeẽ cúa ya Cristo

37 Te vjũu cuehẽ jniũu jéhnũ ni sáha Jesús jeẽ steén yá poder yá nuũ i, te tu ní cáculhyá i ya.

38 Chi siquĩ nahĩn jnũhun ni cahãn Isaías, téẽ ni nacani jnũhun Yaã Dios nde jenahãn: Tátã Yaã Dios, tu ní cáculhyá ñayuu jnũhun ni canacani ná,

te tu ní cáculhyá i jniũu jéhnũ jeẽ ni steén ni poder ni núu i.

Achí Isaías.

39 Jeẽ yũcuan tu ní cúa candije i, chí ni cahãn tucu Isaías:

40 Ni sáha ya jeẽ nãjnũhun cáhĩyo cuáá ánuá i, jĩn jeẽ cáculhni ni i,

návãha coo nãjnũhun jeẽ tu cájito i,

te ni ma jécũhun ni i,

ni ma násãma ini i quivicoo i nuũ rĩ,

jeẽ nasávãha rĩ anuá i nuũ cuéchi i.

Achí Cristo, achí tutu.

41 Jnũhun yáha ní cahãn Isaías, chí je ni jito de ndese yóhoyo cújéhnũ Jesús, te ni cahãn de ndese coo quivĩ jeẽ quiji ya.

42 Te vjũu súcuan te cuehẽ ñayuu hebreo chí ni cacandije i ya, te suni nde jĩn sava téẽ cándacu jniũu. Te tu ní cáculhyá de jeẽ cáculhyá de ya, chí siquĩ jeẽ cáculhyá de táca téẽ fariseo. Chí núu súcuan te quenehen ún de ini vehe iĩ sinagoga jeẽ ma cuáha ga jnũhun quivicoo de.

43 Chí cáculhyá gã ni de jeẽ cujéhnũ de sáha ñayuu, vjũu jeẽ cujéhnũ de sáha Yaã Dios.

*Jnūhun cāhān Jesús cūu jeē sāndaā siquī
ñāyuu*

⁴⁴ Te ni cahān jee Jesús:

Ñayuu cācandije ruhū, nasūu māñūhūn-ni ruhū cācandije i, chi suni cācandije i nde maá Tátá rī, Yaā ní tají ruhū.

⁴⁵ Te ñayuu cājito nuū rī, suni cājito i nuū Yaā ní tají ruhū.

⁴⁶ Máá rī jeē cūu rī luz cūndijin ini anuá ñayuu, ni quiji rī ini ñayivī nāvāha tāca ñayuu cācandije ruhū, ma cáca i nájñūhun nuū néé.

⁴⁷ Te núu ñin ñayuu jini sōho i jñūhun cāhān rī, te núu tu jétáhú i, te nasūu ruhū sāndaā siquī i. Chi tú vēji rī jeē ndénehen rī cuēchi siquī ñayuu ñayivī, chi sa suhva jeē jnāma rī i.

⁴⁸ Te ñayuu jeē casquéhichī i ruhū te tu cājetáhú i jñūhun cāhān rī, iyó ñin jeē sāndaā siquī i. Suu tāca jñūhun jeē ni cāhān rī, jñūhun un cūu jeē ndenehen cuēchi siquī i quivī jñū ñayivī.

⁴⁹ Chi tu cāhān rī jeē cūu ni maá rī, chi Tátá rī, Yaā ní tají ruhū, máá yā ni ndacu jniñu nuū rī ndese cahān rī jñin ndese steén rī.

⁵⁰ Te jini rī jeē jniñu ndacu Tátá rī sáha jeē cótecu ñayuu ní cáni. Núu sūcuan te jñūhun cāhān rī, chi máni jñūhun jeē ní cachi Tátá rī cūu, áchí yā.

Jeē ní nacate ya jehē tēe cáscuáha

13

¹ Te jehini inga quivī te quejéé vico pascua. Te je jini Jesús jeē ní quee quivī jeē quénda ya ñayivī yáha quínuhun yā nuū Tátá yā. Te níni cūndáhú ní yā ñayuu maá yā jeē cáyūcú ini ñayivī. Te vijna jeē jñū jeē ine ya ñayivī, te sáha ya ñin jniñu jeē steén cají yā jeē cūndáhú ní yā i.

² Te jexeén je ni squivī ini anuá Judas Iscariote sēhe Simón, jeē vijna nastúu de ya.

³ Te jini Jesús jeē vēji ya nuū Yaā Dios, te nuhūn yā nuū Yaā Dios, jñin jéé ni sáha Tátá yā jeē cujéhu ya siquī ndihi-ni.

⁴ Te cúxini ya jñin tēe cáscuáha jñin yā, te ni ndocuiñi yā. Te ni stáa ya sahma ndii ya, te ni jihni yā ñin toalla chíji ya.

⁵ Te ni chuhun ya ndute ini ñin tijehēn. Te ni quejéé yā nacate ya jehē tēe cáscuáha. Te násichí yā jñin toalla jeē nuhní chíji ya.

⁶ Te ni jinū yā nuū Simón Pedro. Te ni cahān Pedro jñin yā:

¿Sa máá ní nacate jehē ná naún?

⁷ Te ni cahān Jesús:

Tu jécūhun ní rō jeē sáha rī vijna, te cúcuéé gā te jécūhun ní rō.

⁸ Te ni cahān Pedro jñin yā:

Ma nácate cuiti ní jehē ná.

Te ni cahān Jesús:

Núu tú nacate rī jehē rō, te ma cūu cundúu rō jñin rī.

⁹ Te ni cahān Simón Pedro:

Núu sūcuan cūu te nasūu máá jehē-ni ná, chí suni nacate ní ndaha ná jñin xini ná, áchí de.

¹⁰ Te ni cahān Jesús jñin de:

Tēe jeē sa ní jichi, tu jini ñūhūn ndundoo ní cáhnu de, chí máá jehē-ni de, chí je iyó ndoo ní cáhnu de. Te máá ró chí je ni candundoo ró. Te tú ndihi ró cáhiyo ndoo.

¹¹ Chi je jini yā ndé ñin de cūu jeē nastúu de ya, te jeé yūcuan ní cahān yā: Tú ndihi ró cáhiyo ndoo.

¹² Te nuū ni jñū ni nacate ya jehē de jñināhan de, te ni naquihin ya sahma ndii ya, te ni nucōo tucu ya nuū mesa. Te ni cahān yā:

¿A cājecūhun ní rō na vé cuní cahān jeē ní sáha rī jñin rō?

¹³ Cácahān rō jeē Maestro jñin Jítoho rō cūu rī, te ndaa cácahān rō, chí suu ndije cūu rī.

¹⁴ Núu sūcuan te vēsú Maestro rō jñin Jítoho rō cūu rī, te ni nacate rī jehē rō jñināhan rō, te suni sūcuan cánuú jéé nacate máá ró jehē jñināhan rō.

¹⁵ Chi jniñu yáha ni sáha rī jeē steén rī nuū rō jeē suni sūcuan sa cuajniñu ró núu jñināhan ró, nájñūhun sa máá rī ní jejniñu rī nuū rō.

¹⁶ Jendaá cahān rī jñin ró jeē ñin mozo tu cújéhu de nuū patrón de, te tēe jica jniñu táhú nuū de, te cújéhu de nuū tēe ní tají de. Te máá ró cácuu mozo rī, te na cuajniñu ró núu jñināhan ró nájñūhun ní steén rī nuū rō.

¹⁷ Te núu ni cajecūhun ní rō jñūhun yáha, te yóhoyó ndetú rō te núu squicu ró.

¹⁸ Te nasūu jéé cahān rī jeē ndihi ró ndetú, chí je jini rī táca róhó jéé ní nacají rī. Te cánuu squicu jñūhun yáha jeē cāhān tutu ñin: Tēe yéji staa jñin rī, ní ndió cuñí de siquī rī, áchí tutu.

¹⁹ Te vijna te je cástūhun rī táca jéé yáha núu rō nde ná tu coo, nāvāha núu na cóo, te candije ró jéé máá rī cūu Yaā ní tají Yaā Dios.

²⁰ Jendaá cahān rī jñin ró jeē na-ni ñayuu jeē cuatáhú i táca jéé tají rī, te ruhū jétáhú i. Te ñayuu jétáhú ruhū, suni jétáhú i Yaā ní tají ruhū vēji rī, áchí yā.

Jeē ní cachi yā jeē nastúu Judas yā

(Mt. 26.20-25; Mr. 14.17-21; Lc. 22.21-23)

²¹ Te ná ni cahān Jesús táca jñūhun yáha, te ni cucuihyá ndasí ní yā. Te ni cahān cají yā:

Jendaá cahān rī jñin ró jñināhan ró jéé ñin máá ró nastúu ruhū, áchí yā.

²² Yūcuán na te tēe cáscuáha jñin yā, ní candacoto de nuū jñināhan de, cájeni ní de ndé ñin de cūu jeē ní cahān yā.

²³ Te ñin máá tēe scuáha jeē maní gā yā jñin, néne de xini ya mesa jeē cácuixini de jñin yā.

²⁴ Te ni sáha Simón Pedro seña nuū de jeē na cājñūhūn de ya ndé ñin de cūu jeē ní cahān yā.

²⁵ Yūcuán na te tēe un ní scáyi de máá de nuū Jesús, te ni cajnūhūn de ya:

¿Ndé ñin de cūu? áchí de jñin yā.

²⁶ Te ni cahān Jesús:

Na chūdajī rī staā te cuāha rī nuū ñin de, te suu tēe un cúu, áchí yá.

Te ni chundajī ya staā, te ni jēhe ya nuū Judas Iscariote sēhe Simón.

²⁷ Te jeē ní quihín de staā ún, te ni quívi-ni Satanás ini anuá de. Yūcuán na te ni cahān Jesús jíin de:

Jniñu jeē sāha ró, na sāha yachī ró.

²⁸ Te ni ñin tēe cáyeji staā jíin yá, tu ní cájecūhun ní de naun ni cahān yá súcuān jíin de.

²⁹ Chi sava de cájeni ni de jeē ní cahān Jesús jíin Judas jeē cuāan de jeē jíni ñúhún yá vico ún, chí jeē cuāha de jecu xūhun núu ñayuu ndahú. Chí máá de ndíso yijni xūhún.

³⁰ Te jeē ní yeji de staā ún, te ni quenda-ni de cuahān de. Te je ni cuaa.

Jeē ní ndacu ya jniñu jeé

³¹ Yūcuán na te jeē cuahān Judas te ni cahān Jesús:

Vijna te ruhū, Yaā ní nduu tēe, stéén rī ndese cújéhnū rī, te suni jíin ruhū te cuni ñayuu ndese cújéhnū Yaā Dios.

³² Te núu jíin ruhū cuni ñayuu ndese cújéhnū Yaā Dios, núu súcuān te suni stéén Yaā Dios ndese cújéhnū ruhū jeē cúu rī Sēhe ya. Te yachī-ni stéén yá.

³³ Séhē, tuá nahán condee rī jíin ró jijnáhan ró. Te nanducú ró ruhū, te nájñūhun ní cahān rī jíin táca jnáhan yó hebreo, suni súcuān cáhán rī jíin ró vijna, jeē ma cúu jinūcoo ró núu quihín rī.

³⁴ Te vijna te ndácu rī ñin jniñu jeé núu ró, jeē na cundáhú ní ró jnáhan ró. Nájñūhun cundáhú ní rī rohó, suni súcuān na cundáhú ní ró jnáhan ró.

³⁵ Te núu cundáhú ní ró jnáhan ró, súcuān te cuni táca ñayuu jeē cácuu ró tēe cáscuáha jíin rí, achí yá.

Jeē ní cachi yá jeē yūhu Pedro cahān de jeé jini de ya

(Mt. 26.31-35; Mr. 14.27-31; Lc. 22.31-34)

³⁶ Te ni cahān Simón Pedro jíin yá:

¿Nde núu quihín ní núu súcuān?

Te ni cahān Jesús:

Nuū quihín rī chí ma cúu condiquín ró ruhū vijna, te cúcuéé gá te jinū ró.

³⁷ Te ni cahān Pedro:

¿Najehē ma cúu condiquín na níhín vijna? Tu yúhú ná cuu na jéé siquí ní.

³⁸ Te ni cahān Jesús:

¿A jéni ní ró jeē tu yúhú ró cuu ró jeē siquí rí? Jendaá cahān rī jíin ró jeē nde ná tu cana líhli, te uní jinu yūhu ró te cahān ró jeē tu jíni ró ruhū. Achí yá.

Jesús cúu ichi jeé jinú yó nuū Tatá yá

14

¹ Te ni cahān gá yá:

Ma cucuíhyá ní ró siquí táca jnúndóho. Na cándije ró jeē sāha Yaā Dios jehé ró, te suni na cándije ró jeē sāha rī jehé ró.

² Chi núu ndeé Tatá rī, íyó cuéhē vehe condee ró jijnáhan ró. Te núu jeē tu súcuān íyó, te je ní castūhun rī nuū ró nuū. Núu súcuān te quihín rī quisátūhva rī nuū cóyūcu ró.

³ Te jeē quihín rī sátūhva rī nuū cóyūcu ró, te ndiji rī quinaquihín rī rohó quihín yó, návāha suni cóyūcu ró nuū cóndee máá rí.

⁴ Te je cájini ró ndé nuū quihín rī, te cájini ró ndese jinū ró yūcuán. Achí yá.

⁵ Te ni cahān Tomás jíin yá:

Tu cájini na ndé nuū quihín ní, ¿te ndese cuni ná ichi jínú yūcuān núu súcuān?

⁶ Te ni cahān Jesús jíin de:

Máá rí cúu ichi jinū ró andívi, te máá rí cúu jñūhun ndaa jíin jñūhun cotecu ró ní cáni. Te ni ñin ma jinú nuū Tatá rī te núu tú ruhū.

⁷ Te núu je ní cajini ró ruhū, te suni je ní cajini ró Tatá rī núu súcuān. Te ndé vijna je cájini ró yá, chí je ní cajito ró núu rí, achí yá.

⁸ Te ni cahān Felipe jíin yá:

Stéén ní Tatá ní núu ná, te na cúvāha ní na jijnáhan ná, achí de.

⁹ Te ni cahān Jesús:

Felipe, je ní cuu cuehē quívi jíca rī jíin ró jijnáhan ró, ¿te á ná tu cuni ró ndé ñin cúu rī naún? Tēe jeé jíto ruhū, suu Tatá rī jíto de. Núu súcuān ¿te najehē cahān ró jeé stéén rī Tatá rī nuū ró?

¹⁰ ¿A tu cándije ró jeé ñin-ni cúu rī jíin Tatá rī, te Tatá rī ñin-ni cúu ya jíin rí? Táca jñūhun cáhán rī jíin ró, nastú jñūhun máá rí cúu. Chí Tatá rī jeé ñin-ni cúu ya jíin rí, máá yá sāha táca jniñu jeé sāha rí.

¹¹ Candíje ró jijnáhan ró jeé ñin-ni cúu rī jíin máá Tatá rī, te Tatá rī ñin-ni cúu ya jíin rí. Te núu tu cájecūhun ní ró, te cándije ró ruhū siquí táca jniñu sāha rí.

¹² Jendaá cahān rī jíin ró, núu ndé ñayuu cándije ruhū, jniñu jéhnū jeé sāha rī yáhá, suni sāha í. Te jéhnū ga jniñu sāha í vésú yáhá, chí quínūhun rī nuū ndeé Tatá rí.

¹³ Te táca na-ni vé cacán ró nuū Tatá rí siquí jeé cándije ró jeé cúu rī Sēhe ya, te sāha rī jeé cacán ró, te súcuān stéén rī jeé yóhoyó cújéhnū Tatá rí.

¹⁴ Chí táca na-ni vé cacán ró siquí jeé cándije ró ruhū, te sāha nahín rí.

Jeē ní jéñūhun ya jeé tají yá Espíritu Santo

¹⁵ Te núu maní ró jíin rí jijnáhan ró, te na squícu ró jniñu ndácu rī nuū ró.

¹⁶ Te cacán tahú rī nuū Tatá rí, te tají yá inga Yaā chindéé ñahán rohó, te sāha ya jeé cóo sñ ní ró jijnáhan ró. Te Yaā un cúu máá Espíritu jeé stéén jñūhun ndaa, te condee yá jíin ró ní cáni.

¹⁷ Te ñayuu ñayívi má cúu cuatáhú í ya, chí tu cúu coto í nuū yá, ní tu cúu cuni í ndese

Yaā cúu ya. Te máá ró chi je cájini rō ndese Yaā cúu ya, chí ndéé yá jíin ró, te cōdee yá ini anuá rō ní cáni.

¹⁸ Ma stóo uun ri rohó, chí ndiji ri nuū rō.

¹⁹ Jecu na quiví te ma cóto ga ñayuu ñayiví nuū rī. Te máá ró jíjnáhan ró chí cóto ró nuū rī, chí cotecu rī ní cáni, te jeē yúcuun suni cotecu máá ró.

²⁰ Te quiví ún te cuni rō jeē ñn-ni cúu rī jíin Tátá rī, te máá ró ñn-ni cúu rō jíin rī jeē ndeé rī ini anuá rō jíjnáhan rō.

²¹ Te na-ni ñayuu núu ñúhun ni i jniñu ní ndacu rī, te squícu i, ñayuu un cúu jeé maní ndije jíin rī. Te ñayuu jeé maní jíin rī, suni coo maní Tátá rī jíin i. Te suni ruhú coo maní rī jíin i, te stéén rī nuū i jeé nduú rī jíin i. Achí yá.

²² Te ni cahān Judas jíin yá (te nasūu téé cúu Iscariote):

Najehē cúu jeé steén ni máá ní nuū ná, te nuū ñayuu ñayiví chí tuú?

²³ Te ni cahān Jesús:

Ñayuu jeé maní jíin rī, chí cásquícu i jeé cahān rī. Te coo maní Tátá rī jíin i. Te Tátá rī jíin máá rī quijicoo ri cundúu rī jíin i.

²⁴ Te ñayuu jeé tú maní jíin rī, tu cásquícu i jeé cahān rī. Te jnūhun cájini sōho ró cáhān rī, nasūu jnūhun máá rī cúu, chí jnūhun máá Tátá rī jeé ní tají ruhū cúu.

²⁵ Tāca jnūhun yáha cáhān rī jíin ró níni íne ga rī jíin ró.

²⁶ Te Tátá rī chí tají yá Espíritu Santo, quiji nucuiñi nuū rī. Te máá yá chindéé ñáhān yá rohó, te sáha ya jeé cóo sñ ni rō. Te stéén yá tāca jnūhun nuū rō, te nacachi tucu ya tāca jéé ni cahān rī jíin ró.

²⁷ Te jeé quihín rī, te sáha rī jeé cóo ndeyí coo sñ ni rō. Nájñūhun íyó ndeyí sñ ni máá rī, suni súcuan coo ndeyí sñ ni rō sáha rī. Te jeé sáha rī jeé cóo ndeyí sñ ni rō, tu quíjnáhan jíin jnūhun ndeyí cacāhān ñayuu ñayiví. Ma cucuíhyá ni rō siquí tāca jnūndóho, te ni ma yūhu rō.

²⁸ Je ni cajini sōho ró jéé ni cahān rī jeé quihín rī, te ndiji ri cundúu rī jíin ró. Te núu cáhīyo maní vāha ró jíin rī, te cusñ ni rō jeé ni cahān rī jeé nuhún rī nuū Tátá rī. Chí cújéhu ga Tátá rī vijna vésu ruhū.

²⁹ Je ni castūhun rī nuū rō tāca jnūhun yáha nde ná tu coo, návāha núu je ni cuu, te candíje ró ruhū jíjnáhan ró.

³⁰ Ma cahān rī cuehē gā jnūhun jíin ró, chí je vñi jexeén jeé ndacu jniñu ini ñayiví yáha. Te tú na vé cúu sáha siquí rī nuū.

³¹ Te na cóo nájñūhun ni ndacu Tátá rī jniñu nuū rī, návāha cuni ñayuu ñayiví jéé maní rī jíin Tátá rī, te sáha rī jniñu ní ndacu ya. Ndocuiñi jíjnáhan ró na quíngoo yó. Achí yá.

Jesús cúu nájñūhun yoyúcu uva

15

¹ 'Máá rī cúu nájñūhun yoyúcu uva váha ndaa, te Tátá rī cúu nájñūhun téé ndíto yoyúcu uva un.

² Te máá ró chí cácuu ró nájñūhun ndaha, te núu tu jéhe ró ndehē te quende yá rohó. Te núu cácuu ró nájñūhun ndaha jeé jéhe ndehē, te nasándoo ya nacahnde yá rohó nájñūhun jeé cúu ró ndaha ún, návāha cuāha ró cuehē gā ndehē.

³ Te máá ró chí je ni candundoo ánuá ró jíin jnūhun ni steén rī nuū rō, nájñūhun ndúndoo ndaha uva.

⁴ Na cundúu ró jíin rī, te suni máá rī cundúu rī jíin ró. ñn ndaha uva ma cúu cuāha ndehē jeé maá, te núu tu yjññ jicā yóho. Te suni súcuan máá ró, ma cúu sáha ró jniñu váha te núu tu cundúu ró jíin rī.

⁵ 'Máá rī cúu yoyúcu un, te máá ró cácuu ndaha ri. Ñayuu jeé nduú jíin rī, te ruhū ndúu rī jíin i, máá i cúu nájñūhun ndaha jeé jéhe cuehē ndehē. Chí núu tú cundúu ró jíin rī, te tú cuiti na jniñu váha cuu sáha rō.

⁶ Ñayuu jeé tu cundúu jíin rī, quende yá i nájñūhun ñn ndaha uva, te ichi. Te ndoho i nájñūhun ndaha uva un jéé ndutútu te cayū nuū ñuhún.

⁷ 'Núu ndúu ró jíin rī, te cáñuhun ni rō jnūhun cáhān rī, yúcuán na te cacān rō na-ni vé cácuni rō, te sáha rī jeé cacāhān rō.

⁸ Te núu cásáha ró cuehē jniñu váha, súcuan cástéén rō jeé cúu ndije ró ñayuu cascuāha jíin rī, te súcuan nácuni ñayuu jeé yóhyo cújéhu Tátá rī.

⁹ Nájñūhun maní Tátá rī jíin rī, suni súcuan maní rī jíin ró jíjnáhan ró. Núu súcuan te ma siaá ró jnūhun maní rī jíin ró.

¹⁰ Núu squícu ró jniñu ní ndacu rī nuū rō, te níni coo maní rī jíin ró, nájñūhun máá rī squícu rī jniñu ní ndacu Tátá rī nuū rī, te níni íyó máni yá jíin rī.

¹¹ 'Súcuan ni cahān rī jíin ró návāha coo sñ ni rō nájñūhun íyó sñ ni rī, chí nde cusñ teyí ni rō.

¹² Te yāha cúu jniñu ndácu rī nuū rō jíjnáhan ró: jeé na cundáhu ni rō jnáhan ró nájñūhun cundáhu ni rī rohó.

¹³ Núu ñn téé cuu de jehē amigo de, te tuá na vé cúmani gā sáha de jeé cundáhu ni de amigo de.

¹⁴ Te máá ró cácuu amigo rī núu squícu ró jniñu ndácu rī nuū rō.

¹⁵ Ma cahān gā rī mozo jíin ró, chí ñn mozo tu cástūhún patrón nuū i ndese jéni ni de sáha de. Chí sa suhva amigo cahān rī jíin ró, chí je ni castūhun rī nuū rō tāca jnūhun ni cahān Tátá rī jíin rī.

¹⁶ Máá rī ní nacāji róho jéé jnáma rī rohó, te nasūu máá ró ní cáncani ni xihna gā jeé cóndiquín rō ruhū. Te ni jeni rī rohó jéé caca ndaa rō te scándíje ró cuehē ñayuu jeé cuu i

sêhe ri ní cání. Te súcuan te ndihi jeê cacán rō nuū Tatá rī siquĩ jeê cáandije rō rúhū, sáha ya jeê jicán rō.

¹⁷ Te yáha cúu jniñu ndácu ri nuū rō: jeê na cúdáhú ni rō jnánhan rō.

Jeê cáquitĩ ni ñayuu ñayivi nuū Jesús jín nuū ñayuu cáandije

¹⁸ Te núu cáquitĩ ni ñayuu ñayivi nuū rō jijnánhan rō, te je cájini rō jeê xihna gā nuū maá rí ni caquitĩ ni i.

¹⁹ Te núu jeê iyó gā rō jín modo ñayuu ñayivi, te coo manĩ ñayuu ñayivi jín rō nuū, nājñuhun manĩ i jín jnánhan i. Te ni nacáji rī rohó jéé tuá coo rō jín modo ñayuu ñayivi. Te jeê yúcuan cáquitĩ ni i nuū rō, chi tuá cácuu rō cuenta ñayivi.

²⁰ Nucúhun ni rō jñuhun ni cahán rī jín rō: Núu tu iyó yñúhún ñayuu nuū patrón, te nagá ni cuu nuū mozo de. Núu ni cajito xeên i ruhū, te suni súcuan coto xeên i rohó jéé cácuu rō mozo rī. Te núu jeê ni cájetáhú i jñuhun ni steén rī, te suni cuatáhú i jñuhun cásteén rō.

²¹ Te táca jniñu yáha sáha i jín rō jeê siquĩ ruhū, chi tu cájini i Yaa ní taji rúhū vèji rī.

²² Núu jeê tu ní quiji ri nacani ri jñuhun nuū i, te ma cóo cuéchi i nuū. Te vijna chi ma cúu ga cahán i jeê tu jini i jeê iyó cuéchi i.

²³ Ñayuu jeê cáquitĩ ni nuū rī, suni nuū Tatá rī cáquitĩ ni i.

²⁴ Núu jeê tu ní sáha ri jniñu jéhu nuū i jeê ní ñn tēe tu ní sáha de súcuan, te ma cóo cuéchi i nuū. Te vijna je ni cajito i jniñu ún, te vésú súcuan te cáquitĩ ni i nuū rī jín nuū Tatá rī.

²⁵ Te súcuan cásáha i náváha squícu jñuhun yósó núu tútu ley Yaa Dios jeê cáneváha i: Ni caquitĩ ni i nuū rī, vésú tú na cuéchi ri, achí.

²⁶ Te taji rí maá Yaa chindéé ñáhán rohó te sáha ya jeê cóo sñi ni rō. Te Yaa un cúu maá Espiritu jeê steén jñuhun ndaa, te quiji ya nde nuū Tatá rī, te nacani cáji yá jñuhun rī.

²⁷ Te suni maá rō nacani rō jñuhun ri, chi je cáhñi ro jín rī nde ná ni quejéé rí nacani ri jñuhun.

16

¹ Táca jñuhun yáha ní cahán rī jín rō náváha ma náyuhu rō jeê quiji jñundóho.

² Chi quenehen i rohó jéé ma cuáha ga i jñuhun cone rō táca vehe ñi sinagoga. Te quee quivĩ jeê cahni i rohó, te cani ni i jeê ñn jniñu yáha ni sáha i nuū Yaa Dios.

³ Te súcuan sáha i jín rō, chi tu cájini cuiti i maá Tatá rī ni maá rī.

⁴ Te ni cahán rī jñuhun yáha jín rō náváha núu je ni quee quivĩ jeê súcuan coo, te nucúhun ni rō jeé jé ni cahán rī jín rō.

Jniñu sáha Espiritu Santo

⁵ Te tu ní cáhán rī jñuhun yáha jín rō nde xihna ñúhún, chi ñne maá rí jín rō jijnánhan rō.

⁵ Te vijna chi nuhún rī condee rī jín Yaa ní taji rúhū vèji rī. Te ni ñn rō tu cájñuhun rō nde nuū quihín rī.

⁶ Chi maá jéé cácuuhyá ndasí ni rō jeê ni cáhán rī súcuan jín rō.

⁷ Jendaá cahán rī jín rō: Jeê váha maá rō jijnánhan rō cúu jeê quihín rī. Chi núu tú quihín rī, te ma quiji Yaa chindéé ñáhán rohó te sáha ya jeê cóo sñi ni rō. Te núu cuahán rī, te taji rí yá quiji ya nuū rō.

⁸ Te jeê queé yá, te steén yá nuū ñayuu ñayivi jéé iyó cuéchi i, jín ndese quívicoo i ichi ndaa, jín jéé sándaá Yaa Dios siquĩ cuéchi i.

⁹ Steén yá jeé iyó cuéchi i, chi tu cáandije i ruhū.

¹⁰ Te steén yá siquĩ ichi ndaa, chi maá rí nuhún rī nuū Tatá rī, te ma cóto ga rō nuū rī.

¹¹ Te steén yá siquĩ jeê sándaá Yaa Dios cuéchi ñayuu, chi je ni cundaá jeê jahnú ndetu maá jéxeén jeê cujéhu ini ñayivi yáha.

¹² Te iyó cuéhē gā jñuhun cúni rī cahán rī jín rō, te ma cúu jecúhun ni rō vijna.

¹³ Te jeê queé maá Espiritu jeê steén jñuhun ndaa, te maá yá steén táca jñuhun ndaa un núu rō. Chi ma cahán yá jeê maá yá, chi cahán yá táca jéé jini sōho ya cahán Yaa Dios. Te steén yá siquĩ táca jniñu jeê coo.

¹⁴ Te steén yá jeê cujéhu rī, chi nacastúhun yá nuū rō táca jñuhun jeé jé ni cahán rī, te sáha ya jeê jécúhun ni rō.

¹⁵ Ndihi ndese cújéhu Tatá rī, suni súcuan cújéhu maá rī. Jeé yúcuan ní cahán rī jeê Espiritu Santo nacastúhun yá nuū rō táca jñuhun jeé jé ni cahán rī, te sáha ya jeé jécúhun ni rō jijnánhan rō.

Vésú cácuuhyá ni rō, te ndusñi ni rō

¹⁶ Jecu na te ma cóto ga rō nuū rī. Te jecu tucu quivĩ te coto tucu rō nuū rī, chi quinhun rī nuū ndeé Tatá rī. Achí yá.

¹⁷ Yúcuan na te sava tēe cácuáha jín yá, ni cacajñuhun jnánhan de:

¿Na jñuhun cúu jeé yáha jeê cahán yá jín yó? Chi achí yá jeé jecu na te ma cóto ga yó nuū yá, te jecu tucu quivĩ te coto tucu yó nuū yá, chi siquĩ jeé quinhun yá nuū ndeé Tatá yá.

¹⁸ ¿Na jñuhun cúu jeé yáha jeê cahán yá, jecu na? Tu cájecúhun ni yó na vé cúu jeé cahán yá. Achí de.

¹⁹ Te ni jini Jesús jeé cácuu de cajñuhún de ya. Te ni cahán yá jín de:

¿A cácajñuhun jnánhan rō na vé cúu jeé ni cahán rī jín rō jeé jecu na te ma cóto ga rō nuū rī, te jecu tucu quivĩ te coto tucu rō nuū rī?

²⁰ Jendaá cahán rī jín rō jeé ndahyū rō jijnánhan rō te cucuhyá ni rō, te ñayuu ñayivi

chi sa cus̄ ni i. Te vēsú cucuihyá ni rō, te sa ndus̄ ni rō jeē coto tucu ró nuū rí.

²¹ In ñahan núu cuacuyajni scácu ña, te jénde chíji ña, chí je ni quee hora jeē scácu ña. Te núu je ni scácu ña sūchi lúli, te tuá nahán ña jeē ní ndoho ña, chí cus̄ ni ña jeē ní cacu sēhe ña.

²² Te suni súcuan cúu jeē cándoho ró vijna, chí cacucuihyá ni rō jíin rí. Te jecu-ni quiv̄i te coto jnánhan tucu yó, te cus̄ ndasí ni rō. Te ni in ma cúu casi jeē cus̄ ni rō.

²³ Te quiv̄i ún chí tú na vé cacān gā rō nuū rí. Chí jendaá cahán rí jíin rō jeē nuū maá Tátá rí cacān rō, te sáha ya ndihi jeē cájicān rō, siqūi jeē cácadnje ró rúhū.

²⁴ Nde vijna te ná tu cacān rō nuū Tátá rí jeē jíin shví rí. Te vijna te na quejéé ró cacān rō jíin shví rí, te nihin rō, návaha cus̄ ndasí ni rō.

Je ni quende yā poder ndihi jeneé cáh̄yo ini ñayiv̄i

²⁵ Tāca jnūhun yáha ní cahán yatá rí jíin ró. Te quee quiv̄i jeē ma cahán yatá gá rí jíin ró, chí sa suhva castūhun cáji rí nuū rō siqūi Tátá rí.

²⁶ Te quiv̄i ún chí cacān rō nuū Tátá rí siqūi jeē cácadnje ró rúhū. Te tu cahán rí jíin ró jeē cacān tahú rí jehé rō nuū Tátá rí.

²⁷ Chí máá Tátá rí je cundáhú ni yā rohó siqūi jeē cáh̄yo man̄i rō jíin rí, te ni cacandje ró jéé ndé nuū maá yá vēji rí.

²⁸ Ni quenda rí nde nuū Tátá rí, te ni quee rí ini ñayiv̄i. Te vijna te quenda rí ini ñayiv̄i, te nuhūn tucu rí nuū Tátá rí. Achí yá.

²⁹ Te ni cacān tēe cáscuaha jíin yá:
Vijna te cáhán cáji ní, te tuá cahán yatá ní.
³⁰ Vijna te cájini na jéé jiní ni ndiv̄i cuiti, te tuá jíni ñuhún jéé cájnūhún ni in ná nihin. Jeē yúcan cácadnje ná jéé vēji ní ndé nuū Yaa Dios. Achí de.

³¹ Te ni cahán Jesús jíin de:

¿A ndé vijna te cácadnje ró naún?

³² Te quiji quiv̄i, te je ni quee, jeē cuité núu ró quínungoo ró ná vehe ná vehe ró, te stóo mañuhún ró ruhū. Te nasūu jéé quéndōo mañuhún rí, chí Tátá rí ine ya jíin rí.

³³ Tāca jnūhun yáha ní cahán rí jíin ró návaha coo ndeyí coo s̄i ní rō siqūi jeē cácadnje ró rúhū. Ini ñayiv̄i chí cánuú coto ró jnūdóho. Te vēsú súcuan te na cóo s̄i ní rō, chí je ni quende rí poder tāca jeneé cáh̄yo ini ñayiv̄i. Achí yá.

Jeē ní jíicān tahú Jesús jehé ñayuu cácadnje

17

¹ Te ná ni cahán Jesús tāca jnūhun yáha, te ni ndacoto ya ichi ándiv̄i, te ni cahán yá:

Tátá, je ni quee quiv̄i jeē ndóho ná. Vijna te stéén ní jéé cujéhu máá ná jeē cúu ná Séhe ní, návaha suni máá ná steén na jéé cujéhu máá ní.

² Chí ni sáha ní jéé ndiso jniñu ná siqūi tāca ñayuu, návaha tāca ñayuu jeē ni jéhe ní nuū ná, cotecu i ní cáni sáha ná.

³ Te suhva cúu jnūhun cotecu i ní cáni: suu jeē na cúni i nihin jéé mañuhún-ni ní cúu Yaa ndaa, jíin jéé cúni i saña jeē cúu ná Jesucristo, Yaa ní tají ní.

⁴ Je ni steén na nuū ñayuu ñayiv̄i jéé cujéhu ní, te je sínu ná jniñu ní ndacu ní nuū ná.

⁵ Te vijna, Tátá, sáha ní jéé ndujéhu tucu ná ndé nuū néne ní, nájnūhun cujéhu ná jíin ní nde ná tu jecōo ñayiv̄i.

⁶ Ñayuu jeē ní nacāji ní ini ñayiv̄i, ni jéhe ní i nuū ná, te ni steen na nuū i ndese Yaa cúu ní. Cuenta máá ní cúu i, te ni jéhe ní i nuū ná. Te ni cajetáhú i jnūhun ní, te ni casqūi c.

⁷ Te vijna te cájini i jeē ndé nuū maá ní vēji tāca jéé iyó jíin ná.

⁸ Chí tāca jnūhun ni cahán ni jíin ná, ní castūhun ná nuū i, te ni cajetáhú i. Te ni cajini i jeē ní quenda ndije ná ndé nuū maá ní, te ni cacandje i jeē máá ní ní tají saña.

⁹ Te jíicān tahú na jéhé máá i jíjnahan i. Tu jíicān tahú na jéhé ñayuu ñayiv̄i jéé tu cácadnje, chí sa jehé máá ñayuu ni jéhe ní nuū ná, chí cuenta máá ní cácuu i.

¹⁰ Te tācá i jeé yhi i ndaha máá ná, suni cuenta máá ní cúu. Te tācá i jeé cúu i cuenta máá ní, suni cuenta máá ná cúu i. Te cástéén i ndese cujéhu ná.

¹¹ Te tuá condee ná ini ñayiv̄i. Te máá i chí quendōo i ini ñayiv̄i, te máá ná chí najeé ná condee na jíin ní. Yaa ñi Yaa ndoo cúu ní, Tátá. Te jíin poder ní condito ní tāca ñayuu ni jéhe ní nuū ná, návaha inuú na cóo ni i jíjnahan i, nájnūhun cúu máá yó.

¹² Te jeé ní condee na jíin i ini ñayiv̄i, te jíin poder ni ní condito ná i. Tāca ñayuu ni jéhe ní nuū ná, ní condito yúcun ná i. Te tu ní jéhe na jnūhun naa i jíjnahan i, chí máá in-ni tēe jeé je cúu de tēe jnahnū ndetū, návaha sqūicu jnūhun yósó nuū tútu ii.

¹³ Te vijna te najeé na nuū ní, te cahán na tāca jnūhun yáha jíin i níni jéé ine ga ná ini ñayiv̄i, návaha na cóo s̄i ndasí ni i nájnūhun cus̄ ni máá ná.

¹⁴ Ni castūhun ná jnūhun ní nuū i. Te ni caqūit̄i ní ñayuu ñayiv̄i nuū i, chí tuá cácuu i cuenta ñayiv̄i, nájnūhun máá ná tu cúu ná cuenta ñayiv̄i.

¹⁵ Te tu jíicān tahú na jéé quénehen ní i ini ñayiv̄i, chí sa suhva jeē cóndito ní i nuū jexeén.

¹⁶ Nasūu cuenta ñayiv̄i cácuu i, nájnūhun máá ná jéé násūu cuenta ñayiv̄i cúu ná.

¹⁷ Jíin jnūhun ndaa ní te sáha ní jéé coo ndoo coo ñi i nuū ní. Tāca jnūhun cáhán máá ní cúu jnūhun ndaa.

¹⁸ Te nájnūhun ni tají ní saña ní quiji ná ini ñayiv̄i, suni súcuan tají ná i nacani i jnūhun ní nuū ñayuu ñayiv̄i.

¹⁹ Te jehē maá i cúu jeē jēhe ná máá ná cuu ná, návāha suni máá i coo ndoo coo i i nuū ni jēē jīin jnūhun ndaā.

²⁰ Te nasūu máá iin-ni jehē ñayuu yáha jícán tahú na, chí suni jehē tāca gá ñáyuu jeē candlje i saña núu na cúni sōho i jnūhun jeē nácani máá i jínánhan i.

²¹ Te jícán tahú na jēē inuú na cóo ni i jínánhan i. Nájñūhun iin-ni cúu ní jīin ná, Tátā, te iin-ni cúu ná jīin máá ní, suni súcuan na cóo inuú i jīin yó. Te cúni na jēē inuú na cóo ni i, návāha na cándlje ñayuu ñayiví jēē maá ní ní tají ní saña.

²² Ni sajhēnu ná i nájñūhun ni sajhēnu ní saña, návāha inuú na cóo ni i, nájñūhun inuú-ni cúu yó.

²³ Te ndúú ná jīin i, te ndúú ní jīin ná, te súcuan te inuú cuiti coo ni i jínánhan i. Yūcuán na te cuni ñayuu ñayiví jēē maá ní ní tají ní saña, jīin jēē maní ndasí ní jīin i nájñūhun maní ní jīin ná.

²⁴ Tátā, máá ní ni jēhe ní i nuū ná. Te cúni na jēē cóyucú i jīin ná nuū cóndee ná, návāha coto i ndese luu cújēhnu ná ní sáha ní. Chí iyó maní ndasí ní jīin ná nde ná tu jecōo ñayiví te nde vijnā.

²⁵ Yaā ndaā cúu ní, Tátā, te ñayuu ñayiví tu jīn i níhín, te máá ná chí jīn i na níhín. Te ñayuu yáha chí cájini i jeē maá ní ní tají saña.

²⁶ Ni steén na núu i jínánhan i ndese Yaā cúu ní. Te steén gā na súcuan nuū i, návāha na cóo maní ndasí i jīin jnāhan i, nájñūhun iyó maní ndasí ní jīin ná, te návāha condee ná ini anuá i. Achí yá.

Jeē ní cajñi de Jesús

(Mt. 26.47-56; Mr. 14.43-50; Lc. 22.47-53)

18

¹ Te nuū ní cuu ni cahān Jesús tāca jnūhun yáha, te ni quenda ya jīin tēe cáscuáha jīin yá, cuahān yā inga lado yuu Cedrón. Te yūcuan iyó iin huerto nuū ní quiví ya jīin tēe cáscuáha jīin yá.

² Te Judas, tēe jeē nastúu de ya, suni jīn i de lugar un, chí cuehē jīnu ni nataca Jesús yūcuan jīn tēe cáscuáha jīin yá.

³ Te ni jīn i de yūcuan jīn iin grupo soldado jīn jecu policia cándito templo, jeē ní catajī sutú cáscujēhnu jīn tēe grupo fariseo. Te cándiso de machete, te cájñi de linterna jīn yiti.

⁴ Te Jesús je jīn i yā tāca jnūndóho jeē véji siquí yā. Te ni quenda ya ichi núu de, te ni cahān yā:

¿Ndé iin cámanducú ró?

⁵ Te ni cacahān de jīin yá:

Jesús tēe ñuu Nazaret cámanducú rí.

Te ni cahān yā:

Máá rí cúu.

Te Judas, tēe jeē nastúu de ya, suni ine de jīn tēe ún.

⁶ Te jeē súcuan ni cahān yā, máá rí cúu, te ni cajica yatá de, te ni cacotúu-ni de.

⁷ Yūcuán na te ni cajñūhún tucu ya de:

¿Ndé iin cámanducú ró?

Te ni cacahān de:

Jesús tēe ñuu Nazaret.

⁸ Te ni cahān Jesús:

Je ni cachi rí jeē maá rí cúu. Te núu ruhū cámanducú ró, te máá-ni rí jñi ró, te tēe yáha na quingoo de. Achí yá.

⁹ Súcuan ni cuu návāha na squicu jnūhun jeē ni cahān yā jīin Tátā yā: Tu ní jēhe na jnūhun naa ni iin tēe jeē ní jēhe ní núu na, achí yá.

¹⁰ Te Simón Pedro ndiso de iin espada. Te ni tava de, te ni jehnde de sōho lado váha iin tēe nání Malco. Te tēe un cúu de mozo máá sutú cujēhnu.

¹¹ Te ni cahān Jesús jīin Pedro:

Nachuvāha espada rō ini cubierta. ¿A tu cánuú jēē ndóho rí jnūndóho yáha jeē ní sándaā Tatá rí jeē ndóho rí? Achí yá.

Jeē ní indichi Jesús nuū sutú cujēhnu

(Mt. 26.57-58; Mr. 14.53-54; Lc. 22.54)

¹² Yūcuán na te tāca soldado un, jīin capitán de, jīin táca policia tēe hebreo un, ni cajñi de Jesús, te ni cajihni de ya.

¹³ Te xilna gā vehe Anás cuango de jīin yá. Te tátā chíso Caifás cúu Anás. Te Caifás cúu máá sutú cujēhnu ga cuiyā ún.

¹⁴ Te suu de ni cachi nuū jnāhan de hebreo jeē cánuú jēē cúu iin tēe jehē nación de.

Jeē ní cachi Pedro jeē tu jīn i de ya

(Mt. 26.69-70; Mr. 14.66-68; Lc. 22.55-57)

¹⁵ Te Simón Pedro jīin inga tēe scuáha, cándiquin de Jesús cuango de yatá yā. Te inga tēe scuáha ún chí jīn i jnāhan de jīin sutú cujēhnu. Jeē yūcuan ní quiví de jīin Jesús ini patio vehe sutú cujēhnu ún.

¹⁶ Te Pedro ni quendóo de yatá yehiyí. Te máá tēe scuáha jēē jīn i jnāhan jīin sutú cujēhnu ún, ni quenda de ni cahān de jīin ñahan ndíto yehiyí, te ni squiví de Pedro ini patio.

¹⁷ Yūcuán na te ñahan ndíto yehiyí un ní cajñūhún ña Pedro:

¿A násūú iin tēe scuáha jīin tēe índichi nuū sutú un cúu ró?

Te ni cahān de:

Nasūu cúu rí, achí de.

¹⁸ Te tāca mozo jīin policia un ní cascáyú de ñuhūn jīin ticāyí, chí mijin sáha. Te cáhīn de cánsaā de. Te suni índichi Pedro, násaā de jīin táca tēe ún.

Jeē ní stichí sutú cujēhnu ún Jesús

(Mt. 26.59-66; Mr. 14.55-64; Lc. 22.66-71)

¹⁹ Te sutú cujēhnu un ní stichí de Jesús ndé-ni cúu tēe cáscuáha jīin yá, jīin na jnūhun cúu jeē steén yā.

²⁰ Te ni cahān Jesús:

Níni ní cahān rī nuū chitū ñāyuu, ni cajini sōho ndīhi ñayuu. Te níni ní steén rī jñūhun ini tǎcá vehe ñi sinagoga jíin ini templo cáhnu nuū ndutútú ndivii jñāhan yó hebreo. Te tú ni ñi jñūhun ní cáhān sāhi rī.

²¹ ¿Te naun cájnūhun ró ruhū? Cajnūhun ñāyuu ní cajini sōho jñūhun ni cahān rī, te máá i cachi ndese ni cahān rī. Chi cájini i ndese ni cahān rī.

²² Te jeē ni cáhān Jesús súcuan, te ñi policia ndito templo jeē índichi de yūcuán, ní cani-ni de nuū yá. Te ni cahān de jíin yá:

¿A súcuan cáhān rō jíin sūtū cujéhnu naún?

²³ Te ni cahān Jesús:

Núu ni cahān rī ñi jñūhun néé, cachi na jñūhun néé ní cahān rī. Te núu tu ní cáhān rī ñi jñūhun néé, ¿te naun cáni ró ruhū? achí yá.

²⁴ Yūcuán na te Anás, sutū cujéhnu un, ní tají de ya, núhni yá cuahān yá nuū Caifás, tēe cúu máá sūtū cujéhnu ga.

Jeē ní cachi tucu Pedro jeē tu jíni de ya

(Mt. 26.71-75; Mr. 14.69-72; Lc. 22.58-62)

²⁵ Te níni jéē súcuan cúu, te índichi-ni Pedro, násaā de yuñhún. Te ni cacahān jíin de:

¿A násūú ñi tēe scuáha jíin tēe un cúu ró, chí naún?

Te máá de tu ní cáchi de:

Nasūu cúu rī, achí de.

²⁶ Yūcuán na te ñi mozo sutū cujéhnu, jñāhan tēe jeē ní jehnde Pedro sōho, ni cahān jíin de:

¿A násūu máá ró cúu jeē ní jito rī jíin de ini huerto?

²⁷ Te Pedro tu ní cáchi tucu de. Te ni cana-ni líhli.

Jeē ní índichi Jesús nuū Pilato

(Mt. 27.1-2, 11-14; Mr. 15.1-5; Lc. 23.1-5)

²⁸ Yūcuán na te ni quendacoo de jíin Jesús vehe Caifás, cuango de jíin yá nde palacio tēe nación Roma jeē cúu gobernador. Te je cuacundijin. Te ñayuu hebreo tu ní quívicoo i ini palacio, návāha tu stívi i ley i jeē cahān jeē ma quívi i ini vehe ñi ñayuu jeē násūú hebreo cúu. Chi núu súcuan te ma cúu cuxíni i vico pascua jeē cóo inga quiví un.

²⁹ Yūcuán na te ni quenda Pilato, tēe cúu gobernador, ni cahān de jíin i jñnāhan i:

¿Na cuēchi cájicān rō siquī tēe yáha?

³⁰ Te ni cacahān i:

Núu jeē násūu tēe cúnéé cúu tēe yáha, te ma jñi ná de jeē quíndeca ná de nuū ni núu, achí i.

³¹ Te ni cahān Pilato:

Cuángo jíināhan ró, te sándaā rō siquī de jíin ley cánevāha máá ró.

Te ni cacahān ñayuu hebreo un:

Máá ná jeē cácuu ná ñayuu hebreo, tú na permiso cánevāha ná jéē cáhni ná ni ñi ñayuu.

³² Súcuan ni cacahān i návāha squicu jñūhun jeē ní cachi Jesús jeē quívi ya ndaha tēe Roma te cahni de ya jíicá cruz.

³³ Te ni ndívi Pilato ini palacio, te ni cana de jeē na quíji Jesús. Te ni cajnūhún de ya:

¿A máá ró cúu Rey ñayuu hebreo naún?

³⁴ Te ni cahān Jesús jíin de:

¿A cájnūhun ró ruhū jeē súcuan jéni ni máá ró, chí jéē ní cacastūhun ñayuu hebreo nuū ró?

³⁵ Te ni cahān Pilato:

¿Chí tēe hebreo cúu rī jeē cúni rī? Ñayuu nación máá ró jíin sūtū cácujehnu ni cachihi róhó ndaha rī. ¿Na vé ni sáha ró núu súcuan? Achí de.

³⁶ Te ni cahān Jesús:

Nasūu jéē ndácu rī jñiñi nájnūhun cándacu taca rey ñayívi yáha. Chi núu jeē ñayuu ñayívi ní casáha jeē cúu rī rey, yūcuán na te tēe cándiquin ruhū, cuajnáhan de návāha ma quívi rī ndaha jñāhan rī hebreo nuú. Te nasūu núu ñayívi yáha cúu jeē ndácu rī jñiñi vijna. Achí yá.

³⁷ Yūcuán na te ni cahān Pilato jíin yá:

¿Te á ñi rey cúu ró jéē súcuan?

Te ni cahān Jesús:

Rey cúu rī, nájnūhun cáhān rō. Ni quiji rī ni cacu rī ini ñayívi yáha návāha nacani rī jñūhun ndaā. Te ndíhi ñayuu cájetáhú jñūhun ndaā, cájini nahín i jñūhun cáhān rī. Achí yá.

³⁸ Te ni cahān Pilato:

¿Ndese cuni yó ndé ñi cúu máá jñūhun ndaā?

Jeē ní cundaā jeē cúu yá

(Mt. 27.15-31; Mr. 15.6-20; Lc. 23.13-25)

Te jeē ni cahān de jñūhun yáha, te ni quenda tucu de nuū ñayuu hebreo. Te ni cahān de jíin i:

Tú cuiti na cuēchi níhín rī siquī de.

³⁹ Te íyó costumbre máá ró jíināhan ró jéē vico pascua te siaá rī ñi tēe íne vecāa nuū rō. ¿Te á tu cácu ni rō jeē siaá rī Rey rō nuū ró? Achí de.

⁴⁰ Yūcuán na te ndivii i ni cacana jee tucu i:

Ma siaá ní tēe jíinā, chi Barrabás siaá ni, achí i.

Te tēe cuíhná cúu Barrabás.

19

¹ Yūcuán na te ni cahān Pilato jeē na jñi soldado Jesús, te cani de ya jíin cuarta ñi.

² Te ní casáha de ñi corona íñu, ni cachuhun de xiní yá. Te ni cachuhun de ya ñi sahma cuehé ndíhi jéē cúu sahma rey.

³ Te ni jecondichi de nuū yá, te ni cacahān catá de:

Nacā jeē váha rey cúu Rey ñayuu hebreo.

Te ni cacani de nuū yá.

⁴ Yūcuán na te ni quenda Pilato inga jíinu, te ni cahān de jíin ñayuu:

Yáha condêhe ró tava rî de, návâha na cúni rō jeē tú na cuēchi nihîn rî siquî de.

⁵ Te ni quenda Jesús, ñûhun ya corona iñu jîin sahma cuehé ndíhî un. Te ni cahân Pilato jîin i:

Yáha condêhe ró de jîinâhan ró.

⁶ Te nuû ní cajito sutû cácujeñhu jîin táca policia nuû yâ, te ni cacana jee de:

Cata caa ní de jicâ cruz, na cúu de.

Te ni cahân Pilato:

Núu súcuan te najni máá ró de te cahni rō de. Chi ruhû, tú na cuēchi nihîn rî siquî de.

⁷ Te ni cacahân ñayuu hebreo un:

Cáneváha ná iin ley, te jeē siquî ley un cánuú jéé cúu de, chi sáha de máá de jeē Séhe Yaâ Dios cúu de.

⁸ Te jeē ní jini sōho Pilato jñûhun yáha, te vihyá gâ ni yûhú de.

⁹ Te ni ndávicoo tucu de ini palacio, te ni cajñûhún de Jesús:

¿Ndé nuû véji ró?

Te tu ní cáhán cuiti Jesús jîin de.

¹⁰ Yûcuán na te ni cahân de jîin yá:

¿Naun tu cáhán rō jeē cahân rî? ¿A tu jîiní rō jeē ndíso jñiñu rî jeē cáhni rî rohó jicâ cruz, te suni ndíso jñiñu rî jeē siaá rî rohó quíhîn rō?

¹¹ Te ni cahân Jesús:

Núu tu ní sáha Yaâ Dios jeē ndíso jñiñu ró, te tú na vé cúu sáha ró siquî rî. Jee yûcuán tée jeē ní nacuaña ruhû ndaha ró, cuēchi xeên gâ condee siquî de vésú maá ró. Achí yá.

¹² Yûcuán na te nde hora un ndúcú ndéyí Pilato ndese siaá de ya. Te ñayuu hebreo chi cácana jee i:

Núu siaá ní tée jiñâ, te tu cúu ní amigo rey Roma jeē cujéñhu ndácu jñiñu núu súcuan. Chi táca tée jeē sáha de rey maá de, núu súcuan te cúu de enemigo siquî rey un. Achí i.

¹³ Te jeē ní jini sōho Pilato jñûhun yáha, te ni ndacu de jñiñu jeē na quenda Jesús ini vehe quiji ya. Te ni cucōo de silla nuû cûndaâ jñiñu, nuû máni máá yúu ni jecáva, te lugar un nání Gabata nuû yûhu hebreo.

¹⁴ Te cuacuu cahuxî uû, te jehîni quivî ún quejéé vico pascua. Te ni cahân Pilato jîin ñayuu hebreo:

Yáha índichi maá rey rō.

¹⁵ Te ni cacana jee i:

Na cúu de. Cata caa ní de jicâ cruz, achí i.

Te ni cahân Pilato jîin i:

¿A jéé cata caa rî rey rō jicâ cruz naún?

Te sutû cácujeñhu un ní cacahân de:

Tuá na inga rey cánevâha ná jîinâhan ná, chi máá-ni rey Roma jeē cujéñhu ndácu jñiñu nuû ná.

¹⁶ Yûcuán na te Pilato ni nacuaña de ya nuû i jeē na cúu yâ jicâ cruz. Te ni cajñi i ya cuangoo i jîin yá.

Jeē ní cacata caa de ya jicâ cruz

(Mt. 27.32-44; Mr. 15.21-32; Lc. 23.26-43)

¹⁷ Te ni quenda Jesús, ndíso ya cruz yâ, cuangoo de jîin yá iin lugar nuû nani Yiqui Xiní, te nuû yûhu hebreo nani Gólgota.

¹⁸ Te yûcuán ní cacata caa de ya jicâ cruz. Te suni ní cacata caa de uû tée nuû uû gâ cruz, iin iin de iin lado yâ, te máá Jesús mēhñu.

¹⁹ Te suni ní ndacu Pilato jñiñu jeē na cóndee jñûhun xiní cruz yâ, jeē cahân: Tee yáha cúu Jesús ñuu Nazaret, Rey ñayuu hebreo, achí.

²⁰ Te cuehē ñayuu hebreo ní cacahu i jñûhun yáha, chi máá yajni yuñúu cúu nuû ní cacata caa de ya. Te jñûhun un yósó jîin yuhu hebreo jîin griego jîin latín.

²¹ Te táca sutû cácujeñhu nuû ñayuu hebreo, ní cacahân de jîin Pilato:

Ma tée ní jéé cúu de Rey ñayuu hebreo, chi sa suhva tee ní jéé maá de ní cahân jeē cúu de Rey ñayuu hebreo.

²² Te ni cahân Pilato:

Ma násama rî jeē jé ní ndacu rî jñiñu ní jecondee.

²³ Te soldado un, nuû ní cuu ní cacata caa de Jesús jicâ cruz, te ni caquihin de sahma ya, te ni cajehnde de ní nduu cuñn parte, te iin iin parte ní cuu iin iin soldado un. Te suni ní caquihin de camisa yâ. Te camisa un tu ní quícu, chi ní cunu ní.

²⁴ Te ni cacahân maá de:

Ma cáhnde yō, chi vâha ga na sáha yó sorteo, te na cóndêhe yó ndé iin yó nihîn, achí de.

Te súcuan ní squícu jñûhun yósó nuû tútu ñi nde jehánh jéé cahân Jesús: Ni caquihin de sahma rî cuu máá de. Te ní casáha de sorteo siquî camisa rî. Achí. Súcuan ní casáha soldado un.

²⁵ Te yajni cruz nuû ndíta caa Jesús íne náná yâ, jîin cúhú ña María ñasihí Cleofas, jîin María ñuu Magdala.

²⁶ Te ní jito Jesús nuû naná yâ jîin núu tée scuáha jeē maní gâ yâ jîin, suni índichi de yûcuán. Te ní cahân yâ jîin náná yâ:

Náná, nde vijna te máá de nucuiñî de cuu de séhe ní.

²⁷ Yûcuán na te ní cahân yâ jîin tée scuáha ún:

Nde vijna te cuu ña nájñûhun náná rō, achí yá.

Te nde hora un ní cana de ña cuacondee ña vehe de condito de ña.

Jeē ní jîhî Jesús

(Mt. 27.45-56; Mr. 15.33-41; Lc. 23.44-49)

²⁸ Yûcuán na te ní jini Jesús jeē jé ní jînu táca jñiñu jeē cánuú ndoho ya. Te návâha squícu jñûhun cáhán tutu ñi, te ní cahân yâ:

Jichí rî ndute, achí yá.

²⁹ Te yūcuan íin ìin tìndohō ñúhun chitú vinagre iyá. Te ni cachundaji de ìin cachí nuū vinagre un, te ni catee de xiní ìin ndaha yújnu hisopo, te ni catee de yuhu ya jeē cóho ya.

³⁰ Te ná ni jihí ya vinagre un, te ni cahān yā:

Je ni jinu, áchí yá.

Te ni cāyí-ni xiní yā, te ni jihí-ni ya.

Jeē ní cují soldado lanza xiin ya

³¹ Te inga quiví ún coo vico pascua. Te tēe hebreo tu cácuti de jeē cóndita caa ndīyi ún jicā cruz quiví ndétátú un. Chi quiví ndétátú jeē cúu vico pascua, ìi ndasí gá vēsú táca gá quiví ndétátú. Te ni cacahān de jíin Pilato jeē na ndácu de jniñu jeē jnahnú sīhin tēe cándita caa, te na cújiyo de jicā cruz.

³² Te ni quecoo soldado, te ni cajehnú de sīhin ìin tēe jeē ndíta caa jíin yá, te suni súcuan inga de.

³³ Te nuū ní quecoo de nuū Jesús, te ni cajito de jeē jé ni jihí yā. Jeē yūcuan tu ní cajehnú de sīhin ya.

³⁴ Te ìin soldado chi ni cují de lanza xiin ya, te ni cane-ni niñí jíin ndute.

³⁵ Te máá rí jeē tēe tutu yáha, ni jito rí jeē súcuan ni cuu, te nácani ndaā rí jnūhun ndese ni cuu. Te jíin rí jeē iyó ndáa jnūhun cáhān rí, návāha suni candije máá ró jíjnāhan ró.

³⁶ Chi súcuan ni cuu návāha squicu jnūhun cáhān tutu ìi: Ma cahnú de ni ìin yiqui ya, achí.

³⁷ Te suni inga jnūhun cáhān tutu ìi: Ìin quiví te coto i nuū Yāa jeē ní cují i lanza, achí.

Jeē ní quindūji Jesús

(Mt. 27.57-61; Mr. 15.42-47; Lc. 23.50-56)

³⁸ Te ni cuu táca jēe yáha. Te iyó ìin tēe ñuu Arimatea jeē naní José, te cúu de tēe cándije Jesús. Te yuhu-ni cándije de, chi yúhú de jnāhan de hebreo. Te ni cahān ndahú de jíin Pilato jeē na cuáha jnūhun quihin de yiqui cúñu Jesús. Te ni jēhe Pilato jnūhun. Yūcuán na te cuahān José, ni snúu de yiqui cúñu Jesús.

³⁹ Te suni ni jinū Nicodemo, tēe ni quiji nuū Jesús ìin jecuáa. Te ndíso de nájnūhun ocó uxí kilo sūje uvuā jeē ní saca jnāhan jíin yucú áloe.

⁴⁰ Te ndindúu de ni caquihin de yiqui cúñu Jesús, te ni chachusúcun de jíin tira sahma jeē ni quiví yucú jeē jeén asin ún, nájnūhun iyó costumbre máá ñayuu hebreo jeē cáchindūji i ndīyi.

⁴¹ Te yajni nuū ni jihí Jesús iyó ìin huerto. Te nuū huerto un ndéé ìin yaū jeē ní caan jeē jicā ìin caa, nuū ná tu quindūji ndīyi.

⁴² Te yūcuan ní cachindūji de Jesús, chi íne yajni yaū ndīyi ún. Chi je yajni quejéé quiví ndétátú de jeē cácuu de ñayuu hebreo, te tú na ley chindūji de ndīyi núu je ní quejéé quiví ún.

Jeē ní natecu Jesús

(Mt. 28.1-10; Mr. 16.1-8; Lc. 24.1-12)

20

¹ Te jenéhen quiví domingo ni jinū María ñuu Magdala nuū ní yindūji Jesús, te yínee gá cúu. Te ni jito ña jeē ní cujiyo yuū ndihyú yuyáú ndīyi.

² Yūcuán na te jinu ña cuahān ña nuū Simón Pedro jíin núu inga tēe scuáha ún jeē maní gá Jesús jíin. Te ni cahān ña jíin de:

Ni catava de Jitoho yō nuū ní yindūji ya, te tu cájini yō ndé nuū ní cachune de ya, achí ña.

³ Te ni quendacoo Pedro jíin inga tēe scuáha ún, cuácondēhé de yaū ndīyi.

⁴ Te cájimu tayí ndindúu de. Te inga tēe scuáha ún, nihin ga ni jinu de vēsú Pedro. Te xīhna gá de ni jinū yaū ndīyi.

⁵ Te ni scáyí de máá de, te ni jito nihni de ini yaū. Te ni jito de jeē tira sahma un cáyūcu máá na. Te tu ní quiví de.

⁶ Te sáa te ni jinū Simón Pedro jeē ndiquín jnāhan de vēji de jíin inga tēe ún. Te ni quiví de nuū ní yindūji Jesús. Te suni ni jito de jeē tira sahma cáyūcu máá na.

⁷ Te ni jito de sahma jeē ní ñūsúcun xíní Jesús, tu cájú jíin tira sahma, chi ni natuu te cájú sūn.

⁸ Yūcuán na te suni ni quiví inga tēe scuáha jeē ní jíin xīhna gá nuū ní yindūji ya. Te ni jito de ndese iyó, te ni candije de jeē ní natecu yā.

⁹ Chi nde ná tu jinūcoo de yaū ndīyi, te tu ní jécūhun ni de jnūhun cáhān tutu ìi, jeē jíin ñúhún natecu yā núu je ní jihí yā.

¹⁰ Yūcuán na te ndindúu tēe cáscuáha ún cuanungoo de vehe de.

Jeē ní nane ya nuū María ñuu Magdala

(Mr. 16.9-11)

¹¹ Te María índichi ña ndáhyú ña nuū ní yindūji ya. Te níni ndáhyú ña, te ni scáyí ña máá ña, ni jito nihni ña ini yaū ún.

¹² Te ni jito ña uū ndajéhé andiví, cáñuhun ya sahma cuijín. Te ìin ya néne ichi xíní, te inga ya néne ichi núu jehé nuū ní cátu yiqui cúñu Jesús.

¹³ Te ni cacahān yā jíin ña:

¿Najehē ndahyú rō?

Te ni cahān ña:

Ni catava de Jitoho ná, te tu jíin na ndé nuū ní cachune de ya.

¹⁴ Te jeē ní cahān ña súcuan, te ni ndíó cóto ña, te ni jito ña nuū Jesús jeē índichi yā yūcuán. Te tu ní nácuti ña jeē máá yá cúu.

¹⁵ Te ni cahān yā jíin ña:

¿Najehē ndahyú rō? ¿Ndé ìin nánducú rō? achí yá.

Te máá ña jéni ni ña jeē tēe ndíto huerto cúu ya. Te ni cahān ña jíin yá:

Núu máá ní ni quenehen ní yá, te cachi ní ndé nuú ní jéchine ní yá, te na quínuquihin ná yá, achí ña.

¹⁶ Te ni cahān Jesús jíin ña:

María, achí yá.

Te jeé ni cáhān yā súcuan, te ni nacuni ña ya, te ni ndió cóto ña, te ni cahān ña jíin yuhu hebreo:

Raboni, achí ña. Te jnūhun un cúní cahān, Maestro.

¹⁷ Te ni cahān Jesús jíin ña:

Ma quehé ró rúhū, chí ná tu ndaa ri quinuuhun ri nuú Tatá rí. Te cuáhān núu táca hermano rí, tēe ni cascuáha jíin rí, te cachi ró nuú de jeé ndaa ri quinuuhun ri nuú Tatá rí, jeé suni Tátá maá ró jíin náhan ró cúu. Te cúu ya Yāā Dios maá rí jíin Yāā Dios maá ró jíin náhan ró. Achí yá.

¹⁸ Yūcuán na te María ñuu Magdala un, cuáhān ña, te ni castūhūn ña nuú tēe cáscuáha un jéé ní jito ña nuú maá Jítoho yō jíin jéé ní cahān yā jnūhun yáha jíin ña.

Jeé ní nane ya nuú tēe cáscuáha jíin yá

(Mt. 28.16-20; Mr. 16.14-18; Lc. 24.36-49)

¹⁹ Te jeé ní cuaa máá quívī domingo un, te cáhīin tútu tēe cáscuáha ún iní ñin vehe. Te cándihyū yehyí, chí cáyūhú de jnāhan de hebreo jeé coto xeēn i de. Te ni quee-ni Jesús, ní jecuiñī yā mēhñú de vēsū ndihyū yehyí, te ni cahān yā jíin de:

Ndeyí sñ coo ní ró jíin náhan ró, achí yá.

²⁰ Te ná ní cahān yā súcuan, te ni steén yā ndaha ya jíin xiin ya nuú de. Te ni cacusñ ní tēe cáscuáha un jéé ní cajito de nuú maá Jítoho yō.

²¹ Yūcuán na te ni cahān tucu Jesús:

Ndeyí sñ coo ní ró jíin náhan ró. Te nájnūhun ní tají Tátá rí ruhū iní ñayiví, suni súcuan tájí rí rohó nacani ró jnūhun ri nuú ñayuu. Achí yá.

²² Yūcuán na te ni tīvi tachí yā nuú de jíin náhan de. Te ni cahān yā:

Vijna te ni canihñ rō Espírītu Santo.

²³ Te táca ñayuu jeé cone cáhnu ní ró nuú cuéchi i, núu súcuan te coo jnūhun cáhnu ní nuú cuéchi i. Te núu tú cone cáhnu ní ró nuú cuéchi i, te ma cóo jnūhun cáhnu ní nuú cuéchi i. Achí yá.

Jeé ní nane ya nuú Tomás

²⁴ Te Tomás, tēe ni cacu cuatí, ñin jnāhan jeé uxí uū tēe cáscuáha jíin yá, tu ní ñe de quívī jeé ní nane Jesús nuú táca gá tēe cáscuáha.

²⁵ Yūcuán na te sava ga tēe cáscuáha un, ní cacahān de jíin Tomás:

Ni cajito ri nuú maá Jítoho yō.

Te ni cahān Tomás:

Núu tú coto ri nuú ní túji ndaha ya ní sáha ndūyu cāa, te núu tú chune ri xinī ndáha ri nuú ní ñe ndūyu cāa, te núu tú chune ri ndaha ri xiin ya, te ma candíje cuiti rí, achí de.

²⁶ Te nuú uná quívī, te tēe cáscuáha un cáhīin tútu tucu de iní ñin vehe. Te ñe Tomás jíin de. Yūcuán na te ni quee-ni tucu Jesús, ní jecuiñī yā mēhñú de, vēsū cándihyū yehyí. Te ni cahān yā jíin de:

Ndeyí sñ coo ní ró jíin náhan ró.

²⁷ Te ni cahān-ni ya jíin Tomás:

Chune xinī ndáha ró iní ndaha ri yāhā te coto ró. Te scáā ndaha ró, te chune ró xiin ri nuú ní tújī. Te ma cáni siquí gá ní ró, chí sa suhva na cándíje ró.

²⁸ Yūcuán na te ni cahān Tomás jíin yá:

Aí, Jítoho maá ná jíin Yāā Dios maá ná cúu ní, achí de.

²⁹ Te ni cahān Jesús jíin de:

Tomás, nde ní jito ró núu rí, te ni candíje ró. Te yōhyo ndetū táca ñayuu jeé candíje ruhū vēsū tu ní jito i nuú rí, achí yá.

Najehē ni tee Juan libro yáha

³⁰ Te suni ní sáha Jesús cuehē gā jniñū jēhnu jeé ní steén yā poder yā nuú tēe cáscuáha jíin yá, jeé tu yósó núu tútu yáha.

³¹ Te táca jniñū yáha ní tee ri návāha candíje ró jíin náhan ró jéé Jesús cúu Cristo, maá Séhe Yāā Dios. Chí jeé candíje ró yá, te cotecu ró ní cáni sáha ya.

Jeé ní nane ya nuú uxá tēe cáscuáha jíin yá

21

¹ Te ní cuu jecu quívī, te inga jínu ní nane Jesús nuú tēe cáscuáha jíin yá, jeé cáhīin de yumar Tiberias. Te suhva ní steén yā maá yá nuú de:

² Cáhīin tútu Simón Pedro, jíin Tomás, tēe ni cacu cuatí, jíin Natanael, tēe ñuu Caná ndañúú Galilea, jíin ndāndúú séhe Zebedeo, jíin úū gā tēe cáscuáha.

³ Te ni cahān Simón Pedro jíin de jíin náhan de:

Quíjnñi ri chācá.

Te ni cacahān de:

Suní quingoo ri jíin ró.

⁴ Te cuangoo de, te ní quívīcoo de ñin barco. Te tu ní cáhīin cuiti de tí jecuaá yūcuan.

⁵ Te jeé cuácundijin, te ñe Jesús yumar. Te tēe cáscuáha ún, tu ní cánacuni de jeé maá yá cúu.

⁶ Yūcuán na te ni cahān yā jíin de:

Aá ró jíin náhan ró, zá ní canihñ rō chācá caji yō?

Te ni cacahān de:

Tú cuiti, achí de.

⁷ Yūcuán na te ni cahān yā jíin de:

Singava ñunu ró ichi lado váha barco, te nihñ rō tī.

Te ní cásingava de ñunu, te tuá ní cúu cuiti natava de, jeé ní quívīcoo cuehē ndasí chācá.

⁸ Yūcuán na te tēe scuaáha jeé maní gā Jesús jíin, ní cahān de jíin Pedro:

Máá Jítoho yō cúu, achí de.

Te jeē ní jini sōho Simón Pedro jeē maá Jítóho yō cúu, te ni nachuhun de sahma de, chí ni tava de jeē sájniñu de. Te ni ndava-ni de nuū mar cuahān de nuū yā.

⁸ Te tāca gá tēe cáscuáha ún, vendicoo de jín barco yundúte, cástaa de ñunu ñúhun chítú cháca. Chí tu jícá cáhīn de jín ñuhun íchi, chí nájñuhun ciento-ni metro cúu.

⁹ Te nuū ní quendacoo de ini barco, te ni cajito de jeē nduhvá tícuca ñuhūn, te íne staā jín ñn chācá chíhyó.

¹⁰ Te ni cahān Jesús jín de:

Cuáquihin jecu chācá jéé sa ní cajñi ró, na táu yó, achí yá.

¹¹ Te ni quiví Simón Pedro ini barco, te ni staa de ñunu, ni quee de jín ndé nuū ñúhun íchi. Te ñuhun chítú cháca nāhnu, ñn ciento uū xico uxí uní tí cúu. Te vēsú ñn súcuan tí ñuhun, te tu ní táhndé ñunu.

¹² Te ni cahān Jesús jín de:

Nehen jijnáhan ró na cási ni yó.

Te ni ñn tēe cáscuáha ún tu ní cundeyí ni de cajñuhún de ya núu ndé ñn cúu ya. Chí je cájini de jeē maá Jítóho yō cúu ya.

¹³ Te ni quindehe Jesús yuñúhún, te ni quihin ya staā ún, te ni jēhe ya nuū de, te suní súcuan chācá un.

¹⁴ Yáha cúu vuelta uní jeē ní nane Jesús nuū tēe cáscuáha jín yá, ná ni natecu yá.

Jeē ní ndajñuhún Jesús jín Simón Pedro

¹⁵ Te nuū ní cuu ni cajesi ni de, te Jesús ni cajñuhún yá Simón Pedro:

Simón sēhe Jonás, zá mánī gā rō jín rí vēsú tāca gá tēe yáha?

Te ni cahān de:

Je jíní ní jéé maní na jín ní, achí de.

Te ni cahān yā jín de:

Núu súcuan te stéén rō jñuhun ri nuū ñáyuu cácuu nájñuhun londe ri.

¹⁶ Te ni cajñuhún yá de vuelta uní:

Simón sēhe Jonás, zá mánī rō jín rí?

Te ni cahān de jín yá:

Je jíní ní jéé maní na jín ní, achí de.

Te ni cahān yā:

Condito ró ñáyuu cácuu nájñuhun lanchi ri núu súcuan.

¹⁷ Te ni cajñuhún tucu ya de vuelta uní:

Simón sēhe Jonás, zá mánī rō jín rí?

Te ni cucuíhyá ní Pedro jeē ní cajñuhún yá de vuelta uní núu maní de jín yá. Te ni cahān de:

Máá ní jini ní ndíhi, te jíní ní jéé maní na jín ní.

Te ni cahān yā:

Núu súcuan te stéén rō jñuhun ri nuū ñáyuu cácuu nájñuhun lanchi ri.

¹⁸ Te jendaá cahán rī jín ró jeē nde ná suchí ró, te ni quihin máá ró sahma ró, te ni jica ró ndé nuū cuní maá ró. Te núu na yí ró, te nasúu jéé cuní maá ró, chí inga ñayu

quindēca i róhó nuū tu cuní rō quihīn rō. Te scáá rō ndíndúú ndaha ró jéé cuu rō.

¹⁹ Jñuhun yáha ní cahān yā jeē ní stéén yā jeē cóndita caa de jicā cruz cuu de, te jeē súcuan cuatáhú de cúu jeē steén de jeē yóhyo cújéhnu Yaa Dios. Yūcuán na te ni cahān gā yā:

Condiquín rō ruhū jeē sáha ró jniñu ní ndacu ri nuū rō, achí yá.

Jñuhun tēe scuáha jeē maní gā yā jín

²⁰ Te ni ndió cóto Pedro, te ni jito de tēe scuáha jeē maní gā Jesús jín, ndíquín de vēji de yatā. Tēe un cúu jeē ní conene xiin Jesús ná ni cacuxíni de jín yá, te ni cajñuhún de ya: ¿Ndé ñn de cúu jeē nastúu nihín?

²¹ Te jeē ní jito Pedro nuū tēe ún, te ni cajñuhún de Jesús:

Te tēe yáha, ¿ndese coo jín de?

²² Te ni cahān Jesús:

Núu cuní rī jeē cótecu de nde quiví ndíji ri, ¿te naun ndíhví ni rō? Máá ró chí condiquín rō ruhū jeē sáha ró jniñu ní ndacu ri nuū rō, achí yá.

²³ Yūcuán na te jñuhun yáha ní jitē núu nuū táca hermano, jeē tēe scuáha un má cúu de. Te tu ní cahán Jesús jeē ma cúu de, chí sa suhva ni cahān yā: Núu cuní rī jeē cótecu de nde quiví ndíji ri, ¿te naun ndíhví ni rō?

²⁴ Te tēe scuáha un jéé maní gā Jesús jín, suu cúu ruhū jeē nácani jñuhun táca jniñu yáha, te suu ri tēe táca jñuhun yáha. Te cájini rō jijnáhan ró jéé iyó ndáá jñuhun nácani rī.

²⁵ Te suní iyó cuéhē ndasí gá jniñu ní sáha Jesús. Te núu tee yó ná ñn ná ñn, te ma cánda ní ñáyiví cuhun tutu jeē cóso jñuhun ún, jení ní rī. Te ni cuu. Amén.

JINIŪ JEHNU JEE NI CASAHA TEE APOSTOL

Jeē ni jéjnūhun ya quiji Espiritu Santo

¹ Amigo Teófilo, nuū tūtu jeē ní tee ná xihna gā ni castūhun ná nuū ni táca jniñu ní sáha Jesús, jín táca jnūhun ní steén yā nde quiví ní quejéé yá ní sáha ya

² te nde quiví ní ndaa ya cuanuhun yā andiví. Te nde ná tu ndaa ya quihīn yā, te ní sáha Espiritu Santo jeē ní ndacu ya jniñu nuū táca apóstol, tēe ní nacāji ya.

³ Te nuū ní jínu ní ndoho ya jeē ní jihī yā, te uū xico quiví te tijni jínu ní steén ndijin yā maá yá nuū tēe un jijnáhan de, te súcuan ní cajini de jeē iyó ndaa jeē ní natecu yā. Te ní cahān yā jín de siquī ndese ndácu Yāā Dios jniñu.

⁴ Te ná cáhīn tūtú de jín yá, te ní cahān yā jín ndihī de jeē ma quéndaco de ini űuu Jerusalén, chí áchí yá:

Condetu ró ndé quee Espiritu Santo jeē ní jéjnūhun maá Tátá rī Yāā Dios. Chi je ní cachi rī nuū ró jeē ní jéjnūhun ya quiji Espiritu Santo.

⁵ Chi Juan, jendaá jeē maá ndute-ni ní scuánde de űayuu. Te róhó jijnáhan ró, jecu na quiví te nájñūhun cuandute ró jín Espiritu Santo, cúu jeē condee yā ini anuá rō, achí yá.

Jeē ní ndaa Jesús cuanuhun yā andiví

⁶ Yūcuán na te tēe cáhīn tūtú jín yá, ní cacajñūhún de ya:

¿A vijna te nasáha ní jéē űayuu űuu yō Israel ndujéhu ní ndacu ní jniñu nuū nación yō chí naún? áchí de.

⁷ Te ní cahān yā:

Ma cúu cuní rō quiví chí cuiyá jeē cóo jeē ní sándaá maá Tátá rī, chí maá ĩn-ni maá yá jini yā na quiví sáha ya.

⁸ Te jeē cuní rō cúu jeē quee Espiritu Santo te condee yā ini anuá rō jijnáhan ró. Yūcuán na te nihīn rō poder te nacani ró jñūhun rí ní ini űuu Jerusalén, ní Judea, ní Samaria, nde ní cáhnu űayiví, áchí yá jín de.

⁹ Te ní ndihī ní cahān yā táca jñūhun yáha. Te ní ní cájito de nuū yā, te ní ndaa-ni ya cuanuhun yā andiví. Te ní quee vicó ní jesí-ni nuū cuahān yā, te tuá ní cájito de ya.

¹⁰ Te ní ní cáhīn de cájito ndaa de ichi ándiví núu ní ndaa ya cuahān yā, te uū jnáhan ndajéhé yā cáñūhun ya sahna cuijín ní cajecuiñi yā xiin de jijnáhan de, te cájito ya nájñūhun tēe.

¹¹ Te ní cacahān yā jín de:

Róhó tēe Galilea, ¿nájehé cájito ndaa ró ichi ándiví? Chí maá Yāā Dios ní naquihin ya Jesús cuanuhun yā andiví, te suni súcuan

ndiji ya nájñūhun cájito ró cuahān yā andiví, áchí yá.

Jeē ní canacāji de Matías jeē nucuñi de nuū Judas

¹² Yūcuán na te ní nanungoo de yucu jeē nani Olivos, cuanungoo de űuu Jerusalén. Te yajni-ni ĩne yucu un jín űuu Jerusalén, nájñūhun ĩn kilómetro-ni, cūha jeē ní jéhe ley permiso caca űayuu quiví ndetátú.

¹³ Te ní ndāvicoo de ini űuu. Te ní ndacoo de cuarto xini véhe nuū cáyūcu núu de. Te táca de cúu Pedro, Jacobo, Juan, Andrés, Felipe, Tomás, Bartolomé, Mateo, Jacobo sēhe Alfeo, Simón jeē cúu jnáhan grupo cananista, jín Judas űani Jacobo.

¹⁴ Táca tēe yáha, ní ní cándutútú inuú de cájicān tahu de jín táca űani Jesús jín náná yā María jín sava ga űahan.

¹⁵ Te ĩn quiví te ní jecondichi Pedro nuū táca hermano cácandije. Te cáhīn nájñūhun ciento ocó űayuu. Te ní cahān de:

¹⁶ Hermano jijnáhan ní, ní squicu nahín jñūhun cáhān tutu ĩi jeē ní cáhān David nde jenahān ní sáha Espiritu Santo. Te jñūhun un ní cuu siquī Judas jeē ní yosnúu núu tēe ní cajni jitoho yō Jesús.

¹⁷ Te suu tēe un ní jica de jín yó, te ní chindéé űahān jnáhan de jín yó siquī jniñu ní jeni ya yohó.

¹⁸ Te ní cajeen ĩn űuhun jín xūhun ní nihīn tēe un siquī jniñu neé ní sáha de. Te ní ninga ndeyi de, te ní ndatá sáva chíji de, te ndihī yiti de ní jité.

¹⁹ Te ní jité jñūhun yáha núu táca űayuu cáyūcú űuu Jerusalén, te jeē yúcuan cúu jeē ní casnání ní űuhun ún Acéldama nuū yūhu maá i, jeē cuní cahān űuhun jeē cúu cuenta niñi.

²⁰ Chí súcuan je yósó núu tūtu Salmo siquī Judas:

Vehe de na quéndoo iyú,

te ma cóndee ní ĩn ga űayuu ini vehe ún.

Te suni cáhan:

Jniñu ní condiso de na cóndiso inga tēe.

Achí.

²¹ Núu súcuan te jini űūhún jéē nucuñi ĩn tēe lugar maá de jín yó. Te tēe nucuñi jín yó un, nacāji yó de mēñū táca tēe ní cajica jín yó táca quiví jeē ní jica maá Jítoho yō Jesús jín yó.

²² Te tēe nacāji yó un cúu tēe jeē ní ĩyo de jín yó nde quiví ní jendute ya ní sáha Juan, te nde quiví ní ndaa ya cuanuhun yā andiví. Te tēe nucuñi jín yó na cúu de testigo jín yó jeē jé ní natecu yā, achí de.

²³ Te ní catee nuū de uū jnáhan tēe: Matías jín José jeē nani de Barsabás te suni nani de Justo.

²⁴ Te ní cajicān tahu de:

Tátá Yāā Dios, maá ní chí jini ní ndese cáa ánuá táca űayuu. Núu súcuan te jeē ndindúu

tée yáha, steén ni ndé ìn de cúu jeē ní nacáji ní.

²⁵ Te condiso jníñu de cuu de apóstol. Te naquihin de jniñu ní stóo Judas, chí ni sáha de cuēchi te cuahān de lugar xeēn nuū cánuu quíhñ de, áchí de.

²⁶ Yūcuán na te ni casáha de ìn sorteo te ni jinū Matías, te ni nucuiñi de ni nduu de jnāhan ndihúxi ìn apóstol.

Jeē ní quee Espiritu Santo

2

¹ Te máa quívi víco Pentecostés ni cahīn tūtú ñayuu cácanđije ñuu Jerusalén.

² Te sanaa-ni te ni quejéé nihñ vēji nde andiví nájñuhun tachí nihñ quée, te táca ñayuu jeē cáyūcú ìni vehe un ní cajini sōho i jeē nihñ ún.

³ Te ni cajito i nájñuhun yáñuhñ jeē ní cajitē núu te ni cacucōo xiní ná ìn ná ìn i.

⁴ Te ndihí i, ni cunuú Espiritu Santo jíin i, te ni quejéé i cácahān i sññ sññ yuhu, ndese ni steén máa Espiritu nuū ná ìn ná ìn i cahān i.

⁵ Te ñuu Jerusalén, suni cáhīn ñayuu hebreo, yíñuhñ nuū Yáa Dios, jeē ní quijicoo i nde táca naciōn ní cáhnu ñayiví.

⁶ Te jeē ni nihñ súcuan te ni cacutútú cuéhē ñayuu ún. Te ni cunéé í ni i jñnāhan i, chí ná ìn ná ìn i ni cajini sōho i jeē tēe ni canihñ Espiritu Santo cácahān de jññuhun yuhu ñúú jicá nuū véji i.

⁷ Te ni canaa ni i cájito i te ni cacahān i:

¿A násūu tēe Galilea cácuu táca tēe yáha jeē cácahān de táca yuhu ñúú nuū véjicoo yó?

⁸ ¿Na vé ni cuu yáha núu súcuan? Chí ná ìn ná ìn yó cajini sōho yó cácahān de jññuhun yuhu ñúú nuū ní cacacu yó.

⁹ Chí véjicoo yó ndé táca ñuu jicá. Sava yó véji nde Partia jíin Media jíin Elam. Te sava ga yó véji yó ndé Mesopotamia jíin Judea jíin Capadocia jíin Ponto jíin Asia.

¹⁰ Suni nde Frigia jíin Panfilia jíin Egipto jíin tjini ñuu jeē ìne nde yatā gā ñuu Cirene ñuhun Africa véjicoo yó. Te sava ga yó nde ñuu Roma véjicoo yó, te cáyūcú jinu-ni yó yáha. Te máa yó jeē véjicoo ñuu Roma, sava yó cácuu máa ñayuu hebreo te sava ga yó cácuu ñayuu sññ ñuu, ni cacandije yó ndíquin yó ley ñayuu hebreo.

¹¹ Suni nde Creta jíin Arabia véjicoo sava yó. Te cajini sōho yó jeē jíin jññuhun yuhu ñúú ná ìn ná ìn máa yó cácahān de táca jniñu jéhu ní sáha Yáa Dios, achí i.

¹² Te ndihí i chí ni canaa ì ni i cájini nahñ i. Te ni candajñuhñ i jíin jnāhan i:

¿Na vé cúu jeē ní cuu núu súcuan jee cácahān de yuhu ñúú yó? achí i.

¹³ Te sava i ni cacahān catá i. Tuú chí jeē cánajñi de, áchí i.

Jeē ní nacani Pedro jññuhun nuū ñayuu

¹⁴ Yūcuán na te ni candocuiñi Pedro jíin ndihúxi ìn ga apóstol, te ni cahān jee Pedro jíin ñayuu ún:

Nihñ jnāhan ñuu yō hebreo, jíin ndihí nihñ jéé cáyūcú ní Jerusalén, jññuhun yáha na chūhun ni ni jñnāhan ní, chí cuni nahñ ní cahān na jíin ní.

¹⁵ Chí máa ná jijnāhan ná, nasūu jéé cájini ná nájñuhun cájeni ni ní, chí sáa cahññ jenéhen cúu, te nasūu hora cánajñi ñayuu cúu.

¹⁶ Chí sa suhva squícu jniñu yáha nájñuhun ni cahān Joel, tēe ní nacani jññuhun Yáa Dios nde jenahán, chí súcuan ni cahān de:

¹⁷ Achí Yáa Dios: Quívi sándihí na te tají rí Espiritu rí cunuú yá jíin táca ñayuu, te sēhe yí ró jíin sēhe síhí ró, nacani i jññuhun rí,

te táca tēe lulí chí coto ndijin de jeē steén rí nuū de,

te táca tēe jéhu chí sáha rí jeē scóto jēni de.

¹⁸ Te quívi ún chí tají rí Espiritu rí cunuú yá jíin táca mozo rí, cúu tēe cúu ñahan, te nacani i jññuhun rí.

¹⁹ Te ichí ándiví sáha rí jniñu jéhu jeē náa ni ñayuu coto i,

te sáha rí jniñu jéhu ìni ñayiví jéé steén jeē cujéhu rí,

chí coo niñi jíin ñuhñ jíin ñuhmā nájñuhun vicō.

Yūcuán cúu jeē sáha rí jeē cóo jññūdóho xeēn.

²⁰ Te nduu jnúú níandii te ma cūndijin gā, te yoō coto cuéhé nájñuhun niñi. Yūcuán na te quee quívi jeē ndiji máa Jítoho ró Jesús.

Quívi ún coo cuéhé jniñu jéhu, te cuni ndihí ñayuu jeē quívi máa Jítoho ró cúu.

²¹ Te táca ñayuu jeē cahān ndahú i jíin yá te jnama ya i, áchí Yáa Dios.

Achí Joel ní nacani de jññuhun ya.

²² Jeē yúcuán nihñ tēe ñuu yō Israel, cuni nahñ gā ní jññuhun yáha jijnāhan ní. Ni steén Yáa Dios jeē ní tají yá máa Jesús, Yáa ní jéhu ñuu Nazaret, chí máa Yáa Dios ní jéhe ya jeē ní sáha Jesús jniñu jéhu mēhñu máa ní, jíin jniñu jeē steén jeē cujéhu ya, te jniñu un ní canaa ni ní ní cajito ní. Te je cajini vāha ní jéé súcuan ní cuu.

²³ Te máa ní ní cajññi yá, te ni cajendēca ní yá nuū tēe xeēn ní cajehni de ya jicā cruz ní casáha ní. Te nde jíin tiempo je ni jini Yáa Dios jeē súcuan sáha ní jijnāhan ní, chí súcuan je ni sándaā yā.

²⁴ Te ni nastēcu Yáa Dios Jesús te tuá ní cúu ya ndiyi, chí jññuhun xeēn jeē jihí ñayuu, tuá na vé cúu ga sáha jíin yá.

²⁵ Chí nde jenahán suhva ni tee David jññuhun ndese ní cahān Jesús jíin Yáa Dios: Jíini na nuū máa ní jeē cúu ní Jítoho ná, chí ní cáni ndéé ní jíin ná, chí ndéé ní ichi ndávāha ná, cúu jeē chindéé ñahān ní sāna návāha coo ndeyi ní ná.

26 Jeē yúcuau cúsī ni ná te cáhán na jnúhun sī ni.

Jeē yúcuau ma nácani uhū ni na síquī jnúhun cuu ná.

27 Chi ma cuáha ni jnúhun quendōo ánuá na lugar nuū cáyūcu ánuá ndāyi, ni ma cuáha ni jnúhun tehyū ná, chi jéjníñu ná núu ni te manī ni jíin ná.

28 Te ni steén ni núu na jéē nátecu ná, te sáha ní jéē cusī teyí ni ná condee na jíin ní níí cáni.

Achí Jesús, ni achi David.

29 Tāca níhín jíináhan ní, na cástūhun cáji ná nuū ni jnúhun jíi yō David, chi tu ní cáhán de jnúhun yáha síquī maá de. Chi ní jihí de te ní quindūji de, te jíiní yō nuū yindūji de nde vijina.

30 Chi ni cuu de tēe ni nacani jnúhun Yaā Dios nde jenahán. Te ni jini de jeē váha ni jejnūhun ya nuū de jeē chíji yucūn maá de quiji Cristo, te condee yā mesa de ndacu ya jniñu nájñūhun ni ndacu de jniñu jeē ní cuu de rey.

31 Te nde jíin tiempo ni jini de jeē nátecu Cristo, te ni cahán de jeē anuá yā, ma ndóo lugar nuū cáyūcu ánuá ndāyi, ni yiqui cúñu yā ma tehyú.

32 Chi Yaā Dios ni nastécu yā Jesús, te maá ná cácuu ná testigo jeē ní natecu yā.

33 Te ni ndujéñu tucu ya ni sáha Yaā Dios jíin poder yā. Te nde nuū maá Yaā Dios, Yaā cúu Tátá yā, ni nihín Jesús Espíritu Santo, chi súcuau ni jejnūhun ya. Te ni tají Jesús Espíritu Santo, te suu ya sáha jniñu jeē cájito ní te cájini sōho ní vijina.

34 Te David, nasūu síquī maá de ní cáhán de táca jnúhun yáha, chi tu ní ndáa yiqui cúñu de andiví. Chí síquī Cristo cúu jeē ní cáhán de suhva:

Maá Yaā Dios ni cahán yā jíin Jítoho rī Cristo: Cucōo ró ichi ndávaha ri jeē steén jeē cujéñu ró.

35 Te na sáha ri jeē quende rō poder táca jéē cájito uhū rohó, áchí yā.

Achí David.

36 Núu súcuau te ndihí ní jéē cácuu yō ñayuu Israel, na cúni váha ní jéē vésū ní cajehni ní yá jíicā cruz, te Yaā Dios ní jeni ya maá Jesús jeē cúu ya Jítoho yō te suni cúu ya Cristo, Yaā jnáma yóhó, áchí Pedro jíin í.

37 Te jeē súcuau ni cajini sōho i jnúhun yáha, te ni cajnahuhū ni anuá í. Te ni cacajñūhūn i Pedro jíin táca gá apóstol:

¿Te ndese sáha ná jíináhan ná núu súcuau? áchí í.

38 Te ni cahán Pedro jíin í:

Nacani ní ní jéē stóo ní cuéchi ní jíináhan ní, te cuandute ní jéē ní cacandíje ní Jesucristo, návaha cone cáhnu ni Yaā Dios nuū cuéchi ní, te cuáha Yaā Dios Espíritu Santo yā condee yā iní anuá ní.

39 Chí súcuau ni jejnūhun maá Tátá yō Yaā Dios nuū yō jíin núu séhe yó, te suni súcuau ni jejnūhun ya nuū ñáyuu táca gá nacióon, táca í jeē cána ya i candíje í.

40 Te jíin cuéhē gá jnúhun súcuau ni cahán cají Pedro, te ni stihví ní de í:

Nducú ndéyí ní jeē na cácu ní, chí jnahnú ndetú ñayuu casáha jniñu néé, áchí de.

41 Yúcuán na te táca í jeē ní cajetáhú jnúhun ní cahán de, ní cajendute í. Te quiví un ní nducuehē gá ñayuu cácadíje, nájñūhun uní mil gá ñayuu.

42 Te ní cahíin nihín i síquī jnúhun cástéén apóstol. Te inuú-ni cándajñūhun maní i te cájicán tahú í, te in cáhnu-ni cáyeji i pan, nájñūhun ní steén maá Jítoho yō jeē núcūhun ní yō síquí yā.

Ndese ní coyūcu ñáyuu jeē ní cacandíje jeē xlhna ñúhún

43 Te ndihí ñayuu ni cayūhú i ní cajito í, chí cuéhē jniñu jéñu jeē steén jeē cujéñu ya ní casáha tēe apóstol.

44 Te inuú ní cahíyo ni ñayuu cácadíje, te ní cacuu inuú i táca jéē cánevāha í.

45 Te ní caxicó i na-ní na vé cánevāha í, te ní casaja i xūhún un núu táca jnáhan í, núu ndese jíin ñúhún in in í.

46 Te ndijnahan quiví ní candututú i ini templo. Te maní ní cayeji cáhnu i pan táca vehe jnáhan i nájñūhun ní steén yā, te ní cahíyo sī ní í.

47 Te ní cacahán i jeē yóhoyo cújéñu Yaā Dios. Te ndihí ñayuu ñuu un ní cajejnúhún i ñayuu cácadíje. Te ndijnahan quiví ní jnama Jítoho yō sava ga ñayuu, te ní nduu inuú i jíin ñáyuu cácadíje.

Jeē ní nduvāha tēe ríngo

3

1 Te in quiví te maá cáhuni jehíni ní caa Pedro jíin Juan cuango de templo, chí hora un cájicán tahú jnáhan de hebreo.

2 Te cájendēca ñayuu in tēe cáringo nde quiví ní cacu de. Te tēe un ndéé de ndijnahan quiví yehyí templo jeē naní Hermosa, jíicán de caridad nuū táca ñáyuu quívicoo ini templo.

3 Te tēe un ní jito de nuū Pedro jíin Juan jeē véji de quívicoo de ini templo, te ní jíicán de caridad nuū Pedro jíin Juan.

4 Te Pedro jíin Juan ní cajito váha de nuū tēe ún. Te ní cahán Pedro jíin de:

Condēhe núu rī jíináhan rí, áchí de.

5 Te maá tēe un ndétu tūhva de, ní jeni ní de jeē cuáha Pedro jíin Juan jecu xūhun núu de.

6 Te ní cahán Pedro:

Tú na xūhun plata ní xūhun oro cánevāha rí. Te íyó in jeē váha ga sáha rí jíin ró: jíin poder maá Jesucristo, Yaā ní jehnu ñuu

Nazaret, cáhán rī jīn ró, ndocuiñī te caca ró, áchí de.

⁷ Te ni jñi de ndaváha tēe ún, te ni ndonehen de. Te jehē de jīn súcūn jehé de ni nduváha-ni.

⁸ Te ñin ni scánda de máá de ni ndocuiñī de, te ni quejé de jíca de. Te ni quivī de jīn Pedro jīn Juan ini templo, jíca de, cánda de, te nácuatáhú de nuū Yaá Dios.

⁹ Te ni cajini táca ñáyuu jeē jíca de te nácuatáhú de nuū ya.

¹⁰ Te ni canacuni i de jeē maá de cúu tēe ni condee yehyí templo jeē naní Hermosa, ni jicān de caridad. Te ni canaa ni i cajito i, te ni cayuhú i cájito i jeē ni nduváha tēe ún.

Jeē ní nacani Pedro jñuhun ini corredor jeē naní Salomón

¹¹ Te tēe ni nduváha ún, tu siáá de Pedro jīn Juan. Te ni cacutútū-ni cuehē ñáyuu nuū de ini corredor jeē naní Salomón, te ni canaa ni i cájito i.

¹² Te ni jito Pedro jeē ní cutútū ñáyuu ún, te ni cahān de jīn i:

Níhín tēe ñuu yō Israel jijnáhan ní, ¿najehe cánaa ni ni cájito ni jñiñu yáha? ¿Najehe cájito ní nuū ná te cájeni ni ni jéē maá ná jijnáhan ná iyó poder na jéē sáha ná jéē nácaca tēe yáha? ¿Chí ni nduváha de siquī jeē tēe cájica ndaa cácuu ná cájeni ni ní?

¹³ Tuú chi máá Yáa Dios jí yō Abraham jīn Isaac jīn Jacob jīn táca gá jí yō, ni sáha ya jñiñu yáha náváha cuni ñáyuu jeē cujéhnu Sēhe ya Jesús, Yaá jeē ní cajendēca ní nuū tēe cácujeñnu. Te ná ni cuni Pilato jeē siaá de ya, te tu ní cájehe ni jñuhun.

¹⁴ Te ni casquéhichí ni yá vēsú cúu ya Yaá ndaa, Yaá ñi. Te sa suhva ñin tēe jéñni ndiyi ni cacahān ni jīn Pilato jeē na siáá de.

¹⁵ Te ni cacahān ni jéē na cúu Yaá jeē sáha jeē técu ndihi-ni. Te Yaá Dios ni nastécu yá Jesús jeē ní cuu ya ndiyi, te máá ná cácuu testigo jeē ní natecu yá.

¹⁶ Te tēe yáha jéē cájito ní te cánacuni ní de, ni candíje de jīn ná jeē iyó poder Jesús nasáváha ya de, te jeé yúcuu ni nasáváha ya de. Te jeē súcuan ni cacandíje ná ní sáha ya, jeé yúcuu ni nduváha váha de nájñuhun cájito ndihi ní.

¹⁷ Te na cástuhun ná nuū ni jijnáhan ní, je jini na jéē maá ní jijnáhan ní jīn tēe cácujeñnu nuū yō, tu ní cájecuhun ni ní, te jeé yúcuu ní cajehni ni yá.

¹⁸ Te súcuan ní squícu jñuhun ni cahān Yaá Dios nde jenahán jéē cánuú ndoho Cristo siquī cuéchi ñáyuu, chí ni sáha ya jeē súcuan ní cacahān tēe ni canacani jñuhun ya nde jenahán.

¹⁹ Te na nácani ni ni jéē stóo ni cuéchi ní, te nasāma ini ní, te quivícoo ní ndaha Yaá Dios náváha ndahva yá cuéchi ní. Te quee quiví jeē ndúsñi ni ní sáha máá Jitoho yō.

²⁰ Te natají yá Jesús ndiji ya, chí cúu ya Cristo, Yaá ní jeni Yaá Dios jeē jnáma ya yohó.

²¹ Te jini ñuhún jeē cóo ya andiví ndé nasájéé yá táca jéē iyó, nájñuhun ni cacahān tēe ndoo ni canacani jñuhun nde jenahán ní sáha Yaá Dios.

²² Chí suhva ni nacani jí yō Moisés jñuhun nuū táca jí yō: Máá Jitoho yō Yaá Dios cani ya Yaá nacani jñuhun nuū rō jijnáhan ró, nájñuhun ni jeni ya ruhū. Te cuu ya ñin jnáhan ñuu yō. Te na chuhun ni rō táca jñuhun jeē nácani ya ún.

²³ Te núu ndé tēe tú chuhun ni de jñuhun cahān yá, jnahñu ndetū de, te ma cúu ga de jnáhan ñáyuu yá Israel, áchí Moisés.

²⁴ Te táca tēe ni canacani jñuhun nde jenahán, nde tiempo ni quiji Samuel te ní gá nde vijna, suni ni canacani de jñuhun siquī táca jñiñu cúu quiví yáha.

²⁵ Yucūn maá tēe ni canacani jñuhun ya nde jenahán cácuu yó, te suni siquī maá yó jijnáhan yó cúu jeē ní sáha Yaá Dios contrato jīn jí yō. Chí ni cahān yá jīn Abraham: Yucūn maá rō cane Yaá sáha jeē quéndōo ndetū táca ñáyuu ní cáhnu ñayiví, áchí yá.

²⁶ Te jeē ní nastécu Yaá Dios Sēhe ya, te ni quiji ya nuū maá yó xihna gā, náváha quéndōo ndetū yō sáha ya, chí sama ya anuá yō jeē ma sáha ga yō jñiñu neé, áchí Pedro.

Jeē ní cajendēca de Pedro jīn Juan nuū tēe cácujeñnu

4

¹ Te Pedro jīn Juan níni cácahān gā de jīn ñáyuu ún te ni quecoo táca sūtū jīn tēe grupo saduceo, jīn tēe cácujeñnu nuū tēe cándito templo.

² Te yōhyo ni caquiti ní de siquī jeē castéén Pedro jīn Juan nuū ñáyuu, jīn jéē cánacani de jñuhun jeé nátecu ndiyi chí je ní natecu Jesús.

³ Te ni cajini ún de, te ní cachuhun ún de vecāa cone de nde cundijin inga quiví, chí je ní ini.

⁴ Te cuehē ñáyuu jeē ní cajini sōho jñuhun ní cacahān Pedro jīn Juan ní cacandíje i. Te ní nduu nájñuhun uhūn míl jee maá nene tēe jeē ní cacandíje.

⁵ Te jeē ní cundijin inga quiví ún, te tēe cácujeñnu nuū ñáyuu hebreo jīn tēe jéñnu cándiso jñiñu jīn tēe castéén jñuhun tutu ley yá, ní candutútū de ini ñuu Jerusalén.

⁶ Te suni ní candutútū de jīn Anás jeé cúu sūtū cujéñnu ga, jīn Caifás jīn Juan jīn Alejandro jīn táca gá jeé cácuu jnáhan sūtū cujéñnu ga ún.

⁷ Te ni candacu jñiñu jeē na quijicoo Pedro jīn Juan condichi de mēhñū, te ni caca-jñuhun de:

¿Ndé ñin ni tejniñu róhó te ndese ni nihñ jñiñu ró ní sáha ró jéē nduváha tēe yáha? áchí.

⁸ Yūcuán na te Pedro chi ni cunuú maá Espíritu Santo jiín de, te jiín poder yá ni cahān de jiín táca téé ún:

Tāca níhín téé cácujuhnu nuū ñúú yō Israel jiín táca níhín téé jéhu cāndiso jniñu,

⁹ vijna te cástichí ni sáña síquī ñn jniñu váha ní casáha ná jéé ní nduváha téé cúhú yáhá.

¹⁰ Te na cástūhun ná nuū níhín jéé cácujuhnu ní, náváha suni cuni ndihi jnāhan ñuu yō Israel jeé jiín poder maá Jesucristo, Yaā ní jéhu ñuu Nazaret, ni nduváha téé índichi nuū ní yáha. Te suu ya cúu Yaā jeé ní cajehni ní jíca cruz, te ni sáha Yaā Dios jeé ní natecu yá.

¹¹ Jesús cúu nájñūhun yuū cimientu jeé quítuu vehe. Te máá ní jijnáhan ní cácuu nájñūhun téé casáha vehe, te ni casquéhichí ní yá nájñūhun jeé cátejiyo ní yúu, chi tu ní cácañdije ní yá. Te ni sáha Yaā Dios jeé cúu ya nájñūhun yuū cánuú gá jeé quítuu vehe.

¹² Te tú cuiti inga jeé cúu jnama yóhó, chi tuá na inga jeé cujéhu ní jéni Yaā Dios ini ñayivi yáha jéé cúu jnama yóhó, áchí Pedro.

¹³ Yūcuán na te ni cajini un jéé Pedro jiín Juan jéhu-ni cácahān de. Te je cájini jeé tú tūhva de, chi téé súcuān ní cácuu de. Te ni canaa ní cájito nuū de, te ni casáha cuenta jeé ní cajica de jiín Jesús.

¹⁴ Te cándēhe núú téé ni nduváha un, índichi de jiín Pedro jiín Juan, te tu ní cánihīn gá modo ndese ga cahān.

¹⁵ Yūcuán na te ni candacu jniñu jeé na quéndaco sñn de yatá véhe juzgado te nda-jñūhun máá jijnáhan.

¹⁶ Te ni cacahān:

¿Ndese sáha yó jiín téé yáha núu súcuān? Chi ní jitē jñūhun yáha núú táca ñayuu ñuu Jerusalén jeé súcuān ní casáha de ñn jniñu jéhu, te ma cúu cahān yó jeé tu iyó ndáa.

¹⁷ Te náváha ma cuité ga jñūhun yáha, na cúxeēn yó nuū de jeé ma cahān cuiti gá de jñūhun Jesús nuū ní ñn ñayuu, áchí.

¹⁸ Te ni cacana ún de, te ni cacahān níhín jiín de jeé ma cahān cuiti gá de jñūhun Jesús ní ma steén gá de jñūhun un núu ní ñn ñayuu.

¹⁹ Yūcuán na te ni cacahān Pedro jiín Juan: Cani váha ní ní te núu njñahan ní Yaā Dios jeé stóo ná jniñu ní ndacu ya jeé sáha ná te cuandije ná máá na jniñu nándacu ní.

²⁰ Chi ma cúu stóo ná jniñu jeé nácani ná jñūhun ní cajini sóho ná jiín jniñu ní cajito ná, áchí de.

²¹ Yūcuán na te téé ni cacutútú un ní cacuxeēn tucu de nuū Pedro jiín Juan. Te ní casiaá de cuango de, chi tú cuiti na modo stóho de chí cáyūhu cájito ñayuu, chí síquī jniñu jéhu ni cuu ún te ndihi i cácahān i jeé yóhoyo tújéhu Yaā Dios.

²² Chí téé jeé ní sáha ya jniñu jéhu jiín de jeé ní nduváha de, víhyá gá uū xico cuiyá de.

Jeé ní cajicān tahú ñayuu cácañdije

²³ Te ná ni casiaá un Pedro jiín Juan cuango de, te ni najinúcoo de nuū táca gá jnāhan de, te ni cacachi de ndese ni cacahān sutú cácujuhnu jiín téé jéhu cāndiso jniñu.

²⁴ Te jeé ní cajini sóho de jñūhun yūcuān, te inuú-ni ní cajicān tahú de nuū Yaā Dios:

Tátá Yaā Dios jeé cujéhu ní núu ndihi, máá ní cúu Yaā Dios ní sáha andiví jiín ñayivi jiín mar jiín táca ndihi jeé iyó.

²⁵ Te jeé jiín Espíritu Santo te ni sáha ní jéé ni cáhān mozo ní David nde jenahān:

¿Najehē cáquiti ndeváha ni ñayuu sñn nación? ¿Te najehē cájeni sáá ni i jeé ndónnda i síquī ní?

²⁶ Ni cacutútú jéé cácuu rey ñayivi jijnáhan, te téé cácujuhnu ní cacutútú de, te inuú-ni ní candonda de síquī maá ní jeé cúu ní Jitoho ná,

jiín síquī Cristo, Yaā jeé ní jeni ní. Achí David.

²⁷ Te jendaá chí Herodes jiín Poncio Pilato jiín táca téé ñuu yō Israel jiín téé táca gá nación, ni cacutútú de ini ñuu yáha ní candonda de síquī Séhe ñi ní Jesús, Yaā ní jeni ní.

²⁸ Te súcuān ni cuu náváha squícu táca jniñu jeé jiín poder ní ní cundaā ni ní ndé jenahān jéé súcuān coo.

²⁹ Te vijna, Tátá, coto ní ndese cácahān xeēn de nuū na jijnáhan ná, te cuáha ni fuerza ní núu na jéé cácuu ná mozo ní, náváha jéhu-ni nacani ná jñūhun máá ní.

³⁰ Te jiín poder ní nasáváha ni ñayuu cácuhu, te sáha ní jniñu jéhu jeé steén jeé cujéhu ní. Te táca jéé yáha sáha ní jiín poder Séhe ñi ní Jesús, áchí i jijnáhan i.

³¹ Te nuū ní ndihi ní cajicān tahú i, te nuū cáyūcu tútu i un ní sáha ya jeé ní jnáa. Te ndihi i ní cunuú Espíritu Santo jiín i, te ni jéhe ya fuerza te jéhu-ni ní canacani i jñūhun Yaā Dios.

Jeé ní caneváha cáhnu i ndajniñu

³² Te ñayuu cuehē jeé ní cacandije chi inuú cáhīyo ní i jijnáhan i. Te tú ní ñn i ní cáhān jeé ndajniñu jeé névaha máá i cuu máá-ni i, chí táca ndajniñu ní caneváha cáhnu i.

³³ Te níhín cánacani apóstol jñūhun jeé ní cajito de jeé ní natecu Jitoho yō Jesús. Te yóhoyo ní chindéé ñhān yá ñayuu cácañdije.

³⁴ Chí tú cuiti ní ñn i ní ndóho jeé cumani nuū i, chí táca ñayuu cáneváha cuehē ñuhun chí vehe, ni caxícó i sava te ni caquindecā i xūhūn un.

³⁵ Te ní cajéhe i xūhūn un núu téé apóstol, te ni casaja téé apóstol nuū ñayuu cácañdije núu ndese jíni ñūhūn ñn ñn i.

³⁶ Te iyó ñn téé nání José jeé cúu yucūn Leví, ni cacu de Chipre, ñuhun jeé íne sñn nuū ndúte. Te téé apóstol ní casnání de téé ún

Bernabé, jeé cuní cahān: tēe cáhān jñūhun ndeyí ni.

³⁷ Te ni xīcō de ñn ñuhun de, te ndáhá de xūhún un ní jēhe de nuū tēe apóstol.

Siquí cuēchi jeé ní casáha Ananías jín Safira

5

¹ Te suni inga tēe nání Ananías jín ñasihí de Safira, ni caxīcō de ñn ñuhun de.

² Te ní chuvāha de sava xūhún un cuu máá de jín ña, chí súcuan ni candajnūhún de jín ña, te ndáhá de inga sava nájñūhun jeé ndíhi cuu, te ni jēhe de nuū tēe cácuu apóstol.

³ Te ni cahān Pedro:

Ananías, ¿naun ni jēhe ro jñūhun jeé quívi jexeén, jeé cúu Satanás, ini anuá rō te stáhú rō Espiritu Santo cuní rō? Chí jeé ní caxīcō rō ñuhun rō te cuēchi rō cúu jeé tu ní cáchi ndaā rō jeé ní squéndōo rō jecu xūhún un cuajñiñu máá rō, chí ni sáha rō nájñūhun jeé ndíhi xūhun ní jēhe rō.

⁴ ¿Te á násūu cuenta máá rō cúu ñuhun un ndé ná tu xīcō rō? Te ná ni xīcō rō ¿te á násūu cuenta máá rō cúu xūhun jeé cuajñiñu rō ndé nuū cuní máá rō? ¿Te naun ni jeni ni rō jeé stáhú rō súcuan? Te nasūu máni máá tēe cúu jeé jīcu rō stáhú rō, chí suni Yaā Dios, áchi Pedro.

⁵ Te ná ni jini sōho Ananías táca jñūhun yáha, te ni cotúú-ni de ni jīhi de. Te táca ñáyuu ní canihñ jñūhun ún, yōhoyo ni cayūhú i.

⁶ Te ni candocuiñi tēe suchí, te ni cachusúcun de ndíyi un cuáchindūji de.

⁷ Te ni cunúu nájñūhun uní hora. Te ni jinū ñasihí ndíyi un ní quívi ña ini vehe ún, te tú na vé jiní cuiti ña.

⁸ Te Pedro ni cajñūhún de ña:

Cachi nuū rī, ¿á ñn súcuan-ni ni caxīcō rō ñuhun rō chí tuú? áchi de.

Te ni cachi ña:

Suu súcuan-ni ni caxīcō ná, áchi ña.

⁹ Te ni cahān Pedro jín ña:

¿Naun ni casquijnáhan jñūhun rō jēe cóto ndee rō Espiritu Santo maá Jítoho yō? Chí ni nducú rō stáhú rō yā. Cuni nahñ jēe cáhma nanecoo tēe cuachindūji yī rō, te suni súcuan quichindūji de rōhó, áchi de.

¹⁰ Te ni cotúú-ni ña nuū jehé Pedro te ni jīhi-ni ña. Te ni ndívicoo tēe suchí un te ni cajito de jeé jé ni jīhi ña, te ni caquenehen de ña, te ni jechindūji de ña xiin yí ña.

¹¹ Te yōhoyo ni cayūhú ndíviñ ñáyuu cácadnje jín táca gá ñáyuu jeé ní cajini jñūhun jeé súcuan ní cuu.

Cuehē jñiñu jéhu ni casáha apóstol

¹² Te cuehē jñiñu jéhu jeé steén jeé kujéhu Yaā Dios ni casáha tēe apóstol nuū ñáyuu. Te táca ñáyuu cácadnje, inuú-ni cándutútu i ini corredor jeé naní Salomón.

¹³ Te tu ní cáchundeyí ni inga ñáyuu quijnáhan jín i. Te cájejnūhún i ñáyuu cácadnje.

¹⁴ Te ni nducuehē gā i, chí cúu tēe cúu ñahan ni cacandje i máá Jítoho yō.

¹⁵ Te cáquindeca ñáyuu jnáhan i jeé cácuñu, te cájequin i ini calle cácaa i nuū camilla jín nuū yúu, chí cácuñi i vésú ste cuándahū Pedro na yáha siquí i te nduvāha i.

¹⁶ Te suni cuehē ñáyuu táca ñuu cáhīyo yajni yūcuan ní quijicoo i ñuu Jerusalén ni caquindeca i jnáhan i jeé cácuñu jín jēe cándoho tachí, te ndíhi i ni canduvāha i.

Jeé ní cajito xeēn i tēe cácuu apóstol

¹⁷ Yūcuán na te sutū kujéhu ga jín táca gá jnáhan jeé cácadnje sahān saduceo, ni cacucúesún ni jeé siquí tēe cácuu apóstol.

¹⁸ Te ni cajñi de tēe cácuu apóstol ni cachuhun de vecāa.

¹⁹ Te ñn ndajehé máá Jítoho yō ni nune ya yehí vécāa ún jecuáñ, te ni quenehen ya de jijnáhan de. Te ni cahān yá jín de:

²⁰ Cuáhán te cuiñi rō ini templo, te yūcuán nacani cáji rō jñūhun nuū ñáyuu siquí ndese ñihñ tahú i cotecu i ní cáni, áchi ndajehé yā.

²¹ Te ni cajini sōho de jñūhun yáha. Te nuú ní cundijin te nehen ni quívicoo de ini templo, te cástéén de jñūhun ya nuū ñáyuu.

Te níni cástéén de te sutū kujéhu ga jín táca jnáhan de ni canastútú de tēe junta kujéhu ga, jeé cúu ndíhi tēe jéhu cándiso jñiñu nuū ñáyuu nación Israel. Te ni catajé de policía cuaquenehen tēe apóstol ini vecāa.

²² Te nuú ní jínūcōo te tuá gā tēe apóstol. Te ni canandió cóo te ni cacachi:

²³ Jendaá cúu jeé ní cajito ná ndési vāha vecāa, te cáhñ tēe cándito yehí un. Te nuú ní canune ná, te tú cuiti gā tēe un cáhñ ini vecāa ún, áchi de.

²⁴ Te sutū kujéhu ga jín tēe kujéhu nuū tēe cándito templo jín sutū cácuñu, nuú ní cajini sōho de jñūhun yáha, te ni cajeni ni de ndese ga cúu un núu súcuan.

²⁵ Te ni quee-ni ñn tēe te ni cachi:

Tēe jeé ní cachuhun ní vecāa, cáhñ de ini templo, te cástéén de jñūhun nuū ñáyuu, áchi de.

²⁶ Yūcuán na te tēe cácuñu nuú tēe cándito templo, jín tēe cácuu policía de, ni jengoo de, te yúcun ní nacueca de táca tēe apóstol vendicoo de jín, chí cayūhú de jeé sanaa te cuāha ñáyuu yū xiñ de núu sáha xeēn de jín táca tēe apóstol.

²⁷ Te nuú ní najinūcōo de jín tēe apóstol, te ni cajecuiñi de nuú tēe casáha junta. Te sutū kujéhu ga ni cahān:

²⁸ Ni cacahān ñihñ ri jín rō jeé ma steén cuiti gā rō jñūhun tēe nání Jesús. ¿Te naun ni casáha rō jēe ní ndecāva jñūhun un ní ñuu Jerusalén yáhá? Te cácuñi rō stau yáhu rō rúhū jijnáhan ri siquí jeé ni jīhi tēe ún, áchi.

²⁹ Te Pedro jiin táca gá apóstol ni cacahān de:

Cánuú jēē squícu ná jniñu ní ndacu Yaā Dios nuū ná te nasūú jniñu nándacu tēē.

³⁰ Máá Yáā Dios jii yō ni nastēcu yā Jesús, Yaā ni cajehni maá ní jeē ní cata caa ní yá jicā cruz.

³¹ Te ní sáha Yaā Dios jeē ní ndujēhnu tucu Jesús néne ya ichi ndávaha Yaā Dios, te cúu ya Yaā ndácu jniñu, Yaā jnáma ñayuu. Te súcuun ní sáha Yaā Dios návaha yóhó, jēē cácuu yó ñayuu Israel, na nácani ní yó jeē stóo yó cuéchi yó, te cone cáhnu ní yā nuū táca cuéchi yó.

³² Te máá ná ní cajito ná táca jniñu yáha, te suni máá Espíritu Santo steén caji yá jeē súcuun cúu, chí jéhe Yaā Dios Espíritu Santo yā condee ini anuá táca ñayuu jeē cájendetū nuū yā, achí de.

³³ Te ná ní cajini sōho un jñuhun yáha, te yōhyo ní caquiñi ní, te cahni de cácuu nuū.

³⁴ Te mēhñū un jínáhan néne iin tēē grupo fariseo nání de Gamaliel, te cúu de maestro jeē steén ley yā, te táca ñayuu cájejnúhún i de. Te ní ndocuñiñi de, te ní ndacu de jniñu jeē na cújiyo núu tēē apóstol.

³⁵ Te ní cahān de:

Róhó jnáhan ñuu yó Israel, caní vāha ní rō núu na vé cácuu rō sáha ró jiin táca tēē yáha.

³⁶ Chí nucūhūn ní rō jeē iin cuiyā ní ndonda Teudas siquī gobierno, te ní cahān de jeē tēē téyí cúu de, te ní cacutútú nájnūhūn cuūn ciento tēē jiin de. Yūcuán na te ní cajehni ñayuu Teudas, te táca jēē ní caqui-jnáhan jiin de ní cajitē núu cuangoo sáá-ni, te ní jecuiñi-ni jniñu ún.

³⁷ Yūcuán na te quiví ní íyo censo te Judas, iin tēē Galilea, ní ndonda de siquī gobierno, te ní cacutútú cuéhē tēē jiin de. Te suni ní cajehni ñayuu Judas, te táca tēē jeē ní caqui-jnáhan jiin de ní cajitē núu cuangoo.

³⁸ Te vijná na cuáha ní consejo rohó. Ma stáhān gā rō tēē yáha. Siáá de na quíngoo de. Chí núu ñayuu-ni ní squejéé jniñu yáha, te jecuiñi ñi.

³⁹ Te núu Yaā Dios ní squejéé, te ma cúu casi rō, chí sanaa te siquī Yaā Dios cándonda ró, achí de.

⁴⁰ Te ní cachusóhó jēē ní cahān Gamaliel. Te ní canacana tēē cácuu apóstol, te ní canani de jiin cuarta ñi te ní cacahān xeēn jiin de jeē ma cahān gā de jñuhun Jesús, te ní casiáá de cuangoo de.

⁴¹ Te máá apóstol ní quendacoo de nuū junta cuangoo de, cácuñi ní de jeē ní jéhe ya jñuhun ndoho de jeē cuáha ñayuu jñuhun canu de siquī jeē cácdandje de ya.

⁴² Te ndiquiví castéén de jñuhun vāha Jesucristo, te canacani de jñuhun ún ini templo jiin táca-ni vehe.

Jeē ní cajeni de uxā tēē cuajniñu mēhñu ñayuu cácdandje

6

¹ Te ní cucuehē ñayuu cácdandje. Te tiempo un te tēē hebreo jeē cácahan yuhu griego, ní quejéé de cácahñu de nuū jnáhan hebreo de, achí de jeē ñahan viuda jeē cácahan yuhu griego tu cániñi vāha ña staā jeē cácaja de táca quiví cuu ña.

² Yūcuán na te máá ndihúxí uū apóstol ní canastútú de táca ñayuu cácdandje, te ní cacahān de:

Tú vāha jeē jecuiñi jniñu jeē canacani ri jñuhun Yaā Dios siquī jeē cácaja rí staā.

³ Núu súcuun te róhó, hermano, nacāji ró úxā jnáhan máá yó, te na cóndiso jniñu de saja de staā. Te nacāji ró tēē jeē cájejnúhún ñayuu de, tēē ndichí jēē ní cunuú Espíritu Santo jiin de.

⁴ Te ruhū jijnáhan ri, máni cacān tahú rí jiin jēē nácani ri jñuhun ya, achí de.

⁵ Te ndihí ñayuu ní canujnahan ní i jñuhun ní cacahān de. Te ní canacāji i Esteban, tēē cándje vāha jeē ní cunuú Espíritu Santo jiin de. Te suni ní canacāji i Felipe jiin Prócoro jiin Nicanor jiin Timón jiin Parmenas jiin Nicolás. Te Nicolás cúu tēē ñuu Antioquía, te ní nduu de tēē cándje sahān ñayuu hebreo nde ná tu cándje de jñuhun Cristo.

⁶ Te ní cajeni i táca tēē yáha núu tēē cácuu apóstol, te tēē apóstol un ní casoó de ndaha de xini táca tēē un ní cajicān tahú de nuū Yaā Dios siquī jniñu condiso de.

⁷ Te jñuhun Yaā Dios ní jitē gā cuahān, te ní nducuehē teyí ñayuu cácdandje i jñuhun ya ini ñuu Jerusalén. Te suni cuehē sutú ní cacandje de jñuhun ya.

Jeē ní cajni de Esteban

⁸ Te ní chindéé ñáhān yá Esteban ní jéhe ya poder nuū de, te ní sáha de táca jniñu jéhnu nuū ñayuu, jniñu jeē steén jeē cujéhnu Yaā Dios.

⁹ Te ñayuu hebreo jeē ní cacuyāhu i te ní canduu libre i, íyó vehe ñi sinagoga i. Te tēē un cácuu tēē ñuu Cirene jiin tēē ñuu Alejandría jiin tēē Cilicia jiin tēē Asia. Te sava tēē un ní quejéé de cástáhān jnáhan de jiin Esteban.

¹⁰ Te tu ní cácuu deyí jiin de, chí ndichí ní cahān de ní sáha máá Espíritu Santo.

¹¹ Yūcuán na te ní cascáhān sava tēē jeē na cahān jñuhun stáhú siquī Esteban. Te ní cacahān jeē ní cajini sōho cahān ndevāha Esteban siquī Moisés jiin siquī Yaā Dios.

¹² Te jeē súcuun ní cacahān te ní caquiñi ní táca ñayuu jiin tēē jéhnu cándiso jniñu jiin tēē cástéén jñuhun tutu ley yā. Te ndihí de ní candonda siquī Esteban, te ní cajni de cuangoo jiin de nde nuū junta cujéhnu ga.

¹³ Te ni cajeni de tēe cahān jnūhun yáa síquī Esteban, te suhva ni cacahān:

Tēe yáha tu ndé jécuiñī de jeē cahān ndevāha de síquī templo ñi yáha jín síquī ley yā.

¹⁴ Chi ni cajini sōho ná cáhán de jeē Jesús, tēe ni jehnu ñuu Nazaret, canu de templo yáha te nasama de jeē tajnúni ley yā jeē ni jehe Moisés nuū yō, áchí.

¹⁵ Yūcuán na te ndihī tēe cáyūcu núu junta un ní candacoto vāha nuū Esteban, te ni cajini jeē jito nuū de ná jito nuū ñin ndajéhé Yāā Dios.

Jnūhun ni nacani Esteban

7

¹ Te máa sūtū cujéhuu ga ni cajnúhún Esteban:

¿A ndáa jeē súcuán ni sáha ró nájnūhun cácahān de yáhá? áchí.

² Te ni cahān Esteban:

Ndihī nhín jéé cácuu ní jnāhan ñuu yō, jín ndihī nhín jéé cácujeñu ní nuū ñuū yō, cuni nahín ní jnūhun cahān ná: Máa Yāā Dios jeē yōho cujéhuu ya, ni steén yā maá yā nuū jii yō Abraham nde na néne ga de región Mesopotamia, nde ná tu quihín de condee de ñuu Harán.

³ Te ni cahān yā jín de: Stóo ñuu rō jín táca jnāhan ró te quihín rō nuū cuáha ri condee rō, chí máa rí steén ichi nuū quihín rō, achí yá.

⁴ Yūcuán na te ni quenda de región Caldea, te ni jinū de ni condee de ñuu Harán. Te yūcuán ní jihī tatá de. Yūcuán na te ni sáha Yāā Dios jeē ní quee de ñuu yáha nuū cáyūcu yō vijnā.

⁵ Te tu ní jéhe ya ni ñin tíhli ñuhun yáha cuu tahū de. Te vesú súcuán te ni jéjnūhun ya jeē cuáha ya ñuhun un núu de nde jín nuū táca séhe de, vesú ná tu coo séhe de sáá.

⁶ Te súcuán ni cahān Yāā Dios jín de: Séhe ró coyūcu jíca i inga ñuu, te cuñ ciento cuiyā sájniñu sáa-ni i te stóho ñayuu yúcuán i.

⁷ Te síquī jeē súcuán sáha i jín séhe ró, te máa rí chí stóho ri ñayuu ñuu ún. Te sáá te quendacoo séhe ró yúcuán, te nucoyūcú i yáhá chíñúhún i ruhū, achí yá.

⁸ Te ni cahān yā jín Abraham jeē na cúu de circuncidar, jeē cúu ñin jnūni jeē ni sáha ya contrato jín de. Te ná ni cacu séhe de Isaac te ni sáha de circuncidar i nuū uná quivī. Te suni súcuán ni sáha Isaac jín séhe de Jacob, te Jacob jín séhe yí de jeē cácuu ndihúxí uū yucūñ ñayuu Israel.

⁹ Te táca séhe Jacob ni cacucúsún ni de jín ñani maá de José, te ni caxicó de i nuū tēe jeē ní cajendēca i nde nación Egipto. Te Yāā Dios chí ni ndito ya José.

¹⁰ Te ni jnama ya i nuū táca jnúndóho ní jito i, te ni cundichí i ni sáha ya. Te Faraón,

tēe cúu rey nación Egipto, ni cusī ni de jín i ni sáha ya, te ni tejníñu de José jeē cúu de gobernador te ndacu de jniñu nación Egipto jín nuū ñayuu cáyūcú vehe Faraón.

¹¹ Te ni quiji quivī jeē ni íyo ñin jnama xeēn, te ni ndoho ñayuu ní cáhuu nación Egipto jín ndé ñuu Canaán. Te táca jí yō ún, tuá ni cánihín de jeē cáji de.

¹² Te ni nihín Jacob jnūhun jeē iyó trigo nde nación Egipto, te ni tají de séhe de ni jengoo de ni cajeen de trigo vuelta ñin.

¹³ Te jeē cuángoo de vuelta uū te ni nastúu José jeē maá de cúu ñani de jínāhan de. Yūcuán na te ni jini rey Faraón ndé ñin jnāhan cúu José.

¹⁴ Te ni cahān José jín táca ñani de jeē na cóndeca de tátá de Jacob jín ndihī jnāhan vehe de. Te ni iyo uní xico xahūn i.

¹⁵ Te súcuán ni cuu jeē ní jínū Jacob ni condee de nación Egipto nde ni jihī de. Te suni yúcuán ní coyūcu séhe de jeē cácuu jí yō un ndé ni cajihī maá de.

¹⁶ Te ná ni quee quivī jeē ndénehen ya táca yucūn de jeē cáyūcu tátú de nación Egipto, te ni cacondiso de yiqui ndihúxí uū ndiyi jí un jeē ndji ñuu Siquem, te ni cachindūji de ini yaū ndiyi ndeé jíca cáva jeē ní jeen jí yō Abraham nuū táca séhe Hamor ñuu Siquem.

¹⁷ Te nde ná cáyūcu gá de nación Egipto, te cuacuayajni quivī jeē squicu jnūhun ni cahān Yāā Dios jín Abraham jeē quéndacoo séhe de nucoyūcú i ñuu ni jéjnūhun ya nuū i, te ñayuu un ní tahū cuehē i ini nación Egipto.

¹⁸ Yūcuán na te ni nucuiñi inga rey ñuu Egipto jeē tu ní jini de jeē vāha ni sáha ndiyi José.

¹⁹ Te rey un ní stahú de táca jí yō te ni sáha ndevāha de jín i, chí ni sáha fuerza de i jeē ma cóto ga i séhe yiquín i te na cūu.

²⁰ Te tiempo un ní cacu Moisés, te ni cusī ni Yāā Dios jín i. Te uní yoō ni condito sáhi náná i tátá i.

²¹ Te tuá ni cúu condito sáhi de i, te ni cachune de i nuū nanihín séhe sáhi Faraón i, te ni naquihín séhe ña i ni scuéhuu ña i nájnūhun séhe máa ña.

²² Te ni cutūhva Moisés táca jnúhun ndichí ñuu Egipto, te ni cujéhu de jín jnúhun cáhán de jín jniñu sáha de.

²³ Te nuū uú xico cuiyā de te ni jecondéhé de jnāhan de jeē cácuu ñayuu Israel.

²⁴ Te ni jito de nuū ñin tēe nación Egipto jeē sáha ndevāha jín ñin tēe Israel. Te Moisés ni jnama de jnāhan de Israel ún, chí ni jehni de tēe Egipto un. Te súcuán ni ndutahū jeē ni sáha ndevāha jín jnāhan de ún.

²⁵ Te máa Moisés jéni ní de jeē jécūhun ni táca jnāhan de jeē Yāā Dios ni tají yá de jeē jnáma de jnāhan de ún ini nación Egipto nuú, te tu ní cájecūhun cuiti ni jnāhan de ún.

²⁶ Te inga quivī suni ní jito de nuū uū tēe Israel jeē cájejnāhan, te cúní de jeē na jécuiñī.

Te jeē yúcuan ní cahān de jíin: ¿Najehē casáha ndevāha ró jíin jnāhan ró? Chi nájnūhun in ñani-ni cácuu ró, áchí de.

²⁷ Te máá tée cáni tahū jnāhan un ní chundahá de Moisés te ni cahān de: ¿Nde in ni jeni róhó jéē cujéhu ró núu rí te sándaā ró jniñu ri jijnāhan rí?

²⁸ ¿Chí suni cúní ró cahni ró ruhū nájnūhun ni jehni ró tēe Egipto icu chí naún? áchí de jíin Moisés.

²⁹ Te núu ní jini sōho Moisés jnūhun yáha, te ni yūhú de jeē cáhni rey de, te ni jinu de cuahān de inga nación. Te ni condee de ñuu jicá Madián, te yúcuan ní scácu ñasihí de uū sēhe yí de.

³⁰ Te ni jinu uū xico cuiyā jeē néne de yūcuán. Yūcuán na te in ndajéhé Yaā Dios ni quenda ya nuū de nde nuū ñūhun téhé nuū ín yucu súcun Sinaí. Te ni quenda ya nuū de xiní in yucū cuí cáhnu cándahá yáñuhūn, te tu ní cáyú yucū ún.

³¹ Yūcuán na te Moisés ni naa ni de jito de ún, te ni jehēn de nde nuū, návāha coto vāha de. Te ni jini sōho de jeē cahán máá Jítoho yō jíin de:

³² Máá rí cúu Yaā Dios táca jíí ró jenhán, Abraham jíin Isaac jíin Jacob, áchí yá. Te Moisés, quísi i de jeē yūhú de, te jeē yúcuan tuá ni cūndeyí ni de coto de nuū.

³³ Te máá Jítoho yō ni cahān yā jíin de: Quenehen ndijēn ró chí nuū ín ró, ñūhun íí cúu.

³⁴ Je ni jini rí ñayuu máá rí jeē yóhyo cándoho i nación Egipto, te suni jini sōho ri jeē cájnana uhū i, te ni cuun ri vēji ri jeē jnáma ri i jijnāhan i. Núu súcuan te vijna chí tají rí rohó ndicó ró quihñ ró nde nación Egipto, áchí yá jíin de.

³⁵ Te nde ná tu quenda Moisés Egipto, te táca jnāhan de ni casquéhichí i de jeē ní cacahān i jíin de: ¿Nde in ni jeni róhó jéē cujéhu ró núu rí te sándaā ró jniñu rí? ni cacahān i jíin de. Te vēsú súcuan te máá ndajéhé Yaā Dios ni quenda nuū Moisés un jéē cándahá cáyú yucū cuí ún. Te súcuan ni cuu jeē ní natají yá de cuanuhun de nde Egipto jeē ndácu de jniñu nuū i te jnama de i.

³⁶ Te máá Moisés ni sáha de jeē ní quendacoo jnāhan ñuu de ini nación yúcuan, te ni cayāha de Mar Rojo, te ni cajica cuu de ñūhun téhé uū xico cuiyā. Te ní tiempo un ní sáha de cuehē jniñu jéhu jeē steén jeē cujéhu Yaā Dios.

³⁷ Te máá Moisés cúu jeē suhva ni cahān de jnūhun yáha jíin jnāhan ñuu yō Israel: Máá Yáā Dios cani ya Yaā nacani jnūhun nuū ró jijnāhan ró nájnūhun ni jeni ya ruhū. Te cuu ya in jnāhan ñuu yō. Te na chúhun ni ró jnūhun cahān Yaā ún, áchí.

³⁸ Te suni nde ná ni cajica cuu jíí yō nde nuū ñūhun téhé, te ni cahān ndajéhé yā jíin

Moisés xiní yúcu súcun Sinaí, te ni nihñ de jnūhun jeē cahān ndese nihñ tahú yō cotecu yō, te ni nacani de jnūhun un núu táca jíí yō, te ni quendōo jnūhun un núu yō.

³⁹ Te táca jíí yō ún tu ní cácuu de cuandētū de nuū Moisés, chí sa suhva ni cacuni de squéhichí ni de Moisés, te ni cacuni de nandicó de nungoo de Egipto nuú.

⁴⁰ Te ni cacahān de jíin Aarón: Sáha ní tijni yaā na cōsnū núu yō. Chi Moisés, jeē ní quenehen de yóhó Egipto vējicoo yō, tu cájini yō na vé ni ndoho de jeē tú de ndeē jeē cuahān de xiní yucu Sinaí, áchí.

⁴¹ Yūcuán na te ni cajēhe de oro ni cuvāha in becerro oro, te nuū becerro ídolo un ní casocó de quiti, te ni cacusi ni de jíin ídolo ni casáha de nuū.

⁴² Te Yaā Dios ni cujiyo ya cuahān yā, te ni stóo ya de na chíñūhún de nuū táca jéē jito yó ín andiví, nájnūhun yósó núu tútu tēe ni canacani jnūhun Yaā Dios nde jenhán: Ni cahān yā: Róhó ñayuu Israel,

¿á cájeni ni ró jeē nuū ruhū ni casocó ró quiti ná ni cajica cuu ró uū xico cuiyā nde nuū ñūhun téhé?

⁴³ Tuú, chí sa suhva ni cacondiso ró nicho jeē íne ídolo jeē naní Moloc jíin figura quimi jeē naní Renfán, ídolo jeē ní casáha máá ró ní cachíñūhún ró. Jeē yúcuan cúu jeē síaha ri rohó quihñ jicá ró nde yatā ñūu Babilonia, áchí yá.

⁴⁴ Te ni ndacu ya jniñu nuū Moisés jeē na sáha de vehe ñi nuū chíñūhún de ya, nájnūhun cáca jeē ní steén yá nuū de. Te táca jíí yō, nde nuū ñūhun téhé ní canevāha de vehe i un núu ní cachuvāha de tabla yuū jeē yósó jnūhun ley yá.

⁴⁵ Te ní castóo de vehe un núu ndihi sēhe de jeē cúu jíí yō. Te ni quiví Josué jíin jíí yō ini nación yáha, te ni sáha ya jeē ní cacundeyí de jíin táca ñayuu jeē ní cacoyócu yáha ní cajinu i cuangoo i. Te ni quívicoo de táca ñuu i jíin vehe i ún, te ni quendōo nde quiví ní cuu David rey.

⁴⁶ Te ni cusí ni Yaā Dios jíin rey David. Te ni jicān de nuū yá jeē sáha de in vehe i yá nuú, chí máá yá cúu Yaā Dios jíí de Jacob.

⁴⁷ Te ni cuu jeē nde sēhe yí de Salomón ni sáha vehe i yá.

⁴⁸ Te vēsú súcuan ni cuu te Yaā cujéhu téyí, tu ndeē yá máá vehe jeē casáha ñayuu, nájnūhun ni cahān tēe ni nacani jnūhun ya nde jenhán:

⁴⁹ Ni cahān yā:

Andiví cúu nájnūhun mesa nuū ndácu ri jniñu

te ñayiví cúu nájnūhun in nuū yítuu jehē rí. Núu súcuan ¿te ndese cuu sáha ró vehe jeē cóndee rí,

te ndese cuu sáha ró núu ndétātu rí?

⁵⁰ ¿A násūtu máá rí ní sáha ndihi jeē iyó? áchí máá Jítoho yō Yaā Dios.

⁵¹ Te cáhán gā Esteban:

Yōhyo cācunihni ní ní, te tu cācuni ní chusóhó ní, te cācuu ní nájñuhun ñayuu tācá nación jeé tu cājini i jñuhun ya ni tu cācandje i ya. Chi níni cajesí ni nuú Espiritu Santo, te nájñuhun ní casáha jíi yō jehán, suni súcuan casáha ní vijna.

⁵² ¿A ní iyo tēe nācani jñuhun ya nde jehán jeé tu ní sáha ndeváha jíi yō jíin de? Chi jíi yō ní cajehni de tēe ní canacani jñuhun jeé quíji máá Yáa ndaā. Te je ni quíji Yáa ún, te máá ní ní canastúu ni yá nuú tēe ní cajehni de ya.

⁵³ Te vesú nde jíin tāca ndajéhé yā ní jēhe ya ley yā nuú yō, te máá ní chi tu cásquicu ní, áchí Esteban.

Jeé ní cajehni de Esteban

⁵⁴ Tāca jñuhun yáha ní cajini sōho, te yōhyo ní caquítí ni, te cānacayihí yuhu cājito nuú Esteban.

⁵⁵ Te máá Esteban chi ní cunuú Espiritu Santo jíin de. Te ní jito de ichi ándiví, te ní jíni de jeé ndíndēe nuú néne Yáa Dios, te índichi Jesús ichi ndáváha ya.

⁵⁶ Te ní cahān de:

Vijna te jito rí jeé núne ándiví, te jito rí nuú máá Yáa ní nduu tēe, índichi yā nuú cujéhnu ya lado váha Yáa Dios, áchí de.

⁵⁷ Yūcuán na te ní cajesí un sóho, te ní cacana cóhó, te inuú-ni ní candonda siquí Esteban.

⁵⁸ Te ní caquenehen Esteban cuangoo jíin de nde yatā ñúu. Te tēe ní cacahān yaá un jíin ndihí jñáhan de ní cachucú de ticachí de ndíto ñn tēe suchí nání Saulo, te ní cacani de yuú xiní Esteban.

⁵⁹ Te níni jéé cācani tāca tēe un yúu xiní de te ní jicān tahú de nuú ya:

Tátá Jesús jeé cúu ní Jítoho ná, naquihin ní ánuá na vijna, áchí de.

⁶⁰ Te ní jecuiñí yití de te ní cahān jee de:

Tátá Yáa Dios, ma quénehen ní cuéchi siquí i jee casáha i jíin ná, áchí de.

Súcuan ní cahān de te ní jihí-ni de.

Jeé ní jito xeēn Saulo ñayuu cācandje

8

¹ Te Saulo, ní nujnahan ní de jeé ní jíhí Esteban.

Te quívi un ní caquejeé de cājito xeēn ndasí de ñayuu cācandje Jesús ini ñuu Jerusalén, te jeé yúcuang cúu jeé ní cajitē núu ñayuu cācandje cuangoo i níi Judea jíin níi Samaria. Te tēe apóstol chi tu ní cajitē núu de.

² Te sava tēe yíñuhún núu Yáa Dios, ní cachindúji de Esteban. Te yōhyo ní candahyū de jeé ní jíhí Esteban.

³ Te Saulo chí jito xeēn de ñayuu cācandje, te quívi de ndijnahan vehe te jñá de tēe, ñahan, chūhun de i vecāa.

Jeé ní canacani i jñuhun Yáa Dios ndañúu Samaria

⁴ Te tācá ñuu nuú cuángoo tāca ñayuu ní cajitē núu un ní canacani i jñuhun ndese jnáma Yáa Dios ñayuu.

⁵ Te ní jinū Felipe ñn ñuu ndañúu Samaria, te nuú ñayuu yúcuang ní nacani de jñuhun Cristo, Yáa ní jeni Yáa Dios jeé jnáma ya yohó.

⁶ Te tāca ñayuu ní cacutútu un ní cajini nahún váha i tāca jñuhun ní nacani Felipe, te ní cajito i tācá jñiñu jéhnu ní sáha de.

⁷ Chi cuehē ñayuu cándoho tachí ní canduváha i, te cācana cóhó tachí un ní caquendacoo. Te cuehē ñayuu ní jñin jíin ñayuu ríngoo ní canduváha.

⁸ Te jeé yúcuang ní cacusi teyí ní ñayuu ñuu ún.

⁹ Te ini ñuu un néne ñn tēe nání Simón, te tēe tásí cúu de. Te nde ná tu jinū Felipe ñuu Samaria, te yōhyo cánaa ní ñayuu ñuu un cājito i jeé sáha Simón, te ní stahú de i ní cahān de jeé ñn tēe cújéhnu téyí cúu máá de.

¹⁰ Te nde tēe cācujéhnu jíin ndivíi cuití ñayuu, cājetáhú ndasí i jñuhun cáhān de, te ní cajeni ní máá i te ní cacahān i:

Tēe yáha ní jēhe Yáa Dios cuehē poder nuú de, áchí i.

¹¹ Te cājetáhú váha i jñuhun cáhān de, chí cuehē tiempo ní sáha de jñiñu stahú ní canaa ní i ní cajito i.

¹² Te nuú ní jinū Felipe, ní nacani de jñuhun váha ndese ndácu Yáa Dios jñiñu, jíin jñuhun Jesucristo, te ní candandje i te ní cajendute i, cúu tēe cúu ñahan.

¹³ Te suni máá Simón ní candje de te ní jendute de, te ní jica cuu de jíin Felipe. Te ní naa ní de jito de tācá jñiñu jéhnu jeé sáha Felipe jeé steén jeé cujéhnu Yáa Dios.

¹⁴ Te cáyucu tēe apóstol ñuu Jerusalén, te ní canihín de jñuhun jeé ñayuu Samaria ní candandje i jñuhun Yáa Dios. Te ní catajé de Pedro jíin Juan cuangoo de yūcuán.

¹⁵ Te ní jinūcoo de, te ní cajicān tahú de jehē ñayuu un náváha na quívi Espiritu Santo ini anuá i jíjnáhan i.

¹⁶ Chi ná tu quívi ya ini anuá ní ñn i, chí máá-ni jeé ní cajendute i jeé ní candandje i Jítoho yō Jesús.

¹⁷ Yūcuán na te Pedro jíin Juan ní casoó de ndaha de xiní i jíjnáhan i, te ní quívi Espiritu Santo ini anuá i.

¹⁸ Te ní jito Simón jeé súcuan casoó apóstol ndaha de xiní ñayuu ún te súcuan quívi Espiritu Santo ini anuá i, te cúní de cuáha de xūhun núu tēe apóstol náváha ñihín de poder un núu.

¹⁹ Chi ní cahān de:

Cúní na jéé cuáha ní poder yáha núu na, náváha núu ndé ñayuu soó ná ndaha ná xiní i te quívi Espiritu Santo ini anuá i, áchí de.

²⁰ Yūcuán na te ní cahān Pedro jíin de:

Na náá xūhun ró je jnahnū ndetū rō siquī jeē jéni ni rō jeē jīn xūhun te cuu cuaan rō táhū jeē véji nuū Yaā Dios.

²¹ Ma níhín tahú rō jeē sáha rō jniñu yáha, chí tu íyó ndáa anuá rō nuū Yaā Dios.

²² Nūu súcuan te jīni ñūhún jeē stóo rō jñūhun jeē jéni néé ni rō súcuan te cahān ndahú rō jīn Yáa Dios, te máá yá sanaa te cone cáhnu ni yā siquī jeē jéni néé ni rō súcuan.

²³ Chí jíní rí jeē cucuésún ni rō siquī jeē sáha rí jniñu yáha. Te táca jeē neé jéni ni rō ni conuú un jín rō, achí Pedro jín de.

²⁴ Yūcuán na te ni cahān Simón jín de:

Cacán tahú ní jéhe na jijnáhan ní núu maá Jítoho yō návāha tú jnahnū ndetū na nájñūhun ní cahān ní, achí de.

²⁵ Te Pedro jín Juan ní cacahān cají de ndese cáandíje de jñūhun Yaā Dios. Te jeē cuángoo de ichi ñūu Jerusalén, te tjini ndañūu Samaria ní canacani de jñūhun jeē jnáma ya ñayuu.

Felipe jín tēe nación Etiopía

²⁶ Yūcuán na te ni cahān ndajéhé maá Jítoho yō jín Felipe:

Quihín ichi te quihín rō ichi sur, ichi jeē quēnda Jerusalén cuahān nde ñuu Gaza, achí yá.

Te ichi chúcuan chí máá ñūhun téhé cúu.

²⁷ Te ní quihín Felipe ichi cuahān de. Te nde nación Etiopía ní quiji ñn tēe eunuco jeē ndíso jniñu de cúu de tesorero nuū ñáhan cúu reina ndácu jniñu nación Etiopía, nání ña Candace. Tēe un ní quichiñūhún de Yaā Dios ñuu Jerusalén.

²⁸ Te cuanuhun de néne de nuū carreta de, te cáhu de tutu jeē ní tee Isaías, tēe ní nacani jñūhun Yaā Dios nde jenahán.

²⁹ Te máá Espíritu ní cahān yā jín Felipe:

Cuahán quijnahan rō tēe cuahān jín carreta un.

³⁰ Te ní jejnahan Felipe carreta un, te ní jini sōho de jeē cáhu tēe ún tutu jeē ní tee Isaías. Te ní cajñūhún de tēe ún:

¿A jécūhun ní ní jñūhun jeē cáhu ní chí tuú? achí de.

³¹ Te ní cahān maá tēe un jín Felipe:

¿Te ndese jecūhun ní ná? Chí tú na tēe castūhun núu ná ndese cúu ún, achí de.

Te ní cahān de jín Felipe jeē na cáa de coneñe ndúu de jín de ini carreta.

³² Te jñūhun cáhu de tutu ñn un cáhán suhva:

Nájñūhun lanchi jeē cuahán tī nuū cúu tī, súcuan ní casáha ñayuu jín yá.

Te nájñūhun ñn londe quiti sáte jeē tu ndáhyú tī, súcuan ní sáha ya,

chí tú na vé ní cáhán cuiti yá ná ní cajcān í cuéchi siquī yá.

³³ Te hora jeē ní cajéhe í jñūhun canu yā, tu ní casáha ndaá í siquī yā jín jñūhun ndaá,

te ní cajehni í ya ini ñayivi yáha.

Te coo cuehē ñayuu candíje nuū yā jeē ma cánda ní ñn ñayuu cahu í ñayuu ún.

Achí.

³⁴ Yūcuán na te ní cahān tēe Etiopía un:

Cava váha ní ní cachi ní núu ná, ¿ndé siquī cahān tēe ní nacani jñūhun yáha? ¿A siquī maá de chí siquī inga tēe? achí de jín Felipe.

³⁵ Yūcuán na te ní nacani Felipe jñūhun váha Jesús nuū tēe ún, chí ní quejéé de ní castūhún de jñūhun jeē ní cahu tēe ún, jín táca gá jñūhun jeē yosó núu tútu yá.

³⁶ Te níni cuángoo de ichi ún te ní jinūcoo de nuū ñūhun ndute, te ní cahān tēe Etiopía: Yáha ñūhun ndute ¿te á tú cuu cuandute ná? achí de.

³⁷ Te ní cahān Felipe:

Cuu te núu cándíje ñihín ní ndé jín ini jín ánuá ní táca jeē ní sáha Jítoho yō Jesús jehé yō, achí de.

Te ní cahān tēe Etiopía:

Cándíje ná jeē Jesucristo cúu máá Séhe Yaā Dios, achí de.

³⁸ Te ní sáha de jeē na jécuiñi carreta de, te ní nuu ndindúu de cuangoo de ichi véyí núu ñūhun ndute ún, te ní scuándute Felipe tēe Etiopía.

³⁹ Te núu ní quendacoo de nuū ndúte, te Espíritu maá Jítoho yō ní sáha ya jeē ní ndoñūhún-ní Felipe. Te tēe Etiopía vésú tuá ní jito de nuū Felipe, te cúsi ní de cuahān de.

⁴⁰ Te ní nane Felipe ñuu Azoto. Te nácani de jñūhun ndese jnáma ya ñayuu, cuahān de táca ñuu nde ní jinū de Cesarea.

Jeē ní nasāma ini Saulo ní sáha Jesucristo (Hch. 22.6-16; 26.12-18)

9

¹ Te Saulo chí máni cáhán de jeē cáhni de táca ñayuu cáandíje í máá Jítoho yō, te jeē yúcan ní jehēn de nuū sutú cujéhnu ga.

² Te ní jicān de carta jeē cahān jeē quihín de táca vehe ñn sinagoga ñuu Damasco te cuhni de tēe ñahan jeē cáandíje í Jesús, quiji de jín í ñuu Jerusalén nuū.

³ Te ní quihín de ichi cuahān de. Te cuacuyajni de ñuu Damasco, te sanaa-ni te ichi ándivi ní stíndéé ñn luz nuū de.

⁴ Te ní cotúu-ni de nuū ñūhun, te ní jini sōho de ñn jñūhun cáhán jín de:

Saulo, Saulo, ¿najehē jito xeēn rō ruhū? achí.

⁵ Te ní cahān maá de:

¿Na níhín cúu jeē cahān, Tátá?

Te ní cahān yā jín de:

Máá rí cúu Jesús, te jeē jito xeēn rō ñayuu cáandíje í ruhū cúu jeē jito xeēn rō ruhū. Te jeē sáha rō súcuan cúu nájñūhun stiquí jeē tu

jéndije ti te jeñú yata tí xinī pulla, te súcuan stóho ti maá tí, achí yá.

⁶ Te maá de chi quísi i de jeē yūhú de, te ni cahān de:

Tátā, ¿na vé cunī ni jéē sāha ná núu súcuan? achí de.

Te ni cahān maá Jítoho yō jíin de:

Ndocuñi, quivī ró ini ñuu, te yūcuan íyó ñin tēe jeē cachi nuū rō na vé cúu jeē cánuú sāha ró, achí yá.

⁷ Te tēe cuango jíin Saulo, ni canaa ndasi ni de cajini sōho de ndusu jeē cahān, te tu ní cájito cuiti de nuū jeē cahān un.

⁸ Yūcuán na te ni ndocuñi Saulo. Te ni nducú de coto de, te tuá cúu coto de, te ni cajni tēe ún ndaha de ni jinūcoo jíin de nde ini ñuu Damasco.

⁹ Te yūcuan ní condee de unī quivī. Te tu ní cúu cuiti coto de, ni tú na vé ni yéji de, ni tú na vé ni jíhi de.

¹⁰ Te ñuu Damasco néne ñin tēe cándije, nání de Ananías. Te maá Jítoho yō ni steén ndijin ya maá yá nuū de te ni cahān yā jíin de:

Ananías, achí yá.

Te maá de ni cahān de jíin yá:

Naun ní sāña, Tátā, achí de.

¹¹ Te ni cahān maá Jítoho yō jíin de:

Quihin ichi te quihīn rō calle jeē naní Calle Derecha, te vehe Judas cajñūhun rō ñin tēe nání Saulo ñuu Tarso, chi jíicān tahú de.

¹² Te nájñūhun ni jito ndijin de jeē maá ró, Ananías, ni jinū rō, te ni soó ró ndaha ró xini de, te ni nanune tinū de, achí yá.

¹³ Yūcuán na te ni cahān Ananías:

Tátā, cuehē ñayuu cácahān jeē tēe yūcuan yōhoyo jíto xeēn de ñayuu cácañdije i nihín ñuu Jerusalén.

¹⁴ Te vijna ni quee de yāhá, chi sutū cácujeñhu ni catejñiñu de véji de jni de táca ñáyu cácahān ndahú i jíin ní, achí de.

¹⁵ Te ni cahān maá Jítoho yō jíin de:

Cuáhān, chí maá rí ni nacāji tēe un jéē quihīn de nacani de jñūhun ri nuū táca ñáyu nación Israel jíin nuū ñáyu táca gá nación nde jíin nuū táca rey.

¹⁶ Chí steén rī nuū de jeē cánuú ndoho de cuehē jñūndóho jeē siquí rī, achí yá.

¹⁷ Yūcuán na te cuahān Ananías. Te ni quivī de ini vehe nuū néne Saulo, te ni soó de ndaha de xinī Saulo, te ni cahān de:

Hermano Saulo, maá Jítoho yō Jesús, Yāá ní quenda ndijin nuū ní ichi jeē véji ní, ni tají yá sāña véji ná nuū ni návāha na nanune tinū ní, te návāha na cúnuú Espiritu Santo yá jíin ní, achí de.

¹⁸ Te ni nanune-ni tinū Saulo, chí ni nungoo-ni nájñūhun soó chācá ní condihyū tinū de ún. Te ni ndocuñi de ni jendute de.

¹⁹ Yūcuán na te ni nacāji de staā, te ni naniñi ni de. Te ni condee de jecu quivī jíin tēe cácañdije jeē cáyūcú ini ñuu Damasco.

Jeē ní nacani Saulo jñūhun ini ñuu Damasco

²⁰ Te ni quejéé-ni de nácani de jñūhun Jesús ini táca vehe ñi sinagoga, achí de jeē Jesús cúu Sēhe Yāá Dios.

²¹ Te táca ñáyu ni cajini sōho jñūhun cáhān de ni canaa ní i, te ni cacahān i:

¿A násū tēe yáha cúu jeē yóhoyo jíto xeēn de táca ñáyu Jerusalén jeē cájicān tahú nuū Jesús? Te siquí yūcuan ní quee de yāha jéē cúhni de ñayuu cácañdije, te quihīn de jíin i nuū sutū cácujeñhu nuū, achí i.

²² Te víhyá gā ni nacani Saulo jñūhun ya, te ni steén cají de jeē Jesús cúu Cristo, Yāá ní jeni Yāá Dios jeē jnáma ya yohó. Te tēe hebreo jeē cáyūcú ñuu Damasco, tu ní cániñi de modo cahān de jeē tu íyó ndáa jeē cahān Saulo.

Jeē ní cácu Saulo nuū jñāhan de hebreo

²³ Te ni yāha cuehē quivī. Te jñāhan de hebreo ni casquijñāhan jñūhun de jeē cáhni de Saulo.

²⁴ Te ni nihín Saulo jñūhun jeē cándito de nduú ñuú táca yéhyí pared jeē ní condūú ndihyū ñuu ún.

²⁵ Yūcuán na te ñin jecuáa te tēe cácañdije ni caquihīn de Saulo, te ini ñin jíca cáhnu ni cascūn de Saulo jíca pared ún, te súcuan ni cácu de.

Jeē ní najinū Saulo ñuu Jerusalén

²⁶ Te nuū ní najinū de ñuu Jerusalén, te cúní de najñāhan de jíin tēe cácañdije. Te ni cayūhu tēe un ní cajito de Saulo, chí tu ní cácañdije de jeē ní nduu Saulo tēe cándije nuū Jesús.

²⁷ Te Bernabé cuahān de jíin Saulo nuū cáyūcu tēe apóstol, te ni nacani de jñūhun nuū tēe ún ndese ni jini Saulo nuū maá Jítoho yō ichi nuū cuahān de, jíin jéé ni cáhān yá jíin de, jíin jéé jéñhu-ni ni nacani de jñūhun Jesús ini ñuu Damasco.

²⁸ Te ni condee Saulo ñuu Jerusalén ni jica de jíin táca tēe apóstol.

²⁹ Te jéñhu-ni ni nacani de jñūhun maá Jítoho yō. Te jñāhan ñuu de hebreo jeē cácahān yuhu griego, ni castáhān jñāhan jíin de, te maá tēe un cácuñi de cahni de Saulo.

³⁰ Te ni cajini táca hermano cácañdije, te ni cajendeca de Saulo nde ñuu Cesarea. Te yūcuan ní canatají de Saulo cuanuhun de nde ñuu de Tarso.

³¹ Te ñayuu cácañdije Jesús jeē cáyūcú Judea jíin Galilea jíin Samaria, tuá ní cájito xeēn ñayuu i. Te ni ije ga i jíin jñūhun ya, te cándiso íyo i nuū maá Jítoho yō. Te Espiritu Santo ni chindéé ñāhān yá i te ni nducuehē gā i.

Jeē ní nduvāha Eneas

³² Te tāca lado jécondēhe Pedro ñayuu cácanđje, te suni ni jécondēhé de ñayuu cácanđje cáyūcū ñuu Lida.

³³ Te yūcuan ní jini de nuū ñin tēe nání Eneas jeē ní cuu unā cuiyā cáa de chi ni ĩjin de.

³⁴ Te ni cahān Pedro jíin de:

Eneas, Jesucristo cúu Yaā nasávaha ya rohó. Ndocuiñi te natuu rō yuu ró, áchí de.

Te ni ndocuiñi-ni tēe ún.

³⁵ Te tāca ñayuu cáyūcū ñuu Lida jíin ndúhvā Sarón ni cajito i jeē ní nacaca Eneas, te ni casquéndoo i tāca jnūhun jeē tu iyó ndáa te ni cacandje i máá Jítoho yō.

Jeē ní natecu Dorcas

³⁶ Te nde ñuu Jope ni Iyo ñin ñahan cándje, nání ña Tabita, te nuū yūhu griego nání ña Dorcas. Te ñahan yáha máni jniñu váha ni sáha ña, te ni sáha ña caridad ni chindéé ñáhán ña ñayuu cúmaní nuū.

³⁷ Te tiempo yūcuan ní quejéé cuéhyi jíin ña, te ni jíhi ña. Te ni cascúchi i ndíyi ún, te ni cajequin i ndíyi un ndé ini cuarto xiní véhe.

³⁸ Te yajni íne ñuu Lida jíin ñuu Jope, te tēe cácanđje ñuu Jope ni cajini jnūhun de jeē néne Pedro ñuu Lida, te ni catajé de uū tēe cuacana de Pedro, te ni cacahān de:

Ma cucuéé ní na quihín yachi yō ñuu Jope, achí de.

³⁹ Yūcuán na te ni quihin Pedro ichi cuahān de jíin tēe ún. Te nuū ní jínū de, te ni cacoo tēe un jíin de nde xiní véhe nuū catú ndíyi ún. Te tāca ñahan viuda ni candicó ndúú ña de cándahyū ña, te cástéén ña tācá sahma jíin tícachi jeē ní sáha Dorcas te ni saja ña nde na técu ña.

⁴⁰ Yūcuán na te ni ndacu Pedro jniñu jeē na quéndacoo ndíhi ñayuu ún quingoo i nde yatā véhe. Te ni jecuiñi yití de ni jicān tahú de, te ni nandió cóto de nuū catú ndíyi ún, te ni cahān de:

Tabita, ndocuiñi ní, áchí de.

Te máá ña ni ndacoto-ni ña te ni jito ña nuū Pedro, te ni nucōo-ni ña.

⁴¹ Te ni jni de ndaha ña, te ni ndonehen de ña. Yūcuán na te ni nacana de xiní ñayuu cácanđje nde jíin ñahan viuda ni ndívicoo i, te ni steén de ña nuū i jeē ní natecu ña.

⁴² Te ni jité jnūhun jniñu yáha ní ñuu Jope cuahān, te cuehé ñayuu ni cacandje i jnūhun máá Jítoho yō.

⁴³ Te cuehé quiví ni ndōo Pedro ini ñuu Jope, néne de vehe ñin tēe sáha curtir ñii, nání de Simón.

Pedro jíin Cornelio

10

¹ Te ini ñuu Cesarea ni Iyo ñin tēe nání Cornelio, ni cuu de capitán grupo soldado jeē naní Italiano.

² Te cúu de tēe ndíso Iyo nuū Yaā Dios nde jíin ndíhi ñayuu vehe de, te yōhuo caridad ni tēe cúu de, chí jehe de xūhun núu ñayuu hebreo cándoho ndáhú, vésú nastuu tēe hebreo cúu de. Te níni jicān tahú de nuū Yaā Dios.

³ Te ñin quiví ni steén ndijin yā nuū tēe yáha nájñuhun cahuní jehíni, te ni jito de jeē ñin ndajéhé maá Yāā Dios ni quiví ya nuū néne de. Te ni cahān yā jíin de:

Cornelio, achí yá.

⁴ Te máá de ni ndacoto váha de nuū yā, te ni yūhú de. Te ni cahān de:

¿Na vé cuni ní, Tātā? achí de.

Te ni cahān yā jíin de:

Je chíhi Yāā Dios cuenta jeē jicān tahú rō jíin jeē sáha ró caridad.

⁵ Vijna te tají ró jecu tēe na quingoo de nde ñuu Jope, quicana de Simón jeē suni nání de Pedro, na quiji de.

⁶ Chí néne núu de vehe tocayo de Simón, tēe sáha curtir ñii, te ndéé vehe ún yajni yumar. Te máá de castūhun núu rō na vé cúu inga jeē cánuú sáhá ró, achí ndajéhé yā.

⁷ Te ndajéhé yā jeē ní cahān jíin Cornelio, cuahān-ni ya. Te ni cana de uū mozo de jíin ñin soldado jeē yíñúhūn núu Yaā Dios, chí cūcáhnū ni de jeē squícu váha tēe ún.

⁸ Te ní nacani ndíhi de jnūhun nuū tāca tēe ún, te ni tají de cuangoo nde ñuu Jope.

⁹ Te inga quiví un cájica de ichi cuangoo de, te cuacuyajni de ñuu Jope. Te je yajni cahuxi uū cúu, te suu hora un ní caa Pedro siquí véhe chí cándaá, te yūcuan cácan tahú de.

¹⁰ Te ni quee sōco chíji de, te ni cuni de caji de staá. Te saá casáha ña ndeyu te ni steén ndijin yā nuū de.

¹¹ Te ni jito de jeē núne andiví. Te ni jito de nájñuhun ñin sahma manta jité cáhnū te núhni jnāhan ndicúun punta, te ni cuun vejí nuū de.

¹² Te chíji un cáñuhun ndinuū quiti, táca quiti cúun ndaha jíin táca cóó jíin táca quiti cándava.

¹³ Te ni jini sōho de ñin jnūhun ni cahān:

Pedro, ndocuiñi te cahni rō táca quiti jíin, te caji rō tí, achí.

¹⁴ Te ni cahān Pedro:

Ma cáji na, Tātā, chí tu yéji cuiti na táca quiti jeē cahán ley ni jeé tú váha caji na tí, chí nájñuhun jeē tu cáhiyo ndoo tí nuū ní, achí de.

¹⁵ Te ni cahān tucu jnūhun un jíin de:

Achí rí jeé iyó váha caji rō táca quiti jíin, chí ni sándoo rí, te ma cahán máá ró jeé tu cáhiyo ndoo tí, achí. Te súcuan ni steén caji yá nuū de jeé cúu quihín de nuū ñayuu vésú násūu jnāhan ñuu de hebreo cúu.

¹⁶ Te uní jínu ni cahān súcuan jíin de. Te sahma un ní ndaa cuanuhun andiví.

¹⁷ Te níni nácani ndasí ní Pedro na vé cuni cahān jeē ní jito ndijin de ún, te ni

jinūcoo-ni tēe ni tají Cornelio, cácajnūhún de vehe Simón nde ni jinūcoo de yéhyí tēe ún.

¹⁸ Te cácahān jee de cácajnūhún de núu yūcuan ndéé Simón jeē suni nání de Pedro.

¹⁹ Te níní nacani ga ni Pedro siquī jeē ní jito ndijin de ún, te Espírítu Santo ni cahān yā jīn de:

Ni quecoo uní tēe cánanducú rōhó.

²⁰ Ndocuīñī te nanuu ró, te ma cáni ni rō jeē tú vāha quihñ rō jīn de, vēsú nasūu jnāhan űuu rō hebreo cácuu de, chi máá rí ni tají rí de vējicoo de, áchí yá.

²¹ Yūcuán na te ni nanuu Pedro nuū tēe ni tají Cornelio, te ni cahān de:

Máá ná cúu tēe cánanducú ní. ¿Te na siquī vējicoo ní núu na núu sūcuan? áchí de.

²² Te ni cacahān mozo un:

Cornelio, tēe cúu capitán, ni tají de saña. Te tēe ndaā, tēe ndíso íyo nuū Yāā Dios cúu de, te tāca űayuu hebreo suni cácahān i jeē tēe vāha cúu de. Te ni cahān ĩn ndajéhé yā jīn de jeē na cána de níhín jeē ní vehe de te chusóhó de jnūhun cahān ni jīn de.

²³ Yūcuán na te ni cahān Pedro jīn mozo un jēē na cūcōo de ini vehe ún, te ni candōo de yūcuán. Te nuū ní cundijin, te ni quihñ Pedro ichi cuahān de jīn mozo un. Te suni cuango jecu hermano cácañdije űuu Jope jīn de.

²⁴ Te nde inga quivī ni jinūcoo de űuu Cesaarea. Te Cornelio ndéu de jinūcoo Pedro, chi ní nastútú de tāca jnāhan de jīn tāca amigo de jeē quijnāhan vāha ga de jīn.

²⁵ Te nuū ní jīnū Pedro jijnāhan de, te ni quenda Cornelio ni cahān de jīn Pedro, te ni jecuiñī yití de jeē chíñūhún de Pedro nuū.

²⁶ Te Pedro ni ndonehen de Cornelio, te ni cahān de:

Ndocuīñī ní, chi saña suni ĩn tēe-ni cúu ná, áchí de.

²⁷ Te cándajnūhún de ni quivicoo de ini vehe. Te ní jito Pedro jeē cáyūcu cuéhé űayuu ini vehe de.

²⁸ Te ni cahān Pedro jīn űayuu ún:

Je cájini vāha ni jijnāhan ní jēē ley jeē cánevāha saña űayuu hebreo, cáhān jeē tú vāha jeē quijnāhan ná jīn ní quivicoo ná vehe ní siquī jeē cúu ní űayuu sñn nación. Te Yāā Dios chi ní steén yā nuū na jēē ma cujéé ní na núu ní ĩn űayuu.

²⁹ Jeē yūcuan cúu jeē vēji-ni ná, chi ni cana ní saña, te tu ní sájéé ni ná. Te na cájnūhun ná níhín, ¿na siquī ní cana ní saña? áchí Pedro.

³⁰ Yūcuán na te ni cahān Cornelio:

Vijna íyó cúun quivī nájjnūhun máá hora yāha jēē cúu cahuní jehíni, te ndite ni ná chi sūcuan chíñūhún ná nuū yā, te jicán tahú na ini vehe ná. Te ni quiji ĩn ndajéhé yā nuū ná, te ndíndéé sahma űūhun ya.

³¹ Te ni cahān yā jīn ná: Cornelio, je ní jini sōho Yāā Dios jeē jicán tahú rō, te chíhi ya cuenta jeē sáha ró caridad.

³² Núu sūcuan te tají ró mozo na quíngoo de űuu Jope quicana de Simón jeē suni nání de Pedro, na quiji de nuū rō. Chi tēe un néne de vehe tocayo de Simón, tēe sáha curtir ññi, te yajni yumar ndeé vehe de. Te quee tēe ún te castūhún de nuū rō jnūhun cánuu, áchí yā jīn ná.

³³ Sūcuan ni cuu te ni tají-ni ná mozo na cuajēcoo de cana de níhín, te na cūtahú ná, chi vāha ni sáha ní jēē vēji ní. Te vijna ni candutútú ná yāha návāha tāca ná cuni sōho ná ndihi jnūhun Jitoho yō Yāā Dios jeē ní jēhe ya cahān ní, áchí de.

Jeē ní nacani Pedro jnūhun ya vehe Cornelio

³⁴ Yūcuán na te ni cahān Pedro:

Vijna te ni jini vāha ná jēē Yāā Dios ĩnuú-ni sáha ya jīn tāca űayuu, cúu űayuu hebreo jīn űayuu tāca gá nación.

³⁵ Chi cúñī ní yā jīn űayuu tācá-ni nación núu cándiso íyo i nuū ya te cásáha i jññu ndaā.

³⁶ Chi ni cahān yā jīn űayuu Israel jeē ndávicoo tāca űayuu nuū jnūhun maní yā jīn i sáha Jesucristo. Te máá yá cúu Jitoho tāca yóhó.

³⁷ Máá ní je cájini ní ndese ni cuu. Chi ná ni jinu ni nacani Juan jnūhun jīn jēé ní scuándute de űayuu, te ni quejéé Jesús nacani ya jnūhun nde Galilea, te ni jité jnūhun un ní cáhnu Judea.

³⁸ Te cájini ní jēē Yāā Dios ní jēhe ya Espírítu Santo jīn poder nuū Jesús, Yāā ní jehnu űuu Nazaret. Te cájini ní jēé ní jica cuu ya ní sáha ya jññu vāha, te ní nasávāha ya tāca űayuu jeē cándoho i sáha jexeén, chi Yāā Dios ní chindéé űāhán yā Jesús.

³⁹ Chi máá ná canacani cájī ná jnūhun tāca jññu ní cajito ná ní sáha ya ní cáhnu Judea jīn ĩni űuu Jerusalén. Yūcuán na te ní cajehni i ya, chi ní cata caa i ya jicá cruz.

⁴⁰ Te Yāā Dios ní nastécu yā máá Jesús nuū uní quivī, te ní ndiji ya nuū na ní cajito ná núu yā ní sáha Yāā Dios.

⁴¹ Te tu ní quiji ya nuū tācá inga űayuu, chi nuū maá-ni tāca ná jee jé ní nacáji Yāā Dios saña jēé nacani ná jnūhun tācá jññu jeē ní cajito ná. Chi ní cayeji na stáa ní cajihí ná ndute jīn yá ná ní nane ya jeē ní natecu yā.

⁴² Te ní ndacu ya jññu nuū na jijnāhan ná jēé na nacani ná jnūhun ya nuū tāca űayuu te cahān cájī ná jee máá Yāā Dios ní jení ya Jesús jeē sándaā yā jññu űayuu cátecu jīn űayuu ní cajihí.

⁴³ Chi jnūhun Jesús cúu jeē ní cacahān tāca tēe ní canacani jnūhun Yāā Dios nde jenahán. Chi ní cacahān de jeē tāca űayuu jeē candije i Jesús, cone cáhnu ní yā nuū cuéchi i, áchí Pedro.

Jeē ní quiví Espírítu Santo ini anuá űayuu jeē násūu hebreo cácuu

44 Te níni cáhán gā Pedro táca jnūhun yáha te ni quívi-ni Espírítu Santo ini anuá táca ñáyuú cájini nahín jnūhun ya jeē cahán de.

45 Te tēe hebreo jeē ni jínūcoo jíin Pedro jeē suni cácanđje de Jesús, nahán ní canaa ni de ni cajito de jeē suni ni quívi Espírítu Santo ini anuá ñáyuú jeē násūú hebreo cácuu.

46 Chi ní cajini sōho de cácahān ñáyuú un sán yuhu, te cácahān i jeē yōhyo cújéhnū Yaā Dios.

47 Yūcuán na te ni cahān Pedro:

¿Nde ĩn casi jeē ma cuándute ñáyuú yáha? Chi ní quívi Espírítu Santo ini anuá maá i, nájnūhun ni quívi ya ini anuá maá yó, áchí de.

48 Te ni cahān de jíin i jeē na cuándute i siquí jeē ní cacandíje i Jesucristo. Yūcuán na te ni cacahān ndahú i jíin Pedro jeē na quéndōo de jecu quívi jíin i.

Jeē ní nacūāha Pedro cuenta nuū ñáyuú cácanđje ini ñuu Jerusalén

11

1 Te tēe apóstol jíin táca hermano cáyūcú Judea, ni canihñ de jnūhun jeē sūni ñáyuú sán nación ni cacandíje i jnūhun Yaā Dios.

2 Te cuanuhun Pedro ñuu Jerusalén. Te sava tēe hebreo jeē cácanđje de ya ni cacahān de nuū Pedro:

3 ¿Najehē ni condee ní vehe ñáyuú jeē násūú ñáyuú nación yó cúu? Te ni yeji ní jíin i, áchí.

4 Yūcuán na te ni nacani cáji Pedro jnūhun nuū tēe ún ndihñ ndese ni cuu siquí tēe sán nación:

5 Néne ná ñuu Jope. Te níni jíicán tahu na, te ní steén ndíjin yā nuū ná, te ní jito ná nájnūhun ĩn sahma manta jité cáhnu jeē nuhní jnāhan ndicúun punta, te nde ichi andívi ní cuun ni quiji nuū ná.

6 Te ní jito vāha ná, te ní jini na jéé chíji un cáñūhun quiti cúun ndaha jíin quiti xéén jíin cóō jíin quiti cándava.

7 Te ní jini sōho ná ĩn jnūhun ni cahān jíin ná: Pedro, ndocuññi te cahni rō táca quiti jíin, te caji rō tñ, áchí jíni ná.

8 Te ní cahān ná: Ma cáji na, Tātā, chi tu yeji cuiti na táca quiti jeē cahān ley ni jéé tu cáhño ndoo tñ nuū ní, áchí ná.

9 Yūcuán na te jnūhun jeē véji nde andívi ní cahān tucu jíin ná: Ni sándoo máá rí tñ, te ma cahān gā rō jeē tu cáhño ndoo tñ, áchí jíni ná.

10 Te uní jinu ni cahān sūcuan. Yūcuán na te ní ndaa sahma un cuánuhun andívi.

11 Te hora un ní jinūcoo uní tēe vehe nuū ni cóndee ná un, cánanucú de sañá, te ĩn jnāhan ñuu de Cesarea ni tají de vējicoo de.

12 Te máá Espírítu ni cahān yā jíin ná jeē ma cáni ní na jéé tú vāha quihñ na jíin de. Te suni iñū hermano yáha ní jengoo jíin ná, te ní quívicoo ná ini vehe tēe nání Cornelio.

13 Te tēe un ní nacani de jnūhun nuū na jíināhan ná jéé ní jito de ĩn ndajehé Yaā Dios, índichi yā ini vehe de, te ní cahān yā jíin de: Tají rō jecu tēe na quingoo de ñuu Jope, quicana de Simón jeē suni nání de Pedro, na quíji de.

14 Te tēe ún cachi de nuū rō ndese jnama Yaā Dios rohó jíin ndihñ ñáyuú cáyūcú vehe rō, áchí yá. Achí Cornelio jíin ná.

15 Te nuū ní quejéé ná cahān na, te ni quívi-ni Espírítu Santo ini anuá i jíināhan i, nájnūhun ni quívi ya ini anuá maá yó xihna gā.

16 Yūcuán na te ní nucūhun ni na jnūhun ni cahān maá Jítoho yō: Jendaá jeē maá ndute-ni ní scuándute Juan ñáyuú. Te rohó jíināhan ró chi nájnūhun cuandute ró jíin Espírítu Santo, cúu jeē cóndee yā ini anuá rō, áchí yá.

17 Te suni ní jēhe Yaā Dios Espírítu yā nuū maá i nájnūhun ni jēhe ya nuū maá yó jeē cácanđje yó Jítoho yō Jesucristo. Núu sūcuan ¿te ndé ĩn cúu ná jéé cási ná jñiñu jeē sáha Yaā Dios? áchí Pedro.

18 Sūcuan ní cajini sōho de jnūhun yáha, te tuá ní cácahān de nuū Pedro, chi sa sahva ni cacahān de jeē yóhyo cújéhnū Yaā Dios. Te ni cacahān de:

Suni ní jēhe Yaā Dios jnūhun jeē na nacani ní ñáyuú táca gā nación jeē stōo i cuēchi i návaha cotecu i níf cáni núu sūcuan, áchí de.

Ñáyuú cácanđje ini ñuu Antioquía

19 Te quívi ní cajehni de Esteban ni quejéé de cájito xeēn de ñáyuú cácanđje, te jeē yūcuan ní cajitē núu ñáyuú un táca ñuu cuangoo i, te ní jinūcoo i Fenicia jíin Chipre jíin ñuu Antioquía. Te ni canacani i jnūhun vāha ya nuū máni jnāhan hebreo i jeē cáyūcu yūcuan, te tu ní canacani i jnūhun ya nuū inga ñáyuú.

20 Te jecu tēe cácanđje jeē cáyūcu Chipre jíin ñuu Cirene ni jinūcoo de ñuu Antioquía, te suni nuū ñáyuú táca nación jeē tu cájini i jnūhun ya ni canacani de jnūhun máá Jítoho yō Jesús jeē jnāma ya i.

21 Te máá Jítoho yō ní chindéé ñāhān yá de, te cuēhē ñáyuú ní castóo i jñiñu jeē tu íyó ndáa te ní cacandíje i máá Jítoho yō.

22 Te ñáyuú cácanđje ini ñuu Jerusalén ni cajini jnūhun i, te ní catají i Bernabé cuahān de nde ñuu Antioquía.

23 Te nuū ní jínū Bernabé yūcuán, te ní jini de jeē yóhyo vāha ní sáha Yaā Dios jíin i, te ní cusñ ndasí ní de. Te ní stihví ní de táca ñáyuú un jéé jíin ini jíin ánuá i na cóndihví ní i squicu vāha i nuū maá Jítoho yō, te ma náyūhú i.

24 Chi tēe vāha cúu Bernabé, te ni cunuú Espírítu Santo jíin de, te cándje mñin de. Te ní cacandíje cuēhē ñáyuú nuū maá Jítoho yō ní sáha de.

²⁵ Yūcuán na te cuahān de nde ñuu Tarso cananducú de Saulo. Te ni nanihñ jnāhan de jín Saulo, te ndēca de tēe un ní ndee de ñuu Antioquía.

²⁶ Te ní ñn cuiyā ni candutútú de jín ñayuu cáandje yūcuán, te ni castéén de jñuhun ya nuū cuehē ñayuu. Te ñuu Antioquía cúu nuū xihna ñuhún gá ni caconaní ñayuu cristiano siquí jeē ní cacandje i Cristo.

²⁷ Te suni tiempo un ní quendacoo tēe cánacani jñuhun Yaā Dios ñuu Jerusalén cuangoo de nde ñuu Antioquía.

²⁸ Te ñn jnāhan de jeē naní Agabo ni ndocuññ nuū hermano cáandje. Te ni steén Espíritu Santo nuū de, te ni castühún de jeē cóo ñn jnamā xeēn ní cáhnu. Te ni cuu jnamā ún ñn parte tiempo jeē ní ndacu Claudio jññu jeē ní cuu de rey.

²⁹ Yūcuán na te ní candanjñuhun tēe cáandje ñuu Antioquía jeē cuāha ñn ñn de nasaa canda de cuāha de te tají de quihñ cotecu hermano cáyucú Judea.

³⁰ Te súcuan ní casāha de. Te ni catajé de Bernabé jín Saulo ni cajendēca de nuū tēe jēhnu cándiso jññu nuū ñayuu cáandje cáyucú Judea.

Jeē ní jehni Herodes Jacobo, te ni chune de Pedro vecāa

12

¹ Te suu tiempo un ní quejéé rey Herodes jíto xeēn de sava ñayuu cáandje.

² Te ní ndacu de jññu jeē jín espada na cáhni i Jacobo ñani Juan.

³ Te ní jini de jeē ní cacusiñ ní tēe hebreo jeē ní sáha de súcuan, te jeē yūcuán suni ní jññ de Pedro. Te máá quiví un ní cuu vico jeē yéji ñayuu pan jeē tu yíhi levadura.

⁴ Te nuū ní jññ de Pedro, te ni chune de vecāa, te ni jeni de cuñ grupo soldado jeē cóndito Pedro, cuñ cuñ soldado cúu jeē ñn ñn grupo. Chi cúní Herodes jeē na yáha vico un jeē cúu vico pascua te quenehen de Pedro vecāa un steén de nuū ñayuu cuehē.

⁵ Te súcuan ñe Pedro vecāa, te cándito soldado un de. Te ñayuu cáandje chi nihin ní cajicān tahú i jehē Pedro nuū Yaā Dios jeē na cácu de.

Jeē ní quenehen Yaā Dios Pedro vecāa

⁶ Te jéni ní Herodes jeē na cundijñ inga quiví te quenehen de Pedro vecāa, te steén de nuū ñayuu un núu. Te núhni Pedro jín úu cadena, cátu de quixí de mēhñu úu soldado jecuáá ún, te suni cáhñ ga soldado cándito yéhyí vecāa ún.

⁷ Te suu jecuáá ún te sanaa-ni te ni jinū ñn ndajéhé máá Jítoho yō, te ni ndindéé ini vecāa. Te ní squíhi ya Pedro, te ní natahú ni de. Te ní cahān yā:

Yachí ndocuññ rō, achí yā.

Te cadena nuhní ndaha de un ní canandají-ni.

⁸ Te ní cahān ndajéhé yā jín de:

Nacuhni ñihñ chíji rō, te nuquñhi rō ndjñen rō, achí yā.

Te súcuan ní sáha de. Te ní cahān tucu ndajéhé yā jín de:

Condií ticāchi rō, te condiquñ rō ruhū na quíhñ yō, achí yā.

⁹ Te ní quenda de ndíquín de ya cuahān de jín yā, te jéni ní de jeē násuu jēndaá cúu jeē sáha ndajéhé yā jín de, chí jéni ní de jeē ñn jeē ní steén yā jíto ndijñ de cúu.

¹⁰ Te ní yáha ya jín de uū nuū cándito soldado. Te ní jinū yā jín de yéhyí cáa nuū quēnda de caca de calle, te yéhyí un ní nune ñ-ni máá. Te ní quenda ya jín de, te ní yáha de ñn calle cuahān de. Yūcuán na te ni cujiyo-ni ndajéhé yā nuū de cuahān yā.

¹¹ Te ní nducájí ní Pedro te ní cahān máá ní cahān ñn de:

Vijna te ní jini ndaā rí jeē ní tají máá Jítoho rí ndajéhé yā ní quiji, te ní jnama ya ruhū nuū Herodes jín núu táca ñayuu hebreo jeē cácuni i sáha xeēn i jín rí nuū, achí de.

¹² Te nuū ní jini de jeē ní cácu ndije de, te ní quihñ de ichi cuahān de vehe María naná Juan jeē suni nání de Marcos. Te yūcuán cáhñ tütú cuehē ñayuu cájicān tahú i jehē Pedro.

¹³ Te cáhñ Pedro ní jinū de yéhyí fuera, te ñn sūchi síhñ nání Rode cuahān i jeē cúní i núu ndé ñn cúu jeē cahān.

¹⁴ Te ní nacuni i tachí Pedro, te jeē ní cusñ ní i te tu ní núne i yéhyí un, chí ní nandíto cóo i te jínu i ní ndāv i ini cuarto. Te ní castühún i jeē ní quee Pedro índichi de yéhyí fuera.

¹⁵ Te ní cacahān jín i:

Jeē cahān neē rō, achí.

Te máá i ñihñ cáhān i jeē máá de cúu. Yūcuán na te ní cacahān:

Ndajéhé yā jeē ndíto Pedro cúu núu súcuan, achí.

¹⁶ Te víhyá gā cahān Pedro. Yūcuán na te ní canune i yéhyí, te ní canacuni i nuū de, te nahān ní canaa ní i cájito i.

¹⁷ Te máá de ní sáha de ndaha de jeē ma cúvaā gā i, te ní castühún de ndese ní quenehen máá Jítoho yō de vecāa. Te ní cahān de:

Castühun núu Jacobo jín núu táca gá hermano jeē ní quenehen ya ruhū vecāa, achí de.

Te ní quenda de cuahān de inga lugar.

¹⁸ Te nuū ní cundijñ, te ní cacuvaā teyí soldado jeē tuá Pedro.

¹⁹ Te ní ndacu Herodes jññu jeē na nānducú váha i Pedro. Te tu ní cánanihñ i de, te nuū ní cuu ní stichí de soldado jijnāhan, te ní ndacu de jññu jeē na cúu. Yūcuán na te ní quenda Herodes Judea cuahān de ñuu Cesarea, te ní condee de yūcuán.

Jeē ni jīhī Herodes

²⁰ Te yōhyo ni quīṭī ni rey Herodes nuū ñāyuu ñuu Tiro jīn ñuu Sidón. Te ñāyuu un ní candajnuhún i jeē inuū-ni quīvicoo ndihi i nuū rey un. Te ni casáha i amigo i jīn Blasto, tēe cūjēhnu jéjníñu nuū rey un. Te ni cacahān ndahú i jīn de jeē na cāhān ndahú de jīn rey un jéē na ndéē ni de jīn i. Chi nde ñuu maā rey un cájeen i jeē cáyeji i.

²¹ Te ni jeni Herodes iin quivī. Te ni nucūhun de sahma yīñúhún de, te ni cucōo de mesa nuū ndácu de jniñu, te ni cahān de iin jñuhun jehū ni cajini sōho i.

²² Te ñāyuu un ní caquejéē i cacahān jee i jñuhun yīñúhún jīn de:

Nasūu tēe-ni cúu ní, chi iin yaā cúu ní, áchī i jīñáhan i.

²³ Te maā hora un ní sáha-ni iin ndajéhe maā Jítoho yō jeē ní jniñ iin cuehyī xeēn rey Herodes, te ni cayeji tindácu de, te ni jihī de, chí ni sandúxi-ni de maā de te tu ní cāhān de jeē Yaā Dios cúu jeē cūjēhnu.

²⁴ Te ni jītē gā jñuhun maā Jítoho yō, te cuehē ndasí ñāyuu ni cacandje i tēcá-ni lugar.

²⁵ Te ni jīnu jniñu jeē ní quindecá Bernabé jīn Saulo jeē cótecu ñāyuu Judea. Te ni quendacoo de Jerusalén cuanungoo de Antioquía, te cándēca de Juan jeē suni nání de Marcos cuahān jīn de.

Jeē ni caquejéē Bernabé jīn Saulo caca cúu de nacani de jñuhun ya

13

¹ Te mēhñu grupo ñāyuu cácadje ini ñuu Antioquía ni cahīyo tēe cástēen jīn tēe cánacani jñuhun Yaā Dios, te cácani de Bernabé, Simón jeē suni nání de Negro, Lucio ñuu Cirene, Saulo, jīn Manaén tēe ni jehnu jīn inga Herodes jeē ní cuu gobernador Galilea.

² Te iin quivī jeē cáhīyo ndite ni tēe yáha cáchiñúhún de nuū maā Jítoho yō, te ni cahān maā Espiritu Santo jīn de:

Cúni rī jeē sasān ró Bernabé jīn Saulo na quingoo de jniñu jeē ní jeni ri de, áchī yá.

³ Yūcuán na te ní cajicān tahú ndite ní de, te ní casoó de ndaha de xinī Bernabé jīn Saulo, te súcuan ní catajī de ndindúú tēe ún cuanacani de jñuhun nuū tēcá ñāyuu.

Jeē ni canacani Bernabé jīn Saulo jñuhun ya nde Chipre

⁴ Te ní sáha Espiritu Santo jeē íchi ñuū Seleucia cuangoo de. Te yūcuan ní quīvicoo de iin barco cuangoo de nde Chipre, ñuhun jeē íne sūn nuū ndúte.

⁵ Te ní jinūcoo de ñuu Salamina nuū cájecuñī barco, te ni canacani de jñuhun Yaā Dios ini tēcá vehe i sinagoga jñáhan hebreo de. Te suni cuahān Juan chindéē ñáhan jīn de.

⁶ Te ni cajica nuu de ñá-ni Chipre nde ni jinūcoo de ñuu Pafos jeē suni íne nuū Chipre. Te yūcuan ní cajini de nuū iin tēe hebreo nání Barjesús. Te tēe tásí cúu de, te cāhān stahú de jeē iin tēe nacani jñuhun Yaā Dios cúu de.

⁷ Te tēe tásí un jéjníñu de nuū gobernador Sergio Paulo, te tēe ndíchí cúu gobernador ún. Te ni cana de Bernabé jīn Saulo jeē cúni nahín de jñuhun Yaā Dios.

⁸ Te tēe tásí un suni nání de Elimas. Te ndúcu ndéyí de casi de jeē ma cándje gobernador ún.

⁹ Te Saulo jeē suni nání de Pablo, ni cunuú Espiritu Santo jīn de, te ni ndacoto váha de nuū tēe tásí un.

¹⁰ Te ni cahān de:

Tēe sáha jniñu néē stáhú ñáhan cúu ró, chí sēhe jexeén cúu ró te jési rō nuū tēcá jniñu ndaa. Te tu jécucñī rō jeē sáca núu ró síquī jñuhun ndaa maā Jítoho yō návaha ma candje ñāyuu nuū yá.

¹¹ Te maā Jítoho yō stóho ya rohó vijna, te cucuáá ró jeē ma cóto ga ró niandii jecu quivī, achí Pablo.

Te ni cunee-ni nuū tēe tásí un, te quéndāha quéhíyú de cuahān de ndúcu de ndé vé jniñ ndaha de stēen íchi nuū de quínuhun de.

¹² Yūcuán na te ní jini gobernador jeē súcuan ní cuu, te ní candje de jñuhun maā Jítoho yō, te náá ní de jini sōho de jñuhun ya.

Jeē ní coyūcu Pablo jīn Bernabé Antioquía ndañúú Pisidia

¹³ Yūcuán na te ní quendacoo Pablo jīn Bernabé jīn Juan ñuu Pafos, te ní quīvicoo de barco te cuangoo de ñuu Perge ndañúú Panflia. Te yūcuan ní cusān Juan, te cuanuhun de ñuu Jerusalén.

¹⁴ Te ni quendacoo Pablo jīn Bernabé ñuu Perge cuangoo de, te ní jinūcoo de ñuu Antioquía ndañúú Pisidia. Te quivī ndétatu ní quīvicoo de ini vehe i sinagoga, te ní cacucōo de.

¹⁵ Te ní cahu tutu ley yā jīn tutu ní catee tēe ni canacani jñuhun ya nde jenahán. Yūcuán na te tēe cácujeñnu ini vehe i sinagoga, vii-ni ní catajī de tēe cahān jīn Pablo jīn Bernabé:

Amigo, núu íyó jñuhun cahān ní jéē stihví ní ní ñāyuu yáha, te cahān ní na cúni nahín i núu súcuan, áchí de.

¹⁶ Yūcuán na te ní ndocuñī Pablo te ní sáha de seña jīn ndaha de jeē nahín-ni coo ñāyuu ún, te ní cahān de:

Nihín jñáhan ñuu yō Israel jīn nihín tēe jeē suni cáchiñúhún ní Yaā Dios, cuni nahín ní jijnáhan ní.

¹⁷ Máá Yáa Dios yohó ñāyuu Israel, ni nacāji ya jī yō jijnáhan de. Te ní ní jéē cáyūcu tátú de ñuu Egipto, te ní sáha ya jeē ní nducuehē de. Yūcuán na te jīn poder maā yá ní quenehen ya de nación Egipto.

¹⁸ Te uñ xico cuiyá ni cajica de nuñ ñuhun téhé, te ni jendeyi ni yá jiín de jeé ní castívi de.

¹⁹ Te ni snáa yá uxá nación Canaán, te ni jéhe ya ñuhun un núú táca jíi yó cóu tahú de.

²⁰ Yücuán na te ni jeni ya táca téé ni candacu jniñu nuñ de nájñuhun cuñ ciento uñ xico uxí cuiyá, nde quiví ní cotecu Samuel, téé ni nacani jñuhun ya.

²¹ Yücuán na te máá ñáuyu un ní cajicán i ñn rey, te ni jeni Yaá Dios Saúl ni ndacu de jniñu nuñ i uñ xico cuiyá. Te yucün Benjamín sêhe Cis ni cuu Saúl.

²² Te ni quenehen ya jniñu Saúl, te ni jeni ya David ní cuu de rey nuñ i. Te ni cahán cají yá jñuhun de: Cúsiñ ní rí jiín David sêhe Isaí, chí sáha de táca jéé cuní rí, achí yá.

²³ Te cahán gá Pablo:

Te sêhe yucün David ni cacu Jesús, Yaá ní jeni Yaá Dios jeé jnáma ya yohó ñáuyu Israel, chí súcuan ni jejnühun ya.

²⁴ Te nde ná tu quejéé Jesús nacani ya jñuhun nuñ ñáuyu, te ni nacani Juan jñuhun nuñ táca jnáhan ñuu yó Israel jeé na nácani ni i jeé stóo i cuéchi i, te cuandete i.

²⁵ Te nuñ cuácuyajini jeé cúu Juan, te ni cahán de: Cándetu ró jéé quíji Cristo, te jéni ní ró jeé ruhú cúu, te nasúu rí cúu. Chí quíji ya, te cújéhu ndasí yá jeé ni ndijén yá tu cújéhu rí tava rí, achí de.

²⁶ Amigo jijnáhan ní, táca nihín jéé cácuu yó sêhe yucün Abraham jíin táca nihín jéé suni cándiso iyo ní núú Yaá Dios, chí cuní Yaá Dios jeé na cuní yó jñuhun yáha jeé cahán ndese jnáma ya yohó.

²⁷ Chí táca ñáuyu ñuu Jerusalén jíin táca téé cácujeñu nuñ i, tu ní cájecühun ni i jeé Jesús cúu Cristo, Yaá ní jeni Yaá Dios jeé jnáma ya yohó. Te ndijnahan quiví ndétátu ní cajini sóho i jñuhun ni cacahu jeé ní catee téé ni canacani jñuhun Yaá Dios nde jenahán. Te vésú súcuan te tu ní cájecühun ni i, te ni candonda i ni cacahán i jeé na cúu yá. Te súcuan ni casquícu i siquí táca jñuhun jeé ní cacahán téé ni canacani jñuhun ya nde jenahán.

²⁸ Vésú tu ní cániñin i ni ñn cuéchi siquí yá jeé cúu yá, te ni cacahán nihin i jíin Pilato jeé na cúu yá.

²⁹ Te ná ni jinu ni squícu siquí yá táca jñuhun cahán nuñ tútu ii, te ni casnúu de ya jíicá cruz, te ni cachindúji de ya ñn yañ ní jete jíicá cáva.

³⁰ Te ní sáha Yaá Dios jeé ní natecu yá.

³¹ Te ñayuu Galilea jeé ní jéngoo jíin yá nde Jerusalén nde na técu yá, nuñ maá i ni steén ndijin yá maá yá cuehé quiví ná ní natecu yá, te ñayuu un cácuu jeé cánacani cáji jñuhun ya nuñ táca gá jnáhan yó hebreo vijna.

³² Te máá ná jijnáhan ná cánacani ná jñuhun vâha yáha núú ní jijnáhan ní jéé súcuan ni jejnühun ya nuñ táca jíi yó.

³³ Te jñuhun yáha ní squícu Yaá Dios nuñ maá yó jeé cácuu yó sêhe yucün de, chí ni nastécu yá Jesús. Chí suhva cáhán salmo uñ jeé cahán yá jiín Sêhe ya Jesús: Máá ró cúu Sêhe ri, te vijna ni sajéhu ri rohó jéé cúu ri Tatá ró, achí yá.

³⁴ Te ni nastécu yá Sêhe ya Jesús návâha ma tehyú cuiti yá, chí suhva cáhán tutu ii jeé ni cáhán Yaá Dios nde jenahán: Te nihín maá ró táca jéé váha ni jejnühun ri nuñ David, achí.

³⁵ Te suni súcuan cáhán inga salmo jeé ní tee David jñuhun jeé cahán Jesús jíin Yáa Dios: Ma cuáha ni jñuhun tehyú ná, chí jéjñiñu ná núú ní te maní ní jíin ná, achí.

³⁶ Te David chí jíin yó jeé ní jejniñu de nuñ ñáuyu ní cotecu de jíin, nájñuhun ni cuní Yaá Dios. Te ni jihí de, te ni quindúji de nájñuhun ni quindúji táca jíi yó, te ni tehyú de.

³⁷ Te Jesús, Yaá ní nastécu Yaá Dios, chí tu ní téhyú cuiti yá.

³⁸ Jeé yúcuán jíin ñühún jecühun ni ní, amigo, jeé Jesús cúu Yaá cóne cáhu ni nuñ táca cuéchi yó.

³⁹ Chí ni canducú ní ndahva ni cuéchi ní jéé squícu ní ley jeé ní jéhe ya nuñ Moisés, te tu ní cúu ndahvâ cuéchi ní súcuan. Te Jesús cúu Yaá ndáhva ndihi cuéchi ñayuu jeé cácandje i táca jéé ní sáha ya jehé i.

⁴⁰ Núu súcuan te coto ní jíináhan ní jéé ma ndóho ní táca castigo jeé ní cacahán téé ni canacani jñuhun Yaá Dios nde jenahán, chí suhva ni cahán Yaá Dios:

⁴¹ Táca rohó ñáuyu jeé casacatâ, na cóto ró na castigo xeén quíji siquí ró,

te naa ni ró coto ró, te cuu ró.

Chí tiempo maá ró te sáha ri jniñu xeén

jeé ma cándije cuiti ró jeé súcuan sáha ri vésú nacani ñayuu jñuhun un núú ró, achí yá.

Achí Pablo.

⁴² Te ni quendacoo Pablo jíin táca jnáhan de vehe ii sinagoga jnáhan hebreo de. Te ñayuu sáin nación ni cacahán ndahú i jíin de jeé inga quiví ndétátú nacani tucu de jñuhun yáha núú i.

⁴³ Te ni jité ñayuu un cuángoo i. Te cuehé ñayuu hebreo jíin ñayuu sáin nación jeé ní cacandje sahán hebreo te cáchiñuhún i nuñ Yaá Dios, cuangoo i jíin Pablo jíin Bernabé. Te ni cacahán nihin de jíin i jeé na cuñiñ nihin i jíin jñuhun jeé maní Yaá Dios jíin i.

⁴⁴ Te quiví ndétátú inga semana te je yajni ndihi ñayuu ñuu un ní candutútú i jeé cúni nahín i jñuhun Yaá Dios.

⁴⁵ Te nuñ ní cajini téé hebreo jeé ní candutútú cuehé ñayuu, te ni cacucúésün ni de, te ni cacahán de jeé násúu jñuhun vâha cúu jeé steén Pablo, te ni cacahán neé de nuñ Pablo.

⁴⁶ Yücuán na te jéhu-ni ni cacahán Pablo jíin Bernabé, achí de:

Cánuú jéé xíhna gā nuū maá ní jeé cácuu ní jnánhan ñuu yō hebreo nacani ná jnúhun Yaā Dios, te tu ní cājetáhú ní. Núu súcuan te cuēchi máá ní cúu jeé ma nihín tahú ní cotecu ní ní cáni. Te vijna te quinacani ná jnúhun ya nuū ñáyuu táca nación jeé tu cájini i jnúhun ya.

⁴⁷ Chi suhva ni ndacu máá Jítoho yō jniñu nuū na jijnáhan ná:

Ní jeni ri rohó jéé cúu ró nájñúhun luz jeé steén ini anuá ñayuu táca nación, chí ní ñáyiví steén rō jnúhun ri nuū ñáyuu jeé jnáma ri i, áchí yá.

Achí de.

⁴⁸ Te ñayuu sán nación, nuū ní cajini sōho i jnúhun yáha te ni cacusií teyí ní i. Te ni cacahān i jeé yōhoyo vāha jnúhun cúu jnúhun máá Jítoho yō, te táca ñáyuu jeé ní nacāji Yaā Dios i jeé cótecu i ní cáni, ní cacandíje i.

⁴⁹ Te ni jité jnúhun máá Jítoho yō cuahān ní región yūcuán.

⁵⁰ Te ñuu Antioquía cáyucú ñahan cácuu nuū te cáchiñúhún ña Yaā Dios. Te tēe hebreo ní cascáhán de ña, te suni ní cascáhán de tēe cácujeñnu ñuu ún, te ní cajito xeēn i Pablo jíin Bernabé te nde ní cascánuu i de cuangoo de.

⁵¹ Te ní cascóyo de ticachā jehé de jeé steén de jeé iyó cuéchi i. Te ní jinúcoo de ñuu Iconio.

⁵² Te vésu súcuan te ñayuu cácandíje un ní cunuú Espiritu Santo jíin i, te cácusí teyí ní i.

Jeé ní coyūcu Pablo jíin Bernabé ñuu Iconio

14

¹ Te ñuu Iconio ní quívicoo Pablo jíin Bernabé ini vehe i sinagoga jnánhan de hebreo. Te jíin jnúhun jeé ní canacani de te ní candíje cuehē jnánhan de hebreo, te suni súcuan cuehē ñayuu sán nación ní cacandíje i.

² Te jnánhan de hebreo jeé tu ní cácandíje, ní cascáhán de ñayuu sán nación, te ní cajeni ní i jeé násū ñáyuu vāha cácuu ñayuu cácandíje.

³ Te ní caquendōo Pablo jíin Bernabé yūcuan cuéhē gā quiví. Te jéñnu-ni ní canacani de jnúhun Jítoho yō, chí cácuacáñnu ní de ya jeé vāha quihín jniñu un sáha ya. Te máá yá chí ní steén yá jeé iyó ndáa jnúhun jeé yōhoyo vāha ní yá jíin i jeé cánacani de, chí ní jéhe ya jeé sáha de jniñu jéñnu jeé steén jeé cujéñnu ya.

⁴ Te ñayuu ñuu un ní cacusiín ní i jijnáhan i, sava i jíin tēe hebreo jeé tu cácandíje de Jesús, te sava ga i jíin tēe apóstol.

⁵ Te ñayuu hebreo jíin ñayuu sán nación jíin tēe cácuu tohō ní casquijnáhan jnúhun jeé sáha xeēn jíin Pablo jíin Bernabé, jíin jéé cuáha yuū xini de núú.

⁶ Te ní cajini de jeé súcuan cácani sáha, te ní cajinu de cuangoo de nde ñuu Listra jíin ñuu

Derbe ndañúu Licaonia jíin táca ñuu yajni yūcuán.

⁷ Te yūcuan ní canacani de jnúhun jeé jnáma ya yohó.

Jeé ní cajéhe i yuū xini Pablo ini ñuu Listra

⁸ Te ñuu Listra néne iin tēe jeé tu cúu caca, te tu jica cuiti de chí nde quiví ní cacu de cácójó de.

⁹ Tēe un ní jini sōho de jnúhun jeé cahán Pablo, te ní jito vāha Pablo nuū de, te ní jini de jeé candíje vāha tēe un jéé ndúvāha de.

¹⁰ Te ní cahān jee Pablo jíin de:

Ndocuñí, condichi rō, achí de.

Te ní scánda tēe un máá de ní nucóndichi-ni de, te ní quejéé de caca de.

¹¹ Te ní cajini ñayuu ún jniñu jéñnu jeé ní sáha Pablo, te ní cacahān jee i jíin yuhu máá i jeé cúu yuhu Licaonia:

Ní cuun yāa ní quecoo nuū yō, te cájica nájñúhun cájica tēe, áchí i.

¹² Te ní cacahān i jeé Bernabé cúu yāa Júpiter, te Pablo cúu yāa Mercurio chí Pablo cúu tēe nácani jnúhun.

¹³ Te yajni yuñúu un néne veñúhun yāa Júpiter. Te máá sūtú jeniñu ini veñúhun un ní quihín de stiquí jijnáhan ti te ní scutú de ti ita te vēji de nde nuū quiví i yuñúu, te máá de jíin ñáyuu ñuu un cácani de cahni de stiquí un sócó de nuū Bernabé jíin Pablo nuú.

¹⁴ Te Bernabé jíin Pablo, tēe cácuu apóstol, ní cajito de jeé súcuan cácani ñayuu un sáha i, te ní candatá de sahma de jeé steén de jeé caství ndasí i jeé casáha i súcuan. Te ní quenendava de ní quívicoo de mēñū ñáyuu cuehē ún, te ní cacana jee de:

¹⁵ Tátá jijnáhan ní, ma sáha cuiti ní súcuan, chí sañá suni tēe-ni cácuu ná nájñúhun máá ní jijnáhan ní. Te vējicoo ná nacani ná jnúhun vāha Yaā Dios nuū ní, chí cahān na jíin ní jeé ma sáha ga ní táca jniñu yáha jéé tu ndé jeniñu cuiti, chí sa suhva na chíñúhún ní máá Yāa Dios, Yāa técu, Yāa ní sáha andiví jíin ñáyiví jíin ndute mar jíin táca gá jeé iyó ní cáñnu.

¹⁶ Te nde jenahán ní jéhe ya jnúhun jeé na sáha táca ñáyuu modo cácani máá i.

¹⁷ Te vésu súcuan te ní ní steén yā ndese Yāa cúu ya, chí máni sáha ya jniñu vāha jíin yó, chí scúan ya saū, te sáha ya jeé cúu vāha itu yō, te jéhe ya jeé jini ñúhún yó návāha caji yō te coo sí ní yó, achí ndindúú de.

¹⁸ Te vésu súcuan ní cacahān de, te yōhoyo uhú ní cajesi de nuū ñáyuu un návāha tú sócó i stiquí un núú de jeé chíñúhún i ndindúú de.

¹⁹ Yūcuán na te ní quecoo jecu tēe hebreo ñuu Antioquía jíin ñuu Iconio, te ní cascáhán de ñayuu cuehē ún, te ní cajéhe i yuū xini Pablo. Te ní caquenehen i de yatá ñúú ún, chí ní cajeni ní i jeé jé ní jihí de.

²⁰ Te tēe cácandíje ní cacondúu de Pablo, te ní ndonda Pablo, te ní ndiví de ini ñuu. Te

inga quiví ni quihin de ichi cuahān de jín Bernabé nde ñuu Derbe.

²¹ Te ini ñuu un ní canacani de jñuhun jeē jnáma ya ñayuu, te ni cacandíje cuehē ñayuu ni casáha de. Te ni canandicó de cuanuhun de ñuu Lистра jín ñuu Iconio jín ñuu Antioquía.

²² Te ni cahije ga ni ñayuu cácandíje yúcuan ní casáha de. Te ni castíhví ni de i jeē na cuñi ñihin i jín jñuhun ya, chi ni cacahān de jeē niní quiji cuehē jñundóho siquí yō te yúcuan na te jinū yō ñuu nuū ndácu Yaā Dios jniñu.

²³ Te tãcá ñuu ni cajeni de tēe jéhu cándiso jniñu condito de ñayuu cácandíje. Te ni cahíyo ndite ni Pablo jín Bernabé nuū yā, te ni cajicān tahú de, te ni cacahān de jín máá Jítoho yō jeē na cóto ya ñayuu ún chi cácandíje i máá yá.

Jeē cuánuhun tucu Pablo jín Bernabé ñuu Antioquía ndañú Stria

²⁴ Te ni cayāha de cuango de región Písidia, te ni najinūcoo de región Panfilia.

²⁵ Te ni canacani de jñuhun ya ini ñuu Perge región Panfilia, te sáa te cuango de ñuu Atalia.

²⁶ Te yúcuan ní quivícoo de barco, te ni najinūcoo de ñuu Antioquía. Te ñuu yúcuan cúu nuū ní cajicān tahú ñayuu nuū Yaā Dios jehē de jeē na chindéé ñáhán yá de jeē quíngoo de nacani de jñuhun. Te ni jinu jniñu, te ni najinūcoo de ñuu ún.

²⁷ Te nuū ní najinūcoo de yúcuan, te ni casáha de junta jín ñayuu cácandíje, te ni canacani de jñuhun tãcá ndese cuehē jeē váha ni sáha Yaā Dios jín de, chi ni jēhe ya jñuhun jeē suni candíje ñayuu tãcá nación jeē tu ní cájini i jñuhun ya.

²⁸ Te ni caquendóo de yúcuan cuehē quiví jín ñayuu cácandíje.

Siquí junta ñuu Jerusalén

15

¹ Yúcuan na te jecu tēe Judea ni quiji-coo de ñuu Antioquía, te ni castéén de nuū tãcá hermano jeē núu tu sáha i circuncidar, najñuhun cáhán ley jeē ni jēhe ya nuū Moisés, te tú na modo cácu i.

² Te Pablo jín Bernabé ni catejñahan de jín tēe ún, te tu ní cúndaā. Te jeē yúcuan ní candajnühún de jeē quíngoo Pablo jín Bernabé jín jecu gá tēe cácandíje un ndé ñuu Jerusalén, te yúcuan ndajnühún de siquí jñuhun yáha jín tēe cácu apóstol jín tēe jéhu cándiso jniñu nuū ñayuu cácandíje yúcuan.

³ Te ñayuu cácandíje un ní canachuhun íchi i de. Te ni cayāha de ichi Fenicia jín Samaria, te cánacani de jñuhun jeē suni ñayuu tãca gá nación jeē tu ní cájini i jñuhun ya, ni castóo i jniñu jeē tu íyó ndáa te ni cacandíje i Yaā Dios. Te yóhyo ni cacusí ni

tãcá hermano jeē ní canihín de jñuhun jeē súcuan ni cacandíje ñayuu ún.

⁴ Te ni najinūcoo de ñuu Jerusalén, te ñayuu cácandíje yúcuan jín tēe apóstol jín tēe jéhu cándiso jniñu nuū ñayuu un, ní cacusí ni de jeē ní najinūcoo jñahan de ún. Te Pablo jín Bernabé ni canacani de tãca jñuhun ndese cuehē jeē váha ni sáha ya siquí jniñu jeē ní canacani de jñuhun ya.

⁵ Te sava tēe grupo fariseo jeē cácandíje ni candocuiñi te ni cacahān:

Ñayuu sín nación jeē cácandíje i Jesús, jini ñühún jéé sáha i circuncidar najñuhun casáha máá yó, te cánuu ndacu yó jniñu nuū i jeē na squícu i ley jeē ni jēhe ya nuū Moisés, áchi.

⁶ Te tãca tēe apóstol jín tãca tēe jéhu cándiso jniñu nuū ñayuu cácandíje, ni candutútú de junta návāha ndajnühún de te sándaā de siquí jñuhun yáha.

⁷ Te tãcá de ni cacahān de ndese cájini ni de. Yúcuan na te ni ndocuiñi Pedro, te ni cahān de:

Hermano jijnáhan ní, je cájini váha ni jéé je íyó tiempo jeē ní nacáji Yaā Dios sáña jéé quihín na núu ñayuu sín nación te nacani ná jñuhun nuū i jeē jnáma ya i, návāha candíje i Jesucristo.

⁸ Te Yaā Dios chi jini yā ndese cáa ánuá ndihi ñayuu, te ni steén yā jeé jetáhú yá i, chi suni ni jēhe ya Espíritu Santo nuū i jijnáhan i, najñuhun ni jēhe ya nuū máá yó.

⁹ Te inuú-ni sáha ya jín yó jín máá i, chi siquí jeé suni ni cacandíje i jñuhun jeé jnáma ya i, te jeé yúcuan ní sándoo ya anuá i nuū tãca cuechi i.

¹⁰ Te vijna zñau cancuni ní ndacu ní jniñu jeé na squícu i ley un? Chi tu núñahan ni Yaā Dios jeé súcuan. Chi cáculi ní tee ní jniñu yí yáha siquí ñayuu cácandíje ún, te ni tãca jí yō tu ní cácuendeyí de squícu de, te ni máá yó.

¹¹ Chi sa suhva cácandíje yó jéé jnáma ya yohó súcuan-ni siquí jeé yóhyo váha ni máá Jítoho yō Jesús jín yó, te suni súcuan-ni jnáma ya máá i, nasúu siquí jeé squícu i ley un, áchi de.

¹² Yúcuan na te tēe cuehē un ní cacuu nayúu de, te ni cajini nahín de jñuhun cacahān Bernabé jín Pablo. Chi ni castühún de jeé ni jēhe ya poder jeé ní casáha de tãcá jniñu jéhu jeé steén jeé cujéhu ya, ni cajito ñayuu tãcá nación jeé tu cájini i jñuhun ya.

¹³ Te nuū ní jinu ni cacahān Pablo jín Bernabé, te ni cahān Jacobo:

Hermano jijnáhan ní, cuni sōho ní na cáhán na.

¹⁴ Ni nacani Simón Pedro jñuhun ndese ni quejéé nuū jniñu jeé jnáma Yaā Dios ñayuu tãcá nación jeé tu cájini i jñuhun ya, chi suni mēhñu máá i nacáji ya ñayuu jeé ndúu i ñayuu máá yá.

¹⁵ Te quijnáhan jnūhun ni cahān de yāha jín jnūhun ni catee tēe ni canacani jnūhun Yaā Dios nde jenahán jeē yosó núu tútu iī:

¹⁶ Achí Yāa Dios:

Nájnūhun ni cotúú vehe David cúu jeē tuá ndácu sēhe yucūn de jniñu, nájnūhun ni ndacu máá de jniñu nde jenahán.

Te iin quivī te ndee rī

te jeē nasáha ri vehe de cúu jeē sáha ri jeē nandacu Sēhe yucūn de jniñu.

¹⁷ Súcuán sáha ri návāha táca gá ñayuu na nánducú i ruhū

nde jín ñayuu táca nación jeē tu cájini jnūhun ri, táca i jeē cána ri i candje i ruhū.

¹⁸ Súcuán cáhán máá Jítoho yō, te nde jenahán ní steén yā jnūhun yáha núu ñayuu.

Achí tutu iī.

¹⁹ Jeē yúcuán jéni ni na jéē ñayuu táca gá nación jeē ní castóo i jniñu jeē tu iyó ndáa te ni cacandje i máá Yāa Dios, ma stáhān yō i jeē ndácu yō jniñu jeē squicu i ley Moisés.

²⁰ Chi sa suhva na tēe yó carta quihín nuū i jeē ma cáji i ndeyu jeē ní sócō nuū ídolo, te ma cáca jnéni ní, te ma cáji i cūñu quiti jeē jíhi jeē tu jéti niñī tī, te ni ma cáji i niñī.

²¹ Jnūhun yáha-ni tee yó quihín nuū i nájnūhun je cásteén nde jenahán. Chi nde jenahán je iyó tēe cásteén jnūhun ley jeē ní jēhe ya nuū Moisés, te ndijnahan quivī ndétātu cácahu de ley un ini vehe iī sinagoga táca ñuu, áchí Jacobo.

²² Yúcuán na te tēe apóstol, jín tēe jéhu cándiso jniñu, jín ndivíi ñayuu cácadje, ni cacundaā ní de jeē nacāji de tēe quingoo jín Pablo jín Bernabé nde ñuu Antioquía. Te tēe ni canacāji de un cácuu Silas jín Judas, te inga sihví de cúu Barsabás. Te cándiso jniñu de nuū táca hermano cácadje.

²³ Te ni cajendēca de carta jeē cahán suhva:

Máá ná cácuu tēe apóstol, jín táca tēe jéhu cándiso jniñu nuū ñayuu cácadje, jín táca gá hermano yō. Te cátee ná carta yáha cuájeē nuū ní jijnáhan ní, hermano, jeē cácuu ní ñayuu sín nación jeē cáyūcu ní ñuu Antioquía jín Siria jín Cilicia. Cuandeyí ni ní jijnáhan ní.

²⁴ Ni cajini jnūhun ná jéē ní quendacoo sava jnāhan ná yáha ní jengoo nuū ní, te jín jnūhun jeē ní cacahān de te ni casáha jeē ní canacani ndasí ní, te ni cacuxíi ní ní, chí cándacu de jniñu jeē sáha ní circuncidar jín jéē squicu ní jniñu cáhán ley jenahán jéē ní jēhe ya nuū Moisés. Te nasūu sáña ní cátaji tēe un jéē jeē de nuū ní.

²⁵ Jeē yúcuán ní cajeni ni ná, te inuú-ni ni cacundaā ní ná, te ni nacāji ná tēe cuajēcoo nuū ní jín úu hermano yō jeē maní yō jín, cúu Bernabé jín Pablo.

²⁶ Te ndindúú de je ni catana de máá de nuū jnūdóho vēsú na cúu de jeē siquī jnūhun Jítoho yō Jesucristo.

²⁷ Núu súcuán te cátaji ná Judas jín Silas jeē nuū ní, te suni nájnūhun cáhán carta yáha suni súcuán castúhūn de nuū ní jijnáhan ní.

²⁸ Chí máá Espíritu Santo ní steén yā iin modo jeē ní cacundaā ni na jéē ma tēe ná táca jniñu yíi ley Moisés siquī ní, chí máá-ni jniñu yáha jéē cánuú gá:

²⁹ Ma cáji ni táca jéē ní casocō nuū ídolo, ni ma cáji ni niñī ní quiti jeē jíhi jeē tu jéti niñī tī, te ma cáca jnéni ní. Te vāha squicu ní núu tuá sáha ní táca jéē yáha. Súcuán na cóo te sándeiyí ní ní, áchí carta.

³⁰ Yúcuán na te tēe quingoo un cuángoo de nde ñuu Antioquía. Te ni cacana de xini ñayuu cácadje ni candutútu de junta, te ni cajēhe de carta un núu i.

³¹ Te ni cacahu i, te ni candusī ni i jeē ní níhín i jnūhun ndeyí ni nuū carta ún.

³² Te suni tēe canacani jnūhun Yaā Dios cácuu Judas jín Silas, te jín cuéhē jnūhun ní cacahān de te ni candundeyí ní táca hermano un, te ni cahije ga ni i jín jnūhun ya.

³³ Te ní coyúcú de yúcuán jecu quivī. Yúcuán na te hermano yúcuán ní canacu-atáhú i nuū de jeē quinhun de nuū tēe jeē ní catajé de.

³⁴ Te Silas ni nujnahan ni de ni quendōo de yúcuán.

³⁵ Te suni ni caquendōo Pablo jín Bernabé ñuu Antioquía, te máá de jín sava ga tēe ní cásteén de te ni canacani de jnūhun vāha máá Jítoho yō.

Jeē quihín Pablo inga jínu nacani de jnūhun ya

³⁶ Te ni cuu ga quivī, te ni cahán Pablo jín Bernabé:

Vijna te na quícondēhe yó táca hermano yō ndijnahan ñuu nuū ní nacani yó jnūhun máá Jítoho yō, na cōndēhe yó ndese cáhiyo i, áchí de.

³⁷ Te Juan jeē suni nání de Marcos, cúni Bernabé jeē quihín tēe un jín de.

³⁸ Te tu ní cúni Pablo jeē quihín tēe un jín de, chí nde Panfilia ni cusán Marcos nuū Pablo jín Bernabé, chí tuá ní chindéé ñáhán de ndindúú tēe un siquī jniñu ya nde saá.

³⁹ Te nahán ní candajnūhun Pablo jín Bernabé, te tu ní cacundaā ni de siquī Marcos, te ni cacusán de. Te Bernabé ní jeca de Marcos, te ni quivícoo de barco cuangoo de nde Chipre, ñuhun jeē íne sán nuū ndúte.

⁴⁰ Te Pablo ní nacāji de Silas quihín jín de. Te táca hermano cácadje ni cajicān tahú de nuū máá Jítoho yō jeē siquī jeē vāha ni yā te na chindéé ñáhán yá Pablo. Te cuahán Silas jín Pablo.

41 Te ni cajica cuu de nã Siria jiin Cilicia. Te tãca grupo ñayuu cãcandije ni cahije ga ni i jiin jnũhun ya ni casãha de.

Jeẽ cuahãn Timoteo jiin Pablo jiin Silas

16

1 Yũcuãn na te sãã te ni jinũ Pablo jiin Silas ñuu Derbe jiin ñuu Listra. Te yũcuãn nẽne iin tẽe suchi cãndije, nãní i Timoteo. Sẽhe yí iin ñahan hebreo cõu i, te ñahan cãndije cõu ña. Te tátã i chi tẽe griego cõu de.

2 Te tãcã hermano ñuu Listra jiin ñuu Iconio cãjejnũhũn de Timoteo.

3 Te cõni Pablo condeca de Timoteo quihĩn de jiin i. Te ni cahãn Pablo jeẽ quihĩn i cuu i circuncidar, chi tu cõni Pablo jeẽ cahãn ñayuu hebreo jeẽ tu ni squĩcu Timoteo costumbre un, chi ndihĩ ñayuu cãjini i jeẽ tẽe griego cõu tátã i.

4 Te tãcã ñuu nuũ cuãngoo de te ni castũhũn de nuũ ñayuu cãcandije jeẽ na squĩcu i mãã jniñũ jeẽ ni casãndaã tẽe apõstol jiin tãca tẽe jẽhu cãyũcũ ñuu Jerusalẽn jeẽ cãndiso jniñũ nuũ ñayuu cãcandije.

5 Te ñayuu cãcandije ni cahije ga ni i. Te ndijnahan quivĩ ni cacandije cuehẽ gã ñayuu.

Jeẽ ní jito ndijin Pablo iin tẽe ñuu Macedonia

6 Te tu ni jẽhe Espĩritu Santo yã jnũhun jeẽ nãcãni de jnũhun ya nã Asia. Jeẽ yũcuãn ni cayãha de ichi Frigia jiin Galacia cuangoo de.

7 Te ni jinũcõo de nuũ quijnãhan Misia jiin Bitinia. Te cãcuni de quingoo de Bitinia, te mãã Espĩritu Jesũs tu ni jẽhe ya jnũhun quingoo de.

8 Te ni cayãha de iin lado Misia cuangoo de ñuu Troas jeẽ iine yajni yumar.

9 Te iin jecuãã te nãjnũhun iin jẽni ni jito ndijin Pablo, te ni jito de jeẽ indichi iin tẽe ñuu Macedonia nuũ de cãhãn ndahũ jiin de: Nehen ni ñuu nã Macedonia te chindẽẽ ñãhãn ni sãña jijnãhan nã, áchĩ.

10 Te sũcãn ni jito ndijin de. Yũcuãn na te sãña, Lucas, ni quijnãhan nã jiin de. Te ni casãtũhva nã jiin de jijnãhan de jeẽ quingoo nã Macedonia, chi ni cajini cajĩ nã jeẽ mãã Yãã Dios tãjĩ yã sãña jijnãhan nã jẽe castũhun nã nuũ ñayuu yũcuãn jnũhun jnama ya i.

Jeẽ ní coyũcu Pablo jiin Silas ñuu Filipos

11 Te jiin barco ni quendacõo nã ñuu Troas, te cuangoo ndaã-ni nã ndẽ Samotracia, ñuhun jeẽ iine sãĩn nuũ ndũte. Te inga quivĩ ni jinũcõo nã ñuu Neãpolis.

12 Te yũcuãn ni quendacõo nã, te ni jinũcõo nã ñuu Filipos jeẽ cõu ñuu cujẽhnu ga iine Macedonia, chi mãã ñayuu ñuu Roma ni casãha i ñuu i ún. Te ni coyũcu nã ñuu Filipos jecu quivĩ.

13 Te iin quivĩ ndẽtãtu ni quendacõo nã ñuu ún, te ni jengoo nã iin yuyũte, chi yũcuãn cõu iin lugar nuũ cãjicãn tahũ ñayuu. Te ni cacucõo nã, te ni canacãni nã jnũhun ya nuũ tãcã ñahan ni canataca yũcuãn.

14 Te iin ña nãní Lidia jeẽ vẽji ña ñuu Tiatira, xico ña sahma ndihĩ jẽe yãhu ga ndeẽ. Te mãã ña nĩnĩ chĩfũhũn ña Yãã Dios. Te ni jini sõho ña jnũhun cãnacãni nã, te mãã Jĩtoho yõ Jesũs ni sãha ya jeẽ ni candije ña jnũhun jnãma ya ña jeẽ ni cãhãn Pablo.

15 Te ni jendute ña nde jiin ñayuu cãyũcũ vehe ña, te ni cahãn ndahũ ña jiin nã:

Nũu cãcucãhnu ni ni jẽe candije ndije nã mãã Jĩtoho yõ, te cuajẽe ni coyũcu ni vehe nã, áchĩ ña.

Te ni cana fuerza ña sãña jijnãhan nã.

16 Te iin quivĩ te cuangoo tucu nã suu lugar nuũ jengoo ñayuu cãjicãn tahũ. Te ni canajnãhan nã jiin iin sũchi sãhĩ jẽe ñũhun tachĩ ini i, te mãã un sãha jeẽ cahãn i tãcã ndese coo te cũndaã jeẽ cahãn i. Te sũchĩ un ni cãjeen patrõn i, nãvãha niĩn de cuehẽ xũhun squĩ jeẽ cãstũhũn i nuũ iin iin ñayuu ndese coo ichi nũ.

17 Te sũchĩ un ndĩquĩn i sãña jijnãhan nã cãna jee i:

Tẽe yãha cãjejnĩũ de nuũ Yãã Dios, Yãã cujẽhnu tẽyĩ, te cãcastũhũn de ndese cãcu ni nũu cuẽchi nĩ jijnãhan nã, áchĩ i.

18 Te cuehẽ quivĩ ni cuu sũcãn te nde ni jnanini ni Pablo. Te ni ndiõ cõto de nuũ i, te ni cahãn de jiin tãchĩ ún:

Jiĩn poder mãã Jesucristo ndãcu ri jniñũ nuũ rõ jeẽ na quẽnda rõ ini i quihĩn rõ, áchĩ de.

Te hora un ni quenda-ni cuahãn.

19 Yũcuãn na te ni cajini patrõn i jeẽ ma niĩn gã i xũhũn cuu de, te jeẽ yũcuãn ni cajni de Pablo jiin Silas cuangoo jiin de nde vehe juzgado nuũ cãyũcu tõhõ.

20 Te ni cajeni ún de nuũ juez, tẽe casãndaã jniñũ, te ni cacahãn:

Tẽe hebreo cãcuu tẽe yãha, te cãstõnda de ñayuu ñuu yõ cũvãã i.

21 Te cãjequin de inga costumbre jeẽ ma cõu cuatãhũ cuĩtĩ yõ, ni ma cõu sãha yõ, chi tu jẽhe ley naciõn yõ jnũhun, chi ñayuu naciõn Roma cãcuu yõ, áchĩ.

22 Te suni ni candonda ñayuu squĩ Pablo jiin Silas. Te tẽe cãcuu juez ni candacu de jniñũ jeẽ na quẽnda sahma ndĩndũ de te canĩ yujnu squĩ de.

23 Te nuũ ni jĩnu ni cacãni tẽyĩ un de, te ni casquĩvĩ de vecãa. Te ni candacu jniñũ nuũ tẽe ndiõ vecãa jeẽ na cõndito ndasĩ de jeẽ ma cãcu ndĩndũ tẽe ún.

24 Te jeẽ sũcãn ni tahũ jniñũ nuũ tẽe ndiõ vecãa te ni squĩvĩ de Pablo jiin Silas nde ichi ini gã, te ni squĩvĩ jehẽ de tĩsin yujnu ndeẽ yãũ te ni cajihni de.

²⁵ Te nuú ní cuu sava ñuu, te cájicān tahú Pablo jíin Silas, te cájita de yaa íi nuú maá Yáa Dios. Te ñayuu cáhīin jíin de vecāa un ní cajini nahín i.

²⁶ Te sanaa-ni te ni jnāa nihin téyí, te nde nuú cimientu vecāa un ní canda. Te ni canune-ni yéhyí vecāa ún, te ni canandajī-ni cadena jeē cánuhnī táca ñayuu ún.

²⁷ Te ni natahú ni tēe ndító vecāa, te ni jito de jeē núne yéhyí vecāa ún. Te ni tava de espada jeē cáhni de máa de núú, chi ni jeni ni de jeē ndivii cuiiti ñayuu cáhīin vecāa un cuángoo í.

²⁸ Te ni cana jee Pablo:

Ma cáhni ní máa ní, chí cáhīin ndihí ná, áchí de.

²⁹ Yūcuán na te máa tée ndító vecāa ni cana de jeē na quíndeca í ñuhūn, te yachí ni quívi de iní vecāa. Te ni jecuñi yití de nuú Pablo jíin Silas, te quísi i de jeē yūhú de.

³⁰ Te ni quenehen de Pablo jíin Silas, te ni cajnúhún de:

Tátā, ¿na vé cánuú sáha ná te jnama ya sañá? áchí de.

³¹ Te ni cacahān de jíin tée ún:

Candíje ní táca jéē ní sáha Jítoho yō Jesu-cristo jehé ní te cácu ní, te suni súcuan cácu ndihí ñayuu cáyūcú vehe ní, áchí de.

³² Te ni canacani de jnúhun máa Jítoho yō nuú tée un jíin núú táca ñayuu cáyūcú vehe de.

³³ Te suu máa jecuáa yúcuan ní nacate tée ndító vecāa un núú ní catují Pablo jíin Silas jeē ní cacani yujnu siquí de. Yūcuán na te ni jendute de jíin ndihí ñayuu cáyūcú vehe de.

³⁴ Te ni jeca de Pablo jíin Silas cuahān de jíin vehe de, te ni jēhe de staā ni cayejí de, te cácusí ni ndihí de vehe de jeē ní cacandíje de Yāa Dios.

³⁵ Te nuú ní cundijin, te tēe cácuu juez ni catají de policía cuangoo jíin jnúhun jeē na siáá tée ndító vecāa un Pablo jíin Silas quingoo de.

³⁶ Te tēe ndító vecāa un ní castúhún de jnúhun yáha núú Pablo:

Tēe cácuu juez ní catají de jnúhun vēji jeē na siáá na níhīn quíngoo ní. Núú súcuan te quendacoo ní quihīn ní, te cuandeyí ní ní, áchí de.

³⁷ Te ni cahān Pablo jíin policía:

Cuehē ñayuu ní cajito i jeē ní cacani de sañá, te ní tu ní cásañdaā de xihna gā núu ndaā jeē iyó cuehí ná. Te ní cachuhun de sañá vecāa, vēsú cácuu ná séhe nación Roma, te iyó ley jeē ma cúu sáha súcuan jíin ñayuu cácuu séhe nación Roma. Te vijna zá quenehen sañá de sañá cácuni de naún? Ma cúu cuiiti. Na quícoo máa de quenehen de sañá jínáhan ná, áchí Pablo.

³⁸ Te ni canandíó cóo policía ní castúhún de jnúhun yáha núú tée cácuu juez, te ní

cayúhú de jeē ní cajini sōho de jnúhun jeē séhe nación Roma cácuu Pablo jíin Silas.

³⁹ Te ni quecoo tēe cácuu juez ún, te yōhyo ní cacahān ndahú jíin Pablo jíin Silas jeē na cóne cáhnu ní de. Te ní caquenehen de vecāa ún, te ní cacahān ndahú jíin de jeē na quéndacoo de ñuu un quíngoo de.

⁴⁰ Yūcuán na te ni quendacoo de vecāa, te ní jengoo tucu de vehe Lidia, te ní cacahān de jnúhun ndeyí ní jíin táca hermano. Te ní caquihin de ichí cuangoo de.

Jeē ní cacuvaā ñayuu Tesalónica

17

¹ Te Pablo jíin Silas ní cayāha de ñuu Anfípolis jíin ñuu Apolonia cuangoo de, te ní jinúcoo de ñuu Tesalónica nuú iyó in vehe íi sinagoga jnáhan de hebreo.

² Te ní coyūcú de yúcuan únī semana, te táca quívi ndétātu jéhēn Pablo vehe íi sinagoga, nájnúhun sáha sáha de, te ní nacani de jnúhun ya nuú tée un.

³ Te jíin jnúhun cáhān tutu íi ní steén de jeē súcuan ní jini núhūn ndoho Cristo jeē cúu yā te natecu yā. Te ní cahān de:

Jnúhun nacani ná núú ní cúu jnúhun Jesús, te máa yá cúu Cristo, Yāa ní jeni Yāa Dios jeē jnáma ya yohó, áchí de.

⁴ Te ní cacandíje sava jnáhan de hebreo jíin cuehē ñayuu griego jeē cáchiñúhún i Yāa Dios, jíin cuehē ñahan cácuu nuú, te ní nduu inuú ní i jíin Pablo jíin Silas.

⁵ Yūcuán na te yōhyo ní cacucésún ní jnáhan de hebreo jeē tu cácandíje, te ní castútú tée cunéé jéē cájica cúxí-ni, te ní quejéé cácana ndee cuangoo. Te súcuan ní casaca núu de xiní ñayuu ñuu ún. Te ní jengoo de vehe Jasón cámanducú de Pablo jíin Silas jeē jnā de tée un quíndeca de nuú ñayuu cuehē.

⁶ Te tu ní cácanihīn de, te ní cañuhun de Jasón jíin sava ga hermano cuangoo de jíin núú tohó ñuu ún. Te jeē siquí Pablo jíin Silas ní cacana jee de:

Tēe jeē castíví xiní ñayuu ní ñáyiví, je ní quecoo de nde yáhá.

⁷ Te máa Jasón ní jēhe núu vehe cáyūcu tée ún. Te tēe ún tu cájetáhú de ley maá rey yohó ñayuu Roma, chí sa suhva cacahān de jeē cájetáhú de nuú inga rey jeē naní Jesús, áchí de jínáhan de.

⁸ Te ñayuu jíin tée cácuu tohó ní cajini sōho i jnúhun yáha, te ní cacuvaā i siquí.

⁹ Te Jasón jíin táca gā hermano ní castóo de xúhún de, chí ní cacahān tohó un jíin de jeē nde núu tají de Pablo jíin Silas quingoo de inga ñuu, yūcuán na te nacuaña tohó un xúhún de. Te súcuan te ní casiaá de Jasón jíin táca gā hermano cuangoo de.

Jeē ní coyūcu Pablo jíin Silas ñuu Berea

¹⁰ Yūcuán na te tǎcá hermano un, yachī-ni ni cascáca de Pablo jín Silas jecuáa un, cuángoo de nde ñuu Berea. Te nuū ni jínūcoo de yūcuán, te ni quivicoo de vehe ñi sinagoga jnáhan ñuu de hebreo.

¹¹ Te jnáhan ñuu de hebreo cáyūcu yūcuán, vāha ga ni maá de vēsū jnáhan ñuu de hebreo cáyūcū ñuu Tesalónica, chí vāha ni cacusi ni de jín jnúhun ni cacahān Pablo jín Silas. Te ndijnahan quiví cānanducū yūcūn de nuū tūtu ñi nuū sūcuán cāhān chí tuū.

¹² Jeē yūcuán ní cacandije cuēhē jnáhan ñuu de hebreo te suni nde jín cuēhē ñayuu griego, cúu tēe cúu ñahan cácuu nuū.

¹³ Te jnáhan ñuu de hebreo cáyūcū ñuu Tesalónica ni cajini jnúhun de jeē suni nde ñuu Berea nácani Pablo jnúhun Yaā Dios, te ni caquihin de ichi cuangoo de Berea, te suni yūcuán ní castónnda de ñayuu siquī Pablo.

¹⁴ Yūcuán na te tǎcá hermano ni catajī-ni de Pablo cuahān de nde yumar. Te ni ndōo Silas jín Timoteo ñuu Berea.

¹⁵ Te jecu hermano ni cajendēca de Pablo nde ñuu Atenas. Te ni cahān Pablo jín de jeē cahān de jín Silas jín Timoteo jeē na quingoo yachī de nuū Pablo. Te vendicoo de ñuu Berea.

Jeē ni ñne Pablo ñuu Atenas

¹⁶ Te níni ndétu Pablo jeē jinūcoo Silas jín Timoteo nuū de ñuu Atenas, te ni jini de jeē ñayuu ñuu ún yōhō cáchiñúhún i ídolo, te ni nacani cuihyá ni de.

¹⁷ Te ñni vehe ñi sinagoga ni cahān de jnúhun ya jín jnáhan ñuu de hebreo jín táca gá tēe cáchiñúhún Yāā Dios. Te suni táca quiví ni nacani de jnúhun ya nuū táca ñayuu cáhīn nuū yáhu.

¹⁸ Te sava tēe cáscuáha jnúhun jeē castéén grupo epicúreo, jín inga sava tēe cáscuáha jnúhun jeē castéén grupo estoico, ni caque-jeé cacahān jín Pablo. Te sava ni cacahān:

¿Na jnúhun cāhān tēe tlóhlé yāha? áchí.

Te sava ga de ni cacahān:

Tēe nácani jnúhun táca yāā jeē tu cánevāha yó cúu de, áchí.

Súcuán ni cacahān de, chí nácani Pablo jnúhun vāha Jesús jeē ní natecu yā mēhñu ndīyi.

¹⁹ Te ni cajeca de Pablo cuangoo de, te ni jinūcoo de nde lugar nuū naní Areópago nuū cāndutútú ñayuu cāndacu jniñu, te ni cacahān de:

Cáculi ná cachi ni nuū na jnúhun jeē jé steén ni.

²⁰ Chí cāhān ni jnúhun jeē ná tu cuni cuiñi na jínáhan ná, te jeē yūcuán cáculi ná jecūhun ni na síquī táca jnúhun yáha, áchí jín de.

²¹ Chí táca ñayuu ñuu Atenas jín táca ñayuu inga ñuu jeē cáyūcu nuū i yūcuán, tuá na inga

jniñu cáculi gā ni i jín chí máa-ni jeē cuni nahín i jnúhun jeē chí jé cāhān i jnúhun jeē.

²² Te índichi Pablo mēhñu ñayuu ni cāndutútú nuū naní Areópago, te ni cahān de:

Tēe ñuu Atenas jínáhan ní, jito ná jé yóhō cáchiñúhún ní yāā maá ní.

²³ Chí ni jica nuu ná, te ni jecondēhe ná nuū jeē cáchiñúhún ní, te ni jito ná ñi altar jeē yosó jnúhun yáha: Yáha cúu altar yāā jeē ná tu cuni yō jnúhun ya, áchí. Te máa Yāā un jé cáchiñúhún ní, vēsū ná tu cuni ni jnúhun ya, suu jnúhun Yāā un cúu jeē nácani ná nuū ní vijna.

²⁴ Chí Yāā un cúu Yāā jeē ni sáha ñayiví jín táca ndihi jeē iyó, te máa yá cúu jito andiví jín ñayiví, te tu ndéé yá ñi veñuhun cásáha ñayuu.

²⁵ Te ni tu cúmani ni ñi nuū yā jeē cuáha ñayuu nuū yā, chí máa yá sáha jeē técu ñayuu, jín jé stáa i tachí i, jín jé nihín i ndihi jeē jini ñúhún i.

²⁶ Te ni sáha ya jeē chíjī ñi-ni yucún ni tahū táca ñayuu jeē ní nduu táca nación, návāha coyúcú i ní cáhnu ñayiví, te ni tana yā cuiyā cotecu ñayuu jín lugar coyúcú i jínáhan i.

²⁷ Te súcuán ni sáha ya chí cúni yā jeē nanducú yó yá, chí nuū nanducú yó yá te cuni yō jeē iyó yá, chí yajni-ni cúu ya jín ñi yó.

²⁸ Chí máa yá sáha jeē iyó yó jín jé cátecu yó jín jé cáanda yó. Chí suni súcuán ni cacahān sava tēe ñuu ni jé cātava yaa: Suni nde yucún maá yá cácuu yó, áchí.

²⁹ Te nuū yucún Yāā Dios cácuu yó, te ma cáni ni yō jeē ídolo yo chí plata chí yúu cúu ya, chí cájini ni ñayuu jeē súcuán cáa ya, te súcuán cásávāha i ídolo.

³⁰ Te ni jendeyí ni yá siquī jeē tu ní cájecūhun ni i ní ndé saá, te vijna chí ndácu ya jniñu jeē ñayuu ní cáhnu ñayiví na nácani ni i jeē stóo i cuēchi i.

³¹ Chí Yāā Dios, je ni jeni ya quiví jeē ndāá sándaā yá siquī ñayuu ñayiví, te ni jeni ya Jesús jeē maá yá sándaā. Te je ni steén cají Yāā Dios nuū táca ñayuu jeē maá yá ni jeni Jesús, chí ni nastécu yā Jesús, áchí Pablo.

³² Te jeē ní cajini sóho i jnúhun jeē nátecu ndīyi te sava i ni cacahān catá i, te sava ga i ni cacahān i:

Vāha te nuū cuu cuni sóho na jnúhun cāhān ni ndé inga jinu, áchí i.

³³ Te ni quenda Pablo mēhñu ñayuu un cuahān de.

³⁴ Te cuahān jecu ñayuu jín Pablo, te ni cacandije. Te ñi de cúu Dionisio, tēe ndútútú jín tēe cáculjñu cásáha junta nuū naní Areópago, jín ñi ñahan naní Dámaris, jín jecu gā i.

Jeē ni ñne Pablo ñuu Corinto

18

1 Yūcuán na te ni quenda Pablo ñuu Ate-nas, te cuahān de nde ñuu Corinto.

2 Te yūcuan ní jito de nuū ñin jnāhan ñuu de hebreo, nání Aquila, te tēe región Ponto cúu de. Te sáa jecu-ni tiempo ni quee de jíin ñasihí de Priscila jeē ni quenda de Italia, chí rey Claudio ni ndacu de jniñu jeē na quéndacoo tāca ñayuu hebreo ñuu Roma, jeē cúu capital Italia. Te ni jinū Pablo vehe Aquila jíin Priscila jeē cáyucú de ñuu Corinto.

3 Te suni jniñu sáha tēe un sáha Pablo, chí cáqucu de ñi cuu vehe. Te ni quendōo Pablo jíin tēe ún, te ni casájniñu de.

4 Te tāca quívī ndetātu ní jehēn Pablo vehe ñi sinagoga ni nacani de jnūhun ya, te ni nducú ndéyí de jeē na cándíje ñayuu jnūhun Jesús, cúu jnāhan ñuu de hebreo jíin ñayuu tācá naciōn jeē tu ní cájini i jnūhun ya.

5 Te ni jinūcōo Silas jíin Timoteo ñuu Corinto jeē véjicoo de nde Macedonia. Yūcuán na te tuá na inga jniñu ní sáha Pablo, chí máni jnūhun ya nācani cájī de nuū ñayuu cácuo jnāhan de hebreo, jeē máa Jesús cúu ya Cristo, Yāā jeē cáñūhun ni i quiji ya.

6 Te ni caquejeé i ni cacahān i síquī jnūhun ún, te ni cacahān xeēn i nuū Pablo. Te máa de ni caja de sahma de jeē cúu seña jeē stōo de i jíin cuēchi i, te ni cahān de jíin i:

Cuēchi máa ní cúu jeē jnahñū ndetū ní núu súcuan, te nasūu cuēchi máa ná cúu. Nde vijna te quihñ na nuū ñayuu tācá naciōn jeē tu cájini i jnūhun ya, te nacani ná jnūhun ya nuū í, áchí de.

7 Te ni quenda de ini vehe ñi sinagoga, te ni jinū de vehe ñin tēe nání Justo ni condee de. Te chíñūhún tēe un Yāā Dios, te vehe tēe un néne yajni xiin véhe ñi sinagoga.

8 Te Crispo, tēe cújēhnu ini vehe ñi sinagoga, ni candíje de máa Jítoho yō nde jíin ndíhi ñayuu vehe de. Te cuehē ñayuu ñuu Corinto ni cajini nahñ i jnūhun nācani Pablo, te ni cacandíje í, te ni cajendute i.

9 Te ñin jecuáā ni sáha máa Jítoho yō jeē ní jito ndijin Pablo yā ni cahān yā jíin de:

Ma yūhu ró ni ma cási rō yuhu ró, chí níni nacani ró jnūhun ri.

10 Chí ndíto ri rohó, te ma cúu sáha xeēn ni ñin ñayuu jíin ró. Nacani ró jnūhun ri, chí coo cuehē ñayuu candíje jnūhun ri ñuu yáha, áchí yá.

11 Te ni condee Pablo yūcuán ñin cuiyā yosáva ni steén de jnūhun Yāā Dios nuū ñayuu ún.

12 Te ná cúu Galión gobernador Acaya, te ñayuu hebreo jeē cúu jnāhan ñuu Pablo, ñin cáhnu-ni ni candonda i síquī Pablo. Te ni cajeca i de cuango i jíin de nde vehe juzgado.

13 Te ni cacahān i jíin Galión:

Tēe yáha yōhoyo scáhán de tāca ñayuu jeē inga modo chíñūhún i Yāā Dios, suu ñin modo jeē cúu contra síquī ley, áchí i.

14 Te quejeé Pablo cahān de núu, te ni cahān-ni Galión jíin ñayuu hebreo un:

Ñayuu hebreo jijnāhan ró, núu ñin cuēchi xeēn cúu, te cánuú cuni nahñ ri jnūhun cácahān rō núu.

15 Te tuú, chí máni síquī jnūhun-ni jíin síquī ley máa ró jíin síquī tēe cástéen cúu. Te na sándaā máa ró síquī jniñu yáha, chí tu sándaā ri síquī máa ñin jeē súcuan-ni, áchí de.

16 Te ni cahān de nuū i jeē na quíngoo i fuera.

17 Yūcuán na te ñayuu griego ni cajni i Sóstenes, tēe cújēhnu ini vehe ñi sinagoga, te máa fuera yehyí vehe juzgado ni cacani i de, te Galión chí tu ní sáha cuiti de cuenta.

Jeē ní najinū Pablo ñuu Antioquia, te cuahān de vuelta uní jeē nacani de jnūhun ya

18 Te cuehē gā quívī ni condee Pablo ñuu Corinto. Yūcuán na te ni nacuatáhu de nuū tācá hermano yūcuan, te Aquila jíin ñasihí de Priscila cuango de jíin Pablo, te ni jinūcōo de ñuu Cencrea. Te yūcuan ní saté líi Pablo xiní de, te súcuan steén de jeē síquī de nuū Yāā Dios jeē ní jéjnūhun de. Te ni quívicoo de barco jíin Aquila jíin Priscila quihñ de región Siria.

19 Te ni jinūcōo de ñuu Efeso, te yūcuan ní caquendōo Aquila jíin Priscila. Te ni jehēn-ni Pablo vehe ñi sinagoga, te ni cahān de jnūhun ya jíin jnāhan ñuu de hebreo jeē cándututú yūcuan.

20 Te ni cacahān ndahú i jíin de jeē na cónēne de jecu gā quívī jíin i, te tu ní jéhe de jnūhun.

21 Chí ni nacuatáhu de nuū i, te ni cahān de:

Cánuú jéē nuhūn ná ñuu Jerusalén cone ná vico. Te núu cúni Yāā Dios te ndee tucu ná núu ní, áchí de.

Te ni quenda de ñuu Efeso, te ni quívī de barco cuahān de.

22 Te ni jinū de ñuu Cesarea, te ni jehēn de ñuu Jerusalén. Te nuū ní ndíhi ni cahān de jíin grupo ñayuu cácaandíje yūcuán, te cuanuhun de ñuu Antioquia.

23 Te ni coyucú de yūcuán jecu quívī, te sáa te ni quenda tucu de cuahān de ni jica cuu de ná Galacia jíin Frigia. Te ñayuu cácaandíje ni cahije ga ni i jíin jnūhun ya ní sáha de.

Jeē ní nacani Apolos jnūhun Jesús ñuu Efeso

24 Te ñuu Efeso ni quee ñin tēe hebreo nání Apolos, te tēe ñuu Alejandría cúu de. Te vāha nācani de jnūhun ya, chí vāha jíni de jnūhun jeē cahān tutu íi.

25 Te je ni cutūhva vāha tēe un jíin jnūhun máa Jítoho yō Jesús, vésú jíni de máni máa jnūhun ya jeē ní steén Juan ná ni scuándute

de ñayuu, te ndíhví ni de steén cají de jñūhun ya nuū ñayuu.

²⁶ Te jéhnū-ni ni nacani de jñūhun ya ini vehe i sinagoga. Te ni cajini sōho Aquila jín Priscila jñūhun nācani de, te ni cajeca de Apolos cuangoo sán de, te ni cacastūhun yúcūn ndindúú de jñūhun ya jeē ná tu cuni Apolos.

²⁷ Te cúní Apolos quihīn de nde región Acaya. Te je cácanđije sava ñayuu yúcuan ní sáha Yaā Dios siquī jeē váha ni yā. Te táca hermano ñuu Efeso ni cachindéé ñáhán i de, chi ni catee i carta quihīn de jín nuū ñayuu cácanđije cáyūcú Acaya jeē na cuátáhu i Apolos. Te nuū ní jínū de yūcuán, te váha ni chindéé ñáhán de táca ñayuu cácanđije un jín jñūhun ya.

²⁸ Te nuū táca ñayuu ñuu un ndé jín jñáhan ñuu de hebreo jeē cáyūcu yúcuan, ní steén cají de ndese cástívi táca jñáhan hebreo de siquī jñūhun ya. Te tu ní cánihīn jñáhan de un jñūhun cahán siquī jeē ní steén de, chi jín jéé cahán tutu i ní steén de jeē Jesús cúu Cristo, Yaā jeē cáñūhun ni de quiji ya.

Jeē ni íne Pablo ñuu Efeso

19

¹ Te níni néne Apolos ñuu Corinto, te ni yáha Pablo ichi siquī ñuu Efeso, te ni nanuu de ni jinū de máá ñuu ún. Te yúcuan ní nijñáhan de jín tjini tēe cácanđije.

² Te ni cajñūhún de tēe ún:

¿A ní canihīn ní Espíritu Santo ná ni cacandije ní, chí ná tuú? áchí de.

Te ni cacahán de jín Pablo:

Tuú, chí ní ná tu nihīn na jñūhun jeē iyó Espíritu Santo, achí de.

³ Yūcuán na te ní cahán Pablo:

¿Na siquī ní cajendute ní núu súcuan? áchí de.

Te ni cacahán de:

Ni cajendute ná siquī jñūhun ní steén Juan, achí de.

⁴ Te ni cahán Pablo:

Jeē ní scuándute Juan ñayuu cúu jeē ní steén de jeē na nācani ní i jeē stóo i cuēchi i, te ní cahán de jeē na cándije i máá Yāa quiji jeē cúu Cristo Jesús, áchí Pablo.

⁵ Te nuū ní cajini sōho tēe un jñūhun yáha, te ní cajendute de jeē ní cacandije de máá Jítoho yó Jesús.

⁶ Te ní soó Pablo ndindúú ndaha de xiní táca tēe ún, te ni quívi ní Espíritu Santo ini anuá de jñáhan de, te ni cacahán de sán sán yuhu te ní canacani de jñūhun ya.

⁷ Te ní iyo nájnūhun uxí uú jñáhan tēe.

⁸ Te uní yoó ní jehēn jehēn Pablo vehe i sinagoga. Te jéhnū ni nacani de jñūhun ya, te ní nducú ndéyí de jeē na cándije ñayuu jñūhun ndese ndácu Yaā Dios jniñū.

⁹ Yūcuán na te sava i ní cacaniñhi ní i te tu ní cácanđije i, chí sa ní cacahán neé i siquī jñūhun váha Yaā Dios jín ñayuu cántaca. Jeē yúcuan ní cujiyo-ni Pablo nuū ñayuu ún, te ñayuu cácanđije cuangoo i jín de. Te ndijnahan quívi ní steén de nuū ñayuu ún ini escuela iñ tēe nání Tiranno.

¹⁰ Te súcuan ní sáha de uú cuiyā, te táca ñayuu cáyūcu Asia, cúu ñayuu hebreo cúu ñayuu táca gá nación, ní cajini sōho i jñūhun máá Jítoho yó Jesús.

¹¹ Te ní jēhe Yaā Dios poder nuū Pablo jeē sáha de cuehē jniñū jéhnū téyí.

¹² Te nde pañú jín sahna jeē ní jni de ní cajengoo jín nuū ñayuu cácuñū, te ní canduváha-ni i cuehyí cándoho i, te ní quenda-coo tachí ini i cuangoo.

¹³ Te jecu tēe hebreo cájica cuu de jeē quénehen de tachí ini ñayuu, te ní cajeni siquí ní de jeē suni jín poder máá Jítoho yó Jesús quenehen de tachí, te suhva ní cacahán de jín táca táchi:

Jín poder Jesús jeē nācani Pablo jñūhun ya, cáhán níhin rí jín ró jeē na quénda ró quihīn ró, achí de.

¹⁴ Te súcuan ní casáha uxā sēhe yí iñ tēe hebreo nání Esceva, cúu de iñ sutú cujéhnū.

¹⁵ Te ná ní casáha de, te ní cahán-ni tachí ún:

Je jíní rí Jesús, te suni jíní rí Pablo. Te róho jínáhan ró ¿ndé tēe cácuu ró jéé cuatáhu rí rohó? áchí jín de.

¹⁶ Te tēe ndóho tachí un ní ndonda de, te ní cundeyí de siquí ndihúxá tēe ún. Te ní sáha xeēn ndasí de jín ndé ní catují te ní cacuvichí lí ní quendacoo vehe un ní cajinu cuangoo.

¹⁷ Te jñūhun yáha ní cajini táca ñayuu cáyūcú ini ñuu Efeso, cúu ñayuu hebreo cúu ñayuu táca gá nación, te yōhoyo ní cayúhú i, te ní cacahán i jeē yóhoyo cújéhnū máá Jítoho yó Jesús.

¹⁸ Te cuehē ñayuu jeē ní cacandije ní quijicoo i nuū Pablo ní nacani ndaā i jñūhun táca jniñū neé ní casáha i.

¹⁹ Te cuehē i jeē ní casáha jniñū tásí ní jinūcoo i cándiso i tutu i, te ní cajehmu i tutu un jito nuū táca ñayuu. Te ní catava i cuenta nasaa ndéé tutu ní cáyú ún, te ní cajini i jee uú xico uxí mil xūhun plata cúu.

²⁰ Te ní jitē jñūhun máá Jítoho yó cuahán, te ndihi ñayuu ní cajini i jeē cujéhnū ndasí jñūhun ya.

²¹ Te nuū ní ndihi táca jniñū yáha, te jeni téyí ní Pablo jeē quihīn de Macedonia jín Acaya, te sáa te najinū de ñuu Jerusalén. Te ní cahán de jeē na nájinū de ñuu Jerusalén, yūcuán na te jini ñūhún quihīn de nde ñuu Roma.

²² Te uú tēe jeē cáchindéé ñáhán jín Pablo cúu Timoteo jín Erasto, te ní scáнду de

ndindúú téē yāhá cuángoo de nde Macedonia, te ni quendoo máá de Asia jecu gā quiví.

Jeē ní cacuvaā ñayuu ñuu Efeso

²³ Te suu quiví ún yōhyo ni candonda ñayuu siquí jñūhun ya.

²⁴ Chí ní iyo ñin téē sájniñu siquí plata, nání de Demetrio. Te máá de jín ndihí téē cásájniñu jín de, cániñin de cuehē xūhún, chí jín plata casáha de vehe lulí jéē modo veñūhun ídolo i jeē cúu yaā Diana.

²⁵ Te Demetrio ni nastútú de téē cásájniñu jín de jín táca gá téē jee suni jniñu yúcuan casáha, te ni cahān de:

Tátā, cájini ní jéē siquí jniñu casáha yó yáha vāha cániñin yō xūhún.

²⁶ Te cájito ní te cájini sōho ní jéē ñin téē nání Pablo chí cáhān de jeē násūu yaā cácuu jéē casáha ñayuu. Te je ni scandíje de cuehē ñayuu, nasūu máá ñin-ni ñuu Efeso yāhá chí ní cáhnu Asia.

²⁷ Te quíyūhú ní na jéē cahān ñayuu jeē tu ndé jéjniñu jeē casáha yó. Te sanaa te suni súcuan cahān i coto i máá veñūhun yaā síhí Diana jeē cujéhnu, te suni sájéē ní i nuñ yaā Diana, te ma cúu ga cujéhnu ya vēsú ndiví ñayuu Asia jín ñayuu ní cáhnu ñayiví cáchiñūhún i ya vijna, áchí de.

²⁸ Súcuan ní cajini sōho de jñūhun yáha te yōhyo ní caquiti ní de, te ni cacana jee de:

Cújéhnu téyí Diana, yaā cúu patrona ñuu yō Efeso, achí de.

²⁹ Te ñayuu ñuu Efeso ni cacuvaā i, te ñin cáhnu-ni ni candonda i ni cajni i Gayo jín Aristarco cuangoo i jín de nde vehe nuñ cándutúú ñayuu casáha i junta. Te ndindúú téē un cácuu téē Macedonia, te cájica de jín Pablo.

³⁰ Te cúní Pablo quiví de nuñ ñayuu cuehē un cáhān de jín i, te ñayuu cácandíje tu ní cájéhe i jñūhun quihín de.

³¹ Te suni sava tohō jeē cácuu amigo de cáyūcu Asia, ní catají jñūhun cuahān nuñ de, cácahān ndahú jín de jeē ma quihín de nuñ ní cacutúú ñayuu ún.

³² Te ñayuu ní cacutúú un, sava i ní cacana jee i ñin jñūhun te sava ga i inga jñūhun, te súcuan ní cacuvaā téyí i, te cuehē i ní tu cájini cuiti i na siquí cúu jeē ní cacutúú i.

³³ Te sava téē hebreo ní cajeni de ñin jñāhan de jeē naní Alejandro nuñ ñayuu cuehē ún, te ní cacastūhún de nuñ téē ún na siquí cúu jeē cácuvaā i. Yūcuán na te Alejandro ní sáha de seña jín ndaha de jeē na cúnayúú ñayuu, chí cúní de cahān de jín i jeē násūu cuéchi táca ñayuu hebreo cúu.

³⁴ Te ní canacuni ñayuu un jéē téē hebreo cúu de, te jeē yúcuan ní cacana jee téyí gá i nájnūhun uū hora:

Cújéhnu téyí Diana, yaā cúu patrona ñuu yō Efeso, achí i.

³⁵ Yūcuán na te ní cacunahín ñayuu ní sáha téē cúu secretario ñuu ún, te ní cahān de:

Nihín ñayuu ñuu yō Efeso, ndihí ñayuu chí je cájini i jeē cándito vāha yó veñūhun yaā Diana jín imagen Diana jeē ní ñinga nde andiví.

³⁶ Te ní ñin chí ma cúu cahān jeē tú ndaā jñūhun yáha. Núu súcuan te vāha ga na cási ní yuhu ní, te ma sáha yachí ní ñin jeē tu ní nácani vāha ní ní siquí.

³⁷ Chí téē yáha ní caquindecá ní de yāhá vēsú tu ní casáha de ní ñin cuéchi siquí Diana yō, ní tu ní cácahān ndevāha de ní ñin jñūhun siquí.

³⁸ Te Demetrio jín táca gá téē jeē ñin-ni jniñu casáha jín de, núu cácuni de cahān de cuéchi siquí ñin téē, te na quíngoo de nde vehe juzgado nuñ cáyūcu juez, téē cásándaā jniñu, te yūcuán cundaā siquí de jíjñāhan de.

³⁹ Te núu iyó jñūhun jeē ma cúu cundaā yūcuán, te jini fñūhun cundaā nuñ ñin junta nájnūhun tájñuní ley.

⁴⁰ Chí yúhú ná jeē sanaa te cahān táca tóhō Roma jeē siquí gobierno de ní candonda yó, chí ma nihín yō jñūhun castūhun yó na siquí cúu jeē ní cacutúú yó ní cacuvaā yō vijna, áchí de.

⁴¹ Te nuñ ní ndihí ní cahān secretario jñūhun yáha, te ni cajitē ñayuu un cuángoo.

Jeē ní jéhēn Pablo Macedonia jín Grecia

20

¹ Te ná ní yáha jéē ní cacuvaā ñayuu, te ní cana Pablo ñayuu cácandíje, te ní jeni íchí de i. Te ní cañundee jñāhan de jín Pablo jeē ní nacuatáhu de, te cuahān de Macedonia.

² Te ní jica cuu de táca ñuu yúcuan. Te jín cuehē jñūhun ní stihví ní de táca hermano cácandíje. Te ní jinū de Grecia.

³ Te ní condee de yúcuan úní yoō. Te je yajni quihín de jín barco nde Siria nuñ, te máá quiví ún te ní nihín de jñūhun jeē jñāhan ñuu de hebreo ní casquijñāhan jñūhun jeē ndonda síquí de íchí nuñ quihín de, te jeē yúcuan ní nacani ní de te cuahān tucu de íchí Macedonia.

⁴ Te ní cahíyo sava téē cájica jín Pablo, te cácaní de Sópater ñuu Berea, Aristarco jín téē nání Segundo nde ñuu Tesalónica, Gayo ñuu Derbe, Tíquico jín Trófimo nde Asia, jín Timoteo.

⁵ Te ní cacandu téē yáha, te cándētu de Pablo jín sáña, Lucas, nde ñuu Troas.

⁶ Te nuñ ní yáha vico jeē cáyeji i pan jeē tu yíhí levadura, te jín barco ní quendacoo ná ñuu Filipos, te nde nuñ uhún quiví te ní canajñāhan ná jín de nde ñuu Troas. Te ñuu yúcuan ní coyūcu ná uxá quiví.

Jeē ní ñe Pablo ñuu Troas

⁷ Te máá quiví domingo ní candutúú ñayuu cácandíje jeē cáji i pan, nájnūhun ní

steén maá Jítóho yō jeē núcūhun ni yō siquī yā. Te ni steén Pablo jnūhun nuū ñáyuu ún. Te siquī jeē inga quivī un jíní ñúhún quenda de quihín de, te nahán ní nacani de jnūhun nde ni cuñú.

⁸ Te vehe yósó jnāhan cūu vehe ún. Te nde cuarto xinī nuū ní candutútú ná un ní iyo cuehē lámpara ni cundijin.

⁹ Te ñn sūchi yí nání i Eutico, néne i yuhu ventana. Te jeē ní cunahán nācani Pablo jnūhun, te yōhyo jí i māhná, te ni quixī-ni i. Te nde piso unī un ní inga i nde nuū ñúhun. Te je ni jihí i ni candonehen de i.

¹⁰ Yūcuán na te ni nuu Pablo te ní jita ndeyi de ni canehen de i ni ñunundee de i, te ni cahān de:

Ma yūhu ní jijnāhan ní, chi ni natecu i, áchí de.

¹¹ Te ni ndaa Pablo, te ni yeji de pan jíin i jijnāhan i jeē cánucūhun ni de siquī yā. Te nahán gá ni nacani de jnūhun nde cuacundijin. Yūcuán na te ni quenda de cuahān de.

¹² Te Eutico chi íyó váha i cuanuhun i jíin de jijnāhan de, te ndivii ñayuu ún yōhyo cácusī ni i.

Jeé ní quenda Pablo ñuu Troas cuahān de ñuu Mileto

¹³ Te ni quivicoo ná ini barco cuangoó ná. Te Pablo chi cúní de caca jéhé de, te ni cundaa jeé najnāhan ná jíin de nde ñuu Asón.

¹⁴ Te nuū ní canajnāhan ná jíin de ñuu Asón, te ni quiví de barco te cuangoó ná jíin de nde ñuu Mitilene.

¹⁵ Te yūcuán ní quendacoo tucu ná jíin barco te inga quiví ni jinūcoo ná xiin Quío, ñuhun jeē íne sán nuū ndúte. Te quiví unī ni jinūcoo ná Samos jeé súni nuū ndúte íne, te ni caquendoo ná Troglilio. Te quiví cuún ni jinūcoo ná ñuu Mileto.

¹⁶ Te tu ní jéngoo ná ñuu Efeso, chi jéni ni Pablo jeé yáha-ni de ñuu un quihín de, návaha ma cucuéé de Asia te naa tiempo nuú, chi núu de jinū yachí de ñuu Jerusalén cone de maá quiví Pentecostés núu na cūu.

Jeé ní jeni ichí Pablo tēe jéhu cándiso jnūñu nuū ñáyuu cácanđije ñuu Efeso

¹⁷ Te ná íne ga Pablo ñuu Mileto, te ni tají de jnūhun cuahān nde ñuu Efeso jeé na quijicoo tēe jéhu cándiso jnūñu nuū ñáyuu cácanđije yūcuán.

¹⁸ Te nuū ní queeco tēe ún, te ni cahān de:

Je cájini váha ní ndese ni jica ndaa na ndé ná ní quee nuú ná Asia te nde vijna.

¹⁹ Chi ní tiempo jeé ní íne ná jíin ní te nde vijna, jéjñiñu váha na siquī jnūñun maá Jítóho yō, te tu ní sándúxí ná maá ná. Te íyó jínu ní ndahyū na jéhé ñáyuu. Te ni ndóho ná jnūndóho ni casáha jnāhan ñuu ná hebreo, chi ní casquijnāhan jnūñun i siquī ná.

²⁰ Te cájini ni jéé tu ní táñuhún ná ni ñn, vesú ndese ga cácahān ñayuu siquī ná, chi ní

nacani ná ndihi jnūñun ya jeé quéndóo váha ní sáha. Te ni steén na jnūñun ya nuū ni jijnāhan ní, cūu nuū chitú cūu táca vehe ní.

²¹ Te inuū-ni jnūñun ni nacani ná nuū ndihi ní, cūu jnāhan ñuu ná hebreo cūu ñayuu táca gá nació, chi ní cahān na jéé na nācani ni ní jéé stóo ni cuéchi ní te na cándije ní maá Jítóho yō Jesucristo.

²² Te vijna chi ñúhun ichí ná quihín ná ñuu Jerusalén, chi stíhví ni Espíritu Santo saña quihín ná. Te tu jíin ná ndese ga coo jíin ná yūcuán.

²³ Te íyó ñn jeé jíiní na, cūu jeé chune i saña vecāa te quiji jnūndóho siquī ná, chi Espíritu Santo súcuán cáhān jíin ná ndijnahan ñuu nuú jica ná.

²⁴ Te ni tu sáha ná cuenta vesú na cáhni i saña, chi jeé cuní na cūu jeé na sínu váha ná jniñu jeé ní tee maá Jítóho yō Jesús siquī ná, te súcuán cusī ni ná. Te jniñu un cūu jeé nācani ná jnūñun váha ya nuū táca ñáyuu ndese váha ni Yā Dios jíin yó.

²⁵ Te je ni jica cuu ná, ní nacani ná jnūñun ya nuú ní ndese ndácu Yā Dios jniñu. Te vijna chi jíin na jéé ní ñn ní ma najnāhan ga yō nuū ñáyivi yáha.

²⁶ Jeé yūcuán cástūhun cájí ná nuū ni jijnāhan ní vijna jeé násūu cuéchi ná cūu núu ndé ñn ní stíví.

²⁷ Chi ní nacani ná nuū ní ndihi jnūñun Yā Dios jeé ní sándaá yā ndese coo, te tu ní quéndóo ni ñn jnūñun.

²⁸ Núu súcuán te coto váha ní maá ní jíin ndihi ñayuu cácanđije, chi Espíritu Santo ni jeni ya nihín jéé cóndito ní ñáyuu maá Jítóho yō, chi ní nacuaan ya i jíin níñi yā.

²⁹ Chi jeé quihín na te jíin na jéé quijicoo tēe cástáhu quivicoo mehñu ní, te nducú de snáa de jnūñun ni cajetáhu ñáyuu cácanđije, te xeén sáha jnūñun stáhu de nájñuhun xeén sáha yihí jeé cájehni tī lanchí.

³⁰ Te suni nuú grupo maá ní quejéé sava de cahān de jnūñun stáhu, te stáhu de sava ñayuu cácanđije jeé na cóndiquín i jnūñun stáhu steén de.

³¹ Jeé yūcuán condito ní jéé ma cóo súcuán. Te ma náa ni ní jéé uní cuiyā ndiquiví ndíñuu ni condíhví ndasí ní na ndé ndahyú na jéhé ní, ní jeni ichí ná ñn ñn ní jijnāhan ní.

³² Te vijna, hermano, jicán tahú na nuú Yā Dios jeé coto ya nihín. Chi jnūñun jeé váha ni yā ndíso poder sáha jeé íje ga ní jíin, te suu sáha jeé ñn quiví te cuāha ya tahú jeé ndujéhnu luu ní ndé jíin ndihi ñayuu ní nacáji ya jeé cóo ndoo coo íi i nuú yā.

³³ Tu ní nducú ná jeé nihín na xūhun chí sahma nuū ní ñn i.

³⁴ Chi je cájini váha ni jéé sa suhva ni sájñiñu nihín ná návaha nihín na jéé cótecu na ndé jíin táca tēe cájica jíin ná.

³⁵ Te níni ní steén na nuú ní jéé súcuán jíiní ñúhún sájñiñu yó návaha nihín yō jeé cuāha

yó núu ñayuu cúmaní nuú. Te ma nāá ni ni jnúhun jeé ni cahān maá Jítoho yō Jesús, chí suhva ni cahān yā: Ndetū gā quendōo yó jée cuáha yó vēsú jeé nihín yō, achí yá. Achí Pablo.

³⁶ Te ni ndihi ni cahān de tāca jnúhun yáha, te ni jecuíñi yití de, te ni jicān tahú de jíin ndihi tēe ún.

³⁷ Yūcuán na te ndihi de ni cajecunundee jnāhan de jíin Pablo ni catechúhú de jeé cáncuatáhú de, te ni candahyū de.

³⁸ Chí cácuuíhyá ndasí ni de jíin jnúhun ni cahān Pablo jeé ma ndácoto jnāhan ga de. Te cuangooní de jíin Pablo nde núu ín barco.

Jeé cuánuhun Pablo ñuu Jerusalén

21

¹ Yūcuán na te ni caquendōo tācá hermano ñuu Efeso, te ni quívicoo ná barco, te cuangooní ná ndé Cos. Te inga quiví ni jinūcoo ná Rodas, te yūcuan ní quendacoo ná te ni jinūcoo ná ñuu Pátara.

² Te ni cane in barco jeé quihín Fenicia, te ni quívicoo ná cuangooní.

³ Te nuú ní cajito ná núu Chipre jeé ine sñin nuú ndúte, te ni quendōo ichi lado jecó barco, chí ni cayāha ná cuangooní nde Siria. Te ni jinūcoo ná ñuu Tiro, chí yūcuan ndóo jeé ndíso barco ún.

⁴ Te ni jenanducú ná ñayuu cácan dije, te ni caquendōo ná jíin i uxā quiví. Te maá Espiritu Santo ní steén nuú i jeé quiji jnūndóho siquí Pablo ñuu Jerusalén, te jeé yūcuan ní cacahān i jíin de jeé ma quihín de.

⁵ Te ni yāha uxā quiví ún, te ni quendacoo ná. Te tāca tēe cácan dije jíin ñasihí de jíin séhe de ni cachuhun ichi de saña ní jengoo de jíin ná nde yata núu, te ni cajecuíñi yití ná jíin de yumar te ni cajicān tahú ná.

⁶ Te ni cañunundee jnāhan ná ní canacuatáhú ná yūcuán, te ni quívicoo ná barco cuangooní. Te ni canandió cóo de cuanungoo de vehe de.

⁷ Te ni quendacoo ná ñuu Tiro cuangooní ná jíin barco, te ni jinūcoo ná ñuu Tolemaida ní quendacoo ná iní barco. Te yūcuan ní jengoo ná ní cacahān na jíin tāca hermano, te ni caquendōo ná jíin de in quiví.

⁸ Te inga quiví un ní cajica jéhe ná jíin Pablo, te ni jinūcoo ná ñuu Cesarea, te ni quívicoo ná vehe Felipe, tēe nácani jnúhun vāha ya. Tēe un cúu jnāhan jeé ndihúxá tēe jeé ní casaja staā nuú ñāhan viuda. Te ni caquendōo ná jíin de.

⁹ Te tēe un iyó cúun séhe síhí de jeé cáhiyo maá i, te cánacani i jnúhun Yaā Dios.

¹⁰ Te ni coyūcu ná yūcuán tijni quiví. Te ichi Judea ní quiji in tēe nácani jnúhun Yaā Dios, nání de Gababo.

¹¹ Te ni quee de nuú ná. Te ni quihin de sanchí Pablo, te ni jihni de ndaha de jíin jéhe de, te ni cahān de:

Suhva cahān Espiritu Santo. Jnāhan yó hebreo súcuan cuhni i tēe chí sanchí yāha iní ñuu Jerusalén, te nastúu i de nuú ñayuu sñin nación, achí de.

¹² Te jeé ní cajini sōho na jnúhun yāha te maá ná jíin tāca tēe cácan dije cáyūcú ñuu Cesarea ní cacahān ndahú ná jíin Pablo jeé ma quihín de ñuu Jerusalén.

¹³ Yūcuán na te ni cahān Pablo:

¿Najehē cándahyū ní jíināhan ní, te casáha ní jée cucuíhyá ní ná? Chí saña jeé iyó túhva ná jée nastúu maá jée cónuhni ná iní ñuu Jerusalén, chí suni jeé vēsú na cúu na jée siquí maá Jítoho yō Jesús, achí de.

¹⁴ Te jeé tu ní cúu cuiti casicoo ná, yūcuán na te sa suhva ní cacahān ná:

Na cóo ndese cúni maá Jítoho yō nuu súcuan, achí ná.

¹⁵ Yūcuan na te saá te ni casatúhva ná, te cuangooní ná ñuu Jerusalén.

¹⁶ Te suni jecu tēe ñuu Cesarea jeé cácan dije cuangooní de jíin ná. Suni cuahān in tēe Chipre nání de Mnasón, te je ni cuu cuehē cuiyá candije de. Te ná ní jinūcoo ná ñuu Jerusalén, te ni cacoyūcu ná vehe de.

Jeé ní jecandēhe Pablo Jacobo

¹⁷ Te nuú ní jinūcoo ná ñuu Jerusalén, te hermano cáyūcú ñuu ún yōhoyo ní cacusí ní de jeé ní jinūcoo ná.

¹⁸ Te inga quiví un ní cajengoo ná jíināhan ná jíin Pablo vehe Jacobo, te yūcuan ní candutútú tāca tēe jéhu cándiso jniñu nuú ñayuu cácan dije.

¹⁹ Te Pablo ní sáha de saludar tēe ún jíināhan de. Yūcuán na te ni castúhún de ndihi jniñu ní sáha Yaā Dios ná ní nacani de jnúhun ya nuú ñayuu tācá nación jeé tu cajini i jnúhun ya.

²⁰ Te ní cajini sōho de jnúhun yāha, te ní cacahān de jeé yōhoyo cújéhu Yaā Dios. Te ní cacahān de jíin Pablo:

Hermano, vijna te jini ní ná cuehē mil jnāhan ñuu yō hebreo ní cacandije i Jesús, te cacahān nihin i jeé cánuu squícu yó ley jeé ní jéhe ya nuú Moisés.

²¹ Te ní canihin i jnúhun cacahān jeé ství ní steén ní núu tāca jnāhan yó ñayuu hebreo cáyūcu jíicá i tāca gá nación, chí ní steén ní núu i jeé ma cuatáhú gá i nuú ley Moisés, ní ma sáha gá i circuncidar séhe i, ní ma cuatáhú gá i tāca gá jeé tajnúni jenahán.

²² ¿Ndese sáha ní núu súcuan? Chí cuni ñayuu un jée ní ndee ní te cutútú cuehē i.

²³ Suhva sáha ní núu súcuan. Yāha iyó cúun tēe jeé ní cajejnúhun de in jeé squícu de nuú Yaā Dios.

²⁴ Cueca ní tēe yāha quihín ní jíin de templo, te cuchi ní nasándoo ní maá ní jíin de

nuū yā, te cuaan ní jeē socó de nuū Yaā Dios jijnáhan de. Yūcuán na te cuu sātē de xiní de, te suu stéén jeē ní casquícu de ndíhi jeē ní cajénjūhun de nuū yā. Yūcuán na te cuni ndíhi ñayuu jeē tú ndaā tāca jnūhun ní cajini sōho i siquī ní, chí coto i jeē suni máá ní sa squícu ní ley yā.

²⁵ Te ñayuu tācá nación jeē násūu ñayuu hebreo cácuu i te ni cacandíje i ya, je ni catee ná carta cuahān nuū i jeē tu cánuú squícu i ley un, chí máá-ni jeē ma cáji i cūñu jeē ní sóco nuū ídolo ní niñí ní quiti jeē jihí jeē tu jéti niñí tí, te ní ma cáca jnéni í, áchí de.

Jeē ní cajni de Pablo ini templo

²⁶ Yūcuán na te ni jeca Pablo tēe ún, te inga quiví un ní cajichi de ní canasándoo de máá de nuū yā. Te ní quiví Pablo ini templo ní cachi de nuū sutú ní quiví jinu jeē nasándoo tēe un máá de nuū yā, te quindeca de quiti jeē socó de nuū yā.

²⁷ Yūcuán na te cácuu de jeē sínu de ndíhuxá quiví jeē cándundoo de nuū yā, te sava jnáhan hebreo de jeē véjicoo Asia ní cajiní de jeē íne Pablo ini templo, te ní cascáhán de ndíhi ñayuu, te ní cajni i Pablo.

²⁸ Te ní cacana jee i:

Tēe ñuu yō Israel, cuāha núu ní ndaha jijnáhan ní na jni yó tēe yāha. Chí máá de cúu tēe jica cuu ní cáhnu stéén de nuū tāca ñayuu, te cáhán de siquī nación yō jín siquī ley jeē ní jēhe ya nuū Moisés jín siquī templo yāha. Te suni je ní quivícoo de jín jecu tēe griego ini templo ñi yāhá, te sūcuan stívi de jnūhun ñi jeē cahān jeē ma cúu quiví ñayuu ini templo te nuū nasūu ñayuu hebreo cúu í, áchí.

²⁹ Chí nde na íne Pablo ini ñuu un ní cajini tēe hebreo jeē jica de jín Trófito, tēe ñuu Efeso jeē násūu hebreo cúu de, te cájeni ní de jeē ní quiví tēe un jín Pablo ini templo.

³⁰ Te ndíhi ñayuu ñuu un ní cuvaā, te ní cacutútú-ni i, te ní cajni i Pablo, te ní castáa i de ní quenehen i de ini templo un, te ní cacacasi-ni i yéhyí.

³¹ Te ní cacuni i cahni i de núu. Te general, tēe cújéhnu nuū ndíhi soldado, ní nihín de jnūhun jeē ndíhi ñayuu ñuu Jerusalén ní candonda i cácuvaā i.

³² Te ní jeca general tācá soldado jín capitán, te cájnu de cuango de nde nuū cáhín ñayuu cuehē ún. Te ná ní cajito ñayuu jeē ní jíncoo general jín soldado, te ní cajecuiñi i jeē cácani i Pablo.

³³ Yūcuán na te ní quiví general mēhñu ñayuu, te ní jni de Pablo, te ní ndacu de jniñu jeē conuhí de jín úu cadena. Yūcuán na te ní cajnūhún general ndé tēe cúu Pablo te na cuēchi ní sáha de.

³⁴ Te ní cacana ñayuu cuehē ún, sava i ñin jnūhun te sava ga i inga jnūhun, te tu ní cúu cuni de na cuēchi ní sáha Pablo, chí cácuvaā

i. Te ní ndacu de jniñu cuahān Pablo nde cuartel.

³⁵ Te nuū ní jín Pablo escalera cuartel ún, te soldado ní cajni de Pablo cándiso de siquī jeē cácani ñayuu ún jni i Pablo sáha xeēn i jín de.

³⁶ Chí ndíhi i véjicoo i ichi yátá soldado, te cácana jee i:

Cahni ní tēe jíná, achí i.

Jeē ní cahān Pablo jehē maá de nuū ñayuu

³⁷ Te cácuvi de Pablo ini cuartel nuú, te jín jnūhun griego ní cahān Pablo jín general:

¿A cuāha ní jnūhun cahān ná ñin jnūhun jín ní? achí de.

Te ní cahān general jín de:

Te jíní rō cahān rō yuhu griego jeē sūcuan.

³⁸ Núu sūcuan te nasūu rōhó cúu tēe Egipto jeē jé ní cuu quiví ní ndonda siquī gobierno te ní quenehen cuūn míl tēe jéhni ndíyí cuango jín de nde nuū ñūhun tēhé, áchí.

³⁹ Yūcuán na te ní cahān Pablo:

Tuú, chí tēe hebreo cúu ná, te ní cacu ná ñuu Tarso, ñin ñuu jeē cújéhnu ndañú Cilicia. Te quíñūhun ní ní cuāha ní jnūhun na cáhán na jín ñayuu yāha jijnáhan i, áchí de.

⁴⁰ Te general ní jēhe de jnūhun jeē cahān de. Te ní jecondichi Pablo nuū escalera, te ní sáha de seña jín ndaha de jeē na cúu nayúú ñayuu ún. Te nuū ní cuu nayúú-ni i, te jín jnūhun yuhu ñúu de hebreo ní cahān de:

22

¹ Ndihi níhín jeē cácuu ní jnáhan ñuu yō jín ndíhi níhín jeē cácujeñu ní núu ñúu yō, cuni sōho ní jnūhun cahān na jēhé maá ná, achí de.

² Te ní cajini sōho i jeē cahān Pablo yuhu hebreo jeē cúu yuhu ñúu í, te víhyá gā ní cacunahín i. Te ní cahān Pablo:

³ Máá ná cúu jnáhan ñuu yō hebreo, te ní cacu ná ini ñuu Tarso ndañú Cilicia. Te ini ñuu Jerusalén yāha ní jehnu ná, te ní cutūhva ná núu Gamaliel, te ní stéén de nuū ná ndíhi siquī ley jeē ní jēhe ya nuū jii yō. Te nde jín ini jín ánuá na ní nducú ndéyí ná squícu ná sūcuan nuū Yaā Dios, nájnūhun cásáha máá ní vijna.

⁴ Te ní jito xeēn na ñayuu cácanjíje i jnūhun Jesús te nde cuni na jéé na cúu ndíhi i núu. Chí cúu tēe cúu ñahan ní jni ná ní chuhun ná vecāa.

⁵ Te sutú cújéhnu ga jín táca tēe jéhnu cándiso jniñu nuū ñúu yō, cácuu de testigo jeē sūcuan ní sáha ná, te suni máá de ní cajēhe de tíjni carta cuahān na jín jéé cuāha na núu táca jnáhan yó cáyúcu ñuu Damasco. Chí cuahān ná ñuu un jéé jni ná ñayuu cácanjíje i Jesús te quindeca ná i ñuu Jerusalén yāha, návāha ndoho i núu.

*Jeē ní cachi Pablo ndese ni sama ya de
(Hch. 9.1-19; 26.12-18)*

⁶ Te ni quihñ ná ichi cuahān ná, te cuacuyajñi ná ñuu Damasco, te nájñuhun caxū cúu. Te ichi ándiví ní quiñi ñn nduva ní ndíndéé ndaxín núú ná.

⁷ Te ni cotúú ní ná núú ñúhun, te ni jini sōho ná ñn jñuhun cahān jín ná: Saulo, Saulo, ¿najehe jito xeēn rō ruhū? achí.

⁸ Yūcuán na te ni cahān ná: ¿Na nihñ cúu jeē cahān, Tātā? achí ná. Te ni cahān yā jín ná: Máá rí cúu Jesús jeē ní jehnu ñuu Nazaret, te jeē jito xeēn rō ñayuu cácadje i ruhū cúu jeē jito xeēn rō ruhū, achí yá.

⁹ Te tēe cuango jín ná ní cajini ndije de jeē ndíndéé, te ni cayuhú de, te tu ní cájini sōho de ndese ni cahān yā jín ná.

¹⁰ Yūcuán na te ni cahān ná: Tātā, ¿na vé cuní ní jeē sáha ná? achí ná. Te ni cahān maá Jítoho yō jín ná: Ndocuñi te quihñ rō ñuu Damasco, te yūcuán iyó ñn tēe jeē cachi nuū rō na vé cúu jeē cánuú sáha rō, achí yá jín ná.

¹¹ Te jeē ní ndíndéé un ní sacuaá núú ná, te tēe cuango jín ná un ní cajni de ndaha ná cuango de jín ná ní jinūcoo ná ndé ñuu Damasco.

¹² Te yūcuán ní condee ñn tēe nání Ananías, te táca jnáhan yó hebreo yūcuán cácahān jeē tēe váha cúu Ananías, chí váha siquú de ley jeē ní jéhe ya nuū Moisés.

¹³ Te ni quee tēe un núú néne ná, te ni cahān de jín ná: Hermano Saulo, na ndúndijin tinūu ní, achí de. Te ni ndundijin-ní tinūu ná, te ni jito ná núú de.

¹⁴ Te ni cahān Ananías: Máá Yáa Dios táca jí yō, je ni nacáji ya nihñ návāha cuní ní na vé cuní yā jeē sáha ní, te coto ní núú maá Cristo, Yáa ndaā, te cuní sōho ni jñuhun jeē cahān yā.

¹⁵ Te nacani ní jñuhun ya nuū ndivii ñayuu táca jéé ní jito ní jín jéé ní jini sōho ní.

¹⁶ Ma cúhuun ni ní nuú súcuán. Ndocuñi ní, te cuandute ní te cahān ndahú ní jín máá Jítoho yō, návāha nacate ya anuá ní núú cuéchi, achí de jín ná.

*Jeē ní cachi Pablo ndese ni tají Yáa Dios
de nuū ñayuu táca gá nación*

¹⁷ Te ni nandió cóo na ní ndee ná ñuu Jerusalén. Te jícán tahú na ini templo, te ni sáha máá Jítoho yō jeē ní jito ndijin ná.

¹⁸ Te ni jini na núú yā ni cahān yā jín ná: Yachí quenda rō ñuu Jerusalén yāhá, chí ma cuatáhú ñayuu yáha jéé nacani rō jñuhun ri nuú i, achí yá.

¹⁹ Te ni cahān na jín yá: Tuú, chí cuatáhú i, Tātā, chí je cajini i jeē ní quiví ná ndijnahan vehe ñi sinagoga ni jñi ná táca ñayuu cácadje i nihñ, te ni caní ná i, te ni chuhun ná i vecāa.

²⁰ Te je cajini i jeē quiví ní cajehni i Esteban, tēe ni nacani cáji jñuhun ní, suni

ni indichi na yūcuán, te ni jejnúhún ná jeē na cúu de, chí ni condito ná sahma tēe ni cajehni Esteban, achí ná jín yá.

²¹ Te ni cahān yā jín ná: Cuáhán, chí máá rí tají rí rohó quihñ jicá rō nde nuū ñayuu táca nación jeē tu cájini i jñuhun ri, achí yá jín ná. Achí Pablo.

Jeē ní íne Pablo nuū general

²² Te táca ñayuu ún váha-ni ní cajini sōho i te nde jñuhun sandihí yáha jéé ní tají yá de nuū ñayuu táca gá nación. Yūcuán na te ni cacuvaá i, te ni cacahān jee i:

Na cúu tēe jíná, chí tú váha jeē cótecu gā de, achí i.

²³ Te súcuán cácana jee i, te ni cascádoó i ticáchí i, te ni cascánda i ticachā. Te súcuán cástéén i jeē cáquiti xeēn ni i.

²⁴ Te ni ndacu general jñiñu jeē na quiví Pablo ini cuartel, te ni cahān de jeē na stíchí soldado Pablo nde jín cuarta ñi, návāha cujnúni ní general na siquú cúu jeē ní candonda ñayuu un siquú de.

²⁵ Te ni cajihni de Pablo návāha súcuán te caní de. Te ni cahān Pablo jín capitán jeē índichi túhva:

¿A jéhe ley jñuhun jeē caní ní cuarta tēe cúu sehe nación Roma núu ná tu sándaá ní núu iyó cuéchi de? achí de.

²⁶ Te ni jini sōho capitán jñuhun yáha, te ni jecahān jín general:

Coto váha ní jéé ma stíví ní sáha ní jín tēe yáha, chí cúu de sehe nación Roma, achí.

²⁷ Yūcuán na te ni jinū general nuū Pablo, te ni cajñuhún de:

Cachi núu jendaá cúu jeē sehe nación Roma cúu rō, achí.

Te ni cahān Pablo:

Suu cúu ndije ná, achí de.

²⁸ Te ni cahān general:

Ruhū chí nde jeē ní jéhe ri cuehē xūhún te ní nduu ri sehe nación Roma, achí.

Te ni cahān Pablo:

Te sñá chí nde quiví ní cacu ná cúu ná sehe nación yō Roma, achí de.

²⁹ Yūcuán na te táca tēe jeē cácuni caní Pablo nuú, ni cacujiyo-ni cuango, te suni nde general ni yuhú de, chí ní stíví de jeē ní jihni de Pablo, chí tu iyó váha sáha súcuán jín sehe nación Roma.

*Jeē ní índichi Pablo nuū junta cujehnu ga
jnáhan ñuu de hebreo*

³⁰ Te inga quiví un cuní general cundaá váha ni de na siquú cúu jeē ní candonda tēe hebreo siquú Pablo. Te ni ndaji de cadena jeē nuhñ Pablo, te ni ndacu de jñiñu ni cacutútú táca sūtú cácujeñu jín táca tēe cásaña junta cujehnu ga, te ni quenehen de Pablo, te ní jeni de nuú tēe ní candutútú un.

23

¹ Yūcuán na te ni ndacoto Pablo nuū téé ni candutútú junta un, te ni cahān de:

Tátá jijnáhan ní, n# ndé vijna vāha íyó ni anuá na jée tú na cuēchi ná, jito jínúú Yāā Dios, áchí de.

² Yūcuán na te Ananías, sutú cujéhnú ga, ni cahān jín téé cáhīn yajni nuū de jeē na cátu maá yuhu de.

³ Te ni cahān Pablo jín sutú cujéhnú ga ún:

Yāā Dios stóho ya nihín chí téé stáhú-ni cúu ní, chí néne ní jée sándaā ni núu ni stívi ná ley yā, ¿te naun stívi máá ní ley jeē ndácu ní jñiú jeē cáni de sãñá? áchí de.

⁴ Te ni cacahān téé cáhīn nuū de ún:

¿Naun cáhān rō sūcuan jín sutú cujéhnú ga? Chí nuū Yāā Dios jejníñu de, áchí jín de.

⁵ Te ni cahān Pablo:

Tátá jijnáhan ní, tu ní jíní na jée sutú cujéhnú ga cúu de, chí núu ní jíní na te ma cahán na sūcuan núú, chí yósó núu tútu íi jeē ní cáhān yā jeē ma cahán neé yó coto yó táca téé cácujehnú nuū yō, áchí Pablo.

⁶ Te nuū ní jini Pablo jeē sava de cácuu grupo saduceo te sava ga de cácuu grupo fariseo, te ni cahān jee de:

Tátá jijnáhan ní, máá ná cúu íin jnáhan grupo fariseo, te suni sūcuan ni Iyo tátá na. Chí suni máá ná ñúhun ni na jée nastécu yā ndíyi, te siquí yūcuan cúu jeē cácahān ni cuēchi siquí ná, áchí de.

⁷ Te jeē sūcuan ni cahān de te ni cacusān ni téé junta jeē cácuu grupo fariseo jín grupo saduceo, te ni cacahān nihin.

⁸ Chí cácahān téé grupo saduceo jeē ma nátecu ndíyi, ni tu cáhīyo ndajéhé yā ni ánuá, te téé grupo fariseo cájejnúhún de ndinúni jñúhun yáha.

⁹ Te yōhyo ni cuvaā. Te sava téé cástéén jñúhun cáhān tutu ley yā jeē cácuu jnáhan grupo fariseo, ni candocuñi de, te ni cacahān de:

Tú ni íin cuēchi cánihin na siquí téé yáha. Sanaa te ni cahān ndije íin ánuá jín de chí íin ndajéhé yā. Ma sáníhni ni yō nuū Yāā Dios nuu sūcuan, áchí.

¹⁰ Te yōhyo ni catejnáhan, te yúhú general jeē quende i chiyó Pablo, te ni ndacu de jñiñu jeē na quívi soldado te quenehen de Pablo sava mēhñú i, te na ndívi de ini cuar-tel.

¹¹ Te jecuáá un ní quee-ni máá Jítóho yō nuū de, te ni cahān yā jín de:

Pablo, cuandeyí ni rō, chí nájnúhun ni nacani rō jñúhun ri ini ñuu Jerusalén yáha, suni sūcuan nacani nahín rō jñúhun ri ini ñuu Roma, achí yá.

Jeē ní casquijnáhan jñúhun cahni Pablo

¹² Te nuū ní cundijin te ni cacutútú sava ñayuu hebreo, te ni casquijnáhan jñúhun, te

ni cacahān teyí i jeē ma cáji cuiti i ni íin ni ma cóho cuiti i nde núu tu cahni i Pablo.

¹³ Te víhyá gā uū xico téé hebreo ni cacahān teyí jñúhun yáha.

¹⁴ Te ni jengoo nuū sutú cácujehnú jín núu téé jéhnú cándiso jñiñu nuū ñayuu hebreo, te ni cacahān jín téé ún:

Ni cacahān teyí ná jeē ma cáji cuiti ná ni íin níni nde ná tu cahni na Pablo.

¹⁵ Núu sūcuan te máá ní jijnáhan ní jín táca gá téé casáha junta cujéhnú ga, cuácáhān ni jín general jeē quenehen de Pablo na jée de nuū junta sajne, chí cachi ní jée cácuni ní stíchi vāha ga ní de. Te máá ná jijnáhan ná cotúhva ná cahni ná de nde ná tu quee de nuū cáhīn tútu ní, achí.

¹⁶ Te sehe yí cuáha Pablo ni nihín i jñúhun jeē sūcuan ni cacahān, te ni jehén i cuartel, te ni castúhún i nuū Pablo.

¹⁷ Te ni cana Pablo xiní íin jnáhan capitán, te ni cahān de:

Condeca ní sūchi yáha quíhīn ni jín i nuū general, chí íyó íin jñúhun castúhún i nuū de, áchí de.

¹⁸ Te capitán un ní jeca de i cuahān i jín de nuū general, te ni cahān de:

Pablo, téé íne vecāa, ni cana de sãñá, te ni cahān de jín ná jeē quíndeca ná sūchi yáha núu ní, chí íyó íin jñúhun cahān i jín ní, áchí de.

¹⁹ Te ni jñi general ndaha i cuahān de jín i íin lado, te yuhu-ni ni cajnúhún de i:

Na jñúhun cúní rō cahān rō jín rí, áchí de.

²⁰ Te ni cahān i:

Téé hebreo ni casquijnáhan jñúhun de jeē cahān ndahú de jín ní quenehen ní Pablo sajne quíhīn de nuū táca téé casáha junta cujéhnú ga, chí cahān-ni de jín ní jeē cácuni de jeē stíchi vāha ga de Pablo.

²¹ Te ma cuáha ní jñúhun, chí víhyá gā uū xico de cándētu sáhi de ichi, te ni cacahān teyí de jeē ma cáji cuiti de ni íin ni ma cóho cuiti de nde núu tú cahni de Pablo, te vijna je cándētu túhva de jeē cuáha ní jñúhun quíhīn Pablo nuū junta, áchí i.

²² Te ni cahān general jín i jeē ma cáchi i nuū ní íin ñayuu jeē ni cáhān i jñúhun yáha jín de, te ni tají de i cuanuhun i.

Jeē ní tají general Pablo cuahān de nuū Félix, téé cúu gobernador

²³ Yūcuán na te ni cana general uū capitán de, te ni ndacu de jñiñu jeē sátúhva de uū ciento soldado cájica jéhé jín úní xico uxí jeē cáyosó caballo jín uú ciento jeē cándaha lanza, chí cahīn jecuáá ún quendacoo de jín Pablo quingoo de nde ñuu Cesarea.

²⁴ Te suni ni ndacu de jñiñu jeē coo túhva caballo jeē cóso Pablo, te condito vāha soldado un Pablo quingoo de nde nuū Félix, téé cúu gobernador.

²⁵ Te ni tee de in carta jeē cahán jnūhun yáha:

²⁶ Máá ná cúu Claudio Lisias, te tée ná carta yáha cuájeē nuū ní, señor Félix, gobernador kujéhu. Ndese tahū cúu ní.

²⁷ Ņayuu hebreo ni cajni i tée yáha, te je yajni cahni i de núu, te ni jnama ná de jín soldado, chi ni jini na jée séhe nación Roma cúu de.

²⁸ Te ni jendeca ná de nuū junta maá i jínáhan i jeē sándaá i núu na cuēchi ni sáha de.

²⁹ Te ni jini na jée siquī ley maá i cúu cuēchi cácahán i siquī de, te tu níhin na ni in cuēchi siquī de jeē cúu de ni jeē cóne de vecáa.

³⁰ Te ni nihin na jnūhun jeē sava tée hebreo ni casquijnáhan jnūhun de jeē cahni de tée yáha, te jeē yúcuan cúu jeē yachī ni tají ná de cuajeē de nuū ní. Te suni je ni cahán na jín űayuu cájicān cuēchi siquī de jecoo i nuū ní, te jínā cahán i jín ní na cuēchi ni sáha de. Je ni cahán yō, achí carta.

³¹ Te ni cajeca űuu-ni soldado Pablo cuanguo jín de nde űuu Antípatris, nájnūhun ni tahū jniū nuū de.

³² Te inga quivī ni canandió cóo-ni soldado cájica jéhe cuánungoo nde cuartel, te soldado cáyōsó caballo cuanguo de jín Pablo.

³³ Te ni jinūcoo űuu Cesarea, te ni cachihí carta ndaha gobernador, te suni ni cajeni Pablo nuū de.

³⁴ Te ni cahu gobernador carta un. Te ni cajnūhún de nde űuu cúu Pablo, te ni jini de jeē tée ndañū Cilicia cúu Pablo.

³⁵ Te ni cahán de:

Nde na quécoo tée cájequin cuēchi siquī rō te cuni nahín rí jnūhun cahán rō, achí de.

Te ni cahán de jeē na quíndihyū Pablo ini palacio ndāy Herodes.

Jeē ni cahán Pablo jehē maá de nuū Félix

24

¹ Te nuū uhún quivī te Ananías, sutū kujéhu ga, ni quee de űuu ún. Te suni ni quecoo sava tée jéhu cándiso jniū nuū jnáhan űuu de hebreo jín in tée cúu abogado, nání de Tértulo. Te ni quívicoo de nuū gobernador jeē cahán de cuēchi siquī Pablo.

² Te ni cana gobernador Pablo ni quee de. Te ni quejéé Tértulo cahán de cuēchi siquī Pablo, chí suhva ni cahán de jín Félix:

Tátā gobernador, siquī jeē cúu ní tóhō jeē váha ndíchí ndácu ní jniū, te jeē yúcuan tú na jnūhun cájejnáhan iyó, chí cáyūcu váha yó.

³ Te na cútahū ná, chí táca quivī váha cúu táca núu ndácu ní jniū jeē váha sáha ní, tátā Félix.

⁴ Te tu cúní na snáa na cuéhē tiempo ni, te cahán ndahú ná jín ní cuni nahín ní jecu-ni jnūhun cahán na jín ní.

⁵ Chi ni cajini na tée yáha jée cúu de in tée tíxin, te sáha de jeē cáncuajnáhan máá jnáhan űuu ná hebreo ní cáhnu-ni táca lado, te cúu de tée cújéhu nuū űayuu cascuáha jnūhun tée nání Jesús jeē ní jehnu űuu Nazaret.

⁶ Te suni je ndúcú de jeē stívi de táca jniū iní templo i, te ni cajni ná de. Te cácuni na sándaá na síquī de núu, nájnūhun cáhán ley űuu ná.

⁷ Te ni jinū-ni general Lisias, te ni quende fuerza de tée yáha núu na jínáhan ná.

⁸ Te ni ndacu de jniū jeē táca ná jeē cácahán na cuēchi siquī tée yáha quíjicoo ná ndé núu ní. Te vijna cuu stíchí maá ní de, te jín jnūhun cahán maá de te cuni ni jée ni sáha de cuēchi jeē cácahán na jín ní, achí Tértulo.

⁹ Te suni ni cacahán tée hebreo jeē ni jínūcoo jín de jeē iyó ndáá jeē súcuan cúu cuēchi Pablo.

¹⁰ Yúcuan na te ni sáha gobernador seña nuū Pablo jeē na cáhán de, te ni cahán Pablo:

Je jini na jée cuehē cuiyā cúu ní gobernador űuu yáha, te jeē yúcuan nújnahan ni na jée sándaá ni síquī ná.

¹¹ Chi máá ní cuu nanducú ní te cuni ni jée sáa máá úxí uū quivī ni cuu jeē ni jéhen ná űuu Jerusalén jeē chíñúhún ná Yaá Dios.

¹² Te tu ní stáhán jnáhan ná jín ní in űayuu, ni tu ní stóna ná űayuu iní templo ni iní vehe i sinagoga ni iní maá űuu.

¹³ Ni tú na jín stéén de jeē iyó ndáá jnūhun cácahán de siquī ná.

¹⁴ Te jnūhun cáhán cají ná jín ní cúu jeē chíñúhún ná Yaá Dios táca jí na, te suu cúu jeē chíñúhún ná maá Jesucristo, te máá jnūhun yáha-ni cúu jeē cácahán de jeē stívi ná. Te cándije ná táca jnūhun yósó núu tútu ley yá jín núu tútu jeē ní catee tée ni canacani jnūhun ya nde jenahán.

¹⁵ Te inuú űuhun ni na jín de jeē sáha Yaá Dios jeē nátecu táca ndāy, cúu űayuu ní casáha váha jín űayuu ní casáha néé.

¹⁶ Te jeē yúcuan máni jeē váha ndáhví ni na sáha ná. Súcuan te váha iyó ni anuá na jée tú na cuēchi ndéé siquī na núu Yaá Dios ni núu űayuu.

¹⁷ Te ni jica cuu ná táca űuu jicá jecu cuiyā, te sáa te ni ndee na jín xúhun jée ní cajéhe táca űayuu jeē chindéé űáhán i jnáhan űuu na cáyūcú Jerusalén. Te suni ni ndee na jée socó na quiti nuū Yaá Dios.

¹⁸ Te íne ná iní templo siquī jeē cuchi ná ndundoo ná núu Yaá Dios te socó ná. Te jecu jnáhan űuu ná hebreo jeē véjicoo Asia ni cajito de sañá iní templo, te tú na űayuu cuehē ni cóyūcu jín ná jeē sávaá i.

¹⁹ Te núu ni stívi ná zte naun tu ní quíjicoo tée Asia un náváha suni cahán de ndese ni stívi ná?

²⁰ Chĩ tée ni quecoo yāhá na cáhán maá de núu na cuéchi ni canihĩn de siquĩ na ná ni indichi na núu junta tēe cácujeñhu ini ñuu ná.

²¹ ¿Te chí cájequin de cuéchi siquĩ na jéé ni cáhán jee ná suhva ná ni ñyo ná nuu junta naun? Chi ni achi na jéé cándije ná jéé nátecu táca ndíyí, te jeé yúcuan cájequin ni cuéchi siquĩ ná, ni achi na jíin de. Achi Pablo.

²² Te Félix chi je jíin vāha de ndese cácadije ñayuu Cristo. Te jeé ní jíin sōho de jñuhun yāha te ni stétu de un jíināhan, te ni cahān de:

Nde na queé general Lisias te cajñuhun gá rĩ siquĩ jñiñu yāha, áchĩ de.

²³ Te ni ndacu de jñiñu nuu capitán jeé na cóne ga Pablo vecāa, te ma cásĩ jeé sáha de jeé cuní de, te ni ma cásĩ jeé quijicoo jñáhan de jeé chindéé ñáhán i de.

²⁴ Te ni cuu jecu quivĩ, te ni quiji tucu Félix jíin ñasihĩ de Drusila, te ñahan hebrea cúu ña. Te ni ndacu de jñiñu jeé na quiji Pablo návāha nacani de jñuhun ndese cándije yó Jesucristo.

²⁵ Te ni cahān Pablo jíin de jeé cánuú sáha yó jñiñu ndaā, te cánuú coto yó máá yó jeé ma sáha yó jñiñu stívĩ, chí quivĩ sándihĩ te sándaā Yaā Dios jñiñu ndívii ñayuu ndese ni casáha i. Te ni yūhu Félix te ni cahān de:

Vijna te cuáhán, te inga quivĩ jeé núne ri te cana ri rohó quiji ró, áchĩ de.

²⁶ Te ñuhun ni de jeé cuāha Pablo xuhun núu de te siáá de quenda de vecāa. Jeé yúcuan tijni jínu ni cana de Pablo ni canda-jñuhún de.

²⁷ Te súcuan ni cuu uú cuiyā, te sáá te ni nucuíñĩ Porcio Festo nuu Félix. Te cúní Félix jeé na cúsi ni ñayuu hebreo jíin de, te jeé yúcuan ní squéndōo de Pablo vecāa.

Jeé ni índichi Pablo nuu Festo

25

¹ Te sáá únĩ quivĩ jeé ni quivĩ Festo cuu de gobernador Judea, te ni quenda de ñuu Cesarea cuahān de ñuu Jerusalén.

² Te táca sūtū cácujeñhu jíin tēe cácujeñhu nuu ñayuu hebreo ni jinúcoo nuu Festo, te ni cajicān cuéchi siquĩ Pablo.

³ Te ni cacahān ndahú jíin Festo jeé núu vāha ni de te na nátáji de Pablo ndiji ñuu Jerusalén. Súcuan ni cacahān, chí je ni casquijñáhan jñuhun jeé cahni Pablo ichi.

⁴ Te ni cahān Festo jeé yíndesi vāha Pablo nde ñuu Cesarea, te je jéni ni de jeé jecu na quivĩ te nuhūn maá de ñuu Cesarea.

⁵ Te jeé yúcuan ní cahān de jíin táca tēe ún: Táca ñihĩn jeé cándiso jñiñu, na quingoo yó nde Cesarea, te yúcuan cácan ni cuéchi siquĩ de te núu iyó cuéchi de, áchĩ de.

⁶ Te ni ine de yúcuan únā chí úxĩ-ni quivĩ, te ni ndee de ñuu Cesarea, te inga quivĩ ni cucōo de mesa nuu sándaā de jñiñu, te ni cahān de jeé na quiji Pablo.

⁷ Te je cáhĩn tēe hebreo jeé ní quijicoo nde ñuu Jerusalén. Te ni quee Pablo, te ni cajicó ndúu nuu de, te ni caquejéé-ni cásajñuhún téyĩ siquĩ de, te tú na jíin ní cástéén jeé iyó ndáá jñuhun cácahān.

⁸ Te ni cahān Pablo jehē maá de:

Tu ní sáha ná ni ñin cuéchi siquĩ ley ñuu na jéé cácuu ná ñayuu hebreo, ni siquĩ templo, ni siquĩ rey nación Roma, achi de.

⁹ Te Festo chí cúní de jeé cusĩ ni ñayuu hebreo jíin de, te ni cajñuhún de Pablo:

¿A tu cúní rō quinhun rō Jerusalén te yúcuan sándaā rĩ siquĩ rō? áchĩ de.

¹⁰ Te ni cahān Pablo:

Je índichi na núu cúndaā jñiñu jeé ndácu máá tēe cúu rey nación Roma, te yāha cúu nuu cánuú cúndaā jñiñu ná. Máá ní je jíin vāha ni jéé tú na cuéchi ní sáha ná siquĩ táca jñáhan ñuu ná hebreo.

¹¹ Chĩ núu ní sáha ná ñin cuéchi xeēn jeé jíin ñuhún cuu ná, te iyó vāha jeé cúu na núu súcuan. Te núu tu iyó ndáá jñuhun jeé casajñuhún tēe yāha siquĩ ná, te ni ñin tēe ma cúu chíhi de sañá ndaha tēe yāha jíināhan de. Núu súcuan te cúní na quihĩn na núu máá rey nación Roma sándaā de siquĩ na, áchĩ de.

¹² Te ni cajñuhun Festo ndese cájeni ni tēe cándiso jñiñu jíin de. Yúcuán na te ni cahān de jíin Pablo:

Je ni cahān rō jeé cuní rō quihĩn rō nuu máá rey nación Roma sándaā de siquĩ rō. Núu súcuan te quihĩn nahín ró nuu de, áchĩ de.

Jeé ni índichi Pablo nuu rey Agripa

¹³ Te ni cuu jecu quivĩ, te rey Agripa jíin Berenice ni jecondéhé de Festo nde ñuu Cesarea.

¹⁴ Te tijni quivĩ ni coyúcú de yúcuán. Te ni nacani Festo jñuhun siquĩ Pablo nuu rey un. Te suhva ni cahān de:

Félix jeé ní cuu de gobernador, ni stóo de ñin tēe ine vecāa yāhá.

¹⁵ Te ná ni jehēn ná ñuu Jerusalén, te sūtū cácujeñhu jíin ñayuu jéhu cándiso jñiñu nuu ñayuu hebreo ní jinúcoo i nuu na cájequin i cuéchi siquĩ tēe ún, te cácuni i jeé na cúu de.

¹⁶ Te ni cahān na jíin i jeé tu iyó costumbre táca tóhō Roma jeé cahni de ñin tēe súcuan-ni, chí jíin ñuhún condichi de jíin ñayuu cájequin cuéchi siquĩ de, návāha cahān de jehē maá de te cúndaā núu iyó cuéchi de.

¹⁷ Yúcuán na te ni quecoo tútú i yāhá. Te inga quivĩ ún tu ní cúcuéé ná, chí ni cucōo na mesa nuu sándaā na siquĩ cuéchi, te ni ndacu ná jñiñu jeé na quiji tēe ún.

¹⁸ Te cáhĩn ñayuu cájequin cuéchi siquĩ de. Te ni jeni ni na jéé iyó cuéchi xeēn cahān de siquĩ tēe un núu, te tú cuiti.

¹⁹ Chĩ jeé cácahān de cúu máni siquĩ jñuhun cácadije-ni máá de, jíin siquĩ ñin tēe nání

Jesús jeē jé ni jihī de, te Pablo cahán nīhin de jeē ní natecu ndije tēe ún.

²⁰ Te tu ní cūjnúní cuiti ní ná ndese sándaā ná, te ní cajnūhun ná de núu cúní de quihīn de űuu Jerusalén te yūcuán cundaā siquī de.

²¹ Te máá Pablo ní cahān de jeē cuní de quihīn de nuū Augusto, rey yō nación Roma, te yūcuán sándaā rey cuēchi de, ní achi de. Te ní cahān na jēē na cóne de vecāa nde tají ná de quihīn de nuū rey un, áchí Festo.

²² Yūcuán na te ní cahān Agripa jíin Festo: Suni cúní máá ná cuni sōho ná jēē cahán tēe un, áchí de.

Te ní cahān Festo:

Sajnē te cuni sōho ní jēē cahán de núu sūcuán, áchí de.

²³ Te inga quiví un ní quecoo Agripa jíin Berenice. Te cáñūhun de sahma cūjéhu de, ní quivicoo de ini vehe juzgado jíin táca general jíin tēe cácujehu ini űuu ún. Te ní ndacu Festo jniñu jeē na quíji Pablo.

²⁴ Te ní cahān Festo:

Cahán na jíin ní, tátā rey Agripa, jíin ndihí nihín jēē cáyūcu jíin yó yāhá vijna. Yāha cúu tēe jeē siquī de ní candonda ndivii jnāhan de hebreo űuu Jerusalén jíin ndé űuu Cesarea yāhá, te máni cácahān i jeē tú vāha jeē cótecu gā de.

²⁵ Te jéni ní máá ná jēē tú na cuēchi xeēn ní sáha de jeē cúu de. Te je ní cahān de jeē cuní de quihīn de nuū rey Augusto jeē sándaā rey un siquī de, te jeē yūcuán ní cahān na jēē tají ná de quihīn de nuū rey un.

²⁶ Te tu cūcáhnū ní ná na jnūhun tee ná núu tútu quihīn jíin de nuū rey yō. Jeē yūcuán ní ndacu ná jniñu ní quee de nuū yō jijnāhan yó, te cánuú gā nuū máá ní, tátā rey Agripa. Te stichí ní de návāha nihín na jnūhun tee ná siquī de, te quihīn jnūhun un jíin de nuū rey.

²⁷ Chi tu jéjníñu cuiti jeē tají ná in preso quihīn te núu tú castūhun ná nuū tútu na cuēchi ní sáha de, áchí Festo.

Jeē ní cahān Pablo jehē máá de nuū rey Agripa

26

¹ Yūcuán na te ní cahān rey Agripa jíin Pablo:

Vijna te jéhe ri jnūhun cahān rō jehē máá rō, áchí de.

Te Pablo ní sáha de ndaha de jeē ní quejé de cáhān de, te suhva ní cahān de:

² Tátā rey Agripa, cúsi ní ná vijna jeē cúu cahān na jíin ní siquī ndihí jeē casájnūhún űayuu űuu yō hebreo siquī ná.

³ Chi je jíni vāha máá ní táca jéē ní tajnúni űayuu űuu yō hebreo jíin táca jnūhun jeē tu cáhīn inuú i jíin. Jeē yūcuán cáhān ndahú ná jíin ní jeē coo paciencia ní cuni sōho ní jnūhun cahān na jíin ní.

Jeē ní cachi Pablo ndese ní sáha de nde ná tu sama ya ini de

⁴ Je cájini táca jnāhan űuu yō hebreo ndese ní sáha ná ini űuu nuū ní cacu ná jíin ini űuu Jerusalén nde ná lulí ná.

⁵ Te núu cácuani máá de cahān ndaā de, te je cájini de sáña jēē ndé lulí ná ní quiví ná nuū grupo fariseo, te grupo un nīhin ga cánducú ndéyí de squicu de ley yā vésú táca gā grupo tēe nación yō.

⁶ Te űūhun ní na jnūhun ní jejnūhun Yāá Dios nuū táca jíi yō jeē nastécu yā ndiyi, te máá siquī táca jnūhun yāha-ní cúu jeē cájequin de cuēchi siquī ná.

⁷ Chi máá yō jeē cácuu yō jnāhan ndihúxi uū yucūn űayuu Israel, cáñūhun ní yō jnūhun ní jejnūhun ya jeē nastécu yā ndiyi, te jeē yūcuán nduú űuu cáchiñūhún yó Yāá Dios te cájejniñu yó núu ya. Te suni sūcuán űūhun ní máá ná, tátā rey Agripa, te siquī jeē nácani ná jnūhun jeē natecu ndiyi cúu jeē cájican jnāhan űuu yō hebreo cuēchi siquī ná.

⁸ Te chí máá nastécu Yāá Dios táca ndiyi cájeni ní ní naún?

Jeē ní cachi Pablo ndese ní jito xeēn de űayuu cácañdije

⁹ Te máá ná chi ní jeni ní na jēē jíni űūhún ndonda ná siquī űayuu cácañdije i Jesús, Yāá ní jehnu űuu Nazaret.

¹⁰ Te sūcuán ní sáha ná ini űuu Jerusalén, chi táca sūtū cácujehu ní cajēhe de jnūhun jeē cóndiso jniñu ná chuhun ná cuéhē űayuu vecāa siquī jeē cácañdije i Jesús, te iyó vāha ní na núu cájehni de i.

¹¹ Te tjini jínu ní sáha ndevāha na jíin i ini táca vehe iī sinagoga jeē ní sáha fuerza na i jeē na stóo i jnūhun cácañdije i. Te xeēn ní quiti ní na núu i, chi nde űuu jicá ní jehēn ná ní sáha xeēn na jíin i.

Jeē ní cachi tucu Pablo ndese ní sama ya ini de

(Hch. 9.1-19; 22.6-16)

¹² Te sutū cácujehu ní cajēhe de jnūhun jeē cóndiso jniñu ná quíhin na sáha xeēn na jíin űayuu cácañdije cáyūcú űuu Damasco nuú.

¹³ Te cuahān ná ichi ún, tátā rey, te cacū cúu, te ichi ándiví ní quiji in nduva ní ndindēē ndaxín núu na jíin núu tēe cuangoo jíin ná, te vīhyá gā ndí vésú niāndii.

¹⁴ Te ndihí ná ní cacotúú ná nuū űūhun. Te ní jini sōho ná in jnūhun ní cahān jíin ná jíin jnūhun yuhu yó hebreo: Saulo, Saulo, ¿najehe jíto xeēn rō ruhū? Chi jeē sáha rō sūcuán cúu nájnūhun stiquī jeē tu jéndije tí, te jéñú yatá tí xini pulla, te sūcuán stóho tí máá tí, áchí.

¹⁵ Yūcuán na te ní cahān ná: ¿Na nihín cúu jeē cahán, Tátā? áchí ná. Te máá jítoho na ní cahān yā jíin ná: Máá rí cúu Jesús, te jeē

jító xeēn rō ñayuu cácanđje i ruhū cúu jeē jító xeēn rō ruhū.

¹⁶ Ndonga condichi rō, chi vēji ri nuū rō jeē tejniñu ri rohó sáha rō jniñu cúní ri, te nacani cáji rō jñuhun táca jée ní jito ró vijna, jíin jée steén gā ri nuū rō táca quívi quíji.

¹⁷ Te jnama ri rohó núu táca jñáhan ñuu rō jíin núu ñayuu táca gá nación, chí nuū ñayuu un táji ri rohó quíhñ rō.

¹⁸ Te táji ri rohó quíhñ rō nuū i, chí nájñuhun nanune ró tñnú i cúu jeē steén rō jñuhun ri nuū i te jecūhun ni i. Chí ñayuu ná tu candije i ruhū, nájñuhun cájica i nuū néē. Te jeē candije i ruhū, quívi i nuū luz ri, te tuá quíhi i chíji jniñu jeē cuní jexeén jeē cúu Satanás, chí sa suhva quíhi i chíji jniñu cúní maá rí. Te táji ri rohó quíhñ rō nuū i, návaha candije i ruhū te cone cáhnu ni ri nuū cuéchi i. Yūcuán na te inuú nihñ tahú i jíin táca gá ñayuu jeē ní sándoo ri anuá i, áchí yá jíin ná.

Jeē ní cachi Pablo ndese ni jetáhú de jñuhun ni cahān yā

¹⁹ Jeē yūcuan tu ní sáníhni ni na núu jñuhun ni cahān yā ichi ándiví jíin ná, tátā rey Agripa.

²⁰ Chí ni jetáhú ná, te ni nacani ná jñuhun ya xíhna gā nuū ñayuu ñuu Damasco, te sáá te ni nacani ná jñuhun ya nuū ñayuu ñuu Jerusalén jíin ní región Judea jíin núu ñayuu táca gá nación. Te jñuhun ni nacani ná núu i cúu jeē na nácani ni i jeē stóo i cuéchi i te nasāma ini i sáha Yāā Dios, te na sáha i jniñu váha jeē steén jeē ní nasāma ini i.

²¹ Te siquí jeē súcuan ni nacani ná jñuhun te ni cajñi jñáhan ñuu yō hebreo sáñá ini templo, te ni cacani i cahni i sáña núu.

²² Te ni chindéé ñáhán Yāā Dios sáñá, te jeē yūcuan índichi nihñ na ndé vijna nácani cáji ná jñuhun ya nuū ñayuu cácujeñnu jíin núu táca-ni ñayuu. Chí tu chíso gá na jñuhun siquí jñuhun jeē ní nacani Moisés jíin táca gá tēe ni canacani jñuhun Yāā Dios nde jehahán.

²³ Te ni cundaā jñuhun ni canacani de un jée cánuú ndoho Cristo nde cuu yā, te xíhna gā maá yá natecu vēsú táca gá ndiyi, te súcuan stéén cají yá nuū ñayuu jeē jnáma ya i, cúu ñayuu nación yō Israel jíin ñayuu táca gá nación, áchí Pablo.

Jeē ní nducú ndéyi Pablo scandje de Agripa jñuhun Jesús

²⁴ Te súcuan ni cahān Pablo jehē maá de, te ni cahān jee Festo:

Ni nduloco rō, Pablo. Siquí jeē ní scuáha ndasí ró te jeē yūcuan ní tñvi xíní rō, áchí de.

²⁵ Te ni cahān Pablo:

Tu ní tñvi xíní na, tátā Festo, chí sa suhva íyo cáji ndáā jñuhun cáhán na.

²⁶ Te maá rey Agripa je jíiní váha de táca jniñu ní íyo jeē ní nacani ná, te tu yúhú ná cahān na táca jñuhun yáha, chí je jíiní váha na

jeē jíiní de táca jñuhun yáha, chí tú sáhi ní cúu táca jniñu yáha.

²⁷ Tátā rey Agripa, zá cándje ní jñuhun jeē ní cacahān tēe ni canacani jñuhun ya nde jehahán? Jéni ni na jée candije ní, áchí Pablo.

²⁸ Yūcuán na te ni cahān Agripa jíin Pablo: Va jéni ni rō jeē jíin jecu jñuhun ni cahān rō te sáha ró jeē candije ri Cristo, áchí de.

²⁹ Te ni cahān Pablo:

Vēsú jíin jecu-ni jñuhun chí jíin cuéhē, te jíicán tahú na jée maá ní jíin táca gá tēe cájini sóho jñuhun cáhán na vijna, na cándje ní nájñuhun cándje maá ná, te tu cúní na jée cónuhñi ní nájñuhun núhñi na.

³⁰ Te ni ndíhi ni cahān Pablo táca jñuhun yáha. Te ni ndocuñí rey jíin gobernador jíin Berenice jíin táca gá tēe cácujeñnu cáyūcu jíin de.

³¹ Te ni cacujiyo de, te ni candajnūhun sñin maá de:

Tú ni ñin cuéchi ní sáha tēe yáha jée cúu de ní jeē cóne ga de vecāa.

³² Te ni cahān Agripa jíin Festo:

Cuu siáá ni tēe yáha núu jeē tu ní cáhán maá de jeē quíhñ de nde nuū rey yō nación Roma nuú, áchí de.

Jeē ní catají de Pablo cuahān de ñuu Roma

27

¹ Te ni cundaā jeē quíhñ Pablo jíin barco nde Italia, te suni quingoo ná jíin de. Te Pablo jíin sava ga tēe cáhñin vecāa ni quívicoo de ndaha ñin capitán naní Julio jeē quíndeca de tēe un ndé Italia. Te Julio cúu ñin jñáhan grupo soldado naní Augusto.

² Te nde ñuu Adramitio nuū cájecuñí barco ni quenda ñin barco ni quee, te ni quívicoo ná, te quíhñ barco un táca ñuu jeē yñi chíji Asia jeē yúcu yumar. Te suni cuahān Aristarco jíin ná, te maá de cúu tēe ñuu Tesalónica región Macedonia.

³ Te ñga quívi ní jinūcoo ná ñuu Sidón nuú cájecuñí barco. Te Julio ni cundáhú ní de Pablo, te ni jēhe de jñuhun ni jecondēhe Pablo táca amigo de, te ni cachindéé ñáhán i de.

⁴ Te ñuu yūcuan ní quenda barco cuahān jíin ná. Te siquí jeē nihñ yñi tachí te tu ní cúu quíhñ yohó barco, te ni tee xín barcu cuahān jíin ná xiin isla Chipre, ñuhun jeē ñe sñin nuū ndúte, te lado jecó barco ní quendōo Chipre.

⁵ Te ni cayāha ná yumar Cilicia jíin Panflia cuahān ná, te ni jinūcoo ná ñuu Mira ndañúú Licia.

⁶ Te ñuu yūcuan ní nihñ capitán ñin barco jeē vēji ñuu Alejandría te quíhñ ichi Italia, te ni cahān de jíin ná ni quívicoo ná barco un.

⁷ Te cuéhē quívi ní cahñin na núu ndúte jíin barco, chí cuéé ní jica, te fuerza-ni ní jinūcoo ná yuñtū Gnido. Te tuá ní jēhe tachí

un jnúhun quihín yohó barco, te ni cayāha ná núu jnúhma tachī xiin ñúu Salmón jeē íne nuū isla Creta.

⁸ Te yōhyo ni canducú ndéyí tée cáscáca barco un, ní yāha jíin ná ní yumar xiin Creta. Te ni jinūcoo ná ñn lugar naní Buenos Puertos nuū cájecuñī barco, te yajni un íne ñuu Lasea.

⁹ Te je ni cuu cuehē quivī ni cajica ná jíin barco. Te je yajni quejéé vico mǐjin, te yūcuan cúu tiempo jeē yíí jica barco te sanaa te coo jnúndóho nuū mar. Te ni cahān ñihin Pablo jíin de:

¹⁰ Tātā jijnáhan ní, jíin ná jeē yóhyo yíí coo viaje yāha, te quiji jnúndóho siquī barco, te naa barco jíin ndajniñu, te nde maá yó sanaa te cuu yō, achí de.

¹¹ Te tu ní chúsóhó capitán jeē cahán Pablo, chí sa suhva jeē cahán tēe scáca barco un jíin tēe chíí barco.

¹² Te siquī jeē tu iyó yāha lugar nuū ni jécuiñī barco un jeē cóyūcú de ní vico mǐjin, te ni cajeni ni cuehē gā de jeē vāha ga núu quendacoo de yūcuán. Chí cájeni ni de jeē núu cuu te jinūcoo de ñuu Fenice te yūcuán coyūcú de vico mǐjin. Chí Fenice suní íne yundúte isla Creta nuū cájecuñī barco, te ndijin ichi noroeste jíin suroeste.

Jeē ní jécuiñī ñn tachī ñihin jeē stóna ndute mar

¹³ Te ni jecuñī vīta táchī ichi sur, te ni cajeni ní de jeē jíin de Fenice nuū, te ni cascáca ga de barco jica jíin de xiin Creta.

¹⁴ Te ni cunúu jecu gā, te ni quejéé-ñi ñn tachī ñihin ndasí jeē naní táchī nordeste.

¹⁵ Te tuá ni cúu ga quihín yohó barco, chí ni chundahá-ni tachī cuahān jíin, te ni casiáá-ni de jeē cascáca de, te cháha chūcuan cuahān barco jíin ndihí ná sáha tachī.

¹⁶ Te ni yāha jíin ná xiin isla lulí jeē naní Claudia, nuū jnúhma tachī. Te vésú súcuan te yōhyo uhú ni casca ná barco lulí jeē ndiquín yatā barco cáhnu.

¹⁷ Te ni casquíví ná ini barco cáhnu. Te ni casucun núu de barco cáhnu jíin yoho. Te cáyuhú de jeē quihín barco nuū yaxín ndute nuū naní Sirte te jññ nuū ñiti, te jeē yūcuan ní casnúu de sahna cóquin jeē stehí te jica barco. Te ni casiáá de jeē na quihín ndé chí chundahá táchī.

¹⁸ Te tu jécuiñī cuiti jeē yíhi tachī ñihin. Te inga quivī un ní caquejéé de cájete de ndajniñu ndiso barco, návāha nduñama gā barco te ma queé chíji ndute.

¹⁹ Te quivī uní ni cajēhe núu ná ndaha ni cajete ná maá ndajniñu jéñiñu barco.

²⁰ Te cuehē quivī tu ní cájito ná ñíandii ni quimi siquī jeē ín vicō, ní tu jécuiñī cuiti tachī ñihin ún, te tuá cáñuhun ní na cácu ná.

²¹ Te ni cuu quivī jeē tuá cáyeji cuiti na stáa. Te ni jecondichi Pablo sava mēñu tēe ún, te ni cahān de:

Tātā jijnáhan ní, núu ní cájetáhú ní jnúhun jeē ni cahán ná te ma quéndacoo yó Creta nuū, te ni ma cóto yó jnúndóho yāha ní ma náa ndajniñu núu.

²² Te vijna cáhán ñihin na jíin ní jeē cuandeyí ní ni jijnáhan ní, chí ní ñn ní má cúu ní, vésú naa barco.

²³ Chí jeē cuni ní quiji ñn ndajéhé jeē ní tají maá Yáa Dios nuū ná. Chí maá yá cúu Jitoho ná, te jéñiñu ná núu yā.

²⁴ Te ndajéhé yā ún suhva ni cahān yā jíin ná: Pablo, ma yūhu ró, chí vāha-ni jinú ró nuū rey nación Roma, te jeē siquí rohó te sáha Yáa Dios jeē cácu ndihí tēe cáhín jíin ró ini barco yāhá, achí yá jíin ná.

²⁵ Tātā jijnáhan ní, ma yūhu ní núu súcuan, chí maá ná cúcáhnu ní na Yáa Dios jeē coo nájnúhun ni cahān ndajéhé yā jíin ná.

²⁶ Te jinú nahín yó ñn isla, te ma jinú yachí yó nuú quingoo yó, achí de.

²⁷ Te ni cuu uxí cuñ jecuáa nde jeē ní quejéé táchī, te jica barco nuū mar Adria, te cháha chūcuan cuahān barco sáha tachī. Te maá jecuáa ún te jeē ní cuu sava ñuú te cájeni ní tēe cáscáca barco jeē jé cuacuyajni jinú barco ñuhun íchi.

²⁸ Te ni casínga de ñn jeē cáchicuahá de nasaa cúnú ndute, te ni cajini de jeē iyó ócō xahún ñn metro. Te ni jica barco jecu gā te ni casínga tucu de, te ni cajini de jeē iyó ócō uxā na metro.

²⁹ Te cáyuhú de jeē jécujináhan barco jíin toto, te ni cajihni de cuñ cāa gancho náhnu yatā barco un, te ni cascáne de nde jehē ndute návāha chituu te jecuñī barco. Te yōhyo jnāa de jeē na cundijin yachí.

³⁰ Te tēe cáscáca barco un ní canducú de cunu de quingoo de jíin barco lulí te cácu de nuū jnúndóho quiji siquī barco cáhnu núu. Jeē yūcuan ní casnúu de barco lulí un núu ndute, te casáha-ni de nájnúhun jeē snúu de inga cāa gancho ichi núu barco návāha tú cuni ñayuu jeē cácuni de cunu de quingoo de.

³¹ Te ni cahān Pablo jíin capitán jíin táca soldado:

Núu tú coyūcu tēe yāha ini barco cáhnu jíin yó, te ma cácu cuiti maá ní jijnáhan ní, achí de.

³² Yūcuán na te soldado ni cajehnde de yoho núhni barco lulí, te ni jneni-ni cuahān.

³³ Te nuū cuacundijin te ni cahān Pablo jíin táca tēe un jeē na cáji de staa. Te suhva ní cahān de:

Vijna iyó úxi cuñ quivī jeē cándito ní te tu cáyeji cuiti ní stáa.

³⁴ Te cáhán ndahú ná jíin ní jeē na cáji ní stáa, návāha nanihín ní ní te cácu ní, chí ní ñn yó má cúu, ní ma túj cuiti yó, achí de.

³⁵ Te ni ndihí ni cahān de jñuhun yáha, te ni quihín de ìn staā, te mehñu táca ñáyyu un ní nacuatáhú de nuū Yaā Dios, te ni tahú sáva de staā ún, te ni quejéé de yéji de.

³⁶ Yūcuán na te ni candusñ ni ndihí de, te suni ni cayeyi de staā.

³⁷ Te ndivii na jéé cáñuhun ná ini barco cúu uū ciento uní xico xahūn ìn ná.

³⁸ Te ni cayeyi váha ndihí ná. Yūcuán na te ni cajete de trigo cuahān nuū ndúte un, návāha na ndúñama gā barco.

Jeē ni quéé barco chíji ndute

³⁹ Te nuū ní cundijin te ni cajito de ñuhun, te tu ní cánacuni de ndé nuū cúu. Te ni cajito de nuū ìne cuiñi ndute, te suni máá ñíti cúu, te cájeni ní de jinū de yūcuán jín barco núu na cúu núu.

⁴⁰ Te ni cajehnde de yoho núhni cáa gancho yúcuán, te ni caquendōo cáa un núu mar. Te ni canandají de yujnu jeē scotú chíí barco, te ni nacata caa de sahma cóquin ichi nuū návāha chundahá táchí barco, te ni quejéé caca quihín jín de ichi núu iyó ñíti.

⁴¹ Te ni jinū barco nuū ñihín náquijnáhan ndute. Te ni quéé barco nuū ñíti ñuhun chíji ndute, te ni jññi-ñi ichi núu te tuá ní jica cuiñi, te yatá barco un ní cahya-ñi jeē ñihín ní cani suhma ndute mar.

⁴² Yūcuán na te ni candajñuhún soldado jeē cáhni de táca preso návāha ma sūte i te cunu i quingoo i.

⁴³ Te cúní capitán un jéé cácu Pablo, te ni jesicoo de. Chí sa ní cahān de núu ndé ñáyyu jiní sūte te xihna gā i na núngoo i sūte i nuū ndúte, te na quénda-ñi i quihín i nuū ñuhun ichi.

⁴⁴ Te suni sūcuán na quécoo ndihí i quihín i, sava i coso candá i jín yujnu cūnu te sava ga i jín pedazo yujnu barco. Te sūcuán ni cacácu ndihí ná ní jinūcoo ná ñuhun ichi.

Jeē ni ìne Pablo isla Malta

28

¹ Te nuū ní cacácu ná te ñayuu cáyūcu yúcuán ní cacachí i nuū na jéé isla un nání Malta.

² Te ñayuu un ní cacundáhú ni i sãña jijnáhan ná, te ni cascáyú i ñn ñuhūn cáhnu, te ni cacahān i jín ná jeē nasaā ná, chí mijin sáha jeē cúun saū.

³ Te ni stutú Pablo jecu tujnu íchi. Te jeē jnāa de tujnu un núu ñuhun te ñn coō xeén jinū ti ní quenda ti tujnu un jéé ní cujihni, te ni chiyuhú-ñi ti ndaha de.

⁴ Te ñayuu cáyūcu yúcuán ní cajito i jeē ndíta caa coō un yíyuhú tí ndaha de, te ni cacahān i:

Tēe yáha vā sanaa te ni jehni de ndīyí nuū sūcuán, te vēsú je ní cácu de nuū mar, te máá yāá sándaā jniñu ñayuu tu jéhe ga yā jñuhun jeē cótecu de, áhí i.

⁵ Te ni caja Pablo ndaha de, te ni ñinga coō un núu ñuhún, te tú na vé ní ndóho de.

⁶ Te cándētu táca ñáyyu jeē chūhun i cuiñi de chí cotúú-ñi de te cuu de. Te ni cunahán téyí cándētu i, te ni cajito i jeē tú na vé ní ndóho de. Yūcuán na te ni nasāma cájeni ni i, te ni cacahān i jeē ñn yaā cúu Pablo.

⁷ Te yajni yūcuán iyó ñuhun tēe cújēhnu ga Malta un, nání de Publio. Te ni cana tēe un sãña jijnáhan ná, te ni jéhe núu de vehe de ni coyūcu ná jín de uní quiví, te ni jito yúcuán de sãña.

⁸ Te tátá Publio cáa de, chí ndóho de cuehyí quíji jín cuehyí ñiñi. Te ni jecondēhe Pablo tēe ún, te ni jicān tahú de te ni soó de ndaha de síquí tēe ún, te ni nduvāha-ñi de.

⁹ Yūcuán na te ni quijicoo ndihí ga ñayuu cácuñ yūcuán, te suni sūcuán ni canduvāha-ñi i.

¹⁰ Te ñayuu un ní cajēhe i cuehē ndajñiñu ni cacutahū ná. Te nuū ní jinū quiví jeē quingoo tucu ná jín barco, te ni cajēhe i táca ndajñiñu cuu ná ichi.

Jeē ní jinū Pablo ñuu Roma

¹¹ Te uní yoō ní coyūcu ná Malta. Te ñn barco jeē véji ñuu Alejandría ni ñne Malta ñí vico míjin, te ichi núu barco un ndéé uñ figura idolo ñuu de nání Cástor jín Pólux. Te ní quivícoo ná barco un cuángoo ná.

¹² Te ní jinūcoo ná ñuu Siracusa, te yūcuán ní coyūcu ná uní quiví.

¹³ Te ní quenda barco cuahān jín ná nduu nduu yundúte, te ní jinūcoo ná ñuu Regio. Te ñnga quiví ún váha ní quiji tachí ichi sur, te ní quendacoo ná ñuu Regio, te uñ quiví te ní jinūcoo ná ñuu Puteoli.

¹⁴ Te yūcuán ní caquijnáhan ná jín jecu hermano cácandje, te ni cacana de sãña ní coyūcu ná jín de ñn semana. Yūcuán na te ní quendacoo ná jéé quihín ná ñuu Roma.

¹⁵ Te hermano cáyūcú ini ñuu Roma, je ni canihín de jñuhun jeē jinūcoo ná, te ni quendacoo de, te sava de ní caquijnahan de sãña ndé ñuu Foro de Apio te sava ga de ñuu Tres Tabernas. Te ná ni jito Pablo nuū de jijnáhan de, te ni nacuatáhú de nuū Yaā Dios, te ni ndundeyí ni de.

¹⁶ Te sáa te ní jinūcoo ná ini ñuu Roma, te capitán ní squiví de táca preso ndaha tēe cújēhnu nuū táca soldado ñuu Roma. Te ní cajēhe de jñuhun jeē cone sñn Pablo te condito ñn soldado de.

Jeē ní nacani Pablo jñuhun ya ini ñuu Roma

¹⁷ Te nuū uní quiví te ni cana Pablo táca tēe cácuñehnu nuū jnáhan ñuu de hebreo cáyūcú ini ñuu Roma. Te ni cacutútú de, te ni cahān Pablo jín de:

Tátá jijnáhan ní, tú cuiñi na vé ní sáha ná síquí jnáhan yó hebreo ní síquí táca jniñu ní catajñuní jíi yó. Te vēsú sūcuán te ní cajñi

i sãña ndé ñuu Jerusalén ni casquĩvi i sãñã ndaha tēe ñuu Roma jijnáhan de.

¹⁸ Te tēe ñuu Roma jeē cácujeñhu cáyūcú Cesarea ni castíchi de sãñã, te cácuñi de siáá de sãña núu, chí ni cajini de jeē tú na cuēchi ná jéē cúu ná.

¹⁹ Te jnánhan ñuu yō hebreo tu ní cájēhe de jnūhun. Jeē yúcuñi ní cahān na jéē quiji ná núu maá rey cujeñhu ga nde ñuu Roma yāhá te sãndaã maá de siquĩ ná. Te tú vēji ná jéē cácuñi na cuēchi siquĩ ñayuu nacióñ yō.

²⁰ Jeē yúcuñi ní cana ná níhñ jijnáhan ní, návāha cuni na táca ní te ndajñūhun yó. Chí yóhó ñayuu Israel cáñūhun ní yō jeē nátecu ndīyĩ, te suu jnūhun un nácani ná, te jeē yúcuñi cúu jeē nuhñi na jíñ cadena yáha, áchí de.

²¹ Te ni cacahān tēe un jíñ Pablo:

Tú ni ññ carta ni cátaji ñayuu cáyūcú Judea nuū na jéē cástūhún de jnūhun ní, te táca jnánhan yó Judea jeē ní quijicoo yāhá, tú ni ññ jnūhun néé ní cacahān de siquĩ ní.

²² Te cánujnahān ní ná cuni sōho ná ndese cúu jnūhun jeē cahān ní, chí je cájini na jéē táca-ni lado cacahān ñayuu contra siquĩ jnūhun jeé jéē steén ní, áchí de.

²³ Te ni cajeni de ññ quivĩ, te ni quijicoo cuehē de vehe nuū néne Pablo. Te ni nacani de jnūhun ndese ndácu Yaā Dios jniñu, te ni steén caji de jnūhun nde jenéhen te nde ni ini. Te súcuñi nducú ndéyĩ de scándije de táca tēe un jnūhun Jesús, te ni steén de jeē suni súcuñi cáhān ley jeē ní jéhe ya nuū Moisés jíñ jnūhun jeē ní cateo tēe ni canacani jnūhun Yaā Dios nde jenahán.

²⁴ Te ni cacandije sava de jnūhun ní cahān Pablo, te sava ga de tu ní cájetáhú de.

²⁵ Chí tú inuú cáhīyo ní de. Te sáá cánducú de quingoo de te ní cahān Pablo:

Ndaā cahān jnūhun jeē ní cahān Isaías, tēe ni nacani jnūhun Yaā Dios nde jenahán, chí suhva ní cahān de jíñ táca jíí yō ní sáha Espíritu Santo:

²⁶ Ní cahān Yaā Dios:

Cuáhán núu jnánhan ñuu rō yāhá te cahān rō jíñ i:

Vēsú cuni nahín váha ró te ma jécūhun ní rō, te vēsú coto váha ró te ma cúni rō.

²⁷ Chí yōhō níhni ní rō,

chí tu cácuñi rō cuatáhú ró.

Te yōhō uhū cájini sōho ró,

chí tu cánujnahān ní rō cuni sōho ró jnūhun rí.

Te nájnūhun cájesi rō tinūu ró

cúu jeē tu cácuñi rō nanducú ró ndese cúu,

te tu cácuñi rō jeē násāma ini rō

návāha nasávāha ní anuá rō nuū cuēchi ró, ní achí Yaā Dios.

Achí tutu.

²⁸ Núu súcuñi te na cástūhun ná nuū ní jéē jnūhun ní táji Yáa Dios jeē jnáma ya yohó, nde vijna te táji yá jnūhun yáha quihñ nuū

ñayuu táca nacióñ jeē tu cájini i jnūhun ya, te maá i chí cuni sōho i, áchí de.

²⁹ Te ní jíñu ní cahān de jnūhun yáha, te cuangoo jnánhan de hebreo, te yōhō ní cacahān de siquĩ jnūhun yáha jíñáhan de.

³⁰ Te ní condee Pablo uū cuiyā vehe jeē ní quihñ núu de ún. Te ni cusñi ní de cahān de jíñ táca ñayuu ní quijicoo nuū de.

³¹ Te jéñu-ni ní nacani de jnūhun ndese ndácu Yaā Dios jniñu, te ni steén de jnūhun maá Jítoho yō Jesucristo, te tú ni ññ ní jési jeē nácani de jnūhun.

CARTA JEE NI TEE SAN PABLO APOSTOL NUU ÑAYUU ÑUU ROMA

¹ Máá rí cúu Pablo, mozo Jesucristo, chi ni cana Yaá Dios ruhú cúu ri apóstol yá, ni jeni ya ruhú te ni tají yá ruhú jeé nácani ri jñuhun jeé jnáma ya ñayuu.

² Te jñuhun un ní jejnühun ya nde jenahán ndasí, te yósó núu tútu ñi jeé ní catee tée ni canacani jñuhun ya.

³ Te jñuhun un cáhán siquí Jitoho yó Jesucristo, Yaá cúu Sêhe Yaá Dios. Te ni nduu ya tée, ni cacu ya chíji yucún rey David.

⁴ Te ni natecu yá mēhñu ndíyi ni sáha Espíritu ñi, te súcuan ni steén Yaá Dios jeé cúu ya Sêhe ya jeé ndíso poder.

⁵ Te jeé jín Jesucristo ni jēhe Yaá Dios jñiñu luu yáha jeé cácuu ri apóstol, cájica ri jín jñuhun Cristo, náváha coo ñayuu táca nación jeé candíje i jeé sáha ya jehē i, te cuatáhu i nuu yá.

⁶ Te suni máá rō jijnáhan ró, suni ni cana ya rohó ní quáivicoo ró ndaha Jesucristo.

⁷ Te tée ri carta yáha cuajeé nuu rohó ñayuu ñuu Roma. Chi ni cundáhu ni Yaá Dios rohó, te ni cana ya rohó jéé coo ndoo coo ñi rō nuu yá. Te ñuhun ni rī jeé máá Tátá yó Yaá Dios jín Jitoho yó Jesucristo sáha ga yá jeé váha rohó, te sáha ya jeé coo ndeyí coo sifí ni rō.

Jeé cuní Pablo quihñ de ñuu Roma

⁸ Te xihna gā cástühun rí nuu rō jeé nácuatáhu rí nuu Yaá Dios jeé siquí rohó jijnáhan ró, chi ni sáha Jesucristo jeé váha rohó. Chi ní ñayivi jíté núu jñuhun cuahán ndese váha cácaníje rō yá.

⁹ Te máá Yaá Dios jini yá jeé niní jicán tahú rī jehē rō jijnáhan ró nuu jicán tahú rī. Chi yóhyo ndáhví ni rī rejñiñu rí nuu yá jeé nácani ri jñuhun Sêhe ya.

¹⁰ Te niní jicán tahú rī nuu yá jeé núu cuní yá te nde vijna te cuu jecondēhe rí rohó.

¹¹ Chi cúu ni rī coto rí nuu rō jijnáhan ró, te steén gā rī jñuhun ya nuu rō, náváha quendōo váha ga anuá rō te cuiñi ñihin ga rō jín.

¹² Súcuan cuní rī náváha sáha yó jéé inuú coo ndeyí ni yó jijnáhan yó siquí jeé inuú cácaníje yó yá.

¹³ Hermano jijnáhan ró, cuní rī jeé na jécūhun ni rō jeé tjñi jñu ni cuu ni rī jecondēhe rí rohó, te nde vijna ná tu cuu. Chi cuní rī scuité núu ga rí jñuhun ya mēhñu ró, nájnühun ni sáha ri mēhñu ñayuu táca gá nación.

¹⁴ Chi cúu ri tée táu siquí jñuhun ya, chi táu ri nacuaña rí jñuhun ya nuu ndihi ñayuu, cúu

ñayuu jini gā siquí ndihi jeé iyó ñayivi jín jéé tu jini cuiti, cúu ñayuu túhva jín jéé tú túhva.

¹⁵ Jeé yúcuan cúu jeé ndihví ni rī jeé suni nuu rohó ñayuu ñuu Roma nacani ri jñuhun jnáma ya yohó.

Jeé ndíso jñuhun váha ya poder

¹⁶ Chi tu cúcanu rī siquí jñuhun váha ya, chi yúcuan cúu poder Yaá Dios jeé jnáma ya táca ñayuu cácaníje, xihna gā ñayuu hebreo te suni táca gā ñayuu.

¹⁷ Chi jñuhun váha ya un steén nuu yó jeé ndáhva Yaá Dios cuēchi yó siquí jeé candíje yó jéé sáha ya jehē yó, te máá jéé candíje yó ní cuahán yó. Chi súcuan cáhán nuu tútu ñi: Ñayuu jeé ní ndahva yá cuēchi i, tēcu i jeé candíje i jeé sáha ya jehē i, áchi.

Siquí jeé iyó ndasí cuēchi ñayuu

¹⁸ Chi jini váha yó jéé Yaá Dios andiví, cuāha ya castigo xeén nuu táca ñayuu tu cácaníje te máni cuēchi casáha. Chi jín jñiñu néé casáha i te cájesi i nuu jñuhun ndaá.

¹⁹ Te ma cúu cahán i jeé tu jécūhun ni i siquí ndese Yaá cúu Yaá Dios, chi máá yá ni steén nuu i.

²⁰ Chi jín táca jeé ni sáha ya te cúu jécūhun ni ñayuu ndese Yaá cúu máá Yaá tu jito i nuu. Chi nde ni jecóo ñayivi jín ndé vijna te cúu jécūhun váha ni i jeé máá yá cúu Yaá Dios te iyó poder yá ní cáni. Te jeé yúcuan má cúu cuiti cahán i jeé tu jini i jeé iyó yá.

²¹ Chi vésu ni cajini i ndese Yaá cúu ya, te tu ní cáchiñúhún i ya jeé cúu ya Yaá Dios, te ni tu ní nácuatáhu i nuu yá. Chi sa suhva ni nduu i ñayuu cájeni cáhá ni, chi ni candunéé í i, te ni quendōo nee ini anuá i.

²² Cácahán i jeé ndichí i, te sa suhva cácanéé i.

²³ Chi ni castóo i Yaá Dios jeé yóhyo luu cújēhnu, jeé ma cúu cuiti. Te ni cajetáhu i táca imagen jeé casáha i, jeé cáa nájnühun tēe cájiji, te suni nde imagen saa jín coo jín quití cájica ndicúún ndaha.

²⁴ Te jeé yúcuan ní siaá Yaá Dios i jeé na sáha i táca jñiñu jnéhén jñiñu néé jéé cuní i. Te casáha i jñiñu néé jín jnáhan i jeé cúu máá jñuhun canu.

²⁵ Chi tu ní cácaníje i jñuhun ndaá Yaá Dios, chi sa ni cacandíje i jñuhun stáhu. Te cáhiyo yñíhún i te cáchiñúhún i nuu táca jéé ni sáha ya, lugar jeé chíñúhún i máá Yaá ni sáha ún, Yaá jeé canuú cahán yó jeé cújēhnu ya ní cáni. Amén.

²⁶ Jeé yúcuan ní siaá Yaá Dios i jeé na sáha i táca jñiñu néé jéé cándiyo ni i jeé cúu máá jñuhun canu. Chi nde ñahan ni casama ña modo síhí, te ni quívi ña jín modo neé.

²⁷ Te suni súcuan tēe ni casiáá de modo chíjñiñu jín ñahan. Te nde ni nduquijí de ni casáha ndiyi de jín jnáhan yí de, te tēe jín tēe ni casáha de jñiñu jñuhun canu. Te cándoho de castigo siquí jñiñu néé ní casáha de.

²⁸ Te jeē tu ní cáconi i cuajnúhún i Yaā Dios, jeē yúcuani ní siaá yā i jeē na cáni neé ni i, te sáha i táca jniñu jeē tu íyó váha.

²⁹ Te máni máa na jniñu jeē tu íyó ndáa cándihvī ni, te cájica jnéni, casáha jniñu neé, cándiyo ni, cájito uhū jnánhan. Te máni jeē cácuueésún ni, cájehni ndīyi, cájejnánhan, cástáhú, cáshuhū jnánhan, cásjnúhún siquī jnánhan.

³⁰ Cácahān jnúhun neé siquī jnánhan, cájito uhū Yaā Dios, cácujeē ni, cáсандúxí máa, cástátéyi máa, cájequin costumbre neé, tu cájendetū nuū tatá nuū naná.

³¹ Te tu cájecūhun cuiṭi ni, tu squícu jnúhun jéjnúhun, tu íyó máni jín jnánhan, tu íne cáhnu ni nuū jnánhan, tu cūndáhú ni jnánhan.

³² Te je cájini váha i jeē ni sándaā Yaā Dios jeē ñayuu casáha súcuani, cánuū jnahnū ndetū i. Te vēsú súcuani cájini i, te níni casáha i jniñu neé un, te suni cánujnahan ni i jeē casáha jnánhan i súcuani.

Ndaā sándaā Yaā Dios siquī cuēchi

2

¹ Núu súcuani te róhó jéē cahán cuēchi siquī jnánhan, núu na-ni ñayuu cúu ró, ma cúu cahān ró jeē tú na cuēchi máa ró. Chí jeē cahán ró cuēchi siquī jnánhan ró cúu jeē ndénehen ró cuēchi siquī maá ró. Chí róhó jéē cahán cuēchi, suni súcuani sáha máa ró cuēchi.

² Chí jíni yō jeē Yaā Dios, ndaā sáha ya jeē ndóna ya siquī cuēchi ñayuu casáha súcuani.

³ Te róhó jéē cahán cuēchi siquī ñayuu casáha cuēchi, te suni súcuani sáha máa ró, ¿te á jéni ni ró jeē cácu máa ró quivī ndóna Yaā Dios siquī cuēchi, chí naṭun?

⁴ ¿A cújéē ni ró nuū jnúhun jeē yóhoyo váha ni Yaā Dios jíni ró, jíni jéē iyó paciencia yā jeē tú yachī cuáha ya castigo nuū ró? ¿Te á tu jécūhun ni ró jeē jnúhun jeē yóhoyo váha ni yā sáha jeē nácani ni ró siquī cuēchi ró?

⁵ Chí níhni ni ró te tu nácani ni ró siquī cuēchi ró. Te jeē yúcuani cáya gā ró castigo siquī ró quivī sáha Yaā Dios juicio, máa quivī jeē cóo ndijin jeē ndaā sándaā yā siquī cuēchi.

⁶ Chí chunaa yā nuū ná #n ná #in ñayuu núu ndese jniñu ni casáha i.

⁷ Te ñayuu jeē tu jécuiñī i jeē sáha i jniñu váha, cuáha ya jnúhun jeē cótecu i ní cáni. Chí ndúcú i quivī i nuū ndujéhnu yíñúhún i, nuū níí cáni cótecu i.

⁸ Te quivī ni yā te cuáha ya castigo nuū ñayuu cújéē ni nuū yā, te cúnihni ni nuū jnúhun ndaā, chí sa nuū jnúhun yacuá yóho jetáhú i.

⁹ Te táca ñayuu casáha jniñu neé, chí nihIn i jnúndóho xeēn te cucuihyá ndasí ni i, xihna gā ñayuu hebreo te suni súcuani ñayuu táca gá nación.

¹⁰ Te sa suhva táca ñayuu casáha jniñu váha, chí quivī i nuū ndujéhnu yíñúhún i, te coo ndeyí coo sī ni i, xihna gā ñayuu hebreo te suni súcuani ñayuu táca gá nación.

¹¹ Chí Yaā Dios tu sáha ya cuenta ndese cúu #in #in ñayuu, chí inuú sáha ya jíni i.

¹² Chí táca ñayuu jeē casáha cuēchi, vēsú tu cáyihi i chíji ley jeē ni jéhe ya nuū Moisés, te tu níni ley un te jnahnū ndetū i. Te táca ñayuu cáyihi chíji ley Moisés te casáha cuēchi, jíni ley un sándaā yā cuēchi i.

¹³ Chí tu ndáhva Yaā Dios cuēchi ñayuu jeē máa jéē cúni nahin-ni i jnúhun cáhán ley yā. Chí sa suhva ñayuu squícu jeē cahán ley yā cúu jeē ndáhva yā cuēchi i.

¹⁴ Chí ñayuu táca nación jeē tu cáneváha tutu ley jeē ni jéhe ya nuū ñayuu hebreo, te núu cásquicu máa i ley yā, suu cúu jeē cáneváha i ley yā ini anuá i, vēsú tu cáneváha i tutu ley un.

¹⁵ Te súcuani cástéén i jeē jnúhun ndácu ley un chí ñúhun ini anuá i. Te táca jéē cájini ni i jíni anuá i, suu cúu jeē steén nuū i siquī núu ni sáha i cuēchi chí váha ni sáha i.

¹⁶ Te súcuani coo máa quivī jeē jíni Jesucristo sándaā Yaā Dios siquī táca jéē tu íyó váha jeē ni cajeni sáhi ní táca ñayuu. Súcuani cáhán jnúhun váha ya jeē nácani ri.

Siquī jeē tu cásquicu ñayuu hebreo ley Moisés

¹⁷ Te róhó cácahān ró jeē téé hebreo cácuu ró, te cátenuú ró máa ley Moisés, te cácutéyi ró jeē siquī Yaā Dios.

¹⁸ Te cájini ni ró jeē jíni ró ndese nújnahan ni yā, jíni jéē cúu nácaji váha ró ndé-ni cúu jniñu váha, chí ni cacutúhva ró ley un.

¹⁹ Te cájini ni ró jeē máa ró cácuu téé steén ichi Yaā Dios nuū ñayuu tu cájini cuiṭi, jíni jéē cúu sáha ró jéē cūndijin ini anuá ñayuu cájica nájnúhun nuū neé.

²⁰ Te cájini ni ró jeē cúu steén ró nuū ñayuu tú túhva jnúhun ya, jíni jéē máa ró cácuu maestro nuū ñayuu tu jécūhun ni. Chí jíni tutu ley yā te cájini ró ndese cúu jnúhun ndíchi jnúhun ndaā, cájini ni ró.

²¹ Núu súcuani te máa ró jeē castéén nuū ñayuu, ¿te naun tu cástéén ró nuū máa ró? Te máa ró jeē cácahān jeē ma sácuihná i, ¿te naun cáscúicuhná máa ró?

²² Te máa ró jeē cácahān jeē ma cósiquī ndéē i, ¿te naun cásiquī ndéē máa ró? Te máa ró jeē cácahān jeē cácuquini ni ró ídolo, ¿te naun cáscúicuhná ró ndajniñu jeē yúcu ini vehe ídolo?

²³ Te cácutéyi ró jíni ley Yaā Dios, te vēsú súcuani te casáha ró jéē cácahān ñayuu siquī yā, chí tu cásquicu máa ró jnúhun ndácu ley yā ún.

²⁴ Chí súcuani yósó núu tútu i: Ñayuu táca gá nación, máni cácahān ndeváha i siquī Yaā Dios, jeē siquī cuēchi róhó ñayuu hebreo.

²⁵ Te núu cásquicu ró ley Moisés, yūcuán na te níhñ jñiñu ndije jeē ní canihñ rō jñunī circuncidar. Te núu tu cásquicu ró ley un, te vēsú ní cuu ró circuncidar, te nájñuhun jeē tu ní cúu ró.

²⁶ Te tēe tācá nación, núu cásquicu de jñiñu ndácu ley un, vēsú tu ní cánihñ de jñunī circuncidar, núu sūcuan te nájñuhun ní canihñ de jñunī circuncidar.

²⁷ Te tēe jeē tu ní cúu circuncidar yiqui cúñu de, te cásquicu de ley yā, máá de cahān cuēchi siquī rō. Chi tu cásquicu ró, vēsú cánevāha ró tutu ley un, te ní cuu ró circuncidar.

²⁸ Chi nasūu jēē cáa ichi siquī ññ tēe sáha jeē cúu ndije de tēe hebreo. Te ní nasūu jēē cúu circuncidar yiqui cúñu ññ tēe sáha jeē cúu de tēe ndaa.

²⁹ Chi sa suhva tēe cúu hebreo ndije, cúu jeē ini anuá de ññuhun jñuhun ndaa. Te tēe cúu circuncidar ndije, chi nde jíñ ini jíñ ánuá de sáha de jñiñu ndaa te nasūu jēē ndíso de jñunī circuncidar jeē cahán ley un cúu. Tēe cándāa sūcuan, nasūu ñáyuu cájejnúhñ de, chi máá Yaā Dios.

3

¹ ¿Núu sūcuan te na vé iyó gá nuū ñáyuu hebreo jeē quendō vāha ga i? ¿Te ndé níhñ jñiñu jeē casáha i circuncidar?

² Vāha ndasí níhñ jñiñu. Xihna gā nihín jñiñu jeē ní jéhe Yaā Dios jñuhun ya nuū maá i.

³ Te vēsú sava i tu ní cácondije, ¿te á suu sáha jeē ma squicu ga Yaā Dios jñuhun ni jejnūhun ya, chí naññ?

⁴ Tú cuiti jeē sūcuan, chi vēsú núu ndihí ñáyuu castáhú i, te Yaā Dios chi iyó ndaa yā. Chi suhva yósó nuū tútu ññ jeē ní cáhān ññ tēe jíñ yā:

Cahān ñáyuu jeē iyó ndaa ní jíñ táca jñuhun cáhān ní, te cuni i jeē iyó ndaa ní vēsú núu cácahān i siquī ní.

Achí tutu.

⁵ Te cácahān sava ñáyuu jeē iyó vāha jeē sáha yó cuēchi, chí cuēchi yó jéjñiñu stéén jeē iyó ndaa Yaā Dios. Núu sūcuan ¿te á cuu cahān yō jeē tú vāha sáha Yaā Dios jeē jéhe ya castigo núu jéjñiñu cuēchi yó sūcuan? (Va cáhān-ñi nde ri nájñuhun cácahān ñáyuu ñayiví.)

⁶ Tú cuiti jeē sūcuan. Chi núu jeē tú vāha sáha Yaā Dios, ¿te ndese cuu sándaā yā cuēchi ñáyuu ñayiví?

⁷ Te núu jñuhun stáhú cácahān ñáyuu jéjñiñu stéén jeē yóhoyo cújñhu Yaā Dios siquī jeē máni cáhān ndaa yā, ¿te á cuu cahān yō jeē tú vāha jeē cahán yā jeē cuēchi cúu jeē castáhú i?

⁸ Tuú, chí núu jeē sūcuan cúu, te cuu cahān yō jeē vetú-ñi sáha yó jēē neé návāha quee

jeē vāha núu. Te sava ñáyuu cácahān ndevāha i siquī rī jeē sūcuan cástéén rī, te tú ndaa. Ñáyuu ún chí iyó vāha jeē ndénehen ya cuēchi siquī i.

Ndivii yō iyó cuēchi

⁹ Núu sūcuan ¿te á vāha ga ñáyuu cácuu yóhó ñáyuu hebreo vēsú inga ñáyuu naññ? Tú cuiti jeē sūcuan. Chi je ní cacahān yō jeē vēsú ñáyuu hebreo chí ñáyuu táca gá nación, ndivii yō yñhi chíji cuēchi.

¹⁰ Chi suhva cáhān tutu ññ:

Tú cuiti na ñáyuu ndaa iyó, ní ññ i.

¹¹ Te tú cuiti ñáyuu jécūhun ní iyó,

te tú ní ññ i nánducú i Yaā Dios.

¹² Ndihi i ní cascuíta i jñuhun ya,

te inuú-ñi ní castiví ndihí i máá i.

Te tú cuiti ñáyuu sáha jñiñu vāha iyó, ní ññ i.

¹³ Yaū sucūñ i cúu nájñuhun yaū ndiyi jeē núne,

chí máni jñuhun stáhú cácahān i.

Te nájñuhun veneno coō yñhi yuhu i,

¹⁴ chí máni máá jñuhun ndevāha jñuhun uvuā cácahān i.

¹⁵ Te yóhoyo ñama jehē i jeē cáhni i ndiyi.

¹⁶ Te ndé-ñi cúu-ñi nuū cájica i te squíví i jñundóhoyo jeē jñahnú ndetú ñáyuu.

¹⁷ Te tu cájica cuiti i jíñ jñuhun coyūcu máñi i,

¹⁸ te ní tu cánacani ní i jeē cónso Iyo i nuū Yaā Dios.

Achí tutu.

¹⁹ Te jíñi yō jeē táca jñuhun cáhān ley jehāhān, chí cáhān nuū ñáyuu yñhi chíji ley un, návāha ndihí i ma cúu cahān i jehē i. Chi ndenehen Yaā Dios cuēchi siquī i nde jíñ ñáyuu ní ñayiví.

²⁰ Chi tú ní ññ ñáyuu quendō ndaa i nuū yā jeē nducú i squicu i jñiñu ndácu ley un. Chi ley un jéjñiñu máni návāha cuni yō jeē iyó cuēchi yó.

Jeē ñáma ya yohó siquī jeē cándije yó jēē sáha ya jehē yō

²¹ Te yijna te je cájini vāha yó ndese ndáhva Yaā Dios cuēchi yó. Te nasūu ley un sáha jeē quendō ndaa yō, vēsú máa tutu ley jíñ tēe ní canacani jñuhun ya, ní cacahān ndese ndáhva yā cuēchi ñáyuu.

²² Chi táca ñáyuu jeē cácondije i jeē ní jíñhi Jesucristo jeē chúnaa yā cuēchi i, chí ndahva Yaā Dios cuēchi i siquī jeē sūcuan cácondije i. Chí inuú-ñi cúu táca ndihí ñáyuu.

²³ Chi ndihí yó ní casáha cuēchi, te jeē yūcuan tu ní cúu quendō ndaa yō nuū Yaā Dios.

²⁴ Te siquī jeē yóhoyo vāha ní Yaā Dios, jeē yūcuan ndáhva yā cuēchi yó sūcuan-ñi. Chí siquī jeē ní jíñhi Cristo Jesús cúu jeē ñáma ya yohó.

²⁵ Chí Yaā Dios ní jeni ya Cristo návāha socó yā maá yā chunaa yā cuēchi yó jēē ní jíñi yā. Te ñáma ya yohó núu sūcuan cándije

yó. Te súcuan ni sáha Yaā Dios návāha stéén yā jeē Yaā ndaā cúu ya. Chi ichi yátá ni íyo paciencia yā, te tu ní chíhi ya cuenta cuēchi ñayuu.

²⁶ Te tiempo yáha stéén yā jeē Yaā ndaā cúu ya, chí ndaā sáha ya jeē squéndōo ndaā yā ñayuu candíje vēsú íyo cuēchi i, chí cáandíje i jeē ní chunaa Jesús cuēchi i ni ndahva yā.

²⁷ Núu súcuan ¿te á cuu cutéyí gá yō siquí maá yó? Ma cúu cuiti, chí ma cúu cutéyí yó caní ni yō jeē váha squícu yó ley yā. Chi jnáma ya yohó máá síquí jeē candíje yó jeē sáha ya jehé yō.

²⁸ Núu súcuan te je jíní yō jeē ndáhva Yaā Dios cuēchi yó síquí jeē súcuan cándíje yó, te nasūu jéē nducú yó squícu yó jéē ndácu ley.

²⁹ ¿Te á núu maá-ní ñayuu hebreo cúu ya Yaā Dios, chí naún? Tuú, chí suni cúu ya Yaā Dios jeē jnáma ñayuu táca gá naciún.

³⁰ Chi ñn-ní Yaā Dios íyó, te ndáhva yā cuēchi ñayuu cáandíje jeē ní sáha ya jehé i, cúu ñayuu ndíso jnuni circuncidar, cúu ñayuu jeē tuú.

³¹ Te jeē candíje yó jéē jnáma ya yohó, ¿á sáha jeē tuá jíní ñúhún squícu yó ley yā, chí naún? Tú cuiti, chí sa suhva sáha jeē váha ga cuu squícu yó ley yā.

Abraham cúu ñn ejemplo nuú yō

4

¹ Núu súcuan ¿te ndese cahān yō síquí táca jéē ní cuu jíní jíí yō Abraham? ¿Ndese ni ndahvā cuēchi de?

² Nasūu jéē ní sáha máá de cúu jeē ní ndahva Yaā Dios cuēchi de. Chi núu jeē súcuan cúu núu, te cuu cutéyí de jeē váha ní sáha de. Te tu ní cutéyí de, chí nasūu síquí jeē ní sáha máá de cúu jeē ní ndahva Yaā Dios cuēchi de.

³ ¿Chi ndese cáhán tutu íi? Cáhán jeē ní candíje Abraham jeē sáha ya jeē ní jéjnūhun ya nuú de, te jeē yúcuan ní ndahva yā cuēchi de.

⁴ Te ñn ñayuu sájniñu, te yāhu i chí nasūu jéē cútahū i cúu, chí jeē chúnaa yō nuú i cúu.

⁵ Te jeē jnáma Yaā Dios ñayuu, chí jeē cútahū i cúu. Chi vēsú tu cúu squícu i táca jniñu váha, te núu candíje i jeē jnáma ya i nuú cuēchi i, yúcuán na te ndahva yā cuēchi i.

⁶ Te David suni ni cahān de ndese yōhyo ndetū ñayuu jeē ndáhva Yaā Dios cuēchi i, vēsú tu cúu sáha i ni ñn jniñu jeē quéndōo ndaā i nuú yā.

⁷ Chi ní cahān de:
Nacā ndetū ñayuu jeē íne cáhnu ní yā nuú jniñu néé ní sáha i,

te tu ndénehen ya cuēchi síquí i.

⁸ Te nacā ndetū téé jeē tuá chíhi máá Jítoho yó cuenta cuēchi de.

Achí tutu.

⁹ ¿Te á máni máá ñayuu squícu ley circuncidar cúu jeē quéndōo ndetū? ¿Chí suni quéndōo ndetū ñayuu jeē tu cúu circuncidar naún? Suni máá i quéndōo ndetū i. Chi je ní cahān yō jeē ní candíje Abraham jeē sáha ya jeē ní jéjnūhun ya, te jeē yúcuan ní ndahva yā cuēchi de.

¹⁰ Te ná ní ndahva yā cuēchi de, ¿á je ní cuu de circuncidar, chí ndé ná tuú? Nasūu jéē jé ní cuu de circuncidar, chí nde ná tuú.

¹¹ Te cuéé gá te ní nihín de jnuni circuncidar. Te suu ní cuu ñn seña, nájñūhun ñn sello jeē ní ndahva yā cuēchi de síquí jeē súcuan ní candíje de. Te jeē yúcuan ní cahān yā jeē cuu de jíí nuú táca ñayuu jeē candíje i jeē sáha ya jehé i, suni nuú ñayuu tu ní cúu circuncidar, chí suni ndahva yā cuēchi máá i.

¹² Te suni cúu de jíí nuú ñayuu ní cuu circuncidar, te nasūu máni jeē ní cuu i circuncidar, chí suni jeē ní jnū i ejemplo de. Chí cáandíje i jeē sáha ya jehé i, nájñūhun ní candíje máá de nde ná tu cuu de circuncidar.

Núu candíje yó te sáha Yaā Dios jeē ní jéjnūhun ya

¹³ Chí ní jejnūhun Yaā Dios nuú Abraham jíín nuú táca yúcūn de jeē cuāha ya níí ñáyíví cuu tahū de. Te nasūu síquí jeē ní nducú de squícu de ley yā cúu jeē ní jéjnūhun ya un núu de, chí sa suhva síquí jeē ní candíje de jeē ní jéjnūhun ya, te ní ndahva yā cuēchi de.

¹⁴ Chí núu jeē máni máá ñayuu nducú squícu ley cúu jeē nihín jeē ní jéjnūhun ya, núu súcuan te cándíje cáha yó nuú, te ma nihín jniñu jeē ní jéjnūhun ya ún.

¹⁵ Te ley chí sáha jeē nihín ñayuu castigo síquí jeē tu cúu squícu i. Te núu jeē tu ley, te suni tú na jnūhun stívi ñayuu síquí ley coo núu.

¹⁶ Núu súcuan te ní jejnūhun ya jeē sáha ya jeē váha jíín ñayuu síquí jeē candíje i jeē súcuan sáha ya, te jeē cútahū i súcuan-ní cúu. Te jeē ní jéjnūhun ya ún, íyó cutú nuú táca yúcūn Abraham, te nasūu núu maá-ní ñayuu jeē nducú squícu ley jenahán, chí suni nuú táca ñayuu cáandíje nájñūhun ní candíje Abraham. Te súcuan cúu de jíí nuú táca yó jeē cáandíje yó.

¹⁷ Súcuan ní sáha Yaā Dios chí ní candíje de jeē sáha ya. Chí súcuan cáhán tutu íi: Ní jeni ri rohó cuu ró jíí nuú cuehē ndasí ñayuu. Súcuan ní cahān máá Yaā jeē nastécū ndíyí te cáhán yā ndese coo táca jéé ná tu coo.

¹⁸ Te ní candíje de, te ní cocuhun teyí ní de jeē ní jéjnūhun ya jeē coo cuehē yucūn de, vēsú tuá na modo coo sehe de núu. Te jeē yúcuan ní nduu de jíí nuú cuehē ndasí ñayuu, nájñūhun ní cahān Yaā Dios: Súcuan nducuehē yucūn rō, achí yá jíín de.

¹⁹ Te je yajni jinū de ciento cuiyā, te vēsú súcuan te tu ní quénda de nuú jnūhun cándíje

de, vésú jini de jeē maá de jín ñasihí de Sara je jéhu ndasí ndándúú de jeē ma cúu ga coo sêhe de.

²⁰ Te tu ní nácani siquí ni de jeē ma cándije ga de jnúhun ní jejnúhun Yaā Dios jeē coo sêhe de. Chi sa suhva ni cándije nihin ga de, te ni nacuatáhú de nuū Yaā Dios.

²¹ Chi ni cucáhu váha ni de jeē cúu squícu Yaā Dios ndíhi jeē ní jéjnúhun ya.

²² Te jeē yúcuani ní ndahva yā cuēchi de siquí jeē súcuani ní cándije de.

²³ Te nasūu máá-ni siquí Abraham cúu jeē yosó núú tútu jeē ní ndahva yā cuēchi de jeē ní cándije de.

²⁴ Chi suni yosó jéé siquí yohó jíjnánah yó. Chi suni ndáhva yā cuēchi máá yó jéé cándije yó jéé cúu ya Yaā ní nastécu Jitoho yó Jesús.

²⁵ Chi ní jihí Jesús jeē chúnua yā cuēchi yó, te ni natecu yā návaha ndahva Yaā Dios cuēchi yó.

Ndese quéndō ñayuu jeē ndáhva yā cuēchi

5

¹ Núu súcuani te je ní ndahva Yaā Dios cuēchi yó siquí jeē ní cándije yó jéé sáha ya jehé yó. Te jeē yúcuani ní sáha ya jeē ní ndívi yó núú jnúhun maní yā jín yó, siquí jeē ní jihí Jitoho yó Jesucristo jehé yó.

² Chi máá Cristo ní sáha jeē ní quívicoo yó núú Yaā Dios, chi ní sáha ya jeē váha yohó siquí jeē súcuani cándije yó. Te cáhiin nihin yó jín jnúhun jeē sáha ya jeē váha yohó. Te cúsi ní yó chi níhun ni yó jeé jinú yó nuú lúu cujéhu yó jín Yaā Dios.

³ Te nasūu máá yáha-ni, chi suni cúsi ní yó jeē ndóho yó jnúndóho. Chi jini yó jeē máá jnúndóho sáha jeé jéndeyí ni yó.

⁴ Te jeé jéndeyí ni yó sáha jeé íje váha yó cuu yó ñayuu ndaá. Te jeé íje váha yó sáha jeé níhun ni yó táca jéé váha jeé coo.

⁵ Te táca jéé níhun ni yó, chi nihin nahín yó. Chi jnúhun cúndáhú ní Yaā Dios yohó, ní cunuú ini anuá yó, sáha Yaā Dios jeé jín Espiritu Santo jeé ní jéhe ya nuú yó.

⁶ Chi náa ndóho yó jéé máa cúu cuiti jnama yó máá yó, te ní jihí Cristo jehé yohó jéé cúu yó ñayuu íyó cuēchi. Te ní jihí yá máa quívi jeé jé ní jeni Yaā Dios.

⁷ Te yí cúu jeé cúu ñin ñayuu jehé inga ñayuu, vésú jehé ñin ñayuu ndaá. Chi sanaa te íyó jínu jeé chúndeyí ní ñin tēe cuu de jehé ñin tēe ndaá váha.

⁸ Te máá Cristo chi ní jihí yá jehé yó náa máni cuēchi sáha yó, te súcuani ní steén Yaā Dios jeé cundáhú ní yá yohó.

⁹ Te vijna je ní ndahva Yaā Dios cuēchi yó siquí jeé ní jihí Cristo jehé yó. Núu súcuani te suni jini váha yó jéé jnama Cristo yohó núu castigo quívi quívi sáha Yaā Dios juicio.

¹⁰ Chi náa cúu ga yó enemigo Yaā Dios, te siquí jeé ní jihí Sêhe ya jehé yó, te ní sáha ya

jeé ndívi yó núú jnúhun maní yā jín yó. Te jeé súcuani ní ndívi yó nuú jnúhun maní yā jín yó, te suni jini váha yó jéé cácu yó siquí jeé técu Cristo, nduú yá jín yó.

¹¹ Te nasūu máá yáha-ni, chi suni cúsi ndasí ní yó jín Yaā Dios siquí jeé ní sáha Jitoho yó Jesucristo jehé yó, chi máá yá ní sáha jeé ní ndívi yó núú jnúhun maní Yaā Dios jín yó.

Jnúhun Adán jín jnúhun Cristo

¹² Núu súcuani te jini yó jeé ní quívi cuēchi ini ñayivi ní sáha máá ñin-ni tēe Adán. Te jeé siquí cuēchi yúcuani te ní jecōo cuehyí jéhu ñayuu. Te jeé yúcuani cúu jeé jihí ndíhi ñayuu, chi ndíhi í yáhi cuēchi.

¹³ Te nde ná tu cuáha ya ley nuú Moisés, te je íyó cuēchi ini ñayivi. Te siquí jeé ná tu coo ley yá, te tu ní chíhi ya cuenta jeé castivi í.

¹⁴ Te vésú súcuani te nde tiempo Adán te nde tiempo Moisés ní yihí ñayuu chíhi cuehyí jeé jéhu í siquí jeé íyó cuēchi í. Chi ní jihí í siquí cuēchi ní casáha máá í, vésú tu ní sáha í jnánah cuēchi jeé ní sáha Adán jeé ní cuníhi ní de nuú ñin jniñu ní ndacu ya. Te Adán ní cuu de ñin muestra máá Yaā ní quívi cuéé gá.

¹⁵ Te jnúhun jeé ní sáha Adán cuēchi, tu quíjnánah cuiti jín táhu jeé jnama Yaā Dios yohó. Chi jeé ní stívi máá ñin-ni tēe ún, jeé yúcuani cúu jeé jihí ndíhi yó. Te jnúhun jeé jnama Yaā Dios yohó cújéhu ndasí gá, chi siquí jeé ní sáha máá ñin-ni tēe Jesucristo cúu jeé súcuani-ni jnama ya ndíhi ñayuu cándije.

¹⁶ Te cuēchi jeé ní sáha máá ñin-ni Adán, tu quíjnánah cuiti jín jnúhun jeé jnama Yaā Dios yohó. Chi siquí máá ñin-ni cuēchi ún te ní quívicoo ñayuu chíhi jnúhun jnahnú ndetú í. Te jnúhun jeé jnama ya ñayuu, sa suhva sáha jeé súcuani-ni ndáhva yá cuēchi í, vésú yóhyo cuehé cuēchi ní casáha í.

¹⁷ Chi siquí jeé ní sáha máá ñin-ni tēe Adán cuēchi, te ní nihin poder cuehyi jéhu ñayuu. Te sa suhva siquí jeé ní jihí máá ñin-ni tēe Jesucristo, te víhyá gá ní nihin ñayuu máá yá poder jeé cótecu í caca ndaá í jín yá. Chi ní ndahva yá cuēchi í siquí jeé yóhyo váha ní yá.

¹⁸ Núu súcuani te siquí jeé ní sáha máá ñin-ni tēe Adán cuēchi, te ní quívicoo ndíhi ñayuu chíhi jnúhun jnahnú ndetú í. Te sa suhva siquí jeé ní sáha máá ñin-ni tēe Jesucristo ñin jniñu váha ndasí, te ndáhva Yaā Dios cuēchi ndíhi ñayuu te cotecu í ní cáni.

¹⁹ Chi siquí jeé tu ní jéndije máá ñin-ni tēe, te ní quívicoo cuehé ndasí ñayuu chíhi cuēchi. Te suni súcuani siquí jeé ní jéndije máá ñin-ni tēe Jesucristo, te ndáhva Yaā Dios cuēchi cuehé ndasí ñayuu.

²⁰ Te ní jéhe ya ley yá návaha cuni yó jeé cuehé cuēchi casáha yó. Te jeé ní nducuehé cuēchi yó, te víhyá gá cuehé cúu jnúhun jeé váha ní yá jeé íne cáhu ní yá nuú yó.

²¹ Núu súcuan te nájñuhun ni nihñin poder cuehyi jéñni ñayuu siquĩ jeē iyó cuéchi i, suni súcuan iyó poder jñuhun jeē váha ni yá jíin yó. Chi ndáhva yá cuéchi yó te cotecu yó ní cání siquĩ jeē ní jíhi Jitoho yó Jesucristo jehē yó.

Jeē tuáyihio yó chíji cuéchi chiyihio yó ndaha Cristo

6

¹ Núu súcuan ¿te ndese cahān yó? ¿A caca ga yó jíin cuéchi návāha vihyá gā sáha ya jeē váha yóhó jéē cóne cáñu ni yá nuū yó?

² Ma cúu cuiti. Chi nájñuhun je ni jíhi yó jeē tuá yíhi yó chíji cuéchi, te ma cúu ga caca yó jíin cuéchi núu súcuan.

³ ¿A tu cájecūhun ni rō jeē tāca yó jeē ní jendute yó siquĩ jeē ni quívi yó ndaha Cristo Jesús, suni ní jendute yó siquĩ jeē ni quívi yó chíji jñuhun jeē ni jíhi yó jíin yá?

⁴ Chi jeē ní jendute yó cúu nájñuhun ni quindūji yó jéē ní jíhi yó jíin yá. Te vijna te cuu caca yó jíin vida jeé jeē ní jéhe ya nuū yó, chí nájñuhun suni ní natecu yó jíin yá. Chi ní natecu yá ni sáha Tátá yá jíin poder jeē cujéñnu ndasí yá.

⁵ Chi núu ní cundúu yó jíin yá siquĩ jñuhun jeē ní jíhi yó jíin yá, te suni súcuan cundúu yó jíin yá siquĩ jñuhun jeē ní natecu yó jíin yá.

⁶ Chi jíni yó jeē ní naa modo maá yó jeē ní jíca yó jíin ichi yátá, chí ni quívi yó núu jñuhun jeē ní jíhi yó jíin Cristo jíca cruz. Te súcuan ni naa modo yó jeē cúu yó mozo nuū cuéchi, návāha tuá cuajñiñu yó núu tāca jñiñu jeē máni cuéchi cúu.

⁷ Chi ñayuu jeē jé ni cajihí, je ni quendacoo i chíji tāca cuéchi.

⁸ Te núu je ni jíhi yó jíin Cristo, te cándíje yó jéē suni súcuan ní natecu yó jíin yá.

⁹ Chi jíni yó jeē ní natecu Cristo, te ma cúu cuiti ga yá, chí cuehyi jéñni yóhó, tuá na vé cúu sáha jíin yá.

¹⁰ Chi jeē ní jíhi yá, te ñin jñu-ni ni jíhi yá jeē siquĩ cuéchi ñayuu. Te jeē técu yá vijna, chí sáha ya jeē cuní Yaā Dios.

¹¹ Te suni súcuan róhó jíjnánhan rō, sáha rō cuenta jeē nájñuhun ní cajihí rō jeē ní quendacoo rō chíji cuéchi. Te cátecu rō návāha sáha rō jéē cuní Yaā Dios, chí ndúu rō jíin Jitoho yó Cristo Jesús.

¹² Núu súcuan te ma cuáha ga rō jñuhun quihí rō chíji cuéchi jíin yiqui cúñu rō jeē cúu. Chí cuéchi ún stñví ní rohó jéē na sáha rō táca jéē ndíyo néé ní rō.

¹³ Te ma cuáha rō máá rō cuajñiñu rō núu cuéchi jeē cócuu rō jíin jñiñu néé. Chí sa suhva cuáha rō máá rō nuū Yaā Dios, te sáha rō cuenta jeē nájñuhun je ni cajihí rō te ni canatecu rō nuū yá. Te cuáha ndihí rō máá rō nuū yá jeē cuajñiñu rō núu jñiñu ndaā.

¹⁴ Chí tuá na poder cuéchi jeē cundeyí jíin rō, chí tuá cáyihí rō chíji ley jenahán, chí sa cáyihí rō chíji jñuhun jeē váha ni yá jíin rō.

Jñuhun mozo jeē steén ndese quéndōo ñayuu cácandíje

¹⁵ ¿Ndesse sáha yó núu súcuan? ¿A caca ga yó jíin cuéchi siquĩ jeē tuá yíhi yó chíji ley jenahán, chí sa yíhi yó chíji jñuhun jeē váha ni yá jíin yó? Ma cúu cuiti.

¹⁶ Chí cájini rō jeē núu cuáha rō máá rō jeē cuatáhú rō sájñiñu rō núu ñin tēe, núu súcuan te cácuu rō mozo nuū tēe ún, te cánuu cuandíje rō núu de. Te suni súcuan núu cuáha rō máá rō jeē sáha rō cuéchi, te mozo cuéchi cácuu rō, te cuu rō. Te núu cuatáhú rō nuū máá yá, te mozo yá cácuu rō jéē cáca ndaā rō.

¹⁷ Te na cútahú yó nuū Yaā Dios, chí vésú ni cacuu rō mozo nuū cuéchi, te vijna chí nde jíin ini jíin ánuá rō ní cajetáhú rō núu jñuhun ya jeē ní quívicoo rō núu.

¹⁸ Te vijna te je ni nduu libre rō jeē tuá cácuu rō mozo nuū cuéchi, te cájejnñu rō núu jñiñu ndaā.

¹⁹ (Ní cahān rī ñin jñuhun ndese cúu siquĩ mozo ini ñayívi yáha, chí tu cájecūhun yachí ni rō siquĩ jñuhun ya.) Núu súcuan te nájñuhun ní cajéhe rō máá rō nde saá jeē ní cajejnñu rō núu táca jñiñu jñehén jñiñu néé, suni súcuan cuáha rō máá rō vijna jeē cuajñiñu rō núu jñiñu ndaā, návāha coo ndoo coo ñi rō nuū Yaā Dios.

²⁰ Chí nde náa cácuu rō mozo nuū cuéchi, te tu ní cájejnñu rō núu jñiñu ndaā.

²¹ ¿Te na vé ni canihñn rō siquĩ cuéchi ní casáha rō un jéē cácuacan rō vijna sáha? Tú cuiti, chí máá jéē jñahnú ndetú rō ní cání sáha.

²² Te vijna te je ni canduu libre rō jeē tuá cácuu rō mozo nuū cuéchi, te cájejnñu rō núu Yaā Dios. Te suu sáha jeē quéndōo váha rō, chí cáhíyo ndoo cáhíyo ñi rō nuū yá, te nde sandihí te cotecu rō ní cání.

²³ Chí yáhu jeē nihñn ñayuu siquĩ cuéchi cúu jeē jñahnú ndetú i. Te sa tahú jeē jéhe Yaā Dios cúu jeē cótecu yó ní cání andiví, siquĩ jeē nduu yó jíin Jitoho yó Cristo Jesús.

Jñuhun ñasihí jíin yíi jeē steén ndese quéndōo ñayuu cácandíje

7

¹ Hermano, je cájini rō ndese cáhán ley yá, te cájini rō jeē yíhi ñayuu chíji ley maá-ni núu técu i ñayívi yáha.

² Te yáha cúu nájñuhun ñin ñahan jeē ní quijnánhan, chí cáhán ley jeē yíhi ña ndaha yíi ña maá-ni núu técu de. Te núu ni jíhi yíi ña, te je ni quenda ña chíji ley jeē ní quijnánhan ña jíin de.

³ Núu súcuan te núu quijnánhan ña jíin inga tēe níni técu gā yíi ña, te cásiquí ndeé ña de. Te núu je ni jíhi yíi ña, te je ni quenda ña chíji ley un. Te cuu quijnánhan ña jíin inga tēe, chí nasúu jéē casíquí ndeé ña núu súcuan.

4 Te suni súcuan róhó jínáhan ró, ñáni máni, chi ndúú ró jín Cristo. Chi nájnūhun ni cajihī rō jín Cristo, te ni quendacoo ró chíji ley jenahán. Te vijna chí nájnūhun ni quijnáhan ró jín inga, cúu jeē ní quívicoo ró ndaha Cristo, Yaā ni natecu mēhū ndíyi, návaha cuu sáha ró jniñu váha jeē cuní Yaā Dios.

5 Chi ná ni cajica yó jín modo maá yó nde saá, te ley un ní sáha jeē ní ndíyo neé ni yō táca jéē cuní yiqui cúñu yō jeē sáha yó. Te yūcuan ní sáha jeē jnahnú ndetū yō nuū.

6 Te vijna te je ni quenda yó chíji ley jenahán, chí nájnūhun je ní jihī yō jeē ma nihín gā poder siquī yō. Te súcuan te iyó libre yō jeē cuajniñu yó nuū Yaā Dios. Te jica yó jín modo jeé jéē cuní maá Espiritu, chí tuá yíhi yó chíji ley jeē ní tee Moisés jenahán.

Siquī cuēchi jeē ñūhun ini anuá yō

7 ¿Ndese cahán yō núu súcuan? ¿A ley ndíso cuēchi? Tú cuiti jeē súcuan. Te núu jeē tú ley yā, te ma cuní cuiti rī jeē iyó cuēchi rī. Chi ma cuní rī jeē cuēchi cúu jeē ndíyo ni rī ndajniñu jnáhan rī núu tu ní cahán ley jeē ma ndíyo ni yō.

8 Te súcuan ni nihín cuēchi modo cocuu jín rī. Chi siquī jeē ndácu ley jniñu jeē ma sáha yó cuēchi, te ni quejéé ndíyo ni rī sáha rī táca jéē neé. Te núu jeē tu ley, te suni tú na jñūhun stívi yó siquī ley nuū.

9 Chi ní iyo tiempo jeē técu rī jeē ná tu jecūhun ni rī jeē cahán ley. Te ná ni quejéé rī jécūhun ni rī jniñu jeē ndácu ley, te ni jecūhun ni rī jeē iyó cuēchi rī, te ni nduu rī nájnūhun ndíyi.

10 Chi ní jini rī jeē ley jeē sáha jeē cótecu anuá rī nuū, te tuú chí sa ní sáha jeē jnahnú ndetū rī nuū.

11 Chi jín jéē ndácu ley un jniñu, te ni nihín cuēchi modo cocuu jín rī, te ní stahú ruhū. Chi jín jéē ndácu ley jniñu, te cuēchi ní sáha jeē ní quenda jñūhun jeē jnahnú ndetū rī.

12 Núu súcuan te iyó ndáa maá ley, te táca jniñu ndácu chí iyó ndoo iyó ndáa váha.

13 Núu súcuan te ley jeē iyó váha ún, ¿á suu sáha jeē jnahnú ndetū rī naún? Tú cuiti. Chí sa suhva maá cuēchi cúu jeē sáha jeē jnahnú ndetū rī, te súcuan stúu cuēchi ndese iyó máa. Chí jín jniñu váha jeē ndácu ley te ní natūu jniñu neé jéē cúu cuēchi.

14 Chi jín yō jeē nuū maá Espiritu vēji ley. Te ruhū chí sa névaha rī ñn modo neé máa rī jeē ní squívi ruhū jejniñu cáha rī nuū cuēchi.

15 Chí táca jéē sáha rī, tu jécūhun ní rī najehē cúu jeē sáha rī. Chí jniñu váha jeē cuní rī sáha rī, tu ndé nihín rī fuerza sáha rī, chí sa suhva sáha rī jniñu neé jéē tu cúvaha ní rī sáha rī.

16 Te náa sáha rī jniñu neé jéē tu cuní rī sáha rī, núu súcuan te náconi rī jeē iyó ndáa ley.

17 Núu súcuan te nasūu ruhū cúu jeē sáha jniñu neé un, chí modo neé jéē ñūhun ini anuá rī cúu jeē sáha cuēchi.

18 Chí jín rī jeē modo maá rī jeē névaha rī ini anuá rī, tú cuiti na vé jeē váha iyó. Chí cuní rī sáha rī jniñu váha, te tu ndé nihín rī fuerza sáha rī.

19 Chí jniñu váha jeē cuní rī sáha rī, tu sáha rī. Te jniñu neé jéē tu cuní rī, sa yūcuan sáha rī.

20 Te náa sáha rī jniñu jeē tu cuní rī sáha rī, te nasūu ruhū cúu jeē sáha, chí modo neé jéē ñūhun ini anuá rī cúu jeē sáha.

21 Núu súcuan te ní jini rī jeē súcuan cúu jín rī. Vésu cuní rī sáha rī jniñu váha, te sa máni modo neé cúu jeē ñūhun ini anuá rī.

22 Chí cúsī ní rī jín ley Yaā Dios nde jín ini anuá rī.

23 Te ní nacuni rī jeē iyó inga modo neé máa rī jeē jési nuū jeē cuní rī sáha rī jeē váha. Te cúu rī nájnūhun preso nuū cuēchi jeē jicu jín rī.

24 Nacā jeē ndahú gá cúu rī núu súcuan. ¿Ndé ñn jnama ruhū nuū modo neé máa rī jeē jicu jín rī jeē jnahnú ndetū rī?

25 Na cutahū ndasi rī nuū Yaā Dios, chí máa yá cúu jeē jnama ruhū nuū modo neé rī siquī jeē ní jihī Jitoho rī Jesucristo jehē rī. Núu súcuan te vésu cuní yō squicu yó ley Yaā Dios, te jeē jín fuerza maá yó ma cúu, chí modo neé máa yó sáha jeē jejniñu cáha yó nuū cuēchi.

Siquī jeē jica yó jín modo cuní Espiritu Yaā Dios

8

1 Núu súcuan te ma ndénehen Yaā Dios cuēchi siquī ñayuu cáyihī ndaha Cristo. Chí tuá cájica i jín modo neé máa i, chí sa suhva cájica i nájnūhun cuní maá Espiritu yā.

2 Chí modo jeē sáha Espiritu cúu jeē técu yō siquī jeē yíhi yó ndaha Cristo Jesús. Te yūcuan ní sáha jeē ní nduu libre yō nuū jñūhun jeē ní yíhi yó chíji cuēchi jeē jnahnú ndetū yō nuū.

3 Chí ní sáha Yaā Dios jeē quéndōo váha ñayuu jeē tu ní cúu quendōo váha jín ley Moisés, siquī jeē tú na fuerza i jín modo maá i jeē squicu i ley un. Chí ní tají yá Sēhe ya ní quijí, te ní nduu ya nájnūhun ñayuu cáhīyo cuēchi, návaha socō yā maá yá siquī cuēchi, vésu tú na cuēchi ya. Te súcuan ní ndonda Yaā Dios siquī cuēchi jeē ní casáha ñayuu jín modo neé máa i.

4 Súcuan ní cuu návaha cuu squicu yó táca jniñu ndaā jeē ndácu ley, chí tuá jica yó jín modo neé máa yó, chí jica yó nájnūhun cuní maá Espiritu.

5 Chí ñayuu jeē cájica jín modo neé máa, chí máni ndáhvī ní i siquī jeē cuní maá i. Te ñayuu jeē cájica nájnūhun cuní Espiritu,

chi máni ndáhví ni i síquī jñíñu cúní maá Espírítu.

⁶ Te jeē ndihví ni yō síquī modo cuní maá yó sáha jeē jñahnú ndetū yō. Te jeē ndihví ni yō síquī jñíñu cúní maá Espírítu, sa suhva sáha jeē cotecu yō níí cáni te coo ndeyí coo síi ni yō.

⁷ Chi ñayuu jeē ndihví ni síquī modo neé cúní maá í, chí jító uhū í Yaā Díos, chí tu cúní í cuatáhu í ley Yaā Díos, te ní ma cúu squícu í.

⁸ Jeē yúcuan, ñayuu jíca jíín modo cuní maá, tu cúu sáha í jeē cúsií ní Yaā Díos jíín í.

⁹ Te máá ró jijnáhan ró, chí tuá cájica ró jíín modo cuní maá ró, chí cájica ró nájnūhun cúní Espírítu, chí ndéé Espírítu Yaā Díos ini anuá ró. Te ñayuu jeē tu ndéé Espírítu Cristo ini í, tu cáyihí í ndaha ya.

¹⁰ Te núu ndéé Cristo ini ró, te vésú ñn quiví te cuu yiquí cúñu ró jeē síquí cuéchi, te cotecu anuá ró síquí jeē ní ndahva Yaā Díos cuéchi ró.

¹¹ Te núu ini ró jijnáhan ró ndéé Espírítu maá Yaā jeē ní nastécu Cristo Jesús méhñu ndíyí, yúcuán na te máá yá suní sáha ya jeē natecu yiquí cúñu ró jeé cúu. Te sáha ya súcuan jeé jíín máá Espírítu yá jeé ndeé ini ró.

¹² Núu súcuan, hermano jijnáhan ró, ndéé jñíñu yó jéé caca ndaa yō, te nasūu jéé sáha yó modo neé cúní maá yō.

¹³ Chí núu caca ró jíín modo neé máá ró, te jñahnū ndetū ró. Te núu jíín fuerza maá Espírítu snáá ró táca jñíñu casáha ró jíín modo neé máá ró, te cotecu ró níí cáni.

¹⁴ Chí táca ñayuu jeé cándiquín modo jeé steén Espírítu Yaā Díos, máá í cácuu séhe Yaā Díos.

¹⁵ Chí Espírítu jeé ní canihín ró, tu ní sáha ya rohó jéé cuu ró nájnūhun mozo nuū yá jeé yuhú tucu ró núu yá, chí sa ní sáha ya jeé cúu yó séhe ya. Te jeé yúcuan cúu jeé cahán jee yó: Tátá maá ná.

¹⁶ Te máá Espírítu steén yá ini anuá yō jeé cúu ndije yó séhe Yaā Díos.

¹⁷ Te núu séhe ya cácuu yó, te suni nihín yō maá táhū jeé ní jéjnūhun ya, te ñn cáhnu-ni coo tahū yō jíín Cristo. Chí núu ndóho yó jíín yá vijna, suní cujéñu yó jíín yá andíví.

¹⁸ Núu súcuan te sáha ní cuenta jeé táca jnúndóho jeé ndóho yó vijna, lúli ndasí cúu nuū jnúhun jeé cujéñu luu yó jíín yá cucuéé gá.

¹⁹ Chí ndihí jeé ní jécōo, yōhoyo cándétu jeé na sáha Yaā Díos jeé nduváha, quiví quénda ndijin jeé cujéñu séhe Yaā Díos jijnáhan í.

²⁰ Chí táca jéé ní jécōo, chí ní quiví chíji jñūhun jeé tu quéndōo vāha. Te nasūu jéé ní castíví máá, chí ñayuu ní casáha cuéchi, te jeé yúcuan ní squéndōo Yaā Díos súcuan. Te máni cándétu jeé ndúvāha.

²¹ Chí ñn quiví te táca jéé ní jécōo, chí quenda chíji jñūhun jeé tíví jíín jéé tehyú.

Te ndululu ndasí nájnūhun coo táca séhe Yaā Díos, chí cácu nuū jnúhun jeé tu quéndōo vāha.

²² Chí jíín yō jeé táca jéé ní jécōo, chí nde vijna te nájnūhun inuū-ni cándoho te cájitū ní jeé na ndúvāha ndihí.

²³ Te nasūu máá-ni táca jéé ní jécōo cúu jeé ndóho, chí suni nde maá yó ndóho yó, vésú je névāha yó Espírítu jeé cúu seña jeé ñn quiví te nihín yō ndihí tahū yō. Chí yōhoyo ndóho yó jnúndóho, te ndétu yó jéé náquihin séhe ya yohó te jnama ya yiquí cúñu yō jeé tuá ndoho yó jíín.

²⁴ Chí ní jnama ya yohó síquí jeé ñūhun ni yō jeé súcuan coo. Te núu je ní sáha ya nájnūhun ñúhun ni yō, yúcuán na te tuá ñūhun ni yō jeé sáha ya súcuan jíín yó. Chí tuá ndétu yó te núu je ní cuu súcuan.

²⁵ Te núu ná tu coto yó jéé sáha ya jeé ñūhun ni yō, yúcuán na te jíín paciencia ndétu yó jéé sáha ya.

²⁶ Te suni súcuan máá Espírítu chéndéé ñáhan yá yohó jéé tú na fuerza ini yō. Chí tu jíín yō cacān tahú yō nájnūhun cánuú. Te máá Espírítu cahán ndahú yá jíín Yaā Díos jehé yō síquí táca jéé jítú ndasí ní yō te tu níhín yó jñūhun ndese cacān tahú yō.

²⁷ Te máá Yaā Díos jeé jító ndee anuá yō, chí jíín yá táca jéé cuní maá Espírítu cahán yá jehé yō. Chí ñayuu cáyihí ndaha Yaā Díos, cáhan ndahú Espírítu jehé í nájnūhun cúní Yaā Díos.

Vāha-ni cúndeyí yó síquí ndihí jeneé

²⁸ Te jíín yō jeé táca-ni jeé quíji nuū ñayuu maní jíín Yaā Díos, jeé vāha chí jéé uhú, chí quéndōo vāha ga í nuū yá, sáha ya jíín táca jéé yúcuan. Chí cácuu í ñayuu jeé ní cana ya í ní quivícoo í ndaha ya síquí jeé súcuan ní tee ní yá nde jenahán.

²⁹ Chí nde ná tu coo í te je jíín yá í, te je ní jeni ya í jeé ndoo ndaa nduu anuá í ndacu í máá Séhe ya, návāha na cúu Séhe ya ñani jéñnu nuū cuéhe ñayuu cácuu ñani cácandíje.

³⁰ Te jeé ní jeni ya í, te suni ní cana ya í. Te jeé ní cana ya í, te suni ní ndahva yá cuéchi í. Te jeé ní ndahva yá cuéchi í, te suni ní sáha ya jeé cujéñu í.

³¹ ¿Te ndese ga cahán yó síquí jnúhun jéñnu yáha núu súcuan? Chí núu íne Yaā Díos jíín yó, ¿te ndé ñn cuu cahán síquí yó? Tú ní ñn.

³² Chí máá yá tu ní jnáma ya Séhe ya jeé ma cúu yá, chí sa suhva ní jéhe ya Séhe ya ní jíhí yá jehé ndihí yó. Te núu súcuan ní jéhe ya Séhe ya, te nagá ní cuu jeé ma cuáha ya táca gá jeé jíín ñúñun yó.

³³ ¿Te ndé ñn cuu cahán cuéchi síquí ñayuu jeé ní nacáji Yaā Díos? Tú ní ñn. Chí máá yá ní ndahva yá cuéchi í.

³⁴ ¿Te ndé ñn cuu ndenehen cuéchi síquí yó núu súcuan? Tú ní ñn. Chí máá Cristo cúu jeé ní jíhí yá jehé yó, te suni ní natecu yá.

Te vijna te ndéé yá lado váha Yaā Dios nuū cujéhu ya, te cáhán ndahú yá jíin Yaā Dios jehé yō.

³⁵ ¿Te ndé iin cuu quenehen yóhó núu jnúhun cundáhú ni Cristo yohó? ¿A jnúndóho, chí táca jéé yí sáha, chí jéé cájito xeēn ñayuu yohó, chí jnámā, chí jéé cúmaní sahma, chí jnúhun yúhú, chí jéé cáhni i yóhó naún? Ni iin táca jéé yáha.

³⁶ Chí súcuan yósó núu tútu ií jeé cácahān ñayuu cácañdije jíin Yaā Dios:

Jeé siquí maá ní te ndihi-ni hora cácuni i cahni i sañá.

Te cása i jíin ná nájnúhun cása i jíin lanchi, quití cúu.

Achí tutu.

³⁷ Te tuú chi vésú cándoho yó táca jéé yáha, te váha-ni cundeyí yó siquí ndihi-ni, sáha maá Yaā jeé ní cundáhú ni yohó.

³⁸ Jeé yúcuan cúcáhu ni rí jeé tú ni iin cuu quenehen yóhó núu jnúhun cundáhú ni Yaā Dios yohó. Ni núu cuu yó, ni núu cotecu yó, ni táca ndajéhé andiví, ni táca jéé neé jéé cácujuhnu jnhi poder, ni jeé iyó vijna, ni jeé cóo,

³⁹ ni jeé iyó núu súcún, ni jeé iyó núu cúnú, ni táca gá jeé ní jecóo, ma cúu cuiti quenehen yóhó núu Yaā Dios, jeé jíin Jítoho yó Cristo Jesús ni cundáhú ni yá yohó.

Siquí ndese ni nacāji ya yucún Israel

9

¹ Te cáhán ndaā rí chí cúu rí tēe cándije Cristo, te tu stáhú rí, te jíní rí ini anuá rí jeé cahán ndaā rí sáha Espíritu Santo.

² Yóhuo cúcuíhyá ní rí, te níni jnáhuhú ni anuá rí

³ jeé siquí táca jnāhan rí ñayuu nación hebreo, chí iin-ni yucún rí jijnāhan rí. Chí jeé siquí maá i te cúu ni rí jeé núu na cúu te cujiyo rí nuū Cristo te jnahnú ndetu rí, návaha jíin yúcuan te cuu cácu ánuá maá i núu.

⁴ Chí cácuu i yucún ñayuu Israel, te nde jenahán ni sáha Yaā Dios jeé cúu i sēhe ya, te mēhñu vícō jeé ndíndéé ní condee yá jíin i sáa. Te jíin maá i ni sáha ya táca contrato, te ni jēhe ya ley yá nuū Moisés jeé cúu maá i, te ni steén yá ndese chiñúhúni ya ini templo, te nuū maá i ni jejnūhun ya cuehē jnúhun.

⁵ Te maá i cácuu yucún táca jíi yō jeé ní cacujéhu, te suni yucún maá i ni cacu Cristo jeé ní nduu ya tēe. Te maá yá cúu Yaā Dios jeé jnhi ndihi-ni, te ní cáni cahān ñayuu jeé cujéhu ya. Amén.

⁶ Te nasūu jéé tu ní queé ndaā táca jnúhun jeé ni jéjnūhun Yaā Dios nuū ñayuu Israel. Chí ni quee ndaā nahín núu vésú jecu-ni i, chí tú ndihi-ni yucún Israel cúu jeé cácañdije.

⁷ Chí nasūu ndihi yucún Abraham cácuu ndije sēhe de jeé ni jéjnūhun ya. Chí ni cahān

Yaā Dios jíin de: Nuū maá-ni sēhe ró Isaac cúu nuū coo yucún ró jeé ni jéjnūhun rí nuū ró.

⁸ Te jnúhun yáha cúní cahān jeé ni iin ñayuu tu cúu i sēhe Yaā Dios siquí jeé ní cacu i iin yucún jeé jéni ni i jeé váha ga cúu. Chí sa suhva máni yucún jeé ni jéjnūhun ya cúu ndije yucún jeé chíhi ya cuenta.

⁹ Chí yáha cúu jnúhun jeé ni jéjnūhun ya nuū Abraham: Máa tiempo jeé ní jeni rí te quiji rí, te cacu iin sēhe yí ñasihí ró Sara, achí yá.

¹⁰ Te nasūu maá yáha-ni, chí suni Rebeca ní cacu uū sēhe yí ña, te iin-ni tátá ndindúú i, jeé ní cuu jíi yó Isaac.

¹¹⁻¹³ Te nde ná tu cacu ndindúú i, te ná tu sáha i jeé váha jeé uhú, te je ní cahān yá jíin Rebeca: Sūchi ní cacu xihna gá cuajniñu i nuū sūchi sándihí, achí yá. Chí suni súcuan cáhán tutu ií: Ni jito maní rí Jacob, te Esaú chí tuú, achí Yaā Dios. Te súcuan jíní yō jeé maá Yaā Dios cuu nacāji ya ñayuu núu ndese tēe ni maá yá, te nasūu síquí jniñu jeé sáha i, chí sa suhva siquí ndese cúní maá yá nacāji ya i.

¹⁴ ¿Ndese cahān yō núu súcuan? ¿A jéé tu iyó ndaā Yaā Dios jeé sáha ya súcuan, chí naún? Tú cuiti.

¹⁵ Chí nde jenahán ní cahān yá jíin Moisés: Ndé-ni cúu jeé cuní rí cundáhú ni rí, te cundáhú ni rí. Te ndé-ni cúu jeé cuní rí sáha rí jeé váha jíin, te sáha rí jíin, achí yá.

¹⁶ Núu súcuan te nasūu síquí jeé cuní maá ñayuu, ni nasūu jéé nducu ndeyí maá i cúu, chí siquí ndese cúní maá yá cundáhú ni yá i.

¹⁷ Chí suni súcuan yósó núu tútu ií jeé ni cahān yá jíin rey ñuu Egipto: Ni jeni rí rohó jéé cúu ró rey, návaha jíin rohó te steén rí poder rí, te návaha cuitē núu síhví rí ní ñáyiví, achí yá.

¹⁸ Núu súcuan te núu ndé iin cúní yá cundáhú ni yá, te cundáhú ni yá. Te núu ndé iin cúní yá jeé cunihni ni, te sáha ya jeé cunihni ni.

¹⁹ Te sanaa te cahān iin ró jíin rí: Núu súcuan cúu ¿te najehē cahān gá yá jeé cuēchi sáha yó? Chí ma cúu casi yō nuū yá jeé ndese cúní maá yá sáha ya. Achí ró.

²⁰ Te sa suhva cahān rí jíin ró: Róhó, ¿ndé iin cúu ró jéé jéni ni ró stío cuiñí ró nuū Yaā Dios? ¿A cuu cahān quisi ñuhun jíin tēe ni sáha: Najehē ni sáha ró rúhú súcuan? achí.

²¹ Chí tēe sáha quisi, cuu sáha de ndese cúní maá de, chí iin-ni ñuhun cuu sáha de iin quisi fino te inga quisi corriente.

²² ¿Te á tu jétáhú ró jeé suni súcuan sáha Yaā Dios jíin ñayuu? Chí cúní yá steén yá ndese sáha ya juicio siquí ñayuu, te súcuan te cuní i poder yá. Te vésú súcuan te ni iyo paciencia ni yá jeé tu ní ndóna yachí yá siquí ñayuu jeé jnahnú ndetu.

²³ Te sáha ya súcuan návāha stéén yā ndese yóhō luu cújéhu ya siquī jniñu sáha ya jíin yóhó ñáyuu cúndáhú ní yā. Chi nde jenahán je ní sátúhva ya yohó jéé luu cújéhu yó jíin yá.

²⁴ Chi ní cana ya yohó jéé candíje yó, te sava yó cúu ñáyuu hebreo te sava yó cúu ñáyuu táca gá nación.

²⁵ Chi suni súcuan ní cahán yā, yósó núu tútu Oseas:

Ñáyuu jeé tu ní cúu ñáyuu maá rí, vijna te cahán rí jeé cácuu i ñáyuu maá rí.

Te ñáyuu jeé tu ní iyo maní rí jíin, vijna te cahán rí jeé cácuu i ñáyuu jeé maní rí jíin.

²⁶ Te maá lugar nuū ní cahán rí jeé násūu ñáyuu rí cácuu i,

suu yúcuan cahán ñáyuu jeé cácuu i sēhe Yaā Dios, Yaā técu ní cáni.

Achí yá.

²⁷ Te Isaías sa suhva ní cahán de jñūhun ñáyuu Israel: Vēsú ní caya yucūn Israel nájñūhun ñíí yumar, te jecu-ní i jnama ya.

²⁸ Chi Jitoho yō Yaā Dios, yachí sinu ya jniñu jeé sándaá yā cuēchi ñáyuu ñayiví. Achí tutu.

²⁹ Chi nájñūhun ní cahán tucu Isaías:

Maá Yáa cúu Jitoho nuū táca ndajéhé andiví, núu tu ní jnama ya jecu yucūn yō nuū, te je ní ndoho yó nájñūhun ñáyuu ñuu Sodoma jíin ñuu Gomorra, jeé ní naa ndihi.

Achí tutu.

Jeé tu cájetáhú ñáyuu hebreo jñūhun jnama ya i

³⁰ ¿Ndese cahán yō núu súcuan? Suu jeé ñáyuu táca gá nación, vēsú tu ní cánducú i quendōo ndaā i nuū Yaā Dios, te ní ndahva yā cuēchi i. Chi siquī jeé ní candíje i jeé ní jíihí Cristo jehē i cúu jeé ní ndahva yā cuēchi i.

³¹ Te sa suhva ñáyuu Israel, vēsú cánducú i quendōo ndaā i nuū Yaā Dios sáha ley yā, te tu cūndeyí i quendōo ndaā i.

³² ¿Te najehē? Siquī jeé tu cánducú i jeé ndahva yā cuēchi i jeé candíje i jeé ní jíihí Cristo jehē i, chí sa jéni ní i jeé squícu maá i ley te quendōo ndaā i. Te jeé stíví i súcuan cúu nájñūhun cácotúú i siquī maá yúú jeé cácachihí jehē, te suu cúu Cristo.

³³ Chi súcuan cahán nuū tútu íi:

Nde ñuu rí Sion sáha rí jeé cóne maá Yaā jeé cúu nájñūhun yuū jeé cácachihí i jehē i.

Te cúu ya nájñūhun toto jeé cotúú i sáha.

Te sa suhva ñáyuu cándíje Yaā ún, chí jnama nahín yá i.

Achí Yaā Dios.

10

¹ Hermano jijnáhan ró, cúu ndasí ní rí te jíicán tahú rí nuū Yaā Dios jehē ñáyuu nación rí Israel, jeé na jnama ya i jíjnhán i.

² Chi cahán rí jeé vāha cásáha i jeé ndihví ní i cáchiñúhún i Yaā Dios. Te vēsú súcuan te cáchiñúhún cáhá i.

³ Chi tu cájécūhun ní i ndese ndáhva Yaā Dios cuēchi ñáyuu, te ndúcú i quendōo ndaā i maá-ní jeé squícu i ley. Te tu cájetáhú i maá modo jeé ndáhva Yaā Dios cuēchi i.

⁴ Chi siquī jeé ní sáha Cristo te cuu quenda ñáyuu chíji ley Moisés. Te ndáhva Yaā Dios cuēchi táca ñáyuu jeé candíje i jeé ní sáha Cristo jehē i.

⁵ Chi súcuan ní tee Moisés jñūhun ñáyuu jeé cánducú quendōo ndaā jíin ley: Núu íin ñáyuu cuu squícu i táca jniñu ndácu ley, te cotecu i núu, áchí.

⁶ Te jñūhun jeé ndáhva Yaā Dios cuēchi ñáyuu siquī jeé candíje i jeé sáha ya jehē i, chí sa suhva cáhán: Ma cáni ní rō jeé jíni ñúhún caa ró andiví nasnúu ró Cristo jeé ndahva yā cuēchi rō.

⁷ Ní ma cáni ní rō jeé jíni ñúhún cuun ró ndé nuū cúnú ndonehen ró Cristo mēhñu ndíyí, nájñūhun jeé tu ní nátecu yā.

⁸ ¿Te ndese cahán jñūhun nuū súcuan? Yajni íyó jñūhun ya jíin ró, chí ñúhún iní yuhu ró jíin iní anuá rō, achí tutu. Te suu cúu jñūhun jeé na cándíje yó jéé jnama ya yohó. Te jñūhun yáha cúu jeé cáncani rí.

⁹ Chi núu cahán rō jeé Jitoho rō cúu Jesús, te núu candíje ró jíin iní jíin anuá rō jeé ní nátecu yā mēhñu ndíyí ní sáha Yaā Dios, yúcuán na te jnama ya rohó.

¹⁰ Chi jíin iní jíin anuá yō cándíje yó jéé ní jíihí yā jehē yō, te súcuan te ndáhva Yaā Dios cuēchi yó. Te jeé cahán yō jeé Jitoho yō cúu Jesucristo, te súcuan te jnama ya yohó.

¹¹ Chi cahán tutu íi: Táca ñáyuu jeé candíje i ya, chí jnama nahín yá i, áchí.

¹² Chi inuú-ní cúu ñáyuu hebreo jíin táca gá ñáyuu, chí maá yá cúu Jitoho nuū ndihi yó, te cuehē jeé vāha sáha ya jíin ñáyuu cácahán ndahú jíin yá.

¹³ Chi súcuan cahán jñūhun ya: Ndihi ñáyuu cácahán ndahú jíin maá Jitoho yō, chí jnama ya i, áchí.

¹⁴ ¿Te ndese cahán ndahú i jíin yá te núu tu ní cándíje i jeé jnama ya i? ¿Te ndese candíje i te núu tu ní jíini sōho i jñūhun ya? ¿Te ndese cuni sōho i te núu tú na ñáyuu nacani jñūhun nuū i?

¹⁵ ¿Te ndese nacani ñáyuu jñūhun ya te núu jeé tu táj yá i quíhín i? Chi nájñūhun cahán tutu íi: Yóhō luu jniñu cásáha ñáyuu cájica jíin jñūhun ndeyí sá ní jeé cáncani i jñūhun vāha ya, achí.

¹⁶ Te nasúú ndihi i jétáhú nuū jñūhun jnama ya i. Chí ní cahán Isaías nde jenahán: Táta Yaā Dios, ¿ndé ñáyuu ní candíje jñūhun jeé cáncani ná víi? áchí de.

¹⁷ Núu súcuan te núu cuni nahín ñáyuu te cuu candíje i. Te jñūhun cuni nahín i cúu jñūhun Cristo.

¹⁸ Te cájñuhun rí: ¿A tu ní cájini sôho i jñuhun un nú súcuan? Tuú chi ní cajini sôho i, chí cáhán tutu íi:

Níí ñáyivi ní cajini sôho ñayuu jñuhun jeé ní canacani de.

Te nde nuú jicá gá táca lado ni jinú jñuhun ún.

Achí tutu.

¹⁹ Te suni cájñuhun rí: ¿A tu ní cájecuhun ní ñayuu Israel jñuhun ún? Tuú chí ní cajecuhun ní i, te tu ní cájetáhú i. Chí xihna gá Moisés ní cachi de jeé ní cáhán Yaá Dios:

Cucuñíí ró jijnáhan ró, chí cuáha ri jñuhun ri nuú inga ñayuu jeé násúú ñin nación cúu.

Te quiti ní rō coto ró jée cuáha ri jñuhun ri nuú ñin nación jeé tu jécuhun ní.

²⁰ Te suni Isaías ní chundayí ní de ní cachi caji de jeé ní cáhán Yaá Dios:

Ñayuu jeé tu ní cánanducú rúhú, ní cajini i ruhú.

Te nuú ñayuu jeé tu ní cájajñuhún, ní steén rí nuú i ndese Yaá cúu rí.

²¹ Te siquí ñayuu Israel sa ní cahán de jeé ní cáhán yá: Ndiquiví ní cana rí i jeé quívicoo i nuú rí, te tu ní cácuni i, chí ñayuu ñihni ní, ñayuu jée ní cácuu i. Achí yá, achí Isaías.

Jeé iyó jecu na ñayuu Israel jeé jnáma ya

11

¹ Nú súcuan te cájñuhun rí: ¿A ní stóo Yaá Dios ñayuu maá yá Israel, chí naún? Tú cuiti. Chí ruhú suni tée Israel cúu ri, te yucún Abraham cúu ri, te Benjamín cúu jíi rí jenahán.

² Tu ní stóo Yaá Dios ñayuu maá yá, chí je ní nacáji ya i nde jenahán. ¿A tu cájini ró ndese cáhán tutu íi jñuhun Elías, tée ní nacani jñuhun ya jenahán? Chí náa jicán tahu de, te ní cahán de siquí ñayuu Israel:

³ Tátá Yaá Dios, ní cajehni i táca tée cánacani jñuhun ní, te ní cajenu i táca altar ní. Te mañuhún na sáña ní quendóo, te vijna suni cácuni i cahni i sáña, achí de.

⁴ Te Yaá Dios ní nastió cuñí yá: Iyó nahín úxa míl ñayuu cájandje ruhú jeé tu ní cájecuñí yití i nuú ídolo naní Baal, achí yá.

⁵ Te suni súcuan vijna, chí iyó jecu na ñayuu jeé ní nacáji ya siquí jeé váha ní yá jíin i.

⁶ Te núu ní nacáji ya i siquí jeé váha ní yá jíin i, te nasúu siquí jeé ní sáha i jñiñú váha cúu. Chí núu siquí jeé ní sáha i jñiñú váha cúu, yúcuán na te nasúu siquí jeé váha ní yá cúu.

⁷ ¿Te ndese cúu núu súcuan? Cúu jeé ñayuu Israel tu ní cúndeyí i quendóo ndáa i nájnuhun ní canducú i. Te sava i jeé ní nacáji ya, chí máá i ní ndahva yá cuéchi i. Te sava ga i ní ndunihni ní i,

⁸ nájnuhun cáhán tutu íi: Ní sáha Yaá Dios jeé tu jécuhun cuiti ní i siquí yá, ní tu jíin i jíin

tínúú i, ní tu jíin nahín i jñuhun ya, te súcuan cúu nde vijna. Achí tutu.

⁹ Te suni ní cahán David:

Vico jeé casáha i, na cóo nájnuhun ñin trampa chí ñin xeyú,

náváha nihín i castigo xeén siquí jeé castívi i casáha i cuéchi.

¹⁰ Te ánuá i na ndúnee, nájnuhun jeé tuá cúu coto i,

te na jécosthí jñundóho siquí i ní cáni.

Achí tutu.

Siquí jeé jnáma ya ñayuu táca gá nación

¹¹ Nú súcuan te cájñuhun rí: ¿A tuá cúu cuiti ndívi ñayuu Israel nuú Yaá Dios jeé súcuan ní castívi i? Tú cuiti. Chí sa suhva jeé ní cacunihni ní i, te sa ñayuu táca gá nación ní canihín tahu máá i jñuhun jeé jnáma ya i. Te yúcuan sáha tucu jeé ñayuu Israel condihví ní i jeé suni candije máá i.

¹² Chí jeé ní castívi i, te sa ñayuu ní cáhnu ñáyivi ní canihín maá i jñuhun ya. Te jeé ní cajica yátá i, suu ní sáha jeé ní canihín ñayuu táca nación jñuhun ya. Núu súcuan te quívi jeé ndívicoo tucu ndíhi ñayuu Israel ndaha ya, te ñayuu ñáyivi víhyá gá quendóo ndetú i sáha ún.

¹³ Te vijna te cáhán rí jíin róhó ñayuu táca nación jeé tu ní jíin jñuhun ya. Chí ní tají Yaá Dios ruhú jeé scáca ri jñuhun nuú rohó ñayuu táca nación. Te ndúcú rí jeé na cuájñuhún ró jijnáhan ró jñiñú sáha ri jeé nácani ri jñuhun ya.

¹⁴ Chí cúní rí jeé jíin yúcuan te nacani ní sava jnáhan ri ñayuu Israel jeé suni candije máá i, te jnama ya i.

¹⁵ Chí jeé ní stóo ya ñayuu Israel, jeé yúcuan cúu jeé sa ñayuu ñáyivi ní sáha ya jeé ndívicoo i nuú jñuhun maní yá jíin i. Núu súcuan te quívi naquihín tucu ya ñayuu Israel, quívi ún suni váha ndasí sáha ya jíin ñayuu ní cáhnu ñáyivi. Chí coo nájnuhun jeé natecu i jeé cúu i nájnuhun ndívi.

¹⁶ Te ñayuu Israel cásocó i nuú Yaá Dios pan jeé quénda xihna gá nuú ñujen, te súcuan stéén i jeé ndíhi un cúu cuenta yá. Te ñin yujnu, núu yíhi jeé cuenta yá cúu, te suu cúu nde yoho jíin ndé ndíhi ndaha. Te suni súcuan ñayuu Israel, yíhi cuenta i nuú yá, siquí jeé jíi i xihna ñuhún, ní quívicoo de ndaha ya.

¹⁷ Chí ñayuu Israel cácuu i nájnuhun ndayújnu olívo váha, te sava ndaha un ní quendé. Te róhó ñayuu táca nación jeé tu jíin jñuhun ya, cácuu ró nájnuhun ndayújnu olívo yucú, te ní nachuhun ya rohó núú ní quéndé ñayuu cácuu ndayújnu váha ún. Te nájnuhun inuú-ní cástáa ró ndúxi jíin cajin jeé véji nde yoho yújnu ún.

¹⁸ Núu súcuan te ma sáha téyí ró máá ró nuú ñayuu Israel jeé cácuu nájnuhun ndayújnu jeé ní quéndé. Ma cuteyí ró, chí

nucūhun ni rō jeē nāsūū jēē yoho stāa cajin nuū maá rō, chí sa maá rō stāa cajin jeē véji nde yoho.

¹⁹ Te sanaa te cahān rō: Tú chi sava ndaha ni quendē návāha nachuhun ya ruhū nuū ni quendē ún, achi rō.

²⁰ Ndaā, te ni quendē i siquī jeē tu ní cáandje i Cristo. Te rōhó chí máni siquī jeē cáandje rō, jeē yúcuan cúu jeē ní quívicoo rō lugar i. Te ma sándúxí rō maá rō núu súcuan, chí sa suhva conso iyo rō núu Yaā Dios.

²¹ Chí tu ní íne cáhnu ni yā nuū maá ndaha jeē chíjniñu, te suni súcuan ma cóne cáhnu ni yā nuū rō jijnáhan rō te núu stívi rō.

²² Núu súcuan te sáha váha ro cuenta ndese váha ni Yaā Dios jíin ndese xeēn ni yā. Chí ni nduxeēn ni yā jíin ñáyuu hebreo jeē ní castívi ún, te sa cúndáhú ní yā rohó. Te cánuú cuífi nihin ro jíin jñuhun jeē váha ni yā jíin rō. Chí núu tuú, te suni quende yā rohó.

²³ Te maá i, núu candje tucu i, te nucōndee tucu i, chí maá Yaā Dios cuu nachuhun tucu ya i.

²⁴ Núu súcuan te rōhó ñáyuu táca nación jeē tu ní jíin jñuhun ya, ni quendē rō xiní yújnu olivo yucú, te ni nachuhun ya rohó xíní yujnu olivo váha, vésú nasúú ndaha maá yujnu un cácuu rō. Te nagā ni cuu ñayuu hebreo jeē ma náchuhun ya i nuū ni quendē i, chí cácuu i maá ndayújnu váha ún.

Íin quiví te jnama ya ndihi ñayuu nación Israel

²⁵ Hermano, cúni rī jeē na jécūhun ni rō jijnáhan rō ndese íyó jñuhun yáha jēē ní yisāhí, návāha ma cutéyí rō caní ni rō jeē ndichí xíní maá rō: Chí sava ñayuu Israel ni ndunihni ni i, te súcuan coo maá-ni nde quiví jínu candje ñayuu táca nación jeē tu jíin jñuhun ya.

²⁶ Te saá te jnama ya ndihi ñayuu nación Israel, chí cáhán tutu íi:

Ichi ñuu rī Sión quiji Yaā jnama ñayuu, te sáha ya jeē tuá coo cuēchi nuū táca yúcūn Jacob.

²⁷ Te yáha cúu contrato jeē sándaā rī jíin i, quiví jeē quende ri cuēchi i jijnáhan i, áhí Yaā Dios.

Achí tutu.

²⁸ Chí ñayuu hebreo un ní nduu i nájnūhun enemigo Yaā Dios siquī jeē tu ní cáandje i jñuhun jnama ya i. Te jeē yúcuan te cuu cuité núu jñuhun un núu táca rōhó. Te vésú súcuan te siquī jeē ní nacāji ya táca jíi i jenahán, te cúndáhú gá ni yā i jeē ma stóo ya i ní cáni.

²⁹ Chí tu nácani yátá ni yā jeē cána ya ñayuu jíin jēē jēhe ya tahū i.

³⁰ Te rōhó jijnáhan rō, suni ni cahíyo nihni ni rō nuū Yaā Dios nde saá. Te vijna jeē ní cacunihni ni maá ñayuu hebreo, te cúndáhú ni yā rohó.

³¹ Te suni súcuan maá i, chí vésú cácanihni ni i vijna, te cundáhú tucu ni yā i, nájnūhun cúndáhú ni yā maá rō jijnáhan rō.

³² Chí Yaā Dios ni sáha ya jeē ní quendō ndivíi ñayuu chíji jñuhun cúniñhi ni i, návāha suni cuu cundáhú ni yā ndivíi i.

³³ Núu súcuan te náhán náā ni yō jeē yóhoyo cuehē jñuhun ndichí íyó jíin Yaā Dios, te ndihi cuiti jíiní yā. Te ni ma cúu cuiti castūhun yó ndese téé ni yā sáha ya táca-ni, te ma cánda cuiti yō jecūhun ni yō ndese cúu táca jēē sáha maá yā.

³⁴ Chí cáhán tutu íi: ¿Ndé íin ni jecūhun ni ndese jéni ni maá Jítoho yō? ¿Chí ndé íin ni steén nuū yā?

³⁵ ¿Ndé íin ni jēhe xihna gā nuū maá yā, návāha nachunaa yā nuū í?

³⁶ Chí nde nuū maá yā véji táca jēé íyó, te maá yā ni sáha ndihi, te jeē cúu maá yā cúu. Te na cáhán yō jeē yóhoyo luu cújéhu Yaā Dios ní cáni. Amén.

Jeē na cóo ndoo ánuá yō cuajniñu yó núu Yaā Dios

12

¹ Núu súcuan te cáhán ndahú rī jíin rō jijnáhan rō, hermano, jeē siquī jeē cúndáhú ni Yaā Dios yohó. Na sócō rō maá rō núu yā, coo ndoo coo íi rō cuajniñu rō núu yā, nájnūhun cúsi ni yā. Chí yáha cúu jeē chíñúhún rō yā nde jíin ini jíin ánuá rō.

² Te ma cáca rō jíin táca modo casáha ñayuu ñayiví yáha, chí sa na sáma rō modo caní ni rō, te ndujeé jēé níjnūni rō. Te súcuan te cuu nacāji rō ndé-ni cúu jeē váha jeē nujnahan ni Yaā Dios, jeē cúsi ni yā, jíin jēé íje ni rō jíin jñuhun ya.

³ Te siquī jeē váha ni yā ni jēhe ya jniñu nácani rī jñuhun ya, jeē yúcuan cáhán rī jíin ndihi rō jēé ma cáni ni rō jeē váha ga ñayuu cúu rō núu cūhva jeé íyó rō. Chí ná íin ná íin rō na cáni ndaā ni rō siquī maá rō, te ma scáa ga rō caní ni rō jeé váha ga ñayuu cúu rō vésú nuū cūhva jeé ni jēhe Yaā Dios fuerza ini rō cándje rō.

⁴ Chí cácuu yó nájnūhun íin yiquí cúñu jeé íyó cuehē parte, te sán sán jéniñu íin íin.

⁵ Chí vésú íyó cuehē yō, te nájnūhun íin-ni yiquí cúñu cúu yó jēé yíhi yó ndaha Cristo, chí íin-ni ni nduu yó jijnáhan yó.

⁶ Te sán sán tahū ni jēhe Yaā Dios nuū yō jeé cuajniñu yó núu yā, núu ndese ni nujnahan ni yā ni jēhe ya nuū íin íin yó. Núu súcuan te na cuajniñu váha yó jíin táhū ún. Núu ni nihin yó tahū jeé nácani yó jñuhun ya, te cánuú sáha yó ndé maá cūhva ni jēhe ya cándje yó.

⁷ Te núu ni nihin yó tahū jeé chindéé ñáhán yó jñahan yó, te na sáha yúcún yó. Te núu ni nihin yó tahū jeé steén yó, te na cóndihví ni yó steén yó.

⁸ Te ñayuu jeē stihví ni inga ñayuu, suni na sáha yúcun i. Te ñayuu jéhe nuū jnáhan, na cuáha i súcuan-ni. Te ñayuu ndíso jniñu, na ndácu váha i jniñu. Te ñayuu jito ndáhú ñayuu ndahú, na cúsí ni i sáha i.

Ndese cánú squícu ñayuu cácan dije

⁹ Te na cundáhú ndije ni rō jnáhan rō, nasū máa jéé cahán-ni rō. Te coto uhū rō jniñu néé, te condiquin rō jniñu váha.

¹⁰ Te cánú coo maní rō jín jnáhan rō nájnūhun jéé maní rō jín ñani rō. Te nducú rō jeé quéndōo yíñuhún gá jnáhan rō vesú máa rō.

¹¹ Te ma cucúxí rō jín jniñu cásáha rō. Chi jín ini jín ánuá rō condihví ni rō cuajniñu rō nú máa Jítoho yō.

¹² Te na cúsí ni rō jeé cáñuhun ni rō táca jéé váha jeé cóo. Te na cuáneyí ni rō nú ndóho rō jnúndóho. Te níni na cácan tahú rō.

¹³ Te coto ndáhú rō ñayuu cácan dije nú cúmaní nuū i. Te cuáha nú rō vehe nuū ñayuu cájica.

¹⁴ Te cacān tahú rō jehē ñayuu cájito xeēn rohó. Ma cahán ndeváha ro síquí i, chi sa cacān tahú rō jehē i.

¹⁵ Te nú cúsí ni ñayuu, te suni na cúsí ni rō jín i. Te nú cucúñhá ni ñayuu, te suni na cucúñhá ni rō jín i.

¹⁶ Na cóo inuú ni rō jín táca jnáhan rō. Te ma cundúxí rō, chi sa quijnáhan rō jín ñayuu nú ga. Ma cáni ni rō jeé ndichí xíní rō.

¹⁷ Te ma nasáha ndeváha rō jín ni ñin ñayuu, nú ni sáha ndeváha i jín rō. Na cóndihví ni rō sáha rō jniñu váha, jito jínú táca ñayuu.

¹⁸ Te na cóndihví ni rō coyūcu máni rō jín táca ñayuu, vesú ndese cándaa máa i.

¹⁹ Nání máni jijnáhan rō, ma nácuáha rō jéé ndútahū ñayuu casáha ndeváha jín rō, chi sa cuáha rō jnúhun jeé máa Yaā Dios cuáha ya castigo i. Chi cáhán tutu íi: Máa rí cuáha castigo i, máa rí nacuáha yāhu i, áchí Jítoho yō.

²⁰ Te suni cáhán tutu: Tēe jito uhū rohó, nú jí de sóco, te cuáha rō jéé cáji de. Te nú jíchi de, te cuáha rō jéé cóho de. Chi nú sáha rō súcuan, te cucanu de te nacani uhū ni de jeé ni jito uhū de rohó.

²¹ Ma cuáha rō jnúhun jeé cundeyí jniñu néé jín rō, chi sa jniñu váha na sáha rō náváha ndahvá jniñu néé.

13

¹ Táca ñayuu na cuátáhú i nuū tohó cándiso jniñu ñuu. Chi ma cóo tēe cándiso jniñu te nú tu ní sáha máa Yaā Dios. Te tēe cándiso jniñu chí Yaā Dios ni tee jniñu síquí de.

² Te ñayuu jeé tu jétáhú nú tēe cándiso jniñu, nú súcuan te cunihni ni i nuū jeé ní jeni Yaā Dios. Te ñayuu jeé cunihni ni, chi cuéchi sáha i, te nihni i castigo.

³ Chi táca tēe ndíso jniñu, nasū jéé ndíso jniñu de jeé yūhú ñayuu casáha jniñu váha, chí sa jeé yūhú ñayuu casáha jniñu néé. Te nú cúní rō jeé ma cúxeēn tēe cándiso jniñu nuū rō, na sáha rō jniñu váha nú súcuan. Yūcuán na te cuajnúhun de rōhó.

⁴ Chi jéjniñu Yaā Dios de jijnáhan de, náváha coyūcu váha rō jijnáhan rō. Te nú sáha rō jniñu néé, te sa yūhu rō, chí nasū cáha-ni cúu jeé cándiso jniñu de stóho de ñayuu. Chi jéjniñu Yaā Dios de, náváha cuáha de castigo ñayuu casáha jniñu néé.

⁵ Jeé yúcuan cánú jéé cuatáhú rō nú tēe cándiso jniñu, te nasū máni jeé ma níhin rō castigo, chí suni jeé tú na cuéchi coo ánuá rō.

⁶ Te jeé yúcuan cúu jeé suni cájēhe rō xúhun nú tēe cándiso jniñu cuu jniñu ñuu. Chi jéjniñu Yaā Dios de, te máni jniñu yúcuan cásáha de.

⁷ Te chunaa rō ndihi jeé cátaú rō nuū táca ñayuu. Cuáha rō xúhun ñuu nuū tēe stútú xúhun ñuu, te cuáha rō xúhun renta nuū tēe stútú renta. Te na cóo respeto rō nuū ñayuu cánú coo respeto rō. Te na cóo yíñuhún rō nuū ñayuu cánú coo yíñuhún rō.

⁸ Ma cótaú rō nuū ní ñin. Te íyó ñin jeé taú rō jeé ma tahndé cuiti, suu jeé ni cáhán Yaā Dios jeé cundáhú ni rō jnáhan rō. Chi ñayuu cundáhú ni jnáhan, je ni squícu i ndihi jeé ndácu ley yā.

⁹ Chi súcuan ndácu ley jniñu: Ma cosíquí ndéé rō jnáhan rō, ma cáhni rō ndíyí, ma sacuíhná rō, ma sajnúhún rō, ma ndíyo ni rō jeé néváha jnáhan rō. Te táca jnúhun yáha jín táca gá jniñu ndácu ley, ndihi-ni yáhi chíji jnúhun yáha: Cundáhú ni rō jnáhan rō nájnūhun cundáhú ni rō máa rō, áchí tutu.

¹⁰ Te nú cundáhú ni yō jnáhan yó, te tu sáha yó ni ñin jeé tu íyó váha nuū i. Nú súcuan te jeé cundáhú ni yō jnáhan yó, yúcuan cúu jeé squícu yó ní ley yā.

¹¹ Súcuan sáha rō jijnáhan rō, chí sáha rō cuenta jeé cuácuyajni quiví ndíji yā. Te ma cóo ga rō nájnūhun ñayuu quixí, jeé cúhuun ni rō. Chi vijna je ni cuyajni ga quiví jnáma ya yohó vesú quiví ní candíje yó jnúhun ya.

¹² Chi nájnūhun je yajni yáha jecuáa, te cuacundijin quiví jnáma ya yohó. Nú súcuan te na stóo yó jniñu jeé ní sáha yó nú néé, te na cúcutú yó jín táca jniñu ndaa jeé caca yó jín luz yā.

¹³ Na cáca yíñuhún yó nájnūhun cánú caca yó jín luz yā. Ma nájni rō, ma sáha rō táca vico néé, ma cáca jnéni rō, ma sáha rō jniñu néé, ma cuajnáhan rō, ma cucuésun ni rō.

¹⁴ Chi sa suhva cuiñi cutú rō jín fuerza máa Jítoho yō Jesucristo, jeé ma cuáha ga rō jnúhun sáha rō jniñu cúní modo neé máa rō.

Ma cahán neé yó coto yó jnáhan yó

14

¹ Cuatáhú ró ñayuu jeē ná tu ije jíin jnúhun ya, te ma tejnáhan ró jíin i siquí táca jnúhun jeē sín jéni ni i jíin máá ró.

² Chi iyó ñayuu jeē jéni ni i jeē cúu caji i ndinuū-ni. Te iyó ñayuu jeē ná tu ije jíin jnúhun ya, te cájeni ni i jeē tú vāha caji i cūñu, chí jeē ní casocó ñayuu nuū ídolo cúu.

³ Te rōhó tēe jeē yéji ndinuū-ni, ma cahán rō coto ró tēe jeē tu yéji ndinuū. Te rōhó tēe jeē tu yéji ndinuū, ma cahán rō coto ró tēe jeē yéji ndinuū. Chi Yaā Dios ni jetáhú yá tēe ún.

⁴ Te rōhó, ¿ndé iin cúu ró jéé cahán neé ró jito ró mozo Yaā Dios? Chi núu vāha chí neé sáha de, te máá yá cúu jeē sándaā jíin de, nasūu máá ró. Te tuú chí cuiñi vāha de, chí mozo máá Jítoho yō cúu de, te cuu sáha ya jeē ma stívi de.

⁵ Te suni iyó ñayuu jeē jéni ni jeē íi gā iin quiví vésú inga quiví. Te inga ñayuu chí jéni ni i jeē inuū-ni cúu táca quiví. Te táca i na cúndaā vāha ni máá i siquí jeē jéni ni i.

⁶ Chi tēe jeē neé íi quiví, chíñúhún de máá Jítoho yō jeē sáha de súcuan. Te tēe jeē tu neé íi quiví, suni chíñúhún de Jítoho yō jeē sáha de súcuan. Te tēe jeē yéji ndinuū-ni, chíñúhún de máá Jítoho yō jeē sáha de súcuan, chí nácuatáhú de nuū Yaā Dios. Te tēe jeē tu yéji ndinuū, suni chíñúhún de Jítoho yō jeē sáha de súcuan, te suni nácuatáhú de nuū yā.

⁷ Chi ni iin yó tu técu yō jee vāha máá-ni yó, te ni iin yó tu jihí yō jeē cuní máá yó.

⁸ Chi núu técu yó, te técu yō jee cuajníñu yó núu máá Jítoho yō. Te núu cuu yō, te suni cuu yō siquí jeē cuní máá Jítoho yō. Núu súcuan te núu jeē cótecu yō chí jéé cuu yō, te yíhi yó ndaha Jítoho yō.

⁹ Chi ni jihí Cristo te ni natecu yā, návāha cuu ya Jítoho nuū ñayuu ni jihí jíin ñayuu técu.

¹⁰ Te rōhó, ¿naun jéni neé ni rō jito ró jnáhan ró núu súcuan? ¿Te naun cújéé ni rō jito ró de? Chi táca yó cuiñi yó yuhu mesa Cristo jeē sándaā yā jniñu yó.

¹¹ Chi suhva yósó núu tútu íi: Jendaá ndije chí nuū máá rí cuiñi yítí táca ñayuu,

te ndihi i cahān jeē máá rí cúu Yaā Dios, áchí máá Jítoho yó.

¹² Núu súcuan te ná iin ná iin yó nacūaha yó cuenta nuū Yaā Dios ndese jniñu ni casáha yó.

Ma sáha yó jéé quiví jnáhan yó cuéchi

¹³ Te jeé yúcuan ma cahán neé gá yō coto yó jnáhan yó. Chi sa tee ni rō jeé ma sáha ró ni iin jniñu jeē sáha jeé stívi jnáhan ró te quiví i cuéchi.

¹⁴ Te jíní rí jeē ni iin jeē ni sáha Yaā Dios, tu stívi ánuá yó. Chi súcuan ni cucáhu vāha ni rí

siquí jeē candíje ri Jítoho yō Jesús. Te núu iin ñayuu jéni ni i jeé iyó jéé stívi ánuá i, yūcuán na te súcuan sáha un jíin máá i.

¹⁵ Te núu jnáhan rō tu cívāha ni de jeé yéji rō cūñu ni casocó ñayuu nuū ídolo, chí jéni ni de jeé stívi un ánuá rō, núu súcuan te tu cúndáhú ni rō de jeé sáha ró súcuan. Coto má snáá rō ánuá jnáhan ró siquí jeé yéji rō iin jeé jéni ni de jeé cuéchi cúu. Chi suni jehē máá de ni jihí Cristo.

¹⁶ Ma sáha ró jniñu jeé cahán i siquí, vésú jíin máá ró jeé iyó vāha.

¹⁷ Chi jeé ndácu Yaā Dios jniñu nuū yō, nasūu siquí ndese caji yó coho yó cúu, chí sa suhva siquí jeé na sáha yó jniñu ndaa, te coyūcu máni yō jíin jnáhan yó, te cusí ni yō sáha Espíritu Santo.

¹⁸ Te ñayuu jeé súcuan jéjniñu nuū Cristo, chí cusí ni Yaā Dios jíin i, te suni cájejnúhún ñayuu i.

¹⁹ Núu súcuan te na cóndihví ni yō coyūcu máni yō, návāha jíin yúcuan chindéé ñájnáhan yó ije yó jíin jnúhun ya.

²⁰ Te ma cuáha ró jnúhun jeé ndeyu yéji rō snáá jniñu ni sáha Yaā Dios jíin jnáhan ró. Chi iyó ndoo ndije ndihi jeé yéji yó, te vésú súcuan te tú vāha jeé yéji rō ndeyu jeé sáha jíin jnáhan ró jéé caji de jeé jéni ni de jeé cuéchi cúu.

²¹ Vāha ga ma caji rō cūñu, ni ma cóho ró vino, te ni iin ma sáha ró jéé stívi ánuá jnáhan ró, te quiví de cuéchi, te caca yátá de nuū jnúhun cándíje de.

²² Te núu cándíje ró jéé tú na vé sáha jeé yéji rō, te súcuan na cándíje máá-ni ró núu Yaā Dios. Te nacā ndetū tēe jeé tu sáha jíin ánuá de jeé cuéchi cúu núu caji de coho de.

²³ Te tēe yéji iin jeé jéni ni de sanaa te stívi ánuá de, núu súcuan te sáha de cuéchi, chí tu cándíje de jeé iyó vāha jeé yéji de. Chi táca jéé sáha yó, núu tu cándíje yó jéé iyó vāha, te cuéchi cúu.

Jeé na sáha yó jéé cusí ni jnáhan yó

15

¹ Te yóhó jéé ni ije yó jíin jnúhun ya, cánuú condito yó ñayuu jeé ná tu ije jíin jnúhun ya, návāha candíje vāha i. Te ma sáha yó jéé máá-ni yó cusí ni.

² Chi ná iin ná iin yó na sáha yó jéé cusí ni jnáhan yó, návāha quendōo vāha i te ije i jíin jnúhun cándíje i.

³ Chi ni Cristo, tu ní sáha ya jeé cusí ni máá yá, chí sa suhva jeé cusí ni Tatá yā. Chi suhva cáhán tutu íi: Táca jnúhun ndevāha jeé cácahān ndevāha ñayuu siquí ní, ni ndívi siquí máá ná, áchí Cristo jíin Tatá yā.

⁴ Chi táca jnúhun jeé ni jecosó nuū tútu íi nde jenahán, chí ni jecosó návāha stéén nuū yó, te nihín yō jnúhun jeé sáha jeé cuandeyí

ni yō te ndus̄ ni yō. Te súcuan te cocuhun ni yō tāca jēē vāha jeē cóo.

⁵ Te máa Yaā Dios jeē jēhe jñūhun cuandeyi ni jín jñūhun ndús̄ ni, na sāha ya jeē cóo inuú ni rō, nájñūhun cúní Cristo Jesús.

⁶ Te súcuan te ñn-ni coo ró te inuú-ni cuu cahān rō jeē yóhoyo vāha Yaā cúu Yaā Dios, Tátá Jitoho yō Jesucristo.

Jeē ni jítē jñūhun vāha ya nuū ñáyyu tācá nación

⁷ Núu súcuan te cuatáhú ró tāca jnāhan ró, nájñūhun ni jétáhú Cristo yohó, návāha cuni ñayuu jeē luu cújéhnú Yaā Dios.

⁸ Chi cāhān rī jeē ní quiji Cristo Jesús, ni sāha ya tācá jniñu jeē quéndōo vāha ñayuu hebreo, návāha cundaā tāca jñūhun jeē ní jéjñūhun Yaā Dios nuū tāca jí i. Te súcuan ni steén Cristo jeē squícu Yaā Dios tāca jēē ní jéjñūhun ya.

⁹ Te suni ni quiji ya návāha ñayuu tācá nación jeē tu jíní jñūhun ya, cahān i jeē yóhoyo vāha ni Yaā Dios jeē cundáhú ni yā i. Chi suhva cāhān tutu i:

Núu súcuan te cahān na jēē yóhoyo vāha ni ní, cuni ñayuu tācá nación,

te cata ná yaa jeē chiñhún nā nihín.

¹⁰ Te cāhān tucu tutu i:

Róhó ñayuu tācá nación, inuú na cús̄ ni rō jín ñayuu maá yá.

¹¹ Te cāhān tucu:

Róhó ñayuu tācá nación, na cāhān rō jeē yóhoyo vāha ni Jitoho yō Yaā Dios, te róhó ñayuu tācá-ni ñuu, suni na cāhān rō jeē yóhoyo cújéhnú ya.

¹² Te suni ni tee Isaiás jñūhun yáha:

Nuū yúcūn Isai quiji ñn jeē cújéhnú,

te ndacu ya jniñu nuū ñayuu tācá nación.

Te ñayuu ún chi cocuhun ni i tāca jēē sāha ya. Achí tutu.

¹³ Te máa Yaā Dios jeē sāha jeē cáñuhun ni yō tāca jēē vāha jeē coo, na sāha ya jeē cóo s̄ñ ndasí ni rō jín jēē cóo ndeyí ni rō siquí jeē cáandije nihín ró yá. Te súcuan te cocuhun teyí gá ni rō tāca jēē vāha jeē coo, sāha poder maá Espiritu Santo.

¹⁴ Nānī mánī, cúcáhnú ni rī jeē vāha ndasí cándihví ni rō jín jniñu vāha, te vāha ndasí cájécūhnú ni rō, te cúu stihví jnāhan ni rō.

¹⁵ Te ni jeni ni rī jeē tee rī carta yáha cāhān cají rī jín ró jijnāhan ró, návāha víhyá gā na cócuhun ni rō tāca jñūhun yáha. Chi súcuan sāha ri siquí jeē vāha ni Yaā Dios te ni jēhe ya jniñu nuū rī

¹⁶ jeē jejniñu ri nuū Jesucristo, jeē nácani ri jñūhun nuū ñayuu tācá nación jeē tu jíní jñūhun ya. Te nácani ri jñūhun vāha Yaā Dios nuū i jeē jnāma ya i. Súcuan sāha ri návāha ñayuu tācá nación, cuu squívi ri i ndaha ya jeē cúu i nájñūhun ñn jeē socó ri nuū yā jeē cús̄ ni yā jín. Chi ni sāha Espiritu Santo jeē iyó ndoo iyó í i nuū yá.

¹⁷ Núu súcuan te siquí jeē candije ri Cristo Jesús, te cús̄ ni rī jeē jejniñu vāha ri nuū Yaā Dios.

¹⁸ Chi ma cúu cahān rī siquí jniñu cāsáha inga tēe, chi máa-ni siquí ndese ni jejniñu Cristo ruhú jeē sāha ri jeē ñayuu tācá nación tu ní jíní jñūhun Yaā Dios, vijna jétáhú i nuū yā. Chi súcuan ni cuu jín jñūhun ni cahān rī jín jniñu ni sāha ri.

¹⁹ Chi ni sāha ri jniñu jéhnú ndíso poder jeē steén jeē cújéhnú ya, te ni íyo poder Espiritu Santo jín rī. Te súcuan ni nacani ndihí ri jñūhun ndese jnāma Cristo ñayuu. Te ni nacani ri nde ñuu Jerusalén, jín ndihí tācá ñuu, jín nde ní región Ilírico.

²⁰ Súcuan cúu jeē ní condihví ni rī ni nacani ri jñūhun jeē jnāma ya ñayuu. Te ni jehēn rī nuū ñayuu jeē ná tu cuni jñūhun Cristo, chi tu ní cúní rī nacani ri nuū ñayuu jeē jé ni jini i ni canacani inga tēe.

²¹ Chi sa suhva ni sāha ri nájñūhun cāhān tutu i:

Tāca ñayuu jeē tu ní quiji jñūhun ya nuū i, vijna chi cuni i jñūhun ya,

te tāca ñayuu jeē tu ní jíní cuiti jñūhun ya, vijna chi jecūhnú ni i.

Achí tutu.

Jeē ñūhun ni Pablo jeē quihín de Roma

²² Te jeē yúcuan cúu jeē cuehē jínu ni cujnéñu rī, te tu ní cúu jecondēhe rī rohó jijnāhan ró.

²³ Te vijna chi ni ndihí jniñu ri ní cāhnú tācá región ndañúu yáha. Te je ni cuu cuehē cuiyá jeē cuni rī jeē rī nuū rō.

²⁴ Núu súcuan te ñūhun ni rī jecondēhe rī rohó jijnāhan ró núu na yáha ri quihín rī España. Te ñūhun ni rī jeē núu je ni cus̄ ni rī jeē ní jito jnāhan yó, yúcuan na te chindéé ñāhán ró ruhú jeē quihín gā rī.

²⁵ Te xīhna gā na quihín rī ñuu Jerusalén quindēca ri xūhún cuu hermano cáyucu yúcuan.

²⁶ Chi ñayuu Macedonia jín Acaya ni caji ni i jeē cáquin i xūhun quihín nuū hermano cándoho ndáhú ñuu Jerusalén.

²⁷ Chi súcuan ni cacus̄ ni i ni casáha i. Te íyó vāha jeē súcuan, chi máa i jeē cácuu i ñayuu tācá gá nación, táu i jeē sāha vāha i nuū ñayuu hebreo un. Chi ñayuu hebreo ni casáha jeē ní quiji jñūhun Yaā Dios nuū i jeē quéndōo vāha ánuá i sāha. Jeē yúcuan cánuu jēē chindéé ñāhán i ñayuu hebreo cáandije jín ndajniñu ñayívi yáha.

²⁸ Núu súcuan te jeē jínu jniñu yáha jēē quindēca ri xūhun yáha nuū i, yúcuan na te jecondēhe rī rohó jijnāhan ró jēē yáha ri quihín rī España.

²⁹ Te jíní vāha ri jeē quívi jinú rī nuū rō, te vāha ndasí quéndōo ró jēē nacani ga rī jñūhun vāha Cristo nuū rō.

³⁰ Hermano jijnáhan ró, cáhán ndahú rí jín ró jeé chindéé ñáhan ró ruhú cacán tahu ró jehé rí nuū Yaá Dios siquí jniñu ndúcú ndeyí rí. Súcuan sáha ró siquí jeé candíje yó Jítoho yó Jesucristo, jín siquí jeé cundáhú ni yó jnánhan yó sáha máá Espíritu.

³¹ Te cacán tahu ró jeé na cácu rí nuū tée región Judea jeé tu cácan díje, jín jéé na cúsi ni táca hermano ñuu Jerusalén jeé quíndēca rí xūhun yáha cuu de.

³² Te súcuan te núu cúní Yaá Dios te jecondēhe rí rohó jijnáhan ró, te cusí ni yó, te nanihín ni rí jeé condee rí jín ró.

³³ Te máá Yaá Dios jeé jéhe jnūhun ndeyí sñ ni, na cóo ya jín ró jijnáhan ró. Amén.

Jeé cáhán Pablo jeé sándeýí ni i

16

¹ Te vijna te cáhán rí jín ró jijnáhan ró jéé na chindéé ñáhan ró hermana Febe, chí cúu ña ñahan jéjniñu jeé siquí jnūhun ya nuū ñayuu cácan díje ñuu Cencrea.

² Te cuatáhú ró ña nájnūhun cúní maá Jítoho yó, chí súcuan cánuu sáha hermano cácan díje. Te chindéé ñáhan ró ña na-ni vé cúu jeé jini ñúhún ña, chí súcuan ni chindéé ñáhan máá ña cuehé ñayuu, te suni nde ruhú.

³ Cahán ró jín Priscila jín Aquila jeé sándeýí ni ndindúu de, áchí rí, chí cáchindéé ñájnáhan de jín rí siquí jniñu Cristo Jesús.

⁴ Chí ná ni iyo jnūndóho jeé cuu rí nuū, te ni cachundeyí ni de ni canducú de scácu de ruhú, vésú suni cuu maá de núu. Te nácuatáhú rí nuū ndindúu de, te nasūu máá-ni ruhú, chí suni táca grupo ñayuu cácan díje táca nación.

⁵ Te suni cahán ró jín ñayuu cácan díje ndútútú vehe de, sándeýí ni i, áchí rí. Te cahán ró jeé sándeýí ni Epeneto, téé maní rí jín. Chí ñuu Acaya, máá de cúu jeé ní candíje xihna gā nuū Cristo.

⁶ Suni cahán ró jeé sándeýí ni María, ñahan jeé ní jejniñu ndasí jeé siquí jnūhun ya meñhu ró jijnáhan ró.

⁷ Te cahán ró jeé sándeýí ni Andrónico jín Junias, téé cácu jnánhan ñuu rí jeé ní cahíin jín rí vecāa. Te táca apóstol chí cájejnūhún de ndindúu téé jíná, te xihna gā de ni cacandíje Cristo vésú maá rí.

⁸ Cahán ró jeé sándeýí ni Amplias, téé maní rí jín, chí cándíje de Jítoho yó.

⁹ Te cahán ró jeé sándeýí ni Urbano, téé chindéé ñájnáhan jín yó siquí jniñu Cristo Jesús, te suni súcuan Estaquis, téé jeé maní rí jín.

¹⁰ Suni cahán ró jeé sándeýí ni Apeles, téé jeé ní stéén jeé candíje váha de Cristo, te suni súcuan cahán ró jín ñayuu vehe Aristóbulo.

¹¹ Cahán ró jeé sándeýí ni Herodión, téé cúu jnánhan ñuu rí. Te suni súcuan ñayuu vehe Narciso jeé cácan díje máá Jítoho yó.

¹² Te suni cahán ró jeé sándeýí ni Trifena jín Trifosa, ñahan cásjniñu siquí jnūhun máá Jítoho yó. Te suni sándeýí ni Pérsida, hermana jeé maní yó jín, chí suni ní sájniñu ndasí ña siquí jnūhun Jítoho yó.

¹³ Te cahán ró jeé sándeýí ni Rufo, téé cájejnūhún ñayuu jeé váha cándíje de máá Jítoho yó. Te suni súcuan cahán ró jín náná de, te máá ña suni ní jito ña ruhú nájnūhun jeé naná rí cúu ña.

¹⁴ Te cahán ró jeé sándeýí ni Asíncrito jín Flegonte jín Hermas jín Patrobas jín Hermes jín táca hermano jeé cáyūcu jín de.

¹⁵ Te suni súcuan Filólogo jín Julia jín Nereo jín cuáha de, jín Olimpas jín ndihí hermano cácan díje cáyūcu jín de jijnáhan de.

¹⁶ Te jeé cáhán táca ró jín jnánhan ró, te yíñúhún techūhu ró ndaha i. Te táca grupo ñayuu cácan díje nuū Cristo, cáhán i jeé na sándeýí ni ró.

¹⁷ Te cáhán ndahú rí jín ró, hermano jijnáhan ró, jéé cóto ró máá ró nuū ñayuu cútucu ni te ndúcú stívi jnánhan jín jnūhun tu quíjnáhan jín jéé ní cacutūhva ró. Te cujiyo ró núu i jijnáhan i.

¹⁸ Chí ñayuu súcuan, tu jéjniñu i nuū Jítoho yó Jesucristo, chí máni ndáhví ni i siquí jeé cáji i. Te yóhoyo ndúxí i jín jnūhun cácahán i, te súcuan stáhú i ñayuu jeé tu jini váha.

¹⁹ Te máá ró jijnáhan ró, chí je cájini ndihí ñayuu ndese váha cájetáhú ró nuū yá, te jeé yúcuan cúsi ni rí. Te cúní rí jeé cóo listo váha ró sáha ró jniñu váha, te ma sáha ró jniñu néé.

²⁰ Te máá Yaá Dios jeé jéhe jnūhun ndeyí sñ ni, yachí sáha ya jeé sándeýí ró siquí jexeeén jeé cúu Satanás. Te ñūhun ni rí jeé Jítoho yó Jesucristo na sáha ya jeé váha rohó jijnáhan ró.

²¹ Sándeýí ni ró jijnáhan ró, áchí Timoteo, téé chindéé ñáhan jín rí siquí jnūhun ya. Te suni súcuan cácahán jnánhan ñuu rí Lucio jín Jasón jín Sosípater.

²² Te ruhú jeé naní Tercio, jeé téé rí carta yáha jéé cáhán Pablo, suni cáhán rí jeé sándeýí ni ró jeé cácan díje ró Jítoho yó.

²³ Te Gayo, téé ni jéhe núu vehe ndéé rúhú Pablo, cáhán de jeé sándeýí ni ró jijnáhan ró. Te suni jéhe núu de vehe nuū táca ñayuu cácan díje. Te suni súcuan cáhán Erasto, téé cúu tesoroero ñuu yáha, te suni súcuan cáhán hermano Cuarto.

²⁴ Te ñūhun ni rí jeé máá Jítoho yó Jesucristo, na sáha ya jeé váha rohó jijnáhan ró. Amén.

Jnūhun sándihí jéé cáhán jeé yóhoyo cújéhnu ya

²⁵ Te vijna na cáhán yó jeé yóhoyo cújéhnu Yaá Dios. Chí máá yá cuu sáha jeé cuiñi ñihin ga ró jijnáhan ró jín jnūhun jnáma ya rohó jeé nácani rí, jín jnūhun Jesucristo jeé steén

rī. Chi súcuan ni steén Yaā Dios jnūhun sāhi yá, jeē ní yisāhi níí cáni nde ná tu jecōo ñayāví.

²⁶ Te vijna te je ni nane cájí. Chi jíin tútu íi jeē ní catee tēe ni canacani jnūhun ya, ni jītē núu jnūhun sāhi yáha nuū ñáyuu tēcá nación, návaha candíje i te cuatáhú i. Chi Yaā Dios jeē técu níí cáni, súcuan ni ndacu ya jniñu.

²⁷ Te níí cáni na cáhán yō jeē yóhyo cújéhnú Yaā Dios siquī jniñu ní sáha ya jeē jíin Jesucristo. Chi máá ñn-ni ya iyó te yóhyo ndíchí yá. Súcuan na cóo. Amén.

CARTA HN JEE NI TEE SAN PABLO APOSTOL NUU ÑAYUU NUU CORINTO

¹ Máá rí cúu Pablo, te ni cana Yaā Dios ruhū cúu ri apóstol Jesucristo. Chi súcuan ni nujnahan ni yā ni tají yá ruhū nacani ri jñūhun ya. Te ndándúú rí jín hermano yō Sóstenes

² cátee ri carta yáha cuájeē nuū rohó ñáyyu ñuu Corinto jeē cácanđije ró Yaā Dios. Chi cácuu ró ñayuu maá yá, chi cáyihí ró ndaha Cristo Jesús. Chi ni cana Yaā Dios rohó jijnáhan ró jeē coo ndoo coo íi ró nuū yā. Te ni cana ya rohó ndé jín táca gá ñayuu jeē ndácunehen i máá Jítoho yō Jesucristo, ndé-ni cúu nuū cáhíyo í. Chi Jítoho táca yó jín i cúu ya.

³ Te cáñuhun ni rí jeē Tatá yō Yaā Dios jín Jítoho yō Jesucristo na sáha ga yā jeē váha rohó, te sáha ya jeē coo ndeyí coo síi ni ró.

Cristo sáha ya táca jeē váha yóhó

⁴ Te níni nácuatáhu rí nuū Yaā Dios jeē síquí rohó jijnáhan ró, chi jeē jín Cristo Jesús ni sáha ya jeē váha rohó.

⁵ Chi cáyihí ró ndaha Cristo, te jeē yúcuan ní sáha Yaā Dios jeē cáhíyo cúcá ró jín táca jñūhun ya, chi cájecūhun váha ni ró te cúu nácani ró.

⁶ Chi súcuan cúu jeē cáhín nihin ró jín jñūhun Cristo jeē ní canacani ri nuū ró.

⁷ Te súcuan te tu cúmani ni ñin tahú jeē jéhe ya cuu ánuá ró níni jéé cándetu ró quívi jeē quenda ndjín Jítoho yō Jesucristo.

⁸ Te máá yá chi sáha ya jeē cuiñi nihin ró nde na jínu quívi, náváha ma cóo cuéchi síquí ró quívi ndjji Jítoho yō Jesucristo.

⁹ Te squícu Yaā Dios táca jéé ni jéjñūhun ya, te ni cana ya rohó jijnáhan ró náváha cuni jnáhan ró jín Séhe ya, Yaā cúu Jítoho yō Jesucristo.

Síquí jeē ma cóo sán ni i jín jnáhan i

¹⁰ Hermano, nde jín síhví Jítoho yō Jesucristo cahán ndahú rí jín ró jeē inuú-ni na ndájñūhun ró jijnáhan ró, te ma cóo sán ni ró. Chi váha inuú na cóo ni ró jín táca jéé cájeni ni ró.

¹¹ Súcuan cáhán rí, ñání mání, chi ni cacastūhun ñayuu vehe Cloé nuū rí jeē cátejñáhan ró.

¹² Chi táca ñin ñin ró sán sán cácahán ró: Ruhū chi jín Pablo índichi rí, cácahán sava ró. Te sava ga ró: Ruhū chi jín Apolos. Ruhū chi jín Pedro. Ruhū chi jín Cristo. Cácahán ró.

¹³ Te jeē cácahán ró súcuan ¿te á cájeni ni ró jeē sán sán Cristo iyó jéé cácanani ri jñūhun? ¿Te á ruhū Pablo ni jihí jicá cruz jehé ró? ¿Chí jín síhví ruhū ni cajendute ró, chí naún?

¹⁴ Tú cuítí. Te na cútahú rí nuū Yaā Dios jeē tú cuéhé ró ni scuándute rí, chí máá Crispo jín Gayo-ni,

¹⁵ náváha ma cahán ni ñin ró jéé jín síhví rí ni jendute ró.

¹⁶ Te sá núcūhun ni rí jeē suni ni scuándute rí Estéfanos jín ñayuu vehe de. Te sanaa te súcuan-ni cúu ñayuu ni scuándute rí, jéni ni rí.

¹⁷ Chi tu ní téjníñu Cristo ruhū jeē scuándute rí, chí sa suhva jeē nácani ri jñūhun jeē jnáma ya ñayuu. Te tu ní ndúcú rí jeē steén rí nuū ró ñin modo ndichí jéé ma jécūhun ni ró, chí núu súcuan te ma cúu jecūhun váha ni ró jñūhun jeē ni jihí Cristo jicá cruz.

Jín Cristo ni steén Yaā Dios poder yā jín jñūhun ndichí yá

¹⁸ Te jñūhun jeē ni jihí yá jicá cruz jeē jnáma ya ñayuu, chí jñūhun cánéé íi cúu nuū ñayuu cuangoo nuū jnahú ndetú. Te máá yó jeē cuahán yō nuū cácu yó, chí jíni yō jeē jñūhun Yaā Dios jeē ndiso poder cúu.

¹⁹ Chi suhva yósó núu tútu íi jeē ni cáhán Yaā Dios:

Na snáa rí jñūhun ndichí cácahán ñayuu ndichí cuenta ñayívi yáha,

te ma cuatáhu rí jñūhun cácahán ñayuu jeé jéni ni jeé jíni váha.

Achí yá.

²⁰ Núu súcuan ¿te ndé cuajníñu tēe ndichí cuenta ñayívi yáha, jín téé cástéén tutu, jín téé cánanducú yúcun síquí jeé steén ñayuu ñayívi yáha? Chi táca jñūhun ndichí cuenta ñayívi yáha, ni cáhán Yaā Dios jeé jñūhun cánéé íi cúu.

²¹ Te yóhoyo ndichí sáha Yaā Dios. Chi táca jñūhun ndichí cájeni ñayuu ñayívi, ni cachí ya jeé tu jéjníñu jeé cúni i ndese Yaā cúu ya. Yúcuan na te ni nujnahan ni yā jeé jín jñūhun ya jeé cácanani ri te jnama ya ñayuu cácanđije, vesú cájeni ni ñayuu ñayívi jéé jñūhun cánéé íi cúu.

²² Chi ñayuu hebreo, máni cácani i jeé sáha Yaā Dios cuéhé jniñu jéhu jeé steén poder yá. Te ñayuu griego chí máni síquí jñūhun ndichí cándihví ni í.

²³ Te máá rí chí sa suhva cácanani ri jñūhun jeé ni jihí Cristo jicá cruz jeé jnáma ya ñayuu. Te jñūhun yáha sáha jeé jnáníni ni ñayuu hebreo, te ñayuu táca gá nación chí cájeni ni i jeé jñūhun cánéé íi cúu.

²⁴ Te ñayuu jeé ní cana ya ni quívicoo ndaha ya, vesú ñayuu hebreo chí ñayuu griego, chí jíni i jeé jín Cristo ni steén Yaā Dios poder yā jín jñūhun ndichí yá.

²⁵ Chi jñūhun Yaā Dios jeé cácahán ñayuu jeé jñūhun cánéé íi cúu, yóhoyo ndichí gá vesú jñūhun ndichí ñayuu. Te cájeni ni ñayuu jeé tú na poder yā ná ni jihí Jesús jeé jnáma ya yóhó, te tuú chí nihin téyí gá poder yā ún vesú poder ñayuu.

²⁶ Hermano, máá ró cácuu jeé ní cana ya ni quívicoo ró ndaha ya. Te condêhe ró jeé tú cuehê rô ndichí jíin jnúhun ñayíví, ní tú cuehê rô cándacu jniñu, ní tú cuehê rô cácuu sêhe ñayuu cujêhnu.

²⁷ Chi sa suhva ni nacáji Yaā Dios tāca jéé cácahān ñayuu ñayíví jéé tu ndíchí cuiti, návāha coo jnúhun canu nuū tāca jéé ndichí. Te ni nacáji ya ñayuu tu téyí ini ñayíví, návāha coo jnúhun canu nuū ñayuu teyí.

²⁸ Te suni ni nacáji Yaā Dios tāca jéé tu cujêhnu ini ñayíví, jíin tāca jéé sajéé ní i nuū, nde jíin tāca jéé tú jniñu cájeni ní i, návāha snúu ya tāca jéé cujêhnu ini ñayíví.

²⁹ Súcuan ní sáha ya návāha ní ñin ñayuu ma cúu sátéyí i máá i nuū yā.

³⁰ Te máá ró jijnáhan ró chi ní sáha Yaā Dios jeé nduú ró jíin Cristo Jesús. Chi nde nuū máá yá ní canihīn yō jnúhun ndíchí, te ní ndahva yā cuēchi yō, te ní sáha ya jeé iyó ndoo íyó í yō nuū yā, chi ní jnama ya yohó.

³¹ Te jeé yúcuan na cóo nájñuhun cáhan tutu íi: Núu ñin ñayuu cuní i cutéyí i, te na cutéyí i síqui jeé ní sáha máá Jítoho yō jehé i, áchí.

Jeé nácani Pablo jnúhun jeé ní jíhi Cristo

2

¹ Te ruhū, hermano, ná ní jeé rī nuū ró jijnáhan ró jéé nácani ndaa rī jnúhun Yaā Dios, te tu ní nácani rī jnúhun ndíchí jéé ma jécūhun ní rō.

² Chi ná ní iyo rī jíin ró te tú na inga jnúhun ní ndúcú rī castūhun rī nuū ró, chí máni máá jnúhun Jesucristo jeé ní jíhi yā jicā cruz jeé jnāma ya yohó.

³ Te ná ní jinū rī nuū ró jijnáhan ró, chí tú na fuerza rī, te yúhū rī, te quísi i ruhū.

⁴ Te ná ní nacani rī jnúhun nuū ró, chí nasūu jíin jnúhun ndíchí ñayuu ñayíví ní scándije rī rohó, chí sa suhva jíin máá poder Espíritu yā ní steén rī nuū ró jijnáhan ró,

⁵ návāha ma cuiñi ró síqui jnúhun ndíchí cácahān ñayuu, chí cuiñi ró síqui poder Yaā Dios.

Jíin Espíritu te steén Yaā Dios ndese Yaā cúu ya

⁶ Te ndaa chí ndíchí cácahān rī jíin ñayuu jeé jeé ní ije jíin jnúhun cándije i ya. Te nasūu jnúhun ndíchí jéé iyó ini ñayíví yáha, ní nasūu jnúhun ndíchí cácahān tēe cácujeñu ñayíví yáha, chí tēe ún yáha-ni jeé cácujeñu de.

⁷ Chi jnúhun cácahān rī cúu jnúhun ndíchí máá Yaā Dios jeé ní yisáhí. Chí jnúhun ndíchí un jéé ní yisáhí, ní jequin Yaā Dios nde ná tu jecóo ñayíví, návāha cácu yó jéé cótecu yō níf cáni sáha jnúhun ún.

⁸ Chí ní ñin tēe cujêhnu nuū ñayíví yáha, tu ní jécūhun ní de jnúhun ndíchí un. Chí núu ní jécūhun ní de núu, te ma cáhni cuiti de máá Jítoho yō, Yaā cujêhnu luu.

⁹ Chí cúu nájñuhun cáhan tutu:

Tāca jéé ní sátūhva Yaā Dios jeé cúu ñayuu jeé maní jíin yá, ní ñin ún tu ní jíto jíinú ñayuu, ní tu ní jíni sóho i,

ní tu ní quíji jeé súcuan cani ní i. Achí tutu.

¹⁰ Te máá yó jijnáhan yó chí ní steén Yaā Dios tāca un núu yō jeé jíin Espíritu yā. Chí máá Espíritu jíni vāha ya te steén yā ndihi, chí nde ndihi jeé ndichí gá máá Yaā Dios.

¹¹ Chí ní ñin ñayuu ma cúu cuní i ndese jéni ní inga ñayuu, chí máá-ni i jíin ánuá i cúu jeé jíni. Te suni súcuan ní ñin ñayuu tu jíni i ndese jéni ní Yaā Dios, chí máá-ni Espíritu Yaā Dios cúu jeé jíni.

¹² Te máá yó chí ní nihīn yō Espíritu un jéé véji nuū Yaā Dios, te tu cájeni ní yō nájñuhun cájeni ní ñayuu ñayíví. Te jeé yúcuan cúu jeé cájecūhun ní yō ndese ní sáha Yaā Dios jeé vāha yóhó síqui jeé vāha ní yā.

¹³ Te suu síqui tāca jéé yáha cúu jeé cácahān rī, te nasūu jíin jnúhun jeé castéén ñayuu ndíchí, chí jíin jnúhun jeé steén máá Espíritu. Chí cástéén rī jnúhun Espíritu nuū ñayuu cánevāha Espíritu.

¹⁴ Te ñayuu ñayíví tu cájetahú i tāca jnúhun jeé véji nuū Espíritu Yaā Dios, chí cájeni ní i jeé jnúhun cáneé íi cúu. Te ma cúu jecūhun ní i, chí tu cánevāha i máá Espíritu jeé sáha jeé jécūhun ní i.

¹⁵ Te ñayuu cánevāha Espíritu, chí cájecūhun ní i ndese íyó ndihí-ni. Te ñayuu ñayíví ma cúu jecūhun ní i ndese ñayuu cácuu ñayuu ún.

¹⁶ Chí suhva cáhan tutu íi: ¿Ndé ñin cuu cuní ndese jéni ní máá Jítoho yō? ¿Te ndé ñin cuu steén nuū yā? Ní ñin ma cúu. Achí tutu. Te vesú súcuan te máá yó chí cájeni ní yō nájñuhun jéni ní Cristo.

Jeé cáchindéé nájñahan de cájegniñu de nuū Yaā Dios

3

¹ Te ruhū, hermano, tu ní cúu cahān rī jíin ró jijnáhan ró nájñuhun cáhan rī jíin ñayuu jica jíin Espíritu. Chí ní cahān rī jíin ró nájñuhun jíin ñayuu cájica jíin modo máá, chí cácuu ró nájñuhun sūchi lúli jéé ná tu ije ró jíin jnúhun Cristo.

² Ní steén rī nuū ró jeé tú yíi, chí cácuu ró nájñuhun sūchi lúli jéé jéxin gā. Te tu ní cáhān rī jíin ró jnúhun yíi jeé cúu nájñuhun jeé ndáva jeé véji ñayuu ní ije, chí ná tu canda ró jíin ndé saá. Te ní vijna ná tu canda ró jíin.

³ Chí cájica ga ró jíin modo neé máá ró. Chí cácuuésún ní ró, te cácajnāhan ró, te cácusín ní ró. Núu súcuan te cácuu ró nájñuhun ñayuu ñayíví jéé cájica jíin modo neé máá.

⁴ Chí ñin ró cáhān: Ruhū chí jíin Pablo índichi rī. Te inga ró cahān: Ruhū chí jíin Apolos. Te súcuan cúu jeé cájica ró jíin modo neé máá ró

⁵ ¿Te ndé ñn cúu ruhū, te ndé ñn cúu Apolos núu súcuan? Chí máá mozo-ni Yaā Dios cácuu ri, te ni jejniñū ya ruhū návāha candíje ró máá Jítoho yō. Chí ná ñn ná ñn ri ní sáha jniñū ndese ni jēhe máá Jítoho yō nuū rī.

⁶ Ruhū, nájñūhun ní taji ri jñūhun ya ini anuá rō, te Apolos, nájñūhun ní chuhun de ndute cúu jeē ní steén gā de nuū rō. Te máá Yaā Dios cúu jeē ní scuéhnu jñūhun ini anuá rō.

⁷ Núu súcuan te tú na vé cúu sáha tēe táji ni tēe chūhun ndute, chí sa suhva máá Yaā Dios cúu jeē scuéhnu.

⁸ Te tēe táji jíin tēe chūhun ndute, ñn-ni cácuu de. Te táca de chí cuāha ya yāhu nuū de ndese jniñū ní casáha ñn ñn de.

⁹ Chí ruhū jijnáhan ri chí tēe chindéé ñájñáhan cájejniñū nuū Yaā Dios cácuu ri. Te máá ró jijnáhan ró cácuu nájñūhun itu Yaā Dios jeē jicu ya jíin.

Te suni nájñūhun ñn vehe jeē sáha Yaā Dios cácuu ró.

¹⁰ Te ruhū chí cúu ri nájñūhun ñn maestro albañil jeē ní jequin rī cimientto vehe ún, cúu jeē ní scándíje ri rohó. Te inga de cásama de siquī, cúu jeē castéén gā de nuū rō. Núu súcuan te ná ñn ná ñn de na cóo cuidado de ndese sáma de siquī.

¹¹ Te Jesucristo cúu cimientto vehe ún, te ni ñn ma cúu caquin inga cimientto, chí máá yá cúu jeē ní ndahva cuēchi rō.

¹² Te táca ñáyuu cácadíje, chí sáha i vehe siquī cimientto un, núu jíin ndajniñū vāha nájñūhun oro chí plata chí yūú luu, chí jíin jēe yachí naa, nájñūhun yujnu chí ite chí ndayóho.

¹³ Te natūu jniñū un jēe ní sáha ñn ñn i, te suu cúu ndese ní condihví ní i siquī máá yá. Chí máá quiví juicio jeē sándaā yā jniñū ñáyuu, quiví ún natūu cáji jniñū i. Chí jíin ñūhūn quiji quiví ún, te nájñūhun sáha ñūhūn jeē jéhmū táca jēe cúu cayū, súcuan coto ndee ya jniñū ñn ñn i.

¹⁴ Te núu tú cayū jniñū ní sáha i siquī cimientto un, te nihín i tahū i.

¹⁵ Te núu tu ní condihví ní i jíin jniñū ya, te ma nihín i tahū i, chí nájñūhun cayū jniñū i. Te máá i chí cácu ánuá i, vesú nájñūhun je yajni cayū i nuū yáñūhūn.

¹⁶ ¿A tu cájini ró jeē cácuu ró nájñūhun templo Yaā Dios, chí ndéé Espíritu Yaā Dios ini anuá rō?

¹⁷ Te núu ñn tēe stívī de templo Yaā Dios, te snáhnū ndetū yā tēe ún. Chí ndoo ndasí cúu templo yā, te suu cácuu máá rō.

¹⁸ Ní ñn ró ma stahū ró máá ró jíin jēe jéni ní rō. Núu ñn ñáyuu jéni ní i jeē ndichí i jíin jñūhun ñayiví yáha, vāha ga na siāā i ún, návāha coo ndichí ndije i jíin jñūhun máá yá.

¹⁹ Chí jñūhun ndichí jēe iyó ini ñayiví yáha, jñūhun cánéé íi cúu nuū Yaā Dios. Chí cáhan nuū tútu íi: ñáyuu ndichí cuenta ñayiví, chí

nájñū ya i siquī jñūhun ndichí i jeē jési i jñūhun ya, achí.

²⁰ Te cáhan tucu tutu: Máá Jítoho yō jini yā táca jēe jéni ní ñáyuu ndichí, chí máni jeē jéni cáha ní i, achí.

²¹ Núu súcuan te ni ñn ró má cutéyí ró jeē siquī ní ñn tēe ndichí. Chí cuenta máá ró cúu ndihí-ni.

²² Cúu Pablo, cúu Apolos, cúu Pedro jeē castéén nuū rō. Cúu ndihí jeē iyó ini ñayiví, jeē iyó vijna jíin jēe quíji. Te vesú núu cotecu ró chí cuu rō, te ndihí-ni chí cuenta máá ró cúu.

²³ Te máá ró cácuu cuenta Cristo, te Cristo cúu cuenta Yaā Dios.

Jeē casájniñū apóstol siquī jñūhun ya

4

¹ Núu súcuan te na cáni ní rō jijnáhan ró jeē mozo-ni nuū Cristo cácuu ri, jeē ní tejniñū ya ruhū jeē steén rī jñūhun Yaā Dios jeē ní yisáhi ndé jenahán.

² Te ndaa chí tēe jeē sájniñū siquī ún, iyó responsable ná ñn ná ñn de jeē squícu vāha de.

³ Te ruhū tu sáha ri cuenta núu cánanducú ró siquī rī ndese sáha rī, chí núu cánanducú ñáyuu cácujeñnu ini ñayiví. Te ni máá rí tu chíhi ri cuenta siquī máá rī.

⁴ Chí vesú jini rī jíin ánuá rī jeē tú na cuēchi ri, te nasūu yúcuan cúu jeē quéndoo ndaa rī, chí máá Jítoho yō cúu jeē jito ndee ruhū.

⁵ Jeē yúcuan ma nánducú ró siquī jniñū jnáhan ró, chí nde na quée máá quiví te cuni ró. Chí nde na ndiji máá Jítoho yō te nastúu ndijin yā táca jniñū jeē yisáhi núu nēe, te steén ndijin yā táca jēe jéni ní ñáyuu jíin ánuá i. Yúcuan na te máá Yaā Dios cuajnúhún yá ná ñn ná ñn i ndese ní casáha i.

⁶ Hermano, táca jñūhun yáha ní cahán rī návāha quéndoo vāha ró jijnáhan ró. Te ni cachí rī jeē máá rí jíin Apolos cácuu ri mozo-ni nuū yā, te súcuan cácuu ri ñn ejemplo nuū rō. Te cáhan rī jeē súcuan cácuu ri, návāha cutūhva ró cani ní rō máá-ni nájñūhun cáhan tutu íi. Chí ma sandúxí ró jeē cuajnúhún ró ñn tēe steén, te inga de tuú.

⁷ ¿Te naun cácutéyí ró nuū jnáhan ró núu súcuan? ¿Te na vé cúu jeē iyó núu ró jeē tu ní cácutahū ró nuū yā? Te núu ní cacutahū ró nuū yā, ¿te naun casátéyí ró máá ró jeē nájñūhun jeē nasūu jēe ní cacutahū ró cúu?

⁸ Va je ní cacucucá ró, chí je cánévāha ró ndihí, cájeni ní rō. Te je cándacu máá ró jniñū, te ni tuá cájini fúhún ró ruhū, cájeni ní rō. Tú vāha jeē súcuan cácutéyí ró. Te nacā jeē vāha núu jeē cándacu ndije nde ró jniñū núu, návāha suni cuāha ró jñūhun jeē ndacu nde ri jniñū jíin ró jijnáhan ri.

⁹ Te iyó jéni ní rī jeē ruhū tēe cácuu apóstol, ní sáha Yaā Dios jeē cácuu rī nájñūhun tēe núu

ga nuū ñayuu, nájñuhun tēe jeē jé ni cundaā jeē cúu. Te ní ñayivi jíin andiví cándēhe váha nuū rī, cúu ndajéhé Yaā Dios jíin ñayuu.

¹⁰ Chi jeē siquí Cristo te cácahān i jeē tēe cánéé cácuu rī. Te táca róhó va ndichí rō jíin jñuhun Cristo, cájeni ni rō. Te táca rúhū chi tu fuerza rī, te róhó va iyó fuerza rō, cájeni ni rō. Te róhó chi cáhiyo yñíuhún ñayuu nuū rō, te nuū rī chi casájéé ni i.

¹¹ Ní véjicoo rī cájil rī sóco te nde vijna. Te cájichí rī ndute, te cúmani sahma rī, te tu casáha váha ñayuu jíin rī, te ni tu cáneváha rī vehe.

¹² Te nihin casájniñu rī jíin ndaha rī. Cácahān neé i nuū rī, te cácahān váha rī jíin i. Cájito xeēn i ruhū, te cájendeyí ni rī.

¹³ Cácahān neé i siquí rī, te sa cácahān maní rī jíin i. Te cácuu rī nájñuhun yáca ini ñayivi, te cásqéhichí i ruhū nde vijna.

¹⁴ Te nasūu jeé tēe rī yáha jeé cúcanu rō, chi sa suhva jeé stihví ni rī rohó, chi cácuu rō nájñuhun sēhe rī chi maní rī jíin rō.

¹⁵ Chi vésu na cóo uxí mil tēe stéén jñuhun Cristo nuū rō, te ñn-ni tátá rō iyó. Te máa rī cúu nájñuhun tátá rō, chi ni scandije rī rohó jeé ní nacani rī jñuhun váha Cristo Jesús jeé ñáma ya yohó.

¹⁶ Núu súcuan te cáhān ndahú rī jíin rō jeé na ndácu rō rúhū jijnáhan rō.

¹⁷ Te jeé yúcuu cúu jeé tají rī Timoteo cuajeé de nuū rō. Chi cúu de nájñuhun sēhe rī jeé maní rī jíin de, te squicu váha de nuū máa Jítoho yō. Te máa de nacachi tucu de nuū rō ndese jíca rī jeé candije rī Cristo, jíin ndese stéén rī nuū táca grupo ñayuu cácañdije táca lado.

¹⁸ Te sava rō chi casátéyí rō máa rō, chi cájeni ni rō jeé ma jeé cuiti gā rī nuū rō.

¹⁹ Te tuú chi yachí jeé rī nuū rō te núu súcuan cúní máa Jítoho yō. Yúcuān na te nanducú rī siquí tēe cácutéyí, te ma sáha rī cuenta jñuhun cácahān-ni de, chi sa coto ndee rī de núu cuu squicu nde de.

²⁰ Chi jeé ndácu Yaā Dios jñiñu nuū yō, nasūu máa jeé cahán ñn-ni yó cúu, chi jíni ñíuhún condiso poder jñuhun cáhān yō jíin jñiñu sáha yó.

²¹ Núu súcuan ¿te ndese cácuni rō? ¿A jeé cuxeēn rī nuū rō núu na jeé rī, siquí jeé tu cáncani ni rō, chí nacani ni rō te jeé rī jíin jñuhun cúndáhú ni jíin jñuhun vítá ní?

Jeé sándaā Pablo siquí ñn cuēchi

5

¹ Te ni nihin rī jñuhun jeé jíca jnéni ñn tēe jeé ñe méñhu rō, chí ndéca de naná uū de. Te xeēn ndasí sáha tēe ún, chí ni ñayuu jeé tu cájini jñuhun Yaā Dios, tu casáha i súcuan.

² Te vésu súcuan te casátéyí rō máa rō jijnáhan rō. Váha ga jeé na cúcuíhyá ndasi

ni rō. Te cánuú jeé na quénehen rō tēe sáha cuēchi ún na quénda de méñhu rō.

³ Te ruhū, vésu tu iyó rī jíin rō, te nájñuhun jeé iyó rī jíin rō cúu jeé ñíuhún ni rī rohó. Te je ni sándaā rī siquí tēe ni sáha cuēchi ún, chí nájñuhun jeé iyó rī jíin rō cúu.

⁴ Núu súcuan te na ndútútú rō jijnáhan rō, te máa Jítoho yō Jesucristo coo ya jíin rō. Te máa rī chí nájñuhun cone rī jíin rō, chí ñíuhún ni rī rohó. Te poder máa Jítoho yō Jesús suni coo jíin rō.

⁵ Te na chíhi yó tēe ún ndaha Satanás, náváha na ndóho yiquí cúñu de, te nacani ni de te cácu anuá de quivi ndiji Jítoho yō Jesús.

⁶ Tuú váha jeé casátéyí rō máa rō. ¿A tu cájini rō jñuhun cáhān suhva? Vésu jecu-ni levadura te ndáa ní ñujen sáha, áchí.

⁷ Núu súcuan te quenehen rō tēe un nájñuhun scáne rō levadura jeé ni tívi. Te súcuan te cuu rō nájñuhun pan jeé cúváha jíin ñujen jeé jeé tú na levadura yñi, jeé cáyeji i vico pascua. Te ndaā jeé súcuan cácuu rō. Chi je ni jíhi Cristo jeé ni sóco yá máa yá jehe yó, chí cúu ya nájñuhun londe pascua jeé ni jíhi.

⁸ Núu súcuan te na cócuhun ni yó ndese ni cuu vico pascua un, te na cóo ndije ndaā anuá yó, te suu cúu nájñuhun pan jeé tú na levadura yñi. Te ma sáha yó jñiñu neé jíin jñiñu jnéhen, jeé cúu nájñuhun levadura jeé ni tívi.

⁹ Nuū inga carta jeé ní tee rī nuū rō jijnáhan rō ni cahán rī jeé ma quívi nduu rō jíin ñayuu cájica jnéni.

¹⁰ Te tu ní cáchi rī jeé ma quíjñahan cuiti rō jíin ñayuu tu cácañdije jeé cájica jnéni, jeé ndiyo ni, jeé sáculhná, jeé chíñíuhún ídolo. Chi núu súcuan te jíni ñíuhún jeé quénda rō ini ñayivi núu, chí tuá na inga modo jeé cújiyo rō núu i chí ndéé yó ñayivi jíin i.

¹¹ Chi sa suhva ni cáchi rī jeé ma quívi nduu rō jíin máa ñayuu jeé cácahān i jeé cúu i hermano, te núu jíca jnéni i, chí ndiyo ni i, chí chíñíuhún i ídolo, chí chíso jñuhun i siquí jñahan i, chí nájini i, chí cuíhná i. Te ni ma cáji cuiti rō staa jíin ñayuu casáha súcuan.

¹²⁻¹³ Chi nasūu jñiñu rī cúu jeé sándaā rī siquí ñayuu jeé tu cáhñi jíin yó. Yaā Dios cúu jeé sándaā siquí i. Te ñayuu cáhñi jíin rō chí cánuú jeé sándaā rō siquí i. Núu súcuan te cánuú jeé quénehen rō tēe ni sáha cuēchi un jeé ñe de méñhu rō, na quénda de.

Jeé ma cáquin i cuēchi siquí jñahan i nuū tohó tu cácañdije

6

¹ Te núu jñahan rō jeé candije ni sáha cuēchi siquí rō, ¿te naun jéngoo rō jíin de nuū tohó jeé tu cácañdije jíin yó? ¿Te naun tu casándaā rō nuū jñahan rō cácañdije Yaā Dios?

² ¿A tu cájini rō jeé ñayuu cácañdije Yaā Dios chí ñn quívi te sándaā i jñiñu ñayuu ñayivi? Te

núu ñn quiví sándaã rō jniñu ñayuu ñayiví, ¿te á má cúu sándaã rō vjna siquí tãca cuēchi lúli cásáha jnánhan rō?

³ ¿A tu cájini rō jeē ñn quiví te sándaã yō nde jniñu tãcá ndajéhé andiví? Te nagā ni cuu jniñu ñayiví yáha jeē má cúu sándaã yō.

⁴ Núu súcuan te núu jnánhan rō sáha de ñn cuēchi siquí rō, ¿te naun jéngoo rō sa nuū tãca tée jeē tu cúu de jnánhan ñayuu cácadñje jeē sándaã de siquí cuēchi ún?

⁵ Súcuan cáhán rí náváha na cúcanu rō ji-jnánhan rō. ¿A tu iyó ni ñn tēe jécūhun ni mēhñu rō jeē cuu sándaã de siquí rō?

⁶ Tú vāha jeē ñn hermano caquin cuēchi siquí inga hermano nuū tohó jeē tu cácadñje.

⁷ Te jeē cájequin rō cuēchi siquí jnánhan rō, chi jeē castíví íi rō cúu. ¿A tú vāha ga cuandeyí ni rō na sáha i cuēchi siquí rō chí quende i ndajniñu rō?

⁸ Te tuú chi sa máá rō cásáha cuēchi te cáquende rō ndajniñu, te nuū tãcá hermano rō cúu jeē casáha rō.

⁹⁻¹⁰ ¿A tu cájini rō jeē ñayuu tu iyó ndáã, ma nihín tahú i quiví i ñuu nuū ndácu Yaã Dios jniñu? Ma stahú rō máá rō caní ni rō jeē nihín tahú rō, chí ni ñayuu jeē jica jnéni, ni ñayuu chiñúhún ídolo, ni ñayuu casíquí ndéé jnánhan, ni tēe sáha ndiyí jín jnánhan yí, ni ñayuu cuíhná, ni ñayuu ndíyo ni, ni ñayuu nájini, ni ñayuu chisó jnūhun siquí jnánhan, ni ñayuu stahú jnánhan siquí xūhun, ma nihín tahú i quivícoo i ñuu nuū ndácu Yaã Dios jniñu.

¹¹ Te súcuan ni candāa sava rō núu, te vjna chí je ni nacate ya rohó, te cáhiyo ndoo cáhiyo íi rō nuū yā. Chí je ni ndahva yā cuēchi rō jéé jín máá Jítoho yō Jesús jín Espíritu Yaã Dios.

Jeē iyó ndoo iyó íi yiqui cúñu ñayuu cácadñje

¹² Te ndaã cúu jeē cácahān jeē ndihi-ni jniñu iyó vāha sáha yó núu ndese cúní yō. Te vēsú súcuan te nasūú ndihi sáha jeē quéndōo vāha ánuá yō. Ndihi chí cuu sáha yó, te vēsú súcuan te tu iyó vāha jeē quiví yó núu jniñu jeē stíví ánuá yō.

¹³ Te ndaã cúu jeē cácahān jeē ndeyu cúu jeē cúhun chíji, te chíji cúu jeē cúhun ndeyu. Te ñn quiví te tuá coo súcuan, chí naa ndindúu un sáha Yaã Dios. Te nasūu siquí jeē cáca jnéni yó cúu jeē iyó yiqui cúñu yō, chí sa suhva jeē sáha yó jéé cúní máá Jítoho yō. Te Jítoho yō chí ndíto ya yiqui cúñu yō.

¹⁴ Te nájñūhun jeē ní nastécu Yaã Dios Jítoho yō, suni súcuan nastécu yā yohó jín poder yā.

¹⁵ ¿A tu cájini rō jeē yiqui cúñu tãcá ñn ñn rō cúu nájñūhun tãca parte yiqui cúñu Cristo? Núu súcuan ¿te á cuu quende yó ñn parte

yiqui cúñu Cristo te squijnánhan yó jín ñn ñahan jica jnéni? Ma cúu cuiti súcuan.

¹⁶ ¿A tu cájini rō jeē tēe quijnánhan jín ñahan jica jnéni, ñn na yiqui cúñu ni nduu de jín ña? Chí cáhán tutu íi: Jeē ndindúú chí ñn na yiqui cúñu cuu, áchi.

¹⁷ Te ñayuu jeē quijnánhan jín máá Jítoho yō, chí suni súcuan ñn na cúu i jín yá siquí jeē candñje i ya.

¹⁸ Núu súcuan te cunu rō jéé ma quiví rō núu jnūhun jica jnéni. Chí tãca gá cuēchi jeē sáha ñayuu, chí nasūu yiqui cúñu i stíví i. Te núu jica jnéni i, te siquí yiqui cúñu i cúu jeē sáha i cuēchi.

¹⁹ ¿A tu cájini rō jeē yiqui cúñu rō cúu templo Espíritu Santo jeē ni jéhe Yaã Dios nuū rō, te ndéé yá ini rō? Te nasūu cuenta máá rō cácuu rō.

²⁰ Chí Yaã Dios yahu ni cuu jeē ní nacuaan ya rohó jijnánhan rō. Te jeē yúcuan cánuú jéé cáca yíñúhún rō nuū Yaã Dios jeē sáha rō jniñu vāha nde jín yiqui cúñu rō jín ini jín ánuá rō, chí máni cuenta Yaã Dios cúu.

Jnūhun cástūhun siquí tēe jín ñasihí

7

¹ Vjna te na cáchi rí siquí tãca jnūhun jeē ní cacajñūhun rō ruhū nuū carta. Jendaá jeē vāha ga quendōo ñn tēe núu tú condeca de ñahan.

² Te siquí jeē iyó jnūhun jnéni, te vāha ga jeē tãca tēe na cóo ñasihí máá de, te suni tãcá ñahan coo yíi máá ña.

³ Te yíi na squícu vāha de nuū ñasihí de jeē cúu de yíi ña. Te suni súcuan ñasihí na squícu vāha ña nuū yíi ña.

⁴ Chí ñasihí chí tu cúu sáha ña jeē cúní ña jín yiqui cúñu ña, chí suni jeē cúní yíi ña. Te suni súcuan yíi tu cúu sáha de jeē cúní de jín yiqui cúñu de, chí suni jeē cúní ñasihí de.

⁵ Te ma sasáhán rō máá rō nuū jnánhan rō. Te núu cácuu rō jeē vihýá gā cacān tahú rō jecu tiempo, te núu cáhiyo conforme ndindúú rō, te cuu sasáhán rō máá rō nuū jnánhan rō. Te yūcuān na te vāha ga naqui-jnánhan tucu rō, náváha ma cóto ndee Satanás rohó siquí jnūhun jnéni.

⁶ Te nasūu jéé ndácu rí jniñu jeē cánuú quijnánhan rō, chí jeé jéhe rí jnūhun cúu.

⁷ Chí núnjahan ni rí jeē tãca tēe na cóo máá ñn-ni de, nájñūhun iyó máá rí. Te sín sín ni sáha Yaã Dios jín ñn ñn de ndese cúu máá de, chí sava de cuu quendōo máá ñn-ni de, te inga de chí tuú chí sín ni sáha ya jín de.

⁸ Núu súcuan te cáhán rí jín ñayuu cáhiyo máá ñn-ni, jín ñahan ní caquendōo ndáhú, jeé vāha ga te núu quendōo máá ñn-ni i, nájñūhun iyó máá rí.

⁹ Te núu jíní i jeé má cánda i quendōo máá ñn-ni i, te na quijnánhan i núu súcuan. Chí vāha ga jeé quijnánhan i vēsú jeé ndúquji i.

10 Te nuū ñayuu jeē jé ni quijnáhan chi ndácu ri jniñu jeē ñahan ma ndusín ña jíin yíi ña. Te nasūu rúhū cúu jeē ndácu jniñu, chi máá Jítoho yō.

11 Te núu ñn ñahan ndusín ña jíin yíi ña, te na quéndōo máá ñn-ni ña, chí cuu naqui-jnáhan ña jíin yíi ña. Te yíi suni ma ndusín de jíin ñasihí de.

12 Te jíin sava ga ñayuu chi cahān rī yāha jéé jéni ni maá rī, te nasūu jéé ní cachí maá Jítoho yō cúu. Núu ñn hermano ndéca de ñahan jeē tu cándíje, te núu núnjahan ni ña condee ña jíin de, te ma ndusín de jíin ña.

13 Te núu ñn ñahan ndéca ña tēe jeē tu cándíje, te núu núnjahan ni de condee de jíin ña, te ma ndusín ña jíin de.

14 Chi tēe tu cándíje, yíhi cuenta de nuū Yaā Dios siquī jeē ní quijnáhan de jíin ñahan cándíje. Te ñahan tu cándíje, yíhi cuenta ña nuū Yaā Dios siquī jeē ní quijnáhan ña jíin tēe cúu hermano cándíje. Chi núu tu súcuan te sēhe i ma quíhi cuenta i nuū Yaā Dios, te vijna chi yíhi cuenta i nuū yā.

15 Te yíi chí ñasihí tu cándíje, núu fuerza cuní i ndusín i jíin jnáhan i, te na ndúsín i. Chí núu súcuan cuní i, te hermano chí hermana cándíje tu cánuú casi i jeē ndusín jnáhan i jeē tu cándíje. Chí ni cana Yaā Dios yohó jéé condee maní yō jíin jnáhan yō.

16 Te rōhó jéé cácuu ñasihí, tu cájini rō, sanaa te cándíje yíi rō sáha rō, te cácu de. Te suni súcuan rōhó jéé cácuu yíi, tu cájini rō, sanaa te cándíje ñasihí rō sáha rō, te cácu ña.

17 Te ná ñn ná ñn ró na quéndōo ró ndese ni sáha Jítoho yō jeē cúu rō, jíin ndese íyó ró ná ni cana ya rohó ní cándíje rō. Te súcuan ndácu ri nuū táca grupo ñayuu cácaandíje.

18 Núu ni cana ya ñn tēe jeē ní cuu circuncidar, te súcuan na quéndōo de. Núu ni cana ya ñn tēe jeē tu ní cúu circuncidar, te ma cúu de circuncidar.

19 Chí tú na vé sáha núu cúu yó circuncidar chí tuú, chí jeē cánuú gá cúu jeē na squícu váha yó jniñu cuní Yaā Dios.

20 Ná ñn ná ñn ró na quéndōo ró ndese íyó ró ná ni cana ya rohó ní cándíje rō.

21 Núu mozo jeē ní jeen ñayuu cúu ró ná ni cana ya rohó, te ma cóndihvī ní rō jeē quénda rō. Te núu íyó modo jeē quénda rō nduu libre rō, te íyó váha jeē sáha rō.

22 Chí tēe cúu mozo jeē ní jeen ñayuu, te núu ni cana Jítoho yō de, te vijna chí ni nduu libre de nuū cuéchi de, jéjníñu de nuū maá Jítoho yō. Te suni súcuan tēe sájniñu cuenta maá, te núu ni cana ya de, te vijna chí ni nduu de mozo jeñíñu nuū Cristo jeē ní nacuaan ya de.

23 Chí yahu ni cuu jeē ní nacuaan Yaā Dios rohó jijnáhan ró, cúu jeē ní jíhi Sēhe ya jehē rō. Núu súcuan te ma cuajníñu ró núu jniñu cáhá-ni jeē ndácu ñayuu ñayiví.

24 Núu súcuan hermano, ná ñn ná ñn ró na quéndōo ró núu Yaā Dios ndese íyó ró ná ni cana ya rohó.

25 Te vijna te siquī ñayuu jeē íyó máá-ni, tú na jnūhun ní ndácu Jítoho yō nuū rī. Te na cáhān rī jeē jéni ni maá rī, chí ni cundáhu ni Jítoho yō ruhū, te ni sáha ya jeē cúu cahān ndaā rī.

26 Jéni ni rī jeē vāha-ni núu quendōo-ni tēe ndese cáhíyo de, jeē siquī jeē íyó jnūdóho tiempo yáha.

27 Núu íyó ñasihí ró, te ma ndusín ró jíin ña. Te núu tu íyó ñasihí ró, te ma nducú ró ña.

28 Te núu quijnáhan ró, te nasūu cuéchi cúu. Te núu quijnáhan sūchi síhí, te suni nasūu cuéchi cúu. Te ñayuu quijnáhan, chí nihín i jnūdóho ñayiví yáha, te cuní rī jeē ma nihín rō jnūdóho.

29 Hermano jijnáhan ró, jnūhun jeē cahān rī yāha cúu jeē yachí-ni ndíhi tiempo jeē sáha yó jniñu ya. Núu súcuan te nde vijna te tēe íyó ñasihí, na cóndihvī gā ni de siquī jniñu máá yá vēsú siquī ña.

30 Te ñayuu jeē ni jíhi jnáhan vehe i, na sáha i nájñūhun jeē tu cúcuíhyá ni i. Te ñayuu cúsiñ ni, na sáha i nájñūhun jeē tu cúsiñ ni i. Te ñayuu jéen, na sáha i nájñūhun jeē nasūú ndajniñu i cúu. Ma cuáha i jnūhun jeē cási táca un jéé ma cúu cóndihvī ni i jniñu máá yá.

31 Te ñayuu jeē ní cacondihvī ni siquī ndajniñu ñayiví yáha, ma cujnéñu ga i jíin. Chí je yajni naa táca jéé íyó ñayiví yáha.

32 Cuní rī jeē ma nácani ndasí ni rō siquī táca jéé íyó ini ñayiví. Chí tēe cúu soltero, ndáhvī ni de jniñu máá Jítoho yō, ndese cusíñ ni Jítoho yō sáha de.

33 Te tēe íyó ñasihí chí ndáhvī ni de jniñu íyó ñayiví, ndese cusíñ ni ñasihí de sáha de.

34 Te suni súcuan síñ síñ jéni ni ñahan íyó yíi jíin ñahan íyó máá. Chí ñahan íyó máá, ndáhvī ni ña jniñu máá Jítoho yō, chí cuní ña jeē coo ndoo coo ñi anuá ña jíin yiqui cúñu ña cuajniñu ña nuū yā. Te ñahan íyó yíi chí ndáhvī ni ña jniñu íyó ñayiví, ndese cusíñ ni yíi ña sáha ña.

35 Jeé váha máá ró jijnáhan ró cúu jeē ni cáhān rī súcuan. Chí nasūu jéé nducú rí casi rī jeē quijnáhan ró, chí sa sulva cuní rī jeé caca yíñūhún ró te nune ró cuajniñu cutú ró núu máá Jítoho yō.

36 Te núu ñn tēe íyó sēhe síhí de, te núu cuayíi i, te núu jéni ni de jeē vāha ga jeē quijnáhan i, núu súcuan te na sáha de jeé jéni ni de, te cuáha de jnūhun quijnáhan i, chí nasūu cuéchi cúu.

37 Te núu ñn tēe ni cundaā ni de jeé cóndee sēhe síhí de súcuan-ni, jeé ma cuáha de i vēsú fuerza jicán ñayuu i, núu súcuan te cuu quendōo i nájñūhun cuní de, chí jeé váha sáha de.

³⁸ Núu súcuan te tēe jéhe jnūhun quijnáhan i, vāha sáha de. Te tēe tu jéhe jnūhun, chí vāha ga sáha de.

³⁹ Te ñahan ní quijnáhan, chí yíhi ña ndaha yí ña níni jeé técu de. Te núu je ní jíhi yí ña, yūcuán na te je ní cuu libre ña jeé quijnáhan tucu ña jíin na-ni tēe cúu ní ña, te núu tēe cándíje nuū Jítoho yō cúu de.

⁴⁰ Te jéni ní rí jeé ndetú gā coo ña te núu quendō ña súcuan-ni. Te suni jéni ní rí jeé jíin Espiritu Yāa Dios cúu jeé cahán rí.

Siquí cūñu ní sócō nuū ídolo

8

¹ Te vijna te na cáchi rí siquí cūñu ní sócō nuū ídolo. Ndaā chí tāca yō jéni ní yō jeé maá yō cúu jeé jíni ndese cúu. Te tāca jéé jíni yō ún, chí ndúcú sáha jeé cundúxí yō. Te sa suhva jeé cundáhú ní yō jnáhan yō, sáha un jéé íje i jíin jnūhun ya.

² Núu na-ni ñayuu jéni ní i jeé jíni vāha i, te tuú chí ná tu cuni cuíti i nájñūhun cánuú cuni i.

³ Te sa suhva ñayuu jeé maní i jíin Yāa Dios, maá i cúu jeé jetáhú yá.

⁴ Núu súcuan te na cástūhun rí siquí cúñu jeé ní casocō ñayuu nuū ídolo. Ndaā chí jíni yō jeé tāca ídolo ñayívi, tú ndaā cuíti. Te tú na inga yaá iyó, chí maá ñin-ni Yāa Dios.

⁵ Te ñayuu chí cájeni ní i jeé iyó táca yāa ini andiví jíin ñayívi, chí cácahan i jeé iyó ndíje cuehé yaá i jíin Jítoho i.

⁶ Te nuū maá yō chí ñin-ni Yāa iyó, jeé cúu Tátá yō Yāa Dios. Te maá yá ní sáha tāca jéé iyó, te cuenta maá yá cúu yō jíinánhan yō. Te suni iyó ñin-ni Jítoho yō Jesucristo, te nde nuū maá yá véji táca jéé iyó, te suni maá yá ní sáha yóhó.

⁷ Te ñayuu cácañdije, chí tú ndíhi i jíni jnūhun yáha. Chí sava i ní cacāan i ní chíñúhún i ídolo nde ná tu cándije i. Te nde vijna núu cáyeji i cúñu ún te sáha i cuenta jeé ní sócō nuū ídolo cúu. Te siquí jeé ná tu ije i jíin jnūhun Yāa Dios, te jéni ní i jeé cujnéhén ánuá i sáha cúñu jeé ní sócō nuū ídolo ún.

⁸ Te ndaā chí nasūu jéé yéji yō cúu jeé sáha jeé cuatáhú Yāa Dios yohó. Chí núu yéji yō, nasūu yúcuán sáha jeé quéndōo vāha ga yō nuū Yāa Dios. Te núu tu yéji yō, ní tu sáha jeé quéndōo ndáhú gá yō nuū yá.

⁹ Te vesú tú ní ñin jési jeé ma cáu caji rō cúñu ún, te coto rō jnáhan rō jéé ná tu ije jíin jnūhun ya, te ma sáha rō jéé suni caji i jeé jéni ní i jeé cuéchi cúu.

¹⁰ Vāha ga ma cáji rō núu súcuan, chí sanaa te hermano rō jeé ná tu ije jíin jnūhun ya, coto de róhó jéé yéji rō ini vehe ídolo, chí jíni vāha rō jéé tú na vé sáha. Te súcuan te sáha rō jéé cájni ní de jeé suni caji maá de cúñu jeé ní sócō nuū ídolo, vesú jéni ní de jeé cuéchi cúu.

¹¹ Te súcuan stívi ró anuá hermano rō jeé ná tu ije jíin jnūhun ya, vesú jíni vāha maá rō jeé tú na vé sáha jeé cáji rō. Te tú vāha sáha rō, chí suni jehē maá de ní jíhi Cristo.

¹² Te núu súcuan stívi ró anuá hermano rō jeé ná tu ije jíin jnūhun ya, núu súcuan te siquí Cristo cúu jeé sáha rō cuéchi.

¹³ Núu súcuan te núu cúñu un sáha jeé quívi hermano rí cuéchi, te ma cáji cuíti ga rí cúñu ún, návāha ma sáha rí jeé quívi de cuéchi.

Siquí jeé iyó derecho tēe cácuu apóstol

9

¹ Te maá rí chí jíca libre rí, te iyó derecho rí siquí jeé cúu rí apóstol, tēe ní tají yá scáca jnūhun ya. Chí ní jito rí nuū maá Jítoho yō Jesús, te maá rō jíinánhan rō cácuu jñíñu jeé ní sáha rí jeé ní squívi rí rohó ndaha Jítoho yō.

² Te núu sava ga ñayuu tu jetáhú i jeé cúu rí apóstol, te nuū maá rō chí suu cúu ndíje rí. Chí siquí jeé ní scandíje rí rohó jíinánhan rō, te jeé yúcuán cácuu ró prueba jeé steén jeé ndíso jñíñu rí cúu rí apóstol nuū maá Jítoho yō.

³ Te jnūhun yáha cáhán rí jehē maá rí nuū ñayuu cácahán siquí rí.

⁴ Achí rí: Iyó derecho rí caji rí coho rí jeé cájēhe ñayuu núu cúní rí.

⁵ Te suni iyó derecho rí núu jeé cuni rí condeca rí ñin hermana cándije cuu ñasihí rí, caca ña jíin rí, nájñūhun iyó ñasihí Pedro jíin táca gá apóstol jíin tēe cácuu ñani maá Jítoho yō.

⁶ ¿Chí cájeni ní rō jeé maá rúhū-ni jíin Bernabé tú na derecho rí jeé stóo rí jñíñu cásaña rí jeé cótecu rí, návāha nune ga rí nacani rí jnūhun vāha ya, chí naún?

⁷ ¿A iyó soldado jeé técu de xūhún vehe de? ¿A iyó tēe jeé jítu uva te tu yéji de ndehé ún? ¿A iyó tēe jeé ndíto lanchi te tu jíhi de leche tí? Tú cuíti. ¿Te á suni tu iyó derecho rí cotecu rí siquí jnūhun ya naún?

⁸ Te ma cáni ní rō jeé táca jéé cahán rí yāhá, máni maá jéé cácahán ñayuu ñayívi cúu. Chí nde maá ley yá jeé ní jéhe ya nuū Moisés, cáhán súcuan.

⁹ Chí cáhán nuū tútu ley yā: Ma chúhun ró ñunu yuhu stíquí, quití jéxin trigo, achí. Te ndaā chí nasūu máni siquí stíquí cúu jeé ní cáhán yá súcuan.

¹⁰ Chí suni siquí maá yó ní cahán yā. Chí ley un ní jéhe ya jeé vāha maá yó, chí steén jeé tēe jítu jíin tēe jéxin trigo cánuú jeé níhín de sava un quívi ndutútú.

¹¹ Te suni súcuan ruhū jíinánhan rí jeé ní cataji rí jnūhun Espiritu ini anuá rō, ¿te á véyi cúu jíin ró núu nastútú rí jeé cótecu rí nuū rō?

¹² Te núu sava ga tēe cástéén nuū rō, iyó derecho de cacān de nuū rō, te nagā ní cuu ruhū jíinánhan rí jeé ma cóo derecho rí cacān rí.

Te tu ní cájicān rī derecho un, chi sa suhva ni jendeyi ni rī coto máá rí jeē caji rī, návāha ma cási rī jeē cáca jnūhun vāha Cristo.

¹³ Te cājini rō jeē sutū ni cajejniñū ini templo, ni cacotecu de siquī jeē ní casocō ñayuu ini templo. Chi sutū ni cajejniñū nuū altar nuū ní casocō i quiti, suni ni cayejni de sava quiti ún.

¹⁴ Te suni súcuan ni ndacu máá Jítoho yō jniñū jeē tée cánacani jnūhun jeē jnáma ya yohó, siquī jniñū un níhīn de jeē cótecu de.

¹⁵ Te ruhū tu ní jícán cuiti rī derecho rī yāhá, te suni nasūu jéē tée rī jnūhun yāha návāha cuāha rō núu rī jijnánhan rō. Chi jéni ni rī jeē vāha ga núu na cúu rī nasūu jéē quihin rī jeē cuāha rō, chi casi jeē cúsi ni rī scáca rī jnūhun ya súcuan-ni.

¹⁶ Te tú vāha núu sátéyí rí máá rí siquī jeē nácani rī jnūhun jeē jnáma ya yohó. Chi ñin jeē ní tejniñū ya ruhū cúu, te cánuú squícu rī. Chi nacā ndahú cúu rī te núu tú nacani rī jnūhun ya.

¹⁷ Te núu jeē cúu ni máá rí sáha rī nuú, yucúan na te cuu cacān rī yāhu rī. Te tuú chi cánuú sáha rī, chi máá Yaā Dios ni tee ya jniñū siquī rī.

¹⁸ Núu súcuan te yāhu rī cúu jeē cúsi ni rī jeē súcuan-ni nácani rī jnūhun jeē jnáma ya yohó, te tu jícán rī derecho rī jeē cotecu rī siquī jeē nácani rī jnūhun ya.

¹⁹ Chi vésú tú ni ñin ñayuu ndácu jniñū nuū rī, te ni sáha rī máá rí mozo nuū táca i jeē nácani rī jnūhun nuū i, návāha nihīn rī cuehē i candije i Cristo.

²⁰ Núu íne rī jín jnánhan rī hebreo te sáha rī nájñūhun casáha i, návāha cuu scándije rī i. Chi násáha rī máá rí nájñūhun tée cáyihī chiji ley Moisés, návāha cuu scándije rī i jeē cáyihī i chiji ley un, vésú tuá yíhi rī chiji ley un.

²¹ Te suni násáha rī máá rí nájñūhun ñayuu tu cáyihī chiji ley Moisés, návāha cuu scándije rī ñayuu ún. Te vésú súcuan te yíhi rī chiji ley Yaā Dios, chi suu cúu ley Cristo jeē squícu rī.

²² Te núu íne rī jín ñayuu jeē ná tu ije jín jnūhun ya, te sáha rī máá rí nájñūhun jeē ná tu ije rī jín jnūhun ya, návāha cuu scándije ga rī i. Núu súcuan te násáha rī máá rí núu ndese cándaā táca ñayuu, návāha táca-ni modo un te cuu scándije rī sava i.

²³ Táca yáha sáha rī jeē siquī jnūhun jeē jnáma ya yohó, návāha suni nihīn rī tahū jeē ndiso jnūhun ya.

²⁴ Je cājini rō jeē tée cájinu carrera, jendaá chi ndihi de cájinu, te ñin-ni de cūndeyí nihīn premio. Te suni súcuan nducú ndéyí máá rō squícu rō, návāha nihīn rō premio nuū yā.

²⁵ Te táca tée cúní cūndeyí siquī ñin deporte, chi cáscuāha de te cándito de máá de. Súcuan casáha de návāha nihīn de ñin premio jeē cúu corona ndaha yúñu jeē náā yachī. Te máá yó chi sa suhva cánducú ndéyí yó návāha nihīn yó ñin premio jeē ma náā cuiti.

²⁶ Te máá rí suni nducú ndéyí rí nájñūhun tée cájinu, te tu nducú ndéyí cáha rí. Te sáha rī nájñūhun tée cácajnánhan juego jeē tu jéhe iyú de, chi queé jniñū sáha rī.

²⁷ Chi sa suhva stóho rī yiqui cúñu rī, te stíhví ni rī máá rí squícu rī. Chi vésú ni stíhví ni rī inga ñayuu jeē nducú ndéyí i, te núu tu nducú ndéyí máá rí te snáā rī premio rī.

Siquī jeē ma chíñūhún i ídolo

10

¹ Hermano jijnánhan rō, cúní rī jeē na jécūhun ni rō ndese ni cajica jí yō jenahán. Chi ndihi de ni cajica chíji vicó jeē ni stéén ichi nuú de, te ndihi de ni cayāha méhñū ndute Mar Rojo jeē ní cusñin, ni nune ichi.

² Súcuan cúu jeē ní canduu inuú ndihi i jín Moisés, chi ni candiquín i de chíji vicó jín méhñū mar.

³ Te ndihi i chi inuú-ni ni cayejni i alimento jeē ni jéhe máá Espiritu.

⁴ Te suni ndihi i ni cajihī ndute jeē ni jéhe Espiritu. Chi ni cajihī i ndute jeē ní cane jicā cáva nuū ní cajica cuu i. Te Cristo cúu nájñūhun cava un jéé jéhe ya ndute cotecu yó ní cáni.

⁵ Te vésú súcuan te cuehē i ni cunñhni ni i, te tu ní cúsi ni Yaā Dios jín i, te jeē yúcuan ní cajihī i nuū ñūhun téhé.

⁶ Te táca jéé ní cuu ún, ñin ejemplo cúu nuú yó, návāha ma ndiyo ni yó táca jéé neé, nájñūhun ni candiyo ni ñayuu ún.

⁷ Te ma chíñūhún rō ídolo, nájñūhun ni casáha sava i. Chi súcuan cáhán nuū tútu ñi: Ni cacucōo ñayuu ún, ni cayejni i ni cajihī i vico ídolo, te ni ndocuiñi i ni cajita jéhé i, áchi.

⁸ Te ni ma cáca jnéni rō nájñūhun ni casáha sava i, te ni cajihī ocó uní mil i jeē ñin quiví-ni.

⁹ Te ni ma sáha rō jniñū jeē squití ni rō Jítoho yō, nájñūhun ni casáha sava i, te ni cajihī i jeē ní catuu coó i, ni sáha ya.

¹⁰ Te ni ma cahán sóo rō siquī Yaā Dios, nájñūhun ni cacahán sóo sava i, te ni cajihī i jeē ní jehni ndajéhé yā i.

¹¹ Te táca jéé ní cuu ún, chi ñin ejemplo cúu nuú yó. Te súcuan yósó núu tútu návāha na chúhun vāha ni máá yó. Chi cácuu yó ñayuu cátecu quiví cuándihi ñayiví.

¹² Núu súcuan te rōhó jéé cājini ni rō jeē cáhīn nihīn rō jéé ma sáha rō cuéchi, coto má quiví rō cuéchi.

¹³ Chi máni íyó jéé nducú squiví rōhó cuéchi, te inuú-ni cándoho rō súcuan nde jín táca gá ñayuu. Te cuu cucáñu ni rō Yaā Dios jeē ma cuāha ya jnūhun jeē vihyá gā coto ndee jexeén rōhó vésú jeē cúu cūndeyí rō jín. Chi sa suhva núu vėjí jeē nducú squiví rōhó cuéchi, te chindéé ñáhán yá rohó quenda rō te cūndeyí rō siquī.

14 Ñānī mánī, ma chiñúhún cuiti rō ídolo núu súcuan.

15 Cáhán rī jín rō jée cúu rō ñáyuu cájecūhun ni, te na sáha rō cuenta núu ndaā jñūhun cáhán rī.

16 Máa copa īi jee cájicān tahu yō jehē, suu cájihī cáhnu yō jee steén yō jee inuú cúu ndihī yó, chí ni jeti ñiñī Cristo jee siquī yō ná ni jihī yā jicā cruz. Te pan jee sacuéchī yó cáyeyi cáhnu yó, steén jee inuú cúu ndihī yó siquī jee ni jéhe Cristo yiqui cúñu yā ni jihī yā jehē yó.

17 Te vésu cuehē yō iyó, te ñn-ni ñayuu cácuu yó, chí ñn-ni pan un cáyeyi cáhnu yó siquī jee cācandīje yó.

18 Condēhe rō ndese cásáha ñayuu Israel. Tāca tēe jee yéji quiti jee ni sócō nuū yā, chí inuú-ni cúu ndihī de siquī jee cáyeyi de jee ni sócō ún.

19 Núu súcuan te cáhán rī jee tu ndé jéñiñū ídolo, ni tu jéñiñū cūñu jee ni sócō nuū ídolo, chí inuú cúu jín táca gá cūñu.

20 Te suni cáhán rī jee ñayuu tu cájini jñūhun Yaā Dios, núu cāsocō ī, te nuū tachī cāsocō ī, nasūu núu Yaā Dios. Te tu cúnī rī jee cuajniñū rō núu tachī.

21 Ma cúu coho rō copa máa Jítoho yō te núu cájihī rō jee ni sócō nuū tachī. Te ma cúu caji rō nuū mesa Jítoho yō te núu cáyeyi rō jee ni sócō nuū tachī.

22 Ma quívi nduu yō súcuan jín táchī, návāha ma cucuíñī Jítoho yō jín yó. ¿Chí téyí gá máa yó vésu máa yā jee ma cúu stóho ya yohó, cájeni ni rō, chí naún?

Ndihī chí sáha yó jín jñūhun cúndáhú ni

23 Te ndaā cúu jee cācāhān jee ndihī-ni jniñū iyó váha sáha yó núu ndese cúnī yó. Te tuú chí nasūu ndihī sáha jee quéndōo váha ánuá yó. Ndihī chí cuu sáha yó, te vésu súcuan te nasūu ndihī sáha jee ije jñāhan yó jín jñūhun ya.

24 Chí cánúu sáha yó jee váha jñāhan yó, nasūu máni máa jee váha máa yó.

25 Cuu caji rō ndihī-ni cūñu cūyāhu nuū yáhu, te ma cájñūhun rō ni ma cáni ni rō núu jee ni sócō nuū ídolo cúu.

26 Chí cuenta máa Jítoho yó cúu ñayívi jín ndivii jee iyó ini, te cuu cuajniñū yó.

27 Te núu ñn tēe tu cāndīje, cana de róhó caji rō jín de, te núu cācuni rō quihñ rō, núu súcuan te caji rō táca jee cáni de nuū rō. Te ma cájñūhun rō ni ma cáni ni rō núu jee ni sócō nuū ídolo cúu.

28 Te núu cachi ñn i nuū rō jee cūñu ni sócō nuū ídolo cúu, yūcuán na te ma caji rō, chí siquī jee jéni ni i jee cuēchī cúu, te tu cúnī rō sáha rō jee quívi i cuēchī.

29 Te súcuan cáhán rī siquī jee inga i cájeni ni i jee cuēchī cúu, te nasūu jee súcuan cájeni ni máa rō.

Te sanaa te cahān ñn rō: ¿A tu iyó libre rī caji rī jee cunī máa rī, vésu cájeni ni inga i jee cuēchī cúu?

30 ¿Te núu nácuatáhú rī nuū Yaā Dios te yéji rī, te najehē cācāhān i siquī rī jee yéji rī? achi rō.

31 Tuú chí ndihī jee sáha rō, vésu jee caji rō chí jee coho rō, chí na-ni jniñū sáha rō, ndihī na sáha yíñúhún rō jín Yaā Dios, návāha cuni ñayuu jee luu cújehnu ya.

32 Te ma sáha rō jniñū jee squívi rō ñayuu nuū cuēchī, cúu ñayuu hebreo, cúu ñayuu táca nación jee tu jín jñūhun ya, cúu ñayuu cācandīje Yaā Dios.

33 Te ruhū chí ndúcú rí jee na cúsñ rí táca ñayuu jín táca jniñū sáha rī. Tu ndúcú rí jee váha máa-ni rī, chí sa ndúcú rí sáha rī jee váha cuehē ñayuu, návāha cácu i.

11

1 Te na ndácu rō ruhū jijnāhan rō, nájñūhun ndácu máa rī Cristo.

Siquī ndese cánúu sáha ñahan cāndutútu

2 Váha cásáha rō, hermano, jee nini cānucūhun ni rō ruhū, te cāndihví ni rō jín táca jniñū jee ni steén rī nuū rō.

3 Te cúnī rī jee na jécūhun ni rō jee Cristo cúnúu yá nuū táca tēe. Te tēe cúnúu de nuū ñasihí de. Te Yaā Dios cúnúu yá nuū Cristo.

4 Núu ñn tēe ñūhun de lélú te jicān tahu de chí nácani de jñūhun nuū ndutútu ñayuu cācandīje, núu súcuan te jéhe de jñūhun canu máa de.

5 Te sa núu ñn ñahan tu ndési xiní ña te jicān tahu ña chí nácani ña jñūhun, núu súcuan te jéhe ña jñūhun canu máa ña, chí ñn-ni cúu un núu ní sáte xiní ña.

6 Núu ñn tēe casí ña xiní ña, váha ga na sáte ña ixi ña núu súcuan. Te núu cūcanu ña jee sáte ña ixi ña chí jee sáte ña ña, te na casí ña núu súcuan.

7 Te tēe chí ma casí de xiní de, chí máa de cúu muestra jee steén ndese cúu Yaā Dios jee cújehnu ya. Te ñahan chí steén ña jee cújehnu tēe.

8 Chí ná ni sáha ya tēe, te nasūu jín yiqui ñāhan ni sáha ya, chí sa suhva jín yiqui tēe ni sáha ya ñahan.

9 Te ñahan chí ni cuvāha ña jee siquī tēe, nasūu tēe jee siquī ñahan.

10 Te jee yúcuán cānúu jee cóndesi xiní ñahan, te suu steén jee cújehnu tēe, chí suni cāndéhé ndajéhé yā ndese sáha ña.

11 Te vésu súcuan te yóhó jee candīje yó, chí jín yó jee tu iyó tēe nuū jee tu iyó ñahan, te tu iyó ñahan núu jee tu iyó tēe.

12 Chí vésu ni sáha ya ñahan jín yiqui tēe, te vijna cácu tēe chíji ñahan, te máa Yaā Dios cúu jee sáha táca-ni.

13 Na sáha máá ró cuenta zǎ iyó váha núu tu ndési xiní ñahan te jicán tahu ña nuū Yaā Dios?

14 Chi sáha yó cuenta jeē ini ñayivi yáha, núu cáni ixi tēe te cúcanu de sáha.

15 Te ñahan chi sa váha jito ña te núu cáni ixi ña, chi suu ni jēhe ya jeē cóndesi xiní ña.

16 Te núu ndé ñin ñayuu cuní i cahān i siquī jnúhun yáha, te ruhū jín táca grupo ñayuu cácan dije nuū Yaā Dios, tú na inga costum-bre jejnúhún rí siquī jnúhun yáha.

Jeē castívi i siquī Cena Jitoho yō

17 Te iyó inga jnúhun cánuú cahān rí jín ró, chi tu cúu cahān rí jeē váha casáha ró. Chi nuū cándutútú ró te tu sáha jeē quéndōo váha ga ró, chi sa jeē castívi ró.

18 Xihna jnúhun yáha cáhān rí, jeē nihín rí jnúhun jeē nuū cándutútú ró te cácusín ni ró. Te jéni ni rí jeē ndaá cúu.

19 Chi níni coo sava ró jéé cusín ni, návāha natūu ndé-ni cúu jeē cácan dije váha mēhñu ró.

20 Te jeē cácusín ró súcuan nuū cándutútú ró, te nasūu cena maá Jitoho yō cúu jeē cáyeji ró núu súcuan.

21 Chi núu cáyeji ró, te táca ñin ñin ró cúní caji xihna gā vēsú jnāhan ró. Te súcuan te sava ró tu cánihin, te cáji sōco, te sava ró cánañini jeē cájihi cuehē.

22 ¿A tu cánevāha ró vehe nuū cáji ró coho ró, chí naún? Chi jeē casáha ró súcuan cúu jeē tu iyó yíñúhún ró ini vehe nuū cándutútú ñayuu cácan dije Yaā Dios, chi casáha ró jéé cáccuanu ñayuu jeē tú na vé névāha. ¿Ndese cahān rí jín ró núu súcuan? ¿A cáhān rí jeē váha casáha ró? Tuú chi nasūu jéé váha cúu jeē casáha ró súcuan.

Siquī jeē ní jequin Jitoho yō Cena yā

(Mt. 26.26-29; Mr. 14.22-25; Lc. 22.14-20)

23 Chi jnúhun yáha jéé ní nastéén rí nuū ró, chí nuū maá Jitoho yō ni nihín rí: Jeē maá jecuáá jeē ní nastúu de Jitoho yō Jesús, te ni quihin ya pan.

24 Te ni nacuatáhú yá, te ni tahu cuéchi yá, te ni cahān yā jín tēe cácuáha jín yá: Quihin te caji ró jijnáhan ró, chí yáha cúu yiqui cúñu rí jeē ní sōco rí jeē siquī ró. Te níni caji ró súcuan jeē cáñuhun ni ró ruhū jeē ní jihí rí jehē ró. Achí yá.

25 Te suní súcuan ni quihin ya copa ná ni cuu ni cuxini ya jín de, te ni cahān yá: Jeē ñuhun copa yáha cúu niñí rí jeē sácútu contrato jeé jeé jnámá rí ñayuu. Te táca jínu jeē cájihi ró, te nucúhun ni ró ruhū. Achí yá.

26 Chi táca jínu jeē cáyeji ró pan un te cájihi ró copa un, súcuan cástéén ró jeē ní jihí Jitoho yō jehé yō. Te súcuan na sáha ró ndé quiví ndíji ya.

Ndese caji yíñúhún i Cena yā

27 Te núu na-ni ñayuu caji i pan un chí coho i copa Jitoho yō ún, te núu tu sáha yíñúhún i nuū Yaā Dios, núu súcuan te sáha i cuéchi jeē tu iyó yíñúhún i siquī yiqui cúñu maá Jitoho yō jín siquī niñí yá.

28 Núu súcuan te coto ndee ró maá ró núu iyó ndoo ánuá ró jeē tú cuéchi ró. Te saá te cuu caji ró pan un te coho ró copa un.

29 Chi núu ñin ñayuu tu yéji tu jihí yíñúhún i te tu núcúhun ni i jeē yiqui cúñu yá cúu, ñayuu ún chi nihín i castigo núu na cáji i coho i.

30 Jeē yúcuán cúu jeē iyó cuéhē ñayuu cácuñu jín jéé ní cacuxií, cáhiyo mēhñu ró. Te sava i je ni cajihi.

31 Te núu coto ndee yō maá yó nde ná tu caji yō, te Jitoho yō ma cuáha ya castigo yohó.

32 Te núu Jitoho yō jéhe ya castigo yohó, te súcuan stóho ya yohó návāha ma jnahnú ndetū yō jín ñayuu ñayiví.

33 Nání maní, núu súcuan te jeē cándutútú ró jeē cáji ró Cena yā, te condetu ró te caji inuú ró.

34 Te núu ñin ñayuu jii i sōco, te xihna gā na cáji i vehe i návāha ma stívi i nuū cándutútú ró. Te súcuan te ma cuáha ya castigo i. Te quiví jécondēhe rí rohó te cachi rí ndese coo sava ga jniñu.

Siquī táca táhū jeē jéhe Espíritu

12

1 Hermano, cúní rí jeē na jécúhun ni ró siquī táca táhū jeē jéhe Espíritu nuū yō, suu táca modo jejniñu ñin ñin yó núu Yaā Dios.

2 Te cájini ró jeē ná ni cuu ró ñayuu ná tu candíje, te ni cacondihví ni ró ni cachiñúhún ró ídolo ñihín.

3 Te vijna te na jécúhun ni ró jeē núu ndé ñayuu cahān ndevāha i siquī Jesús, te nasūu jín poder Espíritu Yaā Dios cúu jeē cahān i súcuan. Te ni ñin i ma cúu cahān i jeē Jitoho i cúu Jesús, te núu tu ndéé poder Espíritu Santo ini i.

4 Te sán sán tahu jéhe ya jeē cuajniñu ñin ñin yó núu yá, te ñin-ni maá Espíritu cúu jeē jéhe.

5 Te sán sán jéjniñu yó, te nuū maá ñin-ni Jitoho yó jejniñu yó.

6 Te sán sán modo sáha yó jniñu ya, te ñin-ni Yaā Dios cúu jeē sáha jniñu un jín yó.

7 Te nuū ná ñin ná ñin yó ní jéhe Yaā Dios tahu jéé sáha Espíritu yá jín yó, návāha na sáha yó jéé ije jnāhan yó jín jnúhun ya.

8 Chi sava yó ní canihín tahu jeē ndichí cáhān yō jnúhun ya, sáha maá Espíritu. Te sava ga yō ní canihín yō jeé cúu jécúhun váha ni yō te castúhun yó, te suní maá Espíritu sáha.

9 Te nuū sava ga yō ni jéhe ya tahu jeé cúu cándíje nihin yó jéé sáha ya jeé jicán yō, te

sava ga yō cūu sāha yō jēē ndūvāha ñayuu cācuhū, te suni mǎá Espiritu sāha.

¹⁰ Te sava ga yō cūu sāha jniñu jéhu jín fuerza Yaā Dios. Te sava ga yō cūu nācani jñuhun ya. Te sava ga yō ni sāha ya jeē nācuni yō tāca jñuhun, núu vēji nuū Espiritu yā chí tuú. Te sava ga yō ni nihīn tahū jeē cahán yō tjini yuhu jeē tu jécūhun ni yō. Te sava ga yō cūu nacastūhun yō jñuhun ni cahān jñahan yō jín inga yuhu ún.

¹¹ Te tāca tǎhū yáha, chí ñn-ni mǎá Espiritu sǎja, te sǎn sǎn jéhe ya nuū ñn ñn yó, ndese núnjahan ni mǎá yá.

Ndihí yó cūu nájñuhun ñn na yiqui cūñu

¹² Chí nájñuhun ñn yiqui cūñu iyó cuehē parte, súcuan cūu yó jín Cristo jeē cūu yó nájñuhun yiqui cūñu yā, chí ñn na cūu yó jín yá. Te vēsú cuehē parte cácuu yó te ñn-ni cūu yó, nájñuhun ñn yiqui cūñu jeē iyó cuehē parte.

¹³ Chí ñn na ni canduu yó jín yá ni sāha ñn-ni mǎá Espiritu ná ni cajendute yó. Súcuan cūu vēsú cūu yó ñayuu hebreo chí ñayuu griego, vēsú mozo jeē ní jeen ñayuu chí té sǎjniñu cuenta mǎá. Te ndihí yó chí ñn-ni Espiritu ni canihīn yó.

¹⁴ Te ñn yiqui cūñu chí nasú ñn-ni parte cūu, chí sa cuehē parte cūu.

¹⁵ Te núu jehē cahān: Nasūu cuenta yiqui cūñu cūu ri, chí nasūu ndaha cūu ri, te tuú chí parte yiqui cūñu cūu nahín.

¹⁶ Te núu sōho cahān: Nasūu cuenta yiqui cūñu cūu ri, chí nasūu tinūu cūu ri, te tuú chí parte yiqui cūñu cūu nahín.

¹⁷ Núu ní yiqui cūñu yó cūu tinūu, ¿te ndese cuni sōho yó núu súcuan? Te núu ní yiqui cūñu yó cūu sōho, ¿te ndese cuaan yó xícó núu súcuan?

¹⁸ Te Yaā Dios ni chujñahan ya ñn ñn parte yiqui cūñu, nájñuhun cúní yā jeē coo.

¹⁹ Chí núu ñn-ni parte cūu ndihí, te nasú ñn ní yiqui cūñu cūu núu súcuan.

²⁰ Te tuú chí cuehē parte iyó, te ñn-ni yiqui cūñu cūu.

²¹ Te ni ma cūu cahān tinūu jín ndaha: Tu jini ññuhún rí rohó. Te ni xini ma cūu cahān jín jehē: Tu jini ññuhún rí rohó.

²² Chí sa suhva tāca parte yiqui cūñu jeē jeni ni yō jeē núu ga fuerza, suu cūu jeē cānuú gá.

²³ Te tāca parte yiqui cūñu jeē jeni ni yō jeē tu cá vāha, suu cūu jeē yúcun gá chūhun yó sahma. Te parte jeē tú-ni luu cáa, sa vāha ga jési yō.

²⁴ Chí parte jeē lúu cáa, tu cānuú jéē condihyū. Chí súcuan ni chujñahan Yaā Dios yiqui cūñu, jeē yúcun gá ndito yó jéē tu cáa luu.

²⁵ Súcuan ni sāha ya návāha ma cusin tāca parte yiqui cūñu, chí sa chindéé ñájñahan vāha jín jñahan.

²⁶ Te núu jétú ñn parte yiqui cūñu, te suni ní cáhu-ni jétú. Te núu ñn parte ndito yúcun yó, te suni ndihí-ni parte quéndō vāha.

²⁷ Te róhó jínñahan ró chí nájñuhun yiqui cūñu Cristo cácuu ró, chí ñn na cūu yó jín yá. Te ná ñn ná ñn ró cūu ñn ñn parte yā.

²⁸ Núu súcuan te sǎn sǎn jniñu ni jéhe Yaā Dios nuū tāca ñayuu cācandje jeē cácuu i nájñuhun ñn ñn parte yā: Te suu ñn parte yā cūu tācá apóstol jeē ní jeni ya xīhna gā jeē scáca de jñuhun ya. Yūcuán na te jeē uú, tēe cānacani jñuhun ya, te jeē uní, tēe cástéén. Yūcuán na te ñayuu casáha jniñu jéhu jín fuerza yā, jín ñayuu casáha jeē ndūvāha ñayuu cācuhū, jín ñayuu cachindéé ñájñahan, jín ñayuu cándiso jniñu, jín ñayuu cācāhān sǎn sǎn yuhu jeē tu cájecūhun ní.

²⁹ ¿A ndihí yó cácuu apóstol, chí naún? ¿A ndihí yó cānacani jñuhun? ¿A ndihí yó cástéén? ¿A ndihí yó cūu sāha jniñu jéhu?

³⁰ ¿A ndihí yó cūu sāha jeē ndūvāha ñayuu cācuhū? ¿A ndihí yó cūu cahān sǎn sǎn yuhu? ¿A ndihí yó cūu nacastūhún yuhu ún, chí naún? Tuú chí sǎn sǎn tahū ni canihīn yó.

³¹ Núu súcuan te na cóndihvī ní rō cacān rō jeē cuáha Yaā Dios tahū cānuú gá nuū rō. Te vijná te na stéén rī nuū rō ñn jeē vāha ga nuū tāca gá tahū ún, suu jñuhun cúndáhú ni jñahan.

Jñuhun jeē cundáhú ni jñahan

13

¹ Vēsú núu cūu cahān yō tjini yuhu jeē cācāhān ñayuu chí jéē cācāhān ndajéhé Yaā Dios, te núu tu cúndáhú ni yó jñahan yó, te jñuhun cahān yō un cūu nájñuhun ñn tambor jeē ndaxín cǎján chí ñn platillo jeē ndaxín cǎxín sánee sōho ñayuu.

² Te vēsú cūu nacani vāha yó jñuhun ya, te cūu jécūhun ni yō tāca jñuhun sǎhi yá jín tāca jñuhun ndíchí, te núu tu cúndáhú ni yó jñahan yó, te tu ndé jéjníñu cuiti yó núu súcuan. Te vēsú cūu candíje téyí yó jeē nde cūu cahān yó jeē cūjijo yucu, te núu tu cúndáhú ni yó jñahan yó, te tu ndé jéjníñu cuiti.

³ Te vēsú na sǎja yó ndihí jeē névāha yó cūu ñayuu ndahú, te vēsú núu cuāha yó jñuhun cahmu ñayuu yohó jéē siquí jñuhun ya, te núu tu cúndáhú ni yó jñahan yó, te tu ndé jéjníñu cuiti.

⁴ Ñayuu cundáhú ni chí iyó paciencia jín jñahan, te iyó mǎní ni, te tu cúcuésun ni. Te tu sánduxí, te tu sátéyí mǎá.

⁵ Tu sǎjéé ni, tu ndúcú jéé cūu mǎá-ni, tu quítí ni, tu ññuhun ni jñuhun quítí ni.

⁶ Tu cúsī ni jito jniñu néé casáha jñahan, chí sa cúsī ni jín jniñu vāha.

⁷ Ñayuu cundáhú ni chí ndihí jéhnde ni ndoho jehé jñahan, te tu jécuiñí jeē candíje

jnáhan, jíin jée ñúhun ni jeé squícu jnáhan, jíin jée jéndeýí ni jíin jnáhan.

⁸ Jnúhun cundáhú ni chí ma náá cuíti. Te quiji quiví jeé tuá nacani i jnúhun, ni tuá cahán i tijni yuhu, ni tuá jíni ñúhún jnúhun ndíchi.

⁹ Chí tu jíni vāha vāha yó vijna, te jnúhun cáncani yó suni jecu-ni cúu.

¹⁰ Te núu na quiji quiví jeé cúni yó ndihi, yucúan na te tuá coo jeé jíni yó jecu-ni.

¹¹ Ná ni cuu yó sūchi lúli te ni cahān yó, ni jeni ni yó, ni jecūhun ni yó nájñūhun sūchi lúli. Te ná ni jehnu yó te ni stóo yó modo sūchi lúli.

¹² Te suni sūcuan, jecu-ni jecūhun ni yó vijna, nájñūhun jeé jíto yó núu ñin espejo jeé tú ndijin vāha. Te cúcuéé gá te jecūhun cáji ni yó ndihi. Te vijna chí jecu-ni jíni yó, te cúcuéé gá te cuni vāha yó ndese Yaa cúu ya, nájñūhun jíni vāha ya yohó ndese ñayuu cúu yó.

¹³ Núu sūcuan te íyó úní jnúhun jeé quéndōo cutú ní cáni: Jeé candije ñihin yó jée squícu ya jeé ni jéjñūhun ya, jeé cócuhun ni yó táca jée vāha coo, jíin jée cundáhú ni yó jnáhan yó. Te jnúhun cundáhú ni chí jéhnú ndasí gá cúu nuú táca jée yāha.

Siquí jeé cácahān i tijni yuhu

14

¹ Na cóndihví ni rō cundáhú ni rō jnáhan ró, te suni condihví ni rō cacān rō táca táhū jeé jéhe Espíritu. Te tahū jeé cánuú gá cúu jeé náncani rō jnúhun ya.

² Chí tēe névāha tahū jeé cahán de tijni yuhu jeé tu jécūhun ni de, chí máá-ni Yaa Dios jíni jeé cahán de, nasūu ñayuu. Chí ni ñin i ma jecūhun ni jeé cahán de. Chí sáha Espíritu jeé cahán de táca jnúhun yisáhi.

³ Te sa suhva tēe náncani jnúhun ya, chí jíin ñayuu cahán de návāha ije i jíin jnúhun ya, te stíhví ni de i, te cáhān ndeyí ni de jíin i.

⁴ Te tēe jeé cahán tijni yuhu, chí máá-ni de ije jíin jnúhun ya. Te tēe jeé náncani jnúhun ya, chí sa suhva sáha de jeé ñayuu cácañdije ije i jíin jnúhun ya.

⁵ Nújñahan ni rī jeé ndihi ró cuu cahān rō tijni yuhu jeé tu jécūhun ni rō, te jeé cánuú ndasí gá cúu jeé náncani rō jnúhun ya. Chí jéhnú ga jniñu sáha tēe náncani jnúhun ya vesú tēe cáhān tijni yuhu. Chí núu tú tēe castūhun jnúhun cáhān de, te ma cuajniñu jeé ñayuu cácañdije.

⁶ Jeé yūcuan hermano jijnáhan ró, núu na jée rī nuú rō, te núu cahān rī tijni yuhu jeé tu jécūhun ni rō, ¿te ndé cuajniñu ún? Te núu na cáhān rī ñin jeé ni steén yā, chí ñin jeé cutūhva ró jnúhun ndaa, chí ñin jeé náncani rī jnúhun ya, chí ñin jeé steén rī nuú rō, yūcuan cúu jeé cuajniñu.

⁷ Sáha yó cuenta jeé nájñūhun instrumento música, vesú tu técu, te cuu cata, nájñūhun flauta jíin arpa. Te núu tu jíta sñin sñin nota, ¿te ndese cuni yó na yaa jíta?

⁸ Te núu corneta tu jécú cáji, te ni ñin tēe ma sátūhva de quihñ de guerra.

⁹ Te suni sūcuan rōhó jijnáhan ró, núu tu cáhān cáji ró jnúhun jecūhun ni ñayuu, ¿te ndese cuni i na vé cahān rō? Chí jnúhun cáhān rō ndíso tachí cuahān jíin.

¹⁰ Te ndaa chí íyó cuéhē yuhu ini ñayví, te táca yuhu chí íyó ñayuu jecūhun ni.

¹¹ Te núu tu jécūhun ni yó yuhu cáhān ñin tēe, te cúu yó nájñūhun tēe ñuu jicá núu tēe cáhān, te suni nájñūhun tēe ñuu jicá cúu de nuú maá yó.

¹² Jeé yūcuan rōhó jée cáncani ndasí ró ñihñ rō tahū jeé jéhe Espíritu, na cacān rō tahū jeé sáha jeé ije ñayuu cácañdije jíin jnúhun ya.

¹³ Núu sūcuan te ñayuu jeé cahán inga yuhu jeé tu jécūhun ni i, na cacān tahú i jeé cuu nacastūhñ i yuhu ún.

¹⁴ Chí núu jicán tahú yó jíin inga yuhu, te maá ánuá-ni yó cúu jeé jicán tahú, te tu ndé jéjñiñu nuú jeé níjñuni yó.

¹⁵ ¿Ndesé sáha yó núu sūcuan? Na cacān tahú yó jíin ánuá yó, te suni jíin jée níjñuni yó. Na cáta yó yaa ñi jíin ánuá yó, te suni jíin jée níjñuni yó.

¹⁶ Chí núu nácuatáhú ró máni jnúhun jeé ní quiji nuú anuá ró te tu jécūhun ni rō, núu sūcuan te tēe jíni sōho te tu jécūhun ni, ma cúu nacuatáhú de jíin ró. Chí tu jíni cuíti de na jnúhun cáhān rō.

¹⁷ Ndaa chí vāha nácuatáhú maá ró, te inga de chí tú na vé ñihñ de jeé ije de jíin jnúhun ya.

¹⁸ Na cutahú rī nuú Yaa Dios jeé cahán gā rī jíin tijni yuhu vesú maá ró jijnáhan ró.

¹⁹ Te vesú sūcuan te núu íne rī nuú cáyūcu tūtú ñayuu cácañdije, te nújñahan gā ni rī cahān rī uhūn-ni jnúhun jeé jecūhun ni i te steén nuú i, vesú jeé cahán rī uxí mil jnúhun jíin inga yuhu jeé tu jíni cuíti i.

²⁰ Hermano jijnáhan ró, ma cáni ni rō nájñūhun sūchi lúli, chí sa suhva na ije ró jée jecūhun vāha ni rō. Te coo ró nájñūhun sūchi lúli jée tu jíni i jniñu néé.

²¹ Te yósó núu tūtu ley yā jenahán: Jíin jnúhun cácahān tēe inga yuhu, jíin jnúhun cácahān tēe ñuu jicá, sáha rī jeé cúni sōho ñayuu yāha jnúhun rī. Te ni jíin sūcuan ma sáha i cuenta jnúhun cahān rī, achí maá Jítóho yó.

²² Núu sūcuan te tahū jeé cahán yó tijni yuhu, yūcuan cúu ñin jeé steén poder Yaa Dios nuú ñayuu tu cácañdije, nasūu nuú ñayuu cácañdije. Te jeé náncani yó jnúhun ya, yūcuan cúu jeé steén nuú ñayuu cácañdije, nasūu nuú ñayuu tu cácañdije.

²³ Núu sūcuan te núu ndihi ró ñayuu cácañdije cáhiyo tūtú, te táca ró cácahān sñin

sín yuhu, te quíwicoo ñayuu tu jécūhun ni jín ñayuu tu cándije, ¿te á má cahán i jeé ni canduu loco rō?

²⁴ Te núu táca ró cáncani jñūhun ya, te núu quívi ñn tēe tu cándije chí ñn tēe tu jécūhun ni, yūcuán na te nacuni de jeé tēe iyó cuéchi cúu de, te coto ndee de máá de jín jñūhun cáncani ró.

²⁵ Te nucūhun ni de táca jéé ní jeni yuhu ni de jín ánuá de. Yūcuán na te jecuíñi yití de te chíñúhún de Yaa Dios. Te cahán de jeé íne ndije Yaa Dios jín ró jijnáhan ró.

Siquí jeé yucún yíñúhún na cóo nuú ndutútú yó

²⁶ Núu súcuan hermano jijnáhan ró: Nuú cándutútú ró te táca ró coo ñn yaa í cata ró, chí ñn jñūhun stéén ró, chí ñn jñūhun jeé ni sáha Yaa Dios jeé jécūhun ni ró, chí inga yuhu jeé cahán ró, chí jéé nacastūhun ró jñūhun inga yuhu ún. Te ndihi ún na sáha ró návaha ije ñayuu cáncandije jín jñūhun ya.

²⁷ Te núu cáhíyo tēe cahán inga yuhu, te na cahán uú de chí úní-ni de, te ná ñn ná ñn de na cahán. Te suni jini ñúhún jéé nacastūhún ñn tēe jñūhun ún.

²⁸ Te núu tu iyó tēe jeé cúu nacastūhun jñūhun ún, te tēe cácahan inga yuhu, váha ga ma cahán de nuú cándutútú ró, te na cahán maá-ni de jín Yaa Dios.

²⁹ Te suni súcuan tēe cáncani jñūhun, na cahán uú de chí úní de, te sava ga ró nacani ni ró núu iyó ndáá jeé cácahan tēe ún.

³⁰ Te núu inga tēe néne ni nihín de ñn jñūhun jeé ni stéén yá nuú de, núu súcuan te tēe cahán na jecuíñi jeé cahán de, návaha cahán inga tēe ún.

³¹ Te súcuan te ná ñn ná ñn ró cuu nacani ró jñūhun jeé steén yá nuú ró, návaha cutúhva ró te coo ndeyí ni ró.

³² Te tēe cáncani jñūhun, jini ñúhún cutatáhú de jeé nacani inga tēe jñūhun te jecuíñi jeé cahán maá de.

³³ Chí Yaa Dios cuní yá jeé coo nayúú mēñū ró, násūu jéé sacá núu cuvaá ró.

Te nájnūhun cásáha táca grupo hermano cáncandije,

³⁴ suni súcuan táca ñahan cándutútú jín ñayuu cáncandije, na cóo nayúú ña. Chí tú váha jeé cahán ña, chí sa cuatáhú ña nájnūhun cahán tutu ley yá.

³⁵ Te núu cuní ña cucáhu ni ña ñn jñūhun, te nde vehe na cájnúhún ña yí ña. Chí jñūhun canu cúu jeé cahán ñn ñahan mēñū núu cándutútú ró.

³⁶ Te na sáha ró cuenta jeé tu ní quéndá jñūhun Yaa Dios nuú maá ró jijnáhan ró, te nasūu maá ñn maá ró ní cánihín jñūhun ya.

³⁷ Núu ñn tēe jéni ni de jeé tēe nacani jñūhun ya jín tēe névaha Espíritu cúu de, núu súcuan te na cuájñúhún de jeé jniñu ní ndacu Jitoho yó cúu jeé tēe ri yahá.

³⁸ Te núu tu jétáhú de jñūhun yáha, suni ma cuatáhú yó de.

³⁹ Núu súcuan, ñaní maní jijnáhan ró, na cóndihví ni ró nacani ró jñūhun ya, te ma cási ró nuú tēe cácahan sín sín yuhu.

⁴⁰ Te yúcuán yíñúhún na sáha ró táca jniñu.

Jñūhun jeé ní natecu Cristo

15

¹ Hermano jijnáhan ró, vijna te nucūhun ni ró jñūhun jnáma ya yohó jeé ní nacani ri nuú ró. Te jñūhun ún chí je ni cajetáhú ró, te suni cáhín nihín ró jín.

² Te suni jín jñūhun ún te ni jnama ya rohó, te núu cáhín nihín ró jín jñūhun ni nacani ri nuú ró, te núu tu ní cáncandije cáha ró.

³ Chí jñūhun cánuú gá jeé ni nihín maá ri ní nastéén ri nuú ró: Jeé ni jihí Cristo siquí cuéchi yó, nájnūhun je cahán tutu í nde jenahán.

⁴ Te ní quindūji ya, te ní natecu yá nuú uní quíwí, nájnūhun cahán tutu í.

⁵ Te ní nane ya nuú Pedro. Te saá te ní nane ya nuú ndihúxí gá apóstol.

⁶ Te saá te ní nane ya nuú vihyá gá uhún ciento hermano jeé cáyūcu títú. Te sava i tēcu gá nde vijna, te sava i je ní jihí.

⁷ Te saá te ní nane ya nuú Jacobo, yūcuán na te nuú ndihi ga apóstol.

⁸ Te jeé sándihí na te ní nane ya nuú maá rí. Te nájnūhun ñn jeé ní cacu yúte, súcuan cúu jeé ñn sanaa-ni te ní nduu ri apóstol.

⁹ Chí tēe núu ga nuú táca gá apóstol cúu ri, te ní nasūu tēe váha cúu ri jeé cónaní rí apóstol, chí ní jito xeén rí ñayuu cáncandije nuú Yaa Dios.

¹⁰ Te siquí jeé ni sáha Yaa Dios jeé váha ruhú, jeé yúcuán cúu ri apóstol vijna. Te jeé ni sáha ya jeé váha ruhú, chí tú cáha ní cúu, chí sa ní scáca ga rí jñūhun ya vésú táca gá tēe apóstol. Te nasūu maá rí ní sáha, chí Yaa Dios ní sáha ya jeé váha un jín rí.

¹¹ Núu súcuan te vésú ruhú chí táca gá tēe ún, súcuan cáncani ri jñūhun, te súcuan ní cacandije ró.

Jñūhun jeé natecu ndíyi

¹² Te jeé cáncani ri jñūhun Cristo jeé ní natecu yá mēñū ndíyi, ¿te naun cácahan sava ró jéé ma nátecu ndíyi?

¹³ Chí núu jeé tú natecu ndíyi, te suni tu ní nátecu Cristo nuú.

¹⁴ Te núu jeé tu ní nátecu Cristo, te cáncani cáha ri jñūhun ya nuú, te suni cáncandije cáha ró núu.

¹⁵ Chí núu jeé súcuan cúu núu, te cácuu ri tēe jeé tu cácahan ndáá jñūhun Yaa Dios, chí ní cacachi rí jeé ní nastécu Yaa Dios Cristo. Te núu jeé tú natecu ndije ndíyi, núu súcuan te tú ndáá jeé ní nastécu Yaa Dios Cristo.

16 Chi núu tú natecu ndíyí, te ni Cristo suni tu ní nátecu yá nuú.

17 Te núu tu ní nátecu Cristo, te cácanđije cáha ró te cándiso iĩ gā rō cuēchi ró nuú.

18 Te núu jeē súcuan cúu núú, te suni je ni cajnahñu ndetú ñayuu ni cacandíje Cristo.

19 Chi núu tú natecu ndíyí, te núu máá iin-ni siquí vida yáha ñuhun ni yō jeē sáha Cristo jeē váha yóhō, núu súcuan te ndahú ndasí gá cácuu yó vēsú táca gá ñayuu, chi cácanđije cáha yó nuú.

20 Te tuú chi íyó ndáa jeē ní natecu Cristo mēhñu ndíyí. Te máá yá cúu jeē xihna gā ni natecu nuú táca gá ndíyí jeē natecu.

21 Chi siquí jeē ní stívi iin-ni tēe Adán, te ni quejeé jíhí ñayuu. Te suni súcuan siquí jeē ní sáha iin-ni tēe Cristo, te natecu ñayuu.

22 Chi nájnūhun cájihí ndíhi yó siquí jeē cácuu yó yúcūn Adán, suni súcuan natecu ndíhi yó siquí jeē yíhi yó ndaha Cristo.

23 Te ná iin ná iin ndese ndíquín jnánhan máá: Xihna gā Cristo ni natecu yá, te sáa te quívi ndíji ya te natecu táca ñayuu yíhi ndaha ya.

24 Yūcuán na te jīnu tiempo, te snáa yā poder táca enemigo jeē cujēhnu jíin jeē ndácu jñiñu jíin jeē iyó poder. Te ndíhi jeē ndácu ya jñiñu nuú, nacuaña ya nuú Tatá yā Yāa Dios.

25 Chi cánuú jeē ndacu Cristo jñiñu nde quíji quívi jeē quēnde Yāa Dios poder táca jeē jíto uhú nuú Cristo, te stóho ya.

26 Te jeē sándíhí na te snáa yā cuehyi jéhni ñayuu.

27 Chi cáhán tutu iĩ jeē sáha Yāa Dios jeē cujēhnu Cristo siquí ndíhi, te cuatáhú núu yā. Te jeē cahán jeē cujēhnu ya nuú ndíhi-ni, te jíni váha yó jeē máá Yāa Dios ma quíhi ya ndaha Cristo, chi Yāa Dios cúu jeē ní chíhi táca un ndaha Cristo.

28 Te ná ni quívi ndíhi ún ndaha Cristo, yūcuán na te suni máá Cristo jeē cúu ya Sēhe, quívi ya ndaha Tatá yā, Yāa jeē ní chíhi táca un ndaha ya. Te súcuan te máá Yāa Dios jñiñi ya ndíhi-ni.

29 Te íyó ñayuu cájendute jehē ndíyí. Te núu tú natecu cuíti ndíyí, ¿te najehē cájendute i jehē ndíyí núu súcuan?

30 Te ruhū jijnánhan rí, ¿najehē cúu jeē ndíquíví cájendeyí ní rí jíto rí jñūndóho cuu rí, te núu tú natecu ndíyí?

31 Hermano, nájnūhun íyó ndáa jeē cúsiñ ní rí siquí jeē cácanđije ró Jítoho yō Jesucristo, suni súcuan íyó ndáa jeē ndíquíví nducú ñayuu cahni ruhū siquí jñiñu ya.

32 Te jeē ní ndoho rí ni casáha tēe xeēn ñuu Efeso, jeē cácuu de nájnūhun quiti xéén, ¿te na vé nihín rí siquí un núu súcuan? Chi núu tú natecu ndíyí, te cuu cahán yō nájnūhun áchí iin jñūhun: Na cúsiñ ní yō caji yō coho yó, chi sanaa te sajñē te cuu yó, achí yó nuú.

33 Ma cuáha ró jñūhun stáhú ñayuu rohó. Chi áchí iin jñūhun: Núu cájica ró jíin ñayuu neé, te stívi i róhó jeē tuá caca ndaā rō.

34 Nachuhun ni rō jijnánhan ró, te sáha ró jñiñu ndaā, te ma sáha ga rō cuēchi. Chi sava ró tu cájini cuíti rō ndese Yāa cúu Yāa Dios. Súcuan cáhán rí návāha na cúcanu rō.

Ndese natecu ndíyí

35 Te sanaa te cahán iin ró: ¿Ndese natecu ndíyí? ¿Ndese coo yiqui cúñu i? achí rō.

36 Tu jécūhun cuíti ni rō núu súcuan. Chi cúu nájnūhun jeē cátañí ró táca tata chíji ñuhun návāha nane yucú i.

37 Te tata jeē quívi chíji ñuhun, núu trigo chí inga tata, chí nasūu yúcū cúu, chí máá núní-ni cúu.

38 Te cuéé gá te cane, chí Yāa Dios ni jēhe ya yucú tata ún, ndese ni nujnahan ni maá yá, te ná iin ná iin tata chí sñn sñn cáa yucú ní sáha ya.

39 Te suni súcuan táca yiqui cúñu, chí tú inuú cándāa. Chi sñn cáa ñayuu, te sñn cáa quíti, te sñn cáa saa, te sñn cáa chácá.

40 Te suni súcuan cúu táca jeē iin andívi jíin táca jeē iyó ñayívi. Te sñn luu cáa jeē iin andívi, te sñn luu cáa jeē iyó ñayívi.

41 Te sñn ndíndēe níandii, te sñn ndíndēe yóo, te sñn ndíndēe táca quími. Te táca iin iin quími chí suni sñn sñn ndíndēe.

42 Te suni súcuan coo jíin ndíyí jeē natecu. Ndíyí jeē chíndūji yó chí téhyū, te jeē nastécu yá chí ma cúu gā.

43 Jeē chíndūji yó chí ndáhú cáa, te jeē nastécu yá chí luu cujēhnu. Jeē chíndūji yó chí tú na fuerza, te jeē nastécu yá chí coo fuerza.

44 Jeē chíndūji yó chí iin yiqui cúñu cuenta ñayívi cúu, te jeē nastécu yá chí iin yiqui cúñu cuenta Espíritu yó yá. Chi íyó yiqui cúñu cuenta ñayívi, te suni íyó yiqui cúñu cuenta Espíritu.

45 Chi súcuan yósó núu tútu iĩ: Adán, tēe xihna ñuhún, ni cuvāha de jíin vida cuenta ñayívi, áchí. Te Cristo cúu nájnūhun inga Adán uū, te máá yá cúu Espíritu jeē jēhe vida.

46 Te nasūu yiqui cúñu cuenta Espíritu cúu jeē ní cuvāha xihna gā, chí sa suhva yiqui cúñu cuenta ñayívi, te sáa te nduu cuenta Espíritu.

47 Te cuenta ñayívi cúu tēe xihna ñuhún, chí ni cuvāha de jíin tícachā ñuhun. Te Adán uū jeē cúu máá Jítoho yó, chí nde andívi ní quíji ya.

48 Te ñayuu ñayívi yáha, chí cúu i jnánhan Adán jeē ní cuvāha jíin tícachā ñuhun. Te ñayuu jeē quívicoo andívi, chí nduu i nájnūhun máá Yāa ní quíji nde andívi.

49 Chi jeē cáa yó nájnūhun tēe ní cuvāha jíin tícachā ñuhun, suni súcuan coo yó nájnūhun cáa máá Yāa ní quíji nde andívi.

⁵⁰ Jñūhun yáha cástūhun rí nuū rō jijnáhan ró, hermano, jeē yiqui cúñu yō cuenta ñayivi yáha, ma cúu quiví ñuu nuū ndácu Yaā Dios jñiñu. Chi jeē jihí cúu, te ma cúu quiví nuū cōtecu níí cáni.

⁵¹ Te cúní rí jeē na jécūhun ni rō jñūhun yáha jeē ní yisáhi: Nasūū ndíhi yó cuu, te ndíhi yó chi nasāma yiqui cúñu yō.

⁵² Chi quiví jeē cuécu sandíhi na trompeta, te ñin yachí-ni, nájñūhun ñin jeē nácuení-ni yó, te nasama ya yohó. Chi cuécu trompeta un, te natecu táca ndíyi jeē ma cúu gā i. Te táca yó jeē cátecu yō quiví ún, chi nasama ya yiqui cúñu yō.

⁵³ Chi jeē tehyú yáha, cánuú nucūhun jeē ma téhyú gā. Te jeē jihí cánuú nucūhun jeē ma cúu cuiti gā.

⁵⁴ Chi jeē jihí jeē tehyú, chi quiji quiví jeē nucūhun jeē ma cúu gā ma tehyú gā. Yūcuán na te cundaā jñūhun yósó nuū tútu ñi: Jín poder yā ni snáā yā cuehyí jéhi ñayuu.

⁵⁵ Cuehyí jéhi yóhó ¿ndese ga cuu sáha xeñ jín yó? Chi natecu yō. ¿Te ndese ga cundeyí jín yó? Chi snáā yā. Achí tutu.

⁵⁶ Chi cuéchi cúu jeē sáha jeē cūndeyí cuehyí jéhi ñayuu. Te ley yā jenahán sáha jeē náne cuéchi siquí yō.

⁵⁷ Te na cútahū yō nuū Yaā Dios, chi jín máá Jítoho yō Jesucristo sáha ya jeē cūndeyí yó siquí cuéchi jín siquí jñūhun cuu yō.

⁵⁸ Jeē yúcuán, ñáni máni, cuiñi ñihin ró te ma cáca yátá ró jijnáhan ró. Te níni na sájñiñu váha ró jín jñiñu máá Jítoho yō. Chi je cájini rō jeē tu cásájñiñu cáha ró jín máá Jítoho yō.

Siquí jeē cáquin i xūhún cuu táca hermano

16

¹ Te vijna te cahán rí siquí xūhun jéé cáquin rō cuu hermano cácandíje cándoho ndáhú. Suni na sáha máá ró jijnáhan ró nájñūhun ni ndacu rí nuū táca grupo ñayuu cácandíje ichi Galacia.

² Táca domingo te ná ñin ná ñin ró chuváha sñn rō jecu xūhún, núu ndese ni ñihin máá ró, náváha quiví jeē jinú rí nuū rō te je iyó túhva.

³ Te jeē jeé rí, te cuáha rí carta nuū táca téé jeé nácaji ró, te tají rí de quingoo de nuū táca hermano cáyūcu Jerusalén, quisiáha de xūhun jéé ní casocō rō.

⁴ Te núu iyó váha jeē quihín rí, te suni quihín rí jín de jijnáhan de.

Jeē cahán Pablo siquí jeē quicondéhé de ñayuu cácandíje

⁵ Te jeé jeé rí nuū rō jijnáhan ró, te jini ñūhún jeé xíhna gā jeé rí región Macedonia, yūcuán na te jeé rí ñuu rō Corinto.

⁶ Te sanaa te quendōo rí jín ró jijnáhan ró jecu tiempo, chí sanaa te coyūcu yó níí

tiempo mñjin. Yūcuán na te cuu chindéé ñáhán ró ruhū, núu ndé chi quihín tucu rí.

⁷ Chi tu cúní rí jeé rí nuū rō vijna te yáha yachí rí quihín rí, chi ñūhun ni rí jeé quendōo rí jín ró jecu tiempo, te núu cuáha Jítoho yō jñūhun.

⁸ Te cone rí ñuu Efeso yáha nde na yáha quiví Pentecostés.

⁹ Chi coo cuehé ñayuu scandíje rí, te váha quihín jñiñu Jítoho yō. Te suni iyó cuehé ñayuu cácuu contra.

¹⁰ Te núu na jéé Timoteo, te sáha ró jéé coo sñ ni de mēññu ró, te ni ñin ma cáni ni de siquí. Chi suni jñiñu máá Jítoho yō sáha de, nájñūhun máá rí.

¹¹ Núu súcuán te ni ñin ró má sajéé ni rō nuū de. Chi sa suhva chindéé ñájñáhan ró jín de jeé na quihín gā de, te coo ndeyí coo sñ ni de, náváha ndíji de coto jñáhan rí jín de. Chi ruhū jín sava ga hermano cándetu rí de.

¹² Te hermano Apolos chi ni cahán ndahú rí jín de jeé na jéé de jín sava ga hermano, condéhé de róhó. Te ni jeni ni de jeé ma cúu jeé de vijna. Te núu na núne de te jeé de.

Saludo jeé sándíhi

¹³ Ndíto coo ni rō jijnáhan ró, te cuiñi ñihin ro jín jñūhun cácandíje ró. Te téyi na cóo ni rō, te na cóo fuerza ñi rō.

¹⁴ Te táca jéé casáha ró, na sáha ró jín jñūhun cūndáhú ni jñáhan.

¹⁵ Hermano, cájini rō jeé xíhna gā ñayuu vehe Estéfanos ni cacandíje ichi Acaya. Te ni cajéhe i máá i nuū jñiñu jeé chindéé ñáhán i táca hermano cácandíje.

¹⁶ Te cúní rí jeé suni máá ró jijnáhan ró, cuatáhú váha ró ñayuu casáha súcuán, jín táca ñayuu cachindéé ñájñáhan te cásájñiñu siquí jñiñu ya.

¹⁷ Cúsñ ni rí jeé ní quijicoo Estéfanos jín Fortunato jín Acaico, chí téé yáha ni caje-jñiñu de nuú rí jehé rō jeé tu ní cáhíyo ró jín rí.

¹⁸ Chi ni ndundeyí ni rí, te suni súcuán máá ró jijnáhan ró, ni casáha de. Te cánuú cuajñūhún ró táca téé cándāa súcuán.

¹⁹ Sándeyí ni rō jijnáhan ró, achí táca grupo ñayuu cácandíje cáyūcu Asia. Aquila jín Priscila jín ñayuu cácandíje jeé cándutútu vehe de, cácahán i jeé sándeyí ndasí ni rō jín jñūhun máá Jítoho yō.

²⁰ Te táca hermano cácahán i jeé sándeyí ni rō. Te jeé cahán rō jín táca jñáhan, te yíñūhún techūhu ró ndaha i.

²¹ Ruhū Pablo, jín ndaha máá rí téé rí jñūhun yáha jeé na sándeyí ni rō jijnáhan ró.

²² Te núu ndé ñin tu iyó máni jín Jítoho yō Jesucristo, te na jñáñú ndetū i núu súcuán. Te na cahán yō: Jítoho ná, cúní na jéé yachí ndíji ní.

²³ Te ñūhun ni rí jeé máá Jítoho yō Jesucristo na sáha ga yá jeé váha róhó jijnáhan ró.

²⁴Te manī rī jīn ró jijnáhan ró jéē cácadje
ró Cristo Jesús. Súcuan na cóo. Amén.

CARTA UU JEE NI TEE SAN PABLO APOSTOL NUU ÑAYUU ÑUU CORINTO

¹ Máá rí cúu Pablo, apóstol Jesucristo, chi súcuan ni nujnahan ni Yaā Dios ni taji yá ruhū nacani ri jñūhun ya. Te ndindúú rí jíin hermano yō Timoteo cátee ri carta yáha cuájeē nuū rohó hermano ñuu Corinto jeē cácañdije ró Yaā Dios, jíin nuū ndihi rōhó jēē cáyihí ndaha Yaā Dios jeē cáyūcu n# cáhnu Acaya.

² Te cáñuhun ni rí jeē Tatá yō Yaā Dios jíin Jítoho yō Jesucristo na sáha ga yā jeē váha rōhó te sáha ya jeē coo ndeyí coo sñ ni rō.

Siquí jeē ní ndoho Pablo jñūndóho

³ Na cáhán yō jeē yóhoyo cújéhnu Yaā Dios, Yaā cúu Tatá maá Jítoho yō Jesucristo. Chi máá yá cúu Tatá yō jeē cundáhú ni yohó, te níní sáha ya jeē ndúsñ ni yō.

⁴ Chi sáha ya jeē ndúsñ ni yō siquí táca jñūndóho ndóho yó, návaha suni cuu sáha máá yó jeē ndúsñ ni jñáhan yó jēē cándoho jñūndóho. Chi nájñuhun ni sáha ya jeē ndúsñ ni maá yó, suni súcuan sáha yó jēē ndúsñ ni i.

⁵ Chi jeē ndóho yó cuehē jñūndóho nájñuhun ni ndoho Cristo, suni súcuan nihñ ni yó cuehē jñūhun ndúsñ ni, sáha Cristo.

⁶ Jeē yúcuan núu cándoho ri jñūndóho te súcuan te cuu sáha ri jeē ndúsñ ni rō te quendō vāha ga anuá rō. Te jeē sáha Yaā Dios jeē ndúsñ ni rí, suu sáha tucu jeē ndúsñ ni maá ró, te quendō vāha ga anuá rō. Te súcuan te nihñ rō fuerza jeē cuāndeyí ni rō jíin táca jñūndóho nájñuhun cándoho rí.

⁷ Te cáñuhun ndasi ni rí jeē cúu rōhó, chi cájini rí jeē nájñuhun cándoho ró jñūndóho jíin rí, suni súcuan ndúsñ ni rō jíin rí sáha máá Yaā Dios.

⁸ Hermano, cácuni rí jeē na cúni rō jíinánhan ró ndese ni candoho rí ichi Asia. Chi yóhoyo xeēn jñūndóho ni cajito rí, nde je yajni tuá canda rí, te ni jeni ni rí jeē cuu rí nuū.

⁹ Te siquí jeē ní cajehnde ni rí cuu rí, te yúcuan ní sáha jeē ní cajecūhun ni rí jeē ma tēnuū rí maá rí chí tú jñiñu rí, chí sa suhva Yaā Dios jeē nastécu ndíyí tenuū rí.

¹⁰ Chi máá yá ni scácu ruhū jíinánhan ri nuū jñūndóho xeēn jeē jé yajni cuu rí nuū, te suni súcuan scácu ya ruhū víjna. Te ñúhun ni rí jeē suni scácu tucu ya ruhū ichi núú gā.

¹¹ Te suni na chindéé ñáhán ró ruhū jíinánhan rí jeē cacān tahú ró jehē rí. Chi núu cuehē ñayuu cacān tahú jehē rí, te suni cuehē i cuu nacuatáhú jehē rí jeē ni sáha ya jeē váha ruhū.

Jeē ní cucuéé Pablo quihñ de ñuu Corinto

¹² Iyó ñin jeē sáha jeē cácusñ ni rí: Chí váha iyó ni anuá rí jeē váha ndoo te ndaā ni cajica

ri nuū ñáyuu ñayíví, te víhyá gā nuū maá ró jíinánhan ró. Chí siquí jeē váha ni Yaā Dios, te ni chindéé ñáhán yá ruhū, te nasūu siquí jēē ndichí máá rí cúu jeē ní cajica ri súcuan.

¹³ Te jñūhun cátee ri nuū táca carta rí, chí máni jeē cúu cahu ró te jecūhun ni rō cúu. Te ñúhun ni rí jeē jecūhun vāha ga ni rō,

¹⁴ nájñuhun je cájecūhun ni rō jecu. Te súcuan te cuu cusñ ni rō siquí rí quiví ndíji Jítoho yō Jesús, nájñuhun cácusñ ni rí siquí maá ró.

¹⁵ Te siquí jeē súcuan ni cucáhnu ni rí, te jeē yúcuan ní jeni ni rí jeē núu na quihñ rí Macedonia te jeē rí nuū maá ró xihna gā, návaha cusñ ni rō jeē jécondēhe rí rohó úu jínu núú.

¹⁶ Chí ni jeni ni rí jeē jécondēhe rí rohó, te yāha ri quihñ rí Macedonia, te jeē nándicó rí Macedonia te ndíji tucu ri nuū rō. Yūcuán na te cuu chindéé ñáhán ró ruhū jeē quihñ rí ichi Judea nuū.

¹⁷ Te jeē súcuan ni jeni ni rí, ¿te á téé tu nacani vāha ni cúu ri jeē tu ní jéé rí nuū rō, chí naún? ¿A cájini ni rō jeē cúu ri nájñuhun ñayuu ñayiví jeē yachí cahán jeē cuu, yūcuán na te tuú, chí naún?

¹⁸ Tuú chí máá Yaā Dios jíni yā jeē tu cáhán ri jíin ró jeē cuu, te yachí nacáhan rí jeē ma cúu.

¹⁹ Chí ruhū jíin Silvano jíin Timoteo ni canacani ri jñūhun Jesucristo Sēhe Yaā Dios nuū ró jíinánhan ró. Te máá yá tu cáhán yā jeē cuu te nacáhan tucu ya jeē ma cúu. Chí squícu ya jeē cahán yā.

²⁰ Chí ndihi jeē ní jéjñuhun Yaā Dios, squícu máá Cristo. Te jeē yúcuan cácahan yō jeē yóhoyo luu cújéhnu Yaā Dios, te cácahan yō Amén, chí ndihi squícu Cristo Jesús.

²¹ Te Yaā Dios cúu jeē sáha jeē ruhū jíinánhan ri jíin rōhó jíinánhan ró, cáhñin nihñ yó jíin Cristo, te ni sándoo ya yohó jēē cuajniñu yó núú yā.

²² Te suni ni jēhe ya Espíritu yā jeē cóndee ini anuá yō, te cúu ya nájñuhun ñin sello jeē steén jeē cúu yó sēhe Yaā Dios. Te sáha Espíritu jeē iyó ndaā ni yó jeē cuāha Yaā Dios tahū yō.

²³ Te jeē ná tu jeē rí nuū rō ñuu Corinto, nájñuhun ni jeni ni rí, suu cúu siquí jeē tu ní cúni rí cuxeēn rí nuū rō jeē tu cásáha vāha ró. Te máá Yaā Dios cúu Yaā jíni jeē cahán ndaā rí. Te iyó váha jeē na cúu rí te núu tu cáhán ndaā rí.

²⁴ Te nasūu jēē cácuni rí ndacu nihñ ri jñiñu nuū rō siquí jñūhun cácañdije ró yá, chí je cáhñin nihñ rō jíin jñūhun ún. Chí sa suhva cácuni rí chindéé ñáhán rí rohó jēē na cúsn gā ni rō.

2

¹ Núu súcuan te ní jeni ni rí jeē ma jéé rí inga jínu nuū rō jíin jñūhun cuxeēn rí te

cucuíhyá ni rō sáha ri.

² Chi núu cucuíhyá ni rō sáha ri, ¿te ndé ñáyyuu sáha jeé cusíi ni maá rí? Tuá na inga ñáyyuu, chí máni maá róhó, te ndese cuu te núu ni sáha ri jeé cucuíhyá ni rō.

³ Te jeé yúcuau cúu jeé ní tee ri carta un núu rō, náváha nacani ni rō siquī cuéchi rō sáha, te ma cucuíhyá ni rī sáha cuéchi rō quívi jeé rī nuū rō. Chi sa suhva sáha rō jéé cusíi ni rī. Te jíni vāha ri jeé núu cusíi ni rī, te suni ndíhi rō jíjnáhan rō cusíi ni rō.

⁴ Te jeé ní tee ri carta un núu rō, te yōhyo ni nacani ni rī siquī rō, te ní jnahuhú ni rī, te ndé ndahyú rī ni tee ri. Te tu ní tée ri jeé sáha ri jeé cucuíhyá ni rō, chí sa suhva náváha cuni rō ndese yōhyo maní rī jíni rō.

Jeé íne cáhnu ni Pablo nuū tée ni sáha cuéchi

⁵ Te jeé ní cucuíhyá ni rī ni sáha tée jeé ni sáha cuéchi ún, te nasūu máá-ni rī, chí suni nde máá rō jíjnáhan rō ni sáha de jeé ní cucuíhyá ni rō jecu. Te cáhán rī jeé jecu-ni, chí tu cúni rī cuxeēn ndasí rī.

⁶ Te jíni jéé ní cacuxeēn rō nuū de ná ni candutútú rō, te jíni yúcuau-ni te ni cuu-ni.

⁷ Te víjna chí jíni ñúhún jeé cóne cáhnu ni rō nuū de, te sáha rō jéé ndúsíi ni de, chí sanaa te caa ga cucuíhyá ni de, te ma ndúsíi gā ni de.

⁸ Núu súcuau te cáhán ndahú rī jíni rō jíjnáhan rō jéé steén tucu rō jéé iyó máni rō jíni de.

⁹ Chi jeé siquī jniñu yáha cúu jeé ní tee ri carta un núu rō, náváha coto ndee rī rohó núu cuatáhú vāha rō jniñu ndácu ri nuū rō.

¹⁰ Núu súcuau te núu íne cáhnu ni rō nuū ñáyyuu, te suni súcuau ruhú. Chi jeé íne cáhnu ni rī nuū ñáyyuu núu ni sáha i cuéchi, te sáha rī súcuau siquī jeé maní rī jíni rō jíto jíni rō Cristo.

¹¹ Chí cánúu cone cáhnu ni yō, chí tu cúni yō jeé nihín Satanás cuéchi siquī yō, chí je jíni vāha yō ndese ndúcu un stáhú yóhó sáha yō cuéchi.

Jeé tu ní íyo nayúú ni Pablo ini ñuu Troas

¹² Ná ni jehēn rī ñuu Troas jeé nácani ri jñuhun Jitoho yō Cristo, te vāha ni sáha ya jeé ni íyo modo jeé nácani ri jñuhun ya.

¹³ Te vésú súcuau te tu ní íyo nayúú ni anuá rī, chí tu ní njnáhan ri jíni hermano yō Tito. Yúcuán na te ni nacuatáhú rī nuū ñáyyuu yúcuán, te cuananducú rī de ichi Macedo-nia.

Jñuhun jeé cujéhnu ndúú yó jíni Cristo

¹⁴ Te na cútahú yō nuū Yaa Dios, chí níni ndéca vāha ya yóhó cuángoo yó jíni Cristo Jesús, te ndúú yó jíni yá jeé cujéhnu ndasí yá snáá yá poder ndíhi enemigo yá. Te jéjníñu ya yóhó jéé scuité núu yó jñuhun ya táca-ni lugar, nájnühun jíte núu ñin xicō asín.

¹⁵ Te cúu yó nájnühun ñin sūje jeé jeén asín nuū Yaa Dios sáha Cristo. Te nájnühun jeé jíni xicō un núu ñáyyuu cācu ánuá jíni núu ñáyyuu jnahū ndetū.

¹⁶ Nuū ñáyyuu jnahū ndetū chí cúu yó nájnühun ñin xicō jeé cúu i sáha, te nuū ñáyyuu cācu ánuá chí cúu yó nájnühun ñin xicō vāha jeé cótecu i sáha. Te ni ñin yó ma cánda yó sáha yó jniñu yáha, te núu ma chindéé ñáhán yá yóhó.

¹⁷ Te ruhú jíjnáhan ri, tu cásáha ri nájnühun cásáha cuehē tēe jeé cánducú de nihín de xūhun siquī jñuhun Yaa Dios. Chí sa cánacani ndaā rī jñuhun ya, chí máá Yaa Dios ni táj rúhū, te máá yá jíni jeé cánacani ndaā rī siquī jeé cáncandíje ri Cristo.

Jñuhun siquī contrato jeé

3

¹ Te jeé cácahán rī súcuau, ¿te á cájeni ni rō jeé cánducú tucu ri cáhán rī jeé vāha ga tēe cácuu ri, chí naún? ¿Te chí jíni ñúhún jeé steén rī carta recomendación nuū rō, chí jéé cacán rī cuāha rō núu rī jíjnáhan ri, nájnühun cásáha sava i?

² Tuú chí máá-ni rō cácuu nájnühun ñin carta recomendación rī. Te jeé ñúhún ni rī jeé ní cacandíje vāha rō ni sáha ri, suu cúu nájnühun jeé yosó jñuhun carta un ini anuá rī. Te ndíhi ñáyyuu chí nájnühun cáhu i, cúu jeé jíni i ndese ni nasāma rō.

³ Chí máá rō cácuu nájnühun ñin carta jeé ní tee Cristo te cáscaca ri. Te nasūu jíni tinta ni tee ya, chí sa suhva jíni Espiritu Yaa Dios, Yaa técu. Te nasūu núu tabla yuū nájnühun ni tee ya ley yá, chí sa suhva nuū anuá ñáyyuu ni tee ya.

⁴ Te cácahán rī súcuau, chí cácuacáhu ni rī Yaa Dios siquī jeé ni sáha Cristo.

⁵ Te nasūu jéé cájeni ni rī jeé cúu canda máá rī sáha ri jniñu ún. Chí sa suhva máá Yaa Dios sáha jeé cuu squícu rī.

⁶ Te máá yá ni sáha jeé cuu cuajníñu vāha ri siquī contrato jeé yá. Te contrato yáha tu cáhán jeé squícu yó ley jeé ní tee jíni letra, chí sa suhva jeé caca yó jíni vida jeé, suu jeé ni jéhe Espiritu yá. Chí contrato ley jeé yosó jíni letra, jnahū ndetū ñáyyuu sáha. Te jeé sáha máá Espiritu cúu jeé cótecu yó níf cáni.

⁷ Te ley jenahán jeé ni jéhe ya nuū Moisés, ni yosó letra nuū tabla yuū. Te yōhyo ni cujéhnu, te ni ndíndéé ndasí ni sáha, te nde Moisés ndíi nuū de ni sáha. Te tu ní cúu coto vāha ñáyyuu Israel nuū de ni sáha. Te vésú súcuau te cuéé-ni cuéé-ni ni ndahvā jeé ndíndéé núu de. Te núu súcuau ni cujéhnu ndasí ley jeé sáha jeé cuu ñáyyuu te jnahū ndetū i,

⁸ te sa víhyá gā cujéhnu ndasí gā jñuhun cotecu yó jeé jéhe Espiritu nuū yó.

⁹ Chi núu yōhoyo ni kujéhu ley un jée jnahnú ndetú ñayuu sáha, te sa víhyá gá kujéhu jnūhun jeē ndáhva Yaā Dios cuēchi yó.

¹⁰ Chi ley un jée ní kujéhu nde saá, tuá kujéhu cuití, siquī jeē kujéhu ndasí gá jnūhun Espírítu jeē iyó vijna.

¹¹ Te núu súcuan ní kujéhu ley jeē ní iyo jecu-ni tiempo, te sa kujéhu ndasí gá jnūhun jeē coo ní cáni.

¹² Te jeē súcuan cáñuhun ni rī, jeē yúcuan cáñhoyo téyí ni rī nácani rī jnūhun yáha.

¹³ Chi tu cásáha rī nájñuhun ní sáha Moisés jeē ní jesi de ññ sahma nuū de, náváha tú coto ñayuu Israel ndese cuandahvā jeē ní ndíndēe núu de.

¹⁴ Te ñayuu ún tu ní cájēcūhun ni i. Te nde vijna núu cácahu ñayuu Israel tutu contrato ley jenahán, suni tu cájēcūhun ni i, chi nájñuhun jési sahma un núu jeē níjñūní i, te tu cújiyo cuití. Chi nde jeē candíje i Cristo, yúcuán na te cújiyo.

¹⁵ Te suni súcuan nde vijna núu cácahu i tutu ley Moisés, te nájñuhun jeē jési ññ sahma nuū jeē níjñūní i.

¹⁶ Te jeē násáma ññ ññ ñayuu quívi i nuū maá Jítoho yō Cristo, yúcuán na te cújiyo-ni jeē jési ún.

¹⁷ Chi Jítoho yō cúu maá Espírítu. Te nuū ññ Espírítu maá Jítoho yō, yúcuan cúu nuū iyó libre ñayuu jeē tuá yíhi i chíji ley jenahán.

¹⁸ Te jeē yúcuan maá yó jijnáhan yó, tuá jési nuū jeē níjñūní yō. Chi cácuu yó nájñuhun espejo jeē jéhe nduva, cúu jeē cájica ndaá yō te suu stéén ndese yōhoyo luu cújéhu maá Jítoho yō. Te maá yó táca quívi cuanasáma yó cuanduu luu ga anuá yō nájñuhun cáa maá yá. Chi maá Jítoho yō jeē cúu ya Espírítu, súcuan sáha ya jíin yó.

4

¹ Núu súcuan te tu ndínuu ni rī cáncani rī jnūhun ya. Chi siquī jeē ní cundáhú ni yā ruhū jijnáhan rī te ní jéhe ya jñiñu yáha nuū rī.

² Te tu cásáha rī jñiñu neé jée cúcanu yō sáha, ní tu cájica cuu rī jíin jnūhun ndíchí stáhú, ní tu cásama rī jnūhun Yaā Dios. Chi sa suhva cácahān rī máni jnūhun ndaā. Te súcuan te cuu cuni táca ñayuu ññ anuá i jeē cácahān ndaā rī jito jíinúu Yaā Dios.

³ Te núu iyó ñayuu tu jécūhun ní jnūhun jnama ya yohó jée cáncani rī, te súcuan cúu nuū máni maá ñayuu jnahnú ndetú.

⁴ Te jeē tu cáncandíje i, te maá jéxeén jeē ndácu jñiñu ññ ñayví yáha, ní jesi nuū jeē níjñūní i, náváha ma ndíndēe jnūhun Cristo ññ anuá i, te ma cūni i jeē yōhoyo luu cújéhu Cristo, Yaā jeē ínuu cáa jíin Yaā Dios.

⁵ Te jeē cáncani rī jnūhun, te nasūu jnūhun maá rí, chi sa suhva jnūhun Jítoho yō Jesucristo cáncani rī. Te maá rí chi cácuu rī

mozo-ni nuū rō jijnáhan ró jée siquī jeē maní rī jíin Jesús.

⁶ Chi ná ni sáha Yaā Dios ñayví te ni cahān yā jeē na cundíjin nuū neé. Te suni súcuan ní sáha ya jeē ní cundíjin nuū anuá yō jée cájēcūhun ní yō siquī Jesucristo, ndese ndíndēe núu yā, cúu jeē yōhoyo luu cújéhu ya nájñuhun cúu Yaā Dios.

Jeē cándiquñ yō jnūhun cáncandíje yó yá

⁷ Te táca jnūhun yáha jeē yōhoyo luu cújéhu, chí nájñuhun jeē ññuhun ññ ññ quísi ññuhun. Chi cácuu yó nájñuhun quísi ññuhun, chí tú na fuerza yō. Te jeē yúcuan cájini vāha rī jeē maá Yaā Dios cúu jeē jéhe poder siquī jnūhun yáha jeē yōhoyo luu cújéhu, te nasūu fuerza maá rí cúu.

⁸ Te jeē yúcuan, vésú táca lado cájito rī jññndóho, te tu sáha jeē ma ndúsí gá ni rī. Te vésú cácuuhyá ni rī siquī jññndóho, te cáñuhun ni rī jeē quee vāha jñiñu rī.

⁹ Te vésú cájito xeēn ñayuu ruhū, te maá yá tu stóo ya ruhū jijnáhan rī. Te vésú cáducú i snáá i ruhū jíin jñiñu sáha rī, te ma cúu.

¹⁰ Te ndé-ni cúu núu cuángoo rī, te nájñuhun ni ndoho Jesús jeē ní jíhi yā, suni súcuan cándoho rī jeē jé yajni cuu rī, náváha suni cuu stéén rī fuerza Jesús jeē técu yā ññ yiqui cúñu rī.

¹¹ Chi jeē níni cátecu rī, te táca quívi je yajni cahni ñayuu ruhū jeē siquī Jesús. Te súcuan te cájito ñayuu jeē técu Jesús ññ yiqui cúñu rī jeē cúu.

¹² Núu súcuan te ruhū jijnáhan rī, níni cúu jeē jé yajni cuu rī siquī jnūhun ya, te yúcuan sáha jeē cotecu maá ró ní cáni jijnáhan ró.

¹³ Te yósó núu tútu ññ: Ní candíje rī te jeē yúcuan ní cahān rī, achí. Te suni jeē cáncandíje maá rí cúu jeē cáncani rī jnūhun ya.

¹⁴ Chi cájini rī jeē maá Yaā jeē ní nastécu Jítoho yō Jesús, suni súcuan nastécu yā ruhū, te sáha ya jeē ññ cáhu ni cuiñi ndíhi yó núu yā.

¹⁵ Chi táca jññndóho yáha cándoho rī náváha coo vāha ró jijnáhan ró. Te súcuan te cayá cuehē gá ñayuu jeē sáha ya jeē vāha i. Yúcuán na te suni yōhoyo cuehē i nacuatáhú i nuū Yaā Dios, te kujéhu ga yā sáha.

¹⁶ Jeē yúcuan cúu jeē tu ndínuu ni rī, te vésú cuandíhi fuerza yiqui cúñu rī, te sa suhva cuanduu fuerza gá anuá rī táca quívi.

¹⁷ Chi jññndóho jeē ndóho yō ñayví yáha, tú-ni xeēn cúu, te yachí yáha. Te sáha jeē níhin yō ññ tahū jeē kujéhu yó ní cáni jeē cáa ndasí gá vésú jññndóho ún.

¹⁸ Te tu táññuhun yó nuū táca jññndóho jito yó núu vijna, chí sa suhva táññuhun yó nuū táca jée vāha jeē tu jito yó núu vijna. Chi táca jée jito yó núu vijna, chí yachí ndíhi, te táca jée tu jito yó núu, chí coo ní cáni.

5

1 Chi yiqui cūñu yō jeē ndeé yó ñáyivi yáha, cúu nájñuhun ñin vehe jeē náa. Te cájini yō jeē núu na náa, te cuáha Yaá Dios ñin yiqui cūñu jeé, te suu cúu nájñuhun ñin vehe jeé coo ní cáni ichi ándivi. Te nasúu ñin vehe jeé sáha ñayuu cúu, chi jeé sáha Yaá Dios cúu.

2 Te níni jée ndeé yó vehe yáha jeé cúu yiqui cūñu yō, te cájitú ni yō sáha, chi yōhyo cúní yō jeé núcūhun yó yiqui cūñu jeé yó nde andívi.

3 Chi jeé núcūhun yó un, te ma cóo máa na anauá yō jeé náa yiqui cūñu yō yáha.

4 Chi níni jée iyó gá yō ñi vehe yiqui cūñu yō yáha, te jítú ni yō te cúcuíhyá ní yō. Te nasúu jée cuní yō jeé stóo yó yiqui cūñu yō te coo máa-ni ánuá yō. Chi sa suhva cúní yō núcūhun yó jée jeé, náváha ndahvá yiqui cūñu yō jeé náa, te coo máa jée cótecu ní cáni.

5 Te Yaá Dios cúu jeé ni sáha ya jeé súcuan coo yó. Te ni jēhe ya Espiritu yá jeé cóndee ñi anauá yō, te sáha Espiritu jeé iyó ndáa ni yō jeé cuáha Yaá Dios tahú yō.

6 Núu súcuan te níni cúu jeé cácuacáhu ni rí. Chi cájini rí jeé níni ndeé gá rí chíji yiqui cūñu yáha, te jícá cúu rí jíin núu ndeé máa Jítoho yō.

7 Chi vijna chi cácuacáhu rí jeé iyó yá jíin rí, vésú ná tu coto rí nuú yá.

8 Te cácuacáhu ni rí, chi sáha rí cuenta jeé váha ga núu na quénda rí chíji yiqui cūñu yáha te quihñ rí condee rí jíin máa Jítoho yō.

9 Jeé yúcuán cúu jeé cánducú ndéyí rí sáha rí jeé cusú ni yá jíin rí, vésú núu ndeé gá rí yiqui cūñu rí chí vésú núu condee rí jíin yá.

10 Chi cánuú jée ndíhi yó cuiñi yuhu mesa Cristo jeé sándaá yá jñiñu yó. Te ná ñin ná ñin yó níñin yó siquí ndese ni casáha yó, á jée váha chí jée neé, ná ni condee yó chíji yiqui cūñu yō.

Siquí jeé ndávicoo yó núu jñuhun maní Yaá Dios jíin yó

11 Núu súcuan te cándiso ñyo rí nuú máa Jítoho yō, te jeé yúcuán ndúcú ndéyí rí scandíje rí ñayuu. Te jíni Yaá Dios jeé cáhíyo ndáa rí, te ñuhun ni rí jeé suni súcuan cájini máa ró.

12 Te nasúu jée cánducú tucu rí cahán rí jeé váha ga tée cácuu rí, chí sa suhva cástūhun rí jeé cuu cusú ni ró jeé siquí rí jíinánhan rí. Te súcuan te cuu stíó cufñí ró nuú ñayuu jeé cutéyí i siquí ndese cáa ñayuu, te tu sáha i cuenta ndese cáa ñi anauá ñayuu.

13 Te va sanaa te cájeni ni ró jeé tée loco cácuu rí jeé cácahán rí súcuan. Te siquí jeé cándihví ni rí jehé Yaá Dios cúu. Te tuú chí cáhíyo váha xiní rí, te jeé yúcuán cájejníñu rí jeé quéndōo váha ró.

14 Chi siquí jeé ní cundáhú ni Cristo ruhú jíinánhan rí cúu jeé cánuú nacani rí jñuhun ya. Chi cájini váha rí jeé ni jíhi mañúhún-ni ya

jeé siquí ndíhi yó, te jeé yúcuán nájñuhun ni jíhi ndíhi yó jíin yá.

15 Chi ni jíhi yá jeé siquí ndíhi yó náváha táca yó jée técu, ma cótecu ga yō jeé sáha yó jée cuní máa yó, chí sa suhva jeé cuní máa yá jeé ni jíhi yá te ni natecu yá jeé siquí yō.

16 Jeé yúcuán tuá casáha rí cuenta ndese-ni cándaá ñayuu, nájñuhun casáha ñayuu ñayiví. Te vésú súcuan ni casáha rí cuenta siquí Cristo nde saá, jeé ñin tēe-ni cúu ya, te vijna chí cájini rí jeé cúu ya Sēhe Yaá Dios.

17 Chi núu ñin ñayuu yñi i ndaha Cristo, te je ni ndujeé i. Te táca modo neé ní neváha i, je ni yáha cuahñ, te vijna je ni ndujeé ndíhi.

18 Te Yaá Dios cúu jeé sáha ndíhi jeé yáha, chí jíin Cristo ni sáha ya jeé ní ndávicoo yó núu jñuhun maní yá jíin yó. Te ni tejñiñu ya ruhú jeé cáncani rí jñuhun jeé ndávicoo ñayuu nuú jñuhun maní yá jíin i.

19 Chi jíin Cristo te ni sáha Yaá Dios jeé ñayuu ñayiví ndávicoo i nuú jñuhun maní yá jíin i. Te tu ndácunehen ya cuéchi ni casáha ñayuu. Te ni tejñiñu ya ruhú jeé cáncani rí jñuhun yáha ndese ndávicoo i nuú jñuhun maní yá jíin i.

20 Núu súcuan te cácuu rí tēe cájica jñiñu máa Cristo. Te jeé cahán rí, te nájñuhun jeé máa Yaá Dios cahán ndahú yá jíin ró. Núu súcuan te cácahán ndahú rí jíin ró jeé cahán Cristo, jeé na ndávicoo ró núu jñuhun maní Yaá Dios jíin ró.

21 Te Cristo, vésú tú ni ñin cuéchi ya, te ni sáha Yaá Dios jeé ni nucondee cuéchi yó siquí yá. Te súcuan te yóhó jée yñi ndaha Cristo, ni nucondee siquí yó jeé iyó ndáa yó nájñuhun iyó ndáa Yaá Dios.

6

1 Núu súcuan te siquí jeé cácuu rí tēe casájniñu jíin yá, te cácahán ndahú rí jíin ró jeé ma stóo uun ró jñuhun jeé ni sáha Yaá Dios jeé váha róhó.

2 Chi áchí yá nuú tútu ñi:

Máa tiempo cuní máa rí te cuní sōho rí jñuhun cahán ndahú ró jíin rí.

Te máa tiempo jnáma rí ñayuu, te jnama rí rohó.

Achí yá. Te vijna-ni cúu máa tiempo jeé cuní yá, chí vijna-ni cúu tiempo ni quiñi Yaá jnáma yóhó.

3 Te cánducú rí jeé ma sáha rí ni ñin jñiñu jeé casi jeé candíje ñayuu, náváha ma cahán i siquí jñiñu ndíso rí.

4 Chí sa suhva cánducú rí jeé ndíhi jeé sáha rí, steén jeé cácuu rí tēe cájejníñu nuú Yaá Dios. Jeé yúcuán cájendeyí ni rí jíin jée ndóho rí jñúndóho, jíin jée cúmani nuú rí, jíin jée yíi sáha jíin rí.

5 Chí ni ñyo tíjni jinu jeé ní cacani i ruhú, jeé ní cachune i ruhú vecáa, jeé ní candonda i siquí rí, jeé ní casájniñu níhin rí, jeé ní

cajehni rī māhna máá rí, jeē ní cahīyo ndite ni rī.

⁶ Te suni cánducú rí jeē cuajnúhún i ruhū siquī jeē ndoo cájca ri, te cájecūhun vāha ni rī jnúhun ndaā, te cáhīyo paciencia ni rī, te vāha ni rī, te ndéé Espíritu Santo ini rī, te cákundáhú ndije ni rī jnáhan rī.

⁷ Te cánacani ndaā rī jnúhun, te poder Yaā Dios íne jíin rí. Te jíin jnúhun ndaā cándahva rī táca jniñu néé, chí nájñuhun jeē cájejnáhan rī siquī. Chí nájñuhun jeē ndónnda un siquī rī te ndónnda rī siquī.

⁸ Iyó jínu yíñhún ñayuu jíin rí, te iyó jínu tuú. Iyó jínu jéjñuhún i ruhū, te iyó jínu cácahān i siquī rī. Iyó jínu cácahān i jeē téé stáhú cácuu rī, te iyó jínu cácahān i jeē téé ndaā cácuu rī.

⁹ Iyó jínu cásáha i nájñuhun jeē tu jíin i ruhū jíjnánhan rī, te iyó jínu jeē jíiní vāha i ruhū. Iyó jínu jeē cuní ñayuu cahni i ruhū, te cátecu nahín rí. Te vēsú cástóho i ruhū, te tu cájihī rī sáha.

¹⁰ Te vēsú iyó jéé cáccuñhyá ni rī, te níni cácusī ni rī. Te vēsú téé ndáhú cácuu rī, te sácúca rí cuehē ñayuu jíin jnúhun ya. Te vēsú tú na vé cánevāha rī, te jíin máá yá te ndihī-ni cúu jeē cánevāha rī.

¹¹ Hermano ñuu Corinto, súcuan cúu jeē cácahān cají rí jíin ró jíjnánhan ró, chí siquī jeē maní rí jíin ró, jeē yúcuan cáchí ndihī rī ndese cándoho rī.

¹² Máá rí jíjnánhan rī cácahān cají rí siquī jeē maní ndasí rí jíin ró, te máá ró jíjnánhan ró sanaa te tu súcuan ró.

¹³ Nájñuhun cáhān tatá jíin séhe, súcuan cáhān ndahú rí jíin ró jeē nájñuhun iyó maní rí jíin ró, súcuan na cóo maní tucu ró jíin rí.

Siquī jeē cúu yó templo Yaā Dios

¹⁴ Ma quívi nduu ró jíin jniñu néé cásáha ñayuu tu cácañdije, chí ma cúu coo inuú ró jíin i. ¿Chí ndese cuu quíjnánhan jniñu cásáha ñayuu ndaā jíin jniñu cásáha ñayuu tú ndaā? ¿Te ndese cuu coyúcú inuú ñayuu cájca jíin luz yá jíin ñayuu cájca nájñuhun nuú néé?

¹⁵ ¿Ndese cuu coo inuú ni Cristo jíin Satanás? ¿Te ndese cuu cuiñi cáhnu ñayuu cácañdije jíin ñayuu tu cácañdije?

¹⁶ ¿Te ndese cuu quíjnánhan templo Yaā Dios jíin ídolo? Chí máá ró cácuu templo Yaā Dios, Yaā técu, chí ndéé yá ini anuá ró, nájñuhun ni cahān yā:

Condee rī ini i te caca cuu rī mēhñū i, te cuu rī Yaā Dios máá i, te cuu i ñayuu máá rí.

¹⁷ Te jeē yúcuan ní cahān gā yā: Ma quívi nduu ró jíin jniñu néé cásáha i, te cusān ró jíjnánhan ró, áchí Jítóho yó. Te ma jñí ró táca jéé tú ndaā.

Yūcuán na te naquihín rī rohó,

¹⁸ te cuu rī Tatá ró jíjnánhan ró,

te cuu ró séhe yí rí jíin séhe síhí rí,

áchí Jítóho yó, Yaā jñí ndihí poder. Achí tutu.

7

¹ Núu súcuan, ñānī mānī, cánevāha yó táca jnúhun yáha jéé ni jéjñuhun ya. Jeē yúcuan na sándoo yó máá yó táca jéé sajnéhén yiqui cúñu yó jíin ánuá yó. Te na cóonso iyo yó núu Yaā Dios, te coo ndoo coo íi yó nuú yá jíin ndihí jniñu cúni yā.

Jeē ní canacani ni ñayuu Corinto siquī cuéchi i

² Coo maní ró jíin rí jíjnánhan ró ví. Chí tu ní sáha rī falta nuú ní ñn ró, te tu ní stívi rí anuá ní ñn ró, te ni ñn ró tu ní stáhú rí.

³ Te nasūu jéé nducú rí cahān rī nuú ró cúu jeē cahān rī súcuan, chí je ni cahān rī jeē yóhyo maní rí jíin ró. Te níni ñuhun ni rī rohó, vēsú cuu yó chí cotecu yó.

⁴ Te cúcáhnu ndasí ní rī rohó jíjnánhan ró, te cúsi teyí ní rī jeē siquī ró. Te vēsú cájito rī táca jnúndóho yáha, te iyó ndeyí ní rī te cúsi ndasí ní rī jeē siquī ró.

⁵ Ná ni jengoo rī Macedonia te tu ní iyo nayúti ní anuá rī, chí sa shuva yí ní iyo jnúndóho jíin rí táca lado. Chí ni iyo jeé ní castáhān jnáhan jíin rí, te ni cayūhu rī sanaa te caca yátá ñayuu cácañdije.

⁶ Te Yaā Dios jeē sáha jeē ndúndeyí ni ñayuu cáccuñhyá ni, ní sáha ya jeé ní candundeyí ni rī, chí ni quíji Tito ní sáha ya.

⁷ Te ní candusi ní rī, nasūu máá ñn-ni siquī jeē ní quíji de, chí suni jeē ní ndundeyí ni de ní casáha ró. Chí ni castúhūn de jeé cáñuhun ni ró coto tucu ró rúhū, jíin jéé cáccuñhyá ni ró jeē siquī cuéchi ró, jíin jéé cánacani ní ró jehē rī. Te jeē yúcuan ní cusī gā ní rī.

⁸ Te carta jeē ní tají rí nuú ró, vēsú ní sáha jeē ní cacucuihyá ní ró, te tuá nácani cuihyá ní rī jeē ní sáha súcuan. Chí vēsú ní cucuihyá ní rī saá, te vijna te tuá, chí jíin rí jeē jecu-ni quívi ní cacucuihyá ní ró ní sáha.

⁹ Te vijna te cúsi ní rī, te nasūu siquī máá jéé ní cacucuihyá ní ró. Chí cúsi ní rī jeē ní jejníñu jeé ní cacucuihyá ní ró, chí ní sáha jeé ní canacani ní ró siquī cuéchi ró. Chí ní cacucuihyá ní ró nájñuhun cúni maá Yaā Dios, te nasūu jéé ní sáhuhū rī rohó.

¹⁰ Chí núu cúcuihyá ní yó nájñuhun cúni Yaā Dios, te suu sáha jeé nácani ní yó siquī cuéchi yó te jnama ya yohó, te ma cóo ga jeé nácani cuihyá ní yó. Te jeé cáccuñhyá ní ñayuu tu cácañdije, tu jéjníñu jeé nácani ní i, chí sa jnahñū ndetū i.

¹¹ Te ní cacucuihyá ní ró nájñuhun cúni Yaā Dios, te vijna te cájito ró náa vāha ni jejníñu. Chí ní canacani ndasí ní ró ní sáha, te ní canducú ró jeé quéndōo ndaā ró, te ní cacuxeēn ró nuú téé ní sáha cuéchi, te ní cayūhu ró jeé ní castívi ró núu yā. Yūcuán na te yóhyo ní cacuni ró coto tucu ró núu rī, te

yōhoyo ni candihvī ni rō ni cacuxeēn rō nuū tēe ni sāha cuēchi ún. Te súcuan ni castéēn rō jeē tú cuēchi rō, chi tu ní cájejnúhún rō cuēchi ni sāha tēe ún.

¹² Te jeē ní tee ri carta un, nasūu máá-ni jeē cúxeēn rī nuū tēe ni sāha cuēchi ún, ni nasūu máá-ni jeē cahán rī jehē tēe ni ndoho ni sāha de. Chi sa suhva ni tee ri návaha nucūhun ni rō ndese yōhoyo ni canacani ni rō jehē rī jito jínúu Yaā Dios.

¹³ Jeē yúcuan ní candusiī ni rī jeē siquī rō.

Te vīhá gā ni cacusiī ni rī jeē ní jini rī jeē cúsiī ni Tito, chi ni nduu nayúu ini de ni casáha rō.

¹⁴ Chi je ni cahán rī jín de jeē cúsiī ni rī jeē váha ñayuu cácuu rō, te vijna te tu ní quéndōo rī jnúhun canu jeē siquī rō. Chi nájnúhun ni cajini rō jeē iyó ndáā táca jnúhun ni cacahán rī jín rō, suni súcuan ni cundaā núnun ni cacahán rī jín Tito jeē cúsiī ni rī siquī rō jeē váha cáscuicu rō.

¹⁵ Te vīhá gā manī de jín rō vijna jeē ñúhun ni de jeē váha ni cajetáhú rō jeē cahán de, te ni cahíyo yíñúhún rō ni candiso iyó rō núu de.

¹⁶ Núu súcuan te cúsiī ni rī siquī jeē cucáhnu ndasí ni rī rohó jínáhan rō.

Jeē na cúsiī ni i socō i cuehē

8

¹ Hermano, vijna te suni cácuni rī castúhun rī nuū rō jínáhan rō ndese cuehē jeē váha ni sāha Yaā Dios jín ñayuu cácandíje cáyūcú Macedonia.

² Chi vēsú yōhoyo ni jito ndee jnúndóho i, te suni yōhoyo ni cacusiī ni i jín jnúhun ya. Te vēsú ñayuu ndahú ndasí cácuu i, te yōhoyo váha ni cajequin i cuehē xúhun jéē cúu ñayuu ndahú cácandíje.

³ Chi cúu rī testigo jeē ní cacusiī ni maá i ni cajēhe i ndésaa ni canda i, te nde vīhá gā ni cajēhe i.

⁴ Chi ni cacahán ndahú ndasí i jín rī jeē na cuáha rī jnúhun chindéé ñáhán i jín yó cuáha i xúhún cuu hermano cándoho ndahú.

⁵ Te vīhá gā ni casáha i vēsú jeē ní cajeni ni rī, chi xíhna gā ni casocō i maá i nuū Jítoho yó, te sáa te ni cajēhe i maá i sāha i táca jéē cácuni rī, ndihí ndese nújnahan ni Yaā Dios.

⁶ Te jeē súcuan ni casáha ñayuu Macedonia, te ni castíhvī ni rī Tito jeē na jéé tucu de nuū maá rō, sāha de jeē jnu jniñu jeē ni squéjéé de jín rō jeē suni caquin rō cuehē xúhún cuu ñayuu ndahú.

⁷ Chi máá rō yōhoyo váha casáha rō táca-ni, chi váha cácandíje rō, váha cánacani rō jnúhun, váha cájecūhun ni rō, váha cándihvī ni rō, váha manī rō jín rī jínáhan rī. Núu súcuan te suni cánuu sāha váha rō jniñu yáha jéé cuáha rō jéé cúu ñayuu ndahú.

⁸ Te nasūu jéē cuní rī ndacu rī jniñu nuū rō, chi sa cástúhun rī nuū rō ndese yōhoyo cácusī ni sava ga ñayuu jéhe i xúhún, te súcuan te cuní rī jeē suni máá rō cácundáhú ndije ni rō ñayuu ndahú.

⁹ Chi je cájini rō ndese yōhoyo váha ni Jítoho yó Jesucristo jín yó. Chi siquī jeē ní cundáhú ni yā rohó te ni nasáha ndáhú yá maá yá, vēsú cucá ndasí yá nde andiví nuú. Te súcuan ni sāha ya jeē cáccucúca rō ndihí jeē ndíso jnúhun ya, siquī jeē ní nasáha ndáhú yá maá yá.

¹⁰ Te jeē váha máá rō cúu jeē na cáchi rī ndese jéni ni rī siquī jniñu yáha. Váha ni caquejéé rō nde jendujin, chi nasūu máá-ni jeē ní cajequin rō xúhún, chi suni yōhoyo ni cacusiī ni rō sāha rō.

¹¹ Núu súcuan te vijna te sínu rō. Te nájnúhun ni cacusiī ni rō ni caquejéé rō jín, suni súcuan na cúsiī ni rō sínu rō, chi cuáha rō núu ndese cáneváha rō.

¹² Chi núu cúsiī ni yó cuáha yó, te jétáhú yá núu ndese névaha yó, chi tu jícán yá jeē cuáha yó jéé tu névaha yó.

¹³ Te nasūu jéē cahán rī jeē cáhni ndahú rō máá rō jeē cáca ga nihín i vēsú jeē ndóo nuū maá rō.

¹⁴ Chi sa suhva jeē ñin cūhva-ni coneváha rō jín i. Chi cáneváha cuehē rō vijna, te cuu cuáha rō jéé cúmaní nuú i. Yúcuán na te núu ndé ñin quiví coneváha i, te suni cuu cuáha i te núu ni cumaní nuú rō. Te súcuan te ñin cūhva-ni coneváha rō jínáhan rō,

¹⁵ nájnúhun cáhán tutu ñi siquī ñayuu jeē ní canastútú maná nde jenahán: Tēe jeē ní nastútú cuehē, tu ní ndóo ga nuú de. Te tēe jeē ní nastútú jecu-ni, suni tu ní cúmaní nuú de. Achí tutu.

Jnúhun Tito jín úu gā jnáhan de

¹⁶ Te na cútahú rī nuú Yaā Dios jeē ni sāha ya jeē ndihvī ni Tito jehē rō nájnúhun cándihvī ni maá rī.

¹⁷ Chi ni jetáhú de jeē ní cacahán rī jín de jeē jeé de nuú rō. Te siquī jeē ndihvī ni de jehē rō, jeē yúcuan cuájeé de, chi súcuan cúu ni maá de.

¹⁸ Te suni cátají rī ñin hermano cuajeé jín Tito nuú rō. Te táca grupo ñayuu cácandíje cájejnúhún i tēe un jéé váha jéjníñu de siquī jnúhun jeē jnáma ya yohó.

¹⁹ Te táca grupo ñayuu cácandíje suni ni catee i jniñu siquī de jeé cáca de jín rī chindéé ñáhán de quindéca de xúhun jín rī jeē ní cajēhe ñayuu. Te jniñu yáha casáha rī návaha cahán ñayuu jeé yōhoyo váha Yaā cúu máá Jítoho yó, chi cuní i ndese yōhoyo cácusī ni rō cásocō rō xúhún.

²⁰ Te quingoo ndándúú rī návaha ni ñin ñayuu ma tēe i cuēchi siquī rī siquī xúhun cásocō ñayuu.

²¹ Chi ndúcú rí jeē squícu ndaā rí tācá jniñu, nasūu maá ñn-ni nuū Yaā Dios, chi suni nuū ñáyuu.

²² Te suni cátají rí inga hermano yō cuajee de jíin ndindúú tēe yáha. Te tñjñi jíinu ni steén de jeē yóhoyo cúsñi ni de ndíhví ni de tācá jniñu. Te vijna chi ndíhví gā ni de jehē rō, chí cúcáhnú ndasí ni de jeē cásquícu rō.

²³ Te núu cácajnñhún ñayuu siquí Tito, te achi rō jeē cúu de tēe chindéé ñáhán jéjñiñu jíin rí nuū rō siquí jñuhun ya. Te uū gā hermano yō yáha, achi rō jeē cácuu de tēe jeē ní catejniñu ñayuu cácañdije, te cáhíyo yñíhún de nuū Cristo.

²⁴ Núu súcuan te steén rō nuū de jeē cáhíyo maní ndije rō jíin de, návāha na cūni tāca grupo ñayuu cácañdije. Te súcuan cuni i jeē tu ní cácusñi cáhá ni rí siquí rō.

Siquí jeē cájequin i xūhún cuu tācá hermano

9

¹ Te vijna te tuá jíini ññhún tee ri nuū rō siquí xūhun jeē cájequin rō cuu tācá hermano cándoho ndáhú.

² Chi je jíini rí jeē cánujnahan ni rō cuāha rō. Te jeē yúcuan maní cúsñi ni rí cahán rí jíin ñáyuu Macedonia jeē rohó ñáyuu Acaya, je ni casátühva rō xūhun ndé jendujin. Te jeē súcuan ni cacusñi ni maá rō, te jeē yúcuan cuehē ñayuu Macedonia ni cacondíhví ni i ni cajēhe maá i.

³ Te tájí rí ndinúni hermano yáha cuájeē maá de nuū rō xíhna gā, návāha jeē jinú maá rí te ma quéndōo neé rí siquí jñuhun ni cahán rí jeē squícu vāha rō jíin jniñu ún. Chi coo tühva ndije rō jíin xūhun ñajnñuhun ni cahán rí jíin i.

⁴ Chi sanaa te jecoo jecu tēe Macedonia jíin rí, te núu cuni de jeē tu cáhíyo tühva rō, te coo jñuhun canu nuū rí, te suni nuū maá rō jíinánhan rō, chí ni cahán teyí rí jeē cáhíyo tühva ndije rō.

⁵ Jeē yúcuan ní jeni ni rí jeē cánuú cahán rí jíin tāca hermano yáha jecoo de xíhna gā, te sáa te jinú rí, návāha stíhví ni de rohó jéē yáchí na cóo tühva xūhun jéē ní cacahán rō jeē cuāha rō. Te súcuan te coo tühva siquí jeē vāha ni rō, te nasúu jéē safuerza rí rohó.

⁶ Cocuhun ni rō jñuhun yáha, jeē núu jecu-ni cuāha rō te suni jecu-ni naniñhún rō: Chí tēe jeē tíhli-ni táji, suni tíhli-ni nastútú. Te tēe jeē táji cuehē, suni cuehē nastútú. Achí tutu.

⁷ Tācá ñn ñn rō cuāha rō ndésaa ni tee ni rō. Ma cúxí ni rō cuāha rō, chí nasúu fuerza cúu. Chí Yaā Dios maní yā jíin ñáyuu jeē cúsñi ni cuāha.

⁸ Te maá Yaā Dios cuu sáha ya jeē nducuehē ndinuū jeē vāha cuu rō jíinánhan rō, návāha níni conevāha rō ndíhi tācá jeē jíini

ññhún rō, te coo sobra gā jeē cuāha rō jéē cúu tācá jniñu vāha.

⁹ Chí súcuan cáhán tutu ñi siquí tāca ñáyuu jéhe:

Ni scáa i ni jēhe i nuū ñáyuu ndahú.

Te tācá jniñu vāha sáha i, chí quendōo ñí cáni.

Achí tutu.

¹⁰ Te Yaā Dios jéhe ya tata nuū tēe táji, te nihín de staā jeē cáji de. Te suni súcuan cuāha ya ndinuū jeē vāha cuu rō, te sáha ya jeē cáyā te nducuehē jniñu vāha cásáha rō.

¹¹ Súcuan cucúca rō jíin táca-ni, návāha cuu cuāha cuehē rō. Te xūhun jéē cuāha rō quíhín nuū hermano cándoho ndáhú, suu sáha jeē nácuatáhú i nuū Yaā Dios.

¹² Chí xūhun jéē cuāha rō núu i, nasúu maá ñn-ni jeē nihín i jeē cúmaní nuū i, chí suni sáha jeē nácuatáhú ndasí i nuū Yaā Dios.

¹³ Te cahán i jeē yóhoyo vāha Yaā cúu Yaā Dios, chí xūhun jéē ní cajēhe rō steén jeē vāha cácañdije rō jñuhun Cristo. Te suni sáha jeē cahán i jeē yóhoyo cújéhu Yaā Dios siquí jeē ní cajēhe cuehē rō nuū i jíin núu sava ga ñayuu.

¹⁴ Te suni cacān tahú i jehē rō, chí coo maní ndasí i jíin rō siquí jeē yóhoyo vāha ni sáha Yaā Dios jíin rō.

¹⁵ Te na cútahú yō nuū Yaā Dios, chí ni jēhe ya Sēhe ya nuū yō, jeē cúu ñn tahū cáhnu ndasí jéē ma cánda cuiti yō castühún ndíhi yō.

Jeē ndíso jniñu Pablo cúu de apóstol

10

¹ Te ruhú Pablo, cáhán ndahú rí jíin rō jíinánhan rō jíin modo maá Cristo jeē vitá ni yā te vāha ni yā. Ruhú, chí cacahán rō jeē iyó suchí ni rí núu ndéé rí jíin rō, te núu ndéé jíca rí te tu yúhú cuiti rí cahán nihín rí jíin rō, cacahán rō.

² Núu súcuan te cáhán ndahú rí jíin rō jeē núu na jéé rí te ma cahán rō jñuhun jeē sáha jeē cuxeén rí nuū rō. Chí sava rō cacahán jeē casáha rí jniñu ya siquí jeē maní jeē na nihín rí siquí ún. Núu súcuan te iyó tühva rí cuxeén rí nuū ñáyuu cacahán súcuan.

³ Chí vésú cácuu rí ñayuu cáyúcú ini ñayíví, te tu cájejnánhan rí modo cájejnánhan ñayuu ñayíví. Chí ñajnñuhun jeē cájejnánhan rí siquí tācá jniñu neé.

⁴ Chí nasúu ndajñiñu ñayíví jéjñiñu rí cájejnánhan rí, chí jíin poder Yaā Dios cájejnánhan rí snáa rí tāca fuerza jeē cúu contra siquí yā.

⁵ Súcuan cásnáa rí tāca jñuhun ndúxí jíin jñuhun téyí jeē nducú casi jeē ma cūni ñayuu ndese Yaā cúu Yaā Dios. Te cájesi rí nuū ndíhi jeē tú vāha jeē cájeni ni ñayuu, návāha cuandetú i nuū Cristo.

⁶ Te jeē jīnu cuandetū vāha máá ró, yūcuán na te coo tūhva ri cuāha ri castigo nuū tāca gá ñayuu jeē tu cájendetū.

⁷ Máá ró jijnáhan ró máni cájeni ni rō modo ñayuu tu cájécūhun ni. Núu na-ni tēe jēni ni de jeē Cristo ni tejníñu ya de, te na sáha de cuenta jeē suni sūcuan ni tejníñu ya ruhū jijnáhan ri.

⁸ Te núu ni cahān teyí rí jīn ró jeē ndiso jniñu ri, te tu cúcanu rí sáha. Chi máá Jítoho yō ni tejníñu ya ruhū jijnáhan ri, návāha sáha ri jeē ije ánuá ró jīn jnūhun ya, nasūu jēe snáa rí.

⁹ Núu sūcuan te tu cúní rí jeē cáni ni rō jeē nducú rí síuhú rí rohó jīn carta rí.

¹⁰ Chi cácahān sava ró jēe tāca carta rí yōhoyo stáhví ni te nīhin ndácu jniñu, te sa suhva núu ndéé rí jīn ró te tu cūndeyí ni rí ndacu nīhin ri jniñu, te suni tu cúu cahān vāvihí rí, achí ró.

¹¹ Te ñayuu cácahān sūcuan na sáha i cuenta jeē nájñūhun nīhin cáhān carta rí jeē íne jíca rí, suni sūcuan nīhin ndacu ri jniñu nuū rō jeē cóndee rí jīn ró.

¹² Te va ma chūndeyí cuiti ni nde ri jeē sajhēnu ri máá rí, nájñūhun cásáha sava tēe un jēe cájējnūhún nde de máá de. Tāca tēe ún chi cácanéé de jeē cájeni ni de jeē cujēhnu ga de vēsú jnáhan de, te tu cásáha de cuenta ndese cúní Yaa Dios jeē caca de.

¹³ Te ruhū jijnáhan ri, chi cutéyí nde ri máá cūhva-ni jniñu jeē ni jéhe Yaa Dios nuū rí, te ma yáha ga rí. Máá Yaa Dios ni tee cūhva yá ndésaa cúu jeē sáha ri, te máá yá ni jēhe jñūhun jeē ni jīnū rí nuū rohó ñayuu ñuu Corinto.

¹⁴ Jeē yūcuan ná ni jinūcoo ri nuū rō jeē xīhna ñūhún te nasūu jēe ni yáha ri nuū cūhva jniñu ní jéhe ya nuū rí. Chi xīhna gā máá rí ni jinūcoo nuū rō ni canacani ri jñūhun vāha Cristo.

¹⁵ Te tu cácutéyí rí siquí jniñu ní casáha inga tēe, nájñūhun jeē jniñu máá rí cúu. Chi sa suhva cáñuhun ni rí jeē cuehē gā candíje ró, te sūcuan te cuu sáha ri cuehē gā jniñu ya mēhñu ró, te níni máá cūhva jeē ni jéhe ya nuū rí.

¹⁶ Yūcuán na te cácuni rí scuité núu ga ri jñūhun jnáma ya yohó núu tāca gá ñuu yūcu ndé yūcuan gá. Te sūcuan te ma quívi nduu rí cutéyí rí nuū jeē jé ni canacani inga tēe jñūhun.

¹⁷ Te núu ndé tēe cúní de cutéyí de, na cutéyí de siquí jeē sáha máá Jítoho yō, nasūu siquí jēe sáha máá de.

¹⁸ Chi nasūu tēe jeē jejnūhún máá cúu jeē quēndōo yíñuhún, chi sa suhva tēe jeē jejnūhún máá yá.

Jeē cahān Pablo siquí tēe cánacani jñūhun stáhú

11

¹ Cone cáhnu ni rō jijnáhan ró jeē cahán rí jecu jñūhun modo nájñūhun cácahān ñayuu canéé. Núu sūcuan te cáhnu coo ni rō víi.

² Chi cúcuíñí rí jēhē rō jijnáhan ró, nájñūhun cúcuíñí Yaa Dios. Chi cácuu ró nájñūhun ñn sūchi síhí íyó ndoo, te ni sáha ri jeē quijnáhan ró jīn Cristo, nájñūhun quijnáhan ñn sūchi síhí jīn máñūhún-ni yīi i.

³ Te yúhú rí sanaa te cuāha ro jñūhun stáhú tāca tēe un rōhó, te siáá rō jñūhun jeē chíñūhún ndáa rō Cristo nde jīn ini jīn ánuá ró. Chi suni sūcuan ni sáha Satanás jīn Eva, chi ni quívi ini ñn coó, te ni stahú un ña jīn jñūhun ndíchí stáhú.

⁴ Chi núu quíjicoo tēe nuū rō jeē tu cánacani ndaā de jñūhun Jesús nájñūhun ni canacani ri nuū rō, te va yōhoyo vāha cájetáhú nde ró de. Te suni sūcuan vāha cájetáhú nde ró núu inga espíritu jīn núu inga jñūhun jeē tu quijnáhan jīn Espiritu jīn jñūhun jeē ní cacandíje ró jēe jnáma ya rohó.

⁵ Te tāca tēe cácandíje ró un jēe cácahān jeē apóstol cujēhnu ga cácuu, tú cuiti jeē cujēhnu ga nde de nuū rí.

⁶ Chi vēsú tu níhín vāha nde ri modo cahān rí, te jécūhun vāha ni rí. Chi jīn ndihí jniñu ni casáha ri mēhñu ró ni castéén cají rí nuū rō jeē sūcuan cúu.

⁷ Tu ní jícan rí xūhun núu rō siquí jeē ní nacani ri jñūhun jnáma ya yohó. Te sūcuan ni cotecu ndahú rí návāha quēndōo vāha ga máá ró jīn jñūhun ya. ¿Te va cuēchi ni sáha ri jeē ni sáha ri sūcuan, chí naún?

⁸ Chi sava ga grupo ñayuu cácandíje ni quihín ri xūhun jēe ní cajēhe i nuū rí, návāha sūcuan-ni nacani ri jñūhun ya nuū rō jijnáhan ró.

⁹ Te ná ni condee rí jīn ró te ni ndihí xūhun rí, te tu ní jícan cuiti rí nuū ní ñn rō. Chi hermano jeē ní quíjicoo ichi Macedonia ni cajēhe de nuū rí jeē cúmaní. Te jeē sūcuan tu ní stáhān rí rohó, te ni ma sáha cuiti rí.

¹⁰ Te nájñūhun cúcáhnu vāha ni rí jeē jini rí jñūhun ndaā Cristo, suni sūcuan jini rí jeē ma quíhin ri xūhún nuū ni ñn ñayuu ní ndáñūú Acaya, návāha ma cási i jeē cúsiñ ni rí jeē sūcuan-ni nacani ri jñūhun ya.

¹¹ ¿Te á siquí jeē tú maní rí jīn ró cúu jeē cahán rí sūcuan, jēni ni rō, chí naún? Tuú chí máá Yaa Dios jini yá jeē maní rí jīn ró jijnáhan ró.

¹² Te sáha ri ná-ni sáha ri, chi ma quíhin ri xūhun ró, návāha casi rí nuū jeē casátéyí tēe un máá de jeē cácahān de jeē inuú cásáha de jniñu ya jīn rí.

¹³ Te tēe ún chi nasūu apóstol ndaā cácuu de, chí máni máá jñūhun stáhú cácahān de, te cásáha de máá de jeē cácuu de apóstol Cristo.

¹⁴ Te tu náa ni yō jito yó jēe casáha de sūcuan, chí je jini yó jeē suni Satanás násama

máa te stáhú jéé sáha máa nájñuhun ñin ndajehé Yaá Dios jeé jica jíin luz yá.

¹⁵ Te jeé yúcuau suni tu náa ni yó jito yó jeé tée cájejniñu nuñ Satanás, cásáha de máa de jeé tée ndaá cácuu de. Te ñin quiví te nanihñ de siquí jniñu neé cásáha de.

Jñundóho ni ndoho Pablo siquí jeé cúu de apóstol

¹⁶ Inga jínu cáhán rí jíin ró jeé ni ñin ró ma cáni ni ró jeé tée cánéé cúu rí. Te núu súcuau cájeni ni ró, te va cuatáhú nde ró jéé cáhán rí nájñuhun tée cánéé, náváha suni cuu cutéyí nde rí jecu nájñuhun cásáha tée ún.

¹⁷ Jeé cáhán rí vijna chí nasúu jéé ní ndacu máa Jítoho yó cúu, chí sa nájñuhun tée cánéé cáhán rí jeé cutéyí nde rí.

¹⁸ Chí cuehē de cásátéyí de máa de modo jeé iyó ñi ñayiví, te suni súcuau na sátéyí nde rí maá rí núu súcuau.

¹⁹ Te va tée cáhíyo cájí xíní cácuu nde ró, te jeé yúcuau cúu vāha ni nde ró cuatáhú ró ñin tée cánéé núu súcuau.

²⁰ Chí va vāha-ni cájendeyí ni ró nuñ tée un jéé casáfuera de róho cuajniñu ró nuñ de, chí cásáha de jeé ndundáhú ró, chí cáquende de ndajniñu ró, chí cásájehnu de máa de nuñ ró, chí ndé cácatu de nuñ ró.

²¹ Te vésú cúcuu nde rí cáhán rí, te na cáhán rí jeé tu ní cundeyí ni nde rí sátéyí rí maá rí nájñuhun casáha tée ún.

Te vijna te núu iyó sava tée chundeyí ni de sátéyí de máa de, te va suni chundeyí ni nde máa rí núu súcuau. Te va cáhán rí nájñuhun cáhán ñin tée cánéé.

²² Núu cácutéyí de jeé tée hebreo cácuu de, te suni súcuau ruhū. Núu tée Israel cácuu de, te suni ruhū. Núu yucūn Abraham cácuu de, te suni ruhū.

²³ Núu tée cájejniñu nuñ jñuhun Cristo cácuu de, te víhyá gā ruhū. Te va cáhán rí nájñuhun tée cánéé jéé cutéyí rí súcuau. Chí ni caa ga ni sájniñu rí vésú maá de jíjnáhan de, te ni caa ga ni cacani i ruhū, te cuehē gā jínu ni ine rí vecāa, te suni cuehē gā jínu ni cacuni ñayuu cahni i ruhū.

²⁴ Te jnāhan rí hebreo, uhñ jínu ni cacani xeēn de ruhū jíin cuarta ñi, ñin cūhva jeé jé yajni cuu rí sáha.

²⁵ Uní jínu ni cacani de ruhū jíin yujnu xíi, te ñin jínu ni cajēhe de yuū xíní rí. Uní jínu ni queē barco jeé ní jica rí siquí jñuhun ya. Te ñin jecuáa jíin ñin ndiáca ni yosó candá rí nuñ cunú ndute mar.

²⁶ Cuehē jínu ni ndoho rí ni jica rí ichi, te ni cácu rí nuñ táca yúte, te ni cácu rí nuñ táca ñácuiñhá. Ni cácu rí nuñ ñáyuu nación rí jíin núu ñáyuu ñuu jicá. Ni cácu rí cháha chúcuau ná ni iyo rí ñuu jíin rancho jíin mar. Ni cácu rí nuñ táca jnāhan rí jeé tu iyó ndáa.

²⁷ Ni sájniñu nihin rí te yí ní ndoho rí. Cuehē jínu ni jehni rí maá rí máhná. Ni jíi rí

sóco, ni jichí rí ndute. Cuehē jínu ni iyo ndute ni rí, ni cuijnu rí, ni cumani sahna rí

²⁸ Te siquí táca jéé yáha chí iyó gá. Chí ndiquiví ndóho rí jeé nácani ndasí ni rí jehē táca grupo ñayuu cácondije.

²⁹ Núu ñin ñayuu tu fuerza ñi i, te suni ndóho rí jehē i. Te núu ñin ñayuu quiví i cuēchi sáha jnāhan i, te ndóho rí jñuhun cúcuu jíin jñuhun náxeēn ni.

³⁰ Núu súcuau te núu cánuú cutéyí nde rí, te va cutéyí rí siquí táca jéé steén jeé tú na fuerza ñi rí.

³¹ Te Yaá Dios, Yaá cúu Tátá maá Jítoho yó Jesucristo, jíni yá jeé cáhán ndaá rí. Te ní cáni na cáhán ñayuu jeé vāha ndasí Yaá cúu ya.

³² Ná ni iyo rí ñuu Damasco, te gobernador jeé ndácu jniñu ndañúu jeé jni rey Aretas, ni jeni de soldado ni cacondito táca yéhyí jeé ní condúu ndihyú ñuu ún, chí jni de ruhū quihñ rí vecāa ni cuni de núu.

³³ Te ni quiví rí chíj i ñi jica, te ñayuu cácondije ni cáscuun i ruhū ventana ñin vehe jeé néne jicá jeé ndihyú ñuu ún. Te súcuau ni cácu rí nuñ tée ún.

Jeé ní jito ndijin Pablo jeé ni stúu ya nuñ de

12

¹ Te tu níhín jniñu jeé cutéyí rí. Te vāha ga na cástūhun rí nuñ ró siquí jeé ní jito rí jeé ní stúu maá Jítoho yó nuñ rí te ni steén ndijin yā nuñ rí.

² Jini rí ñin tée cándije Cristo, te je ni cuu uxí cuñ cuiyā jeé ní sáha ya jeé ní caa tēe un ní jehēn de nde andiví úní. Te tu jini rí núu ní jehēn rí jíin yiquí cūñu rí, chí ní jehēn anuá-ni rí. Máa Yaá Dios cúu jeé jini.

³ Te jíni rí jeé ní ndonehen ya ruhū. Te á ní jehēn rí jíin yiquí cūñu rí, chí ní ndōo, tu jíni rí, chí máa-ni Yaá Dios cúu jeé jini.

⁴ Chí ni sáha ya jeé ní caa rí ni jehēn rí nde jardín andiví. Te yūcuau ní jini sóho rí táca jñuhun sahí ndasí jeé ma cúu castūhun yóhó ñayuu.

⁵ Te siquí jeé ni sáha ya súcuau jíin rí cúu jeé cutéyí rí, te ma cutéyí rí siquí ndese cúu máa rí. Chí cutéyí rí máni jeé tú na fuerza ñi rí.

⁶ Te núu cúní rí cutéyí rí siquí maá rí nuñ, te nasuu jéé cánéé rí núu sáha rí súcuau núu, chí ndaá cúu jeé iyó jeé cutéyí rí. Te ni ma sáha rí, chí tu cúní rí jeé cani ni ñayuu jeé cujehnu ga rí vésú jeé ní jito i chí jéé ní jini i jñuhun rí.

⁷ Te tu cúní yā jeé yáha rí cutéyí rí siquí jeé ni steén ndijin yā jniñu jehnu ndasí un núu rí, te jeé yúcuau ni quiji ñin jñundóho jeé ndiquin ruhū te stóho ruhū. Te ñin jeé ni jéhe ya jñuhun ni tají Satanás cúu, ñin jeé stóho ruhū, náváha ma yáha rí cutéyí rí.

⁸ Te uní jínu ni cáhán ndahú rí jíin máa Jítoho yó jeé na téjiyo ya quihñ.

⁹ Te ni cahān yā jīn rī: Tuú chi tu cúmanī jeē cundáhú ni rī rohó. Chi ñayuu jeē tú na fuerza ini, sáha ri jeē nducuehē gā fuerza maá rī ini i, ni achi yā. Núu súcuan te cúsi ni rī jeē tú na fuerza ini rī, chi súcuan te nducuehē gā fuerza Cristo ini rī.

¹⁰ Jeē yúcuan cúu jeē cúsi ni rī jeē tú na fuerza rī, jīn jéé cácahān ndevāha ñayuu jīn rī, jīn jéé cúmanī nuū rī, jīn jéé cájito xeēn i ruhū, jīn jéé ndóho ri jnūndóho siquī Cristo. Chi jeē tú na fuerza maá rī, yúcuan sáha jeē nihín rī fuerza maá yá.

Jeē nācani ni Pablo siquī ñayuu cácañdije ñuu Corinto

¹¹ Te va tēe cánéé cúu ri jeē ni sátéyí nde ri maá rī. Te siquī jeē tu cácañdije ró ruhū, jeē yúcuan ní sátéyí rī maá rī. Chi cánuú jéé máá ró cuajnúhún ró ruhū nuú. Chi vesú tú jniñu ri jeē maá rī, te va tu núu cuiti nde ri nuú táca tée un jéé cácahān ró jeé apóstol cujéhu cácuu de.

¹² Chi mēhñu ró ní sáha ri táca jniñu jeē steén jeē cúu ndije ri apóstol. Chi jīn cuéhē paciencia ni sáha ri táca jniñu jéhu jeē steén poder Yaa Dios, jīn táca jniñu jeē nahān ní canaa ni rō ní cajito rō.

¹³ Te tu ní sáha ri jeē núu ga cácuu ró núu táca gā grupo ñayuu cácañdije, chi máá ñn-ni jeē tu ní stáhān rī rohó jéé cuāha ro jéé jini ñuhún rī. Cone cáhuu ni rō núu súcuan ni sáha nde ri falta nuū rō víi.

¹⁴ Te vijna jeé íyó túhva ri jecondēhe rī rohó vuelta unī. Te suni tú na vé cacān rī nuū rō, chi nasúu ndajniñu ró cúu jeé cunī rī, chi sa suhva jeé quendóo vāha ró jīn jnūhun ya. Chi nájnūhun sēhe ri cácuu ró, te sēhe chi tu cánuú caya i jeé cúu tátá i, chi sa tátá cánuú cuāha de jeé quendóo vāha sēhe de.

¹⁵ Jeē yúcuan cúsi ni rī stíhi ri jeé névāha ri, te nde stíhi ri fuerza maá rī, návāha sáha ri jeé quendóo vāha ánuá ró jijnáhan ró. Te manī gā coo ri jīn rō, vesú sanaa te jecu-ni cáhiyo manī rō jīn rī.

¹⁶ Te íyó jecu ró cácahān jeē vesú tú na vé ni jicān rī nuū rō, te tēe stáhú cúu ri, chi ni nducú rī modo ndichí nihín rī xūhun ró, cácahān rō.

¹⁷ ¿A táca tée ní tají rī nuū rō, á ñn máá de ni stáhú de rohó jéé nihín de xūhun ró cuu máá rī, chí naún? Tú cuiti.

¹⁸ Ni cahān ndahú rī jīn Tito jeé jecondēhé de rohó, te ni tají rī ñn hermano ni jeé jīn de. ¿Te chí ní stáhú Tito rohó ní quihin de xūhun núu ró jeé cuu máá de, chí naún? Tuú chi inuú-ni cása ha ndindúú rī, te ñn-ni ánuá ndindúú rī.

¹⁹ ¿Sanaa te cájeni ni rō jeé cahān rī jnūhun yāha návāha quendóo vāha ri jīn ró, chí naún? Nasūu súcuan cúu, chi Yaa Dios jini yā jeé cahān rī maá-ni jnūhun jeé cunī Cristo.

Te ndíhi jeé cahān rī chi nducú rī jeé ije ró jīn jnūhun ya, ñānī manī.

²⁰ Chi yúhú rī jeé núu na jéé rī, te sanaa te cunī rī jeé tu cása ha ró jniñu nūñahan ni rī. Te máá ró jijnáhan ró, suni ma nūñahan ni rō ruhū. Chi sanaa te cátejñáhan ró, cácuésún ni rō, cácuiti ni rō, cáсандúxí ró, cásjnúhún ró, cácahān ró siquī jnáhan ró, cácutéyí ró, cájica néé ró.

²¹ Te yúhú rī jeé núu na jéé tucu ri te cuāha Yaa Dios jnūhun canu nuū rī jeé súcuan cása ha ró. Te sanaa te cucuíhyá ni rī núu íyó cuéhē ró jeé ní casáha cuēchi ichi yátá, te tu nācani ni rō stóo ró jniñu jnéhén jniñu jica jnéni jīn jniñu néé ndasí ní casáha ró.

Saludo jīn jnūhun cástūhun Pablo jeé sándíhi

13

¹ Yāha cúu vuelta unī jeé jecondēhe rī rohó. Te sándaā yō jniñu nájnūhun cáhān tutu: Jīn jnūhun jeé cahān uū chí unī testigo te cundaā táca jniñu, áchi.

² Te vijna jeé íne jicá rī te cáhān tucu ri nájnūhun ni cahān rī ná ni ine ri jīn ró. Cáhān rī nuū ñayuu ni casáha cuēchi un jīn núu ndíhi ró, jeé núu na jéé tucu ri te ma cóo vitá ni rī jīn rō.

³ Te yúcuan cuu prueba jeé cánducú ró, suu núu jendaá jeé cahān rī jīn fuerza Cristo. Chi Cristo tu cúmanī fuerza ya jeé sándaā ya jīn ró, chi stéén yā poder yā mēhñu rō.

⁴ Te vesú tu ní stéén yā fuerza ya ná ni jihi yā jicā cruz, te vijna chi técu yā jīn poder Yaa Dios. Te nájnūhun ni ndoho máá yā, suni súcuan cándoho ri vijna jeé tu fuerza rī. Te vesú súcuan te jīn poder Yaa Dios cátecu ri jīn yā jeé cuajniñu ri nuū ró jeé siquī jnūhun ya.

⁵ Coto ndee ró maá ró núu cáhiin nihín ró jīn jnūhun cácañdije ró yá. Sáha vāha ro cuenta. ¿Te á tu cájini ró jeé ndeé Jesucristo ini ánuá ró, te núu ndaā jeé ní cacandije ndije ró?

⁶ Te ñuhun ni rī jeé suni cácucahnu ni rō jeé maá rī cácañdije ndije rī.

⁷ Te cájicān tahú rī nuū Yaa Dios jeé ma sáha ró ni ñn jniñu néé. Te vesú núu cuajnúhún ró jeé vāha ndácu ri jniñu nuū ró, chí vesú núu ma cuajnúhún ró, te tú na vé sáha, chí máni jeé na sáha ró jniñu ndaā cúu jeé cánducú rī.

⁸ Chi tu jési rī nuū jniñu ndaā, chí sa suhva scáca ri.

⁹ Núu súcuan te cácusī ni rī núu tú na fuerza maá rī, te núu íyó fuerza maá ró. Te níni cácañ tahú rī jeé na ije ga ni ró jijnáhan ró jīn jnūhun ya.

¹⁰ Te tée ri carta yāha nuū ró nde ná tu jeé rī, návāha núu na jéé rī te tuá jini ñuhún cuxeēn rī nuū ró. Chi ni jēhe jito ho yō jniñu

ndíso ri yāha jēē sāha ri jeē íje ánuá rō jíin
jnūhun ya, nasūu jēē snāā rī.

¹¹ Je ni cahān yō nūu sūcuan hermano, te
na cóo jeē váha jíin rō jijnáhan rō. Te na
cóndihvī ni rō íje rō jíin jnūhun ya, te coo
ndeyí ni rō. Te na cóo inuú ni rō te coyūcu
mánī rō jíin jnāhan rō. Te Yaā ndíso jnūhun
ndeyí sñ ni jíin jnūhun cūndáhú ni, coo ya jíin
rō jijnáhan rō.

¹² Te jeē cahān rō jíin táca jnāhan rō, te
yíñúhún techūhu rō ndaha i.

¹³ Sāndeyí ni rō jijnáhan rō, áchí hermano
cáandíje jeē cáyūcu yāha.

¹⁴ Te ñūhun ni ri jeē Ítoho yō Jesucristo
na sāha ga yā jeē váha rōhó jijnáhan rō, te
Yaā Dios cundáhú ni yā rohó, te Espíritu
Santo condee cáhnu ya jíin rō. Sūcuan na cóo.
Amén.

CARTA JEE NI TEE SAN PABLO APOSTOL NUU ÑAYUU GALACIA

¹ Máá rí cúu Pablo apóstol. Te nasū ñayuu ni jéni ruhū ni nasū ñayuu ni táji ruhū jee nácani ri jñuhun, chí sa suhva máá Jesucristo jiín Tátá yō Yaā Dios, Yaā ní nastécu Jesús mēhñu ndáyi.

² Te ruhū jiín táca hermano cáyūcu jiín ri yāhá, cátee ri carta yāha cuajeē nuū rohó ñayuu cácandije ní región Galacia.

³ Te cáñuhun ni rí jee Tátá yō Yaā Dios jiín Jítoho yō Jesucristo, na sáha ga yā jee vésu rohó, te sáha ya jee coo ndeyí coo sñ ni rō.

⁴ Chí Jesús ni socó yā maá yá jee ni jíhi yā jee siquí cuéchi yó, návāha jnama ya yohó núu táca jee neé iyó ñayivi yāha, chí súcuan ni nujnahan ni maá Tátá yō Yaā Dios.

⁵ Jee yúcuan na cáhán yō jee yóhoyo luu cújéhu ya ní cáni. Súcuan na cóo. Amén.

Siquí jee tuá na inga jñuhun cácu ñayuu

⁶ Te nánán náá ni rí jíto ri jee yóhoyo yachí cánducú ró stóo ró Yaā Dios, Yaā ní cana rohó jee quívi ró ndaha ya siquí jee cundáhú ni Cristo yohó. Chí ni candiquín ró inga jñuhun jee sñ cáhán.

⁷ Te tú cuíti na inga jñuhun jnama yohó iyó. Te cáhiyo jecu ñayuu castáhán i rohó, te cácuni i nasama i jñuhun ndese jnáma Cristo yohó.

⁸ Te núu iin ñayuu nacani inga jñuhun nuū rō ndese jnáma ya rohó, te núu tu quíjnáhan jiín jñuhun ni canacani ri nuū rō xihna gā, na jánhnú ndetú ñayuu ún. Te vésú maá rí chí iin ndajehé jee quíji nde andivi nacani inga jñuhun núu, na jánhnú ndetú.

⁹ Je ni cáhán ri jíin ró, te suni súcuan cáhán tucu ri vijna: Na-ni tēe nacani inga jñuhun nuū rō, te núu tu quíjnáhan jiín jñuhun jee ní cajetáhú ró, na jánhnú ndetú tēe ún.

¹⁰ Te jee cáhán ri súcuan, chí ndúcú rí jee cuajnúhún ñayuu ruhū, chí Yaā Dios? ¿Chí ndúcú rí jee cúsiñ ni ñayuu jíin rí, cájeni ni rō? Núu ndúcú gá rí jee cúsiñ ni ñayuu jíin rí, te nasū mozo Cristo cúu ri núu súcuan.

Ndese ni jinū Pablo cúu de apóstol

¹¹ Te cástúhun rí nuū rō, hermano jíjnáhan ró, jee jñuhun jnáma ya yohó jee nácani ri, nasū jee ní jeni ní maá rí jíin ñayuu cúu.

¹² Chí nasū ñayuu ni stéén nuū rí, ni nasū ñayuu ni sáha jee ní cutúhva rí, chí sa suhva máá Jesucristo ni steén nuū rí.

¹³ Chí jee ní cajini jñuhun ró ndese ni sáha ri nde saá, ná ní chíñúhún rí sahán jnáhan ri ñayuu hebreo. Te cájini rō jee yóhoyo ni jito xeén rí ñayuu cácandije nuū Yaā Dios, te ní condihvi ní rí snáá rí i núu.

¹⁴ Te vāha ga ní cutúhva ri sahán ún vésú cuehē gā tēe nacióon rí jee ní cajehnu jíin rí, chí ní condihvi gā ní rí siquí táca jee ní cajequin jíi rí.

¹⁵ Te vésú súcuan te Yaā Dios je ní nacáji ya ruhū nde ná tu cacu rí, te iin quívi te ní cusí ni yā ni cana ya ruhū jee quívi ri ndaha ya, siquí jee yóhoyo ni cundáhú ní yā ruhū.

¹⁶ Te ní steén yā Sēhe ya nuū rí, návāha nacani ri jñuhun ndese jnáma ya ñayuu táca nacióon jee tu jíni jñuhun ya. Yúcuán na te tu ní cájñuhun rí ni iin ñayuu,

¹⁷ ni tu ní jéhén rí ñuu Jerusalén nuū tēe cácuu apóstol xihna gā vésú ruhū. Chí sa suhva ni jehēn-ni ri nde región Arabia, te saá te ní nuhūn tucu ri ñuu Damasco.

¹⁸ Yúcuán na te nde ni yāha uní cuiyā, te ní jehēn rí Jerusalén. Te ní jini jnáhan ri jíin Pedro, te ní condee rí jíin de xahūn-ni quívi.

¹⁹ Te tu ní jíto ri nuū táca gá apóstol, chí máá iin-ni nuū Jacobo ñani maá Jítoho yō.

²⁰ Jñuhun yāha jee tēe ri cuajeē nuū rō, chí jíni Yaā Dios jee ndaa cúu.

²¹ Yúcuán na te ní jehēn rí ní región Siria jíin Cilicia.

²² Te ñayuu cácandije jee yíhi ndaha Cristo, jee cáyucú región Judea, ná tu coto cuíti i nuū rí saá.

²³ Chí máni jñuhun-ni ní cajini i cácahán ñayuu: Tēe ní jito xeén yohó ndé saá, vijna chí nácani de jñuhun cándije yó jee ní nducú de snáa de nde saá, áchí i.

²⁴ Te ní cacahán i jee yóhoyo cújéhu Yaā Dios jee súcuan ni sáha ya jíin rí.

Jee ní cajetáhú táca gá apóstol un Pablo

2

¹ Yúcuán na te nde nuū uxí cuñ cuiyā, te ní jehēn tucu ri Jerusalén jíin Bernabé, te suni ní jeca rí Tito ni jehēn de jíin rí.

² Te ní jehēn rí chí máá Yaā Dios ní steén yā jee jíni ñúhún quíhín rí. Te ní candutútú sñ nene tēe cácujuhnu nuū ñayuu cácandije ún. Te ní castúhun rí nuū de siquí jñuhun jnáma ya yohó jee nácani ri nuū ñayuu táca nacióon tu jíni jñuhun ya. Te súcuan ni sáha ri návāha cuajnúhún de jñiñu rí, te ma quéndōo cáhá jñiñu sáha ri jíin jee ní sáha rí.

³ Te ní tu ní cásaá fuerza de Tito, tēe ní jica jíin rí, jee cóndee jñuní circuncidar de, vésú nasū tēe hebreo cúu de.

⁴ Te súcuan ní cundaá, vésú ní quívicoo jecu tēe stáhú jee sáha de jee hermano cácuu de. Te tēe un ní quívicoo de návāha yuhu-ni coto de ndese ni ndulibre yó nuū ley circuncidar siquí jee yíhi yó ndaha Cristo Jesús. Chí cácuni de jee squicu tucu yó ley un, nduu tucu yó mozo nuū ley un.

⁵ Te tu ní cajetáhú cuíti ri nuū tēe ún, chí cúni rí jee quéndōo níhin ró jíjnáhan ró jíin jñuhun jnáma ya yohó.

⁶ Te máá tée cácujeñhu nuū ñayuu cácanđije ún, tuá na inga jniñu jée ní cáncacu de nuū rí. Te máá rí chi tu ní chíhi ri cuenta siquĩ jeē cácujeñhu de, chí suni Yaā Dios tu sáha ya cuenta, chí inuú-ni cúu ndíviĩ tēe nuū yá.

⁷ Chi sa suhva ni cajini de jeē jñuhun jnáma ya yohó, ndíso jniñu ri nacani ri nuū ñayuu táca nacióñ jeē tu casáha circuncidar, nájnūhun nácani Pedro jñuhun un nuū ñayuu hebreo jeē casáha circuncidar.

⁸ Chi Yaā Dios jeē ní tají Pedro jeē nácani de jñuhun nuū ñayuu hebreo, suni máá yá ní tají rúhū jeē nácani ri jñuhun nuū ñayuu táca nacióñ tu jini jñuhun ya.

⁹ Jeē yúcuan, Jacobo jiín Pedro jiín Juan, ni cajini de jeē Yaā Dios ni jēhe ya jniñu luu yáha nuū rí. Te tēe un cácahāñ ñayuu cácanđije jeē máá de cácujeñhu ga. Te ni cajni de ndaha ri jiín ndaha Bernabé, jeē ní castéén de jeē cáhyo maní de jiín rí, jiín jée ní cacundaā ní de jeē máá rí quingōo nacani jñuhun nuū ñayuu táca gá nacióñ, te máá de jíjnáhan de nuū ñayuu hebreo.

¹⁰ Te máá in-ni jeē ní cajicān de cúu jeē cónahāñ rí chindéé ñáhāñ rí ñayuu cándoho ndáhú, te jniñu ún je ni candihví ní rí ní sáha ri.

Jeē ní cáhāñ Pablo nuū Pedro

¹¹ Te ná ní quiji Pedro ñuu Antioquí, te ni cahāñ caji rí nuū de, chí ní stívi de jniñu.

¹² Chi nde ná tu quecoo sava jnáhan de hebreo jeē ní tají Jacobo, te yéji de staa jiín ñayuu jeē násuú hebreo cácuu. Yúcuán na te nuū ní quecoo tēe ún, te ni cusāñ de jeē tuá yéji de jiín i, chí yúhú de jeē cuni táca tēe un jée tuá squicu de ley jnáhan de hebreo. Chí áchí ley jeē ma cúu caji de staa jiín ñayuu jeē tu casáha circuncidar.

¹³ Te sava ga tēe hebreo jeē cácanđije, suni ni cacujiyo de nuū i, nájnūhun ní sáha Pedro, chí cáyūhú de jeē cuni tēe ún. Te nde máá Bernabé ní cascáhāñ de ni cujiyo.

¹⁴ Yúcuán na te ni jini rí jeē ní canayūhú de caji de staa jiín ñayuu ún, cúu jeē tuá jica de jiín modo jeē cahāñ jñuhun jnáma ya yohó. Te ni cahāñ rí nuū Pedro, jito jiniú táca de: Róhó jée cúu tēe nacióñ yó hebreo, tuá squicu ró ley jnáhan yó hebreo, chí yéji ró jiín ñayuu ún. ¿Te najehē safuerza ró i jeē squicu i ley jnáhan yó hebreo núu súcuan? ní achí rí.

Īn-ni modo jnáma ya ñayuu hebreo jiín táca gá nacióñ

¹⁵ Te yohó chí cúu yó ñayuu hebreo, te cácahāñ yó jeē násuú ñayuu táca gá nacióñ casáha cuēchi cácuu yó.

¹⁶ Te vēsú súcuan te jini yó jeē ní in yó tu quéndōo ndaa yó nuū Yaā Dios jeē squicu yó jniñu ndácu ley Moisés jenahāñ, chí máá jée candije yó jeē Jesucristo ndahva yá cuēchi yó. Jeē yúcuan suni máá yó ní candije yó Jesucristo, návāha ndahva yá cuēchi yó siquĩ

jeē candije yó, nasūu jiín jée nducú yó squicu yó ley un. Chí áchí tutu ĩ: Ní in ñayuu ma quéndōo ndaa i nuū Yaā Dios jiín jée nducú i squicu i jniñu jeē ndácu ley, achí.

¹⁷ Te máá yó ñayuu hebreo, núu cuni yó jeē ndahva Yaā Dios cuēchi yó siquĩ jeē ní jihí Cristo jehé yó, suu cúu jeē jécūhun ni yó jeē suni ñayuu casáha cuēchi cúu yó, nájnūhun táca gá ñayuu. Núu súcuan ¿te á cuēchi ní sáha yó jeē ní stóo yó ley jenahāñ ná ní candije yó Cristo? Tú cuiti jeē súcuan.

¹⁸ Chi sa núu naquihin tucu yó ley jeē ní stóo yó un, te súcuan tēe yó cuēchi siquĩ máá yó.

¹⁹ Chi ruhū, nájnūhun ní jihí rí ní sáha ley un, te jeē yúcuan má cúu ga ndacu jniñu nuū rí. Te súcuan te cuu cotecu rí jeē sáha ri jeē cuni Yaā Dios.

²⁰ Chí nájnūhun je ní jihí rí jicā cruz jiín Cristo, te vijna chí tuá técu rí jeē máá rí, chí máá Cristo cúu jeē técu ini rí. Te jeē técu rí ini ñayivi yáha vijna cúu jeē candije rí jeē Sēhe Yaā Dios chindéé ñáhāñ yá ruhū. Chí ní cundáhú ní yá ruhū te ní socó yá máá yá jehé rí.

²¹ Núu súcuan te tu cuni rí casi rí nuū jñuhun jeē ndahva Yaā Dios cuēchi yó siquĩ jeē yóhyo váha ní yá jiín yó. Chí núu jeē quéndōo ndaa yó nuū yá jeē nducú yó squicu yó ley jenahāñ, yúcuán na te tu ndé jéjniñu jeē ní jihí Cristo nuú.

Jñuhun ley jiín jñuhun cácanđije

3

¹ Róhó hermano ñuu Galacia, ¿naun tu cájecūhun ní ró? ¿Nde tēe ní saca núu xiní ró jeē tuá cájetáhú ró jñuhun ndaa? Chí ná ní canacani ri jñuhun ya nuū ró, te cájí ndasí ní cajecūhun ní ró jeē ní jihí Jesucristo jicā cruz jehé ró.

² Īn-ni jñuhun yáha cájnūhun rí rohó: ¿Ndese ní canihñ ró Espíritu Santo? ¿A jée ní cacundeyí ró squicu ró jniñu ndácu ley Moisés? Tú cuiti, chí jeē ní cacandije ró jñuhun jnáma ya rohó jée ní cajini sóho ró.

³ ¿Ndese cúu jeē tu cájecūhun cuiti ní ró? Chí xihna gā ní cacandije ró jée ní jihí Cristo jeē jnama ya rohó, te ní canihñ ró Espíritu. Te vijna ¿á cajeni ní ró jeē stóo ró jñuhun ún te fuerza máá ró squicu ró ley un, te cácu ró naún?

⁴ Núu súcuan te tu ndé ní jéjniñu cuiti jeē ní castóho ñayuu rohó siquĩ jñuhun jnáma Cristo rohó, chí vijna cáncucú ró squéndōo ró jñuhun ún. Nacā jeē váha te núu jeē tu ní castóo ró, chí sa cácanđije ndije ró yá.

⁵ ¿Te na siquĩ cúu jeē jēhe Yaā Dios Espíritu yá nuū ró te sáha ya jniñu jéñhu mēñhu ró? Tu sáha ya siquĩ jeē cáncucú ró squicu ró ley un, chí siquĩ jeē ní cacandije ró jñuhun jnáma ya rohó jée ní cajini sóho ró.

⁶ Abraham ni candíje de jeē sāha Yaā Dios jeē ni jéjnūhun ya, te jeē yúcuan ní ndahva yā cuēchi de.

⁷ Nū sūcuan te na jécūhun ni rō jijnáhan ró jéē ñayuu cáncandíje jeē sāha Yaā Dios jehē i, ndívi i yucūn Abraham siquī jeē sūcuan cáncandíje i.

⁸ Chi nde jenahán je cáhán tutu ñi jeē ñayuu tǎcá naciōn tu jíní jnūhun Yaā Dios, ndahva yā cuēchi i nūu candíje i ún. Te nde ná tu cuu tǎca jéē yáha te je ni jejnūhun ya jnūhun váha yáha nuū Abraham: Jeē rohó cúu jeē quendōo ndetū ñayuu tǎcá naciōn.

⁹ Nū sūcuan te ñayuu cáncandíje, quendōo ndetū i jíní Abraham, tēe ni candíje jeē ni jéjnūhun ya.

¹⁰ Te sa jnahnū ndetū ñayuu jeē cánducú i quendōo ndaā i jeē jíní ley Moisés. Chi sūcuan yósó nūu tútu ñi: Jnahnū ndetū tǎca ñayuu jeē tu squícu ndíhi cuítí jnūhun yósó nūu tútu ley, achí.

¹¹ Nū sūcuan te cájí cúu jeē ni ñi ñayuu ma quendōo ndaā i nuū Yaā Dios siquī jeē nducú i squícu i ley un. Chi cáhán tutu: Ñayuu jeē ní ndahva yā cuēchi i, técu i jeē candíje i jeē sāha ya jehē i, achí.

¹² Te ley Moisés tu cáhán jeē cótecu yō níí cáni siquī jeē candíje yó, chí sa suhva cáhán: Nūu ndé ñayuu squícu jniñu yáha, te cotecu i sáha, achí.

¹³ Te Cristo ni jnama ya yohó nūu jnūhun cáhán ley jeē jnahnú ndetū yō siquī cuēchi yó, chí máá yá ní ndoho siquī jnūhun jeē jnahnú ndetū yō. Chi yósó nūu tutu ñi: Tǎca ñayuu condita caa jicá yúnju, jnahnú ndetū i, achí.

¹⁴ Te Cristo Jesús ni jíhi yā jicá yúnju cruz náváha quendōo ndetū ñayuu tǎcá naciōn sáha ya. Chi jnūhun jeē ni jéjnūhun ya quendōo ndetū Abraham, jinū nuū i. Te sūcuan te nūu candíje yó jeē ni sáha Yaā Dios jehē yó, te nihín yō Espíritu jeē ni jéjnūhun ya quíji.

Siquī ley jíní siquī contrato jeē ni jéjnūhun ya

¹⁵ Hermano, na cáhán rī ñi jnūhun ndese cásáha ñayuu ñayiví: Nūu ñi tēe sáha de ñi contrato chí ñi acta, te nūu je ni cucutú ní sáha de firmar, te ma cúu ga najnanū, ní ma cúu jecosó gǎ.

¹⁶ Te suní sūcuan ní sáha Yaā Dios ñi contrato jeē ní jéjnūhun ya nuū Abraham jíní yucūn de jeē quíji. Te tu cáhán tutu ñi siquī cuēhē yucūn de, chí sa cáhán siquī ñi-ní yucūn de, te suu cúu Cristo.

¹⁷ Nūu sūcuan te jnūhun jeē cáhán rī yáha cúu jeē xihna gǎ ní sáha Yaā Dios ñi contrato jíní Abraham, jeē quíji Cristo jnama ya yohó, te ní sácútu yá. Yúcuan na te ní yáha cuūn ciento ocó uxí cuiyá, te sáa te ní jéhe ya ley nuū Moisés. Te ley un jéé ní quee cueé gǎ,

ma cúu nacanū contrato un, ní ma cúu casi nuū jnūhun jeē ní jéjnūhun ya jeē jnama ya yohó.

¹⁸ Chi nūu jeē jíní ley Moisés jnama Yaā Dios ñayuu, yúcuan na te nastū siquī contrato jeē ní jéjnūhun ya cúu. Chí sa suhva siquī maá jéé ní jéjnūhun Yaā Dios nuū Abraham cúu jeē ní jnama ya de.

¹⁹ Nūu sūcuan zte ndese jéjníñu ley Moisés? Jéjníñu chí ní jéhe ya un cueé gǎ náváha nastū cuēchi i. Te ní ndacu jniñu máá-ní nde ná tu quíji Cristo, Yaa cúu yucūn jeé ní jéjnūhun Yaā Dios jeē quíji. Te nde ná ní jéhe Yaā Dios ley un nūu ñayuu, te ní tǎjí yá tǎcá ndajéhé yá ní cacastūhun nūu Moisés, te Moisés ní nacachí nuū i.

²⁰ Te sán cúu jnūhun jeē ní jéjnūhun ya nuū Abraham jeē quíji Cristo, chí máíñhún-ní ya ní jejnūhun, te tu ní jíní ñihún ní ñi jeé nacachí nuū Abraham.

Siquī ndese jéjníñu ley jenahán

²¹ Nūu sūcuan zte á cúní cahán jeē ley jeē ní jéhe Yaā Dios nuū Moisés, téjiyo jeē ní jéjnūhun ya ún? Tú cuítí jeē sūcuan. Chí nūu jeē ní jéhe Yaā Dios ñi ley jeē cótecu ñayuu níí cáni sáha, yúcuan na te quendōo ndaā i nuū yá siquī jeē squícu i jniñu ndácu ley un nūu.

²² Te tuú chí yósó nūu tútu ñi jeē ndíhi ñayuu ñayiví, nájnūhun yíndihyú i vecáa chí cáyíhi i chíji cuēchi. Te sūcuan cúu náváha tǎcá i jeē candíje i jeē ní jíhi Jesucristo jehē i, nihín i máá jéé ní jéjnūhun ya nuū i siquī jeē candíje i ún.

²³ Chi nde ná tu quee jnūhun candíje yó Cristo, te nájnūhun ní yíndihyú yó ní sáha ley jenahán, náváha condetu yó quíví quíji Cristo, Yaā candíje yó.

²⁴ Nūu sūcuan te ley ní cuu ñi jeē ndíto yóhó nájnūhun ñi mozo ndíto sūchi lúlí, te ní jejníñu nde quíví ní quíji Cristo, náváha candíje yó jéé ní jíhi yá jehē yó, te ndahva Yaā Dios cuēchi yó.

²⁵ Te vijna jeé ní quee Cristo, Yaā candíje yó, te tuá yíhi yó ndaha ley jeé cúu nájnūhun mozo ndíto yóhó.

²⁶ Chi ndívii rō cácuu sēhe Yaā Dios siquī jeé ní cacandíje ró Cristo Jesús.

²⁷ Chí tǎca ró jeé ní jendute ró siquī jeé ní quíví ró ndaha Cristo, ní sáha ya jeé ní nduu ró nájnūhun cúu máá yá.

²⁸ Te vijna chí tuá cúu ró ní ñayuu hebreo ní ñayuu griego, ní mozo jeé ní jeen ñayuu, ní ñayuu sájniñu cuenta maá, ní tēe ní ñahan. Chí ñi na cúu ró nūu yá jeé cáyíhi ró ndaha Cristo Jesús.

²⁹ Te nūu cáyíhi ró ndaha Cristo, nūu sūcuan te yucūn Abraham cácuu ndije ró, te nihín rō maá táhū jeé ní jéjnūhun ya.

4

¹ Jeē cahán rī jīn rō jijnáhan ró cúu jeē yáha: ĩn sūchi chíu táhū, vēsú maá i naquihín ndihí jeē névāha tátá i, te núu lúlí i chí inuú cúu i jīn mozo.

² Chi yíhi i ndaha táca jeē ndító i jīn jeē ndító ndajniñu i, nde quee quiví jeē ní jeni tátá i, te saá te nihín i.

³ Te suni súcuan yóhó, chí nde ná tu jecūhun ni yó siquí Cristo te ni cuu yó nájñūhun sūchi lúlí, te ni yíhi yó chíji táca costumbre jeē ní cajequin ñayuu ñayiví.

⁴ Te nde ná ni quee quiví jeē ní jeni Yaa Dios, te ni tají yá Sēhe ya, ni cacu ya chíji ĩn ñahan, te ni cacu ya yucūn ñayuu nación hebreo jeē cáyihí chíji ley Moisés.

⁵ Súcuan ni cacu ya návāha jnama ya yohó jeē tuá quihí yó chíji ley un, te návāha naquihín Yaa Dios yohó cuu yó sēhe ya.

⁶ Te siquí jeē cácuu ró sēhe ya, te ni tají Yaa Dios Espíritu Sēhe ya ni quiví ĩn anuá rō, te sáha ya jeē cácahan jee rō: Tátá maá ná.

⁷ Núu súcuan te tuá cácuu ró nájñūhun mozo, chí sēhe ya cácuu rō. Te jeē cácuu ró sēhe Yaa Dios, te suni nihín rō maá táhū jeē ní jijnūhun ya jeē jīn Cristo.

Jeē nacani ni Pablo siquí ñayuu cácaandje

⁸ Chi nde saá, nde ná tu jecūhun ni rō ndese Yaa cúu Yaa Dios, te ni cacuu ró mozo núu táca jeē násūu yāa ndaā cúu.

⁹ Te vijna chí je cájini rō ndese Yaa cúu ya, te vāha ga na cáhan rī jeē maá yá je jíní yā rohó. Núu súcuan ꝑte najehē cácuu rō nandió coo ró nduu tucu ró mozo nuū táca costumbre ñayuu ñayiví jeē tu nihín jniñu cuiti?

¹⁰ Chi máni jeē cánē ĩ rō quiví jīn yóo jīn vico jīn cuíya.

¹¹ Te yúhú rī sanaa te tu ní jéjiniñu cuiti jeē ní nacani rī jñūhun nuū rō.

¹² Cáhan ndahú rī jīn ró hermano, jeē na cáni ni rō nájñūhun jéni ni maá rī jeē tuá squicu rī costumbre ñayuu hebreo. Chi ruhū ní nasáha rī maá rī nájñūhun maá ró jeē tu ní cáyihí ró núu ley costumbre ñayuu hebreo. Te tú na vé ní casáha ró jeē cucuihyá ni rī nde saá.

¹³ Chi cájini rō ndese ni cuu ná ni nacani núu rī jñūhun nuū rō ndese jnáma ya yohó. Chi siquí jeē cuhú rī te ni jecuiñí rī ĩnuu rō ní nacani rī jñūhun.

¹⁴ Te vēsú jñūndóho ni cuu jeē ní cocuhū rī, te tu ní casájéē ni rō nuū rī, ni tu ní casquéhichí ni rō ruhū. Chi sa ni cajetáhú ró ruhū nájñūhun jeē cúu rī ĩn ndajéhé Yaa Dios, chí nájñūhun jeē cúu rī maá Cristo Jesús.

¹⁵ Núu súcuan ꝑte najehē cúu jeē tuá cácusíi ni rō jīn rī vijna? Chi náhan rī jeē vāha ni casáha ró jeē ní cajnahuhū ni rō núu jeē cúu

te tava rō tinūu vāha maá ró, cuāha ró nduu tinūu rī nuú.

¹⁶ Te vijna zá ní nduu ri enemigo rō siquí jeē cachí rī máni jñūhun ndaā nuū rō, chí naúñ?

¹⁷ Te cáhiyo tēe jeē cándihví ni siquí rō jijnáhan ró, te nasūu jeē quéndōo vāha ánuá rō, chí sa jeē cácuu de nasásūn de rohó jīn ruhū, návāha condihví ni rō jeē cúu maá de.

¹⁸ Te iyó vāha jeē cándihví ni de jehē rō, te núu jeē quéndōo vāha ánuá rō cúu núu. Chi níni jini ñūhún sáha de jeē vāha rohó, vēsú núu ĩne rī jīn ró chí núu tú rī ĩne.

¹⁹ Sēhē máni jijnáhan ró, jeē siquí rohó cúu jeē inga jinu jñahuhū ni rī, chí nájñūhun ĩn ñahan scácu sēhe, súcuan ndóho rī jehē rō. Te suu cúu jeē jñahuhū ni rī ndéto rī jeē na ndúndaā anuá rō ndacu ró Cristo.

²⁰ Nacá jeē vāha núu jeē ndeē rī jīn ró vijna ñūhún, návāha cuu cahān maní rī jīn ró. Te tu cújñúni cuiti ni rī ndese ga cúu jeē cáni ni rī siquí rō.

Jñūhun yátá siquí Agar jīn Sara

²¹ Rohó jijnáhan ró jeē cácuu ró quihí ró chíji ley Moisés, cachí nuū rī: ¿A tu ní cájini sóho ró ndese cáhan ley un?

²² Chi cáhan tutu ĩ jeē Abraham ni ĩyo uū sēhe yí de. Te ĩn i cúu sēhe Agar, ñahan cúu mozo vehe de. Te inga i cúu sēhe ñahan iyó libre, suu ñashí de Sara jeē ní cuu ña ñahan numá.

²³ Te sēhe ñahan cúu mozo, ni cacu i nájñūhun cácu táca gá sūchi lúlí. Te sēhe ñahan cúu libre, ni cacu i maá siquí jeē súcuan ni jijnūhun Yaa Dios.

²⁴ Te yāha cúu ĩn jñūhun yátá, chí ndindúú ñahan un cúu ña nájñūhun ndindúú contrato jeē ní sáha Yaa Dios jīn ñayuu. Maá ñahan nání Agar, cúu ña nájñūhun contrato ley jeē véji nde yucu Sinái. Te ñayuu cáyihí chíji contrato ley, cácuu i mozo nuū ley un.

²⁵ Chi Agar cúu nájñūhun ley jeē ní jéhe Yaa Dios xiní yucu Sinái jeē ĩn nde Arabia. Te cúu ña nájñūhun Jerusalén, ĩnuu ñayuu hebreo, jeē iyó vijna, chí táca sēhe ĩnuu Jerusalén, cácuu i nájñūhun mozo nuū ley un.

²⁶ Te Jerusalén jeē iyó andiví, chí sa suhva iyó libre nájñūhun Sara. Te yóhó ñayuu cácaandje, nájñūhun sēhe un cácuu yó, chí iyó libre yó nuū contrato ley.

²⁷ Chi suhva yósó núu tútu ĩ: Rohó jeē ní cuu ró ñahan numá jeē tú sēhe ró, na cúsi ni rō.

Rohó jeē tu ní jéhnde chíji ró jeē scácu ró, na cána jee ró jeē cúsi ni rō.

Chi coo cuehē gá sēhe rohó jeē ní cuu ró ñahan numá vēsú ñahan jeē jé ní scácu sēhe.

Achí tutu.

²⁸ Hermano, sēhe Yaa Dios cácuu yó, chí súcuan ni jijnūhun ya nuū yó, nájñūhun ní

jejnūhun ya nuū Abraham jeē cacu sēhe de Isaac.

²⁹ Te nde saá te inga sūchi ní cacu nájnūhun cacu táca gá ñayuu, ní jito xeēn i Isaac, sūchi ní cacu ní sáha Espíritu. Te nájnūhun ní iyo saá, suni sūcuan cájito xeēn ñayuu táca sēhe Yaā Dios nde vijna.

³⁰ ¿Te ndese cáhán tutu ii? Achí: Quenehen ró ñahan cúu mozo na quihín ña jíin sēhe ña. Chí sēhe ñahan cúu mozo, ma nihín i tahū jíin sēhe ñahan libre, achí yá jíin Abraham.

³¹ Núu sūcuan hermano, tu cúu yó nájnūhun sēhe ñahan cúu mozo, chí nájnūhun sēhe ñahan libre cúu yó.

Na cuiñi nihin yó jíin jnūhun jeē ni sáha libre yohó

5

¹ Te Cristo ní sáha libre yá yohó jée tuá yáhi yó chíi ley Moisés. Núu sūcuan te cuiñi nihin ró jíin jnūhun jeē ni sáha libre yá yohó, te ma ndívicoo tucu ró cuu ró mozo nuū ley un.

² Sáha ró cuenta jijnáhan ró, chí ruhū Pablo cahán rí jíin ró jeē núu squicu ró ley circuncidar, yūcuán na te tu nihín jniñu cuiñi jeē ní candíje ró jée ní jíhi Cristo jehē ró.

³ Te inga jinu cáhán nihin rí jíin táca tée cánducu cuu circuncidar, jeē núu sūcuan te suni cánuú jée squicu de ndivii cuiñi gá jnūhun cáhán ley Moisés.

⁴ Róhó jée cánducu ró quendoo ndaá ró jeē squicu ró ley un, je ní casiáá ró Cristo núu sūcuan. Je ní castoo ró jnūhun jeē ndahva yá cuēchi ró síquī jeē cundáhú ní Yaā Dios rohó.

⁵ Te máá yó chí cájica yó jíin Espíritu, te cánducje yó jée ní ndahva yá cuēchi yó, te jeē yūcuan nūhun ní yó jeē quendoo ndaá yó quiví cuiñi yó núu Yaā Dios.

⁶ Chí yohó jée cáyihí ndaha Cristo Jesús, vesú núu jeē cúu yó circuncidar chí tu cúu yó, tú na vé nihín jniñu. Jee nihín jniñu cúu jeē candíje yó jeē sáha ya jehē yó. Te yūcuan sáha jeē cundáhú ní yó jnāhan yó.

⁷ Vāha ní cacandíje ró núu. ¿Te ndé iin ní jesi jeē tuá cájetáhú ró jnūhun ndaá núu sūcuan?

⁸ Jnūhun jeē ní cascáhán de róhó, chí tú vēji nuū máá Yaā ní cana róhó ní quívicoo ró ndaha ya.

⁹ Te ma náá ní ró jeē tée cástáhú róhó, jnūhun cástéén de cúu nájnūhun levadura, chí vesú jecu-ni levadura, te ndáa ndihí ñujen sáha.

¹⁰ Te cúcáhnú ní rí jeē máá Jítoho yó sáha ya jeē ma cándíje ró jijnáhan ró inga jnūhun jeē sín cáhán. Te máá Yaā Dios cuāha ya castigo téje jeē sáca núu xiní ró, núu na-ni téje cúu de.

¹¹ Te ruhū, hermano, núu jeē nácani ga rí jnūhun ley circuncidar nde vijna, te jnāhan rí ñayuu hebreo ma cóto xeēn i ruhū nuú. Chí ma quiti ní i jeē nácani rí jnūhun jeē ní jíhi

Cristo jicā cruz, núu jeē sūni nácani rí jnūhun circuncidar nuú.

¹² Te táca téje jeē sáca núu xiní ró síquī jnūhun ún, vāha ga na cáhnde gá de máá de núu sūcuan.

¹³ Chí máá ró jijnáhan ró hermano, ní cana ya rohó návāha coo libre ró nuū ley un. Te vesú iyó libre ró, te ma cáni ní ró jeē cúu quívicoo ró táca cuēchi jeē cúu modo neé cúní máá ró, chí sa suhva na sáha ró máá ró mozo jeē chindéé ñáhan ró jnāhan ró síquī jeē cundáhú ní ró i.

¹⁴ Chí je ní squicu ró ndihí ley núu squicu ró iin-ní jnūhun ndácu jniñu yáha: Cundáhú ní ró jnāhan ró nájnūhun cundáhú ní ró máá ró, achí.

¹⁵ Te núu máni jeē ndóna xeēn ró síquī jnāhan ró jée cuajnáhan ró, te coto ma snáá ró jniñu jeē ní sáha ya mehñu ró jijnáhan ró.

Modo cuní ñayuu tu cándíje jíin modo sáha Espíritu

¹⁶ Sūcuan cáhán rí jíin ró jijnáhan ró: Caca ró nájnūhun cúní máá Espíritu, te yūcuán na te ma sáha ga ró modo jeē cuní máá ró.

¹⁷ Chí táca jée cuní máá yó, yūcuan jési nuū jeē cuní máá Espíritu. Te jeē cuní Espíritu, jési nuú modo neé jée cuní máá yó. Te jee ndindúú yáha chí cájesi nuū jnāhan, te jeē yūcuan tu cúu sáha ró jniñu vāha jeē cuní ró sáha ró.

¹⁸ Te núu máá Espíritu steén nuū ró, núu sūcuan te tuá cáyihí ró chíi ley jenahán.

¹⁹ Te iyó ndijin táca jniñu casáha ñayuu cájica jíin modo neé máá, te yāha cúu: Cásiquí ndéé jnāhan i, casáha i jniñu jnehén, casáha neé ndasí i.

²⁰ Cáchiñúhún i ídolo, casáha tásí i, cájito uhū jnāhan i, cájehán i, cácuquí ní i. Te yachí cáquítí ní i, te cándihví ní i jeē cúu máá-ni i, te cátejnhán i casásín i máá i.

²¹ Te cácuésún ní i, cájehni i ndíyi, cánajíni i, casáha i vico neé, jíin táca gá jeē sūcuan. Te cáhán nihin rí jíin ró, nájnūhun je ní cahán rí jíin ró saá, jeē ñayuu casáha sūcuan, ma nihín tahú i quívicoo i ñuu nuú ndácu Yaā Dios jniñu.

²² Te ñayuu jeē nduú i jíin Espíritu, táca jniñu yáha sáha ya jíin i: Jeē cundáhú ní jnāhan, jeē cúsí ní, jeē iyó ndeyí sá ní, jeē iyó paciencia, jeē maní ní, jeē vāha ní, jeē squicu vāha,

²³ jeē tu sáha jeē cujéhnú, jíin jée jési modo jeē cuní máá. Te tú na ley cacān cuēchi síquī ró núu sáha ró táca jniñu yáha.

²⁴ Te ñayuu cáyihí ndaha Cristo, nájnūhun je ní cajehni i modo neé máá i jicā cruz, nde jíin táca jée ndíyo neé ní i te cútíndí i.

²⁵ Te jeē sūcuan ní jēhe máá Espíritu iin vida jeē núu yó, te suni na cáca yó jíin modo steén Espíritu.

26 Te ma sandúxí yó jéē squítí ni yō jnáhan yó, te ni ma cucuésún ni yō siquí jnáhan yó.

Jnúhun jeē chindéé ñáhán yó jnáhan yó

6

1 Hermano, núu ìin jnáhan ró ni sáha cuéchi, te róhó jéē cájica jíin Espíritu, na náchuhun íchí ró í. Te jíin jnúhun vitá cahān rō jíin í, te suni condito ró máá ró jeē ma cacān ìni rō sáha ró táca cuéchi.

2 Te chindéé ñáhán ró jnáhan ró núu na vé cúu jeē ndóho í, chí súcuan cúu jeē squícu ró ley Cristo.

3 Chí núu ìin ñayuu jéni ni í jeē ñayuu teyí cúu í, vésu nasúu súcuan cúu, te stáhú í máá í núu súcuan.

4 Te táca ìin ìin ró na cóto ndee rō ndese cáa jniñu sáha ró. Te núu vāha sáha ró, yūcuán na te cuu cusā ni rō jíin jéē sáha máá ró, te tu níni jéē scāni jnáhan ró máá ró jíin jnáhan ró.

5 Chí táca ìin ìin yó cánuú squícu yó jíin jniñu ní jéhe ya nuú maá yó.

6 Te róhó jéē cascuáha jnúhun vāha ya, na chindéé ñáhán ró tēe cástéén nuú rō jíin táca jéē váha cánevāha ró.

7 Ma stívi ró caní ni rō jeē cuu sáha ró cuéchi. Chí ma cúu sácatā rō nuú Yaā Dios caní ni rō jeē tu sáha ya cuenta. Chí táca núu ndese sáha ñayuu, suu yūcuán nanihīn í.

8 Chí ñayuu jeē sáha í jeē cuní modo neé máá í, nihīn í jeē jnahnú ndetū í sáha modo jeē cuní maá í ún. Te ñayuu jeē sáha jeē cuní maá Espíritu, chí nihīn í jeē cótecu í ní cáni andívi sáha Espíritu.

9 Te ma cuíta yó jeē sáha yó jniñu váha núu súcuan, chí jeē quée maá quíví te nanihīn yó, te núu ma cuíta yó.

10 Núu súcuan te táca jínu jeē cúu sáha yó, te na sáha vāha yó jíin táca ñayuu, te hermano yó jeē cácanjíje cúu jeē cánuú gá.

Saludo jíin jnúhun cástúhun Pablo jeē sándihí

11 Condēhe ró jeē náhnu letra tēe rí cuajeē nuú rō jijnáhan ró, chí ndaha máá rí tēe rí yāhá.

12 Te tēe jeē casáfuerza de róhó cuu ró circuncidar, cásáha de siquí jeē cácuini de cuajnúhún ñayuu de. Te cásáha de návāha ma cóto xeēn ñayuu de jeē cánacani de jnúhun jeē ní jíhí Cristo jehē yó.

13 Te ní máá de jeē casáha de circuncidar, suni tu squícu vāha de ndihí ga ley jenahán. Te cácuini de jeē cuu ró circuncidar, návāha cuu sátéyí de máá de núu quihīn ró jnúni circuncidar sáha de.

14 Te ruhū tu cúni rí satéyí rí maá rí siquí ní ìin jeē yúcuan, chí máá ìin-ni siquí jeē ní jíhí Jitoho yó Jesucristo jíca cruz. Chí siquí yúcuan cúu nájnūhun ní jíhí rí, chí ní siaá rí táca jéē iyó ìni ñayíví, te suni nájnūhun ìin ndíyi cúu rí nuú ñayíví.

15 Chí núu yíhi yó ndaha Cristo Jesus, te tu níhín jniñu núu cúu yó circuncidar chí tuú. Chí jeē níhín jniñu cúu jeē ní nasájeé yá anuá yó.

16 Te ñúhun ní rí jeē táca ró jeē jíca ró jíin modo yáha, na sáha ga yā jeē coo ndeyí coo sīi ní rō, te cundáhú ní yā rohó. Te suni ñúhun ní rí jeē súcuan sáha ya jíin táca gá í jeē cúu ndíje í ñayuu cácanjíje Yaā Dios.

17 Te vijna jíin ní gá cuahān yó, cúni rí jeē ma stáhān gā ní ìin ñayuu ruhū. Chí yiquí cúnu rí ndiso seña jeē ní tújī rí ní ndoho rí jeē cúu rí mozo maá Jítoho yó Jesús.

18 Hermano, ñúhun ní rí jeē na sáha ga Jitoho yó Jesucristo jeē váha róhó jíjnáhan ró. Súcuan na cóo. Amén.

CARTA JEE NI TEE APOSTOL SAN PABLO NUU ÑAYUU ÑUU EFESO

¹ Máá rí cúu Pablo, apóstol Jesucristo, chi súcuan ni nujnahan ni Yaá Dios ni tají yá ruhú. Te téé ri carta yáha cuájeé nuú rohó ñayuu ñuu Efeso, jeé cácuu ró ñayuu maá yá jeé cácañdije ró Cristo Jesús.

² Te ñuhun ni rí jeé Tatá yō Yaá Dios jín Jítoho yō Jesucristo, na sáha ga yá jeé váha róhó, te sáha ya jeé coo ndeyí coo sñ ni ró.

Jeé sáha Cristo jeé quéndōo váha ánuá yō

³ Na cáhán yō jeé yóhōo cújéhu Yaá Dios, Yaá cúu Tatá Jítoho yō Jesucristo. Chi ni jēhe ya táca jēé váha íyō andiví jēé quéndōo váha ánuá yō, chi yáhi yó ndaha Cristo.

⁴ Chi nde ná tu jecōo ñayiví te ni nacáji ya yohó jēé quívi yó ndaha Cristo, náváha coo ndoo ánuá yō te caca ndaa yō nuú yá.

⁵ Je ni cundáhu ni yá yohó nde saá, te ni tana ya yohó jēé náquihin séhe ya yohó. Te jín Jesucristo ni sáha ya súcuan, chi ni nujnahan ni yá sáha ya.

⁶ Te jeé yúcuán níni na cáhán yō jeé yóhōo cújéhu ya, chi yóhōo váha ni sáha ya yohó jín táca jēé váha ni yá, siquí jeé yáhi yó ndaha Cristo, Séhe ya jeé maní yá jín.

⁷ Te siquí jeé yóhōo váha ni yá jín yó, te Séhe ya un ní jnama ya yohó jēé ni jíhi yá jehé yō, te ni ine cáhnu ni yá nuú cuéchi yó.

⁸ Te ni steén yá jeé cundáhu ndasi ni yá yohó, te ni sáha ya jeé jécūhun ni yō te cundíchi yó jín jñuhun ya.

⁹ Te ni sáha ya jeé cuni yō ñn jñuhun ya jeé ní yisáhi, jeé tu ní sáha ya jeé cuni ñayuu jenahán. Chí súcuan ni tee ni yá nde saá, te nujnahan ni yá sáha ya.

¹⁰ Te yáha cúu jñuhun ún: Nde na quée tiempo te sáha ya jeé ndíhi jeé yúcu andiví jín jēé yúcu ñayiví, inuú-ni nduu, quíhi ndaha Cristo.

¹¹ Te siquí jeé yáhi yó ndaha Cristo, te nihín yō tahú yō, chi je ni nacáji Yaá Dios yohó nde saá. Chí súcuan ni tee ni maá yá, chí sáha ya táca-ni jeé jé ni cundaa ni yá jeé nujnahan ni yá sáha ya.

¹² Súcuan ni sáha ya náváha máá rí jeé xihna gā ni cacandije ri Cristo, caca ndaa rí te súcuan sájeñnu rí yá jeé yóhōo luu cújéhu ya.

¹³ Te suni máá ró jijnáhan ró, ni cajini ró jñuhun ndaa jñuhun váha jeé jnáma ya rohó, te ni cacandije ró Cristo. Te ni canihín ró Espíritu Santo jeé ni jéjñuhun ya jeé cuáha ya. Te ndéé Espíritu yá ún ini anuá yō, te cúu ya nájnūhun sello jeé steén jeé cúu yó séhe Yaá Dios.

¹⁴ Te sáha ya jeé jini ndije yó jēé cucuée gá te cuáha Yaá Dios tahú yō, nde na sínu ya jniñu jeé jnáma ya ñayuu yá. Te quívi ún cahán yō jeé cújéhu ya, chí yóhōo luu cújéhu ya.

Jeé jicán tahú Pablo jehé ñayuu cácañdije

¹⁵ Te ruhú ni jini jñuhun ri ndese cácañdije ró jēé ni sáha Jítoho yō Jesús jehé ró, jín ndese cácañdihú ni ró ndíhi ñayuu cáyíhi ndaha Yaá Dios.

¹⁶ Te jeé yúcuán tu jécuiñí rí jeé nácuatáhu rí jehé ró, te jeé jicán tahú rí te tu náá ni rí cacán tahú rí jehé ró.

¹⁷ Chí jicán tahú rí jeé na sáha Yaá Dios jeé jécūhun váha ni ró te ndundíchi ró jín jñuhun ya, te cuni gā ró ndese Yaá cúu ya. Chí máá yá cúu Yaá Dios Jítoho yō Jesucristo, te cúu ya Tatá yō jeé lúu ndasi cújéhu.

¹⁸ Te jicán tahú rí jeé na sándijin gā yá nuú jeé níjnūni ró, náváha jecūhun ni ró ndese cáca ndíhi jeé cáñuhun ni ró nihín ró siquí jeé ní cana ya rohó. Te jecūhun ni ró ndese cúca cácuu ró jín táca jñuhun jéhu luu ndíso jñuhun ya jeé cúu ñayuu maá yá.

¹⁹ Te jicán tahú rí jeé na jécūhun ni ró ndese yóhōo jéhu poder yá jeé sájnifu ya ini anuá yohó jéé cúu yó ñayuu cácañdije. Chí tu ndíhi cuiti poder yá.

²⁰ Te suu poder un cúu jeé ni steén yá ná ni sáha ya ñn jniñu jéhu ga jeé ní nastécu yá Cristo méñhu ndíyí te ni scúcoo ya lado váha ya nde andiví.

²¹ Te ni jeni ya Cristo siquí táca jēé cújéhu, jín jēé ndíso jniñu, jín jēé jniñ poder, jín jēé ndácu jniñu, jín siquí táca jeé cácahán ñayuu jeé cújéhu, cúu tiempo yáha, cúu tiempo quíji.

²² Te ni jēhe ya jeé cújéhu Cristo siquí ndívi. Te ni sáha ya jeé cunuú yá cújéhu ya nuú ñayuu cácañdije.

²³ Te ñayuu cácañdije un cácuu i nájnūhun yiqui cúñu ya, chí ñn na cúu i jín yá te ñuhun chítú yá ini anuá i, chí Yaá jeé ñuhun chítú ní cáhnu-ni cúu ya.

Ni cácu yó siquí jeé ní cundáhu ni yá yohó

2

¹ Te ni sáha ya jeé cotecu ró ní cáni jín Cristo. Chi je ni cacuu ró nájnūhun ndíyí nuú yá, ni sáha cuéchi ró jín jniñu néé ní casáha ró.

² Chí ni cajica ró jín jniñu yúcuán nde saá, ná ni cacondiquín ró jniñu ñayuu ñayiví, ná ni cajetáhu ró núu jexeén jeé ndácu jniñu nuú táca táchi xeén, te jica nuú tachí. Te suu cúu jeé scánda ini ñayuu nihni ni nuú Yaá Dios.

³ Te máá rí jijnáhan ri, suni súcuan ni cajica ri, chí ni casáha ri jniñu néé jēé cuni maá rí, jín táca jēé jicán yiqui cúñu rí, jín jēé cájeni néé ni rí nde saá. Jeé yúcuán suni ni cacuu

ri ñayuu jeē nihīn castigo xeēn jeē cuáha ya nuú, chí inuú-ni ni casáha ri nájñuhun casáha máá i.

⁴ Te Yaā Dios chí yóhoyo cuehē ni cundáhú ni yā yohó, te vāha ndasí ní yā jín yó.

⁵ Te náa cúu yó nájñuhun ndíyí nuú yā ni sáha cuechi yó, te ní nastécu yā yohó jéé cótecu yó ní cáni jín Cristo. Chí siquí jeē yóhoyo vāha ni yā cúu jeē ní jnama ya yohó.

⁶ Te ní nastécu yā yohó jéé cótecu inuú yó jín Cristo Jesús, te scúcoo ya yohó jín yā nde andíví.

⁷ Súcuán ni sáha ya návāha ní gá tiempo jeē quíj, te stéén yā ndese yóhoyo maní yā jín yó, jín ndese vāha ni yā jín yó jeē siquí Cristo Jesús.

⁸ Chí siquí jeē yóhoyo maní yā jín ró cúu jeē ní jnama ya rohó, chí ni cacandíje ró jéé sáha ya jehé ró. Te nasū siquí jeē ní casáha máá ró cúu, chí tahū jeē ní jéhe ya nuú ró cúu.

⁹ Chí tú na jniñu vāha ní casáha yó jéé jnama ya yohó, te jeē yúcuán ni ñn yó ma cúu sátéyí yó máá yó.

¹⁰ Chí cúu yó ñn jniñu luu jeē ní nasáha máá yá, chí ni nasáha ya yohó jéé cundúú yó jín Cristo Jesús, návāha sáha yó táca jniñu vāha jeé jí ní sátúhva Yaā Dios jeé sáha yó.

Jeé sáha Cristo jeé ndívi yó núu jñuhun maní Yaā Dios jín yó

¹¹ Núu súcuán te na núcūhun ni ró ndese ñayuu ni cacuu ró ndé saá. Chí tu ní cácuu ró ñayuu hebreo, chí sa suhva ni cacuu ró ñayuu táca nación jeē tu jín jñuhun ya. Te ñayuu hebreo jeé casáha circuncidar yíqui cúñu, ni cacahān i jeé cácuu ró ñayuu tu sáha circuncidar.

¹² Na núcūhun ni ró jeé ndé saá tu ní cáhīn ró jín Cristo, te ni cacuu ró ñayuu ñuu jicá núu nación Israel. Te tu ní cájini ró táca jñuhun contrato jeē ní jéjñuhun Yaā Dios. Te tu ní íne Yaā Dios jín ró ñayívi yáha, te tú na vé jeé vāha ní cáñuhun ni ró jeé cóo.

¹³ Te vjna chí ni ndívicoo ró núu Yaā Dios jeé tu ní cájini ró jñuhun ya nde saá, chí ni quívicoo ró ndaha Cristo siquí jeē ní jihí yā jehé ró.

¹⁴ Chí Cristo cúu Yaā sáha jeé ndúmaní jñáhan yó. Chí ni sáha ya jeé ñayuu hebreo jín ñayuu táca gá nación, ni nduu yó ñn na nuú yā. Chí ni sáha ya jeé tuá jíto uhū jñáhan yó, te suu cúu nájñuhun jeé ní jenu ya ñn jeé ndíhyú sava mehñu yó jeé sásín yohó.

¹⁵ Chí ni socó yā máá yá ní jihí yā, te súcuán ni ndahva yā ley jenahān jín jñuhun ndácu jniñu jín jéé tajnúni ndíso máá. Chí ley un ní sásín ñayuu hebreo jín táca nación jeé tu ní jín i ley un. Te ni nasquíjñáhan ya ndíhi yó jéé ní nduu yó ñn na nación jeé, yíhi yó ndaha ya. Te súcuán ni sáha ya jeé ní ndumaní jñáhan yó.

¹⁶ Te jín jéé ní jihí yā jicá cruz, te ni snáa yā jñuhun cájito uhū jñáhan ñayuu hebreo jín táca gá nación. Te ni sáha ya jeé ndívicoo yó núu jñuhun maní Yaā Dios jín yó, te ni nduu yó ñn na ñayuu máá yá.

¹⁷ Chí ni quíj Cristo ní nacani ya jñuhun vāha nuú táca ñayuu jeé na ndívi i nuú jñuhun maní yā jín i, cúu rohó ñayuu tu ní cájini jñuhun ya, te suní ñayuu jñáhan ri hebreo jeé cájini jñuhun ya.

¹⁸ Te vjna te siquí jeé ní jihí Cristo, te ndíhi yó, cúu ñayuu hebreo chí ñayuu táca gá nación, cuu quívicoo yó núu Tatá yó Yaā Dios, te ñn-ní Espíritu yá sáha.

¹⁹ Núu súcuán te tuá cúu ró nájñuhun ñayuu ñuu jicá ní ñayuu tatú, chí ñn na ni nduu ró jín ñayuu ñuu máá yá. Te jñáhan ñayuu vehe Yaā Dios cácuu ró.

²⁰ Te cácuu ró nájñuhun ñn ñn parte ñn vehe cáhnu jeé cúvāha siquí cimientu, te cimientu un cúu jñuhun Cristo jeé ní canacani táca apóstol jín téé ni canacani jñuhun ya jenahān. Te máá Jesucristo cúu nájñuhun yuú cánuú gá jeé yítuu vehe.

²¹ Te ní vehe cúvāha vāha siquí máá yá, cúúsúcun cuahān, cúu ñn templo íi jeé ndeé máá jítoho yó.

²² Te suu cúu máá ró jijnáhan ró, chí ndúú ró jín Cristo, te inuú-ni sáma ya rohó jín táca ñayuu cácaníje, cácuu ró nájñuhun ñn ñn yuú templo. Te suu cúu jeé ndeé Espíritu Yaā Dios ini ró nájñuhun ini ñn templo.

Jeé ndíso jniñu Pablo nácani de jñuhun nuú ñayuu tu jín jñuhun Yaā Dios

3

¹ Te jeé yúcuán ruhū Pablo, jicán tahú rí nuú yā. Te íne rí vecāa siquí jeé ní nacani rí jñuhun Cristo Jesús nuú rohó ñayuu táca nación jeé tu ní jín jñuhun ya nuú.

² Te jín rí jeé ní cajini ró jñuhun ndese yóhoyo vāha ni sáha Yaā Dios jín rí, chí ni jéhe ya jniñu nuú rí jeé nacani rí jñuhun vāha ya nuú ró.

³ Te jñuhun ya jeé ní yisáhí, ni nastúu ya nuú rí, nájñuhun je ní tee rí jecu siquí un núu ró.

⁴ Te núu na cáhu ró te cuu jecūhun ni ró jeé ní jini vāha rí jñuhun Cristo jeé ní yisáhí un.

⁵ Te tu ní stéén yā jñuhun sáhí un núu ní ñn ñayuu táca cuiyá ní quíj ichi yátá. Te vjna cúu jeé steén ndíjin yā jín Espíritu yā nuú táca apóstol jeé ní jeni ndoo ya, jín núu téé cácanani jñuhun ya.

⁶ Te súcuán cáhān jñuhun ní yisáhí un: Ñayuu táca gá nación, ñn cáhnu-ni nihīn i tahū i jín ñayuu hebreo, chí ni cacandíje i jñuhun jeé jnama ya i. Te inuú-ni ni nduu ndíhi i, te ñn cáhnu-ni quéndōo ndetú anuá i sáha Cristo, nájñuhun ní jéjñuhun Yaā Dios.

⁷ Te jeē siquī jnūhun yáha cúu jeē ní jeni ya ruhū jeē nácani ri jnūhun nuū rō. Chi ni cutahū rī jniñu luu yáha jeē ni jéhe ya nuū rī. Te jíin poder yā ni sáha ya un jíin rī.

⁸ Te ruhū chi cúu ri tēe núu ga nuū tāca ñayuu núu ga jeē yíhi ndaha ya. Te vesū súcuan te nuū maá rí ní jéhe ya jniñu luu yáha jeē nácani ri jnūhun vāha ya nuū ñayuu tāca naciōn jeē tu jíin, ndese yōhyo cúca yó ndihi jeē ndese jnūhun Cristo, jeē ma cánda cuiñi yō jecūhun ni yō.

⁹ Chi ni jeni ya ruhū jeē steén cají rí jeē suni maá i jnama ya i. Te yūcuan cúu jnūhun Yāā Dios jeē ni yísāhi ndé jenhán ndasí, chi maá yá ni sáha ndihi-ni.

¹⁰ Te súcuan ni sáha ya jíin ñayuu, návāha vijna te tāca jeē cácujeñhu jíin jeē ndiso jniñu nuū sucún, na cúni ndese ndíchí ndasí Yāā Dios. Chi ndíchí ndasí ni sáha ya jíin ñayuu cácandije.

¹¹ Chi súcuan ni tee ni yā nde ní cáni, te ni sáha ya jeē Jítoho yō Cristo Jesús ni squícu ya ún.

¹² Te siquī jeē ni sáha Cristo, te vijna te jíin ndije yó jeē cúu quívi yó cáhán yō jíin Yāā Dios siquī jeē candíje yó Cristo.

¹³ Núu súcuan te cáhán ndahú rí jíin ró jeē ma cucuíhyá ni rō siquī jnūndóho jeē ndóho ri jehē rō. Chi suu sáha jeē quéndōo ndetu anuá rō jíinánhan rō.

Cristo yōhyo cundáhú ni yā yohó

¹⁴ Te jeē yūcuan cúu jeē jecuiñi yití rí nuū maá Yāā cúu Tátá Jítoho yō Jesucristo.

¹⁵ Te maá yá cúu Tátá nuū ndihi ñayuu yá jeē yúcu andiví jíin ñayívi.

¹⁶ Te jícan tahú rí jeē jíin poder yā jeē cujéñhu ndasí yá, na sáha ya jeē ije vāha ni rō jíin jnūhun ya, te coo fuerza ini anuá rō, sáha Espíritu yā.

¹⁷ Te jícan rí jeē candíje nihin ró Cristo, návāha condee yā ini anuá rō, te jniñ vāha ró jnūhun jeē cundáhú ni yā rohó, te cuiñi nihin ró jíin.

¹⁸ Te súcuan te cuu jecūhun vāha ni rō jíin táca ñayuu candíje, ndese cáa jnūhun cundáhú ni Cristo yohó. Chi yōhyo jíte, cáni, cúnú, súcún jnūhun ún, chi yōhyo cuehē sáha.

¹⁹ Te jícan rí jeē na cúni vāha ró ndese cundáhú ni yā yohó, vesū tu cúu cuiñi jecūhun ni yō ndihi ndihi. Te súcuan te cundúú ró jíin Yāā Dios jeē cunuú yá ini anuá rō.

²⁰ Núu súcuan te na cáhán yō jeē yóhyo luu cújéñhu ya, chi maá yá cúu Yāā iyó poder jeē sáha ya jeē vāha ndasí gá vesú ndihi jeē jícan yó chí jeē jéni ni yō. Te sáha ya un jíin poder yā jeē sájniñu ini anuá yō.

²¹ Te na cáhán yō jeē yóhyo luu cújéñhu ya jeē siquī jeē ni sáha ya jehē ñayuu cácandije jíin jeē siquī Cristo Jesús. Te súcuan na cóo nde ní cáni cuiñi tiempo jeē quíji. Amén.

Inuú-ni cácuu ñayuu cácandije sáha Espíritu

4

¹ Te ruhū jeē íne ri vecāa siquī jnūhun maá Jítoho yō, cáhán ndahú rí jíin ró jeē na cáca ndaā rō nájnūhun cánuú caca ró jeē cácuu ró ñayuu ni cana ya.

² Te níni na cóo suchí ni rō, te coo vitá ni rō. Te na cóo paciencia rō, te cuandeyí ni rō jíin jnánhan ró jeē cundáhú ni rō i.

³ Te na cóndihvi ni rō coyūcu maní inuú ró, sáha maá Espíritu nuū véji jnūhun maní ni.

⁴ Chi ñin-ni cácuu ñayuu maá yá, te íyó ñin-ni Espíritu, te inuú cáñuhun ni yō jeē cóo jeē vāha siquī jeē ní cana ya yohó.

⁵ Te íyó ñin-ni Jítoho yō, jíin ñin-ni jnūhun cándíje yó, jíin ñin-ni jnūhun jéndute yó.

⁶ Te íyó ñin-ni Yāā Dios jeē cúu Tátá yō jíinánhan yó. Te maá yá cujéñhu siquī ndihi yó, te sájniñu ya jíin ndihi yó, te ndéé yá ini ndihi yó.

⁷ Te táca ñin ñin yó ní cacutahú yō sán sán jniñu sáha yó, núu ndese ni tana Cristo cūhva tahū un núu yō.

⁸ Jeē yúcuán cáhán tutu íi:

Ná ni ndaa ya cuanuhun yā andiví, te ni stutú yá cuehē jeē yíndihyū, cuahān yá jíin.

Te ni saja ya tahū nuū tāca ñayuu.

⁹ Te jeē cahán tutu jeē ní ndaa ya, suni cúni cahān jeē xīhna gā nde andiví ni cuun ya nde nuū cunú gá ñayívi yáha.

¹⁰ Te Yāā ní cuun, suni maá yá cúu jeē ní ndaa nde nuū sucún gá andiví, návāha cūhun chitú yá ní cáhnu-ni.

¹¹ Te ni tana ya sán sán jniñu sáha ñayuu. Chi ni jeni ya sava ñayuu cuu apóstol, te sava ga nacani jnūhun ya, te sava ga scándíje ñayuu jnūhun jeē jnáma ya i, te sava ga coo pastor condito ñayuu cácandije, te sava ga steén.

¹² Súcuan ní jeni ya ñayuu maá yá jeē cuajniñu i nuū yā, návāha cuehnu ga ñayuu Cristo jíin jnūhun ya.

¹³ Te súcuan coo nde nduu inuú-ni ndihi yó jíin jnūhun cándíje yó, te cuni vāha yó ndese Yāā cúu Sēhe Yāā Dios. Te súcuan ije vāha yó ndé na cúchitú yó jíin ndihi jnūhun jeē ñūhun chitú ini Cristo.

¹⁴ Te súcuan te ma cóo ga yō nájnūhun sūchi lúlí jeē yachi jéni yāha jéni yūcuán ni i, ni ma quívi nduu yó cháha chúcuan jíin sán sán jnūhun jeē cástéén tēe stáhú jeē yóhyo ndito de squívi de yóhó nuū jnūhun stáhú.

¹⁵ Chi sa suhva na cóndiquín yō jnūhun ndaā jíin jnūhun cundáhú ni. Te súcuan cuehnu yó jíin táca jniñu cúni Cristo, Yāā cujéñhu nuū ñayuu cácuu nájnūhun yíqui cúñu yā, chi ñin na cúu i jíin yá.

¹⁶ Te sáha ya jeē nduu inuú ni táca i jeē cáhije i cuahān i, chi cácuu i nájnūhun ñin na yíqui cúñu jíin yá. Te jéniñu vāha táca ñin ñin i ndese ni nihin jniñu i, návāha scuéñhu jnánhan te ije jíinánhan jíin jnūhun cundáhú ni.

Jeē ndújeé yó sáha Cristo

¹⁷ Núu súcuan te yáha cúu jnūhun cáhán rí jín ró, te jeē achí Jítoho yō cúu jeē cáhán níhin rí jín ró: jeē ma cáca ga rō nájñūhun cájica sava ga ñayuu jeē tu jíní i ndese Yāā cúu Yāā Dios, chí cájica i jín jnūhun jeē jéni sáá-ni máá i.

¹⁸ Te iyó nee nuū jeē níjnūni i, te tu névāha i Espírítu jeē véji nuū Yāā Dios, chí tu jíní i jnūhun ya, siquí jeē níhni ni i.

¹⁹ Te tuá cúcanu i, chí ni quíivicoo i jín jniñu neé ndasí, te ndíhví ni i sáha i táca jniñu jnéhén.

²⁰ Te rohó jíjnáhan ró, nasūu súcuan ní cáscuáha ró jnūhun Cristo,

²¹ te núu ndaā jeē ní cajini ró jnūhun ya jín jeē ní cacutūhva ró jín jnūhun ndaā Jesús.

²² Núu súcuan te na stóo ró táca jniñu ní casáha ró ichi yátá, ná ni casáha ró modo cuní máá ró jeē ní cunjéhén ánuá ró ni sáha jniñu neé stáhú jéé ni ndiyo ni ró.

²³ Te na ndújeé ánuá ró jín jéé níjnūni ró.

²⁴ Te na cuáha ró jnūhun ndujeé ró, chí nasáha Yāā Dios rohó nájñūhun cuní máá yá jeé cáca ndaā ró jín jniñu váha jniñu ndoo.

²⁵ Núu súcuan te ma cahán gā ró jnūhun stáhú, te na cáhán ndaā ró jín táca jnáhan ró, chí ñin-ni cácuu ndíhí yó.

²⁶ Núu véji ñin jeē squítí ni rohó, te ma quití neé ni ró. Te ma quití ni ró nde quée niándii.

²⁷ Ma cuáha ró jnūhun jeé sáha jexeén jeé quívi ró cuéchi.

²⁸ Ñayuu ní sacuíhná, ma sacuíhná gá i, chí sa suhva na sájniñu i, te na cócuu i jín jniñu váha, návāha níhin i jeé cuáha i nuū ñayuu cúmaní nuū.

²⁹ Ni ñin jnūhun neé ma cahán ró, chí sa suhva na cáhán ró jnūhun váha jeé scuéhnū jnáhan jín jnūhun ya, te sáha jeé quéndōo váha ñayuu jíní sōho.

³⁰ Ma sáha ró cuéchi návāha ma cucuíhvá ni Espírítu Santo Yāā Dios. Chí Espírítu yá cúu nájñūhun sello jeé steén jeé cúu yó séhe Yāā Dios, nde quiji quívi jínu jniñu jeé jnáma ya rohó.

³¹ Te na siáá ró táca jnūhun cútucu ni, jín jnūhun xeén ni, jín jnūhun quítí ni, jín jnūhun cáhán ndeváha, jín táca jnūhun neé.

³² Chí sa suhva na cóo váha ni ró jín jnáhan ró, te cundáhú ni ró i. Na cóne cáhnu ni ró nuū jnáhan ró, nájñūhun ni ine cáhnu ni Yāā Dios nuū ró siquí Cristo.

Ndese cánuú caca ndaā séhe Yāā Dios

5

¹ Núu súcuan te na ndácu ró Yāā Dios, chí cácuu ró séhe ya jeé maní yá jín.

² Te níni cundáhú ni ró jnáhan ró, nájñūhun ni cundáhú ni Cristo yohó, te ni socó yá máá yá jehé yō, ni cuu ya nájñūhun ñin londe jeé jéén asín nuū Yāā Dios jeé ni sócō yá máá yá.

³ Te vijna jeé cácuu ró séhe Yāā Dios, te ni ma sáha ró ni ma ndájñūhun ró siquí jnūhun jíca jnéni, ni táca jniñu jnéhén, ni jnūhun ndiyo ni ndajniñu.

⁴ Te ni ma cahán ró táca jnūhun sáha jeé cúcanu jnáhan, ni jnūhun cánéé íi, ni jnūhun jeé tu ndé jéjñū cuiti. Chí táca un tu níhin jniñu. Chí sa suhva na nácuatáhú ró nuū Yāā Dios.

⁵ Chí je cájini ró jeé ní ñin ñayuu cájica jnéni, ni jeé sáha jniñu jnéhén, ni jeé ndiyo ni táca ndajniñu, ma níhin tahú i quívi i ndaha Cristo jín Yāā Dios jeé ndacu ya jniñu nuū i. Chí táca jeé ndiyo ni i cúu nájñūhun ídolo i jeé cáchiñūhún i.

⁶ Te coto ró jéé ma stahú ni ñin i rohó jín táca jnūhun cáhán saá ni i, chí siquí táca jnūhun neé yáha cúu jeé quiji castigo xeén Yāā Dios nuū táca ñayuu níhni ni.

⁷ Ma quívi nduu ró jín i núu súcuan.

⁸ Chí táca quívi saá ni coyūcu ró nájñūhun nuū neé, te vijna chí cáyūcu ró jín luz máá Jítoho yō, cúu jeé cájecūhun ni ró siquí yā. Te na cáca ró nájñūhun cájica ñayuu jeé steén luz yā ini anuá i.

⁹ Chí jniñu sáha luz yā jín yó cúu táca jniñu maní ni, jniñu ndaā, jín jniñu váha.

¹⁰ Scuáha ró sáha ró táca jniñu jeé núnjahan ni máá Jítoho yō.

¹¹ Te ma quívi nduu ró jín táca jeé tu níhin jniñu jeé casáha ñayuu cáyūcu nájñūhun nuū neé. Chí sa suhva steén ró nuū i jeé tú váha casáha i.

¹² Chí cúcanu yō cahán yō siquí jniñu casáha yuhu máá i.

¹³ Te luz yá sáha jeé nátūu táca jniñu neé casáha i. Te núu cuatáhú i luz yá te caca i jín luz ún.

¹⁴ Jeé yúcuan cáhán tutu:

Rohó jeé cúhuun ni, jeé nájñūhun quíxí, natakū ni, te quenda ró méhñu ñayuu jeé cácuu nájñūhun ndíyi.

Te Cristo steén yá luz yá ini anuá ró. Achí tutu.

¹⁵ Núu súcuan te coto váha ró ndese caca yúcún ró. Te ma cáca ró nájñūhun cájica ñayuu canéé, chí caca ró nájñūhun cájica tee ndíchi.

¹⁶ Ma snáá ró tiempo, chí condíhví ni ró jín jniñu ya, chí iyó cuéhé cuéchi quívi yáha.

¹⁷ Núu súcuan te ma cóo neé xíní ró, chí sa suhva na jécūhun váha ni ró na jniñu núnjahan ni máá Jítoho yō.

¹⁸ Te ma nájini ró, chí tívi ró sáha. Chí sa suhva na ndúcú ró jeé cúnuú Espírítu Santo ini anuá ró.

¹⁹ Te cahán ró jín jnáhan ró jín salmo jín himno, yaa íi jeé cahán jnūhun ya. Te ini anuá ró cahán ró jín yá jín táca yaa, chí yúcuan cúu jeé jíta ánuá ró nuū yá chíñūhún ró yá.

²⁰ Te níní nacuatáhú ró siquī tǎcá-ní nuū Tatá yō Yāā Dios te ndacunehen ró sírhí máá Jítóho yō Jesucristo.

Ndese squícu vāha ñayuu cá candíje nuū jnánhan i

²¹ Te cuatáhú ró nuū jnánhan ró siquī jeē cáhiyo yíñúhún ró nuū Cristo.

²² Róhó ñahan cácuu ñasihí, cuatáhú ró nuū yíi ró, nájñuhun jétáhú ró nuū Jítóho yō.

²³ Chi yíi cújéhu nuū ñasihí, nájñuhun cújéhu Cristo nuū yohó ñayuu cá candíje, jeē cácuu yó nájñuhun yiqui cúñu yā, chí ñin na cúu yó jíin yā. Te máá yá jnáma ya yohó.

²⁴ Chi nájñuhun ñayuu cá candíje cájetáhú i nuū Cristo, suni súcuan ñasihí cuatáhú ña ndíhi jeē cahán yíi ña.

²⁵ Te róhó téé cácuu yíi, cundáhú ní ró ñasihí ró, nájñuhun ní cundáhú ní Cristo yohó ñayuu cá candíje, te ní socō yā máá yá jehē yō.

²⁶ Súcuan ní sáha ya jeē cóo ndoo coo íi yō nuū yā, te ní nacate ya anuá yō jíin jñuhun ya jíin jéé ní jendute yó.

²⁷ Te yohó ñayuu cá candíje chí cuiñi yó núu yā, te luu cújéhu yó. Te ma cóndee cūechi ánuá yō, ní jeē tú luu, ní ñin jeē súcuan, chí sa suhva coo ndoo coo íi yō nuū yā, te tú na vé cumani gā.

²⁸ Te nájñuhun Cristo ní cundáhú ní yā ñayuu cá candíje, suni súcuan cánuú jéé cundáhú ní yíi ñasihí de, nájñuhun cundáhú ní de máá de. Chí téé cundáhú ní de ñasihí de, máá de cundáhú ní de.

²⁹ Chi ní ñin téé tu jító uhú de máá de, chí sa suhva yéji de te ndító yúcún de máá de. Te suni súcuan sáha Cristo jíin yohó ñayuu cá candíje nuū yā.

³⁰ Chí cácuu yó nájñuhun yiqui cúñu yā, te ñin ñin yó cácuu nájñuhun ñin ñin parte yiqui cúñu yā.

³¹ Te suu cúu nájñuhun téé jeē stóo de tátá de náná de, te quíjnahan de jíin ñasihí de, te ñin na cúu ndíndúú de.

³² Yóhoyo jéhu jñuhun sáhi yáha, te cáhán rí jeē ñayuu cá candíje suni súcuan quíjnahan i jíin Cristo.

³³ Te suni súcuan ná ñin ná ñin ró cundáhú ní ró ñasihí ró, nájñuhun cundáhú ní ró máá ró. Te ñasihí na cúu yíñúhún ña jíin yíi ña.

6

¹ Te róhó séhe jíjnahan ró, cuandíje ró núu tátá ró nuū naná ró, chí yúcuan cúu jeē váha sáha ró jéé candíje ró Jítóho yō.

² Chí yáha cúu ñin jnánhan jeē uxí jñuhun ndácu jñiñu jeé ní jéhe ya, te xíhna gā jñuhun yáha ndíso tahū: Coó yíñúhún ró nuū tátá ró nuū naná ró,

³ návāha quendōo ndetū ró, te nánán cotecu ró ñin ñayívi yáha. Achí.

⁴ Te róhó tátá jíjnahan ró, ma squíi ní ró séhe ró, chí sa suhva scuéhu ró i jíin jñuhun cuandíje i, te stéén ró nuū i jeē candíje i máá Jítóho yō.

⁵ Te róhó mozo jíjnahan ró, cuandíje ró núu patrón ró ñayívi yáha, te coo yíñúhún ró te conso íyo ró núu de. Te na sájniñu ndaá sájniñu ndíje ró, cani ní ró jeé nuū Cristo cájejniñu ró.

⁶ Ma sájniñu ndúxi ró jeé máá jéé coto de te cuajñuhún de róhó. Chí sa suhva sáha ró cuenta jeé mozo Cristo cácuu ró. Te sáha ró jéé újnahan ní Yāā Dios nde jíin ñin jíin ánuá ró.

⁷ Te na cúsi ní ró sájniñu ró, te na cáni ní ró jeé nuū máá Jítóho yō cájejniñu ró, nasúu núu ñayuu.

⁸ Chí je cájini ró jeé jñiñu váha sáha ñin ñin ró, te níñin ró yáhu jñiñu yúcuan núu máá Jítóho yō, vésú cúu ró mozo chí téé sájniñu máá.

⁹ Te róhó patrón jíjnahan ró, suni súcuan sáha ró jíin mozo ró, te ma cahán xeén ró jíin i. Chí na cócuhun ní ró jeé suni máá ró jíin máá i yíhi ró ndaha Jítóho yō, Yāā ndeé andívi. Te tu sáha ya cuenta ndese cúu ñin ñin ñayuu, chí ñinu sáha ya jíin i.

Na cúcutú yó jíin táca fuerza Yāā Dios

¹⁰ Te íyó inga jñuhun, hermano jíjnahan ró. Nducú ró jeé na cóo fuerza ñin ró jíin fuerza máá Jítóho yō jeé nduú yá jíin ró, chí íyó téyí poder yā.

¹¹ Na cúcutú ró jíin táca fuerza Yāā Dios, návāha cuu cuiñi níñin ró jéé ma stahú jexeén róhó.

¹² Chí nájñuhun jeé cájejnahan yó jíin táca jéé neé. Te nasúu ñayuu cúu jeé cájejnahan yó jíin, chí sa suhva jíin táca táchi cájica nuú sucún. Te yúcuan cúu jeé cácujeñu, jíin jéé cándiso jñiñu, jíin jéé cándacu jñiñu nuū ñayuu ñayívi yáha jeé nájñuhun cájica i nuú néé.

¹³ Núu súcuan te na cúcutú ró jíin ndíhi fuerza Yāā Dios, návāha cuu cuiñi níñin ró quívi jító ndee jexeén róhó. Te súcuan coo túhva ró jíin táca ndíhi jeé cuiñi níñin ró jíin.

¹⁴ Núu súcuan te cuiñi níñin ró jíin jñuhun ndaá jeé cúu nájñuhun jeé yíhi níñin sanchí chíji ró. Te sácútu ró máá ró jíin jñuhun caca ndaá ró, te suu cúu nájñuhun jeé cúcutú soldado jíin sahma cá jeé ndíhyú de.

¹⁵ Te níní cotúhva ró nacani ró jñuhun ndeyí jñuhun síi ní jeé véji nuū Yāā Dios. Te suu cúu nájñuhun jeé chíhi soldado ndíjēn jehē de.

¹⁶ Te jeé cánuú gá cúu jeé candíje ró jeé íyó yá jíin ró. Te yúcuan cúu nájñuhun jeé túhva ró máá ró yatá ñin escudo. Chí jíin jñuhun cándíje ró un te cuu ndahva ró ndíhi jeé tají máá jéxeén, jeé cúu nájñuhun nduva jeé cayú yáñuhún punta.

¹⁷ Te cuiñi ró jíin jnúhun ni jnama ya rohó, jeē cúu nájnúhun iin lélú cāa. Te cuajníñu ró jnúhun jeē yosó núu tútu Yaā Dios jeē ni jéhe Espíritu Santo nuū rō. Chi yúcuan cúu nájnúhun jéjníñu soldado espada de.

¹⁸ Te níni cácan tahu rō nuū Yaā Dios siquī ndihi-ni, te cahān ndahú ró jíin yá jíin fuerza Espíritu. Núu súcuan te ndito na cóo ni rō, te ma jécuiñi rō jeē cacán tahu rō jehē tāca ñáyuu maá yá.

¹⁹ Te suni cahān rō jehē rī, návāha nihīn rī jnúhun cahān rī, te coo téyí ni rī nacani cáji rí jnúhun jeē jnáma ya yohó, suu jnúhun jeē ní yisāhí un.

²⁰ Chi ní taji yá ruhū jeē jíca ri nácani ri jnúhun ya ún, te jeē siquí un cúu jeē íne ri vecāa. Te na cácan tahu rō jeē coo téyí ni rī cahān rī jnúhun ya, nájnúhun cánuú cahān rī.

Saludo jeē sándihí

²¹ Tíquico cúu iin hermano jeē maní yō jíin, te cúu de tēe squícu vāha chíndéé ñájnáhan jíin rí nuū níñu máá Jítoho yō. Te máá de castúhún ndihi ndese cuahān jniñu ri te ndese íyó rí.

²² Jeē yúcuan ní taji rí de cuajeē de nuū rō, návāha cachi de ndese cáhīyo ri, te coo ndeyí ni rō jijnáhan ró sáha de.

²³ Te ñúhun ni rī jeē Tatá yō Yaā Dios jíin Jítoho yō Jesucristo, na sáha ya jeē coo ndeyí coo sīñi táca róhó jéē cácuu hermano, te coo manī gā rō jíin yá, te candije vāha ró.

²⁴ Te ñúhun ni rī jeē na sáha ga yā jeē vāha róhó jijnáhan ró jéē maní ndije ró jíin Jítoho yō Jesucristo. Súcuan na cóo. Amén.

CARTA JEE NI TEE APOSTOL SAN PABLO NUU ÑAYUU ÑUU FILIPOS

¹ Máá rí cúu Pablo jíin Timoteo, mozo Jesucristo. Te cátee rí carta yáha cuájeé nuú táca róhó hermano cáyucú ñuu Filipos, jeé cácuu ró ñayuu maá yá jeé cáyihí ró ndaha Cristo Jesús. Te suni cátee rí nuú téee cándiso ñiñú cándito róhó, jíin nuú téee cájeñiñú mēñú ró.

² Te cáñuhun ni rí jeé Tatá yō Yaā Dios jíin Jítoho yō Jesucristo, na sáha ga yá jeé váha róhó, te sáha ya jeé coo ndeyí coo sīñ ni rō.

Jeé jíicán tahú Pablo jehē ñayuu cácandíje

³ Táca jíinu jeé núcūhun ni rí rohó jíjnáhan ró, te nácuatáhú rí nuú Yaā Dios.

⁴ Te náa jíicán tahú rí, te níni cúsīñ ni rí jíicán tahú rí jehē rō.

⁵ Chí ni chindéé ñájnáhan ró jíin rí jeé scáca yó jnúhun váha ya, nde quivī ní cacandíje ró te nde vijna.

⁶ Te jíni ndije rí jeé maá Yaā ní squéjéé ñiñú váha jíin ró, cocu ya jíin ndé quivī ndíji Jesucristo, te sínu ndíhi ya.

⁷ Te íyó váha jeé súcuan jéni ni rí siquī táca róhó, chí yóhoyo maní rí jíin ró, te inuú-ni ní sáha ya jeé váha yóhó. Te súcuan cúu vésú íne rí vecāa chí vésú cuiñi rí nuú táca téee cújéñu, cahān rí jehē jnúhun jeé jnáma ya yohó jéé jnúhun ndaā cúu.

⁸ Chí Yaā Dios jíni yā ndese yóhoyo maní rí jíin ró jíjnáhan ró, nájnúhun yóhoyo maní Jesucristo jíin yó.

⁹ Te jíicán tahú rí jeé na cáa ga jeé cundáhú ní ró jnáhan ró, jíin jéé na jécūhun ga ní ró te cundíchí ró jíin táca jnúhun ya.

¹⁰ Te súcuan te cuu nacāji ró táca jéé váha condiquīn ró, te caca ndaā ró, te ma cóo ní ñiñ cuēchi siquī ró quivī ndíji Cristo.

¹¹ Te súcuan te cayā cuehē ñiñú váha jeé sáha Jesucristo jíin ró. Te sáha jeé coo yíñúñú ñayuu jíin Yaā Dios te cahān i jeé yóhoyo luu cújéñu ya.

Jnúhun jeé técu nduú yó jíin Cristo

¹² Hermano, cúní rí jeé na cúcáñu ní ró jíjnáhan ró ndese ní sáha jnúndóho ní ndoho rí. Chí ní sáha jeé ní jíitē núu ga jnúhun jeé jnáma ya yohó.

¹³ Chí táca soldado cáyucú ini palacio, jíin táca gá ñayuu, cájini i jeé íne rí vecāa jeé siquī Cristo.

¹⁴ Te siquī jeé íne rí vecāa, jeé yúcuu cúu jeé vihyá gá níñú ndeyí ní cuehē táca hermano cácandíje nuú Jítoho yō. Te cáhíyo téyí gá ní de nácani de jnúhun ya, te tu ndé ndínuu ní de.

¹⁵ Te ndaā chí sava téee cánacani de jnúhun Cristo siquī jeé cuesún ní de jíin jéé nduxí de.

Te sava ga de chí sa suhva cánacani de jnúhun ya siquī jeé váha ní de.

¹⁶ Sava de cánacani jnúhun Cristo siquī jeé nducú de jeé váha máa-ni de, te tú ndije de, chí cácani de jeé níñú gā rí jnúndóho jeé íne rí vecāa.

¹⁷ Te sava ga de chí cánacani de jnúhun siquī jeé cundáhú ní de ruhú, chí cájini de jeé íne rí vecāa siquī jeé cahān rí jehē jnúhun jeé jnáma ya yohó.

¹⁸ Tú na vé sáha núu súcuan, chí táca-ni modo cascuíté núu de jnúhun Cristo, vésú núu ndije de chí tuú. Te yáha cúu jeé cúsīñ ní rí sáha.

Te suni cusīñ gā ní rí,

¹⁹ chí jíni rí jeé táca jéé váha sáha jeé váha ga coo jíin rí, chí cájicān tahú ró jehē rí, te Espíritu Jesucristo chindéé ñáñán yá ruhú.

²⁰ Chí ñúhun ni rí te cúu ndasí ní rí jeé ma sáha rí ní ñin jeé sáha jeé cucanu rí nuú yā. Chí sa suhva coo téyí ní rí cahān rí jnúhun ya, náváha ndujéñu ga Cristo sáha máa rí vijna, nájnúhun je ní sáha rí ní véji rí, te vésú na cótecu rí chí vésú na cúu rí.

²¹ Chí jeé técu rí cúu jeé nduú rí jíin Cristo, te jeé cúu rí cúu jeé vihyá gá váha coo jíin rí.

²² Te núu cótecu gā rí, te cuu scáca ga rí ñiñú máá Jítoho yō. Núu súcuan te tu cúcáñu ní rí ndé ñin cúu jeé váha ga, núu jeé cótecu rí chí jéé cúu rí.

²³ Chí mēñú ndándúú jnúhun yáha íne níñin rí. Chí ñin cúu jeé cúní rí quíñin rí condee rí jíin Cristo, chí yúcuu cúu jeé vihyá gá váha coo jíin rí.

²⁴ Te suni cánuú gá jeé cótecu gā rí jeé siquī rohó jíjnáhan ró.

²⁵ Núu súcuan te íyó ndaā ní rí jeé quéndóo rí condee gá rí jíin ró, náváha stéén gā rí nuú ró ndese caca váha ga ró jíin yá, te cusīñ gā ní ró jíin jnúhun cácandíje ró.

²⁶ Núu súcuan te condee tucu rí jíin ró, te cusīñ téyí ní ró jeé siquī ruhú, sáha máa Cristo Jesús.

²⁷ Te máa ñin-ni jeé condihví ní ró caca ndaā ró, nájnúhun cánuú caca ró siquī jeé cácandíje ró jnúhun Cristo. Yúcuu na te vésú na jíinú rí coto jnáhan yó, chí condee jíicá rí, te níñin rí jnúhun ró jéé cáñin níñin ró jíin jnúhun ya, te cáhíyo inuú ní ró, te inuú-ni cánducú ndeyí ró siquī jnúhun jeé cácandíje yó jéé jnáma ya yohó.

²⁸ Te ma yúhú cuiñi ró sáha jeé cájito uhú rohó. Chí jeé jíto uhú i róhó, yúcuu stéén jeé jñahnú ndetú i, te suni stéén jeé cácu ánuá máa ró jíjnáhan ró sáha Yaā Dios.

²⁹ Chí ní jéhe Cristo uñ jeé váha nuú ró: nasūu máa ñin-ni jeé candíje ró yá, chí suni jeé na ndóho ró jéé siquī yá.

³⁰ Chí máa rí jíin róhó jíjnáhan ró, nájnúhun jeé cájeñáhan yó jíin táca jéé neé. Chí ní cajito ró jéé súcuan ní sáha máa rí, te cáñin ró jnúhun jeé sáha ga rí nde vijna.

Jeē ni sāha suchí yá maá yá te ni ndujéhu ya

2

¹ Núu súcuan te sāha Cristo jeē cáhiyo ndeyí ni rō, jín jeē cúsí ni rō siquí jeē váha ni yá jín rō. Te ndéé Espiritu yá jín rō, te maní rō jín jnāhan rō, te cájito ndáhú rō i.

² Núu súcuan te na cócu ga rō jín táca jnúhun yáha, návāha cusí teyí ni rī. Te inuú-ni na cóo ni rō, te coyūcu mání rō, te inuú na cóo ánuá rō, te inuú cani ni rō.

³ Te ni ĩn jniñu ma sāha rō jeē nducú rō jeē váha maá-ni rō, ni jeē sateyí rō maá rō. Chi sa suhva sāha suchí rō maá rō, te sāha rō cuenta jeē váha ga jnāhan rō vēsú maá rō.

⁴ Te ma cóndihví ni rō maá-ni jniñu jeē quéndōo váha maá-ni rō, chi suni na cóndihví ni rō jniñu jeē quéndōo váha jnāhan rō.

⁵ Te na cáni ni rō jijnāhan rō nájñuhun ni jeni ni Cristo Jesús.

⁶ Chi máá yá kujéhu inuú yá jín Yaa Dios, te vēsú súcuan te tu ní jeni ni yá jeē kujéhu inuú yá jín Yaa Dios.

⁷ Chi ni siaá yá jeē kujéhu ya, te ni nduu ya nájñuhun índaa mozo, te ni cacu ya ni nduu ya tēe.

⁸ Te ná ni nduu inuú yá jín tēe, te ni sāha suchí yá maá yá. Te ni jendije ya nde jín jnúhun jeē cúu yá, te nde jín jnúhun canu jeē cúu yá jicá cruz.

⁹ Jeē yúcuan ní sāha Yaa Dios jeē yóhoyo ni ndujéhu luu ya, te síhvi yá kujéhu ndasí gá nuú táca gá síhvi.

¹⁰ Te táca jeē cáhĩn andiví jín ñáyiví jín chíji ñáyiví, núu na cúní i síhvi Jesús te jecuiñi yití i.

¹¹ Te cahān ndaā ndivii i jeē Jesucristo cúu máá Jítoho. Te súcuan stéén i jeē yóhoyo kujéhu máá Tátá yá Yaa Dios.

Ñayuu cácandije cúu i nájñuhun quĩmi jeē ndíndēé

¹² Núu súcuan hermano jijnāhan rō, nájñuhun níni ní cajendije rō jnúhun ni cahān rī ná ni condee rī jín rō, suni súcuan víhyá gā cuandije rō vjna jeē ndeé jicá rī jín rō. Te cóndihví ni rō jeē caca ndaā rō jín jnúhun ní jnama ya rohó, te caca yíñuhún rō conso íyo rō núu yá.

¹³ Chi Yaa Dios jícu ya jín rō jeē cúu ni rō sāha rō jniñu váha, te chéndéé ñāhān yá rohó jeē squícu rō jniñu nájñahan ni yá.

¹⁴ Ndihí jeē sāha rō, ma cahān sōo rō, ni ma tejnāhan rō,

¹⁵ návāha cuu rō séhe Yaa Dios jeē tú na cuéchi coo siquí rō te coo ndaā rō. Te caca ndoo rō méhñu ñáyuu nihni ni jeē casáha néé. Chi méhñu ñáyuu un stéén rō jniñu váha rō, te súcuan cácuu rō nájñuhun quĩmi jeē ndíndēé núu néé ñáyiví.

¹⁶ Te stéén rō jnúhun ya nuú i jeē cótecu i ní cáni sāha. Te súcuan te cusí teyí ni rī quiví ndiji Cristo, chi cuni rī jeē tu ní jíca cáhā rī, ni tu ní sájniñu cáhā rī.

¹⁷ Te vēsú na cúu rī jeē socō rī maá rī nuú yá jeē siquí rohó, te yúcuan cúu jeē nducú rī scandije ga rī rohó, návāha socō rō maá rō sāha rō jniñu váha jeē cácandije rō yá. Jeē yúcuan cúsí ni rī, te cúní rī jeē suni cusí ni rō jín rī jijnāhan rō.

¹⁸ Núu súcuan te na cúsí ni maá rō jín rī, te inuú na cúsí ni yō jijnāhan yó.

Jnúhun Timoteo jín Epafrodito

¹⁹ Te ñuhun ni rī jeē cuáha máá Jítoho yō Jesús jnúhun jeē tají yáchí rī Timoteo jeē de nuú rō, návāha ndusí ni rī núu na níhín rī jnúhun ndese cáhiyo rō.

²⁰ Chi tuá na inga tēe íyó yáha jeē inuú jeni ni jín rī, nájñuhun máá de jeē ndihví ndije ni de jehē rō.

²¹ Chi táca de cánducú de jeē cúu máá de, te nasūu jeē cuní Cristo Jesús.

²² Te je cájini rō jeē tēe váha cúu Timoteo. Chi nájñuhun séhe jín tátá, súcuan ni jeniñu de jeē nácani de jnúhun váha ya jín rī.

²³ Núu súcuan te ñuhun ni rī tají rí de jeē de nuú rō, te núu je ni cucáhu ni rī ndese coo jín rī.

²⁴ Te jeni ndije ni rī jeē cuáha Jítoho yō jnúhun jeē suni máá rí jinú yachí rī nuú rō jijnāhan rō.

²⁵ Te suni jeni ni rī jeē cánuú tají rí hermano yō Epafrodito jeē de, chi tēe sájniñu jín rī siquí jnúhun ya cúu de te chéndéé ñájñahan de jín rī. Chi máá rō ni catají rō de jeē cuajniñu de nuú rī táca jeē cúmaní nuú rī.

²⁶ Chi yóhoyo cúu ni de ndacoto tucu de nuú rō jijnāhan rō. Te ni cucuíhyá ndasí ni de, chi ni canihín rō jnúhun jeē ní cocuhú de.

²⁷ Chi jendaá ni cocuhú de, te je yajni cuu de núu. Te Yaa Dios ni cundáhú ni yá de, te nasūu máñuhún-ni de, chi suni ruhū, návāha tú caa ga cucuíhyá ni rī jehē de núu.

²⁸ Jeē yúcuan cúu jeē ndihví gā ni rī tají rí de nuú rō, návāha ndusí ni rō jeē ndácoto tucu rō núu de. Te suni ruhū ma cucuíhyá ndasí gá ni rī.

²⁹ Núu súcuan te na cúsí ni rō jeē nájjiní de nuú rō, chí cúu de hermano yō jeē candije de maá Jítoho yō. Te coo yíñuhún rō jín táca tēe índaa nájñuhun cáa de.

³⁰ Chi jeē siquí jniñu Cristo cúu jeē jé yajni cuu de núu. Chi ni chundeyí ni de jeē cúu de siquí jeē chéndéé ñāhān de ruhú jín jniñu jeē tu ní íyo modo sāha máá rō jijnāhan rō.

Jnúhun jeē cáca ndaā váha yó

3

¹ Te vjna, hermano jijnāhan rō, na cúsí ni rō jín máá Jítoho yō. Ruhú chi tu jnánini

ni rī jeē tée tucu ri jñūhun yāha núū rō, chi cuajniñu jeē quéndōo vāha rō.

² Condito ró máá ró nuū tée casáha jniñu neé, jeē cándāa ná cándāa ina. Chi cánducú de stúji de rōhó jée casáha de circuncidar, te tu casáha de jniñu ndaā.

³ Te máá yó cácuu ñayuu ni cuu circuncidar ndije, chi cáchiñúhún yó nuū Yaa Dios nde jíin ini jíin ánuá yō, te cácusī ni yō jeē yihí yó ndaha Cristo Jesús, te tu tēnuū yō jeē quéndōo ndaā yō jíin jniñu jeē sáha máá-ni yō.

⁴ Núu jeē súcuu cúu te ruhū chi suni cuu tenuū rī jniñu jeē sáha máá-ni ri nuū. Chi núu ndé tée jéni ni de jeē cuu tenuū de máá de, te ruhū chi vihá gā cuu tenuū rī máá rī.

⁵ Chi ni casáha circuncidar ruhū nuū uná quiví ná ni cacu rī. Te yucūn Israel cúu rī, te suni jñáhan yucūn Benjamín, te ñin hebreo sēhe hebreo cúu rī. Te suni ni cuu rī tēe grupo fariseo jeē ni squícu rī táca ley jñáhan ñuu rī hebreo.

⁶ Te ni jito xeēn rī ñayuu cácadnje, chi yōhyo ni condihví ni rī jeē ma sáma i modo ley jenahán. Te ni ñin tu ní cúu cahān jeē tu squícu rī ley un, chi ní squícu vāha rī.

⁷ Te táca jée ní tenuū rī ún, chi sáha ri cuenta jeē tu ndé nihín jniñu cuiti, chi vijna te ni candije ri Cristo.

⁸ Te suni chíhi ri cuenta jeē vāha ga na náa ndihi jeē ní tenuū rī ún, chi vāha ndasí gā cúu jeē ní quiví ri ndaha máá Jítoho rī Cristo Jesús. Te jeē siquí maá yá te ni siaá rī ndihi ún, te sáha ri cuenta jeē nájñūhun yācá-ni cúu. Chi ni quiví ri ndaha Cristo,

⁹ te ndúú yá jíin rī. Te tuá nducú ri quéndōo ndaā rī jeē jíin ley un, chi sa suhva Yaa Dios ni ndaha yá cuēchi rī jeē ní candije ri Cristo. Chi súcuu squéndōo ndaā yá ñayuu cácadnje.

¹⁰ Te vijna te cúní rī jecūhun vāha ni rī ndese Yaa cúu ya. Te cúní rī jeē poder jeē ní natecu yá cone jíin rī. Te cúní rī ndoho rī jíin yá, te nde jinū rī ndoho rī nájñūhun ni ndoho máá yá jeē ni jíhi yá.

¹¹ Chi yōhyo ñūhun ni rī natecu rī nájñūhun ni natecu yá.

Jeē nducú ndeyí Pablo sínu de carrera de

¹² Te ná tu nihín rī ndihi jeē ní cahān rī ún, ni ná tu ije ri jíin. Te nducú ndeyí rī siquí ún, chi ñūhun ni rī jeē nihín rī táca un, chi jeē yúcuu cúu jeē ní nihín Cristo Jesús ruhū xihna gā.

¹³ Hermano jijnáhan ró, tu sáha ri cuenta jeē jé ni nihín rī ndihi ún. Te iyó ñin jeē sáha rī, cúu jeē squéndōo rī táca jée ní cuu ichi yátá, te nducú ndeyí rī nihín rī táca jée iyó ichi núu.

¹⁴ Chi cúu un nájñūhun jeē jínu rī ñin carrera cuahān rī nde jinū rī andiví, te nihín rī premio jeē cuáha Yaa Dios. Chi ni cana ya

yohó jée quihín yō nuū yā andiví siquí jeē yihí yó ndaha Cristo Jesús.

¹⁵ Te táca yó jeē jé ni ije vāha yó jíin jñūhun cándje yó, súcuu na cáni ni yō. Te núu ndé ñin ró ñin jéni ni rō, te Yaa Dios suni stéén yá nuū rō jeē násūu súcuu cúu.

¹⁶ Te jíni ñíhún cani ni yō te caca yó modo jeē quijnáhan jíin jée jé ni nihín yō.

¹⁷ Hermano, na ndácu ró rúhū jijnáhan ró. Te condēhe vāha ró ndese cájica ñayuu ndaā, chi cájica i nájñūhun ni castéén rī nuū rō.

¹⁸ Te je ni cuu tñjni jínu ni cahān rī jíin ró, te nde ndahyú rī cahān tucu rī vijna, jeē iyó cuéhē ñayuu cájica i ñin modo jeē stéén jeē jito uhū i jñūhun jeē ni jíhi Cristo jica cruz.

¹⁹ Te ñin quiví te jnahnū ndetū ñayuu ún. Chi máni jeē cáji vāha i cúu jeē cáchiñúhún i. Te sátéyí i máá i jíin jniñu neé jeē jéhe jñūhun canu. Te máni máá jée iyó ini ñayiví cúu jeē ndihví ni i.

²⁰ Te máá yó chi ñayuu coyucú andiví cúu yó, te cándetu yó jée nde yúcuu ndiji Jítoho yó Jesucristo, Yaa jnáma yohó.

²¹ Te máá yá nasama ya yiquí cúñu ndahú yó, návāha nduu yó nájñūhun cáa máá yá jeē líu cújéhu ya. Te súcuu sáha ya jíin poder yá jeē cujéhu ya siquí ndihi-ni.

Níní na cúsī ni yō jíin Jítoho yō

4

¹ Núu súcuu hermano jijnáhan ró, cuñíi nihín ró jíin jñūhun máá Jítoho yō. Chi yōhyo maní rī jíin ró, te cúní rī jeē coto jñáhan yó, te cúsī ni rī jíin ró, te nájñūhun premio rī cácuu rō.

² Te cahān ndahú rī jíin rōhó Evodia jíin Síntique jeē inuú na cóo ni rō, chi cácuu ró hermana jeē cácadnje ró máá Jítoho yō.

³ Te suni cahān ndahú rī jíin rōhó, tée jeē ní chindée ñájñáhan vāha jíin rī, jeē na chindée ñáhan ró hermana un, chi ni casájñiñu nihín ña jíin rī siquí jñūhun jeē jnáma ya yohó. Te suni súcuu ni sáha Clemente jíin sava ga ñayuu ni sájñiñu jíin rī. Te ni jecosó síhví i nuū libro jeē yosó síhví ñayuu cotecu ní cáni.

⁴ Te níní na cúsī ni rō jijnáhan ró jíin máá Jítoho yō. Te inga jínu cahān rī jeē na cúsī ni rō.

⁵ Sáha vāha ró jíin táca ñayuu, návāha cuni i jeē súcuu vāha ni rō. Chi máá Jítoho yō, yajni-ni cúu ya jíin ró.

⁶ Ma nácani ndasí ni rō siquí ni ñin. Chi sa cahān ró jíin Yaa Dios siquí táca jée nácani ni rō. Chi cacān tahú rō, te cahān ndahú ró, te suni nacuatáhú ró nuū yá.

⁷ Yúcuán na te sáha Yaa Dios jeē cóo ndeyí coo sī ndasí ni rō, te súcuu coo jíin ró nde cūhva jeē ma jécūhun ni rō ndese cúu jeē sáha ya ún. Te condito vāha ya anuá ró jíin jée nijnūní rō, coo cuéhē jñūhun ndeyí jñūhun sī ni jíin ró, siquí jeē yihí rō ndaha Cristo Jesús.

Jeē na cáni ni yō siquī tāca jēē váha

⁸ Te ñn na jñuhun íyó, hermano jijnáhan ró. Na cáni ni ró siquī tāca jēē íyó ndáa, jín jēē sáha yññuhún, jín táca jññu sáha váha, jín jññu íyó ndoo, jín táca jēē íyó máni ni, jín jēē lúu sáha. Te máni na núcuhun ni ró tāca jēē váha jeē sáha jeē nácuatáhú ró nuū yá.

⁹ Tāca jēē ni stéén rī nuū rō, jeē ní cacutúhva ró núu rī, jín jēē ní cajini ró ní cahán rī, jín jēē ní cajito ró ní sáha ri, tāca yúcuan suni na sáha máá ró. Yúcuán na te máá Yaā jeē jéhe jñuhun ndeyí sñ ni, coo ya jín ró.

Jeē ní casocō ñayuu Filipos nuū Pablo

¹⁰ Te yōhyo cúsiñ ni rī sáha máá Jítóho yō, chí vijna te ni canucuhun tucu ni ró jeē chindéé ñáhán ró rúhū. Te nasūu jēē ní naa ni ró sáha ró súcuan, chí siquī jeē tu ní íyo modo.

¹¹ Te nasūu jēē cahán rī siquī jeē ndóho ndáhú rí, chí je ni cutúhva ri cusñ ni rī jín jēē névāha ri.

¹² Jíni rī cotecu ndahú rí, te jíni rī cotecu cucá rí. Chí ni cāan rī jín táca-ni, núu jeē ndutú chíji rí chí jēē ndóho rí sóco, núu jeē cónevāha cuehē rí chí jēē cúmaní nuū rí.

¹³ Ndihi-ni cúu sáha ri, chí máá Cristo jéhe ya fuerza ini rí.

¹⁴ Te vēsú súcuan te vāha ni casáha ró jēē ní chindéé ñáhán ró ruhū jín jñúndóho jeē ndóho ri.

¹⁵ Te róhó ñáyuu ñuu Filipos, je cājini ró ndese ni cuu. Chí nde quiví ní quejéé rí nácani rí jñuhun jeē jnáma ya yohó, ná ni quenda rí Macedonia vēji rí, te ni casocō ró xuhun núu rī siquī jeē ní canihñn ró jñuhun ya ni nacani rí. Te ni ñn grupo ñayuu cácanđje tu ní sáha súcuan, chí máá-ni róhó jijnáhan ró.

¹⁶ Te ná íne rí ñuu Tesalónica, te ni catají ró jecu jeē jíni ññuhún rí, ni jinū ñn uū jínu.

¹⁷ Te nasūu jēē nducú rí jeē cuáha ró núu rí, chí sa ndúcú rí jeē na cáyá gā jññu váha ró, návāha cayā tahū ró nuū Yaā Dios.

¹⁸ Chí je ni nihñn rí ndihi jeē jíni ññuhún rí, te ndóo ga. Te íyó cuehē nuū rí, chí ni nihñn rí jeē ní catají ró vēji jín Epafrodito. Te jeē ní catají ró cúu nájnñuhun ñn ofrenda jeē asín jeén, ni casocō ró nuū Yaā Dios, te cúsiñ ni yā jín.

¹⁹ Te Yaā Dios chí cuáha ya nuū ró tāca jēē cúmaní nuū ró, chí cucá ndasí yá jín táca jēē váha jeē lúu íyó núu Cristo Jesús.

²⁰ Te na cáhán yō jeē yóhyo luu cújéhnú Tátá yō Yaā Dios ní cáni. Amén.

Saludo jeē sándñí

²¹ Cachi ró nuū tāca ñáyuu maá yá jeē sándeyí ni i, áchí rí, chí cácanđje i Jesucristo. Te hermano yō cáyūcu jín rí yáha, cácahán de jeē sándeyí ni ró jijnáhan ró.

²² Te tāca ñáyuu maá yá jeē cáhño yáha, suni cácahán i jeē sándeyí ni ró. Te ñayuu

cáyūcú vehe rey cújéhnú ñuu Roma yáha, máá i cácahán gā súcuan.

²³ Te ññuhun ni rī jeē maá Jítóho yō Jesucristo, na sáha ga yá jeē váha róhó jijnáhan ró. Súcuan na cóo. Amén.

CARTA JEE NI TEE APOSTOL ŞAN PABLO NUU ŅAYUU ŅUU COLOSAS

¹ Máá rí cúu Pablo, apóstol Jesucristo, chi súcuan ni nujnahan ni Yaá Dios ni tají yá ruhú. Te jíin hermano yó Timoteo

² cátee ri carta yáha cuájeé nuū rohó űáyuu űuu Colosas, jee cácuu ró űáyuu maá yá jee cácadíje váha nuū Cristo. Te cáñuhun ni rí jee Tatá yó Yaá Dios na sáha ga yá jee váha rohó, te sáha ya jee coo ndeyí coo sī ni rō.

Jee jicán tahu Pablo jehē űáyuu cácadíje

³ Te jee cájicān tahu rí nuū Yaá Dios, Yaá cúu Tatá maá Jítho yó Jesucristo, te níni cáncuatáhú rí nuū yá jee siquí rohó jíjnāhan ró.

⁴ Chi ni cajini jñuhun ri ndese váha cácadíje ró Cristo Jesús, jíin ndese cákundáhú ni rō táca űáyuu maá yá.

⁵ Chi cáñuhun ni rō nihñ rō jee űuhun váha nde andiví cuu ró. Chi ná ni cajini ró jñuhun ndaa jee jnáma ya rohó, te ni caquejee ró űuhun ni rō.

⁶ Te jñuhun un jee ní canacani nuū rō, chi nducuehē cuahān te níhñ jñiñu ní cáhnu űayiví. Te suni súcuan ni sáha jíin rohó jíjnāhan ró ndé quiví ní cajini ró te ni cajecūhun ni rō jee ndaa cúu jee yóhoyo váha ni Yaá Dios jíin ró.

⁷ Te jñuhun un cúu jee ni stéén Epafras nuū rō, tee sájniñu jíin rí jee maní rí jíin. Chi cúu de tee jéjniñu siquí váha nuū Cristo jee ndito de rohó.

⁸ Te maá de ni castūhun nuū rí siquí rohó, ndese cákundáhú ni rō jñāhan ró sáha maá yá.

⁹ Jee yúcuan suni tu cájecuñi rí jee cájicān tahu rí jehē rō, nde quiví ni níhñ rí jñuhun ún te nde vijna. Te cájicān rí nuū yá jee na jécūhun váha ni rō te coo ndichí ró jíin jñuhun ya, sáha maá Espiritu, návāha cuni ró ndihi ndese nujnahan ni maá yá.

¹⁰ Te cájicān rí jee caca ndaa ró nájnūhun cánuu caca ró jee cácuu ró űáyuu maá Jítho yó. Te súcuan te sáha ró ndihi jee nujnahan ni yá, te nihñ jñiñu ró jíin táca jñiñu váha, te jecūhun ga ni rō ndese Yaá cúu Yaá Dios.

¹¹ Te cájicān rí jee cuáha ya fuerza ini rō, nájnūhun iyó fuerza maá yá jee cujéhnu luu ya. Te súcuan te cuu cuandeyí ni rō jíin táca-ni jñundóho, te cusī teyí ni rō.

¹² Te cuu nacuatáhú ró nuū Tatá yó, chi maá yá ni chihí fuerza yohó jee in cáhnu-ni jíin táca űáyuu maá yá nihñ yó tahu yó. Chi cájica yó jíin luz yá jee yñi yó ndaha ya.

¹³ Chi ni jnama ya yohó jee ni yñi yó ndaha maá jee jñi poder nuū néé, te ni

squívi ya yohó ndaha Séhe ya jee maní yá jíin, ndácu ya jñiñu nuū yó.

¹⁴ Chi Séhe ya un ní jnama ya yohó jee ni jihí yá jehē yó, te ni ine cáhnu ni yá nuū cuéchi yó.

Jee ni sáha Cristo jee ní ndivi yó nuū jñuhun maní Yaá Dios jíin yó

¹⁵ Yaá Dios jee tu cúu coto yó, ni sáha ya jee ní quiji Séhe ya, te súcuan ni jito yó maá yá. Te Séhe ya ún, je iyó yá nde ná tu jecōo táca jee iyó.

¹⁶ Chi jíin Séhe ya ni sáha Yaá Dios ndihi jee ni jécōo, ndihi jee iyó andiví jíin jee iyó űayiví, jee jini yó nuū jíin jee tu jini yó nuū. Te suni ni sáha ya táca ndajéhé jee cándacu jñiñu, jíin jee cándiso jñiñu, jíin jee cácujeñnu, jíin jee cájni poder. Jíin Cristo ni sáha Yaá Dios jee ni jécōo ndihi, te jee cúu Cristo cúu.

¹⁷ Te je iyó Cristo nde ná tu coo ndihi jee iyó. Te ndaha maá yá yñi váha ndihi-ni.

¹⁸ Te maá yá cújéhnu nuū űáyuu cácadíje, nájnūhun cújéhnu xiní nuū yiqui cúñu, chi nájnūhun yiqui cúñu yá cácuu i, cúu jee in na cúu i jíin yá. Te maá yá sáha jee cotecu i ní cáni, te xihna gā maá yá ni natecu mehñu ndiyi, návāha cujéhnu ya nuū táca-ni.

¹⁹ Chi ni cusī ni Yaá Dios jee ndihi ndese cúu maá yá, suni súcuan cúu Cristo.

²⁰ Te siquí jee ní jihí Cristo, te ni cusī ni Yaá Dios sáha ya jee ndávicoo táca-ni nuū jñuhun maní yá jíin, táca jee yúcu űayivi jíin jee yúcu andiví. Chi jíin jee ni jihí Cristo jicā cruz, te ni sáha Yaá Dios jee ndávicoo táca-ni nuū jñuhun maní yá jíin.

²¹ Te maá ró jíjnāhan ró, chi sñ siquí ni cahñin ró ndé saa, te ni cajito uhú ró yá ini anuá ró, chi máni jñiñu néé ni casáha ró. Te vijna chi je ni sáha Yaá Dios jee ní ndávicoo ró nuū jñuhun maní yá jíin ró.

²² Súcuan ni sáha ya siquí jee ní sócō Cristo maá yá ni jihí yá, návāha coo ndoo coo i rō cuiñi ró nuū yá, te ma cóo jñéhén ró, te tú na cuéchi coo siquí rō.

²³ Te súcuan sáha ya núu cuiñi nihñ ró jee candíje váha ró, te núu quendōo nihñ ró jíin jñuhun váha jee cáñuhun ni rō jee jnáma ya rohó, te ma siaá cuiñi ró. Chi jñuhun un ní cajini ró, te ni jite núu ní cáhnu űayiví. Te ruhú Pablo suni jéjniñu rí jee nácani rí jñuhun ún.

Jee jéjniñu Pablo siquí űáyuu cácadíje

²⁴ Te vijna te cusī ni rí jee ndóho rí jehē ró jíjnāhan ró. Chi jíin yiqui cúñu rí ndóho rí jee cúmaní gā ndoho rí jíin Cristo jehē űáyuu cácadíje, suu űayuu cúu nájnūhun yiqui cúñu yá.

²⁵ Te cúu rí tee jéjniñu siquí űáyuu cácadíje, chi súcuan ni tejñiñu Yaá Dios ruhú, návāha nacani ndihi rí jñuhun ya nuū rō te quendōo váha ró.

²⁶ Te nácani ri jnũhun ya jeē ní yisáhí, jeē tu ní cájini ñayuu nde jehahán ndasí te nde ní cáni vēji. Te vijna te je ni steén cají yá jnũhun un núu ñáyyuu maá yá.

²⁷ Chi ní cusñi ní ya jeē steén yā nuū i ndese cucúca ndasí i jín ndehi jeē ndiso jnũhun sāhi yáha jéé lúu cújehnu, te cuitē núu quihĩn nuū táca nación jeē tu jíní. Te jnũhun sāhi yáha cúu jeē ndeé Cristo ini anuá rō, ndúú yá jín rō, te jeē yúcuau cáñuhun ni rō táca jéé lúu jéhnu jeē coo.

²⁸ Te jnũhun Cristo un cúu jeē cánacani ri, te cástíhví ní rī táca ñáyyu, te cástéén rī jnũhun ya návaha jecũhun váha ni i. Te súcuau te ije váha ni ndivii i jeē yáhi i ndaha Cristo Jesús.

²⁹ Te siquĩ yúcuau cúu jeē sájniñu ri, chi ndíhví ní rī nácani ri jnũhun jín táca fuerza Cristo jeē chindéé ñájnahan ya jín rí.

2

¹ Chi cúní rī jeē na jécũhun ni rō ndese yōhyo ndúcú ndéyí rí jehē rō, jín jéhē ñayuu ñuu Laodicea, jín ndé táca ñáyyu jeē tu ní cájini cuiti nuū rī.

² Chi cúní rī jeē coo ndeyí ni anuá i, te inuú-ni coyūcu mání i, te jecũhun ndíhi ni i ndese yōhyo cúca i jín jnũhun jeē candíje níhin i. Chi cuni i ndese Yaā cúu Cristo, chi máa yá cúu jnũhun Yaā Dios jeē ní yisáhí un.

³ Te ini Cristo yisáhí táca jnũhun jeē cucúca rō jín, suu jnũhun ndíchi jín jnũhun jécũhun ni.

⁴ Te jnũhun yáha cáhan rī jín rō jijnahan rō, návaha ma stahú ni ñin i rōhó jín táca jnũhun stáhú jéé lúu cáhan.

⁵ Chi vēsú ndeé jíca rí jín rō, te ñũhun ni rī rohó, te cúsñi ní rí jeē jini rī ndese cájica ndaā rō te cáandíje níhin rō Cristo.

⁶ Núu súcuau te nájñũhun ní cajetáhú rō jeē Jítoho rō cúu Jesucristo, suni súcuau na cáca ndaā rō jín yá.

⁷ Te na jñá váha jnũhun ya ini rō, te na ije váha rō jín jnũhun cáandíje rō yá, nájñũhun je ní cajini rō. Te níni nacuatáhú rō nuū Yaā Dios.

Jeē ndújeé yó sáha Cristo

⁸ Coto má cuáha rō jnũhun jeē stahú ni ñin ñayuu rohó jín jnũhun ndíchi jéé tu jéjñũ, jín jnũhun ndúxí stáhú. Chi tu cáandíje i jnũhun Cristo, chi sa cáandíje i táca jéé tajnúni ñayuu, modo jeē castéén ini ñayívi yáha.

⁹ Chi ndíhi ndese cúu máa Yaā Dios, suni súcuau cúu Cristo.

¹⁰ Te ndíhi ndese cúu Cristo, suni súcuau cúu rō jijnahan rō, chi cáyihí rō ndaha ya. Te máa yá cújéhnu nuū táca jéé cújéhnu jín jéé ndiso jniñu andiví.

¹¹ Te siquĩ jeē cáyihí rō ndaha ya, suu cúu jeē nájñũhun ni cuu rō circuncidar. Te jeē súcuau ní sáha ya circuncidar rohó, chi

nasúú ñin jnuní jeē yáhi yiqui cúñu rō cúu, chi sa suhva jeē ní sándoo ya táca cuéchi ni casáha rō jín modo neé máa rō. Chi súcuau cúu jeē sáha Cristo circuncidar rohó.

¹² Te jeē ní cajendute rō cúu nájñũhun jeē ní quindũji rō jín Cristo, te suni nájñũhun jeē ní natecu rō jín yá. Chi ní cacándíje rō jéé jín poder Yaā Dios ní nastécu yā Cristo méhñu ndíyi.

¹³ Chi ní cacuu rō nájñũhun ndíyi nuū yá siquĩ cuéchi rō, chi ná tu sáha ya circuncidar anuá rō nde saá. Te vijna te ní sáha Yaā Dios jeē cotecu rō ní cáni jín Cristo, chi ní ine cáhnu ní yá nuū táca cuéchi rō.

¹⁴ Te nájñũhun jeē iyó ñin acta jeē jícan cuéchi siquĩ yō jeē ní stívi yó ley yá. Te ní ndahva yá acta un, chi ní chunaa Cristo cuéchi yó jéé ní jíhi yá jíca cruz.

¹⁵ Chi ná ní jíhi yá jíca cruz, te ní quende yá ndíhi poder táca jéneé jéé cácujeñu jín jéé cájni poder. Te ní quende yá jeē tuá cújéhnu, chi ní sáha ya jeē cuángoo nuū quíndihyū, te súcuau ní steén yá poder yá.

Na ndúcú yó jeē quéndoo váha yó ndé andiví

¹⁶ Núu súcuau te ma cuatáhú rō núu cácahán ñayuu cuéchi siquĩ rō, siquĩ ñin jeē yéji rō chí siquĩ ñin jeē jíhi rō, chí jéé tu néé ñi rō quiví vico jín quiví núcosō yō jín quiví ndetátú.

¹⁷ Chi táca ley siquĩ un ní jejniñu máa ndé ná tu quiji Cristo. Te vijna te ní quiji ya te tuá jini ñũhún táca ún.

¹⁸ Ma cuáha ro jnũhun jeē cási ni ñin ñayuu jeē níhin rō tahū rō. Chi cáchiñũhún i táca ndajéhé yá, te cácahán i jeē súcuau casáha suchí i máa i. Te cácahán i jeé cájini ndíje i jeé iyó ndáá jnũhun cánacani i, te tuú. Te súcuau casáha téyí sáa-ni i máa i, chí cájeni néé ni i.

¹⁹ Te tu cáhĩn i jín Cristo, Yaā cújéhnu nuū ñayuu cácuu nájñũhun yiqui cúñu yá chí ñin na cúu i jín yá. Chi máa yá scuéhnu ya i jín jnũhun ya, te nduu inuú ní táca i jeé cáhije i cuahán i, nájñũhun ni jeni ní Yaā Dios.

²⁰ Núu súcuau te nájñũhun jeē je ní cajihí rō jín Cristo, cúu jeé ní casiáá rō táca jéé tajnúni jeé castéén ini ñayívi. Núu súcuau zte naun casáha ga rō nájñũhun casáha ñayuu ñayívi jéé jéndíje rō táca jéé tajnúni i?

²¹ Chi cácahán i: Ma quehé rō ma cáji rō jeé yáha chí jéé yúcuau, ní ma jñá rō, áchí i.

²² Te máni jeé tajnúni ñayuu jín costumbre máa i cúu te tu níhin jniñu jeé quéndoo ndaā ñayuu.

²³ Te ndaā chí cájeni ni i jeé jnũhun ndíchi cúu ún, chí sáha jín i jeé chíñũhún níhin i, jín jéé sáha suchí i máa i, jín jéé stóho i yiqui cúñu i. Te tu níhin jniñu cuiti jeé casi táca jniñu néé jéé cuní i sáha i.

3

¹ Núu súcuan te nájñuhun ni natecu Cristo, suni súcuan ni canatecu rō jeē ní cuu rō nájñuhun ndiyi ni sáha cuēchi rō. Te na cóndihví ni rō siquí táca jeē iyó andiví núu ndeé Cristo lado váha Yaā Dios nuū cujéhu na.

² Te na cáni ni rō siquí táca jeē iyó andiví, nasūu siquí jeē iyó ini ñayivi.

³ Chi nájñuhun je ni cajihí rō jín Cristo, te vijna chi nájñuhun cátecu rō jín yá andiví, chi cáyihí rō ini ndaha Yaā Dios.

⁴ Te quivi ndíji Cristo, Yaā sáha jeē cótecu yō ní cáni, yūcuán na te suni quendacoo ndijin maá rō jín yá, te cujéhu luu rō jín yá.

Ñayuu jica jín modo cuní maá, jín ñayuu ní ndujeé

⁵ Núu súcuan te casi rō táca modo cuní maá rō jeē cáhíyo rō ini ñayivi yáha. Chi ma cáca jnéni rō, ma sáha rō jniñu jnéhen, ma ndíyo ni rō sáha rō táca jniñu néé, ma cutóo rō, ma ndíyo ni rō ndajniñu. Chi táca ndajniñu jeē ndíyo ni yō cúu nájñuhun ídolo yō jeē chiñúhún yō.

⁶ Chi siquí táca jniñu yáha cúu jeē cuāha Yaā Dios castigo xeēn nuū ñayuu niñni ni nuū yá.

⁷ Te suni jín jniñu yáha ní cajica rō ndé saá, ná ni casáha rō súcuan.

⁸ Te vijna te na stóo rō táca jeē yáha: jeē quití ni, jeē xeēn ni, jeē sáha jniñu néé, jeē cahán ndeváha nuū jnahan, jín jeē cahán táca jñuhun tú váha.

⁹ Ma stahú rō jnahan rō, chi yūcuan cúu modo maá rō jeē ní cajica rō jín ndé saá, te je ni castóo rō.

¹⁰ Te ni canduu rō ñayuu jeé, cuandacu rō maá Yaā ni sáha róhó, te cuajecuhun váha ni rō ndese Yaā cúu yá.

¹¹ Te ñayuu ní ndujeé tuá cúu i ñayuu griego, ni ñayuu hebreo, ni ñayuu ni sáha circuncidar, ni ñayuu tu ní sáha circuncidar, ni ñayuu ñuu jicá, ni ñayuu yucú jeē ní indáa néé, ni mozo jeē ní jeen ñayuu, ni ñayuu sájniñu cuenta maá, chi inuú cúu ndihi i nuū yá. Chi Cristo cúu Jitoho ndihi i, te ndeé yá ini anuá ndihi i, ndúú yá jín i.

¹² Chi ni nacáji Yaā Dios róhó jijnahan rō jeē cúu rō ñayuu maá yá jeē maní yá jín. Núu súcuan te níni cundáhú ni rō jnahan rō, te coo váha ni rō jín jnahan rō. Te coo suchi ni rō, te coo vítá ni rō, te coo paciencia ni rō.

¹³ Cuandeyí ni rō jín jnahan rō, te cone cáhu ni rō nuú i te núu na vé ni sáha i nuú rō. Chi nájñuhun ni ine cáhu ni Cristo nuú rō, suni súcuan sáha maá rō.

¹⁴ Te jeé cánuú gá cúu jeé cundáhú ndasí ni rō jnahan rō. Chi yūcuan sáha jeē ndúu inuú ni rō te je váha ni rō jín jniñu váha.

¹⁵ Te jñuhun coyūcu maní na cúnuú ini anuá rō sáha Yaā Dios. Chi ni cana ya róhó jeē nduu rō ñin na ñayuu jeé cóyūcu maní rō. Te níni na nácuatáhú rō nuú yá.

¹⁶ Te scuáha váha rō jñuhun Cristo náváha cunuú jñuhun ún ini anuá rō. Te stéen rō nuú jnahan rō, te stíhvi ni rō i jín táca jñuhun ndíchi yá. Te jín salmo jín himno, yaa i jeé cahán jñuhun ya, na cáta luu rō jeé nácuatáhú rō ini anuá rō nuú Yaā Dios.

¹⁷ Te táca jniñu sáha rō, núu jeé cahán rō chí jeé sáha rō cúu, ndihi na sáha rō jeé ndujéhu síhvi maá Jitoho yō Jesús, te nacuatáhú rō nuú Tatá yō Yaā Dios sáha yá.

Ndese cánuú squicu ñayuu cácandíje nuú jnahan i

¹⁸ Róhó ñahan cácuu ñasihí, cuatáhú rō nuú yí rō, chi súcuan cánuú sáha rō siquí jeé candíje rō Jitoho yō.

¹⁹ Te róhó tée cácuu yí, cundáhú ni rō ñasihí rō, te ma cútu cuu ni rō jín ña.

²⁰ Róhó séhe jijnahan rō, táca-ni jniñu cuandíje rō núu tatá rō nuú naná rō, chi súcuan cúsi ni maá Jitoho yō.

²¹ Te róhó tátá jijnahan rō, ma squití ni rō séhe rō, náváha ma cucuíhyá ni i.

²² Róhó mozo jijnahan rō, táca-ni jniñu cuandíje rō núu patrón rō ñayivi yáha. Ma sájniñu ndúxi rō jeé maá jeé coto de te cuajñuhún de róhó. Chi na sájniñu ndaá sájniñu ndíje rō, te conso iyo rō nuú Yaā Dios.

²³ Te táca jniñu sáha rō, na cúsi ni rō sáha rō, te na cáni ni rō jeé nuú Jitoho yó cájejniñu rō, nasūu nuú ñayuu.

²⁴ Chi je cájini rō jeé maá Jitoho yó cuāha ya cuehé tahú cuu rō ní cáni. Chi nuú maá Cristo cájejniñu rō, chi maá yá cúu Jitoho rō.

²⁵ Te ñayuu casáha jniñu néé, chi sa suhva ndutahú i siquí jeé ni sáha i. Chi tu sáha Yaā Dios cuenta ndese cúu ñin ñayuu, chi inuú sáha yá jín i.

4

¹ Róhó patrón jijnahan rō, váha ndaá na sáha rō jín mozo rō. Te na núcuhun ni rō jeé suni iyó Jitoho maá rō, Yaā ndeé andiví.

² Te ndiví rō ma jécuiñi rō jeé jicán tahú rō, chi coo ndito ni rō jín, te nacuatáhú rō nuú Yaā Dios.

³ Te suni cacán tahú rō jehé rí jijnahan ri, jeé na sáha Yaā Dios jeé cóo ga modo nacani ri jñuhun, náváha cuu cahán rí jñuhun Cristo jeé ní yisáhi, jeé tu ni cájini ñayuu jenahán. Te siquí jñuhun un cúu jeé íne ri vecáa.

⁴ Te cacán tahú rō jeé cuu cahán cají rí ndese cánuú cahán rí.

⁵ Sáha yúcun váha rō jín ñayuu tu cácandíje. Ma cúhuun ni rō siquí i, chí condihví ni rō scandíje rō i.

⁶ Te maní cahán váha rō jín ñayuu, te cahán rō jñuhun cuajniñu jeé quéndóo váha

i sáha. Te cani ni rō ndese vāha nastió cuñí rō jnūhun nuū ìin ìin i.

Saludo jeē sándihí

⁷ Tiquico cúu ìin hermano jeē maní yō jín, te tē squícu vāha chindéé ñájnáhan jín rí cúu de, te jéñíñu de jín rí nuū maá Jítoho yō. Te máá de castūhún ndihí nuū rō ndese cuahān jniñu rí.

⁸ Jeē yúcuan ní tají rí de cuajeē de nuū rō jijnáhan ró, návāha cuni rō ndese cáhīyo rí jín jniñu, te coo ndeyí ni rō sáha de.

⁹ Te suni cuajeē Onésimo jín de, tē cúu jnáhan máá ró jijnáhan ró. Te cúu de hermano jeē squícu vāha jeē maní yō jín. Te ndindúú de castūhun núū rō ndese cuahān tācá jniñu ichi cháha.

¹⁰ Sándeyí ni rō jijnáhan ró, áchí Aristarco, tēe ìne jín rí vecāa. Te suni súcuan cáhán Marcos, ñani primo Bernabé. Te je ni ndacu rí jniñu nuū rō siquí Marcos, te núu ni jecondéhé de róhó te sáha vāha ró jín de.

¹¹ Te suni súcuan cáhán Jesús, tēe jeē suni nání Justo, jeē sándeyí ni rō. Te máá-ni de cácuu tēe hebreo cácandíje jeē chindéé ñáhán cánacani jnūhun jín rí siquí ndese ndácu Yaā Dios jniñu. Te yōhyo ndeyí íyó ni rí casáha de.

¹² Sándeyí ni rō jijnáhan ró, áchí Epafras, tēe cúu jnáhan máá ró, te mozo Cristo cúu de. Te níni jícán tahu ndasí de jehē rō, jeē na cuñí ñihín ró, te ije vāha ni rō jeē squícu vāha ró ndihí jniñu cúni Yaā Dios.

¹³ Chí cáhán ndaā rí jeē yóhyo ndíhví ni de jehē rō jijnáhan ró, jín jéhē ñáyuu ñuu Laodicea jín Hierápolis.

¹⁴ Lucas, tēe cúu médico jeē maní yō jín, suni cáhán de jeē sándeyí ni rō, te suni súcuan cáhán Demas.

¹⁵ Cachi rō nuū tācá hermano ñuu Laodicea jeē sándeyí ni i, áchí rí. Te suni súcuan cahān rō jín Ninfas, jín táca ñáyuu cácandíje cándutútú vehe ña.

¹⁶ Te ná ni jīnu ni cacahu ró carta yáha, te suni tají ró na cáhu ñáyuu cácandíje ñuu Laodicea. Te suni cahu máá ró carta jeē cuahān nuū ñáyuu Laodicea te ndiji nuū rō.

¹⁷ Te cachi rō nuū Arquipo jeē na ndúcú ndeyí de squícu de jniñu ní tee Jítoho yō siquí de, áchí rí.

¹⁸ Ruhū Pablo, yāhá-ni cúu jeē tēe rí jín ndaha máá rí, jeē sándeyí ni rō. Te nucūhun ni rō ruhū jeē ìne rí vecāa. Te ñūhun ni rí jeē na sáha ga Yaā Dios jeē váha róhó jijnáhan ró. Súcuan na cóo. Amén.

CARTA HIN JEE NI TEE APOSTOL SAN PABLO NUU ÑAYUU ÑUU TESALONICA

1 Máá rí cúu Pablo jín Silvano jín Timoteo, te cátee rí carta yáha cuájeē nuū rohó ñáyuu cácanđije ñuu Tesalónica, jeē cáyihí ró ndaha Tátá yō Yaā Dios jín Jítoho yō Jesucristo. Te cáñuhun ni rí jeē Tátá yō Yaā Dios jín Jítoho yō Jesucristo, na sáha ga yā jeē váha rohó, te sáha ya jeē coo ndeyí coo sī ni rí jijnáhan ró.

Ñayuu Tesalónica cúu i ñin ejemplo váha

2 Níní cánacuatahú rí nuū Yaā Dios jeē siquí rohó jijnáhan ró, te tu náa ni rí cacān tahu rí jeē ró jeē cájican tahu rí.

3 Te níní ndácunehen rí rohó nuū Tátá yō Yaā Dios, jeē váha casáha ró táca jniñu chi cácanđije ró, jín jéē váha cájejniñu ró nuū yā chi maní ró jín yá, jín jéē cájendeyí ni ró chi cáñuhun ni ró jeē coo jeē váha sáha Jítoho yō Jesucristo.

4 Chi maní Yaā Dios jín ró jijnáhan ró hermano, te cájini rí jeē ní nacáji ya rohó.

5 Chi ná ni canacani rí jñuhun nuū ró jeē jnáma ya rohó, te nasūu jéē ní cáhān rí súcuan-ni, chi ni nacani rí jín poder Espiritu Santo, te ni cacucáhnu váha ni rí jeē jñuhun ndaā cúu. Te cájini ró ndese ni casáha váha rí ná ni coyūcu rí jín ró, chi ni nducú rí jeē quéndōo váha ró.

6 Te rohó jijnáhan ró chi ni candacu ró ruhū, te suni ni candacu ró máá Jítoho yō. Chi ni cajetáhú ró jñuhun ya, te ni cacusí ni ró ni sáha Espiritu Santo, vésú ni cajito ró cuehē jñundóho siquí ún.

7 Te súcuan cácuu ró ñin ejemplo nuū ndihi ñayuu cácanđije jeē cáyūcú región Macedonia jín Acaya jínā.

8 Chi jeē siquí rohó jijnáhan ró cúu jeē ní jite núu jñuhun Jítoho yō, te nasūu máni Macedonia jín Acaya, chi suni ní cáhnu-ni ni jite núu jñuhun ndese cácanđije ró Yaā Dios. Te jeē yúcuu tuá jini ñuhún jeē nácani máá rí jñuhun nuū i.

9 Chi sa máá i cánacani ndese ni cajetáhú váha ró ruhū ná ni jecoo rí nuū ró, jín ndese ni castóo ró ídolo te ni quivicoo ró ndaha Yaā Dios, Yaā ndaā Yaā técu, jeē cuajniñu ró nuū yā.

10 Te cánacani i jeē cándetu ró jéē ichi ándiví ndiji Séhe ya Jesús jeē ní nastécu yā. Te máá Jesús jnama ya yohó nuū castigo xeēn jeē quíji.

Jniñu jeē ní sáha Pablo ñuu Tesalónica

2

1 Chi cájini ró hermano, jeē tu ní jécoo cáhá-ni rí nuū ró.

2 Te cájini ró jeē ní castóho i ruhū te ni cacahān ndeváha i nuū rí ini ñuu Filipos. Te vésú súcuan te máá Yaā Dios ni chindéé ñáhān yá ruhū, ni sáha ya jeē ni iyo ndeyí ni rí, te ni jecoo rí ñuu ró ní canacani rí jñuhun jeē jnáma ya rohó. Súcuan ni casáha rí vésú xeēn ni iyo jñundóho.

3 Te jñuhun ni canacani rí, nasūu jñuhun ni castíví rí cúu, ni nasūu jéē nihín rí siquí ró, ni nasūu jéē ní castáhú rí rohó.

4 Chi máá Yaā Dios ní jito ndee yā ruhū, te ni tejniñu ya ruhū jeē nácani rí jñuhun jeē jnáma ya rohó. Te jeē yúcuu cúu jeē cacahān rí. Te tu cacahān rí jñuhun jeē núnjahan ni ñayuu, chi sa jeē núnjahan ni Yaā Dios, chi máá yá jito ndee anuá rí.

5 Te cájini ró jeē tu ní cánducú rí cuajnúhún rí rohó ñin modo stahú, ni tu ní cacahān rí jeē cúsi ni rí jín ró návaha nihín rí xuhun ró. Te jíní Yaā Dios jeē súcuan cúu.

6 Te ni tu ní cánducú rí jeē cuajnúhún ró ruhū, ni jeē cuajnúhún inga ñayuu ruhū, vésú súcuan cánuu coo núu, chi apóstol Cristo cácuu rí.

7 Chi sa suhva vita ní cacahān rí jín ró, nájñuhun sáha ñahan ndéca yiquín jéē yucún ndíto ña séhe ña.

8 Te siquí jeē cákundáhú ndasí ni rí rohó, jeē yúcuu ní cacondihví ni rí nacani rí jñuhun váha Yaā Dios nuū ró. Te nasūu máá yúcuu-ni, chi suni nde vida rí cuáha rí jeē siquí ró nuū, chi yóhyo maní rí jín ró.

9 Te cánahan ró hermano, jeē tú ni ñin ró ní stáhān rí jeē cacān rí nuū ró ná ni canacani rí jñuhun váha Yaā Dios nuū ró. Chi ni cánducú ndéyí rí ní casájniñu ndasí rí siquí jeē cótecu rí. Te nduú ñuu ní casájniñu rí.

10 Máá ró cájini ró, te suni Yaā Dios jíní yā ndese ndaā ndoo ni cajica rí nuū rohó ñáyuu cácanđije. Te ni ñin tu cúu cahān cuéchi siquí rí.

11 Te suni cájini ró ndese ni castíhví ni rí ná ñin ná ñin ró, te ni cacahān rí jñuhun ndeyí ni jín ró, nájñuhun sáha ñin tátá jín séhe de.

12 Te ní cacahān nihín rí jín ró jeē na cáca ndaā ró nuū Yaā Dios nájñuhun cánuu caca ró. Chi ní cana ya rohó jéē quingoo ró nuū ndácu ya jniñu, nuū luu cujéhnu ró jín yá.

13 Te jeē yúcuu níní nácuatáhú rí nuū Yaā Dios, chi ní cajetáhú ró jñuhun ya jeē ní canacani rí. Chi ní cajini ró jeē násuu jñuhun ñin tée cúu, chi jñuhun Yaā Dios cúu. Te máá jéndaá jeē jñuhun un sájniñu ini anuá rohó ñáyuu cácanđije nde ndacu ró yá.

14 Hermano, ñayuu ñuu ró ní cajito xeēn i rohó, te súcuan ni candoho ró nájñuhun ni candoho ñayuu cácanđije cáyūcú región Judea jeē cáyihí ndaha Yaā Dios jín Cristo Jesús. Chi nájñuhun ni candoho i ní sáha

jnáhan i ñayuu hebreo, suni súcuan ni candoho ró.

¹⁵ Chi suu ñayuu hebreo ni cajehni de máá Jítoho yó Jesús, nájñuhun ni cajehni de táca téé ñuu de jeé ní canacani jñuhun ya nde jenhán. Te suni nde ruhú jijnáhan ri ni cascúnu de. Te cásáha de jniñu jeé tu nújnahan ni Yaá Dios, te cúu de contra siquí táca ñáyuu.

¹⁶ Chi Jesúsico de jeé ma nácani ri jñuhun nuú ñáyuu táca nación jeé tu jíní, náváha tú cācu i. Te súcuan sáha de jeé nducuehē gā cuēchi siquí de. Te vijna te yachi quivi quiví jeé cuáha Yaá Dios castigo xeēn nuú de.

Jeé cuní Pablo quicōndéhē tucu de ñayuu Tesalónica

¹⁷ Hermano, ni cacujiyo ri ñin núnú-ni nuú ró jijnáhan ró. Te vésú tu cájito jnáhan yó, te níni cáñuhun ni rí rohó. Te yóhyo ni cacuu ni rí ndacoto ri nuú ró jijnáhan ró.

¹⁸ Te jeé yúcuan ní cajeni ni rí jecoo ri nuú ró nuú. Te ruhú Pablo, tijni jínu ni nducú rí modo jeé rí, te Satanás ní jesi ichi ri jijnáhan ri.

¹⁹ Chi tuá na inga cáñuhun ni rí, te tuá na inga cācusí ni rí, chi suu máá ró jijnáhan ró. Te jeé siquí máá ró cúu jeé nihín rí premio rí te cusí teyí ni rí cuiñi yó núu máá Jítoho yó Jesucristo quiví ndiji ya.

²⁰ Suu jeé siquí rohó cúu jeé cācusí teyí ni rí.

3

¹ Te jeé yúcuan tuá ní cācanda ri condetu ri nde nihín rí jñuhun ndese cáñiyo ró. Te ní casāndaá rí jeé quéndōo máá-ni rí ñuu Atenas.

² Te ní catají rí hermano yó Timoteo, téé jéjñiñu jín rí nuú Yaá Dios siquí jñuhun jeé jnáma Cristo yohó. Te ní jecondéhē de rohó náváha sáha de jeé cuiñi nihín ró te coo ndeyí ni ró jín jñuhun cācandje ró.

³ Te ní jeé de náváha ma náyuhú ni ñin ró siquí táca jñúndóho jeé sáha ñayuu. Chi je cājini ró jeé súcuan cānuú ndoho yó.

⁴ Chi nde ná ní coyucu rí jín ró, te ní cacastuhun rí nuú ró jeé nihín nahín yó jñúndóho. Te je cājini ró jeé súcuan ni cuu, nájñuhun ni cacahān rí.

⁵ Te jeé yúcuan, náa tuá ní cānda ri condetu ri jeé nihín rí jñuhun ndese cáñiyo ró, te ní tají rí de ní jeé de, náváha cuní rí núu cācandje nahín ró. Chi ní jeni ní rí á sanaa te jexeén jeé jito ndee yohó ní cundeyí jín ró, te naa cāhá-ni jniñu jeé ní casáha ri jín ró.

⁶ Te vijna chi je ní ndee Timoteo nuú rí jijnáhan ri jeé ní jé de ñuu ró Tesalónica. Te ní nacani de jeé cācandje váha ró, te cācundáhú ní ró jnáhan ró. Te ní cachi de jeé cáñuhun ni ró ruhú, chi cáñiyo maní ró jín rí. Te cācuni ró ndacoto ró nuú rí, nájñuhun cācuni rí ndacoto ri nuú ró.

⁷ Te jeé yúcuan ní candusí ni rí siquí jeé cācandje váha ró, hermano, vésú xeēn iyó jñúndóho siquí rí.

⁸ Te vijna je ní cananihín ni rí, chi cáñin nihín ró jín máá Jítoho yó.

⁹ Núu súcuan te tu jínu cuiñi nacuatáhú ri nuú Yaá Dios jeé siquí rohó jijnáhan ró. Chi jito ya jeé cācusí ndasí ni rí jeé súcuan cáñiyo ró.

¹⁰ Te nduú ñuu cājicān tahú ndasí rí jeé ndácoto tucu ri nuú ró, te steén gā rí na-ni jñuhun cūmaní jecuhun ni ró siquí jñuhun cācandje yó.

¹¹ Te cācuni rí jeé máá Tátá yó Yaá Dios jín Jítoho yó Jesucristo, na núne ya ichi jeé cuu jecoo tucu ri nuú ró.

¹² Te na sáha máá Jítoho yó jeé cuehē ndasí gā cundáhú ní ró jnáhan ró jín táca gā ñayuu, nájñuhun cācundáhú ní ró rohó jijnáhan ró.

¹³ Te na sáha ya jeé íje ánuá ró jeé cuiñi nihín ró, náváha coo ndoo ró jéé ma cóo cuēchi ró núu máá Tátá yó Yaá Dios, quiví ndiji Jítoho yó Jesucristo jín táca ñáyuu yíñi ndaha ya.

Siquí jeé caca ndaā yó modo jeé cúsí ni yá

4

¹ Te vijna hermano, iyó inga jñuhun jeé cācāhān ndahú rí jín ró te cāhān nihín rí jín ró, chi súcuan cúní máá Jítoho yó Jesús. Je ní castéén rí nuú ró ndese cānuú caca ndaā ró náváha cusí ni Yaá Dios. Te cācāhān ndahú rí jín ró jeé sa vlyhá gā na cáca ró súcuan.

² Chi je cājini ró na jniñu ni candacu ri nuú ró jeé ní ndacu máá Jítoho yó Jesús.

³ Te cúní Yaá Dios jeé na cóo ndoo coo íi ró nuú yá, te ma cáca jení ró.

⁴ Te ná ñin ná ñin ró na cóndeca yíñuhún ró ñasihí máá ró, te súcuan caca ndoo ró.

⁵ Te ma sáha ró jniñu néé jéé ndiyo ní ró jeshí, nájñuhun cásáha ñayuu táca nación jeé tu cājini í jñuhun Yaá Dios.

⁶ Ní ñin ró ma sáha ró cuēchi jeé quénde ró ñasihí jnáhan ró. Chi máá Jítoho yó cuáha ya castigo xeēn nuú ñáyuu casáha táca jniñu súcuan, nájñuhun je ní cacahān nihín ri ní castuhun rí nuú ró.

⁷ Chi tu ní cána Yaá Dios yohó jéé sáha yó jniñu jnehén, chi sa jeé caca ndoo yó.

⁸ Núu súcuan te ñayuu jeé squéhichí jñuhun yáha, nastū jñuhun ñin téé squéhichí í, chi sa jñuhun Yaá Dios, Yaá ní jéhe Espiritu Santo nuú yó.

⁹ Te tu jíní ñuhún jéé téé ri nuú carta yáha jéé coo maní ró jín táca hermano, chi je ní steén Yaá Dios nuú ró jeé coo maní ró jín jnáhan ró.

¹⁰ Te je cáñiyo maní ró súcuan jín táca hermano cāyūcu ní cáñu Macedonia jñā. Te cāhān ndahú rí jín ró hermano, jeé sa vlyhá gā na cóo maní ró jín í.

11 Te na cóndihvī ni rō coyūcú nayúú ró, te ma cóndihvī ni rō siquī ndese cásáha jnánhan ró, chí condihvī ni rō sáha ró jniñu máá ró, nájñuhun ni candacu ri nuū rō.

12 Súcuan na sáha ró náváha ñayuu tu cándje, cuatáhú i róhó, te suni ma cúmaní jeé cotecu rō.

Siquí jeé ndíji Jitoho yō

13 Suni cáuni rī, hermano, jeé na jécūhun ni rō jijnánhan ró siquī ñayuu cájihī, náváha ma cucuíhyá ni rō nájñuhun sava ga ñayuu jeé tu cáñuhun ni i jeé nátecu ndíyi.

14 Chí nájñuhun cácandje yó jée ni jíhī Jesús te ni natecu yá, suni súcuan cácandje yó jée nastécu Yaā Dios táca ñayuu ni cacandje nuū Jesús te ni cajihī.

15 Jeé yúcan cácastūhun rī ñin jñuhun jeé ní castūhun máá Jítoho yō nuū rī: Jeé yóhó jée cátecu gā quivī ndíji máá Jítoho yō, nasūu máá yó cosnúu jée ndaa yó quíhīn yō. Chí xihna gā ñayuu je ní cajihī ndaa i quíhīn i.

16 Chí máá Jítoho yō nuu ya quíji ya ichi ándiví, te cana jee ya jeé maá yá ndácu jniñu, te cana jee ndajehé cujéhu ga, te cucu trompeta Yaā Dios. Te xihna gā natecu táca ndíyi jeé ní cacandje Cristo.

17 Yúcuán na te yóhó jeé cátecu gā yō quivī ndíji ya, suni ndonehen ya yohó jíin i, quíhīn yó mēhūu vícō. Te naquijnánhan yó jíin máá Jítoho yō sava andiví. Te súcuan condee yó ní cáni jíin máá Jítoho yō.

18 Núu súcuan te jíin jñuhun yáha cahān ndeyí ni rō jíin táca jnánhan ró.

5

1 Te tu jíni ñuhún jée tée ri nuū carta yáha siquí cuiyá chí quiví jeé coo táca un, hermano.

2 Chí je cájini vāha ró jée ñin sanaa ni yō te quee quiví ndíji máá Jítoho yō, nájñuhun ñin sanaa ni yō te quíji ñacuíhná jecuáa.

3 Chí ná-ni cácahān ñayuu jeé nayúú-ni ñin te tú na jñúndóho coo, te ná-ni cácahān i súcuan te ñin sanaa ni i te quíji jñúndóho siquí i jeé náa i, te ma cácu cuiñi i. Chí quíji quiví un nájñuhun ñin sanaa-ni te quejéé jéhdē chíji ñin ñahan scácu sēhe.

4 Te róhó hermano, tu cácu ró ñayuu cájica nájñuhun nuū néé jeé ñin sanaa-ni te quíji quiví un siquí ró nájñuhun quíji ñacuíhná.

5 Chí ndíhi ró cácu ñayuu jeé nájñuhun cájica ró nduú, chí stéen luz yá ñin anuá ró. Chí tu cácu yó nájñuhun ñayuu jeé tu jécūhun ni siquí Yaā Dios, jeé nájñuhun cájica i nuū néé.

6 Núu súcuan te ma cúhuun ni yō nájñuhun ñayuu cáquixī, chí sa ndito na cóo ni yō te coo cájí xíní yō.

7 Chí jecuáa cúu jeé cáquixī ñayuu, te suni jecuáa cúu jeé nájini i.

8 Te máá yó chí nájñuhun jeé cájica yó nduú, te na cóo cájí xíní yō. Te na cúcutú yó jíin jñuhun cándje ñihīn yó jíin jñuhun cúndáhú ni yō jnánhan yó, nájñuhun cúcutú soldado jíin sahma cáa. Te na cúcutú yó jíin jñuhun jeé cáñuhun ni yō jeé cácu yó, nájñuhun cúcutú soldado jeé ñuhun lélú cáa xíní de.

9 Chí Yaā Dios tu ní jéni ya yohó jée cuáha ya castigo yohó, chí sa suhva jeé jnama ya yohó sáha máá Jítoho yō Jesucristo.

10 Te máá yá ni jíhī yá jehé yō, náváha cotecu inuú yó jíin yá, vēsū núu cotecu gā yō ñayiví yáha chí cúu yō.

11 Núu súcuan te cahān ró jñuhun ndeyí ni jíin táca jnánhan ró, te scuéhu jnánhan ró jíin jñuhun ya, nájñuhun je cásáha ró.

Jeé jéni ichi Pablo táca hermano

12 Te cácahān ndahú rī jíin ró hermano, jeé cuatáhú ró tēe cájejnīñu cándito róhó, jeé cácujeñhu de nuū ró jíin jniñu máá Jítoho yō, te cájeni ichi de róhó.

13 Te coo yíñuhún ndasí ró nuū de, te coo maní ró jíin de siquí jniñu ya jeé casáha de. Te na cóyucu maní ró jíin táca jnánhan ró.

14 Te suni cácahān ndahú rī jíin ró hermano, jeé na stíhvī ni rō ñayuu cájica cúxí. Te cahān ró jñuhun ndeyí ni jíin ñayuu jeé yachí ndínuu ni i. Te chindéé ñahán ró ñayuu jeé tu fuerza ñin. Te cuandeyí ni rō jíin ndíhi ñayuu.

15 Te coto má nasáha ndevāha ro jíin ni ñin ñayuu te núu sáha ndevāha i jíin ró. Chí maní jeé váha nducú ró sáha ró jíin táca jnánhan ró jíin ndíhi-ni ñayuu.

16 Níní na cóo sñi ni rō jijnánhan ró.

17 Te níní na cácan tahú ró.

18 Te nacuatáhú ró jeé siquí táca-ni. Chí súcuan cúni Yaā Dios jeé sáha ró jée cácandje ró Cristo Jesús.

19 Te ma cási ró nuū jniñu jeé sáha Espíritu Santo jíin ró.

20 Te ni ma cujéé ni rō nuū jñuhun cácahān tēe cánacani jñuhun Yaā Dios.

21 Chí coto ndee ró táca jñuhun, te núu jeé váha cúu, te cuatáhú ró.

22 Te ma quiví nduú ró jíin ni ñin jniñu néé.

23 Te máá Yaā Dios jeé jéhe jñuhun ndeyí sñi ni, ñuhun ni rī jeé sáha ndíhi ya jeé cóo ndoo coo ñi ró nuū yá. Te ñuhun ni rī jeé cóndito váha ya anuá ró jíin jée ñijnūni ró, jíin yiqui cúñu ró, náváha tú na cuéchi coo siquí ró quiví ndíji máá Jítoho yó Jesucristo.

24 Chí Yaā jeé ní cana róhó, sáha ya ndíhi un jíin ró, chí squícu ya jeé ni jéjnūhun ya.

Saludo jíin bendición jeé sándihí

25 Hermano jijnánhan ró, cacān tahú ró jehé rī jijnánhan rī.

26 Te núu na cáhān ró jíin táca hermano, te techūhu yíñuhún ró ndaha i.

²⁷ Te cáhán nīhin ri jíin ró, chí súcuan cúní maá Jítoho yō, jeē na cáhu ró carta yáha núū tācá hermano.

²⁸ Te ñúhun ni ri jeē maá Jítoho yō Jesucristo na sáha ga yā jeē váha róhó. Súcuan na cóo. Amén.

Jnūhun siquī maá tée sáha xeēn cuēchi

CARTA UU JEE NI TEE APOSTOL SAN PABLO NUU ÑAYUU ÑUU TESALONICA

¹ Máá rí cúu Pablo jiín Silvano jiín Timoteo, te cátee ri carta yáha cuájee nuu rohó ñayuu cávandje ñuu Tesalónica, jeē cáyihí ró ndaha Tátá yó Yaa Dios jiín Jítoho yó Jesucristo.

² Te cáñuhun ni ri jeē Tatá yó Yaa Dios jiín Jítoho yó Jesucristo, na sáha ga yá jeē váha róhó, te sáha ya jeē coo ndeyí coo sī ni ró jijnáhan ró.

Jeē sándaā yá cuēchi quivī ndjji Cristo

³ Cánúú jée niní nacuatáhu rí nuu Yaa Dios jeē siquī rohó jijnáhan ró hermano. Chi súcuan iyó váha, chí yóhoyo váha cuahije ró jiín jnūhun jeē cávandje ró yá, te yóhoyo cuanducuehē jeē cávandjé ni ró táca jnánhan ró.

⁴ Te jeē yúcuan cúu jeē cácusī teyí ni rí cáncani ri jnūhun ró nuu táca grupo ñayuu cávandje nuu Yaa Dios. Chi váha cávandje ró, te váha cájendeyí ni ró jeē cájito xeēn ñayuu rohó jiín jée cándoho ró táca gá jnūndóho.

⁵ Te jiín táca jée yáha chíhi ya cuenta jeē cácuu ró ñayuu váha jeē quívicoo ró ñuu nuu ndácu ya jniñu. Chi siquī ñuu un cúu jeē cándoho ró. Te jeē súcuan chíhi ya cuenta siquī ró, yáha stéén nuu yó jeē váha Yaa cúu ya.

⁶ Te suni iyó váha jeē nastóho ya ñayuu castóho róhó.

⁷ Te quivī ndjji Jitoho yó Jesús, quivī un sáha Yaa Dios jeē ndétátu róhó jée cándoho, te suni ruhú jijnáhan ri. Chi jiín yáñuhūn quiji Jesús ichi ándiví jiín táca ndajéhé yá jeē ndíso poder.

⁸ Te cuáha ya castigo nuu ñayuu jeē tu ní cájéhe i jnūhun cuni i ndese Yaa cúu Yaa Dios, te tu ní cájetáhu i jnūhun máá Jítoho yó Jesucristo jeē jnáma ya i.

⁹ Te ñayuu ún chí ndoho i ní cáni, chí cujiyo i nuu máá Jítoho yó, te ma cúu quívicoo i nuu lúu ndasí cújéhu ya jiín poder yá.

¹⁰ Súcuan sáha ya quivī ndjji ya jeē lúu cujéhu ya sáha ñayuu cávandje jeē yáhi ndaha ya. Te nahán naa ni i coto i nuu yá. Te suni súcuan róhó jijnáhan ró, chí ni cacandje ró jnūhun jeē ní canacani ri nuu ró.

¹¹ Te jeē yúcuan cúu jeē niní cájicān tahú rí jehé ró, jeē na cúu ró ñayuu váha jeē ní cana ya rohó. Te jiín fuerza yá na sáha ya jiín ró jeē squícu ró táca jniñu váha jeē ní catee ni ró sáha ró siquī jeē cávandje ró.

¹² Te súcuan te cujéhu máá Jítoho yó Jesucristo sáha ró, te suni cujéhu máá ró jijnáhan ró sáha ya. Chi Yaa Dios yó jiín Jítoho yó Jesucristo, súcuan cúu jeē sáha ya jeē váha yóhó.

2

¹ Vijna te cahān rí siquī jeē ndjji máá Jítoho yó Jesucristo jiín jée ndutútú yó nuu yá. Cácahān ndahú rí jiín ró jijnáhan ró hermano,

² jeē ma cuáha ró jnūhun sacā nuu cani ni ró, ni ma cunéé ni ró nuu cácahān ñayuu jeē jé ni quee quivī ndjji máá Jítoho yó. Ma candje cuiti ró vesú nuu cahān i jeē ni níñin i ñn jnūhun siquī un nuu Espíritu, chí ñn jnūhun jeē ni cáhān inga, chí núu cachi i jeē ruhú jijnáhan ri ni tají ñn carta jeē cahān súcuan.

³ Ma cuáha cuiti ró jnūhun jeē stahú ni ñn i róhó. Chi nde ná tu quiji quivī ún te xíhna gá nduníhni ni cuehē ñayuu nuu yá, te quenda ndijin máá tée sáha xeēn cuēchi, te tée jnánhū ndetú cúu máá téé ún.

⁴ Chi tée jito uhū Yaa Dios cúu de, te ndonda de contra siquī táca jée casnání i yaa i jiín táca jeē cáchiñúhūn i. Te xeēn gá sáha de, chí nde cucóo de ini templo Yaa Dios jee iyó Jerusalén, te cahān de jeē maá de cúu Yaa Dios.

⁵ ¿A cánahān ró jnūhun yáha? Chi súcuan ni cahān rí jiín ró ná ni Iyo rí jiín ró.

⁶ Te je cájini ró ndé vé cúu jeē jési jeē ná tu quenda ndijin tée ún, chí nde na quee quivī maá de.

⁷ Chi je jícu sáhi táca cuēchi xeēn ini ñayiví, te vijna chí iyó jée jési nuu, návāha ma cáa ndasí gá cuēchi, chí nde na cújiyo máá jée jési nuu.

⁸ Te sáá te quenda ndijin máá téé xeēn ún. Te máá Jítoho yó Jesús cahni ya tée un jiín táchi yuhu-ni ya, te jiín jée ndíndée yá ndiji ya te snáhnū ndetú yá de.

⁹ Te jeē quiji tée xeēn ún chí máá Satanás sáha. Te quiji de jíñ cuehē poder, te sáha de táca jniñu jéhu jeē stahú de, jeē nahán naa ni ñayuu coto i.

¹⁰ Te jiín táca jniñu néé te stahú ndasí de ñayuu jeē jnahnū ndetú, chí tu ní cúni i cuatáhu i jnūhun ndaa jeē cácu i núu.

¹¹ Te jeē yúcuan cuáha Yaa Dios jnūhun jeē cuatáhu i jnūhun jeē tú ndaa cuiti, te candje i jnūhun stahú un.

¹² Te súcuan te jecondee cuēchi siquī ndihi i jeē tu ní cávandje i jnūhun ndaa, chí sa jniñu néé ni cacusī ni i jiín.

Ñayuu jeē ní nacāji ya jeē cácu i

¹³ Te cánúú jée niní nacuatáhu rí jijnáhan ri nuu Yaa Dios jeē siquī rohó jée cácuu ró hermano jeē maní Jítoho yó jiín. Chi nde ná ni jecóo ñayiví, te je ni nacāji Yaa Dios rohó jée jnáma ya rohó. Chi sáha Espíritu yá jeē cáhíyo ndoo cáhíyo ñi ró nuu yá te cávandje ró jnūhun ndaa.

14 Chi jeē yúcuani ní cana ya rohó jíin jnúhun jeē jnáma ya yohó jeē ní canacani rí, náváha quivicoo ró núu cujúhnu luu ró jíin máá Jítóho yó Jesucristo.

15 Núu súcuani te cuiñi níhin ró hermano, te conahán váha ró jnúhun jeē ní cacutúhva ró núu rí, núu jeē ní cacahán rí chí jeē ní tee rí nuú carta.

16 Máá Jítóho yó Jesucristo jíin Tátá yó Yaa Dios ní cundáhú ní yá yohó, te ní sáha ya jeē coo sñi ní yó ní cáni, jíin jeē níhun ní yó táca jeē váha jeē coo siquí jeē váha ní yá jíin yó.

17 Te na sáha ga yá jeē cóo ndeyí ní anuá ró jijnáhan ró, te na sáha ya jeē íje ró cáhán ró táca jnúhun váha ya, te sáha ró táca jniñu váha.

Jeē na cácan tahu i jehē de

3

1 Te íyó inga jnúhun cánuú, hermano. Na cácan tahu ró jehē rí jijnáhan rí, náváha yachí cuitē núu jnúhun máá Jítóho yó, te cuatáhú váha ñayuu, nájnúhun ní cajetáhú máá ró.

2 Te suni cacán tahu ró jeē na cácu rí nuú táca tée casáha néé jeē cátejnhán jíin rí. Chí tú ndihí tée cácaníje jnúhun ya.

3 Te máá Jítóho yó chí váha squícu ya jeē ní jéjnúhun ya, te sáha ya jeē íje ní táca ró jíin jnúhun ya, te coto ya rohó núu jeneé.

4 Te cácuáhnu ní rí sáha máá Jítóho yó, jeē cócuu ró jíin jniñu jeē ní candacu rí nuú ró, te suni cocuu ga ró jíin.

5 Te níhun ní rí jeē máá Jítóho yó steén gā yá ndese coo maní gā ró jíin Yaa Dios nde jíin iní jíin ánuá ró, jíin jeē cuándeyí ní ró nájnúhun ní sáha Cristo.

Jeē cánuú sájniñu yó

6 Te cándacu rí jniñu nuú ró hermano, chí súcuani ní ndacu máá Jítóho yó Jesucristo, jeē na cújiyo ró núu táca hermano cájica cúxí te tu cájica váha de nájnúhun ní castéén rí nuú ró.

7 Chí je cájini ró ndese cánuú ndacu ró rúhū jijnáhan rí, chí tu ní cájica cúxí rí ná ní cahíyo rí jíin ró.

8 Ní tu ní cáyeji rí staā ní ñin ró súcuani-ní, chí ní cachunaa rí. Chí sa ní canducú ndeyí rí ní casájniñu téyí rí nduú ñuú, náváha ma stáhán rí ní ñin ró.

9 Te vésú íyó derecho rí jeē cacán rí nuú ró nuú, te tu ní cájicán rí, chí súcuani ní casáha rí náváha cuu rí ñin ejemplo nuú ró ndese sáha ró jijnáhan ró.

10 Chí ná ní coyūcu rí jíin ró, te ní candacu rí jniñu yáha nuú ró: Núu ndé ñin ñayuu tu cúní i sájniñu i, te suni ma cáji i núu súcuani.

11 Chí ní canihín rí jnúhun jeē cájica cúxí sava ró, te tu casájniñu ró, chí yáha yúcuani-ní sáha ró.

12 Te cándacu rí jniñu nuú rohó jeē casáha súcuani, te cástíhví ní rí rohó jeē na cóo nayúú ró te sájniñu ró, náváha nihín ró jeē cáji ró siquí jniñu sáha máá ró. Chí súcuani ndácu máá Jítóho yó Jesucristo jniñu.

13 Hermano, ma ndínuu ní ró jijnáhan ró sáha ró táca jniñu váha.

14 Te núu ndé ñin i tu jétáhú i jnúhun jeē cahán rí nuú carta yáha, te condéhe váha ró ndé-ní i cúu, te ma quiñáhan ga ró jíin i, náváha na cúcanu i te nacani ní i.

15 Te nasúu jeē cóto uhó ró i, chí sa cahán ró jíin i nájnúhun jíin ñani ró jeē na sájniñu váha i.

Bendición jeē sándihí

16 Te níhun ní rí jeē máá Jítóho yó, Yaa jeē jéhe jnúhun ndeyí sñi ní, níni na sáha ya jeē coo ndeyí coo sñi ní ró siquí táca-ní, te coo ya jíin ró jijnáhan ró.

17 Ruhú Pablo, yáhá-ní cúu jeē téé rí jíin ndaha máá rí jeē cahán rí jeē sándeýí ní ró jijnáhan ró. Te súcuani jéhe rí firma nuú táca carta rí, náváha cuni ró jeē carta máá rí cúu. Súcuani cáa letra rí.

18 Te níhun ní rí jeē máá Jítóho yó Jesucristo, na sáha ga yá jeē váha ró jijnáhan ró. Súcuani na cóo. Amén.

CARTA HN JEE NI TEE SAN PABLO APOSTOL NUU TIMOTEO

¹ Máá rí cúu Pablo, apóstol Jesucristo, chi Yaā Dios jeē jnáma yohó, jíin Jítoho yō Jesucristo jeē ñúhun ni yō coto yó, ni catajǎ yá ruhū jeē nácani ri jnúhun ya.

² Te tée ri carta yáha cuájeē nuū rō Timoteo, chi cúu ndije ró nájñuhun sēhe ri siquǎ jeē ni scándije ri rohó. Te ñúhun ni ri jeē Tatá yō Yaā Dios jíin Jítoho yō Jesucristo, na sáha ga yá jeē váha rohó, te cundáhú ni yá rohó, te sáha ya jeē coo ndeyǎ coo siǎ ni rō.

Jeē ma candije i táca jnúhun stáhú

³ Ná ni quihin ri ichi jeē quihín rǎ Macedonia, te ni cahān ndahú ri jíin rō jeē quéndoo ró ñuu Efeso. Te suni súcuan cáhán rǎ jíin rō vijna, návāha cahān ñihin ró jíin sava ñayuu yúcuan jeē ma stéén i inga jnúhun jeē tú ndaā.

⁴ Te ma cuatáhú i táca jnúhun jeē cúu máá cuento-ni, jíin jnúhun jeē cahán siquǎ ndese vĕji yucūn táca jíi yó. Chi táca jĕé yúcuan sáha jeē nahán cándajñuhún i siquǎ, te tu ndé jĕjñíñu, te tu sáha jeē ije i squǎ i nuū Yaā Dios siquǎ jnúhun cácdandije yó.

⁵ Te ndácu ri jñíñu yáha chi cúnǎ rǎ jeē na cundáhú ni i jnáhan i siquǎ jeē iyó ndoo iyó ndaā anuá i, te cácdandije ndije i ya.

⁶ Te sava ñayuu chi ni cajica yátá i, te ni cascuíta i jnúhun ya, ni quǎvicoo i nuū táca jnúhun jeē tu ndé jĕjñíñu.

⁷ Chi cácu ni i cuu i maestro ley yá, te ni tu cájecūhun ni i na jnúhun cúu jĕé cácahān i, jíin na vé cúu jeē castéén ñihin i.

⁸ Te jíni yō jeē iyó váha ley un, te núu jectūhun ni yō ndese jĕjñíñu.

⁹ Chi cánuú sáha yó cuenta jeē tu ní jĕcōo ni ñin ley cué siquǎ ñayuu ndaā, chi sa suhva siquǎ ñayuu jeē tu cájetáhú, jeē ñíhni ni, jeē casáha jñíñu néé, jeē casáha cuĕchi, jeē tu cáchiñuhún Yaā Dios ni tu cácdandije ley yá, jeē cájehni tatá jíin náná, jíin jĕé cájehni ndiyi.

¹⁰ Te suni ní jĕcōo siquǎ ñayuu cájica jnéni, jíin téé casáha ndiyǎ jíin jnáhan yǎ, jíin ñayuu casacúhna inga ñayuu, jíin ñayuu castáhú, jíin ñayuu cácahān ñihin jnúhun yáá. Te ni jĕcōo siquǎ táca gá ñayuu jeē casáha jñíñu tu quǎjñáhan jíin jnúhun ya jeē steén ndaā váha.

¹¹ Te jnúhun ya un cúu jnúhun yōhoyo jĕhnu jeē jnáma Yaā Dios yohó. Te yōhoyo ndetú Yaā cúu ya. Te ni tejníñu ya ruhū nácani ri jnúhun ya.

Jeē nácuatáhú Pablo siquǎ jeē ní cundáhú ni yá de

¹² Te nácuatáhú rǎ nuū Jítoho yō Jesucristo, Yaā ni jĕhe fuerza inǎ rǎ, chi ni quihin ya

ruhū ni sáha ya jeē cuu squǎ ri, te ni tejníñu ya ruhū nácani ri jnúhun ya.

¹³ Te súcuan ní sáha ya jíin rǎ vĕsú ni cahān ndeváha ri siquǎ yá nde saá, te ní sáha ndeváha ri jíin ñayuu cácdandije, te xĕén ni sáha ri. Te vĕsú súcuan te ní cundáhú ni yá ruhū, chi ná tu candije ri yá nde saá, te tu ní jĕcūhun ni rǎ na vé cúu jeē sáha ri.

¹⁴ Súcuan ní sáha Jítoho yō jeē váha ndasǎ jíin rǎ. Te ní sáha ya jeē candije ri jíin jĕé cundáhú ni rǎ jnáhan ri siquǎ jeē ní quǎvi ri ndaha Cristo Jesús.

¹⁵ Te ndaā ndije cúu jnúhun yáha, te jeē cánuú candije ndíhi ñayuu cúu: jeē ní quǎji Cristo Jesús inǎ ñayivi návāha jnama ya ñayuu iyó cuĕchi. Te ruhū cúu téé jeē vihyá gá ni sáha cuĕchi.

¹⁶ Te ní cundáhú ni Yaā Dios ruhū, návāha jíin rúhū jeē vihyá gá ni sáha cuĕchi te stéén Jesucristo ndese yōhoyo íne cáhnu ní yá. Te súcuan ní sáha ya jeē cúu ri ñin ejemplo nuū táca ñayuu candije ní cuáhān yō, návāha ñihin tahú i cotecu i ní cáni.

¹⁷ Núu súcuan te ní cáni na cáhán yǎñuhún yó jeē yōhoyo luu cújĕhnu máá Yaā jeē cúu Rey siquǎ ndíhi, jeē técu ní cáni, jeē tu náá cuíti. Te tu cúu coto yó núu yá vijna, te máá ñin-ni ya iyó, te ndíchi yá. Amén.

¹⁸ Nájñuhun sēhe ri cúu ró Timoteo, te jñíñu yáha tejníñu ri rohó, jĕé na ndúcú ndeyǎ ró siquǎ jñíñu váha. Te na cándije váha ró, te na coo ndaā anuá rō. Chi nde saá je ní cacahān táca hermano jíin jnúhun Yaā Dios jeē súcuan condiso jñíñu rō.

¹⁹ Chi sava ñayuu tuá iyó ndaā anuá i nuū yá, te ní casnáá i jnúhun cácdandije i.

²⁰ Himeneo jíin Alejandro cúu uū téé ní casáha súcuan. Te je ní siaá rǎ de nuū Satanás, jeē stóho ún de, návāha jíin jnúndóho ún te cutúhva de jeē ma cáhán ndeváha ga de siquǎ Yaā Dios.

Siquǎ ndese cacān tahú yō

2

¹ Núu súcuan te xǎhna gá ndácu ri jeē cacān tahú ró jĕhĕ táca ñayuu. Te cahān ndahú ró jĕhĕ i, te cacān rō na-ni na vé jíni ñúhún i, te nacuatáhú ró nuū yá jeē siquǎ i.

² Te cacān tahú ró jĕhĕ táca téé cácujeñnu jíin jĕé ndácu jñíñu, návāha sáha de jeē cuu coyūcu váha yó te tú na jnúndóho coo siquǎ yó, te cuu chíñuhún váha yó Yaā Dios te sáha yǎñuhún yó jíin táca-ni.

³ Chi yáha cúu jeē váha jeē nújñahan ni Yaā Dios, Yaā jnáma yohó.

⁴ Chi máá yá cunǎ yá jnama ya táca ñayuu te cunǎ i ndese iyó jnúhun ndaā yá.

⁵ Chi iyó ñin-ni Yaā Dios, te suni iyó ñin-ni Yaā jeē cahán jíin Yaā Dios jĕhĕ ñayuu. Te Yaā un cúu máá Jesucristo jeē ní nduu téé.

⁶ Te ni socó yā maá yá ni jihí yā jeé ní chu-naa yā cuéchi ndihi yó. Te ná ni quiji máá quívi ún, te ni quejéé ní canacani jñūhun ún.

⁷ Te jeé siquí yúcuán ní jeni ya ruhū cúu ri apóstol jeé nácani ri jñūhun ya, návāha stéén ri nuū ñáyyu táca nación jeé tu jíni jñūhun ya, jeé na cándije i jñūhun ún te sáha i jniñu ndaā. Te siquí jeé cándije ri Cristo te ndaā cúu jeé cahán rí.

⁸ Núu súcuán te cúní rí jeé ndihi-ni lugar na cácan tahú táca té. Te na cóo ndoo ánuá de jeé ma quití ní de ni ma tejnáhan de.

⁹ Te suni súcuán táca ñahan, na cási vāha ña máá ña nájñūhun cánuú, návāha ma cóo jñūhun canu. Te ma cóndihví ní ña jeé sáha luu ndasí ña xiní ña, chí jeé cuhun ña siquí oro chí perla chí sahma váha ga.

¹⁰ Chí sa suhva na quéndoo luu ánuá ña jíni jniñu váha sáha ña, nájñūhun cánuú sáha ñahan ndoo ánuá jeé cájejniñu nuū Yaā Dios.

¹¹ Te núu cáhiin ña jíni ñáyyu cascuáha jñūhun ya, te na cúní nahín ña te cuatáhu ña.

¹² Chí tu jéhe ri jñūhun jeé steén ñahan nuū ñáyyu ndutútú, ni jeé ndácu ña jniñu nuū té. Chí sa suhva na cúní nahín ña.

¹³ Chí xíhna gā Adán ní sáha ya, te sáá te ni sáha ya Eva.

¹⁴ Te tu ní stáhú jexeén Adán, chí sa suhva ni stahú un ñasihí de, te ni sáha ña cuéchi.

¹⁵ Te jeé scácu táca ña sehe te coo váha ña, te núu na quéndoo ña jíni jñūhun cándije ña ya, jíni jéé cundáhú ní ña jñáhan ña, jíni jéé cóo ndoo ánuá ña, jíni jéé sáha yíñuhún ña.

Ndese cánuú coo tēe cándiso jniñu nuū ñáyyu cácaandije

3

¹ Ndaā cúu jñūhun yáha: Núu ñin tēe cúní de condiso jniñu de condito de ñáyyu cácaandije, te váha jniñu ndúcú de sáha de.

² Núu súcuán te tēe ndíso jniñu nuū ñáyyu cácaandije, cánuú jeé ma cóo ní ñin jeé nihín ñáyyu cuéchi siquí de. Te na cóo ñin-ni ñasihí de, te cáji coo ní de, te ndíto coo xiní de, te sáha yíñuhún de. Te cánuú jeé níni cuanúu de vehe nuū ñáyyu cájica, te níni stéén vāha de jñūhun ya.

³ Te ma cúu de tēe nájini, te ma tejnáhan de, te ma ndíyo ní de xūhún. Chí sa suhva coo vāha ní de, te coo víta ní de, te ma cutóo ní de siquí xūhún.

⁴ Te cánuú jéé na ndácu vāha de jniñu ini vehe de, te sáha de jeé siquí vāha sehe de te coo yíñuhún i nuū de.

⁵ Chí núu ñin tēe tu jíni de ndácu vāha de jniñu ini vehe de, ¿te ndese cuu condiso jniñu de nuū ñáyyu cácaandije nuū Yaā Dios?

⁶ Núu súcuán te tēe ndíso jniñu nuū ñáyyu cácaandije, ma cúu de tēe jeé saá ní cándije, chí núu súcuán te sanaa te sánduxí de máá de, te inuú-ni cuéchi jecondee siquí de jíni jéxeén.

⁷ Te cánuú cuu de tēe jeé suni nde ñáyyu tu cácaandije, cuajñuhún i de, návāha ma nihín i cuéchi siquí de, te ma cúndeyí jexeén jíni de.

Ndese cánuú coo tēe cájejniñu mēhñu ñáyyu cácaandije

⁸ Te suni súcuán tēe cájejniñu mēhñu ñáyyu cácaandije, cánuú jéé na cóo yíñuhún de, te na siquí de jíni jñūhun cáhan de. Te ma cúu de tēe nájini, te ní ma ndíyo ní de xūhún.

⁹ Te na cuñi ñihin de jíni jñūhun cándije yó jéé ní yisáhi ndé jenahán, te na cóo ndoo anuá de.

¹⁰ Te cánuú jéé xíhna gā coto ndee rō de, te núu ní jini rō jeé tú na cuéchi de, yúcuán na te cuu cuajniñu de mēhñu ñáyyu cácaandije.

¹¹ Te suni súcuán ñasihí de jíniñu ña, cánuú coo yíñuhún ña, te ma sajnūhún ña, te cáji coo ní ña, te siquí vāha ña táca-ni jniñu.

¹² Te tēe cájejniñu mēhñu ñáyyu cácaandije, na cóo ñin-ni ñasihí de, te na ndácu vāha de jniñu nuū sehe de jíni núu ñáyyu vehe de.

¹³ Chí táca tēe cájejniñu vāha mēhñu ñáyyu cácaandije, chí vāha quéndoo yíñuhún de, te ñihin de modo jeé caji gā nácani de jñūhun Cristo Jesús jeé cácaandije yó.

Jñūhun sáhi yá jeé cácaandije yó

¹⁴ Te vesú ñūhun ní rí cuajeé yachí rí coto jñáhan yó, te tēe rí jñūhun yáha cuajeé nuū rō,

¹⁵ návāha núu cucuéeé rí, te je jíni rō ndese cánuú sáha vāha ñáyyu cácuu sehe Yaā Dios. Chí máá i cácuu ñáyyu cácaandije nuū Yaā Dios, Yaā técu. Te máá i cása ha jeé iyó cutú jñūhun ndaā, chí cáhiin ñihin i jíni.

¹⁶ Te jendaá ndije chí jéhu ndasí cúu jñūhun yáha jeé cácaandije yó, jeé ní yisáhi ndé jenahán:

Yaā Dios ní steén yā maá yá, chí ni nduu ya tēe,

te Espiritu ní steén jeé iyó ndáa jniñu ní sáha ya,

te táca ndajehé andiví ní cajito jniñu ní sáha ya.

Te ní jitē núu jñūhun ya nuū ñáyyu táca nación,

te ní cacandije ñáyyu ní ñáyyi núu yā,

te ní ndaa ya cuanuhun yā andiví.

Siquí ñáyyu cájica yátá nuū jñūhun cácaandije yó

4

¹ Te cáji stéén Espiritu Yaā Dios jeé quívi cuándihí te coo sava ñáyyu caca yátá i nuū jñūhun cácaandije yó. Te cuatáhu i táca jéé cácahān jñūhun stáhú jíni jñūhun ní castéén tachí.

² Chí cuni nahín i jñūhun cástéén tēe cástáhú-ni, jeé tu cácahān ndaā de. Chí tēe un ní cahije ndasí ní de jíni jñūhun stáhú, te tuá sáha jíni ánuá de jeé nácani ní de.

³ Te cahān de jeē cuēchi cúu jeē coo ñasihí té, te suni súcuan núu caji ñayuu sava ndeyu. Te ndeyu ún chi ni sáha Yaā Dios jeē cúu ñayuu cácanđije jeē jíní jnúhun ndaā, návaha caji i te nacuatáhú i nuú yā.

⁴ Chi ndihi jeē ni sáha Yaā Dios, iyó váha, te ma squexícó yō ni ñin, chi sa nacuatáhú yó te caji yō.

⁵ Chi jíin jée cáhu yó jnúhun Yaā Dios jíin jée nacuatáhú yó nuú yā, te iyó ndoo ndihi-ni.

Tée jéjníu váha nuú Jesucristo

⁶ Te núu stéen rō jnúhun yáha núu táca hermano, núu súcuan te cuu rō tée jéjníu váha nuú Jesucristo, te ije rō jíin jnúhun váha ya jeē candíje rō, chi ni cutúhva rō te ndíquin rō.

⁷ Te ma quívi nduu rō jíin táca jnúhun jeē cúu cuento-ni jeē cájeni cáhá ni ñayuu. Chi níni na scuáha rō ndese chiñúhún váha rō Yaā Dios.

⁸ Chi jeē scuáha yó ejercicio jeē cóo ndacuí yiqui cúnu yō, jecu-ni níhin jniñu. Te jeē scuáha yó chiñúhún váha yó yá, suu yúcuan cúu jeē váha níhin jniñu siquí táca-ni, jeē cúu vida yáha jíin vida quiji.

⁹ Te ndaā ndije cúu jnúhun yáha, te jeē cánuú candíje ndíhi ñayuu cúu.

¹⁰ Te jeē siquí yáha cúu jeē sájníu nihin yó siquí jnúhun ya te ndóho yó jée cácahān ndeváha i nuú yō. Chi ñúhún ni yō jeē coto yó núu maá Yaā Dios, Yaā técu. Te maá yá cúu Yaā jnáma táca ñayuu, te ñayuu cácanđije jnúhun cúndáhú ni yā i, maá i cúu jeē jnáma ya.

¹¹ Táca jnúhun yáha cánuú jée ndacu rō núu i te stéen rō.

¹² Ma cuáha ro jnúhun jeē kujée ni ni ñin i nuú rō siquí jeē suchí rō. Chi sa coo rō ñin ejemplo nuú ñayuu cácanđije, jeē cúni i ndese váha cáhān rō, ndese váha sáha rō, ndese cúndáhú ni rō jnáhan rō, ndese cándíje rō, ndese iyó ndoo ánuá rō.

¹³ Te níni ndé ná tu jinú rí nuú rō, te condíhví ni rō jeē cáhu rō tutu i nuú hermano cándutútú, jíin jée síhví ni rō i, jíin jée stéen rō nuú i.

¹⁴ Ma cúhuun ni rō jíin táhú jeē ni jéhe Yaā Dios nuú rō jeē nácani rō jnúhun ya. Chi táca tée jéhnu cándiso jniñu nuú ñayuu cácanđije, ni casóo de ndaha de xiní rō, te ni sáha Yaā Dios jeē ní cacahān de jeē súcuan condiso jniñu rō.

¹⁵ Núu súcuan te cocuu rō jíin táca jniñu yáha, te condíhví ni rō jíin, návaha cuni táca ñayuu jeē váha lje rō cuáhān rō jíin.

¹⁶ Coo cuidado rō jeē cacca ndaā rō jíin jée stéen váha rō jnúhun ya, te cuiñi nihin rō jíin ndíhi. Chi núu súcuan sáha rō te quendóo váha ánuá maá rō jíin ñayuu chuhun ni jnúhun cáhān rō.

Ndese sáha váha yó jíin ñayuu cácanđije

5

¹ Ma cúxeēn rō nuú táca tée jéhnu, chi sa cahān váha rō jíin de jeē ma stívi de, nájnúhun cáhān rō jíin tátá rō. Te táca tée suchí, suni cahān váha rō jíin de nájnúhun jíin ñani rō.

² Te suni súcuan cahān rō jíin táca ñahan jéhnu, nájnúhun jíin náná rō. Te suni súcuan jíin táca ñahan súchí, nájnúhun jíin cuáha rō, te yíñúhún ndajnúhun rō jíin ña.

³ Te ñayuu cácanđije na cuáha i jeē jíní ñúhún ñahan ni caquendóo ndáhú, te núu ni quendóo ndáhú ndije ña jeē tú na ñayuu condito ña.

⁴ Chi ñin ñahan ní quendóo ndáhú, núu iyó séhe ña chí séhe chání ña jeē jéváha, te na coto máa i ña. Chi cánuú cutúhva i jeē xíhna gā nuú ñayuu vehe i squícu i coto i. Te na nácolo i náná i tátá i siquí jeē ní cacondito ña i. Chi yáha cúu jniñu váha jeē nújnahan ni Yaā Dios.

⁵ Te ñin ñahan ní quendóo ndáhú ndije jeē máa ñin na ña, ñúhún ni ña jeē maá Yaā Dios condito ya ña, te tu jécuiñí ña jeē jicán tahú ña nduu ñuu.

⁶ Te sa suhva núu máni ndíhví ni ña siquí táca jée cúsi ni maá-ni ña, yúcuan na te vésú técu ña, te nájnúhun je ni jíhi ña.

⁷ Jniñu yáha ndacu rō núu ñayuu, návaha ma cóo cuēchi siquí i.

⁸ Te núu ñin ñayuu tu ndíto i jnáhan vehe i, te víhyá gā ñayuu ñni vehe i, núu súcuan te sáha i jniñu jeē tu quíjnahan jíin jnúhun cándíje yó, te cúu i ñin jeē neé gá vésú ñayuu tu cácanđije.

⁹ Te ñahan viuda cuu quívi síhví ña nuú lista ñayuu jeē cáchindée ñahán rō jíin xúhun, te núu je ni jinu ña uní xico cuiyā, te núu ni iyo ñin-ni yí ña.

¹⁰ Te suni cánuú jée cuajnúhún ñayuu ña jeē váha jniñu ni sáha ña, núu jeē ni scuéhnu váha ña séhe ña, jíin jée ní jéhe núu ña vehe nuú ñayuu cájica, jíin jée ní jéjníu ña nuú hermano cácanđije, jíin jée ní chindée ñahán ña ñayuu cándoho jnúndóho, jíin jée ni sáha ña táca gā jniñu váha.

¹¹ Te táca ñahan viuda jeē iyó suchí gá, chí ma soó rō síhví ña nuú lista. Chi sanaa te nducú ña jeē cúsi ni maá-ni ña, te ma cóndíhví ni ña siquí Cristo, chí cuu ni ña condeca tucu ña tée.

¹² Te súcuan jecondee cuēchi siquí ña, chí tu ní squícu ña jeē ní jéjnúhun ña ná ni jecosó síhví ña nuú lista.

¹³ Te suni cacca cuu ña táca-ni vehe te quee cúxí ña. Te nasúu máni jeē cáca cúxí ña, chí suni siquí jeē sajnúhún ña, te quívi nduu ña cahān ña jnúhun jeē tu iyó váha jeē cahān ña.

¹⁴ Jeē yúcuan cúní rí jeē táca ñahan viuda jeē iyó suchí, na nándaha ña, te scuéhnu ña séhe, te coto váha ña vehe ña, návaha ñayuu cácuu contra ma cúu cahān i siquí ña.

¹⁵ Chi sava ñahan viuda je ni cajica yátá ña te sáha ña jniñu jeē cuu i Satanás.

¹⁶ Te núu ñin tēe chí ñin ñahan cándíje, núu iyó ñahan viuda vehe i, te na cóto máá i ña. Te ma cóndee gasto ña siquī grupo ñayuu cácañdije, návaha cuu cuáha váha i nuū ñahan viuda jeē tu ndé ñin coto ña.

¹⁷ Te táca tēe jéhu cándito ñayuu cácañdije, na jécunaá doble yáhu de, te núu cándihví ni de cástéén de cánacani váha de jnúhun ya.

¹⁸ Chí cúu nájnúhun cáhán tutu i: Ma cánda stiquī caxín tí trigo, núu ma cuáha ró jéé cáji tí. Te suni cáhán: Tēe jeē sájniñu tátú, jini ñúhún quiyáhu de, áchí.

¹⁹ Ma cuajnúhún ró te núu jéquin ñayuu cuéchi siquī ñin tēe jéhu cándito ñayuu cácañdije te núu tu iyó úu chí úní testigo.

²⁰ Te núu cósaáha ñayuu cuéchi, te cánuú cuxeén ró nuū i, jito jínúu ndihi ñayuu, návaha na cónso Iyo sava ga i.

²¹ Te cáhán ñihin ri jín ró, jito máá Yaa Dios jín Jítoho yó Jesucristo jín táca ndajéhé yá jeé ní nacáji ya: Squícu váha ró jniñu yáha, te ma sáha ró cuenta ndese cúu ñin ñin i, chí inuú-ni sándaá ró siquī ndihi-ni i.

²² Ma cáni yachí ró ñin tēe jeē condiso jniñu de nuū ñayuu cácañdije, chí xíha gá coto ndee ró de. Chí sanaa te stívi de, te cuéchi de suni condee siquī ró jín de. Te coto ró máá ró jeē ma quívi ró jín jniñu néé.

²³ Te siquī jeē núu-ni núu-ni chúhú chíji ró, te ma cóho ga ró máni ndute, chí suni coho ró jecu vino.

²⁴ Cuéchi sava ñayuu chí je iyó ndijin nde ná tu quívi i nuū cúndaá cuéchi i. Te cuéchi sava ga i chí cúcuéé te natú nahín.

²⁵ Te suni súcuan táca jniñu váha, chí iyó ndijin. Te vésú ná tu natúu jniñu váha ún, te ma cúu quisáhi ní cáni, chí natúu nahín.

6

¹ Táca ñayuu cácuu mozo, na cóo yíñúhún váha i nuū patrón i, návaha ma cáhán neé ñayuu siquī Yaa Dios jín siquī jnúhun ya jeé cástéén yó.

² Te mozo jeé yíhi nuū patrón cácañdije, ma cáni ni i jeé cúhva-ni sáha yíñúhún i nuū de siquī jeé hermano cácañdije cácuu de. Chí sa cuajniñu váha ga i nuū de, chí tēe cándije tēe maní i jín cúu táca tēe un jéé sájniñu i nuū. Jnúhun yáha stéén ró te stíhví ni ró i.

Siquī jeé chíñúhún váha yó yá te cusí ni yó jín cúhva jeé névaha-ni yó

³ Te núu ndé tēe stéén de jnúhun tú ndaá jeé tu quíñáhan jín jnúhun váha ndaá máá Jítoho yó Jesucristo, jín jnúhun ni stéén Yaa Dios jeé cácañdije yó,

⁴ núu súcuan te máni tēe ndúxí tēe tu jécúhun cuíti ni cúu de. Chí cánéé xíní de, chí máni cúni de tejnáhan de siquī táca jnúhun stéén de. Te táca un sáha jeé cácuésún ni, jín jéé cátejñáhan, jín jéé cácahán ndeváha, jín jéé cájeni néé ni siquī jnáhan,

⁵ jín jéé máni cástáhán jnáhan. Súcuan cósaáha tēe jeé ní ndunéé xíní, jeé tu cájni jnúhun ndaá. Te cájeni ni de jeé ñihín de cuehē xúhun siquī jnúhun cácañdije de stéén de. Na cújiyo ró núu ñayuu cándaá súcuan.

⁶ Te jendaá jeé yóhyo váha quéndō yó te núu chíñúhún váha yó yá, te núu cúsi ni yó jín cúhva jeé névaha-ni yó.

⁷ Chí tú na vé ní cácu yó jín ñayívi yáha, ni tú na vé condiso yó quíhín yó jín núu na cúu yó.

⁸ Te núu iyó jéé cáji yó jeé cusúcún yó, te na cúsi ni yó jín yúcuau-ni.

⁹ Chí ñayuu jeé cumí cucucá, chí yachí quívi i cuéchi jeé jito ndee jexeén i. Te quívi i jín cuéhe jniñu cánéé jniñu stívi jéé ndíyo ni i. Te táca un sáha jeé tívi ñayuu te jnahnú ndetú i.

¹⁰ Chí jeé ndíyo ni yó xúhún, yúcuau sáha jeé quejéé táca jniñu néé. Te sava ñayuu jeé ndíyo ni xúhún, ni castóo i jnúhun cácañdije i, te ni canihín i cuehē ndasi jnúndóho.

Jeé na ndúcu ndéyí yó siquī jnúhun cácañdije yó

¹¹ Te róho chí tēe jéjniñu nuū Yaa Dios cúu ró, te cunu ró coto ró táca cuéchi yáha. Te condiquín ró jniñu ndaá, te chíñúhún váha ró Yaa Dios, te candije váha ró, te cundáhu ní ró jnáhan ró, te cuandeyí ni ró, te coo vítá ni ró.

¹² Te nducú ndéyí ró siquī jnúhun cácañdije yó yá. Te cuiñi ñihin ró jín jnúhun jeé ní ñihín tahu yó cotecu yó ní cáni. Chí jeé yúcuau cúu jeé ní cana ya rohó, te cáji ní cahán ró jeé váha cácañdije ró yá, jito jínúu cuehē ñayuu.

¹³ Te cáhán ñihin ri jín ró, jito máá Yaa Dios, Yaa jeé sáha jeé técu táca-ni, jín Jesucristo, Yaa jeé cáji ní cahán yá ni nacani ya jnúhun váha nuū Poncio Pilato.

¹⁴ Squícu váha ró jniñu ndácu ya nuū ró, te ma stívi ró sáha ró, návaha ma cáhán ñayuu cuéchi siquī ró. Te súcuan sáha ró ní ndé quívi ndíji Jítoho yó Jesucristo.

¹⁵ Chí quíji ndijin yá máá quívi jeé ní jeni Yaa Dios. Te Yaa Dios chí máá ñin-ni ya cúu Yaa yóhyo ndetú, te jniñi ya ndihi poder. Te cúu ya Rey nuū táca rey, jín Jítoho nuū táca jítoho.

¹⁶ Te máñúhún-ni ya cúu jeé iyó ní cáni. Te ndéé yá ñin lugar nuū ndí ndaxín, nuū ma cúu quívi yó. Te ni ñin ñayuu ñayívi yáha tu ní jito cuíti i nuū yá, te ni ma cúu coto i nuū yá. Te ní cáni na cóo yíñúhún yó nuū yá, chí jniñi máá yá poder ní cáni. Amén.

¹⁷ Te cahán ró jín ñayuu cucá ndajniñu ñayívi yáha, jéé ma cundúxí i. Te ma ténuu i xúhún i, chí yachí naa ún. Chí sa suhva na ténuu i jeé coo váha i sáha Yaa Dios, Yaa técu, chí máá yá jéhe cuehē yá táca-ni jeé cúsi ni yó jín.

¹⁸ Te ndacu ró jniñu nuū i jeē na sáha vāha i, chi jeē sacúcá ndije i máá i cúu jeē sáha i tǎcá jniñu váha. Te na cúu i ñayuu vāha ni jeē cuáha i jeē cúu jnánhan i.

¹⁹ Te súcuan caya i cuehē jniñu váha jeē coo cúcá i nuū yā ní tiempo jeē quíji. Te nihīn tahú i cotecu i nǎ cáni.

Jniñu sándīhi ndácu Pablo nuū Timoteo

²⁰ Te rǎhó Timoteo, condito ró táca jniñu ní chihī ya ndaha ró. Te ma quívi nduu rǎ jíin táca jnúhun cǎhá-ni, cuenta ñayivi yáha, jíin táca jnúhun stáhú jéé cǎcāhān i jeē jnúhun ndíchí ndáá cúu.

²¹ Chi sava ñayuu cándiquīn tǎca jnúhun yáha, ni cajica yátá i ni castóo i jnúhun cǎcandíje i ya.

Te ñúhun ni rǎ jeē Yaā Dios na sáha ga yā jeē váha rǎhó. Súcuan na cóo. Amén.

CARTA UU JEE NI TEE SAN PABLO APOSTOL NUU TIMOTEO

¹ Máá rí cúu Pablo, apóstol Jesucristo, chi súcuan ni nujnahan ni Yaá Dios ni tají yá ruhú jeé nácani ri jnúhun jeé ni jéjnúhun ya jeé cótecu yó ní cáni siquí jeé yíhi yó ndaha Cristo Jesús.

² Te téé ri carta yáha cuájeé nuú rō Timoteo, chi cúu ro nájnúhun séhe ri jeé maní ri jín. Te ñúhun ni rí jeé Tatá yó Yaá Dios jín Jítoho yó Jesucristo, na sáha ga yá jeé váha rōhó, te cundáhu ní yá rohó, te sáha ya jeé coo ndeyí coo sí ni rō.

Jeé nácani de jnúhun Cristo

³ Níní tu náá ni rí cacán tahu ri jehé rō nuú Yaá Dios ndúú ñúú, te nácuatáhu rí nuú yá jeé siquí rō. Chi nuú maá yá jejnúnu ri, nájnúhun ni casáha táca jí rí, te iyó ndoo ánuá rí nuú yá.

⁴ Te núcúhun ni rí jeé ni ndáhyū rō ná ni quenda ri cuahān rí. Te cúu ni rí ndacoto jnáhan yó, náváha cusí ndasí ni rí.

⁵ Te núcúhun ni rí jeé váha ndije cándije rō Cristo, nájnúhun ni cándije náná jénu rō Loida, jín náná rō Eunice xihna gā. Te cúcáhu ni rí jeé suni súcuan cándije máá rō vijna.

⁶ Te jeé yúcuan nástíhví ni rí rohó jéé na cóndihví gā ni rō jín táhú jeé ni jéhe Yaá Dios nuú rō jeé nácani rō jnúhun ya. Te tahú un ní nihín rō ná ni tee ri ndaha ri xiní rō.

⁷ Chi Espíritu jeé ni jéhe Yaá Dios nuú yó, tu sáha jeé yúhu yó nacani yó jnúhun, chi sa sáha jeé iyó fuerza ini yó, jín jéé cundáhu ni yó jnáhan yó, jín jéé ndító iyó xiní yó.

⁸ Núu súcuan te ma cúcanu rō nacani ndaa rō jnúhun máá Jítoho yó. Te suni ma cúcanu rō jeé siquí máá rí jeé íne ri vecāa siquí jnúhun ya. Chi sa cuāha rō jnúhun ndoho rō jín rí siquí jeé cánacani yó jnúhun jnáma ya yohó, núu ndese ni jéhe Yaá Dios fuerza ini yó.

⁹ Chi ni jnama ya yohó, te ni cana ya yohó jéé coo ndoo ánuá yó cuajniú yó nuú yá. Te tu ní cána ya yohó siquí jeé váha ni sáha yó, chi siquí jeé ni tee ni máá yá jeé cundáhu ni yá yohó jéé yíhi yó ndaha Cristo Jesús. Chi nde ná tu jecōo ñayíví, te je cundáhu ni yá yohó.

¹⁰ Te vijna jeé ní quenda ndijin Jesucristo, Yaá jnáma yóhó, te ni steén cají Yaá Dios jeé cundáhu ni yá yohó. Chi máá Cristo ni snáa yá poder cuehyí jéhi yóhó, chi jín jnúhun jnáma ya yohó ni steén cají yá nuú yó jeé cótecu yó ní cáni chi ma jnahnú ndetú yó.

¹¹ Te ni jeni Yaá Dios ruhú jeé nácani ri jnúhun ún, te ni tají yá ruhú cúu ri apóstol

jeé steén rí nuú ñayuu táca nación jeé tu jíní jnúhun ya.

¹² Te siquí un cúu jeé ndóho ri táca jnúndóho yáha íne ri vecāa. Te tu cúcanu rí, chi jíní rí ndese Yaá cúu Yaá cándije ri, te cúcáhu ni rí jeé cúu coto ya jniú jeé ní chihi ya ndaha ri nde vijna te nde quiví ndíji ya.

¹³ Te cuiñi nihín rō jín táca jnúhun ya jeé steén ndaa, suu jnúhun jeé ni steén rí nuú rō. Te caca rō jín jnúhun cándije yó, te cundáhu ni rō jnáhan rō siquí jeé yíhi rō ndaha Cristo Jesús.

¹⁴ Te condito rō táca jniú váha jeé ní chihi ya ndaha rō, sáha poder máá Espíritu Santo jeé ndee ini yó.

¹⁵ Je jíní rō jeé táca ñayuu cáyūcu Asia ni castoo i ruhú. Te uú i cúu Figelo jín Hermógenes.

¹⁶ Te jícán tahu rí jeé cundáhu ni Jítoho yó ñayuu vehe Onesíforo, chi cuehē jínú ni nanihín ni rí ni sáha de, te tu ní cúcanu de siquí rí jeé ní ine ri vecāa.

¹⁷ Chi sa suhva ná ni quiji de ñuu Roma, te ni nanducú yúcún de ruhú nde ni nanihín de ruhú.

¹⁸ Te jícán tahu rí jeé máá Jítoho yó cundáhu ni yá de quiví ndíji ya. Te je jíní váha máá rō ndese yóho ni chindéé ñáhán de ruhú ná ni cahíyo ri ñuu Efeso.

Jeé cúu yó nájnúhun soldado váha nuú Jesucristo

2

¹ Núu súcuan te rōhó, séhē mání, na cóo fuerza ni rō siquí jeé yíhi rō ndaha Cristo Jesús te sáha ya jeé váha rōhó.

² Te táca jnúhun jeé ní jini rō ní cahān rí, jito jintú ñayuu cuehē, jnúhun ún na nástéén rō nuú téé cásquicu váha, náváha suni cuu steén tucu máá de nuú sáva ga i.

³ Te rōhó na cuándeyí ni rō coto rō jnúndóho, chi cúu rō nájnúhun ñin soldado váha nuú Jesucristo.

⁴ Ni ñin soldado jeé ñin nuú guerra, tu sájneú de máá de jín jniú máá de, chi cánuú jeé sáha de mání máá jéé ndácu tēe ní tejniú de.

⁵ Te suni súcuan tēe cásiquí deporte, ma nihín de premio te núu tú depóhví ni de cosiquí váha de máá modo chíjiniú.

⁶ Te tēe sájiniú nihín ñuhun, máá de cúu jeé nihín xihna gā jeé cuáha itu.

⁷ Nacani ni rō siquí jeé cahán rí, te máá Jítoho yó sáha ya jeé jécúhun ni rō siquí ndihi.

⁸ Te cocuhun ndasí ni rō Jesucristo, Yaá ní quiji yucún rey David, te ni natecu yá mehñu ndíyí, nájnúhun cáhán jnúhun jnáma ya yohó jéé nácani ri.

⁹ Te jeé siquí jnúhun un ndóho ri jnúndóho, te nde ni cajihni i ruhú íne ri vecāa nájnúhun ñin tēe ni sáha cuéchi xeén. Te jnúhun Yaá Dios chi ma cúu cuhni i jeé ma cuité núu.

¹⁰ Núu súcuan te jéndeýí ni rí jító ri táca jnúndóho yáha siquí jeé cundáhú ni rí ñayuu jeé ní nacáji ya, náváha suni cācu máá i jeé quívi i ndaha Cristo Jesús, te quihín i nuū cujéhnu i ní cāni.

¹¹ Chi ndaā cahán jnúhun yáha:

Núu vesú tu cūu yō jeé siquí yā, te suni cotecu yō jíin yā,

¹² te núu cuandeyí ni yō ndoho yó, te suni ndacu yó jniñu jíin yā.

Te núu ma cuajnúhún yó yā, te suni ma cuajnúhún yá yohó.

¹³ Te vesú tu squícu vāha yó, te máá yá chi máni squícu ya,

chi tu cúu sáfalta yā, chi squícu ya jeé ni cáhān yā.

Tēe sájniñu squícu vāha jíin jnúhun ya

¹⁴ Jnúhun yáha na nástáhví ni rō ñayuu, te cahān nihin ro jíin i, jító máá Jítóho yō, jeé ma téjnáhan i siquí táca jnúhun sáá-ni. Chi tu ndé jéjniñu cuiti, chi sa stívi ñayuu jíni sōho.

¹⁵ Te nducú ndéýí ró jeé cuajnúhún Yāā Dios rohó, jéé cúu ró tēe sájniñu squícu vāha jíin jnúhun ya, náváha ma cúcanu rō nuū yā siquí ní ñn, chi vāha nacani ró jnúhun ndaā yā.

¹⁶ Te ma quívi nduu rō jíin táca jnúhun sáá-ni ñayívi yáha, chi suu sáha jeé ndúcuehē gā jniñu néé quívicoo ñayuu cácahān.

¹⁷ Te táca jnúhun cástéén i chi cúu nájnūhun ñn ndihyi xeēn jeé sacáhú gá cuahān. Te Himeneo jíin Fileto cúu uū tēe jeé casáha súcuan.

¹⁸ Chi tēe un ní cajica yátá de nuū jnúhun ndaā, te cácahān de jeé jé ni cuu ni canatecu ndíyi. Te súcuan cásaca nuu de xiní sava ñayuu cácadíje.

¹⁹ Te Yāā Dios ni jeni ya ñayuu máá yá, te iyó cutú ndaā i jeé ma cáca yátá i, nájnūhun yósó nuū tútu ñi: Je jíni Jítóho yō Yāā Dios táca ñayuu jeé yíhi ndaha máá yá. Te suni cáhān: Táca ñayuu jeé ndácunehen síhví Cristo, na cújiyo i nuū jniñu néé, áchi.

²⁰ Te ñni ñn vehe cáhnu iyó cuéhē cohō, nasūu máni cohō oro cohō plata, chi suni cohō yujnu cohō ñuhun. Te iyó jéé fino te iyó jéé corriente.

²¹ Te núu ñn ñayuu sándoo i máá i jeé quénda i nuū táca jniñu néé, te cuu i nájnūhun ñn cohō fino. Te coo ndoo coo ñi i nuū Jítóho yō, te nihín jniñu i ndese cúni máá yá. Te coo túhva i jeé sáha i táca jniñu vāha.

²² Núu súcuan te cunu ró coto ró táca jéé tú vāha jeé cándiyo ni tēe suchí. Te condiquín ró jniñu ndaā, jíin jnúhun cándíje ró yá, jíin jnúhun cúndáhú ni, jíin jnúhun coyūcu máni jíin jnáhan. Te súcuan sáha ró ndé jíin táca ñayuu ndoo ánuá jeé ndácunehen síhví máá Jítóho yō.

²³ Te ma quívi nduu rō jíin táca jnúhun cánéé ñi jeé tu iyó cájí, chi je jíni rō jeé sáha jeé tejnáhan ñayuu.

²⁴ Te mozo máá Jítóho yō, tú vāha jeé tejnáhan de, chi sa suhva cánuú jéé coo vāha ni de jíin táca ñayuu. Te coo vāha ni de stéén de, te cuandeyí ni de jíin i.

²⁵ Te jíin jéé víta ni de te cani ichi de ñayuu nihni ni. Chi sanaa te nacani ni i sáha Yāā Dios, te jecūhun ni i ndese iyó jnúhun ndaā.

²⁶ Te nducájí ni i te cācu i nuū jexeén jeé ní jniñu ñn i, chi ni cundeyí jíin i jeé sáha i jeé cuní máá.

Siquí ndese coo ñayuu sáha néé quívi cuándíhi

3

¹ Te suni na jecūhun ni rō jeé quívi cuándíhi te quee quívi coo jnúndóho.

² Chi coo ñayuu jeé chiñúhún máá, te ndiyo ni i xúhún, te sátéýí i máá i, te sándúxí i máá i. Te cahān neé i siquí Yāā Dios, te cunihni ni i nuū tatá i nuū naná i, te ma nácuatáhú i, te ma chiñúhún i Yāā Dios.

³ Te ma cóo maní i jíin jnáhan i ni ma cundáhú ni i. Te sájniñún i, te ma cúu casi i táca jéé ndiyo néé ni i, te yōhoyo xeēn coo i, te quiti ni i coto i táca jniñu vāha.

⁴ Te suni nastúu i jnáhan i, te ma yūhú i sáha i cuéchi, te coo ndúxí ndasí i, te nducú i jeé cúsiñi ni maá-ni i, te ma nducú i quívi i nuū Yāā Dios.

⁵ Te sáha-ni i jeé chiñúhún i ya, te casi i nuū poder yā jeé ma sáma modo i.

Ma quívi nduu rō jíin ñayuu casáha súcuan.

⁶ Chi sava tēe ñn quívi de vehe te stáhú de táca ñahan cánéé jéé iyó ndasí cuéchi. Te yachí quívicoo ña jíin táca jnúhun tú ndaā jeé cúsiñi ni ña jíin.

⁷ Te vesú níni scuáha ña na-ni jnúhun, te tu cúu cuiti jecūhun ni ña jnúhun ndaā yā.

⁸ Te nájnūhun ni casáha tēe tásí Janes jíin Jambres jenahán, jeé ní canducú de casi de nuū Moisés, suni súcuan sáha tēe ñn, chi nducú de casi de nuū jnúhun ndaā. Chi coo nee jeé níjnúni de, chi ma candíje ndíje de jnúhun cándíje yó.

⁹ Te ma quée jniñu sáha de, chi cuni táca ñayuu jeé tēe cánéé xiní cácuu de, nájnūhun ni cajini ñayuu jeé ni iyó néé xiní ndindúú tēe jeé ní nducú casi nuū Moisés.

Jniñu sándíhi ndácu Pablo nuū Timoteo

¹⁰ Te róhó chi je ni cutúhva vāha ró ndese stéén rí, ndese jíca ndaā rí, ndese tēe ni rí sáha rí, ndese cándíje rí yā, ndese néé rí paciencia, ndese cúndáhú ni rí jnáhan rí, jíin ndese jéndeýí ni rí.

¹¹ Chi ni cajito xeēn ñayuu ruhū, te ni ndoho rí jnúndóho. Te jíni rō táca jéé ní ndoho rí ñuu Antioquía, ñuu Iconio, jíin ñuu Lистра. Te jíni rō ndese ni cajito xeēn i ruhū.

Te máá Jítoho yō ni jnama ya ruhū nuū ndihi ún.

¹² Chi ndaa cúu jeē tāca ñayuu jeē ndihví ni cuajniñu vāha nuū Cristo Jesús, ndoho i jeē coto xeēn ñayuu i.

¹³ Te ñayuu casáha jniñu neé jíin ñayuu castáhú, chí sa víhyá gā cocuu i jíin jniñu neé, chí stáhú i ñayuu, te suni candíje máá i jnūhun stáhú.

¹⁴ Te rōhó chí sa cuiñi ñihin ró jíin jeē ní cutūhva ró jíin jeē ní cucáhnu vāha ni rō. Chí jíin rō ndese ñayuu cúu jeē ní castéén nuū rō.

¹⁵ Chí nde ná lulí ró, te je jíin rō ndese cáhán tutu íi jeē steén nuū rō ndese candíje ró jeē ní jíihí Cristo Jesús jehē rō návāha cācu ró.

¹⁶ Te náfí tutu íi cúu jnūhun jeē ní cáhān Yaā Dios, te vāha ñihin jniñu jeē steén nuū yō, jeē cahán nuū yō, jeē náchuhun ichí yóhó, jíin jeē scuéhnu yóhó jíin jniñu ndaa.

¹⁷ návāha tēe cájejniñu nuū Yaā Dios, ije ni de te coo tūhva vāha de sáha de tācá jniñu vāha.

4

¹ Te cáhān rí jíin ró, jíto Yaā Dios jíin Jítoho yō Jesucristo, Yaā quiji ndacu jniñu, te sándaā yā jniñu ñayuu cátecu jíin ñayuu ní cajihí.

² Cáhān ñihin ri jeē na nácani ró jnūhun ya, te stíhví ní rō i candíje i. Te níni sáha ró súcuan núu núne i chí vēsú tu núne i. Te sáha ró jeē na jécūhun ní i, te cahán rō nuū i, te caní ichí vāha ró i, te jíin cuéhē paciencia steén rō nuū i.

³ Chí quee tiempo jeē ma cuájnuhún cuítí ñayuu jnūhun ya jeē steén ndaa vāha, chí sa cuajnuhún i jnūhun cúsiñ ní máá i, te nducú i cuéhē maestro jeē steén nuū i máni jnūhun jeē núnahan ní i cuni nahín i.

⁴ Te cujiyo i nuū jnūhun ndaa, te condihví ní i tāca jnūhun jeē máá cuento-ni cúu.

⁵ Te rōhó chí níni coo ndito ní rō, te cuandeyí ní rō jíin jnūndóho, te condihví ní rō nacani ró jnūhun jnáma ya yohó, te squícu vāha ró jíin jniñu ya jeē sáha ró.

⁶ Te ruhū chí je ní socó rí máá rí jeē cúu rí, te je cuacuyajni quiví cuu rí.

⁷ Te je ní cundeyí rí jeē ní nducú ndeyí rí siquí jniñu vāha, te je ní jínu ní jica rí ñayiví yáha, te tu ní siáá rí jnūhun candíje rí yā.

⁸ Te vijna je íyó tūhva premio jeē ñihin rí siquí jeē ní jica ndaa rí. Chí Jítoho yō cuāha ya un núu rí máá quiví sándaā yā jniñu, chí máá yá cúu juez ndaa. Te nasūu núu máá ñin ruhū cuāha ya, chí suni cuāha ya nuū tāca ñayuu jeē cúu ní i jeē ndíji ya chí maní i jíin yá.

Jeē cána Pablo quiji Timoteo nuū de

⁹ Nducú ndeyí ró quiji yachí rō nuū rí.

¹⁰ Chí Demas ní stóo de ruhū, chí ndíyo ní de ndajniñu ñayiví yáha, te cuahān de

ñuu Tesalónica. Te Crescente chí cuahān de Galacia, te Tito cuahān de Dalmacia.

¹¹ Te máá ñin na Lucas íne jíin rí. Te jeē quíji ró, te condeca ró Marcos quíji ró jíin de, chí vāha cuajniñu de jeē chindéé ñáhān de ruhū jíin jniñu ya.

¹² Tíquico ní tají rí de cuahān de ñuu Efeso.

¹³ Te jeē quíji ró, te condaha ró cotón jeē ní stóo ri vehe Carpo ñuu Troas. Te suni condaha ró tāca libro, te jeē cánuú gā cúu tācá tutu ní tee máá rí.

¹⁴ Alejandro, tēe cúu herrero, yōhoyo xeēn ní sáha de jíin rí. Te máá Jítoho yō cuāha ya yāhu de jeē súcuan ní sáha de.

¹⁵ Te condito ró máá ró nuū de, chí yōhoyo ní cuu de contra siquí jnūhun castéén yó.

¹⁶ Te ná ní ine rí jeē xíhna ñúhún núu tāca tóhó, te tú ní ñin tēe ní índichi jíin rí, chí ndihí de ní castóo de ruhū. Te ñúhún ní rí jeē Yaā Dios cone cáhnu ní yā nuū de.

¹⁷ Te vēsú súcuan te máá Jítoho yō ní chindéé ñáhān yá ruhū, te ní jēhe ya fuerza ñin rí, te súcuan ní sínu rí ní nacani ndihí rí jnūhun jnáma ya yohó, ní cajini nahín ñayuu tācá nación tu jíin jnūhun ya. Súcuan ní jnama Jítoho yō ruhū nuū tāca tēe xeēn.

¹⁸ Te jnama ga yā ruhū nuū tācá jniñu neé, te condito ya ruhū nde quiví rí andiví nuū ndácu ya jniñu. Te na cáhān yō jeē yóhoyo luu cújēhnu ya ní cáni. Amén.

Saludo jíin bendición jeē sándihí

¹⁹ Te cahán rō jeē sándeyí ní Prisca jíin Aquila, jíin ñayuu vehe Onesíforo, achí rí.

²⁰ Erasto ní quendōo de ñuu Corinto. Te ní quendōo Trófito ñuu Mileto, te chúhú de.

²¹ Te condihví ní rō quíji ró nde ná tu quejéé vico mójin. Sándeyí ní rō, achí Eubulo jíin Pudente jíin Lino jíin Claudia jíin táca gá hermano.

²² Te ñúhún ní rí jeē máá Jítoho yō Jesucristo na cóo ya jíin ró, te Yaā Dios sáha ga yā jeē vāha rōhó jíinhan ró. Súcuan na cóo. Amén.

CARTA JEE NI TEE SAN PABLO APOSTOL NUU TITO

¹ Máá rí cúu Pablo, mozo Yaā Dios jín apóstol Jesucristo, chi ní tají Yaā Dios ruhū jeē scāndije rí ñayuu ní nacāji ya, návāha jecūhun ní i jñuhun ndaā yā jeē candije yó,

² te cocuhun ní i jeē cótecu i ní cāni. Chi nde ná tu jecōo ñayiví te ní jejnūhun Yaā Dios jeē cótecu yó, te iyó ndaā jñuhun ní cahān yā.

³ Te vijna jeē ní quee tiempo ní jeni ya, te steén caji yá jñuhun ya nuū yó. Te ní tejniñu ya ruhū ní ndacu ya jniñu jeē nācāni rí jñuhun ya ún. Chi Yaā jnāma yóhó cúu ya.

⁴ Te téé rí carta yāha cuájeē nuū rō Tito, chi nájñuhun sēhe rí cúu ndije rō siquī jeē inuú-ní cāndije yó yá. Te ñuhun ní rí jeē Tatá yó Yaā Dios jín Jitoho yó Jesucristo, Yaā jnāma yóhó, na sáha ga yā jeē váha rōhó, te cundáhú ní yā rohó, te sáha ya jeē coo ndeyí coo sī ní rō.

Jniñu ya jeē ní sáha Tito nde isla Creta

⁵ Te ní stóo rí rohó ndé isla Creta, návāha sándaā rō siquī jniñu jeē cūmaní gā cundaā, te caní rō táca téé jéhnū condito ñayuu cācandije táca ñuu, nájñuhun ní ndacu rí jniñu nuū rō.

⁶ Te téé jéhnū un cānuú jeē ma cóo ní in jeē nihín ñayuu cuēchi siquī de. Te cānuú coo in-ní ñasihí de. Te sēhe de cānuú cuu i sūchi cācandije jeē ma nihín ñayuu cuēchi siquī i jeē tu sáha váha i chí jéé nihni ní i nuū de.

⁷ Chi téé cācujéhnū cāndiso jniñu nuū ñayuu cācandije, cānuú caca ndaā de chí cāndiso jniñu de siquī jniñu Yaā Dios. Te ma satéyí de máá de, ma quití yachi ní de, ma cúu de téé nájñi, ma cuajnáhan de, te ma ndíyo ní de xūhún.

⁸ Chi sa cānuú jéé níni cuāha núu de vehe nuū ñayuu cājica, te níni sáha de jniñu váha, te ndito coo xiní de, te coo de téé ndaā, te coo ndoo ánuá de, te casi de modo jeē cuní maá de.

⁹ Te cānuú cuifí nihin de jín jñuhun ndaā jeē ní scuáha de, návāha cuu sthív ní de ñayuu jín táca jñuhun ndaā váha, te suní cuu sáha de jeē jécūhun ní ñayuu cácuu contra, te casi i yuhu i.

¹⁰ Chi iyó cuéhē ñayuu nihni ní, te cástéén i inga modo jéni ní maá i jeē súcuān cācu ñayuu, te stáhú i ñayuu. Te jnáhan yó hebreo cúu jeē vihíyá gā casáha súcuān.

¹¹ Te cānuú jéé casi rō yuhu táca téé ún, chí cástéén de jñuhun jeē tu iyó váha stéén de, chí cuní de nihín de xūhun siquī ún. Te súcuān sáca nuu de xiní ndihí ñayuu táca vehe.

¹² Te in téé isla Creta jeē nācāni jñuhun, ní cahān de siquī jnáhan ñuu de: Jnáhan yó

ñayuu Creta, chí máni ñayuu stáhú cácuu i, te nájñuhun quiti xéén casáha i, te máni ndhíví ní i caji cuéhē i, te cúxí i, áchí de.

¹³ Te ndaā cúu jñuhun ní cahān téé ún. Jeē yúcuān na cúxeēn rō nuū i, návāha ndaā váha na cāndije i.

¹⁴ Te ma sáha i cuenta táca jñuhun ní catava jnáhan yó hebreo, jeē maá cuento-ní cúu, ní ma squicu i jniñu cāndacu téé ní quendacoo nuū jñuhun ndaā.

¹⁵ Te ñayuu jeē ní ndundoo jeē níjnūní, máni modo iyó ndoo iyó váha jéni ní i jito i táca-ní. Te ñayuu tu cāndije jeē tu ní ndúndoo jeē níjnūní, máni jéni ní i in modo tú ndoo tú váha siquī táca jéé jito i. Chi nde jeē níjnūní i jín ánuá i iyó jnéhén.

¹⁶ Te vésú cācāhān i jeē jini i Yaā Dios, te jín jniñu casáha i te jini yó jeē tú ndije i. Chi ñayuu ndeváha ñayuu nihni ní cácuu i, te tu cúu sáha i ní in jniñu váha.

Jñuhun ya jeē steén ndaā váha

2

¹ Te máá rō chí níni na cahān rō táca jñuhun jeē quijnáhan jín jñuhun ya jeē steén ndaā váha.

² Te cahān rō jín táca téé jéhnū jeē na cóo caji ní de, te sáha yíñuhún de, te ndito coo xiní de, te candije nihin de jñuhun cundáhú ní yā de, te cundáhú ní de jnáhan de, te cuandeyí ní de.

³ Te suní súcuān táca ñahan jéhnū, na sáha yíñuhún ña, te ma sajnúhún ña, te ma nájñi ña. Te na steén ña táca jéé váha.

⁴ Te na steén ña nuū táca ñahan súchí jéé coo maní ña jín yí ña jín séhe ña.

⁵ Te ndito coo xiní ña, te coo ndoo ánuá ña, te coto váha ña jniñu vehe ña, te coo váha ní ña, te cuatáhú ña nuū yí ña, návāha ma cahān neé ñayuu siquī jñuhun Yaā Dios.

⁶ Te suní súcuān sthíví ní rō táca téé súchí jeē ndito na cóo xiní de.

⁷ Te rōhó, cuu rō in ejemplo nuū de jeé sáha rō táca jniñu váha. Te jeé steén rō nuū de te ndaā steén rō te coo ndije ní rō.

⁸ Te ndaā váha steén rō, návāha ma cúu cahān ñayuu siquī. Te súcuān te cucānu ñayuu cácuu contra, chí ma cúu cahān i ní in cuēchi siquī rō.

⁹ Te cahān rō jín ñayuu cácuu mozo jeē na cuatáhú i nuū patrón i, te na sáha i táca jniñu jeé núnjahan ní de, te ma cahān maá i núu ndácu de jniñu nuū i.

¹⁰ Te ma sacuíhná i ndajniñu de, chí na cúu i ñayuu ndaā ndije, návāha jín táca jniñu jeé sáha i, te cuni táca ñayuu jeé yóhoyo luu cúu jñuhun jeé steén siquī Yaā Dios, Yaā jnāma yóhó.

¹¹ Chi vijna je ní steén Yaā Dios ndese sáha ya jeé váha ñayuu, chí cuní yá jnama ya ndihí ñayuu ñayiví.

¹² Te jñuhun jeē váha ni yā jín yó, suu stéén nuū yō jeē na siáá yō jniñu néé jín táca jée ndíyo néé ni yō. Te ndito na cóo xiní yō ini ñayívi yáha, te caca ndaā yō, te chiñúhún váha yó Yaā Dios.

¹³ Te suni stéén nuū yō jeē cocuhun ni yō jeē quéndōo ndetū yō jeē quíji máá quívi jénu jeē quénda ndijin Yaā Dios, Yaā cujénu ndasí, suu Jesucristo, Yaā jnáma yóhó.

¹⁴ Chi ni socō yā maá yá jehē yō, návāha jnama ya yohó nuū táca jniñu néé, te sándoo ndihi ya anuá yō jeē cuu yó ñayuu maá yá, te condihvi ni yō sáha yó jniñu váha.

¹⁵ Táca jñuhun yáha cánuu stéén rō, te stíhvi ni rō i, te cahān rō nuū i, chi súcuan ndiso jniñu rō. Te ma cuáha ro jñuhun jeē sajéé ni ni ñin i nuū rō.

Ndese cánuu sáha ñayuu cácandíje

3

¹ Te na nástíhvi ni rō i jeē cuatáhú váha i nuū tée cácujeñu jín tée cándiso jniñu ñuu. Te na squícu i jniñu cándacu de, te coo ñamā ni i sáha i táca jniñu váha.

² Te ma cahán neé i siquí ni ñin ñayuu, te coyūcu máni i jín ñayuu, te coo váha ni i, te coo vitá ni i jín ndihi ñayuu.

³ Chi máá yó suni ni cuu yó ñayuu canéé jeē tu jécūhun ni nde saá, te ni cacuníhni ni yō nuū Yaā Dios. Te ni cacandíje yó táca jñuhun tú ndaā, te ni cajejniñu sáa-ni yó núu táca jée ní ndiyo néé ni yō jín na-ni jniñu ni cusí ni yō. Te ni cajica yó jín jniñu néé jín jñuhun cuésún ni. Chi ni cajito uhū ñayuu yohó, te ni cajito uhū yō i.

⁴ Yūcuán na te Yaā Dios, Yaā jnáma yóhó, ní steén yā jeē váha ni yā te cundáhú ni yā ndihi ñayuu ñayívi.

⁵ Te ni jnama ya yohó, te tú na jniñu váha ní casáha yó jée jnáma ya yohó, chi sa siquí jeē ní cundáhú ni yā yohó. Chi ni nacate ya anuá yō, te súcuan ni nacacu jeé yó, te ni ndujeé yó ni sáha ya jín máá Espiritu Santo.

⁶ Te yóhoyo ni cunuú Espiritu Santo ini anuá yō, jeé ni sáha Yaā Dios jeé jín Jesucristo, Yaā jnáma yóhó.

⁷ Te súcuan te ni ndahva yā cuéchi yó siquí jeé váha ni yā, te nihín tahú yō cotecu yó ní cáni, nájnūhun ñúhún ni yō.

⁸ Ndaā cúu jñuhun yáha, te cúní rí jeé niní cáhān nihín ro táca jñuhun yáha, návāha ñayuu cácandíje Yaā Dios, na condihvi ni i cocuu i jín jniñu váha. Chi íyó váha táca jée yáha, te níhín jniñu jeé quéndōo váha ánuá ndihi ñayuu.

⁹ Te ma quívi nduu rō jín táca jñuhun cánéé íi, jín jñuhun siquí ndese vēji táca jí yó, jín táca jñuhun sáha jeé cátejñáhan i cácahān i jeé cánuu squícu yó ley Moisés. Chi máni jñuhun cáhá-ni jeé tu níhín jniñu cúu.

¹⁰ Te núu íyó ñayuu jeé sáha jeé ndusín ini ñayuu cácandíje, te cahān rō nuū i ñin uū jínu, te núu ma chūhun ni i, te quenehen ró i.

¹¹ Chi jíní rō jeé ñin ñayuu sáha súcuan, stívi ndasí i chi jíní i jeé tú váha sáha i, te jeé yúcuán jeéconde cuéchi siquí i.

Jeé cána Pablo quíji Tito nuū de

¹² Te jeé tají rí Artemas chí Tíquico cuajeé de, yūcuán na te nducú ndéyí ró quíji ró nuū rí ñuu Nicópolis, chi je ni cundaā ni rí jeé yúcuán condee rí tiempo mǐjin.

¹³ Te condihvi ni rō chindéé ñáhán ró Zenas, tée cúu abogado, te suni súcuan Apolos. Chi cuáha ró jée jíní ñúhún de jeé quíngoo ga de ichi nuū quíhín de. Te coto ró jée ma cúmaní ni ñin nuū de.

¹⁴ Te ñayuu cáhín jín yó, cánuu cutúhva i sáha i táca jniñu váha, te chindéé ñáhán i ñayuu cúmaní nuū, návāha ma cótecu saá-ni i.

Saludo jín bendición jeé sándíhí

¹⁵ Táca ñayuu cáyūcu jín rí yáha, cácahān i jeé sándeyí ni rō. Te cahān rō jeé achí rí jeé sándeyí ni ñayuu jíñá jeé maní yó jín siquí jeé cácandíje yó. Te ñúhún ni rí jeé na sáha ga Yaā Dios jeé váha róhó jñánhan ró. Súcuan na cóo. Amén.

CARTA JEE NI TEE SAN PABLO APOSTOL NUU FILEMÓN

¹ Máá rí cúu Pablo, te íne rí vecāa jeē siquí jnúhun Cristo Jesús. Te jíin hermano yō Timoteo cátee rí carta yáha cuájeē nuū rō Filemón. Chi cúu rō tēe jeē cáhíyo maní rí jíin, chi chíndéé ñájnáhan rō jíin rí siquí jníñu Yaā Dios.

² Te suni cátee rí carta yáha nuū ñáyuu cácañdije cándutútu ini vehe rō, te suni nuū hermana yō Apia, jíin núu Arquipo, tēe chíndéé ñájnáhan jíin yō siquí jníñu cánducú ndeyí yō jíin.

³ Te cáñuhun ni rí jeē Tatá yō Yaā Dios jíin Jítoho yō Jesucristo, na sáha ga yā jeē váha rōhó jíjnáhan rō, te sáha ya jeē coo ndeyí coo sī ni rō.

Tēe cūndáhú ni te cándije váha cúu Filemón

⁴ Te jeē jíicán tahú rí nuū Yaā Dios te tu náā ni rí cacān tahú rí jehē rō, te níni nácuatáhú rí nuū yā jeē siquí rō.

⁵ Chi níhín rí jnúhun jeē váha cándije rō jnúhun cūndáhú ni Jítoho yō Jesús rohó, te cūndáhú ni rō táca ñáyuu yíhi ndaha Yaā Dios.

⁶ Te jíicán tahú rí jeē ñáyuu ni cacandije siquí jeē cándije máá rō, na jécuhun váha ga ni i siquí táca jéé váha jeē sáha ya yohó jeē jíin Cristo Jesús.

⁷ Chi cúsi ndasí ni rí te íyó ndeyí ni rí, hermano, siquí jeē cūndáhú ni rō ñayuu cácañdije. Chi máá rō ni sáha jeē ní ndusi ni i.

Jeē jíicán Pablo ñn favor jehē Onésimo

⁸ Núu súcuan te cáhan ndahú rí jíin rō, vesú cuu ndacu rí nuū rō ndese cánuú sáha rō, chi cúu rí apóstol Cristo.

⁹ Te tuú chi sa cáhan ndahú rí jíin rō siquí jeē cáhíyo maní yō. Te cūndáhú ni rō ruhū sáha rō jéé cuní ruhū Pablo, chi je jéhu rí, te íne rí vecāa jeē siquí jnúhun Cristo Jesús.

¹⁰ Te cáhan ndahú rí jíin rō jehē mozo rō Onésimo jeē ní jeen rō te ni jinu. Te vijna te cúu i nájnūhun sēhe rí, chi ní scándije rí i ini vecāa yáha.

¹¹ Te nde saá chi tu ní cúu i mozo squícu nuū rō, chi ni jinu i. Te nde vijna chi váha cuajníñu i nuū rō jíin núu rí.

¹² Te nátají rí i najeē i nuū rō. Núu súcuan te cáhan váha rō jíin i, te sáha rō cuenta jeē nájnūhun máá rí ni najinū, chi yōhyo maní rí jíin i.

¹³ Te cusí ni rí núu jeē na cúu quendōo i jíin rí yáha, návaha cuajníñu i nuū rí lugar máá rō níni jéé íne rí vecāa jeē siquí jnúhun váha ya.

¹⁴ Te tu ní cúni rí sáha rí súcuan, chi nde cuáha máá rō jnúhun. Chi nasūu jéé safuerza rí rohó, chi jeē váha ni rō te sáha rō favor jíin rí, nájnūhun cúsi ni máá rō.

¹⁵ Chi sanaa te jeē siquí yáha cúu jeē ní jinu i ni cujiyo i nuū rō jecu-ni tiempo, suu návaha ví quendōo i jíin rō sáha Yaā Dios.

¹⁶ Te vijna tuá cúu i ñn mozo jeē ní jeen rō, chi ni nduu i ñn jeē váha ga, suu ñn hermano jeē maní rō jíin. Te ruhū chi yōhyo maní rí jíin i, te nagá ni cuu máá rō jeē ma cóo maní rō jíin i. Te nasūu jéé maní rō jíin ñn tēe súcuan-ni, chi siquí jeē cúu i ñn hermano jeē cándije nuū Jítoho yō.

¹⁷ Te núu sáha rō cuenta jeē ruhū cúu jnáhan rō cándije, núu súcuan te cáhan váha rō jíin i jeē jíin i nuū rō, nájnūhun jeē ruhū cáhan rō jíin.

¹⁸ Núu na-ni falta ni sáha i nuū rō, chí núu táu i nuū rō, te cacān rō chunaa máá rí.

¹⁹ Ruhū Pablo, jíin ndaha máá rí tēe rí yáha jéé máá rí nachunaa. Súcuan cáhan rí vesú cuu cáhan rí jeē sa máá rō táu nuū rí sáha rō jéé cúsi ni rí siquí jeē ní scándije rí rohó te ni cácu ánuá rō.

²⁰ Núu súcuan, hermano, sáha rō favor yáha jíin rí siquí jeē cándije rō Jítoho yō. Sáha rō jéé ndusi ni rí, siquí jeē cúu rō hermano cándije Cristo.

²¹ Te tēe rí yáha núu rō, chi cúcáhu váha ni rí jeē cuatáhú rō, te nde vihýá gā sáha rō vesú jeē ní jíicán rí.

²² Te suni jíicán rí jeē sátūhva rō núu cóndee rí, chi ñuhun ni rí jeē quēnda rí yáha te jeē rí nuū rō sáha Yaā Dios siquí jeē cájicán tahú rō jehē rí.

Saludo jíin bendición jeē sándihí

²³ Epafras, tēe íne jíin rí vecāa jeē siquí jnúhun Cristo Jesús, cáhan de jeē sándeýí ni rō.

²⁴ Te suni súcuan cácahan Marcos, jíin Aristarco, jíin Demas, jíin Lucas, tēe cáchindéé ñájnáhan jíin rí siquí jníñu ya.

²⁵ Te ñuhun ni rí jeē Jítoho yō Jesucristo na sáha ga yā jeē váha rōhó jíjnáhan rō. Súcuan na cóo. Amén.

CARTA JEE CUAHAN NUU ÑAYUU HEBREO

Jeē ní tají Yaā Dios Sēhe ya ni nacani ya jnūhun

¹ Tijni jínu te tijni modo ni cahān Yaā Dios jíin táca jíi yō nde jenahán, chi ní tají yá tēe ní canacani jnūhun ya.

² Te vijna te tiempo cuándihi yāha ní tají yá maá Sēhe ya ni nacani ya jnūhun nuū yō. Te jíin Sēhe ya ní sáha ya ñayīvi jíin táca gá, te ndivii jeē iyó ní chihí ya ndaha Sēhe ya.

³ Te Sēhe ya yōhyo luu cújēhnu ya, nájnūhun luu cújēhnu maá yá. Te ndihi ndese cúu maá yá, suni súcuan cúu Sēhe ya. Te jíin poder jnūhun ní cahān Sēhe ya te iyó cutú ndihi-ni. Te ní sándoo ya yohó táca cuéchi yó, te saá te ní cucōo ya lado váha mesa maá Yaā cújēhnu nde andiví.

Jeē cújēhnu ga Sēhe Yaā Dios vēsú tācá ndajéhé yā

⁴ Te ní ndujéhnu ndasí gá Sēhe ya vēsú tācá ndajéhé andiví, chi ní nihín yā tahū jeē ndiso ya jniñu jéhnu ndasí gá vēsú jniñu cándiso ndajéhé.

⁵ Chi súcuan ní cahān Yaā Dios jíin Sēhe ya, te nasūu jíin ndajéhé yā:

Maá ró cúu Sēhe ri,
te vijna te ní sajéhnu ri rohó jeē cúu ri Tatá rō.

Te suni ní cahān yā jnūhun Sēhe ya, te nasūu jnūhun ndajéhé yā:

Maá ri cúu Tatá nuū Sēhe ri,
te maá i cúu Sēhe nuū rī.

⁶ Te suni ná ní tají yá Sēhe ya cújēhnu, ní quiji ini ñayīvi yáha, te ní cahān yā:

Ndihí ndajéhé rí na chíñuhún i Sēhe rí.

⁷ Te ní cahān tucu ya jnūhun ndajéhé yā:

Nájnūhun quée tachí, súcuan cájica ndajéhé rí sáha ri,
te táca un jeē cájegniñu nuū rī, nájnūhun yáñuhún cácuu.

⁸ Te jnūhun Sēhe ya chí sa suhva cáhán yā:

Maá ró cúu Yaā Dios, te ndacu ró jniñu ñf cáni,
te jniñu ndácu ró, máni jniñu ndaā cúu.

⁹ Cúsī ní rō jíin jniñu váha, te jito uhū rō jniñu néé.

Jeē yúcuan ruhū, Yaā Dios maá ró, ní sáha ri jeē yóhyo ga cúsī ní rō vēsú táca gá jeē iyó andiví.

¹⁰ Te suni cáhán yā:

Maá ró cúu Jitoho, te nde xihna ñuhún ní sáha ró jeē ní jécōo ñayīvi.

Te andiví chí suni jeē ní sáha ró cúu.

¹¹ Te táca un chí naa, te maá ró chí ñf cáni iyó ró.

Te táca un chí cutúhú nájnūhun cutúhú ñn sahna,

¹² te nacaquin jnahnū rō te nasama ró jíināhan.

Te maá ró chí ma sáma cuiti rō, te quiví cótecu rō ma ndhí cuiti.

¹³ Te súcuan ní cahān tucu yá jíin Sēhe ya, te nasūu jíin ndajéhé yā:

Cucōo ró lado váha ri nuū cújēhnu ró,
te na sáha ri jeē quende rō poder táca jeē cájito uhū rohó.

Achí yá.

¹⁴ Te táca ndajéhé yā chí mozo-ni cácuu, te tají yá cuangoo jeē chindéé ñahán ñayuu jeē nihín tahū jeē jnama ya.

Jeē ma cúhuun ní yō jíin jnūhun jnáma ya yohó

2

¹ Núu súcuan te cánuú jeē váha ga chuhun ní yō táca jnūhun ya jeē ní cajini yó, chí núu tuú te sanaa te scuíta yó.

² Chí nde jenahán ní jejniñu ya ndajéhé yā ní cacastūhun jnūhun ya, te ní cajini ñayuu jeē iyó ndáa. Te ñayuu nihni ní jíin ñayuu tu ní cájendetú jnūhun ún, vetū-ni ní canihín i castigo.

³ Te núu súcuan ní cuu, te yóhó, ¿ndese cácu yó núu ma chúhun ní yō jnūhun cánuú gá jeē jnáma ya yohó? Chí xihna gá maá Jitoho yō ní nacani ya jnūhun yáha, te saá te tēe jeē ní cajini nahín ní canacani ndaā tucu maá de nuū yó.

⁴ Te Yaā Dios suni ní chindéé ñahán yá de jeē ní canacani de jnūhun ya. Chí ní sáha ya jíin de jeē ní casáha de sán sán jniñu jéhnu jeē nahán náa ní yō jito yó poder yá. Te suni ní jēhe ya Espiritu Santo yá nuū ñn ñn yó, ndese ní nujnahan ní maá yá sáha yó.

Jeē ní nduu Jesús jnáhan ñayuu

⁵ Te Yaā Dios nasūu núu ndajéhé yā ní jēhe ya jnūhun jeē condiso jniñu siquī ñayīvi jéé quíji, chí sa suhva nuū Sēhe ya Cristo ní jēhe ya. Te siquī ñayīvi un cúu jeē cahán rí yáhá.

⁶ Chí suhva yósó núu tútu jeē ní cahān David jíin yá:

¿Na vé cúu ñayuu jeē ñuhun ní ní i?

Te ndihví ní ní siquī i, te maá ñayuu cúu i.

⁷ Chí jecu-ni tiempo ní sáha ní jeē núu i nuū táca ndajéhé ní.

Yūcuán na te sajéhnu ní i te squéndo yíñuhún ní i,

te caní ní i jeē ndacu i jniñu nuū táca jeé ní sáha ní.

⁸ Te ndihí jeē iyó chí sáha ní jeē cújēhnu i siquī.

Achí tutu. Te jeē ní sáha Yaā Dios jeē cújēhnu i siquī ndihí, núu súcuan te ma quéndo ní ñn jeē ma cújēhnu i siquī. Te vēsú súcuan te vijna te ná tu coto yó jeē cújēhnu i siquī ndihí jeē iyó.

⁹ Te jeē jiní yō vijna cúu Jesús, Yaā jeē ní nduu núu jecu-ni tiempo nuū táca ndajéhé

yā. Chi ni ndoho ya jeē ni jihī yā jehē yō, te jeē yúcuan ní ndujénnu luu tucu ya, te ndihi cáhīyo yífúhún núu yā. Chi jeē vāha ni Yāā Dios jín yó, jeē yúcuan ní jihī Jesús jehē yō.

¹⁰ Te ndihi jeē iyó chi cuenta Yāā Dios cúu, chi máá yá ná sáha. Te suni ndéca ya cuehē ndasí sēhe ya jeē quihín i andiví núu luu kujénnu i jín yá. Te vāha níhín jniñu jeē ni jéhe ya jnūndóho nuū Jesús, chi jeē ní ndoho ya súcuan te cuu condeca vāha ya ñayuu ní jnama ya.

¹¹ Chi Jesús jeē ni sándoo ya i te máá i jeē ní candundoo i, chi ñn-ni Tátá i jín yá. Te jeē yúcuan tu cúcanu Jesús jeē cahán yā hermano yā jín i, vésú ndasí núu i.

¹² Chi yósó núu tútu jeē ni cáhān yā jín Tátá yā:

Cachi na jnūhun ní núu táca hermano na, te mēñū núu cándutútú i cata ná ndese cújénnu ní.

¹³ Te suni cáhān yā nájnnūhun cácahān hermano yā:

Ruhū chi cándíje ri yā.

Te cáhān tucu yā:

Yāha ñe ri jín táca gá sēhe Yāā Dios jeē ni jéhe ya nuū rī.

Achí Jesús.

¹⁴ Te nájnnūhun cácacu ñayuu jeē cúu i yiqui cúñu, suni súcuan ni cacu Jesús, návāha cuu yā jehē yō. Te súcuan ní snāá yā poder jexeén jeē squíví ñayuu nuū cuéchi te jíhī i.

¹⁵ Te ni cacu ya súcuan návāha cuu quenehen ya táca ñayuu chíji jnūhun jeē yuhú i cuu i. Chi ní vida i ndóho i sáha ún.

¹⁶ Te jendaá tu ní quíji ya jeē chindéé ñáhān yā táca ndajéhe yā, chi sa suhva jeē chindéé ñáhān yā ñayuu cácañdije jeē ní nduu yucūn Abraham.

¹⁷ Jeē yúcuan ní jini ñūhún nduu ñnuú yā jín táca hermano yā, návāha cuu ya sutū kujénnu jeē squícu vāha ya táca jniñu jehē i nuū Yāā Dios. Chi ní cundáhú ní yā i, te ni ndahva yā cuéchi i jeē ní sócō yā máá yá jehē i.

¹⁸ Chi suni máá yá ní ndoho ya jeē ní jito ndee jnūndóho ya, te jeē yúcuan cuu chindéé ñáhān yā ñayuu jeē jíto ndee jnūndóho i.

Cújénnu ga Jesús vésú Moisés

3

¹ Hermano, ni cana Yāā Dios rohó, te cácuu ró ñayuu ndoo máá yā. Núu súcuan te na nácani vāha ni ró siquí Cristo Jesús, Yāā cúu apóstol jeē ní tejniñu Yāā Dios, te suni cúu ya sutū kujénnu siquí jnūhun cácañdije yó.

² Chi ní squícu vāha ya nuū Yāā Dios, Yāā ní tee jniñu un siquí yā, nájnnūhun ní squícu vāha Moisés nuū ñayuu jeē ni cáhān Yāā Dios jeē cácuu i ñayuu vehe ya.

³ Chi cújénnu ndasí gá Jesús vésú Moisés, nájnnūhun cújénnu ndasí gá tēe sáha vehe nasūu máá vehe.

⁴ Chi táca vehe iyó tēe ní sáha. Te máá Yāā Dios cúu jeē ní sáha táca jēē iyó.

⁵ Te Moisés ní squícu vāha de jín jniñu jeē ní cuu de mozo ní condito de ñayuu vehe Yāā Dios. Te ni castūhún de siquí táca jnūhun jeē steén yā tiempo quiji.

⁶ Te Cristo chi sa cúu ya maá Séhe jeē ndácu jniñu nuū ñayuu vehe Tátá yā, te vāha squícu ya jeē ní jénnūhun ya nuū i. Te suni máá yó cácuu ñayuu vehe ya, te núu na cuíñi níhin yó jín jnūhun cándije yó ndé quiví sándihí, te núu cúsiñi ní yō jeē ñūhun ní yō táca jēē vāha jeē coo.

Jnūhun jeē ndetātu ñayuu Yāā Dios

⁷ Núu súcuan te na chūhun ní yō jeē cahán Espíritu Santo nuū tútu ñi:

Vijna te núu cuni sóho ró jēē cahán Yāā Dios,

⁸ te ma cúnihni ní ró nájnnūhun ní cacunihni

ní ñayuu jenahán.

Chi tu ní cájendetū i nuū yā ná ní cajica i nuū ñūhun téhé.

⁹ Chi yúcuan ní casáha jíí ró jniñu jeē ní quíñi ní rī, achí yá,

vésú ní cajito i táca jniñu ní sáha ri uñ xico cuiyā.

¹⁰ Jeē yúcuan ní quíñi ní rī jín ñayuu tiempo un.

Te ni cáhān rī jeē máni jeē castóo i ichi ndaā, chi tu cácuni i condiquín i jnūhun ri.

¹¹ Te jeē yúcuan ní quíñi ní rī, te ni cáhān teyí rí

jeē ma quívicoo cuiti i nuū ndetátú i sáha ri. Achí yá.

¹² Núu súcuan hermano, coto má conéé ánuá ní ñn ró jēē cáca yátá ró jeē tuá candíje ró Yāā Dios, Yāā técu.

¹³ Chi sa suhva táca quíví na stíhví jnāhan ní ró, níni gá iyó tiempo, návāha ma cúnihni ní ní ñn ró te stáhú róhó sáha ró cuéchi.

¹⁴ Te núu na cuíñi níhin yó ndé quiví sándihí jín jnūhun jeē ní quejéé yó jín, yúcuan na te cuu yó jnāhan Cristo.

¹⁵ Chi cáhān tutu:

Vijna te núu cuni sóho ró jēē cahán Yāā Dios, te ma cúnihni ní ró nájnnūhun ní cunihni ní ñayuu jenahán.

Achí.

¹⁶ ¿Te ndé-ni cúu ñayuu jeē ní jini jnūhun ya te ni cunihni ní? Suu ndihí ñayuu jeē ní scácu Moisés jeē ní quendacoo Egipto.

¹⁷ ¿Te ndé-ni cúu ñayuu jeē ní quíñi ní yā nuū uñ xico cuiyā? Suu ñayuu jeē ní casáha cuéchi, te ni cajihí i nuū ñūhun téhé.

¹⁸ ¿Te ndé-ni i cúu jeē ní cáhān teyí yá jeē ma quívicoo cuiti i nuū ndetátú i sáha ya? Suu máá ñayuu jeē tu ní cájendetū nuū yā.

¹⁹ Núu súcuan te jíni yō jeē tu ní cúu quívicoo i nuū ndetátú i, siquí jeē tu ní cácañdije i ya.

4

¹ Te níni íyó gá jñuhun jeé ní jéjnñuhun ya jeé quívicoo ñayuu nuñ ndetátú i sáha ya, te na cónso iyo yó jéé ma stívi yó, návaha tú coo jíin sava ró jéé ma nihin rō quívi ró.

² Chi suni máá yó ní cajini sōho yó jñuhun jeé jnāma ya yohó, nájñuhun ñayuu jenahán un. Te nuñ maá i tu ní jéjnñiñu jñuhun ni cajini i ún, siquí jeé tu ní cá candíje i.

³ Te yohó jéé cá candíje, máá yó cúu jeé quívicoo yó nuñ ndetátu yó. Te siquí ñayuu tu cá candíje ni cahán yā suhva:

Jeé yúcuan ní quíti ní ri, te ní cahán teyí rí jeé ma quívicoo cuíti i nuñ ndetátú i sáha ri. Te súcuan ní cahán yā vésú je íyó túhva nuñ ndetátú i nde ná ní jecōo ñayívi.

⁴ Chi súcuan yósó jñuhun nuñ tútu ñi siquí quívi uxá:

Ni sínu Yaa Dios táca jéé ní sáha ya, te ní ndetátu yá quívi uxá.

⁵ Te suni nuñ tútu un yósó tucu:

Ma quívicoo cuíti i nuñ ndetátú i sáha ri. Achí yá.

⁶ Núu súcuan te sava ñayuu chi quívicoo nahín i nuñ ndetátú i. Te ñayuu jenahán jéé ní cajini jñuhun jeé jnāma ya i, tu ní quívicoo i siquí jeé tu ní cájendetú i nuñ yá.

⁷ Jeé yúcuan ní jeni tucu ya inga quívi jeé quívicoo ñayuu, te quívi un cúu vijna. Chi ná ní yāha cuehē tiempo jeé ní cáhán yā jíin ñayuu jenahán, te yósó nuñ tútu jeé ní sáha ya jeé suni ní cahán David suhva:

Vijna te núu cuni sōho ró jéé cahán yā, te ma cúnihni ní rō núu súcuan. Achí tutu.

⁸ Te nde jenahán ní squívi Josué ñayuu Israel un ñuu nuñ ndetátú i. Te tu ní cúu squívi de i nuñ ndetátu ánuá i sáha ya. Chi núu súcuan te ma cahán gā Yaa Dios jíin táca ñayuu jeé vijna cúu quívi jeé quívicoo i nuñ ndetátú i.

⁹ Núu súcuan te íyó túhva nahín ñi nuñ ndetátu ñayuu Yaa Dios, nájñuhun ni ndetátu máá yá.

¹⁰ Chi ñayuu jeé quívicoo nuñ ndetátú i jíin yá, chi ndetátú i jeé ní casájñiñu i, nájñuhun ni ndetátú Yaa Dios nuñ jñiñu ní sáha máá yá.

¹¹ Núu súcuan te na ndúcú ndéyí yó quívi yó nuñ ndetátu yó un, te ma sáha ní ñi yó cuéchi jeé ma cándíje yó, nájñuhun ní casáha i nde saá.

¹² Chi jñuhun Yaa Dios ndíto técu te íyó poder. Chi cúu nájñuhun ñi espada jeé xeén ndíndúú lado, chi nástúu cájí ndese íyó jéé níjnñiñi yó jíin ánuá yó, nájñuhun sáha espada jeé jéhnde te nástúu nuñ ñujñahan yíqui jíin meque. Te jñuhun ya nástúu ndíhi ndese jéni ní yó jíin ndese cúní yó sáha yó.

¹³ Te tu íyó ní ñi jeé yisáhi jeé tu jíni maá Yaa jeé náquihin cuenta, chi ndíhi-ni jíni vāha ya, te ndíhi-ni túu ndíjin nuñ yá.

Jesús cúu sutú cujéhnua ga

¹⁴ Te cánevāha yó ñi sutú cujéhnua ga, te je ní ndaa ya ní ndívi ya nuñ íyó Yaa Dios. Te Jesús Sēhe Yaa Dios cúu ya. Jeé yúcuan na cuíñi nihin yó jíin jñuhun jeé ní candíje yó.

¹⁵ Chi névāha yó ñi sutú cujéhnua jeé jíto ndáhú yohó jeé tu fuerza yó squícu vāha yó. Chi nájñuhun ndóho yó jéé jíto ndee jexeén yohó, suni súcuan ní ndoho ya jeé ní jíto ndee un yá, vésú tú cuíti cuéchi ya.

¹⁶ Núu súcuan te ma yūhu yó, chi na quívi yó yuhu mesa yā, cúu jeé cacān tahú yó. Chi maní yā jíin yó, te cundáhú ní yā yohó, te siquí jeé vāha ní yā te chindéé ñahán ya yohó táca jínu jeé jíni ñúhún yó.

5

¹ Chi táca sūtú jeé ní cujéhnua jenahán, ní nacáji Yaa Dios de mēhñu ñayuu, te ní jeni ya de jeé cuíñi de nuñ yā jehē ñayuu, te socó de ndajñiñu jíin quíti nuñ yā jeé siquí cuéchi i.

² Te cuu cahán víta de jíin ñayuu tu jécūhun ní jíin ñayuu castívi, chí máá de suni tú na fuerza ñi de squícu vāha de.

³ Jeé yúcuan cúu jeé suni cánuú socó de quíti nuñ yā jeé siquí cuéchi máá de, nasúu máá-ni jeé siquí cuéchi ñayuu.

⁴ Te ní ñi tēe tu cúu sájéhnua de máá de jeé cuu de sutú cujéhnua, chí sa máá Yaa Dios cúu jeé nacáji ya de, nájñuhun ní nacáji ya Aarón nde jenahán.

⁵ Te suni súcuan Cristo, tu ní sájéhnua ya maá yā jeé cuu ya sutú cujéhnua, chí sa Yaa Dios ní sáha, chí ní cahán yā jñuhun yāha:

Máá ró cúu Sēhe ri,

te vijna te ní sajéhnua ri rohó jéé cúu ri Tatá ró.

⁶ Te suni cáhán tucu ya nuñ tútu ñi:

Ní cáni cúu ró sūtú,

nájñuhun sutú Melquisedec jenahán.

⁷ Te Cristo, ná ní condee ya ñayívi, te ní jícan tahú yā, te nde ní ndahyū yā te ní ndahyū cohó yá. Te ní cahán ndahú yá jíin Yaa Dios, Yaa jeé cúu jnama ya jeé ma cúu yā nuú. Te siquí jeé yíñúhún ní chíñúhún yá Yaa Dios, te ní chindéé ñájñahan Yaa Dios jíin yá nuñ jñúndóho ún.

⁸ Chi vésú Sēhe Yaa Dios cúu ya, te ní jendetú yā ní ndoho ya ñi ñayívi, te súcuan ní jíni yā ndese cúu jñuhun jéndetú.

⁹ Te ná ní cuu ní squícu ndíhi ya jeé ní jendetú yā, te ní cucutú jñuhun jeé jnāma ya táca ñayuu jéndetú nuñ yā, te cotecu i ní cáni.

¹⁰ Chi ní jeni Yaa Dios yá jeé cúu ya sutú cujéhnua nájñuhun sutú Melquisedec.

Siquí jeé ma cáca yátá i

¹¹ Te íyó cuéhē jñuhun jeé castūhun rí siquí táca jéé yāha. Te yí cúu jeé jécūhun ní ró sáha ri, siquí jeé tu cácuni ró chuhun ní ró.

¹² Te je ní cunahán cá candíje ró, te jíni ñúhún jéé cúu ró téé stéén nuñ. Te tuú chí

sa cájini ñúhún tucu máá ró tēe stéén nuú rō tāca jnúhun Yaā Dios jeé tú yí cuiti. Chi sa ni canduu ró nájñuhun sūchi yíquín jéé jini ñúhún caxin i, chi ná tu ije i caji i jeé ndáva. Súcuan cácuu ró chi ná tu ije ró jíin jnúhun yí gá.

¹³ Chi núu máni máá nájñuhun sūchi yíquín jéxin cácuu ró, núu súcuan te tu cúu jecúhun vāha ni rō jnúhun ndaa.

¹⁴ Te ñayuu jeé jé ni ije, chi cáyeji i jeé ndáva, cúu jeé ní cutúhva vāha i te je cúu nácāji i jeé vāha jíin jéé neé.

6

¹ Núu súcuan te na yáha yó núu tāca jnúhun Cristo jeé tú-ni yí, te na quihín yō nuú jnúhun yí gá, návāha na ije vāha ni yō jíin jnúhun ya. Te ma ndejéé tucu yó jíin jnúhun jeé ni scuáha yó xihna gā, suu jnúhun jeé nácani ni yó stóo yo cuéchi yó jéé cúu yō sáha, jíin jéé candlje yó Yaā Dios,

² jíin síquī jeé jéndute, jíin síquī jeé soó ndaha xiní ñayuu, jíin síquī jeé nátecu ndāyi, jíin síquī jeé jñahnú ndetū ñayuu níí cáni.

³ Núu súcuan te na yáha yó núu tāca jéé yáha te quívi yó núu jnúhun yí gá, te núu cuáha Yaā Dios jnúhun.

⁴ Chi íyo ñayuu jeé jé ni jecúhun ni i, te je ni jini i tāca jéé jéhe Yaā Dios, te je ni quívi i nuú jnúhun stéén Espíritu Santo,

⁵ te suni je ni jini i jnúhun vāha Yaā Dios jíin ndese coo poder yá tiempo quiiji.

⁶ Te ñayuu un núu caca yátá i, te ma cúu ga ndejéé jeé i jeé nácani ni i. Chi jeé cáca yátá i cúu nájñuhun jeé nácani tucu i Sēhe Yaā Dios jicá cruz, te cájēhe i jnúhun canu yá cájito ñayuu.

⁷ Te ñayuu chi cácuu i nájñuhun ñuhun jeé cúun vāha saū nuú te ndóyo vāha. Te núu cánecoo jeé vāha caji tēe cásájniñu, yúcuán na te cúsi ni Yaā Dios jíin.

⁸ Te núu máni íñu yóquin jíin yucū sajnéñu cánecoo nuú, núu súcuan te tu jéjñiñu cuiti, te squéndō ñi yā, te ñi quívi te cayū. Súcuan jñahnú ndetū ñayuu cájica yátá.

Jeé ñúhún ni yō tāca jéé vāha jeé coo

⁹ Te máá ró jíināhan ró hermano, vésú cácahān rī súcuan jíin ró, te cácuáhnū ni rī jeé cácuu ró ñayuu cuiñi ñihin, chi ñayuu ni jnama ya cácuu ró.

¹⁰ Te Yaā ndaa cúu Yaā Dios, te tu náa ni yá jñiñu cásáha ró. Chi síquī jeé cáhiyo maní rō jíin yá te ni cacundáhú ni rō hermano rō cácañje, te ni cachindéé ñáhán ró i, te súcuan cásáha ró ndé vijna.

¹¹ Te cácuni rī jeé níni súcuan sáha ga ná ñi ná ñi ró ndé quívi sándihí, chi jeé sáha ró súcuan te ñihín rō ndihí jeé cáñuhun ni rō.

¹² Te cácuni rī jeé ma cúhuun ni rō, chi sa ndacu ró ñayuu cácañje jeé jíin paciencia

cándetu i, te jeé yúcuán ñihín tahú i tāca jéé ni jéjñuhun ya.

¹³ Chi quívi jeé ni jéjñuhun Yaā Dios nuú Abraham, te ni ndacunehen ya maá yá jeé ni jéjñuhun téyí yá, chi tuá na inga ndacunehen ya jeé cujéñu ga vésú maá yá jeé cuu testigo yá.

¹⁴ Te ni cahān yā: Jendaá ndije jeé vāha ndasí sáha rī jíin ró, te sáha rī jeé nducuehé ndasí yúcuán ró, achí yá jíin Abraham.

¹⁵ Te jíin paciencia ni condetu de, te súcuan te ni ñihín de jeé ní jéjñuhun ya.

¹⁶ Te núu cáhán teyí ñayuu, te ndacunehen i síhvī ñi jeé cujéñu ga vésú maá i. Te núu íyo ñi jnúhun jeé tu cácañje jñáhan, te núu ñi tēe cáhán teyí de jíin síhvī Yaā Dios, yúcuán na te jécuiñi jeé cátejñáhan.

¹⁷ Te suni súcuan Yaā Dios, chi ni jejñuhun téyí yá nuú ñayuu jeé cuáha ya tahú i. Chi ni cuni yá jeé cucáhnū vāha ni i jeé ma nácani yátá ni yá síquī jeé ni jéjñuhun ya nuú i.

¹⁸ Chi ma nácani yátá cuiti ni yá síquī jnúhun jeé ni cáhān yā uú jñu, ñi jeé ni jéjñuhun ya, te inga jeé ni cáhān teyí tucu ya síquī suni jnúhun ún. Chi tu stáhú cuiti yá. Te jeé yúcuán máá yó jeé ní tühva yó yá, chi yóhyo íyo ndeyí ni yó, te cáñuhun teyí ni yó jeé squícu ya jeé ni cáhān yā.

¹⁹ Te síquī jeé súcuan ñúhún ni yó, te suu sáha jeé quéndō ñihin ánuá yō jíin jnúhun ya, te quéndō ndaa ni yó, nájñuhun quéndō ñihin barco jeé jñá gancho yuú. Te sáha jeé cúu quívi yó andiví nuú í gá, nájñuhun cuarto ñi gá jeé ni íyo ichi yátá sahna ni ndita caa ñi vehe ñi jenahán.

²⁰ Te ñi yúcuán chi xihna gā Jesús ni quívi, návāha nune ya ichi quívicoo yó. Te jeé yúcuán níí cáni cúu ya sutū cujéñu nájñuhun sutū Melquisedec.

Jeé cúu Jesús sutū nájñuhun Melquisedec

7

¹ Te máá Melquisedec ni cuu de rey ñuu Salem, te ni cuu de sutū nuú Yaā Dios, Yaā cujéñu téyí. Te ni jejnahan de Abraham ná ni nandicó Abraham jeé ní cundeyí de ni cajeñáhan de jíin táca rey. Te ni jicān tahú de jéhe Abraham.

² Te tāca úxi ndajñiñu jeé ní quende Abraham nuú tāca rey un, ni jéhe de ñi ñi síquī un núu Melquisedec. Te síhvī Melquisedec cuní cahān: rey jeé sáha jñiñu ndaa. Te suni nání de rey Salem, te jnúhun Salem cuní cahān: jeé íyo ndeyí síñ ni. Te jeé yúcuán suni nání de: rey jeé sáha jeé íyo ndeyí síñ ni ñayuu.

³ Te tu cáhān tutu jnúhun tátá de ni náná de ni tāca jíi de. Ni tu cáhān núu ni cacu de, ni núu ni jihí de. Chi cúu de nájñuhun Jesús, Sēhe Yaā Dios, chi níí cáni cúu de sutū.

4 Te condêhe jijnáhan ró náa jéhu ni cuu Melquisedec, chi jí jéhu yó Abraham ni jêhe de ìn ìn siquĩ táca jéê uxí nuũ de siquĩ táca jéê ní quende de nuũ rey un.

5 Te jíni yó jéê táca úxi ndajniũ ni canihĩn ñayuu, ni cajêhe i ìn ìn siquĩ un ní caquihin têe cácuu sutũ yucũn Leví, nájñuhun cáhán ley Moisés. Te ní caquihin de nuũ ñayuu cácuu jnánhan de, chi ìn-ni yucũn Abraham cácuu de jíni i.

6 Te Melquisedec nasũu yucũn Leví cúu de, te vêsú súcuu te ní quihin de ìn ìn siquĩ táca jéê uxí nuũ Abraham. Te suni ní jicán tahú de jehê Abraham, vêsú cúu Abraham têe jéê ní jéñuhun ya nuũ.

7 Te jíni vâha yó jéê tée cújéhu ga cúu jéê jicán tahú jehê têe núu ga.

8 Te ñayĩvi yáha chi táca sutũ cáquihin de ìn ìn siquĩ táca jéê uxí nuũ ñayuu, vêsú cácuu te tée cájihĩ. Te Melquisedec suni ní quihin de, te máa de chi cáhán tutu ìi jéê técu de.

9 Te suni cuu cahãnyo jéê Leví, têe jéê ní quihin ìn ìn siquĩ táca jéê uxí nuũ ñayuu, suni nájñuhun nuũ máa de ní quihin Melquisedec ìn ìn siquĩ táca jéê uxí. Chi jéê ní jêhe Abraham nuũ Melquisedec, suu cúu nájñuhun jéê suni ní jêhe de jéê siquĩ Leví jíni ndihĩ ga yucũn de jéê quíji.

10 Chi yucũn Abraham cúu Leví, te vêsú ná tu cacu de quĩvi jéê ní jéñahan Melquisedec Abraham, te nájñuhun jéê ní jêhe máa de cúu jéê ní jêhe Abraham.

11 Te yucũn Leví ní cane sutũ Aarón jíni táca gá sutũ ní quijicoo. Te ní castéén de ley yá nuũ ñayuu Israel jenahán. Te núu ní cúu sáha de jéê quendõo ndaã ñayuu jíni ley un núu, te tuá cánuu jéê nucuiñĩ inga clase sutũ lugar Aarón jíni yucũn de. Te inga clase sutũ cúu Cristo jéê cúu ya nájñuhun sutũ Melquisedec.

12 Te núu nucuiñĩ inga clase sutũ, te suni cánuu sáma ley siquĩ yucũn de.

13 Núu súcuu te ní sáma ley un, chi cáhán tutu ìi jéê Jítoho yó Jesús cúu inga clase sutũ ún, te ní cacu ya chíji inga yucũn. Te yucũn ní quíji ya ún, tú ní ìn ní cúu sutũ.

14 Chi jíni vâha yó jéê chíji yucũn Judá ní cacu Jítoho yó. Te yucũn ún chi tu ní cáhán cuiĩ Moisés jéê cánecoo sutũ.

15 Te cáji cúu jéê ní nucuiñĩ Cristo jéê cúu ya inga clase sutũ nájñuhun sutũ Melquisedec.

16 Te tu cúu ya sutũ jéê ní cacu chíji yucũn Leví nájñuhun cáhán ley jenahán. Chi cúu ya sutũ siquĩ jéê ndíso ya poder cotecu yá ñĩ cáni te ma cúu cuiĩ ya.

17 Chi súcuu ní cahãnyo Yaã Dios jñuhun ya: Níĩ cáni cúu ró sutũ, nájñuhun sutũ Melquisedec.

18 Núu súcuu te jniũ jéê ní ndacu ley jenahán siquĩ sutũ, chi ní naa vijna, chi tu ní nihĩn jniũ quendõo níĩ cáni.

19 Chi ley Moisés tu ní sáha jéê quendõo ndaã ñayuu. Te ní nihĩn yó ìn jñuhun vâha ga jéê ñuhun ní yó jéê ndáhva Cristo cuêchi yó, te súcuu ní cuyajni yó núu Yaã Dios.

20 Te jíni jéê ní cáhãnyo teyĩ Yaã Dios te cúu Jesús sutũ.

21 Chi táca gá tée ún, nasũu jíni jñuhun jéê ní cáhãnyo teyĩ yá ní cúu de sutũ. Te Jesús chi ní cahãnyo teyĩ Yaã Dios jéê cuu ya sutũ, chi súcuu cáhãnyo tutu:

Ní cahãnyo máa Jítoho yó Yaã Dios, te ma nácani yátá ní yá:

Níĩ cáni cúu ró sutũ,
nájñuhun sutũ Melquisedec.

Achĩ yá.

22 Núu súcuu te jíni Jesús ní cucutú ìn contrato vâha ga vêsú ley jenahán.

23 Te táca gá sutũ ún, chi ní iyo cuêhê de, chi siquĩ jéê cájihĩ de te tu ní cúu cuiĩ de níĩ cáni.

24 Te Jesús chi cúu ya sutũ jéê cuiĩ níĩ cáni, chi técu yá níĩ cáni.

25 Jéê yucuan ndíso jniũnyo ya jnama ya ñayuu quijicoo nuũ Yaã Dios, cotecu i níĩ cáni. Chi níĩ cáni técu yá te cáhãnyo jehê i jíni Yaã Dios.

26 Núu súcuu te vâha ndasĩ sutũ cújéhu cúu Jesús, jéê nájñuhun jíni ñuhún yó. Chi sutũ ìi cúu ya, te tú na cuêchi ya, te iyo ndoo ya, te tu cúu ya jnánhan ñayuu casáha cuêchi, te cújéhu teyĩ yá nde nuũ súcuu gá andiví.

27 Te máa yá tu jíni ñuhún sáha ya nájñuhun ní casáha sutũ cácujuhu jenahán, jéê ndiquivĩ ní casocó de quiti siquĩ cuêchi máa de xihna gá, te sáa te siquĩ cuêchi ñayuu. Chi ìn jinu-ni ní socó yá máa yá jehê yó, te ní cuu-ni.

28 Chi ní jeni ley Moisés táca sutũ cújéhu jéê tú na fuerza squicu vâha. Yucuan na te cuéé gá te ní cahãnyo teyĩ Yaã Dios. Te jíni jéê ní cahãnyo teyĩ yá, te ní jeni ya Sêhe ya jéê cúu ya sutũ cújéhu, te sutũ ndaã sutũ vâha cúu ya níĩ cáni.

Jéê ndíso jniũnyo Cristo siquĩ ìn contrato jéê

8

1 Núu súcuu te jñuhun cánuu gá jéê jé ní cahãnyo rĩ cúu yáhá: Névâha yó ìn sutũ cújéhu nájñuhun ní cahãnyo rĩ, te ndéé yá lado vâha mesa nuũ ndácu jniũnyo máa Yaã cújéhu nde andiví.

2 Te vijna te cúu ya sutũ nde andiví, jéê cúu ndije lugar ìi jéê ní sáha máa Jítoho yó Yaã Dios, nasũu ñayuu. Chi tu cáa nájñuhun vehe ìi jenahán jéê ní casáha ñayuu.

3 Te táca sutũ cújéhu ní jeconaa de jéê socó de ndajniũnyo jíni quiti nuũ Yaã Dios. Núu súcuu te Jesucristo suni ní jini ñuhún jéê socó yá jéê cúu ya sutũ.

4 Te núu ní iyo ga yá ini ñayĩvi, te ní ma quijnáhan jéê cúu ya sutũ jíni táca gá sutũ, chi níni casocó gá de quiti nájñuhun cáhãnyo ley Moisés.

5 Te jniñu cásaha de, tu quíjnahan jíin jée iyó andiví. Chi cúu ñin muestra-ni jeé steén siquí andiví. Te cúu nájñuhun jeé ni cáhān Yaā Dios jíin Moisés quiví ní quejée de sáha de vehe ñi jenahán: Coto vāha ró jée sáha ró táca ndajniñu nájñuhun jito jeé ni stéen rí nuū rō nde xiní yúcu, áchí Yaā Dios jíin de.

6 Te vijna te sáha Cristo jniñu jéhnū ndasí gá vēsú jeé casáha táca sūtū ún, chí ndíso jniñu ya siquí contrato jeé jée yóhyo vāha ga, chí ndíso jñuhun jéhnū ga jeé ní jéjñuhun Yaā Dios.

7 Chi contrato ley xíhna ññuhún, núu jeé ni sáha jeé queé vāha jniñu núú, te tuá cánuú jée cóo contrato uū.

8 Chi ñayuu jenahán un jée tu ní cáquendō ndaā, suhva ni cahān Yaā Dios jíin i, áchí tutu:

Quiji quiví jeé nasáha ri ñin contrato jeé jíin ñayuu Israel jíin ñayuu Judá, áchí Jítoho yō Yaā Dios.

9 Te ma cóo nájñuhun contrato jeé ni sáha ri jíin jíi i jenahán,

quiví jeé ní jñi ri ndaha de jíjnahan de, te ni quenehen ri de ini nación Egipto. Chi tu ní cásquicu vāha de jíin contrato ley rí. Jeé yúcuan tuá ní táññuhún rí de, áchí Yaā Dios.

10 Núu súcuan te suhva coo contrato jeé nasáha ri jíin ñayuu Israel, nde na quíji quiví yúcuan, áchí Jítoho yō Yaā Dios:

Sáha ri jeé jécuhun ley rí nuū jeé níjnūni i, te suni ñi anuá i tee ri jñuhun ley rí.

Te cuu ri Yaā Dios maá i, te maá i tuu ñayuu maá rí.

11 Te tuá jíni ññuhún stéen i nuū jñahan i nuū ññani i,

návāha cuni i ndese Yaā cúu Jítoho i. Chi ndihi i cuni ndese Yaā cúu ri,

nde ñayuu núu ga jíin ndé ñayuu cujéhnū ga.

12 Chi cone cáhnū ni rí nuū i jeé ní casáha i jniñu néé,

te ni ma núcuhun ga ni rí cuéchi ni casáha i. Achí Yaā Dios.

13 Te jeé ni cáhān yā jeé cuáha ya ñin contrato jeé cúu jeé ní cachi yā jeé tuá cuajniñū contrato xíhna ññuhún. Te ñin jeé ní cutúhú jée tuá jejniñū, chí jíni yō jeé je yajni naa.

Vehe ñi ñayivi yáha ní steén ndese cáa andiví

9

1 Te ndaā chi contrato xíhna ññuhún ní ndacu jniñu ndese chíññuhún i ya, jíin ndese coo ñin vehe ñi ñayivi yáha.

2 Te ni cuvāha vehe ñi ún, te ni Iyo uū cuarto. Te cuarto xíhna ññuhún jée naní cuarto ñi, ní ñin candelero oro jíin mesa oro jíin pan ñi.

3 Te ni Iyo sahna jeé ndíta caa jeé ndihyú inga cuarto jeé naní cuarto ñi ndasí gá.

4 Te ini un ní Iyo ñin altar oro nuū cayú sūje cútú, jíin yéjñū jeé ññuhun contrato ley, te máni oro cúu ní siquí yejnú. Te ini yejnú un ñe ñin tñehēn oro jeé ññuhun maná jeé ní cuun andiví. Te suni ñe vara Aarón jeé ní nane numa, jíin tabla yuū jeé yosó jñuhun contrato ley.

5 Te siquí yejnú un ní cahñin ndindúú figura ndajéhé querubín jeé steén jeé ñe Yaā Dios. Te ni sáha cuandahú siquí tapa yejnú nuū ni cóso yuyú níñi jeé ndáhva cuéchi. Te tu núne yó cáhān gā yō siquí táca yúcuan vijna.

6 Te ná ni jínu táca un, te núu-ni núu-ni quívicoo sutū ini cuarto xíhna ññuhún jée casáha de jniñu jeé cúu de sutū.

7 Te ini cuarto uū, chí tu cúu quívicoo na-ni sutū jíin inga ñayuu, chí máññuhún-ni sutū cujéhnū ga cúu jeé quívi, te suni ñin-ni vuelta jeé cuiyá. Te suni ma cúu quívi de núu tú níñi quiti jeé socó de nuū Yaā Dios jeé siquí cuéchi máa de jíin siquí cuéchi ñayuu.

8 Te jíin yúcuan stéen Espíritu Santo nuū yō jeé ná ní Iyo ga cuarto ñi xíhna ññuhún ini ñayivi, te tu ní núne ichi jeé quívi ñayuu ini lugar ñi ndasí jeé cúu andiví.

9 Chi táca yúcuan cúu jeé ní stéen ndese cúu tiempo vijna. Chi jeé ní casocó i ndajniñū jíin quiti nuū Yaā Dios, chí tu ní cúu cuiti sáha jeé quéndō ndoo ánuá ñayuu ní casocó ún.

10 Chi táca un ní steén máni siquí yiquí cúñu yō, ndese caji yō, ndese coho yō, ndese ndundoo yō. Te ni jejniñū máa-ni nde ni quiji Cristo jíin ñin modo vāha ga.

11 Chi vijna jeé ní quiji Cristo, te cúu ya sutū cujéhnū ga jeé ndíso jniñu ya siquí táca jée vāha jeé ní quiji vijna. Te cúu ya sutū ini lugar ñi nde andiví jée cujéhnū ga te vāha ga vēsú cuarto ñi jenahán. Te nasūu jée ní casáha ñayuu cúu, chí nasūu cuenta ñayivi yáha cúu.

12 Te jeé ní quívi ya ini lugar ñi ndasí gá nde andiví, te nasūu jíin níñi ndixúhú ní níñi becerro, chí jíin níñi maá yá ní quívi ya, ní socó yā ñin jínu-ni jeé ní cáni. Te súcuan ní jnama ya yohó jée cótecu yō ní cáni.

13 Chi nde jenahán te níñi stíquí jíin níñi ndixúhú jíin yāa becerro jeé ní cayú nuū altar, ní cacosó yuyú de siquí ñayuu jeé tu íyó ndoo ánuá i, te súcuan ní ndundoo i nuū yā.

14 Te núu ni nihñ jniñu níñi táca quiti ún, te nagā ní cuu níñi maá Cristo. Chi Yaā ndoo cúu ya, te ní socó yā maá yá nuū Yaā Dios, ní sáha Espíritu jeé íyó ní cáni. Te níñi yā nácate ánuá yō nuū jniñu néé jée cúu yō sáha. Te súcuan te cuu cuajniñū yó núu Yaā Dios, Yaā técu.

15 Jeé yúcuan cúu jeé ndíso jniñu ya siquí ñin contrato jeé. Chi ní jíhi yā, te súcuan ní quende yā cuéchi ní casáha ñayuu ná ní Iyo i chíji contrato xíhna ññuhún. Te ñayuu jeé cána

Yaā Dios i quívicoo i ndaha ya, nihīn i tahū i jeē cóo ní cáni, nájñuhun ni jejnūhun ya.

16 Chi cúu nájñuhun núu sáha ñn tee acta jeē cahān siquī tahū, te nde na cúu de te nihín jñiñu.

17 Chi núu técu gā tēe ni sáha, te tu nihín jñiñu. Te nde núu ni jihī de, te sáa te jéjñiñu.

18 Te suni súcuan contrato xihna ñúhún, suni ni jini ñúhún cucutú jín ñiñi quiti ní jihī. Te contrato jeé chi ni cucutú jín ñiñi Cristo jeé ni jihī yā.

19 Chi ná ni cuu ni cachi Moisés taca jñiñu ndácu contrato ley un núu ndivii ñayuu, te ni quihin de ñiñi becerro jín ñiñi ndixúhú jín ndute, te jín ixi cácuéhé jín yúcu hisopo ni cosó yuyú de siquī libro ley jín siquī ndivii ñayuu.

20 Te ni cahān de: Yāha cúu ñiñi jeé cucutú contrato ley jeé ní sáha Yaā Dios jín yó, achí de.

21 Te suni ñiñi un ní cosó yuyú de nde maá vehe ñ jín taca ndajñiñu ni cajejñiñu de jeé cachiñúhún de ya.

22 Te je yajni ndihi ndajñiñu, chi cahān ley un jeé jini ñúhún ndundoo jín ñiñi. Te núu ma cáti ñiñi te ma cóne cáhnu ni yā nuū cuéchi núu.

Jeé ni sócō Cristo maá yá jeé quénde yā cuéchi

23 Núu súcuan te taca ndajñiñu un jeé cácuu muestra taca jeé iyó andiví, ni jini ñúhún ndundoo jín ñiñi quiti. Te taca maá jeé iyó andiví, chi ni jini ñúhún ndundoo jín ñiñi Cristo jeé yóhoyo váha ga.

24 Te Cristo chi tu ní quívi ya ini lugar ñi jeé ní casáha ñayuu, chi ñn muestra-ni ni cuu un jeé steén ndese iyó lugar ñi ndije nde andiví. Chi maá andiví ní quívi ya, te vijna íne ya nuū Yaā Dios jeé cahān yā jehé yó.

25 Te maá sūtū cujéhnu ga quívi de taca cuíyā ini cuarto ñi gā jeé sócō de ñiñi quiti. Te Cristo tu ní sócō yā maá yá cuehē jínu, chi ñn jínu-ni.

26 Chi núu jeé súcuan te cánuú jeé cuehē jínu ndoho ya nde ná ni jecóo ñayiví te nde vijna núu. Te tuú chi sa tiempo cuándihí yáhá ni quenda ndijin yā ñn jínu-ni jeé ní cáni, ni socó yā maá yá jeé ní quende yā cuéchi.

27 Te nájñuhun ni cundaā jeé cúu taca ñayuu ñn jínu-ni, yúcuán na te sándaā Yaā Dios jñiñu i,

28 suni súcuan Cristo ni jihī yā ñn jínu-ni jeé ní sócō yā maá yá jeé ní quende yā cuéchi cuehē ñayuu. Yúcuán na te ndiji ya inga jínu, te nasūu jeé sócō tucu ya maá yá jeé quénde yā cuéchi, chi sa suhva jeé jnáma ya ñayuu jeé cándetu i jeé ndiji ya.

10

1 Chi ley Moisés ni cuu ñn muestra-ni taca jeé váha jeé ní quiñi jín Cristo, ñn jeé steén-ni ndese coo maá jeé váha. Jeé yúcuán tu cúu cuiti sáha ley un jeé quéndōo ndaā ñayuu jeé quijicoo i nuū Yaā Dios jeé cásocō i quiti nuū cuiyá nuū cuiyá.

2 Chi núu ní cúu sáha ley un jeé quéndōo ndaā i, te jecuiñi jeé cásocō i quiti núu. Chi núu ní cúu, te ñn jínu-ni te je ni quendōo ndoo ánuá ñayuu cásocō ún, te ma yūhu gā anuá i jeé ni sáha i cuéchi núu.

3 Te tuú chi jeé cásocō i quiti ún taca cuiyá, sa sáha jeé núcūhun ni i cuéchi i.

4 Chi ñiñi stíquī jín ñiñi ndixúhú, ma cúu cuiti quende cuéchi.

5 Jeé yúcuán ná ni quiñi Cristo ini ñayiví, te ni cahān yā jín Yaā Dios:

Jeé jéhni i quiti jín jeé jéhe i ofrenda nuū ní, chi tu ní núnjahan ni ní.

Te ni sátūhva ní yiqui cúñu maá ná jeé sócō na.

6 Te tu ní cúsñi ni ní jeé jéhmu i quiti te sócō i ti jeé ndúndoo cuéchi i núu.

7 Yúcuán na te ni cahān ná: Yāha véji ná jeé squícu ná jñiñu jeé núnjahan ni ní, Tátā Yaā Dios.

Chi súcuan je yósó jñuhun na núu tútu.

Achí Jesús.

8 Xihna gā ni cahān yā jeé tu ní núnjahan ni Yaā Dios te tu ní cúsñi ni yā jeé jéhni i quiti te jéhe i ofrenda, jín jeé jéhmu i ti te sócō i ti jeé ndúndoo cuéchi i núu, nájñuhun ndácu ley jenahán jñiñu.

9 Te ni cahān gā yā: Yāha véji ná jeé squícu ná jñiñu jeé núnjahan ni ní, Tátā Yaā Dios. Te jeé ni cahān yā súcuan, te ni sáha ya jeé jécuiñi jeé cásocō i quiti, chi ni socó yā maá yá.

10 Te ni sáha Yaā Dios jeé iyó ndoo iyó íi yó nuū yā siquī jeé ni sáha Jesucristo jeé núnjahan ni Yaā Dios, suu jeé ní sócō yā yiqui cúñu yā ñn jínu-ni jeé ní cáni.

11 Te taca sūtū ún ndiquiví ni cahān de ni cajejñiñu de nuū yā, te cuehē jínu cájehni de suu quiti jeé sócō sócō de. Te taca un chi ma cúu cuiti quende cuéchi.

12 Te Cristo chi ñn jínu-ni jeé ní cáni ni socó yā maá yá jeé siquī cuéchi yó. Te sáa te ni cucóo ya lado váha Yaā Dios nuū cujéhnu ya.

13 Te yúcuán ndétu ya vijna nde quiñi quívi jeé quénde yā poder taca jeé jito uhū nuū yā.

14 Chi jeé ní sócō yā maá yá ñn jínu-ni, te ni sáha ya jeé ní cáni quendōo ndaā ñayuu ni sáando ya.

15 Te maá Espiritu Santo suni cáji cahān yā siquī jñuhun yāha, chi xihna gā cahān yā:

16 Suhva coo contrato jeé nasáha ri jñiñi, nde na quíji quívi yúcuán, achí Jítoho yó Yaā Dios:

Sáha ri jeé jécūhun ley rī ini anuá i, te suni nuū jeé núnjñi i tee ri jñuhun ley rī.

17 Yúcuán na te cahān gā yā:

Ma núcūhun cuiṭi gā ni rī tāca cuéchi jíin jniñu néé ní casáha i.

Achí ya.

¹⁸ Núu súcuan te núu je ni ine cáhnu ni yā nuū cuéchi yó, te tuá cánuú jéé socó gā yō jeé siquī cuéchi yó.

Jeé ní nune ichi quívi yó núu Yaā Dios

¹⁹ Jeé yúcuan hermano, ma ñin jeé cáni ni yō, chí cuu quívi yó lugar ñi ndasí ndé nuū iyó Yaā Dios, siquī jeé ní jeti niñi Jesucristo.

²⁰ Chí ni nune ya ñin ichi jéé jéé cótecu yō ní cáni sáha ya. Chí ná ni jíhi yā te ni tahndé sahna ndíta caa jeé ndihyú lugar ñi ndasí gā ini vehe ñi. Te súcuan ni steén Yaā Dios jeé nune quívi yó lugar ñi ndasí gā nuū iyó yā.

²¹ Te Jesús cúu sutú cujéhu ndasí jeé ndító yóhó ñayuu cácuu séhe Yaā Dios.

²² Núu súcuan te na quívicoo yó núu Yaā Dios, te na cóo ndije ndaā anuá yō, te na cándije niñin yó jéé iyó ndáa ndihi jñūhun ya. Chí jíin niñi Cristo ni ndundoó anuá yō nuū tāca cuéchi ni casáha yó, nájnūhun ni ndundoó yó núu yā jeé ní jendute yó jíin ndute.

²³ Te na cuiñi niñin yó jíin jñūhun jeé cacahān yō jeé ñūhun ni yō jeé sáha ya jeé váha jíin yó. Te ma cáca yátá yó, chí váha squícu máa Yaā Dios jeé ní jéjnūhun ya nuū yó.

²⁴ Te na nácani ni yō ndese stíhvj náhan ni yō jeé cundáhú gā ni yó jñáhan yó, jíin jéé sáha yó jniñu váha.

²⁵ Te níni na ndútútú yó chíñúhún yó yā, te ma cúhuun ni yó nájnūhun casáha sava i, chí sa víhyá gā na stíhvj náhan ni yó, chí je cájini yó jeé cuácuyajni quívi ndíji ya.

²⁶ Te núu je ni jecūhun ni yó te ni jetáhú yó jñūhun ndaā, te núu máni sáha sáha-ni yó cuéchi, núu súcuan te tuá na inga iyó jéé cúu siquī cuéchi yó.

²⁷ Chí sa quéndoo máni ga jñūhun xeén siquī yō jeé quíji quívi juicio te quíji yáñuhūn xeén jeé cayū ñayuu jeé cájito uhú i ya.

²⁸ Ñayuu squéhichí ley Moisés, te núu uñ chí úní ñayuu cahān cuéchi siquī i, te cuu nahín i, te tuá na jñūhun cundáhú ní iyó.

²⁹ Te nagā ni cuu jeé ma ndóho xeén gā ñayuu jeé squéhichí i máa Séhe Yaā Dios, chí nájnūhun jeé jeñú niñnu i siquī yā. Te sáha i jeé tu ndé jéjñiñu niñi yā jeé ní jeti siquī contrato jeé ndúndoo i nuū yā nuú. Te súcuan sáha ndeváha i nuū máa Espíritu Yaā Dios jeé sáha jeé váha yóhó.

³⁰ Chí je jíni yō jeé ní cahān máa yá: Máa rí sáha jeé ndutahú i siquī cuéchi i, máa rí cuáha castigo i, áchí Jítoho yō. Te suni cáhán: Máa Jítoho yō sándaā yā siquī cuéchi ñayuu yā.

³¹ Núu súcuan te xeén ndasí cúu jeé quívi ñayuu ini ndaha Yaā Dios, Yaā técu, jeé ndútahú i siquī cuéchi i.

³² Te na núcūhun ni rō ndese ni cuu ichi yátá, nde náa sá ní quejéé ró caca ró jíin luz yā, te ni cajendeyí ni rō ni candoho ró tíjni jñūndóho xeén.

³³ Chí sava ró ní cacahān neé i nuū rō te ni castóho i róhó ní cajito ñayuu. Te sava ga rō ni cajéhe ró jñūhun cuiñi ró jíin ñayuu ni candoho súcuan.

³⁴ Chí ni cacundáhú ni rō ñayuu ní cahīin vecāa jeé siquī yā, te ni cacusiñi ní rō vésú ni caquende ñayuu ndajniñu ró. Chí ni casáha ró cuenta jeé ndé andiví cánevāha ró ñin tahū jeé váha ndasí gā jeé coo ní cáni.

³⁵ Núu súcuan te ma siaā ró jñūhun jeé ní cándije ndije ró jéé váha ni yā, chí cuehē ndasí táhū niñin rō siquī ún.

³⁶ Chí cánuú jéé cuándeyí ni rō návāha sáha ró jéé núnahan ni Yaā Dios, te niñin rō jeé ní jéjnūhun ya.

³⁷ Chí cáhán tutu ñi:

ñin núnú-ni te ndee Yaā ndíji, te ma cucueé yá.

³⁸ Te ñayuu jeé ní ndahva rí cuéchi i, cotecu i jeé cándije i jeé sáha ri jehē i.

Te núu na cáca yátá i, te ma cusí ni rí jíin i.

Achí Yaā Dios.

³⁹ Te yóhó tu cácuu yó jñáhan ñayuu cájica yátá jeé jñahnú ndetu i. Chí sa cácandije yó jéé niñin tahū yó cotecu anuá yó.

Siquí jñūhun cándije

11

¹ Te jeé cándije yó, suu cúu jeé cúndaā ndije ni yō jeé niñin yō tāca jéé ñūhun ni yō, jíin jéé jíni váha yó jéé iyó ndije táca jéé tu cájito yó núu víjna.

² Te ñayuu jenahán chí ni jéjnūhún yá i siquī jeé súcuan ní cacandije niñin i.

³ Siquí jeé cándije yó cúu jeé jécūhun ni yō jeé ní sáha Yaā Dios ñayiví jíin jñūhun ni cahān-ni ya. Te jíin poder Yaā Dios jeé tú jíto yó núu, ní jecōo táca jéé jíto yó núu.

⁴ Ni cándije Abel jeé sáha ya jehē de, te jeé yúcuan ní socó de jeé váha ga nuū Yaā Dios vésú Caín. Te jeé yúcuan ní jéjnūhún yá jeé iyó ndáa de, chí ni jetáhú yá jeé ní socó de quíto nuū yā. Te vésú ni jíhi de, te cáhán gā ejemplo de jíin yó nde víjna, chí ni cándije ndaā de.

⁵ Ni cándije Enoc jeé sáha ya jehē de, te jeé yúcuan ní naquihín ya de cuahān de andiví, te tu ní jíhi de. Te tu ní cánanihín ñayuu de, chí ni ndoñúhún-ni de ní sáha ya. Te áchí tutu jeé nde ná tu naquihín ya de te ni cusí ni yā jíin táca jéé ní sáha de.

⁶ Te núu tu cándije yó jéé sáha ya jehē yó, te tú na modo cusí ni Yaā Dios jíin yó. Chí ñayuu jeé cuní quívicoo ndaha ya, cánuú jéé cándije ndaā i jeé iyó yá jíin jéé cuáha ya tahú nuū ñayuu jeé nducú i cándije i ya.

⁷ Te Noé ni candíje de jeé sáha Yaá Dios jehê de, ná ni castúhun yá nuú de jeé coo jnündóho jeé ná tu coto de jeé coo. Te jeé yúcuán ní jendetú de ní sáha de barco cáhnu jeé naní arca, náváha cácu de jíin ní vehe de. Te jeé súcuán ní candíje de, te ní cane cuéchi siquí ñayuu jeé tu ní cándíje i ya. Te ní ndahva yá cuéchi de siquí jeé ní candíje de jeé sáha ya jehê de.

⁸ Te Abraham ní candíje de jeé sáha ya jehê de, te jeé yúcuán ní jetáhú de ná ní cahán yá jíin de jeé quihín de in lugar nuú cuáha ya cuo tahú de. Te ní quenda de cuahán de, vésú tu jíni de ndé nuú quihín de.

⁹ Ní candíje de jeé sáha ya jehê de, te jeé yúcuán ní condee tatú de nuú ñuhun jeé ní jéjnúhun ya jeé cuáha ya nuú de. Te ní condee de vehe ñii, te suni súcuán Isaac jíin Jacob, chí sêhe de ún suni inuú ñihín tahú i jíin de jeé ní jéjnúhun ya.

¹⁰ Chí ní ñuhun ní de condee de máá ñuu andiví jéé iyó cutú cimientó, te máá Yaá Dios ní jequín yá ní sama ya ñuu ún.

¹¹ Te suni ní candíje máá Sara jeé sáha ya jehê ña, te jeé yúcuán ní ñihín ña fuerza jeé ní jecúhun sêhe ña. Chí nde ná ní yáha ndasí cuíyá ña, te ní cacu in sêhe yí ña, chí ní candíje ña jeé squícu Yaá Dios jeé ní jéjnúhun ya.

¹² Te súcuán ní cuu jeé ní táhú cuehê ñayuu ní sáha in-ni Abraham, vésú je jéhnu ndasí de. Te yucún de ní nducuehê ndasí, nájnúhun quími andiví, jíin ñiti yumar, jeé ma cúu cuíti cahu yó.

¹³ Te táca téé cándíje un, ní cajihí de. Te vésú tu ní cájito de jeé ní jéjnúhun ya, te ní cajini váha de jeé cóo, te ní cacusi ní de jeé cóto de inga tiempo. Te súcuán ní cacahán de jeé ñayuu ñuu jíicá ñayuu tatú cácuu de iní ñayiví yáha.

¹⁴ Te táca téé jeé cahán súcuán, chí stéén cají de jeé nducú de in ñuu jeé cúu andiví núu cúu ñuu maá de.

¹⁵ Chí núu jeé cánacani ní de siquí ñúú nuú ní quendacoo de, te iyó modo jeé nándicó cóo de te núu jeé cácu ni de núu.

¹⁶ Te tuú chí ní cacuu ndasí ní de coyúcú de inga ñuu váha ga jeé cúu ñuu andiví. Jeé yúcuán tu cácu Yaá Dios jeé naní yá Yaá Dios de jíinán de, chí je ní sátúhva ya in ñuu nuú cóyucú de.

¹⁷ Ní candíje Abraham jeé sáha ya jehê de, te jeé yúcuán ní jehên de jíin Isaac jeé socó de i, ná ní jito ndee ya de. Te ní Iyo túhva de jeé socó de sêhe de un jéé mañúhún ní i nuú de, vésú ní ñihín de jnúhun jeé ní jéjnúhun ya suhva siquí i:

¹⁸ Isaac cúu téé jeé squeejéé rí yucún ró quihín, achí jnúhun ní jéjnúhun ya.

¹⁹ Te ní sáha de cuenta jeé cúu nastécu Yaá Dios i. Te nájnúhun súcuán ní cuu, chí cuu

cahán yó jeé nájnúhun ní jíni i te ní natecu i nuú de, chí ní jesi-ni ya jeé ma cáhni de i.

²⁰ Ní candíje Isaac jeé sáha ya jehê de, te jeé yúcuán ní cahán de jeé váha tahú ñihín sêhe de Jacob jíin Esaú tiempo quíi.

²¹ Te suni súcuán ní candíje Jacob, te jeé yúcuán, ná je yajni cuu de te ní cahán de jeé váha tahú ñihín ndindúú sêhe yí José. Te yítuu de vara de, ní chíñúhún de Yaá Dios.

²² Te suni súcuán ní candíje José, te jeé yúcuán, ná cuacuyajni cuu de, te ní cahán de jeé táca yucún Israel, in quiví quendacoo i nación Egipto. Te ní ndacu de jniñu jeé chíndúji i yiqui de ñuu nuú quívicoo i.

²³ Te ná ní cacu Moisés, te tátá i náná i ní cacandíje de jeé sáha ya jehê de, te jeé yúcuán ní cacondito sáhi de i uní yoó. Chí ní cajito de jeé lúu cáa i, te tu ní cáyúhú de siquí acta jeé ní sáha rey jeé na cúu táca súchi yí.

²⁴ Te suni súcuán ní candíje Moisés, te jeé yúcuán ná ní jehnu de te tuá ní jêhe de jnúhun cuu de sêhe ñahan cúu sêhe síhí rey Egipto.

²⁵ Chí sa ní cuu ní de ndoho de jíin táca jnánhan de ñayuu Yaá Dios, nasúu jéé cusí ní de jecu-ni tiempo jíin cuéchi.

²⁶ Chí ní sáha de cuenta jeé núu cahán neé ñayuu siquí de jeé siquí Cristo, te yúcuán sáha jeé cucá ndasí gá de ndihi jeé ndiso jnúhun Yaá Dios, vésú jeé ñihín de ndihi ndajniñu cucá iyó nación Egipto. Chí ní ñuhun ní de jeé cuáha ya tahú de.

²⁷ Te jeé súcuán ní candíje de, jeé yúcuán ní quenda de nación Egipto cuahán de. Te tu ní yúhú de jeé quití ní rey nuú de. Chí ní in ñihín de siquí jniñu sáha de, chí ní sáha de cuenta jeé je jíto de nuú Yaá jeé tu cúu coto yó núu vijna.

²⁸ Te jeé súcuán ní candíje de, te jeé yúcuán ní cahán de jeé na cáhni ñayuu londe pascua. Te ní ndacu de jniñu jeé na cóso yuyú i ñihí tí yehiyí i, náváha núu na quíji ndajehé jeé cáhni yá táca sêhe nuú ñayuu Egipto, te ma cáhni yá sêhe nuú ñayuu Israel.

²⁹ Te siquí jeé ní cacandíje ñayuu Israel jeé sáha ya jehê i, te ní cayáha-ni i mehñu Mar Rojo, chí ní nune ya te ní natúu-ni ñuhun íchi. Te suni súcuán ní cacuni téé Egipto yáha de núu, te ní nandihyú-ni ndute siquí de ní cajihí de.

³⁰ Ní cacandíje soldado jeé sáha ya jehê de, te jeé yúcuán ní cotúú jeé ní condúú ndihyú ñuu Jericó, ná ní cajicó ndúú de uxá quiví.

³¹ Te Rahab, vésú ñahan tíjni ní ní cuu ña, te ní candíje ña jeé sáha ya jehê ña. Te ní chindéé ñahán ña téé Israel jeé ní quíjicoo ní condéhé yuhu ndese iyó ñuu ña. Te jeé yúcuán tu ní jíni ña jíin ñayuu ñihni ní ñuu ña ún.

³² ¿Te ndé jnúhun ga cahán rí núu súcuán? Chí tuá na tiempo jeé nácani ga rí jnúhun Gedeón jíin Barac jíin Sansón jíin Jefeé jíin

David jíin Samuel jíin táca tée ni canacani jñuhun ya nde jenahán.

³³ Ni cacandíje de jeē sáha ya jehē de jíinánhan de, te jeē yúcuan ní cacundeyí de ni canajni de táca ñuu náhnu, te váha ni candacu de jniñu nuū, te ni chindéé ñáhán yá de nájnūhun ni jejnūhun ya. Te nuū sava de ni jesí Yaā Dios yuhu ndícaha jeē tu ní cáyeji tí de.

³⁴ Te sava de tu ní cáyu de sáha ñuhūn jeē cayú xeēn. Te sava de ni cācu de jeē tu ní jíihí de jíin espada. Te sava de ni nanihūn ni de náa tuá fuerza de núu, te ndacuí teyí ní iyo de nuū guerra, te ni cacundeyí de síquí soldado táca ñuu jíca jéé jíto uhū ún de.

³⁵ Te sava ñahan ni natecu séhe ña jeē ni jíihí i.

Te sava ga ñayuu chí sa suhva ni candoho xeēn i nde ni cajihí i. Te tu ní cájehe i jñuhun jeē siaá i jñuhun ya te cācu i, chí ni catee ni i jeē natecu i coyūcu váha ga i andiví.

³⁶ Te sava ga i ni casácatā ñayuu nuū i, te ni cacani ñayuu i, te nde ni caconuhni cadena i ni cahíin i vecāa.

³⁷ Te ni cajéhe yuū xiní i, te ni cajehnde i jíin sierra, te ni cajito ndee i jíin jñúndóho, te ni cajehni i jíin espada. Ni cajica cuu i cháha chūcuan, te máá ñi lánchi máá ñi ndíxuhú ní cañuhun i. Ni candoho ndáhú i, ni cajito i jñúndóho, ni castóho ñayuu i.

³⁸ Váha ndasí ñáyuu ni cacuu i jeē tú cuiti ñayuu ñayiví sūcuan, te vēsú sūcuan te ni casáha ñayuu jeē ní cajica cuu i nuū ñúhūn téhé jíin chíji yucu, ni cahíin i yaū cava jíin yaū ñuhun.

³⁹ Te táca ñáyuu yáha, vēsú ni jejnūhún yá i jeē ní cacandíje níhin i jeē sáha ya jehē i, te tu ní cájito i nuū jeē ní jejnūhūn ya.

⁴⁰ Chí ni sátuhva Yaā Dios ñin jniñu váha ga, te suu cúu jeē sáha Cristo jíin yó, náváha ñin cáhnu-ni níhin yó tahū yó jíin i, te jeē yúcuan cúu jeē ná tu níhin i ndíhi tahū i.

Jeē na cócunuū yō nuū maá ñin-ni Jesús

12

¹ Te íyó cuéhē ndasí ñáyuu un jéē ní candíje níhin i jeē sáha ya jehē i, te nájnūhun ni jíicó ndúu i yóho, cástéén gā i nuū yó nde vijna jeē suní sūcuan na cándíje yó. Núu sūcuan te suní máá yó, na téjiyo yó táca jéé sajnéñu jíin cuéchi jeē ní cáan yó jíin. Te na cuándeyi ní yó cunu yó jíin carrera jeē ní jéhe ya jeē cunu yó.

² Te na cócunuū váha yó Jesús, Yaā jeē ní scándíje yóho te sáha ya jeē íje váha yó jíin jñuhun ya nde jínu íje yó. Chí máá yá ní jendeyí ní yá ní ndoho ya jíca cruz. Te vēsú jñuhun canu cúu jeē sūcuan cuu yá, te tu ní sáha ya cuenta. Chí ni ñuhun ni yá jeē sa cusí ndasí ní yá ná ní cuu ní ndoho ya. Yúcuán na

te ni cucōo ya lado váha mesa nuū ndácu Yaā Dios jniñu.

³ Te na nácani ní rō ndese ní jendeyí ní yá ní ndoho ya jeē ní sáha ndeváha ñayuu íyó cuéchi jíin yá. Te sūcuan te ma cuita ró ní ma ndínuu ní rō jíin jñúndóho.

⁴ Chí ní ná tu ndoho ró jéé ndé cuu ró jeē cánducú ndeyí ró snáá ró cuéchi.

⁵ Te sanaa te je ní canaa ní rō jñuhun cáhán tutu íi, jeē stihví ní Yaā Dios rohó jéé cácuu ró séhe ya:

Séhē, ma quití ní rō jeē snahnú Jitoho yō rohó,

te ní ma ndínuu ní rō núu cáhán yá nuū rō.

⁶ Chí Jitoho yō snahnú yá ñayuu jeē maní yá jíin,

te jéhe ya castigo táca jéé náquihin ya cuu séhe ya.

Achí tutu.

⁷ Núu sūcuan te na cuándeyí ní rō jeē snahnú Yaā Dios rohó, chí sáha ya jíin ró nájnūhun sáha tátá jíin séhe. Chí tú na séhe íyó jéé tu snahnú tátá i.

⁸ Te núu ma snahnú yá rohó, nájnūhun ndóho táca séhe, núu sūcuan te nájnūhun séhe ndáhú cácuu ró, nasūu séhe ndíje ya.

⁹ Te tátá yō ñayiví yáha, suni ní snahnú de yóho, te ní Iyo yíñuhún yó jíin de. Te nagá ní cuu jeē ma cuándetú yó nuū maá Tátá yó andiví jeē snahnú yá yohó, te cotecu yó níí cáni.

¹⁰ Te ndaa chí máá de ni casnahnú de yóho jecu-ni quiví, ndese ní cuu ní maá de. Te máá yá chí snahnú yá yohó ñin modo jeē quéndoo váha ga yó, náváha coo ndoo yó nájnūhun íyó ndoo máá yá.

¹¹ Te ndaa chí tu cácusí ní yó maá hora jeē ndóho yó castigo, chí sa cúcuíhyá ní yó. Te cúcuéé gá te cuni yó jeē ní quéndoo ndaa yó te coo ndeyí sñ ní yó jeē ní snahnú yá yohó.

Siquí ñayuu jeē casquéhichí i jñuhun cáhán Yaā Dios

¹² Núu sūcuan te ma cóo ró nájnūhun tée ní cuita íi ndaha te quísi i xiní yití, chí sa ndacuí na sáha ró máá ró nuū jñúndóho.

¹³ Te sáha ró ichi ndóo caca ndaa ró, náváha nduváha rohó jéé tu fuerza ini, jeē cácuu ró nájnūhun téhe chácua jeē tu cúu cava váha.

¹⁴ Te na cóndihví ní rō jeē condee maní ró jíin táca ñáyuu, jíin jéé cóo ndoo coo íi ró nuū yá. Chí ma cúu coto ní ñin ñayuu nuū maá Jitoho yó te núu tu íyó ndoo i.

¹⁵ Te coto má cáca yátá ní ñin ró te scuíta ró jñuhun jeē sáha Yaā Dios jeē váha rohó, náváha tú cuu ró nájnūhun ñin yucú uvuá jeē stíví te sáha daño jíin cuéhē ñayuu.

¹⁶ Te ní ñin ró ma cáca jnéni. Te ní ma cóo jéé ní rō nuū Yaā Dios, nájnūhun ní Iyo Esaú. Chí máá ñin cohō ndeyu ní jícan de nuū ñáni

de, ni sama de jín derecho de jeē cúu de sūchi núu, te sūcuan ni xícó de derecho de.

¹⁷ Te cájini rō jeē cucuéé gá te ni cuni de jeē na cáhán tatá de jeē váha tahū nihín de, te tu ní cúu, chí tuá ní táñúhún Yaā Dios de. Chí tu ní nihín jnínú jeē ní nacani ni de, vesú ni nducú ndeyí de te nde ndahyú de.

¹⁸ Te róhó jijnáhan rō tu ní quíjicoo rō núu íyo cúu, nájñuhun íyo ni cuu máa yucu nuú ni jehe ya ley yā nuú ñayuu Israel. Chí ni cane yañuhún yucu Sinai, te nee lúchi jnúú jito, te queé tachí xeén.

¹⁹ Te ni jecu trompeta, te ni cahān Yaā Dios. Te ñayuu jeē ní cajini sōho jeē cahān yā, ni cacahān ndahú i jeē ma cahān gā yā jín i.

²⁰ Chí tu ní cūndeyí i jín jnúhun jeē ní ndacu ya jniñu nuú i, chí ni cahān yā: Vesú ñn quiti-ní nuú quívi ti yucu yáha, jini ñuhún cuu t̄ jín yúu chí jín lanza, achí yá.

²¹ Te síquī jeē íyo ndasí cúu jeē cájito i ún, te ni cahān Moisés: Quísi i ruhú jeē yuhú rí, achí de.

²² Te vijna róhó jeē cávandje, tu ní quíjicoo rō núu yúcu yúcu. Chí sa suhva nuú máa yucu Sion jín núu máa ñuu Yaā Dios, Yaā técu, ni quívicoo rō. Te ñuu un cúu Jerusalén jeē íyo andívi, nuú cáhíyo tútu cuéhé ndasí mil ndajéhé cáchiñúhún Yaā Dios.

²³ Te ni quívicoo rō núu cáyūcu tútu ñayuu cávandje jeē cácuu sēhe Yaā Dios, jeē íyo lista i andívi. Te ni quívicoo rō núu Yaā Dios, Yaā sándaā jniñu ndihi ñayuu, jín núu cáhíyo ánuá ñayuu váha jeē jé ni squéndōo ndaā yā i.

²⁴ Te suni nuú máa Jesús. Yaā ndiso jniñu síquī contrato jeē ní quívicoo rō. Te yahu ndasí gá jniñu sáha níñi yā jeē ní jéti jeē ndáhva cuéchi yó, nasūu níñi Abel jeē ní jícān cuéchi.

²⁵ Núu sūcuan te coto má squéhichí rō jnúhun jeē cahān yā jín rō jijnáhan rō. Chí ñayuu jeē tu ní cájetáhú ná ni cahān yā jín i ñayívi yáha, tu ní cácau i. Te xeén gā ndoho yóhó te núu ma cuatáhú yó nuú yā jeē cahān yā nde ichi andívi núu sūcuan.

²⁶ Te nde saá ní quisí i ñayívi jéé ni cáhān yā. Te vijna chí cáhān yā: ñn na jínu quisí rí ñayívi, te nasūu máá-ní ñayívi, chí suni táca jéé ñn andívi, achí yá.

²⁷ Te jnúhun yáha jéé cahān, ñn na jínu, chí cúní cahān jeē téjio ya táca jéé tu íyo cutú, suu jeē ní cuvāha, návāha na quéndōo jeē cóo cutú ní cáni.

²⁸ Núu sūcuan te cuāha Yaā Dios ñn ñuu nuú yó jeé cóo cutú ní cáni. Te jeé yúcu, na nácuatáhú yó nuú yā, te na chíñúhún yó yā, te na cóo yíñúhún yó, návāha cusí ni yā jín yó.

²⁹ Chí Yaā Dios máa yó cúu nájñuhun ñn ñuhún jeē snáa ndihi jeé neé.

Ndese sáha yó te cusí ni Yaā Dios

13

¹ Ma jécuiñi rō jijnáhan rō jéé cundáhú ni rō hermano rō cávandje.

² Conahán rō jeē cánuú cuáha núu ró vehe nuú ñayuu cájica. Chí íyo jínu jeé sūcuan ni cajéhe núu ñayuu vehe, te tu ní cájini i jeé nuú máa ndajéhé andívi ní cajéhe núu i vehe.

³ Te conahán rō chindéé ñáhan rō ñayuu cáhīn vecā, chí sáha ró cuenta jeé nájñuhun cáhīn cáhnu ró jín i vecā. Te suni nacani ni rō jehé jnáhan rō jéé cándoho i sáha ñayuu, chí núu sūcuan coo jín máa ró te suni ndoho rō.

⁴ Coo yíñúhún rō síquī jnúhun quíjínáhan ñayuu, te ma cósiquí ndéé jnáhan rō. Chí máa Yaā Dios sándaā yā cuéchi ñayuu tijni ni jín ñayuu casíquí ndéé jnáhan.

⁵ Te ma ndíyo ni rō xúhún, chí na cóo sí ni rō jín jéé cánevāha rō. Chí máa yā ni cahān: Ma siaá cuiti rí rohó, ni ma stóo cuiti rí rohó, achí yá.

⁶ Núu sūcuan te ma ñn jeé cáni ni yó, chí cuu cahān yó:

Máa Jítho rí chindéé ñáhan yá ruhú,
te ma yúhu rí núu na vé cuni ñayuu sáha i jín rí.

Achí yó.

⁷ Te na núcūhun ni rō táca pastor rō, jeé ní castéén de jnúhun Yaā Dios nuú rō. Te sáha váha ro cuenta ndese ni nihín jniñu jeé ní casáha de, te na ndacu ró de jeé ní cacandje de jeé sáha ya jehé de.

⁸ Te Jesucristo chí ñn-ni cáa ya ichi yátá jín vijna jín ní cáni.

⁹ Núu sūcuan te ma cuáha ró jnúhun candje ró táca jnúhun jeé sín cáhán jeé tu quíjínáhan jín jnúhun máa yá. Chí íyo váha jeé na íje ánuá yó sáha jnúhun jeé váha ni yā jín yó. Te tu jini ñuhún yó jnúhun jeé tajnúni síquī jeé yéji yó, chí tu nihín jniñu cuiti jín ñayuu cáhīn jín.

¹⁰ Te máa yó chí cánevāha yó ñn jeé ní sócó máa jéhé yó, cúu Cristo. Te táca sūtū jeé cócócó gá de modo jeé cahān ley jenahán, tú na vé nihín de nuú yā jeé ní sócó yā máa yá.

¹¹ Te sutú cujéhu ga, ná ni sócó de níñi táca quiti iní cuarto ñ gá jeé síquī cuéchi, te yiquí cúñu t̄ ni cajehmu de ichi yátá ñuu.

¹² Te suni sūcuan ni ndoho máa Jesús ichi yátá ñuu, návāha jín níñi máa yá te sándoo ya ñayuu.

¹³ Núu sūcuan te ma cóo inuu gá ni yó jín ñayuu tu cávandje, chí nájñuhun quíñ yó jín yá ichi yátá ñuu, te na ndóho yó jín yá jeé sácatá i.

¹⁴ Chí ñayívi yáha tu íyo ñuu nuú coo yó ní cáni, chí sa cánducú yó máa ñuu nuú cóyūcu yó quívi quíji.

¹⁵ Núu sūcuan te jeé jín Jesucristo te níni na cáhán yó jeé yóhio cújéhu Yaā Dios, chí suu cúu nájñuhun ñn jeé sócó yó nuú yā, suu jeé nácuatáhú yó nuú yá.

¹⁶ Te ma náā ni rō sáha vāha ró núū jnánhan ró, te cuāha ró jeē cúmanī nuū i. Chi nájñuhun ìn jeē cásocō rō nuū Yaā Dios cúu tāca jeē yáha, te cúsiī ni yā jíin.

¹⁷ Te cuandije ró núū tēe cácuu pastor rō, te cuandetū rō nuū de. Chi cándito de rōhó jeē quéndōo vāha ánuá rō, chi cájini de jeē cánuú nacuāha de cuenta nuū yā. Te condihvī ni rō sáha vāha ró, návāha cusī ni de siquī rō te ma cucuíhyá ni de siquī rō. Chi núu tu súcuan te ma cóo jeē vāha jíin ró.

¹⁸ Te cacán tahū rō jehē rī jijnánhan rī. Chi vāha íyó ni anuá rī jeē tú na cuēchi rī. Chi cácuni rī caca yíñúhún rī jíin táca jniñu.

¹⁹ Te suni cáhán ndahú rī jíin ró jeē cacán tahū ndasí ró jehē maá rī, návāha cuāha ya jñuhun jeē yachī gā cuajeē tucu rī nuū rō.

Bendición jíin saludo jeē sándihí

²⁰ Te máá Yaā jeē jéhe jñuhun ndeyí sī ni nuū yō, ni nastécu yā Jitoho yō Jesucristo mēhñu ndáyí. Te Jesús cúu pastor kujéhu jeē ndíto ñayuu cácuu nájñuhun lanchi ya. Chi jíin níñī yā ni sácutú yá contrato jeē yá jeē coo níí cáni.

²¹ Te ñúhun ni rī jeē Yaā Dios na sáha ya jeē ije ni rō jijnánhan ró, návāha cuu sáha ró táca jniñu vāha ndese nójñahan ni yā. Te ñúhun ni rī jeē jíin fuerza Jesucristo jeē ndeé yá ini yō, na sáha Yaā Dios jeē cuu yó ñáyuu cúsiī ni yā jíin. Te na cáhán yō jeē yóhyo luu cújéhu ya níí cáni. Amén.

²² Hermano jijnánhan ró, cáhán ndahú rī jíin ró jeē cone cáhnu ni rō jeē stihví ni rī rohó jíin jecu-ni jñuhun ni tee rī nuū carta yáha.

²³ Te cástūhun rī jeē hermano yō Timoteo, je ni quenda de vecāa. Te núu yachī quiji de yáhá, te cuajecoo ndíndúú rī nuū rō coto jnánhan yó.

²⁴ Te cahān rō jíin táca tēe cácuu pastor rō jíin táca hermano cácandije jeē sándeyí ni de, áchí rī. Te ñayuu Italia suni cácahān i jeē sándeyí ni rō.

²⁵ Te ñúhun ni rī jeē na sáha ga Yaā Dios jeē vāha rōhó jijnánhan ró. Súcuan na cóo. Amén.

CARTA JEE NI TEE SANTIAGO NUU ÑAYUU CACANDIJE

¹ Máá rí cúu Santiago, mozo Yaā Dios jíin Jítoho yō Jesucristo. Te tée rí carta yáha cuájeē nuū rohó ñayuu cacandije jeē cácuu ró ndihúxí uū yucún Israel, te ni cajitē núu ró ní ñáyíví. Sándeyí ni ró jijnáhan ró.

Yaā Dios sáha jeē jécūhun ni yō

² Ñānī mánī, na cúsi ñ ndasí ni ró jijnáhan ró núu quíji tijní táca jnūndóho siquí ró.

³ Chi cájini ró jeē núu jíto ndee jnūndóho rōhó núu cacandije váha ró, te yucuan sáha jeē cútūhva ró cuándeyí ni ró.

⁴ Te na cuándeyí ni ró nde ije váha ró jíin, náváha cuu sáha ró ndihí jniñu váha, te ma cúmaní jeē squícu váha ró núu yā.

⁵ Te núu ndé ñn ró cúmaní jecūhun ni ró caca ndichí ró jíin jnūhun Yaā Dios, na cácan ró nuū yā, te sáha ya jeē jécūhun ni ró. Chi sáha ya ndihí jeē cájicān ñayuu, te tu cúxeēn yā nuū i jeē jicān i.

⁶ Te jeē jicān ró, te cánuú candije ró jeē sáha ya jeē jicān ró, te ma cáni siquí ni ró. Chi ñayuu jéni siquí ni, cúu i nájñūhun ndute mar jeē ndóna jíso cóyo cuahān cháha chúcuan sáha tachí.

⁷ Ñayuu ún ma cáni ni i jeē sáha Jítoho yō jeē jicān i.

⁸ Chi ñayuu jeē jéni ñn jéni uū ni, chi máni násāma ni i jíin táca jniñu cásáha i.

⁹ Tācá hermano ndahú, na cúsi ñ ni de jeē sáha Yaā Dios jeē cujéhu de.

¹⁰ Te hermano cucá, na cúsi ñ ni de núu ni ndundáhú de. Chi táca tée cucá, yachí naa jeē cucá de, nájñūhun nāá ita yucú.

¹¹ Chi núu ni cane niāndii te cújihní, te íchí-ni yucú, te cóyo-ni ita, te nāá-ni jeē lúu cáa. Te suni sūcuan ndoho táca tée cucá níni sá jícu de jíin jniñu de.

Siquí jeē jíto ndee jnūndóho yóhó

¹² Yóhoyo ndetú tēe jeē jéndeyí ni de núu jíto ndee jnūndóho de. Chi núu je ni cundeyí de jíin, te nihīn de premio jeē cujéhu de cotecu de ní cáni. Chi sūcuan ni jeññūhun Yaā Dios jeē cuáha ya nuū ñayuu jeē maní jíin yá.

¹³ Núu ñn ñayuu jicān ini i jeē sáha i cuéchi, te ma cáni ni i jeē nuū Yaā Dios véji jeē jicān sáha i cuéchi. Chi ni ñn ma cúu cuiti sáha jeē quívi Yaā Dios cuéchi, te ni máá yá tu squívi ya ni ñn ñayuu nuū cuéchi.

¹⁴ Chi sa suhva jeē ndíyo néé ni máá i, suu sáha jeē jicān ini i sáha i cuéchi, te scānda ini i chí stáhú un i.

¹⁵ Te jeē ndíyo néé ni i, yūcuan quéjéé cuéchi. Te cuéchi ún, núu je ni cunīhin, te sáha jeē jñahnú ndetú ñayuu.

¹⁶ Núu sūcuan te ma stívi ró cani ni ró jijnáhan ró, ñānī mánī.

¹⁷ Táca jéé cútahū yō jeē váha jeē lúu íyó, chí véji nde andiví núu máá Yaā Dios, Yaā ni sáha táca jéé ndíndēe ñn andiví. Te máá yá tu násāma cuiti ini yā nájñūhun násāma nduva jíin cuándahū.

¹⁸ Te ni sáha ya jeē cótecu yō ní cáni, chí ni candije yó jñūhun ndaā yā. Te ni nduu yó nájñūhun sēhe nuū yá nuū táca gá sēhe ya jeē quíji, chí sūcuan ni nujnahan ni yā sáha ya.

Siquí ndese chiñúhún ndāá yō yā

¹⁹ Núu sūcuan te táca rōhó ñānī mánī, ñama na chúsohó ró jñūhun ya, te sa suhva ma cahān yachí ró, ni ma quití yachí ni ró.

²⁰ Chi ñayuu cáquiti ní, tu sáha i jniñu ndaā jeē cuní Yaā Dios.

²¹ Núu sūcuan te na siáá ró táca jniñu jnéhén jíin jniñu néé jéé ni cáya jíin ró. Te na cóo víta ní ró te cuatáhú ró jñūhun ya jeē ni quívi ini anuá ró. Chi jñūhun un ndíso poder jeē cácu ánuá ró.

²² Te na squícu ró jéé steén jñūhun ún, te nasūu máá jéé cūni sōho ró sūcuan-ni, chí núu sūcuan te cástáhú ró máá ró, chí tu níhín jniñu núu tu squícu ró.

²³ Chi tēe jeē jíni sōho de jñūhun ya sūcuan-ni, te tu squícu de, cúu de nájñūhun ñn tēe jeē jíto de nuū espejo ndese cáa nuū de.

²⁴ Te jíto váha de nuū de, te cuahān-ni de, te náa ni de ndese cáa nuū de.

²⁵ Te núu ñn tēe tu náa ni de jñūhun jíni sōho de, chí sa suhva chúhun váha ni de jeē cahān máa ley ndaā Jesús jeē ni sáha libre yohó, te núu cuiñi níhin de jíin, te squícu de jeē ndácu, yūcuán na te quéndōo ndetú de jíin jniñu váha jeē sáha de.

²⁶ Te núu ndé ñn ró jéni ni ró jeē chiñúhún váha ró Yaā Dios, te núu tu ndíto ró yáá ró, núu sūcuan te stáhú ró máá ró, te tu ndé jéjniñu jeē chiñúhún ró yá.

²⁷ Ñayuu jeē chiñúhún ndoo chiñúhún ndāá i máá Tátá yō Yaā Dios, chí jniñu yáha sáha i: Chíndéé ñáhán i sūchi ní caquendōo ndáhú jíin ñahan ni caquendōo ndáhú, núu na-ni jñūndóho íyó. Te tu sájnéhén i ánuá i jíin jniñu néé íyó ñáyíví.

Ma cúhichí ni yō coto yó ñayuu ndahú

2

¹ Ñānī mánī, cacandije ró Jítoho yō Jesucristo jeē cujéhu luu ya. Núu sūcuan te ma sáha ró cuenta ndese cúu ñn ñn ñayuu, chí inuú sáha ró jíin ndihí i.

² Chi íyó jínu quívi ñn tēe ini vehe nuū cándutúró ró, te yíhi xehyu oro ndaha de, te ñūhun de sahma váha. Te suni íyó jínu quívi ñn tēe ndáhú, te ñūhun de sahma tahndé.

³ Te tú váha núu sáha yíñúhún ró jíin tēe ñūhun sahma váha, te cahān ró jíin de: Cucóo

ní lugar váha yāhá. Te cahān rō jīn tēe ndáhú: Yūcuán cuiñi ní, chí yáha cucōo ní nuū ñūhun, achi rō.

⁴ Chí núu cásáha rō súcuán, te tu jéni váha ní rō siquī jnāhan rō, chí sīn sáha rō jīn tēe cucá jīn tēe ndáhú.

⁵ Ñānī mánī, chusóhó rō jnūhun cáhān rī: Yāā Dios ní nacāji ya ñayuu ndahú ini ñayivi yáha jēe cōo cucá i jīn jnūhun cácandije i ya, te nihīn i tahū i ñuu nuū ndácu ya jniñu. Chí ní jējnūhun ya cuáha ya un núu ñayuu jēe manī jīn yá.

⁶ Te máá rō chí sa suhva cájēhe rō jnūhun canu ñayuu ndahú. ¿Te á násūu tēe cucá cúu jēe castáhú róhó siquī jēe nihīn de xūhun rō, te yachī jéquin de cuēchi siquī rō nuū tohó?

⁷ Te suni cácahān neé de siquī Cristo, te suu sīhvī máá yá cúu jēe cánani rō cristiano.

⁸ Váha cásáha rō te núu cásquicu ndije rō máá jnūhun jéhu ga jēe cahān ley, nájñūhun yósó núu tútu i: Cundáhú ní rō jnāhan rō nájñūhun cundáhú ní rō máá rō, achí.

⁹ Te núu sīn sáha rō jīn ñayuu cucá jīn ñayuu ndahú, núu súcuán te cuēchi cásáha rō, te jécondee cuēchi siquī rō jēe stívi rō ley Yāā Dios.

¹⁰ Chí núu iin ñayuu stívi i iin-ni jniñu ndácu ley, te vēsú na squícu i ndihi ga, te nájñūhun ní stívi i ndihi ley, te ndihi un jécondee cuēchi siquī i.

¹¹ Chí Yāā jēe ní cahān jēe ma cósiquī ndēe jnāhan rō, suni ní cahān yā jēe ma cáhni rō ndāyi. Te vēsú tu ní cásiquī ndēe jnāhan rō, te núu ní jehni rō ndāyi, núu súcuán te je ní stívi ndihi rō ley.

¹² Te tāca jēe cahān rō jīn jēe sáha rō, chí sáha rō cuenta jēe sándaā yā ndihi un jīn máá ley Jesús jēe ní sáha libre rohó.

¹³ Chí quivī sándaā yā jniñu, te ñayuu jēe tu ní cundáhú ní jnāhan, suni ma nihīn i jnūhun cundáhú ní. Te ñayuu ní cundáhú ní jnāhan, cusī ní i jēe ní ndahva yā cuēchi i máá quivī sándaā yā jniñu.

Tu jéniñu jēe candije yó núu tu squícu yó

¹⁴ Ñānī mánī, núu cáhān iin tēe jēe candije de jēe sáha ya jehē de, te núu tu sáha de jniñu váha, ¿te ndē jéniñu jēe candije de ún? ¿A cuu cācu ánuá de jīn jēe cahān-ni de jēe candije de, te núu tu sáha de jniñu váha?

¹⁵ Te núu iin hermano yō chí hermana yō, cúmani sahma i jīn jēe cāji i tāca quivī,

¹⁶ te núu iin rō cáhān jīn i: Cuandeyí ní rō, te cusucún váha rō te caji váha rō, achi rō jīn i, te núu tu ní jéhe ro jēe jīni ñūhún i cotecu i, ¿te ndē jéniñu jēe cahān rō súcuán?

¹⁷ Te suni súcuán cúu jēe núu áhí rō jēe candije rō jēe sáha ya jehē rō, te núu tu sáha rō jniñu váha, núu súcuán te tu ndē jéniñu cuiñi jēe cahān-ni rō jēe candije rō.

¹⁸ Te sanaa te cahān iin ñayuu: Róhó chí cándije rō jēe sáha ya jehē rō, te ruhū chí sáha

ri jniñu váha. ¿Na jīn stēen rō jēe candije rō jēe sáha ya jehē rō, te núu tú na jniñu váha sáha rō? Te ruhū chí sáha ri jniñu váha te súcuán stēen rī jēe candije ri jēe sáha ya jehē rī.

¹⁹ Ndaā chí cándije rō jēe iyó iin-ni Yāā Dios. Te va iyó váha núu súcuán. Te tachī chí suni súcuán cácandije, te cáquisi i jēe cáyūhú, chí tu cásáha jniñu váha.

²⁰ ¿Te nautu tu jécūhun ní rō? ¿A tu jíní rō jēe núu tu sáha rō jniñu váha, te tu ndē jéniñu cuiñi jēe cahān rō jēe candije rō?

²¹ Te jí yó Abraham, ní ndahva yā cuēchi de siquī jēe ní sáha de jniñu váha. Chí ní jetáhú de jēe ní cahān yā jēe cahni de sēhe de Isaac socó de i nuū altar.

²² Te jécūhun ní rō jēe siquī jēe ní candije de jēe sáha ya jēe ní jéjnūhun ya nuū de, jēe yúcuán ní jetáhú de jēe ní cahān yā jēe socó de sēhe de. Te jēe ní jetáhú de, suu ní stēen jēe candije ndije de jēe sáha ya jēe ní jéjnūhun ya nuū de.

²³ Te súcuán ní cundaā jnūhun cáhān tutu i: Abraham ní candije de jēe ní jéjnūhun ya nuū de, te jēe yúcuán ní ndahva yā cuēchi de, achí tutu. Te ní conani de amigo Yāā Dios.

²⁴ Núu súcuán te je ní cajini rō jēe ndáhva Yāā Dios cuēchi ñayuu jēe casáha i jniñu váha siquī jēe cácandije i jēe sáha ya jehē i, te nasūu máá jēe cahān-ni i jēe candije i.

²⁵ Te suni súcuán Rahab, vēsú ñahan tǐjni ní ní cuu ña xīhna gā, te ní ndahva yā cuēchi ña siquī jēe ní sáha ña jniñu váha. Chí ní jehē núu ña vehe nuū tāca mozo ní tají Josué, te ní chuhichi ña de inga ichi, návaha cácu de nuū tēe cánducú cahni de. Te jēe yúcuán ní ndahva Yāā Dios cuēchi ña.

²⁶ Te iin ñayuu núu tuá anuá i nuū yiqui cúñu i, te ndiyi cúu i. Te suni súcuán núu cándije yó jēe sáha ya jehē yō, te núu tu sáha yó jniñu váha, te nájñūhun ndāyi cúu yó.

Jñūhun siquī yaá yó

3

¹ Ñānī mánī, ma cáni ní cuehē rō cuu rō maestro stēen jnūhun ya. Chí cajini rō jēe yóhó jēe stēen jnūhun, cuehē gā cuēchi ndenehen ya siquī yó.

² Chí ndihi yó stívi cuehē jniñu. Te núu iin tēe cuu condito de yáá de jēe ma stívi de jīn ní iin jēe cahān de, núu súcuán te yóhoy váha tēe cúu de, te suni cuu condito de ní gá de jēe ma stívi de.

³ Chí cúu nájñūhun jēe chíhi yó freno yuhu caballo, te súcuán snáhnú yó ní tǐ jēe quihín tǐ jīn yó ndē nuū cuni yó.

⁴ Te suni súcuán tāca barco, vēsú náhnu ndasi, te vēsú nihin chūndahá táhí, te jīn iin timón lulí-ni te cuu scuícó tēe scáca, te quihín de jīn ndē nuū cuni de.

⁵ Te suni súcuan cúu yáá yó, chí vēsú lulí-ni, te cuehē teyí sáha yó jíin. Te suni jíin yó jeē ñn ñuhūn lulí cuu jññi jeē cayú ñn yucu cáhnu ndasí.

⁶ Te suni súcuan yáá yó, chí sáha nájnūhun ñn ñuhūn, chí scuiquín cuehē teyí jññu neé. Te yáá yó cúu ñn parte lulí yiquí cúñu yó, te sáha jeē quívi ní yó cuēchi. Te infierno cúu jeē scuiquín jññuhun neé jíin yáá yó, te yáá yó scuiquín cuehē jññu neé ní tiempo jeē iyó yó ini ñayívi.

⁷ Te ñayuu chí cuu snáhnú i taca quiti jíin saa jíin cóo jíin quiti ññuhun nuū mar, te je ni snáhnú i cuehē tī.

⁸ Te ni ñn ñayuu ma cúu condito i yáá i. Chí ñn jeē neé jéé ma cúu condito i cúu. Te nájnūhun yuhu cóo jeē ññuhun chitú veneno jeé jéñni, súcuan cúu yáá yó.

⁹ Jíin yáá yó chíññuhún yó Tatá yó Yaā Dios, te suni jíin yáá yó cahán ndeváha yo síquī ñayuu jeē ni sáha ya ánuá i nájnūhun iyó máa yá.

¹⁰ ñn-ni yuhu cáne jññuhun chíññuhún yó yá jíin jññuhun cahán ndeváha yó. Nñani mánī, tu iyó váha cuiti jeē súcuan.

¹¹ ¿A ñn-ni tesōcō cáne ndute váha jíin ndute úvuá, chí nañn?

¹² Nñani mánī, ¿á cuu cuun ndehē oliva xinī yújnu higo, te á cuu cuun ndehē higo xinī yoyúcú uva, chí nañn? Te suni súcuan ñn tesōcō ma cúu cane ndute úhvua jíin ndute váha.

Jññuhun ndíchí jéé véji nuū Yaā Dios

¹³ Te núu ndé ñn ró ndíchí te jécūhun váha ni, núu súcuan te jíin jéé jíca ndaa ró steén ró jeé súcuan cúu ró. Te na cóo suchí ni ró modo jeé jéhe jññuhun ndíchí yá.

¹⁴ Te núu cácuésún teyí ni ró te ndúcú ró jéé cujéñnu máa ró, núu súcuan te ma cutéyí ró cani ni ró jeē ndíchí ró. Chí suu cúu jeé stahú ró, te cúu ró contra síquī jññuhun ndaa.

¹⁵ Chí ñayuu cándaa súcuan, nasūu núu Yaā Dios véji jeé ndíchí i. Chí cuenta ñayívi, jíin cuenta anua neé ñayuu, jíin cuenta máa jéxeén cúu.

¹⁶ Chí nuū iyó ñayuu cucuésún ni jíin ñayuu nducú jéé cujéñnu máa, suni yūcuan iyó jññuhun sáca núu jíin táca jññu neé.

¹⁷ Te jññuhun ndíchí jeé véji nuū Yaā Dios, núu ni sáha jeé ni ndundíchí ñayuu, yūcuán na te iyó ndoo ánuá i. Te suni yūcu maní i jíin jññan i, te vitá ni i, te tú ññni ni i. Te cundáhú ni i jññan i, te sáha i jññu váha. Te suni iyó ndaa i, te tu stahú i.

¹⁸ Te ñayuu cáyūcu mánī jíin jññan, jíin jññuhun maní casáha i taca jññu ndaa, te nanihñ i jeé quéndō ndaa i.

4

¹ ¿Te ndese quejéé jéé cájejnáhan ró jíin jéé cájejnáhan ró? Quejéé síquī jeé cándiyo neé ni ró, te yōhyo scánda ini anua ró.

² Chí cándiyo ni ró, te tu cáneváha ró, te suu sáha jeé cájeñni ró ndiñi. Cándiyo ni ró jeé névaha jññan ró, te tu níñin ró, te suu sáha jeé cájejnáhan ró te cájejnáhan ró. Te tu cáñihñ ró jeé cuní ró, chí tu cájicān ró nuū Yaā Dios.

³ Te núu cájicān ró, te tu cáñihñ ró, chí tu cájicān váha ró, chí mánī jeé cusñ ni maá ró cúu jeé cájicān ró nuū yá.

⁴ Ñayuu castoo Yaā Dios cácuu ró. ¿A tu cájini ró jeé núu cutóo ni ró jeé iyó ini ñayívi, yūcuan cúu jeé cájito uhū ró Yaā Dios? Chí ñayuu jeé cutóo ni jeé iyó ñayívi, ndúu i ñayuu jito uhū nuū Yaā Dios.

⁵ Te tu cáñan saa-ni jññuhun yáha jéé yosó núu tútu ñ: Máa Espíritu jeé ni jéhe Yaā Dios jeé ndeé ini yó, cúcuññi ni yá jeé súcuan casáha yó, chí maní yá jíin yó, achí.

⁶ Te jeé váha ni Yaā Dios, te jéhe ya fuerza ini yó jeé ma sáha yó súcuan. Chí cáñan tutu ñ: Yaā Dios jési yá nuū ñayuu casáha téyí máa, te váha ni yá chindéé ñáñan yá ñayuu casáha suchí máa, achí.

⁷ Núu súcuan te cuandetū ró nuū Yaā Dios. Te cuiñi ñihñ ró jéé ma cuatáhú ró jexeén, te cunu coto róhó jíjnáhan ró.

⁸ Maní gā coo ró jíin Yaā Dios, te vihyá gā steén yá jeé maní yá jíin ró. Róhó jéé casáha cuēchi, na sándoo ró máa ró, stoo ró cuēchi. Te róhó jéé cácuu ró coo maní ró jíin Yaā Dios ññi jéé cácuu ró cutóo ni ró jeé iyó ini ñayívi, na sándoo ró ánuá ró jeé tuá coo ró súcuan.

⁹ Na jññuhúñ ni ró, te cucuihyá ni ró, te na ndáhyú ró síquī jeé iyó cuēchi ró. Te vesú ni cajecū ró, te vijna na ndáhyú cohó ró. Te vesú ni cacusñ ni ró, te vijna na nducuihyá ni ró.

¹⁰ Na sásuchí ró máa ró nuū Yaā Dios, te sájéñnu ya rohó.

Ma cóndihvi ni yó síquī cuēchi jññan yó

¹¹ Hermano jíjnáhan ró, ma cahán neé ró síquī jññan ró. Chí tēe jeé cahán neé síquī jññan, chí jéé ndihvi ni síquī cuēchi jññan, nájnūhun jeé síquī ley yá cahán neé de, chí tu squicu de ley jeé cundáhú ni yó jññan yó, te nájnūhun cahán de jeé tu iyó ndaa ley yá. Te núu cahán ró jeé tu iyó ndaa ley yá, núu súcuan te nasūu jéé squicu ró, chí sa jeé cahán ró síquī.

¹² Iyó ñn-ni Yaā jeé ni jéhe ley, te máa-ni ya cúu jeé sándaá síquī cuēchi. Te jnama ya ñayuu cácanñje te snáhnú ndetú yá ñayuu tu cácanñje. Núu súcuan ¿te na jññu ndiso ró jéé sándaá ró síquī jññan ró?

Jeé ma cutóo ni yó jeé iyó ini ñayívi

Tú váha jeé satéyí yó máa yó

¹³ Vijnā chī sājñē te quihīn yō ñuū yūcuan, te coyūcu yō ñn cuiyā, te cuaan yō xīco yō, te nihīn yō siquī, achí rō.

¹⁴ Te tu jíni cuiṭi rō ndese coo sajñē. ¿Chī na vé va víhi cúu vida rō? Cúu nájñuhun ñn vicō nūhūn jēē ñn núnúu-ni núcūhun, te yūcuán na te ndechí-ni cuahān.

¹⁵ Chī sa vāha ga na cáhān rō: Núu cúni maá Jítoho yō te cotecu yō te sáha yó jēē yáha chī jēē yūcuan, achí rō.

¹⁶ Te sa suhva máni cácutéyí ni rō cácahān rō. Te tú vāha jēē súcuan cácutéyí ni rō.

¹⁷ Te núu ñn ñayuu jíni i sáha i jñiñū vāha, te núu tu sáha i, te cuēchi cúu núu súcuan.

Jñuhun cáhān nuū tēe cúcá

5

¹ Te cáhān rī jíni táca róhó tēe cúcá, jēē na ndáhyū rō te ndahyū cohó rō siquī jñūndóho jēē quíji nuū rō.

² Chī ndajniñū cúcá cánevāha rō, je téhyu. Te sahna vāha rō, je tēe tiquixin.

³ Te oro jíni plata cánevāha rō, chī je cáne xehyu. Te xehyu un stéen jēē ní casáha rō jñiñū stáhū jíni xūhun rō. Te yūcuan cúu jēē ndūñlhin cuēchi siquī rō, nájñuhun ñn ñuhūn jēē snáa yiqui cúñu rō. Chī ni cacaya cuehē rō ndajniñū vāha quiví cuándihī yáha.

⁴ Te tāca tēe ni cajehnde trigo rō, tu ní cáchunaa vāha rō yáhu de. Te vijnā cácana jee de nuū Yāa Dios, Yāa cúu Jítoho nuū táca ndajéhé andiví, jēē súcuan ni casáha rō. Te jíni sōho ya jēē cácana jee tēe ni cajehnde ún.

⁵ Cátecu vāha ndasí rō ñn ñayiví yáha, te casáha rō táca jēē cácusñ ni maá rō. Te cájito yūcūn rō maá rō, te cúu rō nájñuhun quiti néñu jēē ndétu quiví cúu.

⁶ Te ni catee rō cuēchi siquī ñayuu ndaā, te nde ni cajehni rō i. Te tu ní cúu casi i jēē casáha rō.

Jēē na cóo paciencia ni yō te cacān tahú yō

⁷ Hermano, núu súcuan te coo paciencia ni rō condetu rō ndé quiví ndíji maá Jítoho yō. Tēe sājniñū ñuhun, cánuú coo paciencia ni de condetu de nde quíji saū néhen jíni saū néñu isa, te sáa te nihīn de nuni vāha jēē jéhe itu.

⁸ Te suni súcuan coo paciencia ni rō, te ndeyí coo ni rō condetu rō, chī cuacuyajni ndee maá Jítoho yō.

⁹ Te ma cahán sōo rō siquī jēē sáha jñáhan rō, hermano, návāha ma jécondee cuēchi siquī rō. Chī maá Yāa jēē sándaā cuēchi, je yajni ndíji ya.

¹⁰ Nánī máni, conahan rō jíjñáhan rō ndese ni casáha tēe ni canacani jñuhun maá Jítoho yō nde jenahán, chī ni cacuu de ñn ejemplo nuū yō. Chī vésú ni candoho de, te ni iyo paciencia ni de.

¹¹ Te cáhān yō jēē ñayuu cájendeyí ni jíni jñūndóho, ndetū cúu i sáha Yāa Dios. Chī

ni cajini rō jñuhun ndese ni jendeyí ni Job jíni jñūndóho, te suni cájini rō jēē yóhoyo vāha ga ni quendōo de ni sáha maá Jítoho yō ná ni vāha jñūndóho. Chī yóhoyo cúndáhū ni yā yohó, te vāha ndasí ni yā jíni yō.

¹² Nánī máni, jēē cánuú gá cúu jēē ma cahán cáha rō sihví Yāa Dios jíni jñuhun cácahān teyí rō. Ma cahán rō verdad de Dios, Yāa ndeé andiví, ni ma cahán rō verdad de Dios, Yāa chī ñayiví, te ni ñn ga jñuhun súcuan ma cahán teyí rō. Chī núu cahán rō jēē cuu, te súcuan-ni cahán rō. Te núu cahán rō jēē tuú, te súcuan-ni cahán rō, ma scāa gā rō cahán rō, návāha ma ndénehen Yāa Dios cuēchi siquī rō.

¹³ Te núu iyó ñn rō jēē ndóho jñūndóho, te na cácan tahú rō. Te núu iyó ñn rō jēē cúsiñ ni, te na cáta rō yaa jēē chiñúhūn rō yá.

¹⁴ Te núu iyó ñn rō jēē cuhú, te na cána rō tēe jéhu cándito ñayuu cácandíje. Te na cácan tahú de jehē ñayuu cuhú. Te jíni sihví maá Jítoho yō na chehi de acite i.

¹⁵ Te núu cácandíje de jēē sáha Jítoho yō jēē cájicān tahú de, yūcuán na te jnama ya ñayuu cuhú. Chī nasávāha ya i, te núu ni sáha i cuēchi, te cone cáhnu ni yā nuū i.

¹⁶ Núu súcuan te nacani ndaā rō cuēchi rō núu jñáhan rō, te cacān tahú rō jehē jñáhan rō návāha nduvāha rō jíjñáhan rō. Chī núu ñn tēe ndaā ndíhví ni de jícan tahú de, te yóhoyo vāha nihīn jñiñū, chī sáha ya jēē jícan de.

¹⁷ Chī Elías, tēe ni nacani jñuhun Yāa Dios jenahán, suni ñn tēe jēē nájñuhun iyó maá yó ni cuu de. Te ni jícan tahú ndasí de jēē ma cúun saū, te tu ní cúun saū unī cuiyā iñū yō.

¹⁸ Yūcuán na te ni jícan tahú tucu de, te ni cuun saū, te ni canecoo tucu táca jēē jéhe ñuhun.

¹⁹ Nánī máni, núu ñn rō ni stóo ichi ndaā, te núu inga rō nachuhichí rō jñáhan rō,

²⁰ núu súcuan te cuni rō jēē núu ni nachuhichí rō tēe ni quiví cuēchi, te je ni jnama rō de jēē jñahnú ndetū de núu, te súcuan iyó jñuhun cáhnu ni nuū cuehē cuēchi de.

CARTA HN JEE NI TEE SAN PEDRO APOSTOL NUU ÑAYUU CACANDIJE

¹ Máá rí cúu Pedro, apóstol jeē ní tají Jesucristo, te téē rí carta yáha cuájeē nuū rohó ñáyyuu ní cajitē núu, te cáyūcu jíca ró ní Ponto, Galacia, Capadocia, Asia, jíin Bitinia.

² Te máá Tátá yō Yaā Dios ní nacāji ya rohó, chí súcuan ní tee ní yā nde ná tu jecōo ñayiví. Te jíin Espiritu Santo ní sáha ya jeē iyó ndoo iyó íi ró cájetáhú ró núu yā, te ní nacate ya anuá ró jíin níñi Jesucristo. Te ñuhun ní rí jeē na cáya gā táca jéē váha jeē sáha ya rohó, jíin jéē coo ndeyí coo síi ní ró jíinánan ró.

Jeē ñuhun ní yō táca jéē váha jeē cóo andiví

³ Na cáhán yō jeē yóhoyo cújéhu Yaā Dios, Yaā cúu Tátá máá Jitoho yō Jesucristo. Chí ní cundáhú ndasí ní yā yohó, te ní sáha ya jeē ní nacacu jeē yó, siquí jeē ní natecu Jesucristo mēhñu ndíyí. Te jeē yúcuan níni cáñuhun ní yō táca jéē váha jeē coo.

⁴ Chí níhin ró tahú jeē ñuhun váha ini andiví jeē cúu ró jíinánan ró. Te tahū un má náā cuiti, ní ma tívi cuiti, ní ma ndíhi cuiti.

⁵ Chí cácandije ró jéē sáha Yaā Dios jehē ró, te jeē yúcuan ndíto ya rohó jíin poder yā, náváha jnama ya rohó quívi sándíhi, chí ní sándaá yā jeē súcuan coo.

⁶ Jeē yúcuan cacusi ndasí ní ró, vēsú cájito ró cuéhē ndínuū jñúndóho jecu-ni quívi.

⁷ Chí nájnūhun jeē stuhvá ñayuu oro jíin ñúhūn, jíto ndee í núu jeē váha cúu, suni súcuan cánuú coto ndee jñúndóho róhó núu cácandije níhin ró chí tuú. Chí jeē cácandije níhin ró, chí yahu ndasí gá cúu vēsú oro, ndajñíñu jeē náā. Te yúcuan cúu jeē cuajnúhūn yá rohó, te sájéhu ya rohó, te squéndōo yíñúhūn yá rohó quívi quenda ndíjin Jesucristo.

⁸ Te vēsú tu ní cájito ró núu yā, te cáhíyo maní ndasí ró jíin yá. Te cácandije níhin ró yá vēsú tu cájito ró núu yā vijna. Te yóhoyo luu cacusi ndasí ní ró, chí nde tuá níhin cuiti yō jñúhūn castūhun yó ndese cúsi ní yō.

⁹ Te níhin tahú ró jeē cácu ánuá ró, chí jeē yúcuan cúu jeē cácandije ró.

¹⁰ Te téē ní canacani jñúhun Yaā Dios nde jenahán, ní cananducú yúcun de ní cacajñúhun váha de siquí jñúhun ndese jnama ya yohó. Te ní cacachi de ndese sáha Yaā Dios jeē váha róhó jíinánan ró.

¹¹ Chí nde ná tu coo, te ní steén Espiritu Cristo nuū de jíinánan de ndese quíji jñúndóho siquí Cristo jíin ndese luu ndujéhu tucu ya jeē yáha jñúndóho ún. Te ní cananducú yúcun de jeē na jécūhun ní de ndé quívi quíji Cristo te ndese coo táca jéē ní cáhán máá Espiritu jeē ndeé ini de.

¹² Te ní steén Yaā Dios nuū de jeē násūu máá de coto jñíñu jeē ní canacani de ún, chí sa máá yó cúu jeē cóto. Te vijna je ní cajini sóho máá ró jñúhun ún, chí táca téē nácani jñúhun jnama ya yohó, ní canacani de nuū ró, ní sáha poder Espiritu Santo jeē ní quíji ichi andiví. Te jñúhun ún chí nde máá ndajéhé Yaā Dios cananducú náváha na jécūhun ní.

Cúni yā jeē coo ndoo ánuá yō

¹³ Jeē yúcuan ndíto na cóo xiní ró jíinánan ró, te cáji coo ní ró. Te cocuhun ndasí ní ró jeē níhin ró táca jéē váha jeē sáha Yaā Dios rohó quívi quenda ndíjin Jesucristo.

¹⁴ Te na cúu ró séhe jeē cájetáhú váha. Te ma sáha ga ró táca jñíñu jeē ní cacusi ní ró sáha ró nde ná tu jécūhun ní ró jñúhun Yaā Dios.

¹⁵ Chí sa suhva na cóo ndoo ánuá ró jíin táca jñíñu cása ha ró, chí Yaā ní cana róhó, Yaā iyó ndoo cúu ya.

¹⁶ Chí súcuan cáhán tutu íi: Na cóo ndoo ró jíinánan ró, chí ruhú iyó ndoo rí, achí yá.

¹⁷ Te núu cácahán ró Tátá ró jíin Yaā Dios, núu súcuan te na cáca yíñúhūn ró nuū yā táca quívi jéē cájica ró ñayiví yáha. Chí máá yá sándaá siquí ndese ní casáha íin íin yó, te tu sáha ya cuenta ndese cúu íin íin yó, chí inuú sáha ya jíin ndíhi yó.

¹⁸ Chí ní jnama ya rohó núu táca costum-bre jeē ní cajequin jíi ró, jeē ní cajejñíñu cáha ró núu. Te cájini váha ró jéē yahu cúu jeē ní jnama ya rohó. Chí tu ní chúnaa yā jíin ndajñíñu jeē náā, nájnūhun oro jíin plata,

¹⁹ chí sa suhva jíin níñi Cristo jeē yáhu ndasí gá cúu. Chí ní socó yá máá yá nájnūhun íin londe, quiti iyó váha iyó ndoo.

²⁰ Chí jeē yúcuan ní jeni Yaā Dios máá Cristo nde ná tu jecōo ñayiví, te ní cane ndíjin Cristo máá tiempo cuándíhi yáha, náváha quendōo váha ánuá ró jíinánan ró.

²¹ Te jeē jíin Cristo te cácandije ró Yaā Dios. Chí ní sáha Yaā Dios jeē ní natecu yā mēhñu ndíyí jíin jéē ní ndujéhu ya. Te jeē yúcuan cácandije ró Yaā Dios, te cáñuhun ní ró coto ró yá.

²² Te vijna chí je ní candundoo ánuá ró, chí ní cajetáhú ró jñúhun ndaa ní sáha Espiritu jíin ró, náváha cundáhú ndije ní ró hermano cácandije. Núu súcuan te na cundáhú ndasí ní ró jñáhan ró nde jíin ini jíin ánuá ró.

²³ Chí je ní canacacu jeē ró, te nasūu chíji yucūn ñayuu jeē cúu. Chí sa jñúhun Yaā Dios jeē ndíto técu ní cáni ní sáha jeē ní nacacu ró.

²⁴ Chí súcuan cáhán tutu íi: Nájnūhun yucū cúu ndíhi táca ñayuu, chí jecu-ni quívi técu í.

Te nájnūhun ita yucū cúu jeē cújéhu í.

Chí íchí-ni yucū, te ndáhvá-ni ita.

²⁵ Te jñúhun Jitoho yō Yaā Dios, sa quéndōo ní cáni.

Achí tutu. Te jñuhun un cúu maá jñuhun jnáma ya yohó jéé ní canacani ri nuú rō.

2

¹ Núu súcuan te na siáá rō táca jñiñu néé, táca jéé stahú, jéé tú ndije, jeé cucuésun ní, jíin jéé sajnúhún siquí jñáhan.

² Te nájnúhun sūchi yiquín sá ní cacu jeé jéxin te jéhnu, súcuan na cóndihvī ní rō scuáha rō jñuhun ndaá yá, návaha cuehnu rō jíin te cacu ánuá rō.

³ Chi je cájini rō jeé yóhoyo váha ní maá Jítoho yō.

Cristo cúu nájnúhun yuú yítuu vehe

⁴ Núu súcuan te maní gā coo rō jíjnáhan rō jíin Jítoho yō Cristo. Chi cácuu rō nájnúhun templo nuú ndeé Yaā Dios, chi ndeé yá ini anuá rō. Te Cristo cúu nájnúhun ñin yuú cánuú gá jeé yítuu yiquí templo, te sáha ya jeé cótecu rō ní cáni. Te ñayuu vésu ní casquéhichí i ya, te Yaā Dios chi je ní nacáji ya Cristo chí cánuú ndasí yá, nájnúhun nacáji yó ñin yuú váha jeé quítuu yiquí vehe.

⁵ Te maá rō chí cácuu rō nájnúhun ñin ñin yuú jeé cúváha templo Yaā Dios, te cotecu rō ní cáni. Te na cuáha rō jñuhun jeé sama ya rohó jíjnáhan rō jéé cúváha templo yá, cúu jeé ndeé Espíritu yá ini anuá rō nájnúhun ñin ñin templo. Te suni cúní Yaā Dios jeé cuu rō sūtú cáhiyo ndoo cájejníñu nuú yá. Chi siquí jeé ní sáha Jesucristo jehé rō, te na sócō rō maá rō jeé cuajniñu rō núu yá sáha rō táca jñiñu váha jeé núnjahan ní Yaā Dios.

⁶ Chí súcuan cáhán tutu ñi: Vijna te nde ñuu rī Sion Jéquin rī ñin yuú jeé cánuú gá jeé quítuu yiquí vehe, chí ní nacáji rī yá nájnúhun ñin yuú váha jeé cánuú téyí.

Te ñayuu jeé candíje i ya, jnama nahín yá i. Achí Yaā Dios, áchí tutu.

⁷ Te maá rō jeé cácandíje rō, chí yuú váha jeé cánuú téyí cúu ya nuú rō. Te nuú ñayuu tu cácandíje chí tuú, chí sa cúndaá jeé cáhán tutu ñi:

Maá yúu jeé ní casquéhichí tēe cásama vehe, suu cúu yuú cánuú gá yítuu yiquí vehe.

⁸ Te suni cúndaá jñuhun jeé cáhán tutu siquí ñayuu tu cácandíje:

Cúu ya nájnúhun ñin yuú jeé cácachihí i jehé i, nájnúhun toto jeé cotúú i sáha.

Achí. Chi jeé cácachihí i jehé i cúu jeé casaníhni ní i nuú jñuhun ya. Te je ní cundaa jeé jnahnú ndetú i siquí jeé cácaníhni ní i.

Jñuhun ñayuu maá Yaā Dios

⁹ Te maá rō cácuu ñayuu jeé ní nacáji Yaā Dios. Te suni cácuu rō sūtú cájejníñu nuú maá Yaā cúu Rey, te ñayuu cáhiyo ndoo, jíin ñayuu maá yá cácuu rō. Súcuan ní sáha Yaā Dios rohó návaha nacani rō jñuhun ndese yóhoyo jéhnu jñiñu sáha ya, chí maá yá ní cana rohó ná ní coyúcu rō nájnúhun nuú néé. Te ní

squívicoo ya rohó núu luz yá jeé yóhoyo váha stéén yá ini anuá rō.

¹⁰ Chi nde saá te nasūu ñayuu Yaā Dios cácuu rō, te vijna je ní nduu rō ñayuu maá yá. Te nde saá chí ná tu cundáhú ní yá rohó, te vijna je cundáhú ní yá rohó jíjnáhan rō.

Jeé cuajniñu váha yó núu Yaā Dios

¹¹ Nání maní, ñin ñayívi yáha cácuu rō nájnúhun ñayuu ñuu jicá jéé cájica cuu tátú. Núu súcuan te cáhán ndahú rī jíin rō jéé ma sáha rō táca jñiñu jeé ndíyo néé ní rō jíin modo maá rō. Chí táca un cájejnáhan jíin rō, ndúcú jéé jnahnú ndetú anuá rō.

¹² Te ndaá na cáca rō méhñu ñayuu tu jíin jñuhun Yaā Dios. Chí vésu cácahán i siquí rō, nájnúhun cácahán i siquí ñayuu casáha jñiñu néé, te núu na cóto i jñiñu váha casáha rō, te quiví sándaá Yaā Dios jñiñu te cahán i jeé yóhoyo cújéhnu ya.

¹³ Jeé siquí maá Jítoho yō te cuatáhú rō nuú táca tóhō cándiso jñiñu nuú ñayuu. Cuatáhú rō nuú maá rey, chí tēe cújéhnu ga cúu de.

¹⁴ Te cuatáhú rō nuú táca gobernador jeé ní jeni rey návaha stóho de ñayuu casáha jñiñu néé te cuajnúhún de ñayuu casáha jñiñu váha.

¹⁵ Chí cúní Yaā Dios jeé sáha rō jñiñu váha, te jeé súcuan sáha rō te táca ñayuu canéé jéé tu cájecúhun ní, casi i yuhu i.

¹⁶ Te na cáca ndaá rō jeé cácuu rō ñayuu ní nduu libre anuá, te nasūu jéé ní nduu libre rō jeé sáha rō jñiñu néé. Chí sa cácuu rō mozo Yaā Dios, te cuajniñu váha rō núu yá.

¹⁷ Coo respeto rō nuú táca ñayuu. Cundáhú ní rō hermano cácandíje. Conso ñyo rō nuú Yaā Dios. Coo yáñúhún rō nuú maá rey.

Jeé na ndóho yó jehé jñáhan yó nájnúhun ní ndoho Cristo

¹⁸ Róhó jéé cácuu mozo, cuatáhú rō nuú patrón rō, te coo respeto rō nuú de. Te nasūu máá-ní nuú téé váha ní jíin téé vitá ní, chí suni nuú téé xeñ ní.

¹⁹ Chí ñin jeé váha cúu núu jéndeyí ní ñin tēe jeé stóho cáha ñayuu de siquí jeé squícu de nuú Yaā Dios.

²⁰ Chí núu cástóho i róhó jéé casáha rō cuéchi, te ní ñin ma cuajnúhún róhó núu jéndeyí ní rō jíin jeé ndóho rō. Te núu cástóho i róhó jéé casáha rō jñiñu váha, te núu jéndeyí ní rō jíin, yáha cúu jeé váha jeé núnjahan ní Yaā Dios.

²¹ Chí jeé yúcuan cúu jeé ní cana ya rohó jíjnáhan rō. Chí suni maá Cristo ní ndoho ya jeé siquí rō, te súcuan ní cuu ya ñin ejemplo nuú rō jeé na ndóho rō jehé jñáhan rō, te súcuan condiquín rō ichi ya.

²² Te maá yá tú cuítí na cuéchi ní sáha ya, ní tú cuítí na jñuhun stáhú ní cáhán yá.

²³ Ná ní cacahán neé i nuú yá, te tu ní nácahán neé yá. Te ná ní castóho i ya, te tu ní téjnáhan ya jíin i, chí sa ní chíhi ya maá yá

ndaha Yaā Dios, Yaā sándaā vāha siquī ndihi ún.

²⁴ Te ni condiso máa Cristo cuēchi yó jín yiqui cúñu yā ná ni jihí yā jicā cruz, návaha quenda yó chíji cuēchi te caca ndaa yó. Chi ni tují yā, te jeé yúcuan ní canduvāha ánuá rō.

²⁵ Chi ni casana ró nájñuhun lanchi, te vijna je ni candicó ró ni ndīvicoo ró núu Cristo, Yaā cúu pastor rō te ndíto vāha ya anuá rō.

Ndese cánuú coyūcu vāha yí jín ñasihí

3

¹ Suni súcuan róhó ñasihí jijnáhan ró, cuatáhu ró nuú yí ró, návaha núu cúu de tēe tu cándije jñuhun ya, te cuu scándije ró de, jeé tuá níní jín jéé cahán rō, chi máa jín jéé casáha vāha rō.

² Chi cuni de jeé cájica ndaa rō te cáhīyo respeto rō.

³ Te jeé casáha luu ró máa ró, chi nasūu máni máa ichi síquī rō sáha ró, jeé sáha luu ndasí ró xiní rō, chí jéé cūhun ró síquī oro chí sahma vāha ga.

⁴ Chi sa nducú ró jeé quéndōo luu ánuá rō, te coo luu ró ñn modo jeé ma náa cuít, suu jeé cóo vítā ní rō te coo nahín ní rō. Chi yāha cúu jeé yahu ndasí gá nuú Yaā Dios.

⁵ Chi ñahan ní cahīyo ndoo ánuá nde jehán, suni súcuan ní casáha luu ña ánuá ña. Chi ní cañuhun ní ña Yaā Dios, te ní cajetáhu ña nuú yí ña.

⁶ Te súcuan ní sáha Sara, chi ní jetáhu ña nuú yí ña Abraham, te ní cahān yíñúhún ña jín de. Te róhó jijnáhan ró, núu sáha vāha ró te núu ma yūhu ró ní ñn, yūcuán na te coo ró nájñuhun ní iyo Sara.

⁷ Te suni súcuan róhó yí, na cóo vítā ní rō jín ñasihí ró. Te yíñúhún coo ró jín ña, siquī jeé núu ga fuerza ña vésú rohó, te suni siquī jeé inuú ní canihín tahú rō cotecu rō ní cáni siquī jeé vāha ní Yaā Dios. Te súcuan sáha ró návaha tú casí nuú jñuhun jicán tahú rō.

Jñuhun ñayuu cándoho siquī jeé cájica ndaa

⁸ Núu súcuan te inuú na cáni ní rō jijnáhan ró, te cuculhyá ní rō jeé ndóho jñahan ró, te cundáhu ní rō ní nájñuhun ñani rō. Te na cóo maní rō te caní suchí ní rō.

⁹ Núu casáha néé ñayuu jín ró, te ma nasáha néé ró jín i. Te núu cácahān neé i nuú rō, te ma nácahān neé ró núu i. Chi sa suhva cacān tahú rō jeé na quéndōo vāha i. Chi Yaā Dios ní cana ya rohó jéé suni súcuan quéndōo vāha ró.

¹⁰ Chi súcuan cáhán tutu íi:

Ñayuu cácani cotecu vāha te cusí ní táca quíví,

na cóto i yuhu i jeé ma cáhán neé i,

te na cóto i jeé ma cáhán i jñuhun stáhu.

¹¹ Na cújiyo i nuú jniñu néé, te na sáha i jniñu vāha.

Na nducú i coyūcu máni i, te na cóndihví ní i jín.

¹² Chi máa Jítoho yó ndíto ya ñayuu ndaa,

te jíní nahín yá jeé cájicān tahú i.

Te ñayuu casáha jniñu néé, chi tu jetáhu yá i. Achí tutu.

¹³ Te ní ñn ma sáha néé jín ró te núu máni jniñu vāha cándihví ní rō sáha ró.

¹⁴ Te vésú núu ndóho ró síquī jeé cájica ndaa rō, te yóhoyo ndetū cácuu ró. Núu súcuan te ma yūhu ró coto ró i, ní ma cunee ní rō.

¹⁵ Chi sa jín ini jín ánuá rō chíñúhún ró máa Jítoho yó Cristo. Te níni coo tūhva ró nastíto cuñí víta ró te cahān yíñúhún ró jín ñayuu jeé castíhí rohó síquī táca jéé cáñuhun ní rō.

¹⁶ Te caca ndaa rō jeé tú na cuēchi condee anuá rō, návaha ñayuu cácahān neé síquī rō, cucanu i jeé ní stáu yáhu i róhó jéé cájica ndaa rō chí cácañdije ró Cristo.

¹⁷ Chi núu cúní Yaā Dios te vāha ga jeé ndóho ró síquī jeé casáha ró jniñu vāha vésú síquī núu sáha ró jniñu néé.

¹⁸ Chi máa Cristo suni ní ndoho ya, te ñn jínu-ni ní jihí yā jeé síquī cuēchi ndihi yó. Yaā vāha cúu ya, te ní ndoho ya jehé yohó ñayuu ní casáha jniñu néé, návaha quívicoo yó núu Yaā Dios sáha ya. Chi ní jihí yiqui cúñu yā, te ánuá yā chí técu-ni ní cáni.

¹⁹ Te ná ní jihí yā te ní jehēn anuá yā ní nacani ya jñuhun nuú anuá ñayuu cáyindihyū.

²⁰ Chi nde jehahán tu ní cájetáhu i, ná ní iyo paciencia ní Yaā Dios te ní condetu ya níni sáha Noé barco jeé naní arca. Te jín arca un ní cácu jecu-ni ñayuu, chí unā-ni i ní cácu nuú ndúte.

²¹ Te nájñuhun ní cacācu i nuú ndúte, súcuan cúu jeé jéndute yó vijna te cácu ánuá yó. Te jeé jéndute yó, nasūu jéé ndúndoo yiqui cúñu yó, chí sa jeé jicán yó nuú Yaā Dios jeé ndúndoo ánuá yó. Te súcuan te cácu yó, chí ní cundúyó yó jín Jesucristo nuú jñuhun ní natecu yā.

²² Te ní ndaa ya cuanuhun yā andíví, te ndéé yá ichi ndávaha Yaā Dios nuú cujéhu ya. Te táca ndajéhé andíví, jín jéé cándacu jniñu, jín jéé cájni poder, cájendetū nuú yā.

Jeé na cuájñu yó jín táhu jeé ní jéhe ya nuú yó

4

¹ Núu súcuan te nájñuhun ní ndoho Cristo jehé yó jín yiqui cúñu yā, suni súcuan na táva ní maá ró ndoho ró. Chi ñayuu jeé ní ndoho jín yiqui cúñu, tuá sáha i cuēchi.

² Núu súcuan te ní tiempo jeé cuahán gā rō, na sáha ró jniñu jeé cuní Yaā Dios, te ma sáha ga ró jniñu jeé ndíyo néé ní rō jín modo máa ró.

³ Chi nde ní véji ró, te ni casáha ró cuéhē cuēchi jeé cánujnahan ni ró siquī jeé tu ní cájini ró jnūhun Yaā Dios. Te tiempo un máni máá jéé neé ni casáha ró, te ni candiyo ni ró táca jéé neé, ni canajīni ró, ni casáha ró vico neé, ni cajihi ndasí ró nuū vico ró, te ni cachiñúhún ró ídolo jeé ni cáhān Yaā Dios jeé ma chíñúhún yó.

⁴ Te cácuñeé ni i jeé tuá cájica ró jíin i jeé sáha ró táca cuéchi xeēn jíin i. Te jeé yúcuan cúu jeé cácahān neé i siquī ró.

⁵ Te máá i chí ñn quivī te nacuaāha i cuenta nuū maá Yaā jeé iyó túhva ya sándaā yā jniñu ñayuu técu jíin ñayuu ní cajihi.

⁶ Chi jeé yúcuan suni ni quiji jnūhun vāha ya nuū táca ndíyi ná ni cotecu i. Te ni cundaā siquī cuéchi ni casáha i ñayivī yāha, nájnūhun cūndaā siquī ndihi ñayuu, návāha nacani ni i te cotecu anuá i ní cáni nájnūhun técu Yaā Dios.

⁷ Te je cuacuyajni quivī jeé náā táca jéé iyó. Núu súcuan te ndito na cóo xinī ró jíjnāhan ró, te condihvī ni ró cacān tahū ró.

⁸ Te jeé cánuú gá cúu jeé cundáhú ndasí ni ró jnāhan ró. Chí núu cundáhú ni yó jnāhan yó, te iyó jnūhun cáhnu ni nuū cuehē cuéchi.

⁹ Sáha vāha ró jíin ñayuu jeé jinú i vehe ró, te ma cúxī ni ró.

¹⁰ Táca ró cuajniñu ró núu jnāhan ró, núu ndese iyó máá táhū ró jeé ni jéhe Yaā Dios jeé cuajniñu ró núu yā. Te squícu vāha ró jíin táhū jeé sán sán ni jéhe ya nuū ñn ñn ró.

¹¹ Núu tahū jeé nácani ró jnūhun cúu, te na cáhān ró nájnūhun jeé maá Yaā Dios cahān. Te núu tahū jeé chindéé ñáhan ró jnāhan ró cúu, te na sáha ró jíin fuerza jeé ni jéhe ya nuū ró, návāha jíin ndihi jeé casáha ró te cahān ñayuu jeé yóhoyó cújéhnu Yaā Dios siquī jeé ni sáha ya jíin Jesucristo. Te na cáhān yó jeé luu cújéhnu Cristo te jñi ya poder ní cáni. Amén.

Jeé ndóho yó siquī jeé candije yó Cristo

¹² Nāni mánī, núu véji jnūndóho xeēn jeé coto ndee rohó, te ma cuneeé ni ró cani ni ró jeé maá ró ni nihñ jnūndóho xeēn gā.

¹³ Chí sa cusñi ni ró jeé cándoho ró jecu jnūndóho jeé ní ndoho Cristo, návāha suni cusñi ndasí ni ró quivī quénda ndijin yā jeé cujéhnu luu ya.

¹⁴ Te yóhoyó ndetū ró te núu cácahān neé i nuū ró siquī jeé cácuñeé ró Cristo. Chí máá Espírítu Yaā Dios jeé cujéhnu ndasí, ndéé yá ini ró. Máá i chí cácahān neé i siquī yā, te máá ró chí cáchiñúhún ró yā.

¹⁵ Te núu ndoho ró, te na ndóho ró siquī jeé cácuñeé ró Cristo. Te ma ndóho ró siquī táca cuéchi nájnūhun cándoho ñayuu jéni ndíyi, ñayuu sacuíhná, ñayuu sáha jniñu neé, jíin ñayuu quivī nduu nuū jniñu jnāhan jeé tu cánuú quivī nduu.

¹⁶ Te sa núu ñn ró ndóho siquī jeé candije ró Cristo, te ma cúcanu ró, chí sa nacuatáhú ró nuū Yaā Dios siquī jeé cúu ró cristiano.

¹⁷ Chí je ni jinū quivī jeé quejéé sándaā Yaā Dios cuéchi, te xihna gā ñayuu cácuu sēhe ya sándaā yā cuéchi. Te núu xihna gā cuéchi máá yó quejéé yá sándaā yā, núu súcuan te xeēn gā coo jeé ndénehen ya cuéchi siquī ñayuu jeé tu ní jétáhú jnūhun vāha ya.

¹⁸ Te núu yóhoyó yí cácu ñayuu vāha, núu súcuan ζ te ndese cácu ñayuu casáha jniñu neé jíin táca cuéchi?

¹⁹ Núu súcuan te róhó jéé cándoho siquī jeé súcuan cúní Yaā Dios, ma jécuiñi ró sáha ró jniñu vāha, te na chíhi ró máá ró ndaha máá Yaā jeé ni sáha róhó, chí squícu ya jeé ni jéjnūhun ya.

Jeé jéhe de consejo ñayuu cácuñeé

5

¹ Vijna te na cáhān rī jíin táca róhó téé jéhnu cándito ñayuu cácuñeé, chí suni téé jéhnu ndíto ñayuu cácuñeé cúu máá rí. Te cúu rí testigo jeé ní jito rí ndese ni ndoho Cristo. Te suni ndujéhnu rí jíin ró sáha Cristo quivī quénda ndijin yā.

² Na cóto yúcún ró ñayuu jeé ndee níñu ró condito ró, jeé cácuu i nájnūhun lanchi Yaā Dios. Te na cúsní ni ró condito ró i, chí súcuan cúní Yaā Dios. Te nasūu siquī jeé sáfuerza yā rohó, ni nasūu siquī jeé nihñ ró xuhún, chí sa siquī jeé cúní ró cuajniñu ró.

³ Te nasūu jéé ndacu nihñ ró jniñu nuū ñayuu cándito ró, chí sa nducú ró cuu ró ñn ejemplo nuū i jeé cácuu i lanchi ni.

⁴ Yúcuán na te quivī quénda ndijin máá Yaā cúu Pastor cujéhnu nuū rohó téé cácuu pastor lanchi ya, te cuāha ya premio nuū ró jíjnāhan ró jéé yóhoyó luu te ma náā cuítí.

⁵ Te suni róhó táca téé suchí, na cuandetū ró nuū táca téé jéhnu jíñā. Te ndihi róhó ñayuu cácuñeé, cuandetū ró nuū jnāhan ró, te caní suchí ni ró. Chí suhva cáhān tutu: Yaā Dios jési yā nuū ñayuu casáha téyí máá, te vāha ni yá chindéé ñáhan yá ñayuu casáha suchí máá.

Achí.

⁶ Núu súcuan te na cáni suchí ni ró, chí cáyihí ró ndaha Yaā Dios jeé jñi poder. Te sájéhnu ya rohó, na jínú máá quivī.

⁷ Táca jéé cáncani ndasí ni ró siquī, chíhi ró ndaha máá yá te máá yá coto, chí ndíto ya rohó.

⁸ Te cájí na cóo xinī ró te ndito coo ni ró. Chí jexeén jeé jito uhū rohó, jíca cuu nducú squiví róhó jíjnāhan ró núu cuéchi. Te xeēn gā sáha vésú ndicaha jeé iyo ndáhyú.

⁹ Te cuiñi nihñ ró jéé ma cūndeyí jexeén jíin ró, te nihñ candije ró jnūhun cundáhú ni yā rohó. Chí cájini ró jeé suni súcuan cándoho hermano ró jeé cáyūcu ní cáhnu ñayiví.

¹⁰ Te núu ni jĭnu jeē ndoho ró jecu-ni tiempo, te Yaā Dios chi sáha ya jeē ije váha ni rō jĭn jnúhun ya, jĭn jēē cuíñi nĭhin ró, te cuáha ya fuerza ini rō, te quendōo cutú ró ní cáni. Chi máá yá cúu jeē sáha tāca jēē váha yóhó, te ni cana ya yohó jēē cújénu luu yó jĭn yá ní cáni, siquī jeē nduú yó jĭn Jesucristo.

¹¹ Te na cáhán yō jeē yóhyo luu cújénu ya te jnúi ya poder ní cáni. Amén.

Saludo jeē sándihí

¹² Jĭní rĭ jeē Silvano cúu ĩn hermano jeē squícu váha. Te máá de cuajeē nuū rō jĭn carta yáha jēē ní tee ri jecu jnúhun. Te jĭn yáha stáhví ni rĭ rohó, te cáhán rĭ jĭn ró jeē ndaá cúu jeē tāca jēē váha ni sáha Yaā Dios rohó, suu stéén nuū rō jeē cundáhú ndije ni yā rohó. Te na cuíñi nĭhin ró jĭn jnúhun yáha.

¹³ Ñayuu cá candĭje jeē cáyúcú ĩnu Babilonia, jeē ní nacāji ya ĩ nájnúhun ni nacāji ya rohó, cácahān ĩ jeē sándeyí ni rō. Te Marcos, tee cúu nájnúhun sehe rĭ, suni súcuan cáhán de.

¹⁴ Te núu na cáhán rō jĭn jnáhan ró, te techūhu mánĭ rō ndaha ĩ.

Te na cóo ndeyí coo sĭi ni ndihĭ ró jēē cáyihĭ ró ndaha Jesucristo. Súcuan na cóo. Amén.

CARTA UU JEE NI TEE SAN PEDRO APOSTOL NUU ÑAYUU CACANDIJE

¹ Máá rí cúu Simón Pedro, te cúu ri mozo Jesucristo, te cúu ri apóstol jeé ní tají yá. Te téé ri carta yáha cuájeé nuú rō jijnáhan rō, jeé ní sáha Yaá Dios jeé inuú-ni jín rí jijnáhan ri ní canihín rō jnūhun luu váha jeé cácan dije yó yá. Chi Yaá ndaa cúu Yaá Dios, suu máá Jesucristo jeé jnāma yóhó.

² Te ñūhun ni rī jeé na sáha ga yā jeé váha ndasí róhó jín jéé yóhoyo coo ndeyí coo sī ní rō siquī jeé cájecūhun váha ni rō ndese Yaá cúu Yaá Dios jín Jítoho yō Jesús.

Siquī ndese cánúu coo ñayuu cácan dije

³ Te Yaá Dios, jín poder yā ní jēhe ya nuú yō táca jéé sáha jeé cúu caca ndaa yō nuú yā jín jéé chíñúhún váha yó yá. Chi ní steén yā máá yá nuú yō, chí cúu ya Yaá jeé ní cana yóhó, siquī jeé yóhoyo cújéhuu ya jín táca jniñu jéhuu sáha ya.

⁴ Jeé yúcuan ní jejnūhun ya táca jéé yóhoyo jéhuu yóhoyo váha sáha ya yóhó, náváha jín táca ún te nduu rō nájñūhun iyó máá yá, te cácu ró núu jniñu jeé cándiyo neé ní ñayuu casáha i ini ñayívi yáha.

⁵ Núu súcuan te na ndúcú ndéyí ró jín jnūhun yáha. Te jeé cácan dije ró, te siquī ún na chísoó ró jeé caca ndaa rō. Te jeé cájica ndaa rō, te siquī ún chísoó ró jeé cóndihví ní rō jécūhun váha ní rō.

⁶ Te siquī ún chísoó ró jeé casi rō modo jeé cuní máá ró. Te siquī ún chísoó ró jnūhun cuandeyí ní rō, te siquī ún chísoó ró jeé chíñúhún váha ró Yaá Dios.

⁷ Te siquī ún chísoó ró jeé cóo maní rō jín jnāhan ró, te siquī ún chísoó ró jeé cundáhú ní rō jnāhan ró.

⁸ Chí núu cayā táca jniñu yáha jín ró, te suu sáha jeé ma cótecu saá-ni ró, chí sa quee váha jniñu sáha ró, siquī jeé cájecūhun ni rō ndese Yaá cúu Jítoho yō Jesucristo.

⁹ Te ñayuu jeé tu casáha jniñu yáha, nájñūhun jeé cáhiyo cuáá i, chí tu jécūhun ní i jnūhun ya, te je ní naa ní i jeé ní sándoo ya i táca cuéchi ní casáha i ichi yátá.

¹⁰ Jeé yúcuan na ndúcú ndéyí ró hermano, náváha coo seguro jeé ní cana ya rohó jín jéé ní nacají ya rohó. Chí núu sáha ró táca jniñu yáha, te ma cáca yátá cuiti rō.

¹¹ Yúcuan na te nune váha ichi quívi ró ini ñuu máá Jítoho yō Jesucristo, Yaá jnāma yóhó, nuú ndácu ya jniñu ní cáni.

¹² Jeé yúcuan ma jécuiñí rī sáha ri jeé núcūhun ní rō táca jnūhun yáha, vésú je cájini ró te cáhín nihín ró jín jnūhun ndaa jeé cácan dije ró.

¹³ Chí jéni ní rī jeé iyó váha stáhví ní rī rohó vijna técu gā rī, náváha nucūhun ní rō.

¹⁴ Chí máá Jítoho yō Jesucristo ní castūhun yá nuú rī jeé tuá cótecu nahán rí ñayívi yáha.

¹⁵ Jeé yúcuan na ndúcú ndéyí gā rī stáhví ní rī rohó, náváha núu je ní jihí rī, te níni nucūhun ní rō táca jnūhun yáha.

Jeé ní cajito de jeé cújéhuu Cristo

¹⁶ Ná ní castéén rī jnūhun máá Jítoho yō Jesucristo nuú rō, ndese ndiji ya jín poder yā, te tu ní cácahan rī ñin cuento-ni jeé ní catava ndichí ñayuu. Chí ná ní cáhiyo rí jín yá xini yúcu, te ní cajito jín núu rī jeé tucu ní nduu ya jeé ní ndululu jéhuu ya.

¹⁷ Chí ní cajini rī jeé Tatá yō Yaá Dios ní cahán yíñúhún yá jín Jesús, te ní sajeéhuu ya Jesús. Chí ichi ándiví ní quiji jnūhun luu, ní cahán Yaá Dios: Yáha cúu Sēhe rī jeé maní ndasí rí jín, te cúsi ní rī jín, áchí yá.

¹⁸ Te ní cajini sóho rí jnūhun un jéé ní cáhan ichi ándiví, chí ní cahín ri jín máá Jítoho yō xini yúcu ñi ún.

¹⁹ Te súcuan cájini yō jeé iyó ndaa ndije táca jnūhun ní catee téé ní canacani jnūhun ya nde jenahán. Te váha jeé na chúhun ní rō jnūhun un jijnáhan ró, chí suu cúu nájñūhun ñin luz jeé cayú nuú neé, nde na cundijin quívi ndiji ya, te steén yā ñi anuá rō nájñūhun jeé ndíndéé lucero.

²⁰ Te xihna gā na jécūhun ní rō jeé ní ñin jnūhun cáhan tutu ñi, nasūu jéé súcuan-ni ní cajeni ní téé cúu.

²¹ Chí táca téé ndoo jeé ní canacani jnūhun ya nde jenahán, tu ní cácahan cuiti de jnūhun jeé cúu ní maá de. Chí sa suhva ní canacani de jnūhun Yaá Dios jeé ní steén Espíritu Santo nuú de.

Siquī téé cástéén jnūhun stáhu (Judás 4-13)

2

¹ Te méhñu ñayuu Israel ún suni ní cahíyo téé ní canacani jnūhun stáhu. Te suni súcuan coo téé steén jnūhun stáhu méhñu ró. Te squívi de jnūhun stáhu jéé tívi ñayuu sáha. Te ní ma cuajnúhún de Jítoho yō jeé jnāma ya de, te súcuan sáha de jeé jnahnú ndetú yachí de.

² Te cuehé ñayuu condiquín i modo neé jéé castéén de. Te sáha de jeé cahán neé ñayuu siquī jnūhun váha ya jeé cúu ichi ndaa.

³ Te siquī jeé cándiyo ní de xūhún, te quende de xūhun ró siquī jnūhun stáhu steén de nuú rō. Te tu quíxín jnūndóho jnahnú ndetú de, chí nde jenahán je ndétu jnūhun ndonda ya siquī cuéchi de.

⁴ Chí tu ní ñne cáhnu ní Yaá Dios nuú táca ndajéhé yá jeé ní casáha cuéchi, chí sa ní jnaa yá infierno cayíndihyú nuú neé, cánuhñí jín cadena. Te ní chindihyú yá nde quívi sándaá yá siquī.

⁵ Te suni tu ní íne cáhnu ní yā nuū ñáyuu jenahán, chí sa ní scúun ya saū xeén siquí ñáyuu ní casáha néé un. Te máá-ni Noé, tēe ní nacani jñūhun ndaā, ní scácu ya de jíin úxā gā ñáyuu.

⁶ Te suni ní ndonda ya siquí cuéchi ñáyuu ñuu Sodoma jíin ñuu Gomorra, te ní cayū ñuu í ní nduu máá yāá na. Te súcuan cúu í ñin ejemplo nuū táca gā ñáyuu sáha néé jéé quíji ga.

⁷ Te ní scácu ya Lot, chí tēe ndaā ní cuu de, te ní cuculhyá ndasí ní de ní jito de jñiñu néé ní casáha ñáyuu neé un.

⁸ Chí tēe váha un ní condee de mēhñu ñáyuu ún, te ndiquiví ní nacani cuíhyá ní de jéé ní jíini sōho de ní jito de táca jñiñu néé ní casáha í.

⁹ Núu súcuan te máá Jítoho yō chí jnáma ya ñáyuu cáchiññhún núu yā, te núu vēji jñūndóho siquí í. Te chíndihyū yā ñáyuu casáha néé, náváha ndoho í castigo quiví sándaā yā cuéchi í.

¹⁰ Te víhyá gā stóho ya tēe casáha jñiñu jnéhén jéé ndíyo néé ní de, te cácuu jéé ní de siquí jñiñu ndácu máá Jítoho yō. Níhni ndasí ní de, te cáhundeyí ní de sáha de jéé cácuu máá de, te tu cáyūhú de cahán ndeváha de siquí táca jéé cácujeñnu nuū súcun.

¹¹ Te ní máá ndajéhé jéé cáhñin nuū Jítoho yō, vēsú cácujeñnu ga yā jíin fuerza jíin jñiñu ndíso ya, te tu cácahán ndeváha ya siquí táca jéé cácujeñnu ún.

¹² Te tēe ún chí cácuu de nájñūhun quití yúcu jéé ní jéconaa tī jíin modo sáha tí, te cátañu tī náváha níhñin ñáyuu tī cahni í tí. Chí cácahán neé de siquí táca jéé tu cájécūhun ní de. Te cuu de nájñūhun jíhí táca quití ún.

¹³ Te jéé ní castóho de ñáyuu, suni súcuan naníhñin de ndoho de. Te cácusñ ní de jíin táca jéé cácajni ní de, te casáha de táca jñiñu jéé cándiyo néé ní de. Te cácuu de tēe quini jéé casáha jñiñu cúcanu ñáyuu. Te jéé cándutútú de jíin ró vico ró, te níni cácusñ ní de jíin jñiñu néé jñiñu stáhu.

¹⁴ Te cándiyo ní de cájito de ñahan, te tu cájecuññ de sáha de cuéchi. Te cástáhu de ñáyuu tahya ní. Chí ní cacāan de jíin jñūhun ndíyo ní de táca ndajñiñu. Te tēe jñahnū ndetū cácuu de.

¹⁵ Te ní casana de, chí ní castóo de jñūhun jéé cúu íchi ndaā. Te ní candiquñ de modo Balaam, tēe ní nacani jñūhun nde jenahán, séhe Beor. Chí tēe un ní cusñ ní de níhñin de xūhun siquí jñūhun néé jéé cahán de.

¹⁶ Te ñin burro ní cahán tī nájñūhun ñin ñáyuu, vēsú quití ñihñin cúu tí. Te ní cahán tī nuū tēe ún, te súcuan ní jesi tī jéé ma quíhñin de cahán de táca jñūhun néé stívi.

¹⁷ Te táca tēe súcuan chí cácuu de nájñūhun tesóco íchi, nájñūhun vicō jéé stehí táchi. Te jñahnū ndetū de quivicoo de nuū néé nuū lúchi jñúú coyócu de ní cáni.

¹⁸ Chí yōhyo casándúxi de máá de jíin jñūhun cácahán saá-ni de. Te cánducú de squiví tucu de sava ñáyuu nuū jñiñu néé jñiñu ndíyo ní. Te súcuan cástáhu de ñáyuu jéé sa ní quenda í ní cácu í nuū ñáyuu casáha jñiñu néé.

¹⁹ Te cácahán de jéé cáhíyo libre í sáha í ndese-ni cúní máá í, te ní máá de tu cáhíyo libre de, chí cácuu de mozo nuū cuéchi, chí máni jñiñu jnéhén casáha de. Chí táca jñiñu jéé cūndeyí jíin ñin tēe jéé sáha de, suu yūcuan ndúu de mozo nuū.

²⁰ Chí núu je ní cajini de ndese Yaā cúu máá Jítoho yō Jesucristo, Yaā jnáma yóhó, te núu súcuan ní quenda de ní cácu de nuū jñiñu jnéhén íyó ñin ñayiví, te yūcuán na te núu ndávicoo tucu de nuū jñiñu un jéé cūndeyí tucu jíin de, núu súcuan te néé gā quendōo de jéé sándihí vēsú jéé xíhna ñūhún.

²¹ Chí váha ga núu jéé tu ní cájini de jñūhun íchi ndaā nuū, vēsú jéé ní cajini de, te stóo tucu de jñiñu ndoo jéé ní ndacu ya nuū de.

²² Chí cūndaā jíin de nájñūhun cáhán ñin jñūhun jenahán: Ina ní nacaji tī jéé ní ndujen tí. Te quini ní ndundoo, ní nacuchi tucu tí ndehyū, achí.

Siquí jéé ndíji Jítoho yō

3

¹ Ñáni máni, yáha cúu carta uū jéé tēe rí nuū ró. Te jíin ndíndúú carta yáha cúní rí jéé nacani ní ró siquí ndihí jéé váha ndaā jéé jéni íchi rí rohó.

² Te na núcūhun ní ró táca jñūhun jéé ní canacani tēe ndoo Yaā Dios nde jenahán, jíin jñiñu ní ndacu máá Jítoho yō, Yaā jnáma yóhó. Te suu cúu jéé ní castéén tēe cácuu apóstol nuū ró.

³ Te xíhna gā jñūhun yáha na jécūhun ní ró: Jéé nuū cuándihí quiví te quijicoo tēe sácatā siquí jñūhun ndaā yā, chí sáha de táca jñiñu néé jéé ndíyo ní máa de.

⁴ Te cahán de jíjnáhan de: ¿Najehé cúu jéé tu ndíji Cristo nájñūhun ní jéjñūhun ya? Chí nde quiví ní cajihí jíi yō te nde vijna, tu ndé sáma cuiti ndihí jéé íyó ndé ná ní jecōo ñayiví, achí de.

⁵ Chí tu cácuu de jécūhun ní de jéé ndé jenahán ní cuváha andiví jíin jñūhun ní cahán Yaā Dios. Te ní ndacu ya jñiñu jéé na cuváha ñayiví jíin ndute, te mēhñu ndute ní nane ñūhun íchi.

⁶ Te suni jíin ndute ní naa ñayiví jenahán, chí ní ndaa ndute jéé ní cuun saū xeén.

⁷ Te suni súcuan jíin jñūhun ní cahán Yaā Dios ní sátūhva ya jéé cayú andiví jíin ñayiví íyó vijna. Chí máá quiví juicio te cayú ndihí, te jñahnū ndetū ñáyuu ní casáha néé.

⁸ Te suni ma náa ní ró jñūhun yáha, ñáni máni: Jéé nuū máá Jítoho yō chí ñin quiví

cúu nájnūhun mil cuiyā, te mil cuiyā cúu nájnūhun iin quivī-ni.

⁹ Chi nasūu jēē cucuēé máá Jítóho yō siquī jnūhun ni jejnūhun ya, nájnūhun cájeni ni sava ñayuu. Chi sa suhva íyó paciencia ni yā nuū yō, chi tu cúni yā jeē jnahnú ndetū ni iin yó, chi sa cúni yā jeē ndihi yó nacani ni yō stóo yó cuéchi yó.

¹⁰ Te quivī ndíji máá Jítóho yō, iin sanaa-ni te quee, nájnūhun iin sanaa-ni te queé ñacuíná jecuáá. Te quivī ún chi ñihin ndasí andiví, te naa-ni. Te ndihi jeē iyó andiví chi naa sáha ñuhūn. Te ñayiví jíin táca jēē iyó ini, ndihi cayū.

¹¹ Te núu súcuan naa tǎcá un, te cánuú ndasí jēē coo ndoo ánuá rō te chiñúhún váha ro yá jijnáhan rō.

¹² Te condetu rō te condihvī ni rō jeē na queé yachī quivī ndíji Yaā Dios. Te quivī ún cayū andiví te naa-ni, te táca jēē iyó chi ndute sáha yáñuhūn.

¹³ Te máá yó chi cándetu yó andiví jēē jíin ñáyiví jēé, chi súcuan ni jejnūhun Yaā Dios. Te yūcuán chi máni jniñu ndaá jíin jniñu váha coo.

¹⁴ Núu súcuan, ñání mání, níni jēē cándetu rō jēē squícu tǎcá jniñu yáha, te na ndúcú ndéyí rō návaha quivī ndíji ya te ñihin yā rohó jēē cáyūcu mání rō, te coo ndoo rō jēé tú na cuéchi rō.

¹⁵ Te na jécūhun ni rō jeē siquī jeē iyó paciencia ni máá Jítóho yō, jeē yūcuán cácu yó. Chi hermano yō Pablo jeē maní yō jíin, suni súcuan ni tee de nuū rō, chi súcuan ni steén Yaā Dios jnūhun ndíchí yá nuū de.

¹⁶ Te cáhán de siquī jnūhun yáha núu táca carta jeē ní tee de. Te nuū carta de un íyó jecu jnūhun jeē yí jécūhun ni yō. Te ñayuu tu jécūhun ni jíin ñáyuu tu íje jíin jnūhun cándíje, cánasama i modo steén jnūhun yí un, nájnūhun násama i jeē cahán sava ga tutu íi. Te súcuan sáha i jeē jnahnú ndetū máá i.

¹⁷ Te róhó ñání mání, vijna te je ni cajini rō ndese coo tǎcá jniñu yáha. Núu súcuan te coto má condiquín rō jnūhun stáhú cástéén ñayuu casáha néé. Chi núu tuú te snáa rō jnūhun cáhīn ñihin rō jíin.

¹⁸ Chi sa na cóndihvī gā ni rō cuni rō ndese Yaā cúu máá Jítóho yō Jesucristo, Yaā jnáma yóhó. Te na íje ga ni rō jíin jnūhun cúndáhú ni yā rohó. Te na cáhán yō jeē yóhoyo luu cújéhu ya nde vijna jíin níí cáni. Súcuan na cóo. Amén.

CARTA HN JEE NI TEE SAN JUAN APOSTOL NUU ÑAYUU CACANDIJE

Jñuhun cotecu yō ní cáni

¹ Jñuhun cátee ri cuajeē nuū rō jijnáhan rō cúu jñuhun máa Yaā jeē je iyó ndé ná tu jecōo táca jéē iyó. Te ni cajini sōho ri jeē ni cáhān yā, te ni cajito jínúū rī yā, chi ni cajito vāha ri nuū yā, te ni cajñi ri yā. Te máa yā cúu Jñuhun cotecu yō ní cáni.

² Chi Yaā yáha jéē sáha ya jeē cótecu yō, ni quenda ndijin yā. Te cácahān rī jñuhun ya, chi ni cajito ri yā. Te cácastūhun rī nuū rō jijnáhan rō síquī Yaā cúu Jñuhun cotecu yō ní cáni, Yaā ni condee jijn Táta yō Yaā Dios, te ni quenda ndijin yā nuū rī jijnáhan ri.

³ Jeē ni cajito ri jijn jéē ni cajini sōho ri, yūcuan cúu jeē cácastūhun rī nuū rō, návāha coo inuū ni rō jijn yō jijnáhan yō. Te jendaā chi cáhiyo inuū ni yō jijn máa Táta yō Yaā Dios jijn Séhe ya Jesucristo.

⁴ Te jñuhun yáha cátee ri cuajeē nuū rō, návāha cusñ teyí ni rō jijnáhan rō.

Yaā Dios cúu luz

⁵ Te yáha cúu jñuhun ni steén Jesucristo nuū rī, te vijna cácastūhun rī nuū rō: Yaā Dios cúu luz, chi yōhyo ndaā yā, te tú cuiti na jñiñu néē iyó jijn yā.

⁶ Núu cácahān yō jeē cáhiyo inuū ni yō jijn yā, te núu cájica yō nájñuhun nuū néē jeē sáha yō jñiñu néē, núu súcuan te cástáhú yó, te nasúū jñiñu ndaā casáha yó.

⁷ Te núu cájica yō jijn luz yā jeē casáha yō jñiñu ndaā, nájñuhun iyó máa yā jijn luz yā jeē sáha ya jñiñu ndaā, yūcúan na te cáhiyo inuū ni yō jijn táca jñahan yó. Te niñi máa Séhe ya Jesucristo sándoo yóhó núu ndihi cuéchi yó.

⁸ Núu cácahān yō jeē tú na cuéchi yó, te cástáhú yó máa yó jeē jéni ni yō súcuan, te tu ñuhun jñuhun ndaā ini yō.

⁹ Te núu nacani ndaā yō cuéchi yó nuū yā, te cone cáhnu ni yā nuū cuéchi yó, te sándoo ya yóhó ndihi jeē neē casáha yó. Chi jini yō jeē Yaā vāha Yaā ndaā cúu ya.

¹⁰ Te núu cácahān yō jeē tú na cuéchi yó, te nájñuhun sáha yó jéē Yaā stáhú cúu ya, te tu cándije ndije yó jñuhun ya.

Cristo cúu Yaā cahán jehē yō

2

¹ Táca jñuhun yáha tée ri cuajeē nuū rohó jéē cácuu rō nájñuhun sēhe ri, návāha ma sáha rō cuéchi jijnáhan rō. Te núu ndé ñn rō ní sáha cuéchi, te iyó máa Yaā cahán jehē yō nuū máa Táta yō Yaā Dios. Jesucristo Yaā ndaā cúu ya.

² Te ni socō yā máa yā jeē ndahva yā cuéchi yó, te nasūu cuéchi máa-ni yó, chi suni cuéchi ñayuu ní ñáyiví.

³ Núu squícu yó jñiñu ndácu Yaā Dios nuū yō, jijn yūcuan cúcáhnu ni yō jeē jini ndije yó ndese Yaā cúu ya.

⁴ Te núu cáhān ñn ñayuu: Ruhū chi jini rī ndese Yaā cúu ya, te núu tu squícu i jñiñu ndácu ya, núu súcuan te stáhú i, te tu cáhān i jñuhun ndaā.

⁵ Te sa ñayuu squícu jñuhun ya, je ni ije vāha ni i jeē maní i jijn yā. Súcuan te cuni yō núu ndúū yó jijn yā chi tuú.

⁶ Núu cáhān ñn ñayuu jeē nduū i jijn yā, cánuū jéē caca ndaā i nájñuhun ni jica Jesucristo.

Jñiñu jéē ndácu ya nuū yō

⁷ Hermano, nasúū ñn jñiñu jéē ndácu ri nuū rō jeē cahán rī jeē na cundáhú ni rō jñáhan rō. Chi jñiñu jeē je cájini rō nde ná ni quejéé rō candije rō cúu. Te jñiñu yáha jeē ndácu ya, vēji nde jenahán, te suu cúu jñuhun ni cajini sōho rō ndé quiví ní quejéé rō candije rō.

⁸ Te vēsú súcuan, te níni jñiñu jéē cúu, te jñiñu ndaā cúu nuū Cristo jijn nuū máa rō jijnáhan rō. Chi je cuayáha jñiñu néē jéē iyó núu néē, te je steén máa luz ndaā ini anuá yō vijna.

⁹ Núu ñn ñayuu cahán i jeē jica i jijn luz yā, te núu jito uhū i jñáhan i, ñayuu ún chi jica ga i nájñuhun nuū néē jijn cuéchi.

¹⁰ Te ñayuu jeē cundáhú ni jñáhan, chi jica i jijn luz yā, cúu jeē sáha i jñiñu vāha. Te ni ñn ma cúu sáha jeē quiví i cuéchi.

¹¹ Te ñayuu jito uhū jñáhan, chi iyó i nuū néē, te jica i nuū néē. Te tu jini i ndé chi quihín i, chi nuū néē un ní jesi jeē tu jécūhun ni i.

¹² Róhó jéē cácuu sēhe, tée ri jñuhun yáha cuajeē nuū rō, chi jeē síquī Jesucristo te ni ine cáhnu ni Yaā Dios nuū cuéchi rō.

¹³ Róhó tátá jijnáhan rō, suni tée ri nuū rō, chi cájini rō ndese Yaā cúu Yaā iyó ndé xihna ñuhún. Róhó tée suchí jijnáhan rō, suni tée ri nuū rō, chi ni cacundeyí rō jeē tu ní cúu squiví jexeén rohó cuéchi.

Róhó jéē cácuu sēhe, tée ri jñuhun yáha cuajeē nuū rō, chi cájini rō ndese Yaā cúu máa Táta yō Yaā Dios.

¹⁴ Róhó tátá jijnáhan rō, suni tée ri nuū rō, chi cájini rō Yaā iyó ndé xihna ñuhún. Róhó tée suchí jijnáhan rō, suni tée ri nuū rō, chi cáhñi ñihin rō, te cácañdije rō jñuhun Yaā Dios, te ni cacundeyí rō síquī jexeén.

¹⁵ Ma cutóo ni rō síquī ñayiví, ni táca jéē iyó ini ñayiví. Chi núu ndé ñayuu cutóo ni i síquī ñayiví, ñayuu ún tu iyó maní i jijn Táta yō Yaā Dios.

¹⁶ Chi táca jéē cúu cuenta ñayiví, nasūu ndé nuū Táta yō Yaā Dios vēji, chi cuenta ñayiví

cúu. Te yúcuan cúu táca jéé cájni ni yó jeé cuní modo neé máá yó, jíin jéé ndíyo ni yó jeé jíto yó núu, jíin jéé sandúxí yó máá yó siquí ndajniñu névaha yó.

¹⁷ Te cuandíhi ñayívi jíin táca jéé ndíyo neé ni yó. Te ñayuu casáha jeé cuní máá Yaa Dios, chí cotecu i níf cáni.

Jñuhun ndaa jíin jñuhun stáhú

¹⁸ Róhó jéé cácuu nájñuhun sêhe ri, cáhán ri jíin ró jeé cuandíhi quívi. Te je ni cajini jñuhun ró jéé quíji máá téu cuu contra siquí Cristo. Te nde vijna je ni canecoo cuéhé téu jeé cácuu contra siquí Cristo. Te jeé yúcuan jíin yó jeé cuandíhi quívi.

¹⁹ Mēñiu máá yó ni quendacoo de, te nasūu jñahan yó cácuu de, te quendōo de jíin yó nuu. Te ni quenda de cuango de, návaha cuni cají yó jéé násūu jñahan yó cácuu ndíhi de.

²⁰ Te máá ró jíijnahan ró, chí Cristo ni jēhe ya Espiritu Santo, ndeé yá ini anuá ró, te jeé yúcuan cájni ró jñuhun ndaa.

²¹ Núu súcuan te téu ri yaha cuájeé nuu ró, siquí jeé cájni ró jñuhun ndaa, nasūu siquí jeé tu cájni ró. Te cájni ró jeé tu na jñuhun stáhú iyó nuu jñuhun ndaa.

²² ¿Ndé iin cúu jeé cahán máni jñuhun stáhú? Suu téu jeé cahán jeé Jesús, tu cúu ndije ya Cristo, Yaa ní taji Yaa Dios. Yúcuan cúu téu jeé cúu contra siquí Cristo, chí tu jéjñuhún de máá Tátá yó Yaa Dios jíin Séhe ya.

²³ Táca ñayuu jeé tu jéjñuhún i Séhe ya, suni tu iyó máá Tátá jíin i. Te ñayuu jeé jéjñuhún i Séhe ya, suni iyó máá Tátá jíin i.

²⁴ Núu súcuan te chuhun vaha ni ró máá jñuhun ni cajini sōho ró ndé jeé xihna ñuhún. Te núu ñuhun vaha ni ró jñuhun ní cajini sōho ró ndé jeé xihna ñuhún, yúcuán na te suni ndúú ró jíin máá Tátá yó jíin Séhe ya.

²⁵ Te yaha cúu jñuhun jeé ni jéjñuhun Jesucristo nuu yó: jeé cótecu yó níf cáni sáha ya.

²⁶ Jñuhun yaha ní tee ri nuu ró jeé cástuhun ri siquí ñayuu cánducú stáhú róhó.

²⁷ Te máá ró jíijnahan ró, chí ni jēhe Jesucristo Espiritu Santo, ndeé yá ini anuá ró. Te jeé yúcuan tu jíin ñuhún jéé steén ni iin ñayuu nuu ró ndé vé cúu jendaá, chí máá Espiritu cúu jeé steén ndíhi nuu ró, te steén yá jñuhun ndaa, chí tu stáhú cuiti yá. Núu súcuan te caca ndúú ró jíin Cristo, nájñuhun steén Espiritu nuu ró.

²⁸ Séhé jíijnahan ró, vijna te na cáca ndúú ró jíin Cristo, návaha núu na quénda ndíjin yá, te ma yūhu yó, ni ma cúcanu yó nuu yá quívi ndíji ya.

²⁹ Chí je cájni ró jeé Yaa ndaa cúu Jesucristo, te suni na jécuhun ni ró jeé táca ñayuu casáha jñiñu ndaa, séhe Yaa Dios cácuu i.

Jñuhun ñayuu cácuu séhe Yaa Dios

3

¹ Nacá jeé yóhoyo ni cundáhú ni Tatá yó Yaa Dios yohó, chí ni nihín yó jñuhun cuu yó séhe ya, te suu cúu ndije yó. Jeé yúcuan, ñayuu ñayívi tu cájni i jeé cúu yó séhe ya, chí tu jíin i ndese Yaa cúu máá yá.

² Náni máni, vijna te cúu yó séhe Yaa Dios, te ná tu cuni yó ndese coo yó níf cáni. Te je jíin yó jeé quívi quénda ndíjin Jesucristo, te nduu yó nájñuhun iyó máá yá, chí coto yó núu yá ndese iyó yá.

³ Te táca ñayuu jeé súcuan ñuhun ni i, chí sándoo i ánuá i, nájñuhun iyó ndoo Jesucristo.

⁴ Te ñayuu casáha cuéchi, chí stívi i ley Yaa Dios. Chí núu sáha yó cuéchi, te stívi yó ley yá.

⁵ Te je cájni ró jeé ní quíji Jesucristo ini ñayívi návaha quende yá cuéchi yó. Te máá yá tú na cuéchi ya.

⁶ Te táca ñayuu jeé nduu i jíin yá, tu cájica i jíin cuéchi. Te táca ñayuu cájica jíin cuéchi, tu jíin i ya, ni tu jécuhun ni i ndese Yaa cúu ya.

⁷ Séhé jíijnahan ró, coto ró jéé ma stáhú ni iin i róhó. Chí na jécuhun ni ró jeé ñayuu casáha jñiñu ndaa, máá i cácuu ñayuu ndaa, nájñuhun iyó ndaa máá yá.

⁸ Te ñayuu casáha cuéchi, máá i cácuu séhe jexeén. Chí jexeén cúu jeé sáha cuéchi vèji nde jeé xihna ñuhún. Jeé yúcuan ní quíji Séhe Yaa Dios, jeé snáa yá táca jñiñu neé sáha jexeén.

⁹ Ni iin ñayuu jeé cúu séhe Yaa Dios, tu jíca i jíin cuéchi, chí ni sáha Yaa Dios jeé ní nduu i nájñuhun iyó máá yá. Te ma cúu ga caca i jíin cuéchi, chí séhe Yaa Dios cácuu i.

¹⁰ Súcuan cuni yó ndé iin cúu séhe Yaa Dios jíin séhe jexeén: Táca ñayuu jeé tu sáha jñiñu ndaa, jíin jéé tu cundáhú ni jñahan, nasūu séhe Yaa Dios cúu i.

Jeé na cundáhú ni yó jñahan yó

¹¹ Yaha cúu jñuhun jeé ní cajini sōho ró ndé jeé xihna ñuhún: jeé na cundáhú ni yó jñahan yó.

¹² Te ma sáha yó nájñuhun ni sáha Caín, jeé ní cuu de séhe jexeén, te ni jehni de ñani de. ¿Te najehē ni jehni de ñani de? Siquí jeé ñani de ni sáha jñiñu ndaa te máni jñiñu neé ní sáha máá de.

¹³ Hermano jíijnahan ró, ma cunéé ni ró te núu ñayuu ñayívi cáquiti ni i nuu ró.

¹⁴ Te máá yó chí siquí jeé cundáhú ni yó jñahan yó, súcuan jíin yó jeé jé ní cácu yó jéé cótecu yó níf cáni. Te ñayuu jeé tu cundáhú ni jñahan, iyó i jíin jñuhun jñahnū ndetū i.

¹⁵ Chí táca ñayuu quiti ni nuu jñahan, nájñuhun ñayuu jéjni ndíyi cúu i. Te cájni ró jeé ñayuu jéjni ndíyi, ma nihín tahú i cotecu i níf cáni.

¹⁶ Jeé ni jíhi Cristo jehé yó, yúcuan cúu jeé steén cají ndese cúu jñuhun cundáhú ni. Te

máa yó, chi suni súcuan jíni ñúhún cundáhú ni yó jnahan yó vésú na cúu yó jehé i.

¹⁷ Te núu névaha yó jéé cótecu yó ñayíví, te núu jíni yó jéé cúmani nuú jnahan yó, te núu tú cundáhú ni yó i cuaha yó jéé jíni ñúhún i, núu súcuan ¿te á iyó máni yó jíin Yaā Dios, chi naún?

¹⁸ Séhē jijnáhan ró, ma cundáhú ni yó jíin máa jnūhun cáhán-ni yó, chi sa suhva na cundáhú ndije ni yó nde jíin jniñu sáha yó.

Ndese cucáhu ni yó jéé váha sáha yó núu Yaā Dios

¹⁹ Te súcuan cundaā ni yó jéé squícu yó jnūhun ndaā, te cucáhu ni yó jéé váha sáha yó núu yā.

²⁰ Chi núu ánuá yó tú váha sáha siquí jéé iyó cuéchi yó, te Yaā Dios chi cújéhu ga yā vésú anuá yó, te jíni ndíhi ya táca un.

²¹ Núu súcuan ñāni máni, núu váha sáha ánuá yó siquí jéé tú na cuéchi yó, yúcuān na te cucáhu ni yó jéé váha sáha yó núu Yaā Dios.

²² Te táca jéé cacán yó nuú yā, te sáha ya jéé cahán yó, chi squícu yó jniñu ndácu ya te sáha yó jniñu jéé cúsiñi ni yā.

²³ Te yāha cúu jniñu ndácu ya: jéé na cándije yó jéé ni sáha Séhe ya Jesucristo jehé yó, jíin jéé na cundáhú ni yó jnahan yó, nájñūhun ni ndacu ya jniñu nuú yó.

²⁴ Te táca ñayuu squícu jniñu ndácu Yaā Dios, ndúu i jíin yá, te ndéé yá ini anuá i. Te jíin máa Espíritu jéé ni jéhe ya jéé ndeé ini anuá yó, jíin yúcuān te jíni yó jéé ndeé Yaā Dios ini yó.

Jñūhun jéé véji nuú Espíritu jíin jñūhun cáhán contra Cristo

4

¹ Ñāni máni, ma cándije ró táca téé jéé cácahān de jéé jíin Espíritu Yaā Dios cánacani de jñūhun. Chi sa suhva coto ndee ró de, núu nde nuú Yaā Dios véji jñūhun cácahān de, chí tuú. Chi ini ñayíví je ni canecoo cuehē téé cánacani jñūhun stáhú, te cácahān de jéé nde nuú Yaā Dios véji.

² Te súcuan nacuni rō ndé-ni i cúu jéé jíin Espíritu Yaā Dios cahán: táca ñayuu jéé cácahān ndaā jéé ní quiji Jesucristo, ni nduu ya téé, máa i cúu jéé jíin Espíritu Yaā Dios cácahān.

³ Te táca ñayuu jéé tu cájéjñúhún jéé súcuan ni nduu ya téé, máa i chí nasúu jíin Espíritu Yaā Dios cácahān i. Chi sa suhva cácuu i contra siquí Cristo. Te je ni cajini jñūhun ró jéé quijócuo ñayuu súcuan, te víjna je cáhiyo i ini ñayíví.

⁴ Séhē jijnáhan ró, máa ró cácuu séhe Yaā Dios, te je ni cacundeyí ró siquí téé cástáhú un. Chi jéhu ga cúu poder máa Yaā jéé ndeé ini rō, vésú poder máa jéé ndeé jíin ñayuu ñayíví jéé castáhú.

⁵ Máa i cácuu cuenta ñayíví, te jéé yúcuān cácahān i jñūhun cuenta ñayíví. Te ñayuu cácuu cuenta ñayíví, cájini nahín i jñūhun ún.

⁶ Te máa yó chí séhe Yaā Dios cácuu yó. Te ñayuu jéé cájini i ndese Yaā cúu Yaā Dios, máa i cájini nahín i jñūhun cácahān yó. Te ñayuu jéé násúu séhe Yaā Dios cácuu, máa i tu cájini nahín i jñūhun cácahān yó. Te súcuan nacuni yó ndé-ni cúu jéé cahán jñūhun ndaā jíin ndé-ni cúu jéé cahán jñūhun stáhú.

Máni jñūhun cundáhú ni iyó jíin Yaā Dios

⁷ Ñāni máni, na cundáhú ni yó jnahan yó, chí jñūhun cundáhú ni, nde nuú Yaā Dios véji. Te táca ñayuu cundáhú ni jnahan, chí séhe Yaā Dios cúu i, te jíni i ndese Yaā cúu Yaā Dios.

⁸ Te ñayuu jéé tu cundáhú ni jnahan, tu jíni i ndese Yaā cúu Yaā Dios, chí máni jñūhun cundáhú ni iyó jíin Yaā Dios.

⁹ Súcuan ni steén Yaā Dios ndese cundáhú ni yá yohó, chí ni tají yá Séhe ya ni quiji ini ñayíví yáha, vésú mañúhún-ni ya iyó, návaha cotecu yó ní cáni sáha ya.

¹⁰ Te yāha cúu jñūhun cundáhú ni: nasúu jéé xihna máa yó ni íyo maní yó jíin Yaā Dios, chí sa suhva máa yá cúu jéé ní cundáhú ni yá yohó. Te ni tají yá Séhe ya ni quiji, návaha socó yá máa yá jéé quende yá cuéchi yó.

¹¹ Ñāni máni, núu súcuan ni cundáhú ni Yaā Dios yohó, te suni súcuan cánuú jéé cundáhú ni yó jnahan yó.

¹² Ni ñiñ ñayuu tu ní jito cuíti nuú Yaā Dios. Te núu cundáhú ni yó jnahan yó, te ndeé Yaā Dios ini anuá yó, te je ni ije váha ni yó jíin jñūhun cundáhú ni.

¹³ Te máa Espíritu Santo jéé ni jéhe ya jéé ndeé ini yó, máa yá steén jéé nduú yó jíin Yaā Dios, te ndeé Yaā Dios ini yó.

¹⁴ Te ni cajito ri te cácastūhun rí jéé máa Tátá yó ni tají yá Séhe ya ni quiji návaha jnama ya ñayuu ñayíví.

¹⁵ Te núu ndé ñayuu jejnúhún i jéé Séhe Yaā Dios cúu Jesús, te ndúu i jíin Yaā Dios, te Yaā Dios ndeé yá ini i.

¹⁶ Te máa yó, je ni jini yó te ni cándije yó jéé cundáhú ni Yaā Dios yohó. Chí máni jñūhun cundáhú ni iyó jíin Yaā Dios. Te ñayuu cundáhú ni jnahan, ndúu i jíin Yaā Dios, te ndeé yá ini anuá i.

¹⁷ Te súcuan cúu jéé íje váha ni yó jíin jñūhun cundáhú ni, návaha ma yūhu yó quiví sándaā yá jniñu yó. Chí nájñūhun cundáhú ni Cristo, suni súcuan cándaā máa yó ini ñayíví yáha.

¹⁸ Te núu maní yó jíin yá, te tu yúhú yó nuú yá. Chí núu ni ije yó jíin jñūhun maní yó jíin yá, te tú na siquí yuhú yó nuú yá. Chí jñūhun yúhú un cúu jéé yuhú yó ndoho yó castigo. Jéé yúcuān ñayuu cáyūhú chí ná tu ije váha i jíin jñūhun maní i jíin yá.

19 Te yóhó chí manī ndasí yó jíin Yaā Dios, chí xihna gā maá yá ní cundáhú ní yā yohó.

20 Te núu ñin ñayuu cahán i jeē maní i jíin Yaā Dios, te núu quítí ní i nuū jnáhan i, núu súcuan te ñayuu stahú-ni cúu i. Chí núu ñin ñayuu tu iyó maní i jíin jnáhan i jeē jíto i nuū, te ní ma cúu coo maní i jíin Yaā Dios jeē tu jíto i nuū yā.

21 Chí je ní ndacu ya jniñu yáha nuū yō: Ñayuu jeē maní i jíin Yaā Dios, suni na cóo maní i jíin jnáhan i.

Jeē cúndeyí yó siquī jeneé íyó ini ñayiví

5

1 Tāca ñayuu jeē cácan díje i jeē Jesús cúu Cristo, Yaā ní tají Yaā Dios, maá i cácuu sēhe Yaā Dios. Te ñayuu maní jíin Yaā cúu Tátá, suni cácan díhú ní i ñayuu cácuu sēhe ya.

2 Súcuan jíin yō jeē cundáhú ní yō ñayuu cácuu sēhe ya, núu maní yō jíin yá te squícu yó jniñu ndácu ya.

3 Chí jeē squícu yó jniñu ndácu Yaā Dios cúu jeē maní yō jíin yá. Te jniñu ndácu ya chí tú veyi.

4 Chí tāca ñayuu cúu sēhe Yaā Dios, cúndeyí i siquī jeneé íyó ini ñayiví. Te jeē candíje yó jeē cundáhú ní yā yohó, yūcuan cúu fuerza jeē sáha jeē cúndeyí yó.

5 Máa-ni ñayuu jeē candíje jeē Jesús cúu Sēhe Yaā Dios, maá i cúu jeē cúndeyí siquī jeneé íyó ini ñayiví.

Jnūhun cáhán ndaā siquī Sēhe Yaā Dios

6 Te jeē ní quiji Jesucristo ini ñayiví, chí ní jendute ya jíin ndute, te ní jeti niñí yā jeē ní jíhí yā jehē yō. Te nasūu maá ñin-ni jeē ní jendute ya jíin ndute, chí suni ní jeti niñí yā. Te maá Espíritu Yaā Dios cahán ndaā siquī yā, chí nuū maá Espíritu vēji jnūhun ndaā.

7 Chí ini andiví íyó úní jeē cácahān ndaā siquī jnūhun yáha: maá Yaā cúu Tátá, jíin Yaā cúu Jnūhun, jíin Espíritu Santo. Te ndinúni yá, chí ñin-ni cúu ya.

8 Te ini ñayiví suni íyó úní jeē steén ndaā: maá Espíritu, jíin jéé ní jendute Jesús, jíin jéé ní jeti niñí yā. Te ndinúni yáha, chí inuú-ni steén siquī yā.

9 Te cájetáhú yó jnūhun cácahān ndaā tēe, te jéhu ga cúu jnūhun cáhán maá Yaā Dios. Te jnūhun ní cahán yā cúu jnūhun siquī Sēhe ya.

10 Ñayuu cácan díje jeē Sēhe Yaā Dios cúu Jesús, je ní cacundaā ní i jnūhun yáha jeē ní cáhán Yaā Dios. Te ñayuu jeē tu cácan díje jeē ní cáhán Yaā Dios, nájnūhun cásáha i jeē Yaā stahú cúu ya, chí tu cácan díje i jnūhun ní cahán ndaā yā siquī Sēhe ya.

11 Te jnūhun ndaā un cúu jeē ní sáha ya jeē cótecu yó ní cáni, te Sēhe ya ndíso jnūhun cótecu yō.

12 Ñayuu jeē iyó Sēhe ya jíin i, je ní nihín tahú i cótecu i. Te ñayuu jeē tu iyó Sēhe ya jíin i, ma nihín tahú i cótecu i.

Jnūhun consejo jeē sándihí

13 Jnūhun yáha tēe ri nuū rohó ñayuu cácan díje Sēhe Yaā Dios, návaha cucáhnú ní rō jeē ní nihín tahú rō cótecu rō ní cáni.

14 Te cúcáhnú ní yō Yaā Dios, chí jíin yō jeē núu na vé jícan yō nuū yā jeē suni cúni maá yá, te jíin nahín yá jeē jícan yō.

15 Te núu jíin yō jeē jíin nahín yá jeē jícan yō, núu súcuan te suni jíin yō jeē sáha ya jeē jícan yō.

16 Núu ñin ñayuu jíin i jeē sáha jnáhan i cuēchi jeē násūu cuēchi jeē jnahnú ndetū i cúu, te na cácan tahú i nuū Yaā Dios, te cuāha ya jnūhun cótecu jnáhan i, te núu nasūu cuēchi jeē sáha jeē jnahnú ndetū i cúu. Iyó cuēchi jeē jnahnú ndetū i sáha, te tu cáhán rī jeē cacán tahú rō jehē ñayuu sáha cuēchi súcuan.

17 Tāca jniñu neé cúu cuēchi, te íyó cuēchi jeē násūu jeē jnahnú ndetū i cúu.

18 Te jíin yō jeē tāca ñayuu cácuu sēhe Yaā Dios, tu jíca i jíin cuēchi. Chí Yaā cúu Sēhe Yaā Dios, ndíto vāha ya i. Te tú na vé cúu sáha jexeén jíin i.

19 Te jíin yō jeē sēhe Yaā Dios cácuu yó. Te ñayuu ní ñayiví yíhi i ndaha jexeén.

20 Te suni jíin yō jeē ní quiji Sēhe Yaā Dios, te ní sáha ya jeē jécūhun ní yō, návaha cuni yō ndese Yaā cúu maá Yaā ndaā. Te ndúu yó jíin Yaā ndaā, suu jíin maá Sēhe ya Jesucristo. Maá yá cúu ndije Yaā ndaā, te maá yá sáha jeē cótecu yó ní cáni.

21 Sēhē jijnáhan ró, na cújiyo ró núu tāca jéé násūu Yaā ndaā cúu. Súcuan na cóo. Amén.

CARTA UU JEE NI TEE SAN JUAN APOSTOL

¹³ Tāca séhe cuhū ní, ñahan jeē suni ní nacāji ya, cácahān i jeē sándeýí ní ní. Súcuan na cóo. Amén.

Jnūhun ndaā jín jnūhun cundáhú ní

¹ Máá ná cúu tēe jénu ndiso jniñu, te tēe ná carta yáha cuájeē nuū ní jēē cúu ní hermana ni nacāji Yaā Dios, jín núu séhe ní jijnáhan i. Te maní na jín ní jijnáhan ní sáha jnūhun ndaā yā, te nasūu máá-ni ná, chí suni tāca ñáyuu jini jnūhun ndaā.

² Te maní na jín ní jijnáhan ní siquī jeē cácañdeje yó jnūhun ndaā yā jeē iyó ini anuá yō, te coo jín yó ní cání.

³ Te ñūhun ni na jēē Tatá yō Yaā Dios jín Séhe ya Jitoho yō Jesucristo, na sáha ga yā jeē váha níhín, te cundáhú ní yā níhín, te sáha ya jeē coo ndeyí coo sī ní ní, jín jnūhun ndaā jín jnūhun cundáhú ní.

⁴ Yōhō ni cusī ní ná, chí ni jini na jēē sava séhe ní cájica i jín jnūhun ndaā, nájñūhun ni ndacu máá Tatá yō Yaā Dios jniñu nuū yō.

⁵ Hermana, cáhán ndahú ná jín ní jeē na cundáhú ní yō jnáhan yó. Te jnūhun tēe ná yáha cuájeē nuū ní, nasūū ñin jniñu jéé sá ndácu ya cúu, chí jniñu ní ndacu ya nuū yō nde ná ní quejéé yó candíje yó cúu.

⁶ Te jeē cundáhú ní yō jnáhan yó cúu jeē caca yó nájñūhun ni ndacu ya jniñu nuū yō. Te jniñu ní ndacu ya cúu jeē caca ní jín jnūhun cundáhú ní, nájñūhun ni cajini sōho ní ndé ná ní quejéé ní candíje ní.

Siquī tēe cástáhú

⁷ Chí cuehē tēe cástáhú ni canecoo de ní ñáyiví, te tu cájejnūhún de jeē ní quiji Jesucristo ni nduu ya tēe. Te tēe tu cájejnūhún súcuan, cácuu de tēe stáhú, te cácuu de contra siquī Cristo.

⁸ Coto ní jēē ma snáa ni táhū siquī jniñu váha ni casáha ní, chí sa suhva jeē na níhín ni ndihí tahū ní.

⁹ Núu ndé ñáyuu jniñi inga jnūhun, te tu quéndōo i jín jnūhun ni steén Cristo, núu súcuan te tu iyó Yaā Dios jín i. Te ñáyuu quéndōo jín jnūhun ni steén Cristo, chí iyó Tatá yō jín i, te suni iyó Séhe ya jín i.

¹⁰ Te núu jinū ñin ñáyuu vehe ní, te núu tu quijnáhan jnūhun steén i jín jnūhun yáha, te ma cuáha ní jnūhun condee i vehe ní, ni ma cahán ni jnūhun ndeyí ní jín i.

¹¹ Chí ñáyuu cahán jnūhun ndeyí ní jín i, chíndéé ñájnáhan jín i siquī jniñu néé casáha i.

Jnūhun sandihí

¹² Iyó cuehē gā jnūhun cahán na jín ní jijnáhan ní, te tu cúni na tee ná núu tútu jín tinta. Chí ñūhun ni na cuájeē ná coto jnáhan yó, te ndajnūhun yó, náváha cusī ndasí ní yō.

CARTA UNI JEE NI TEE SAN JUAN APOSTOL

Jeē jejnūhún de tēe nání Gayo

¹ Maaá rí cúu tēe jēhnu ndíso jniñu, te tēe rí carta yáha cuájeē nuū rō, amigo Gayo, chí manī rí jín rō sáha jnūhun ndaā.

² Nání mání, jícán tahú rí jeē vāha na quihín taca jniñu sáha ró, jíin jéé na cóo vāha ró, nájñuhun iyó vāha ánuá rō jíin jñuhun ya.

³ Yōhyo ni cusī ni rí ná ni quecoo sava hermano te ni cacastūhún de nuū rí ndese vāha squícu ró táca jniñu ndaā, chí jíca ndaā rō.

⁴ Tuá na inga sáha jeē cúsiḡ gā ni rí, chí mání jeē nihún rí jñuhun jeē cájica ndaā ñayuu cácuu nájñuhun sēhe rí siquī jeē ni scándíje rí i.

⁵ Nání mání, yōhyo vāha sáha ró jéé chindéé ñáhán ró taca hermano, te víhyá gā núu tēe ñuu jíca cácuu de.

⁶ Chí tēe un ní canacani de jñuhun nuū ñayuu cácadíje yāhá, ndese cúndáhú ni rō de. Te jícan rí jeē chindéé ñáhán gá rō de, núu na vé jíni ñūhún de jeē caca ga de ichi nuū quihín de, nájñuhun núnjahan ni Yaā Dios.

⁷ Chí tēe un ní quendaco de cájica de siquī jniñu Jesucristo. Te tú na vé cáquihin de nuū ñayuu jeē tu jíni jñuhun Yaā Dios.

⁸ Jeē yúcuan cánuú coto yó de, chindéé ñáhán yó de jeē canacani de jñuhun ndaā.

Siquī jeē tú vāha sáha Diótfes

⁹ Je ni tee rí ñin carta nuū ñayuu cácadíje jíñā. Te Diótfes, tu jétáhú de jñuhun cáhán rí, siquī jeē cuní de cujéhnu maa de nuū i.

¹⁰ Jeē yúcuan, núu na jéé rí te cahān rí nuū de siquī jniñu sáha de, chí yōhyo sájnūhún de te cáhán de jñuhun stáhú siquī rí jíjnahan rí. Te nasūu maa yúcuan-ni sáha de, chí suni tu jétáhú de taca hermano jéngoo nuū de, te jési de jeē ma cuatáhú ñayuu nuū taca hermano un. Te ñayuu cájetáhú nuū hermano un, quénehen de i nuū cándutútú ñayuu cácadíje.

¹¹ Nání mání, ma ndácu ró ñayuu casáha jniñu néé, chí sa suhva ñayuu casáha jniñu vāha. Chí sēhe Yaā Dios cácuu ñayuu casáha jniñu vāha. Te ñayuu casáha jniñu néé, tu cájini i ndese Yaā cúu Yaā Dios.

Jeē cácahān i jeē vāha sáha Demetrio

¹² Táca ñayuu chí cácahān i jeē vāha sáha Demetrio. Te jniñu ndaā jeē sáha de, stéén jeē tēe ndaā cúu de. Te suni súcuan cácahān maa rí, te cájini rō jeē iyó ndaā jñuhun cáhán rí.

Jñuhun sandíhí

¹³ Iyó cuéhē gā jñuhun cahān rí jíin ró, te tu cuní rí tee rí jíin tinta jíin pluma.

¹⁴ Chí ñūhún ni rí cuajeē yachī rí coto jñahan yó, te ndajnūhún yó.

¹⁵ Te ñūhún ni rí jeē na cóo ndeyí coo sī ni rō. Taca amigo yō yāha cácahān i jeē sándeyí ni rō. Te suni cahān rō jíin ñin ñin amigo jíñā jeē sándeyí ni i, áchí rí, te cocahān yō.

CARTA JEE NI TEE SAN JUDAS APOSTOL NUU ÑAYUU CACANDIJE

¹ Máá rí cúu Judas ñani Jacobo, te mozo Jesucristo cúu rí. Te tée rí carta yáha cuájeé nuú rohó ñáyyu jeé ní cana máá Tátá yō Yaā Dios, te ní sáha ya jeé iyó ndoo íyó íi rō nuú yā jeé cácuu rō ñáyyu maní yā jíin. Te Jesucristo ndíto vāha ya rohó jée cáyihí rō ndaha ya.

² Te ññuhun ní rī jeé na cúndáhú gá ní yā rohó, te sáha ya jeé coo ndeyí coo sī ní rō, te coo maní ndasí yā jíin rō, te na ndúcuehé gā táca jée yáha núu rō.

*Siquí tēe cástéén jñuhun stáhú
(2 Pedro 2.1-17)*

³ Nání maní, yōhyo ní cuu ní rī tee rí nuú rō siquí jñuhun ní jnama ya rohó jíin rúhū jijnáhan yó. Te ní jini rī jeé cánuú gá tee rí carta jeé stihví ní rī rohó návāha nducú ndeyí rō jeé ma cási ñayuu nuú jñuhun cácañdije yó. Te jñuhun ún chí je ní jēhe ya ñin jíin-ni nuú táca ñayuu maá yā.

⁴ Chí sava tēe ní castáhú de rōhó ní quivicoo de mēhñu rō. Te tēe ún chí nde jenahán je cáhán tutu íi jeé jahnú ndetū de siquí jñiñu cásaá de. Cácuu de tēe ndevāha, chí cacahān de jeé vāha ní Yaā Dios, te jeé yúcuau vetū-ni sáha de jñiñu néé, cacahān de. Te tu cájejnúhún ndije de Jitoho yō Jesucristo jíin Yaā Dios, jeé mañúhún-ni ya cujéhnu nuú yō.

⁵ Te vijna chí vēsú je cájini vāha rō, te cúní rī jeé na núcúhún ní rō ndese ní sáha máá Jitoho yō. Chí ní jnama ya ñayuu Israel jenahán, ní chindéé ñajnáhan ya i jeé ní jinu i ñi ñuu tatú Egipto cuahān i. Te vēsú súcuau te cuéé gá te ní snáá yā sava i jeé tu ní cácañdije i.

⁶ Te suni nucúhún ní rō siquí ndajéhé yā jeé ní castóo jñiñu ndíso, te ní castóo nuú ní ndeé andiví. Te Yaā Dios ní chindihyū yā jijnáhan, te cándetu nde quíji quiví cáhnu jeé sándaá yā jñiñu. Te cánuhñí jíin cadena, cáyúcu ñí cáni nuú cunú núu néé.

⁷ Te suni ní stóho ya ñayuu ñuu Sodoma jíin ñuu Gomorra jíin sava gá ñuu jeé ní iyo yajni, chí suni ní casáha néé i nájñuhun ní casáha táca ndajéhé un ndé jenahán gá. Te máá i ní cajica jnéni i te ní casáha i táca cuéchi néé ndasí. Te ní canihín i castigo ñuhún jeé cayú ní cáni, te súcuau cúu i ñin ejemplo nuú ndíhi ñayuu.

⁸ Te tēe cástáhú jeé ní quivicoo mēhñu rō, vēsú cájini de jeé súcuau ní sáha ya, te cájeni cáhá ní de, te casáha jnéhén de yíqui cúñu de, te cásqúehichí ní de tēe cándacu jñiñu

Jitoho yō, te cacahān ndevāha de siquí táca jée cácujeñnu nuú sucún.

⁹ Te nasūu súcuau ní sáha ndajéhé Miguel, vēsú ndajéhé cujéhnu ga cúu ya. Chí tu ní cáhán ndevāha ya ní tu ní ndácunehen ya cuéchi siquí jexeén ná ní casásáhan jnáhan ya jíin jéxeén un jeé siquí yíqui cúñu Moisés ná ní jihí de. Chí suhva-ni ní cahān yā: Máá Yaā Dios, Yaā cúu Jitoho, cuxeén yā nuú rō, ní achi Miguel.

¹⁰ Te tēe cástáhú yáha chí cacahān neé de siquí táca jée tu cájecúhún ní de. Te táca modo cánevāha de siquí jeé sá cáa de, nájñuhun quiti yúcu jée sá cáa ti, suu yúcuau sáha jeé jahnú ndetū de.

¹¹ Nacā xeén ndoho de núu súcuau, chí tu cájetáhú de Yaā Dios, nájñuhun jeé tu ní jétáhú Caín. Te siquí jeé cácuu de níhín de xúhún te cástéén de jñuhun stáhú, nájñuhun ní sáha Balaam. Te jahnú ndetū de nájñuhun Coré, tēe ní jihí siquí jeé ní cunihni ní de.

¹² Tēe yáha núu cándutútú de jíin rō jeé cáyeji maní rō, te casáha de jñiñu cúcanu rō. Chí cáyeji cájijhi sī ní de, te tu casáha de cuenta ndese caji inga ñayuu, chí maní máá de ndhví ní de caji vāha de. Te cácuu de nájñuhun vicō íchi jée stéchí táchí. Te suni cácuu de nájñuhun yujnu jeé tu jēhe ndehé maá tiempo. Te cácuu de nájñuhun yujnu jeé ní quenda nde jíin yoho, te tú cuiti gā na modo nane numa.

¹³ Te nájñuhun jeé jisó cóyo ndute mar te cáne tiñú, súcuau jícu de jíin jñiñu néé jée cúu jñuhun canu. Te cácuu de nájñuhun quími jeé ní sana ichi. Te je iyó túhva nuú néé nuú lúchi jnúú coyúcu de ní cáni.

¹⁴ Te jeé ní yáha íñu yucún Adán, te ní cacu Enoc, te ní nacani de jñuhun jeé ní stéén Yaā Dios nuú de siquí táca tēe yáha, áchí de: Máá Jitoho yō ní steén yā nuú rī jeé ñin quiví te quíji ya jíin cuéhē míl ñayuu maá yā.

¹⁵ Te sándaá yā jñiñu táca ñayuu, te snáhnú ndetū yā táca ñayuu casáha néé. Chí maní jñiñu néé casáha i siquí jeé canéé máá i, te cacahān i cuéhé jñuhun ndevāha siquí yā. Ní achi Enoc.

¹⁶ Táca tēe yáha maní cacahān sōó de, te cacahān de siquí ñayuu. Te maní jeé cúsi ní maá de cánducu de. Te cacahān de jeé tēe téyí cácuu de, te cacahān yíñuhún de jíin ñayuu návāha níhín de jecu nuú i.

Jeé stihví ní Judas ñayuu cácañdije

¹⁷ Te máá rō jijnáhan rō ñání maní, na nucúhún ní rō jñuhun jeé jé ní canacani tēe cácuu apóstol maá Jitoho yō Jesucristo.

¹⁸ Chí ní cacahān de: Nde nuú cuándihí quiví te quíjicoo tēe scátā siquí jñuhun ndaá yā, te sáha de táca jñiñu néé jée ndíyo ní maá de. Súcuau ní cacastúhún apóstol.

¹⁹ Tēe un cúu jeē casásin ñayuu. Te máni cándihví ni de tãca jéē cutíndí ni maá de, chi tu ndéé Espíritu yā jíin de.

²⁰ Te máá ró ñání máni, na tje vāha ni rō jíin jnúhun ndoo ndasí jéē cáandíje ró. Te cacān tahú rō jíin fuerza Espíritu Santo.

²¹ Te quendōo nīhin ró jíin jnúhun jeē cundáhú ni Yaā Dios rohó. Te condetu ró quívi jeē cótecu rō níí cáni sáha máá Jítoho yō Jesucristo siquí jeē cundáhú ni yā rohó.

²² Te sava ñayuu jeē cájeni siquí ni, nducú ró modo scandíje ró i.

²³ Te sava ga i chi nducú ndéyí ró jeē cácu i nuū cuéchi i, jeē nájnūhun stāa ró i nuū ñuhún. Te cundáhú ni rō i jnama ró i, te coto ró máá ró, te cuquini ni rō coto ró nde sahma i jeē ní cujnéhén jíin jniñu néé casáha i.

Jnúhun cújéhnu Yaā Dios níí cáni

²⁴ Te Yaā Dios chi máñuhún-ni máá yá cúu Yaā ndichí, Yaā jnama yóhó. Te íyó poder yā jeē coto ya rohó jéē ma quívi ró cuéchi, jíin jéē sáha ya jeē cuíñi ró núū ndíndēe yá, te quívi ún coo ndoo ró núū yā, te cusí ndasí ni rō sáha ya.

²⁵ Te na cáhán yō jeē yóhoyo luu cújéhnu ya siquí jeē ni sáha ya jíin Jítoho yō Jesucristo. Te na cáhán yō jeē cújéhnu téyí yá, te ndácu ya jniñu jíin poder jeē ndíso ya nde jenhán ndasí jíin ndé vijna jíin ndé níí cáni. Súcuan na cóo. Amén.

JNIÑU QUIJI JEE NI JITO NDIJIN SAN JUAN

Jeē ni stéén Jesucristo tãcã jniñu quiji

¹ Jñuhun yáha cúu jeē ní cachi Yaā Dios nuū Jesucristo ndese coo tãcã jniñu quiji, návãha nacastũhun yá nuū ñayuu cácanđije jeē cácuu i mozo yã. Te stéén yã nuū i tãcã jniñu jeē yachĩ coo. Te ni taji yá ndajéhé yã ni quiji ya ni stéén ndijin yã jniñu un núu ruhũ Juan jeē cúu ri mozo yã.

² Te máá rí cástũhun ndãã rí siquĩ tãca jéē ní jito ri ún, te nacani ndaã rí jñuhun Yaā Dios jín jñuhun jeē ní cahãn ndaã Jesucristo.

³ Yõhyo ndetũ ñayuu cahu tutu yáha, te suni yõhyo ndetũ ñayuu cuni nahín jeē cáhu ñayuu tãca jñuhun yáha jeē ní cachi Yaā Dios, te chuhun ni i. Chi je cuacuyajni quivĩ coo tãcã jniñu yósó núu tútu yáha.

Jeē téé Juan carta nuū ndihúxá grupo ñayuu cácanđije

⁴ Máá rí cúu Juan, te téé ri jñuhun yáha cuájee nuū rohó, ndihúxá grupo ñayuu cácanđije jeē cáyũcu Asia. Te ñuhun ni rí jeē maá Yaā Dios na sáha ga yã jeē váha rohó jijnáhan ró, te sáha ya jeē coo ndeyĩ coo sĩr ni ró. Chi máá yá cúu Yaā iyó vjna, te ni iyo ya ní cáni, te coo ya ní cáni. Te ñuhun ni rí jeē suni súcuan sáha ndihúxá Espĩritu jeē cáhiin ya yuhu mesa nuū ndácu Yaā Dios jniñu.

⁵ Te ñuhun ni rí jeē suni súcuan sáha Jesucristo, Yaā cahán ndaã tãca jñuhun. Te xihna gã maá yá ni natecu mēhũ ndiyi. Te cújehnu ya nuū tãca rey jeē iyó ñayivĩ. Te máá yá cúndáhú ni yã yohó, te ni nacate ya yohó núu cuéchi yó jín níñi yã.

⁶ Te ni sáha ya jeē ní nduu yó rey jín sútũ cácejniñu nuū Tatá yã Yaā Dios. Te na cáhãn yó jeē yóhyo luu cújehnu ya te jnã ya poder ní cáni. Amén.

⁷ Cuni sõho jijnáhan ró, chi ndiji Cristo jín vicõ. Te ndiviĩ ñayuu coto i nuū yã, te nde jín ñayuu jeē ní castújĩ i ya. Te tãca raza ñayuu ní cáhnu ñayivĩ ndahyũ i jeē tu ní cácanđije i ya. Súcuan nahín coo.

⁸ Suhva cáhãn máá Jítóho yõ, Yaā jnã ndihĩ poder: Máá rí cúu nãjnũhun letra A xihna ñũhũn jín letra Z jeē sãndihĩ na, chi máá rí ní sqejeé ndhi te máá rí sũnu, áchĩ máá Yaā iyó vjna, te ni iyo ya ní cáni, te coo ya ní cáni.

Jeē ní jito Juan jeē cújehnu luu Cristo

⁹ Máá rí cúu hermano rõ jñuhun jín ró siquĩ jeē cácanđije yó Jesucristo, te inuú-ni ndácu Yaā Dios jniñu nuū yõ, te inuú-ni jendeyĩ ni yõ sáha Jesucristo. Te siquĩ jeē ní nacani rí jñuhun Yaā Dios jín jéē ní cachi ndaã rí jñuhun Jesucristo, jeē yúcuan ní cajni i ruhũ

cuenta preso, te ni cachune i ruhũ isla jeē nani Patmos.

¹⁰ Te in domingo ni jito ndijin rí jeē ní stéén maá Espĩritu Santo nuū rí. Te ni jini sõho ri in jeē cána jee nihin ichi yátã rí nãjnũhun jeē tivĩ trompeta.

¹¹ Te ni cahãn jín rí:

Máá rí cúu nãjnũhun letra A xihna ñũhũn jín letra Z jeē sãndihĩ na, chi máá rí cúu Yaā iyó ndé xihna ñũhũn te coo ri ní cáni. Te na téé ró núu in tutu tãca jéé cóto ró, te taji ró quihũ nuū ndihúxá grupo ñayuu cácanđije jeē cáyũcu i ní cáhnu Asia, suu ini ñuu Efeso, jín ñuu Esmirna, Pérgamo, Tiatira, Sardis, Filadelfia, jín Laodicea. Achĩ.

¹² Yũcuán na te ni ndicó cóto ri jeē cóto ri ndé in cúu jeē cahãn jín rí. Te ná ni ndicó cóto ri te ni jito ri uxã candelero oro.

¹³ Te mēhñũ ndihúxá candelero un índichi maá Yaā ní nduu téé. Te ñũhũn ya in sahna cáni jeē jinũ nde nuū jehé yã. Te núhni in cinturõn oro jicã yã.

¹⁴ Te ixĩ xínĩ yã chi yaa nãjnũhun ixĩ lãnchi, nãjnũhun yuhvã volcã. Te tinũ ya ndindé nãjnũhun yãñuhũn.

¹⁵ Te jehé yã xihũ jito nãjnũhun cãa cuaán jéē ni ndúhvã nuū horno. Te nihin ndasĩ cáhãn yã, nãjnũhun nihin cuehẽ yũte náhnu.

¹⁶ Te ndaváha ya jnã ya uxã quĩmi. Te yuhu ya quẽnda jeē cãa nãjnũhun espada jeē xeén ndindúũ lado, te suu cúu jñuhun ya jeē ninĩ sãndaã yã siquĩ cuéchi. Te nuū yã cãa nãjnũhun niãndii jeē nãndii ndaxín.

¹⁷ Te ná ni jito ri yã te ni cotúũ rí nuū jehé yã nãjnũhun jeē ní jihĩ rí. Te ni soó yã ndaváha ya siquĩ rí, te ní cahãn yã:

Ma yũhu ró. Máá rí cúu Yaā iyó ndé xihna ñũhũn te coo ri ní cáni.

¹⁸ Te Yaā técu cúu ri. Chi ni jihĩ rí te ni natecu rí, te vjna chi técu rí ní cáni. Te máá rí jnã poder siquĩ cuéhỹ jéhni ñayuu jín siquĩ lugar nuū cáyũcu ánuã ndiyi.

¹⁹ Núu súcuan te tee ró núu tútu tãca jéē ní jito ró, jeē cúu vjna jín jéé cóo ichi núu.

²⁰ Te yáha cúu jñuhun sãhi siquĩ ndihúxá quĩmi ní jito ró jnã ndaváha rí, jín siquĩ ndihúxá candelero oro. Ndhúxá quĩmi ún cúu nãjnũhun ndihúxá jeē cácujeñnu nuū ndihúxá grupo ñayuu cácanđije. Te ndihúxá candelero cúu nãjnũhun ndihúxá grupo ñayuu cácanđije.

Jñuhun cuahãn nuū ndihúxá grupo ñayuu cacandije:

Jñuhun cuahãn ñuu Efeso

2

¹ Tee ró jñuhun yáha na quihĩn nuū jeē cújehnu nuū ñayuu cácanđije ñuu Efeso: Súcuan cáhãn ruhũ, Yaā jeē jnã ndihúxá quĩmi jín ndaváha ri, te jicã cuu ri mēhñũ ndihúxá candelero oro.

² Je jíni rí táca jniñu váha cásáha ró, jeé cándihví ni ró siquí jnúhun ri, jíin jeé cájendeyí ni ró. Te jíni rí jeé tu cájêhe ró jnúhun quívicoo ñayuu casáha neé méhñu ró. Te jíni rí jeé ní cajito ndee ró tée cástáhú jeé cácahān de jeé cúu de apóstol, te ni cajini ró jeé tée stáhú cácuu de.

³ Te ni cajendeyí ni ró ni candoho ró jnúndóho, te tu ní ndínuu ni ró jeé cácuu ndasí ró jíin jniñu ri.

⁴ Te vésú súcuan te iyó jecu jeé cahán rí nuú ró, chí tuá cáhíyo maní váha ró jíin rí nájñuhun ni iyo maní ró jíin rí quíiví jehé.

⁵ Núu súcuan te nucúhun ni ró ndese ni castóo ró jnúhun jeé ni iyo maní ró jíin rí, te nacani ni ró, te na sáha ró nájñuhun ni casáha ró ndé quíiví ún. Te núu ma nácani ni ró, te yachí jeé rí te stáa rí candelero ró nuú íin, cúu jeé ma cuíñi ga ró jíin ñayuu cácañdije.

⁶ Te vésú súcuan te iyó íin jeé váha cásáha ró, chí tu cánujnahan cuíti ni ró cájito ró jniñu neé cásáha ñayuu cándiquín jnúhun jeé steén Nicolás. Te suni máa rí tu újnahan cuíti ni rí jito ri.

⁷ Ñayuu iyó sóho na chúsóhó i jeé cahán maá Espíritu Santo jíin táca grupo ñayuu cácañdije. Táca ñayuu jeé cúndeyí síquí jeneé, cuáha ri jnúhun caji i ndehé jeé cúun xiní yújnu jeé sáha jeé cótecu i ní cáni. Te yujnu un íin nuú jardín Yaā Dios nde andíiví, áchí yá.

Jnúhun cuahān ñuu Esmirna

⁸ Te tee ró jnúhun yáha na quíhín nuú jeé cujéhnu nuú ñayuu cácañdije ñuu Esmirna: Súcuan cáhān ruhū, Yaā jeé iyó ndé xíhna ñúhún te coo ri ní cáni, te ni jihí rí te ni natecu rí.

⁹ Je jíni rí táca jniñu váha cásáha ró, jíin jnúndóho cándoho ró, jíin jeé cándoho ndáhú ró. Te vésú súcuan te cucá ró ndihí jeé ndáiso jnúhun ri. Te jíni rí jeé cácahān neé ñayuu siquí ró jijnáhan ró. Ñayuu un cácahān i jeé ñayuu hebreo, ñayuu maá Yaā Dios cácuu i, te tuú chí cástáhú-ní i, chí sa ñayuu yíhi ndaha Satanás cácuu i.

¹⁰ Te ma yuhú cuíti ró táca jéē ndoho ró. Chí jexeén je yajni sáha jeé quívicoo sava ró vecāa jeé cóto ndee rohó jijnáhan ró, te ndoho ró jnúndóho uxí quíiví. Te na cuíñi ñihin ró ndé cuu ró, te cuáha ri premio jeé cótecu ró ní cáni.

¹¹ Ñayuu iyó sóho na chúsóhó i jeé cahán maá Espíritu Santo jíin táca grupo ñayuu cácañdije. Táca ñayuu jeé cúndeyí síquí jeneé, ma nihín i jnúndóho jeé jnahnú ndetú i cuu i vuelta uú, achí yá.

Jnúhun cuahān ñuu Pérgamo

¹² Te tee ró jnúhun yáha na quíhín nuú jeé cujéhnu nuú ñayuu cácañdije ñuu Pérgamo: Súcuan cáhān ruhū, Yaā jeé néváha espada

jeé xeén ndindúú lado, te suu cúu jnúhun ri jeé sándaā rí siquí cuéchi.

¹³ Je jíni rí táca jniñu váha cásáha ró, te jíni rí jeé cáyūcu ró méhñu ñayuu jeé ndácu Satanás jniñu nuú. Te vésú súcuan te cáhíin ñihin ró jíin jnúhun ri, te tu ní cányūhu ró jeé cácañdije ró rúhū, ni quíiví ni jihí Antipas, tée ni squícu váha ni nacani ndaā jnúhun ri. Chí ñuu ró cáyūcu ñayuu cácejniñu nuú Satanás, te ni cajehni i Antipas.

¹⁴ Te vésú súcuan te iyó jecu jeé cahán rí nuú ró jijnáhan ró. Chí méhñu róhó ñayuu ñuu Pérgamo iyó sava ñayuu cándiquín jnúhun ni steén Balaam. Chí tée un ní steén de nuú Balac ndese squíiví de ñayuu Israel cuéchi jeé cáji i jeé ní sócō nuú ídolo jíin jeé cosíquí ndéē jnáhan i.

¹⁵ Te suni iyó sava ñayuu méhñu ró jeé cácañdije ga i jnúhun ni steén Nicolás, te jnúhun ún chí tu nájñahan cuíti ni rí.

¹⁶ Núu súcuan te nacani ni ró siquí cuéchi ró. Chí núu tuú te yachí jeé rí jíin espada jeé quénda yuhu ri, te suu cúu jnúhun ri jeé sándaā rí siquí cuéchi. Te jíin yúcuu te stóho rí ñayuu jeé cañdije ga jnúhun neé un.

¹⁷ Ñayuu iyó sóho na chúsóhó i jnúhun jeé cahán maá Espíritu Santo jíin táca grupo ñayuu cácañdije. Táca ñayuu jeé cúndeyí síquí jeneé, scáji ri i maná jeé yísáhi ichi andíiví. Te suni cuáha ri ñin yuú cuíjín núu i, te nuú ún condee ñin síhví jéé, te ni ñin ñayuu ma cúní síhví un, chí máa-ni i jeé nihín. Achí yá.

Jnúhun cuahān ñuu Tiatira

¹⁸ Te tee ró jnúhun yáha na quíhín nuú jeé cujéhnu nuú ñayuu cácañdije ñuu Tiatira: Súcuan cáhān ruhū, maá Séhe Yaā Dios jeé ndíndee tíñuu rí nájñuhun yáñuhún. Te jehé rí xíñú jito nájñuhun cāa cuaán jéē ní ndúhvā.

¹⁹ Je jíni rí táca jniñu váha cásáha ró, chí cácañdáhú ní ró jnáhan ró, te cácañdije ñihin ró rúhū, te cácejniñu ró núu rí, te cájendeyí ni ró. Te jíni rí jeé vihyá gā cásáha ró vijna vésú nde quíiví jehé.

²⁰ Te vésú súcuan te iyó jecu jeé cahán rí nuú ró. Chí iyó íin ñahan méhñu ró jéē naní Jezabel, te cájêhe ró jnúhun steén ña nuú ró. Te áchí ña jeé nácani ña jnúhun Yaā Dios. Te tuú chí jíin jnúhun steén ña te stáhú ña ñayuu cácañdije jeé cácuu i mozo rí. Te sáha ña jeé casíquí ndéē jnáhan i, jíin jéē cáyeji i jeé ní sócō nuú ídolo.

²¹ Te ni jêhe ri tiempo jeé na nácani ni ña, te tu cúní ña nacani ní ña stóo ña jeé casíquí ndéē ña.

²² Núu súcuan te na sáha ri jeé jécāva ña jíin cuéhyí. Te táca ñayuu casíquí ndéē jíin ña, suni cuáha ri jnúndóho xeén nuú i, te núu ma nácani ni i stóo i jniñu neé nájñuhun sáha ña.

²³ Te sáha ri jeé cúu ñayuu jeé ní scáñdije ña. Te súcuan cuni táca grupo ñayuu cácañdije jeé máa rí cúu Yaā jíni ndihí ndese cāa jeé

nínjūnī jīn ánuá ñayuu. Te cuāha ri yāhu iin iin ró núu ndese ni casáha ró.

²⁴ Te sava ga rō jeē cáyūcū ñuu Tiatira, jeē tu ní cájētáhú jñūhun stéén ñahan ún, ní tu ní cájñi rō jñūhun jeē cācāhān i jeē jñūhun sāhi gá Satanás cúu, jīn máá ró cahān rī jeē ma tée ga rī inga jñiñu siquī rō.

²⁵ Chi máá-ni jeē na quéndōo nihin ró jīn jñūhun ndaa cācandije ró, te quéndōo nihin ró jīn ndé quivī ndiji ri.

²⁶ Tāca ñayuu jeē cūndeyí siquī jeneé, jīn jeē squícu vāha jñiñu cūni rī nde vijna te nde quivī sándihí, sāha ri jeē cujéhu i ndacu i jñiñu nuū tācá naciún,

²⁷ nájñūhun ni sāha Tátá rī jeē cujéhu ri ndácu ri jñiñu. Te ndacu nihin i jñiñu nuū tācá naciún. Te nájñūhun cúun yúu i quisi tahú, sūcuan squéhichí i ñayuu tu cājendetū nuū rī.

²⁸ Te sāha ri jeē coto i ruhū jeē luu cujéhu ri quenda ndijin rī, nájñūhun jito i lucero jeē cáne cūndijin.

²⁹ Ñayuu iyó sóho na chúsóhó i jñūhun jeē cahān maá Espiritu Santo jīn tāca grupo ñayuu cācandije. Achí yá.

Jñūhun cuahān ñuu Sardis

3

¹ Te tee ró jñūhun yáha na quihín nuū jeē cujéhu nuū ñayuu cācandije ñuu Sardis: Sūcuan cāhān ruhū, maá Yāa jeē névāha ndihúxá Espiritu Yāa Dios jīn ndihúxá quimi. Je jíní rī tācá jñiñu casáha ró, te cācāhān ñayuu jeē cátecu rō, te nuū rī chi nájñūhun ndiyi cácuu rō.

² Na nátañú ni rō, te ndejéé nihin ró jīn jñiñu jeē jecu na iyó te ndúcú naa. Chi je jíní rī jeē tu squícu vāha vāha ró nuū Yāa Dios.

³ Te na núcūhun ni rō tāca jñūhun jeē ní castéén nuū rō. Te cuatáhú ró jñūhun ún te nacani ni rō siquī cuéchi ró. Chi núu tú natañú ni rō, te cuajee rī nuū rō in sanaa-ni nájñūhun jeē in sanaa-ni te quiji ñacuñhá, te ma cūni rō na hora jinū rī nuū rō.

⁴ Te vésú sūcuan te iyó nahín jecu ró ñuu Sardis jeē tu ní casáha ró cuéchi, jeē cúu nájñūhun jeē tu ní sājnéhén ró sahma ró. Jeē yúcuán cujín yaa coo sahma ró caca ró jín rī, chi ñayuu vāha cácuu ró.

⁵ Chi tāca ñayuu jeē cūndeyí siquī jeneé, cuāha ri sahma cujín yaa cuhun i. Te ma ndáhva rī sihví i nuū libro jeē yosó shví ñayuu cotecu ní cáni. Te cuajnúhún rī i nuū Tatá rī jīn nuū tācá ndajéhé yá.

⁶ Ñayuu iyó sóho na chúsóhó i jñūhun jeē cahān maá Espiritu Santo jīn tāca grupo ñayuu cācandije. Achí yá.

Jñūhun cuahān ñuu Filadelfia

⁷ Te tee ró jñūhun yáha na quihín nuū jeē cujéhu nuū ñayuu cācandije ñuu Filadelfia: Sūcuan cāhān ruhū, Yāa ndoo Yāa ndaa, te

névāha ri ndacáa rey David. Te máá rí núne jeē quiví ñayuu nuū ndácu ri jñiñu, te ni in ma cúu casi, te máá rí jési, te ni in ma cúu nune.

⁸ Je jíní rī tācá jñiñu vāha casáha ró. Te ni nune rī nájñūhun in yéhyí quívicoo ró, te ni in ma cúu casi. Chi vésú jecu-ni fuerza ró iyó, te ni cācandije ró jñūhun rī, te tu cájesi ró yuhu ró jeē cācandije ró rúhu.

⁹ Te iyó sava ñayuu yíhi ndaha Satanás, te cācāhān i jeē ñayuu hebreo, jīn ñayuu maá Yāa Dios cácuu i, te tuú chi cástáhú-ni i. Núu sūcuan te sāha rī jeē jécóo i nuū rō te jecuiñí yití i nuū rō, te cuni i jeē maní rī jín rō.

¹⁰ Te vāha ní casquícu ró jñūhun ní cahān rī jeē cuándeyí ni rō. Te jeē yúcuán jnama ri rohó quiví jeē quiji in jñūndóho xeén siquī ñayuu ní cáhu ñayiví, jeé cóto ndee ún i jñánhan i.

¹¹ Te yachí ndiji ri. Núu sūcuan te quéndōo nihin ró jīn jñūhun cācandije ró, návāha ni in ma quénde premio rō.

¹² Tāca ñayuu jeē cūndeyí siquī jeneé, sāha ri jeē cuu i nájñūhun shihñ yuū luu ini templo Yāa Dios maá rī. Te ma cūjiyo i nuū ndee yá un. Te tee rī sihví Yāa Dios maá rī jñeé i, jín sihví jeé máá rí, jín sihví ñuu Yāa Dios maá rī. Te ñuu un cúu Jerusalén jeé, te cuun quiji ichi ándiví ndé nuū Yāa Dios maá rī.

¹³ Ñayuu iyó sóho na chúsóhó i jñūhun jeē cahān maá Espiritu Santo jīn tāca grupo ñayuu cācandije. Achí yá.

Jñūhun cuahān ñuu Laodicea

¹⁴ Te tee ró jñūhun yáha na quihín nuū jeē cujéhu nuū ñayuu cācandije ñuu Laodicea: Sūcuan cāhān ruhū, maá Yāa cúu jñūhun ndaa, Yāa cúu testigo vāha jeē cahān ndaa. Te máá rí ni sāha ndihí jeē ní cahān Yāa Dios jeē na jécóo.

¹⁵ Je jíní rī tācá jñiñu casáha ró. Te cácuu ró nájñūhun jeē tú mjín ni tú jhni, cúu jeē jecu-ni cācandije ró jñūhun rī, te ni tu cājito uhū ró ni tu cándihví ni rō siquī. Te nacá jeé vāha núu jeē mjín ró chí jeé jhni ró nuū.

¹⁶ Te tuú chí máá yivixi-ni rō, chí ni tu cājito uhū ró ni tu cándihví ni rō siquī. Te jeé yúcuán squéhichí rī rohó nájñūhun in jeé tésihí rī jeé séyūhu rī jeē tu nájñan ni rī.

¹⁷ Te cācāhān ró jeé cucá ró, te quéndōo vāha ró, te tu cúmaní ni in nuū rō. Te tu casáha ró cuenta jeé cuécá lí cándoho ró, te ndáhú ndasí ró, te cácuáá ró, te máá ñi lí rō. Te tāca jeé yáha cūni cahān jeē tu cācandije vāha ró.

¹⁸ Núu sūcuan te cahān rī jīn ró jeé nuū rī cuan ró oro jeé ni ndúhvā nuū ñuhún te ni nduu máá nene, te suu cúu jeé sāha rī jeé coo cúcá ndije ró ndihí jeé ndiso jñūhun rī. Te nuū rī cuan ró sahma cujín cuhun ró, návāha tu cucanu ró jeé máá ñi lí rō, cúu jeé quéndōo ndaa ró sāha rī. Te cuan ró

tájna nuū rī, quīvi tinūu ró, návaha ndundi-jin tinūu ró, cúu jeē jecūhun ni rō jnūhun rī.

¹⁹ Tāca ñáyuu jeē cundáhú ni rī, chí cáhán rī nuū i te stóho rī i, návaha na chúhun ni i. Núu súcuan te na cóndihvi ni rō jijnáhan rō, te nacani ni rō jeē stóo ró cuéchi ró.

²⁰ Cuni sōho, chí íin rī yehyí ánuá rō te cáhán rī. Te núu ndé-ni rōhó cuni sōho te nune ró yehyí ánuá rō, te quīvi rī caji rī staa jíin ró, te suni caji maá ró jíin rī. Te suu cúu jeē cóndee rī anuá rō.

²¹ Tāca ñáyuu jeē cundeyí síquī jeneé, cuāha rī jnūhun conene i jíin rī nuū mesa nuū ndácu rī jniñu. Chí maá rī suni ni snáa rī poder jeneé, te ni cucōo rī jíin Tátá rī nuū mesa nuū ndácu ya jniñu.

²² Ñayuu iyó sóho na chúsohó i jnūhun jeē cahán maá Espiritu Santo jíin táca grupo ñayuu cácanđje. Achí yá.

Tāca jée cáyucú andiví cáchiñúhún núu yā

4

¹ Yūcuán na te ni ndacoto rī, te ni jito rī jeē núne íin yehyí andiví, te maá Yaā jeē ni cáhán jíin rī jeē xihna ñúhún, ni cahán tucu jíin rī nájñuhun jeē tíví trompeta. Te ni cahán:

Caa quiji ró yáha, te na stéen rī nuū rō tāca jniñu jeē cóo ichi núu gā, achí yá.

² Te maá Espiritu Santo ni scóto-ni ya ruhū. Te ni jito rī jeē andiví íin íin mesa nuū ndácu jniñu, te néne maá yá nuū mesa un.

³ Te maá yá jeē néne yūcuan cáa ya nájñuhun ndíndee íin yuū quiyi ndí chí íin yuū cuehé ndí. Te íin ticō vēhnde ní jicó ndúu yuhu mesa yā, te ndíndee nájñuhun íin yuū cuí ndí.

⁴ Te xiin mesa yā ni jito rī jeē ní jicó ndúu ocō cuñ gā mesa nuū ndácu jniñu. Te nuū mesa un néne ocō cuñ tēe jéhu cándiso jniñu. Te cáñuhun de sahma cuijín yaa, te xiní de cáñuhun corona oro.

⁵ Te nde nuū mesa nuū ndácu ya jniñu ndíndee taja te nñin te cáhán taja. Te ichi núu mesa yā íin ndihúxá Espiritu Yaā Dios, jeē cáa nájñuhun uxā yiti náhnu jeē cayú ñuhūn.

⁶ Te ichi núu mesa yā ún suni íyó nájñuhun íin mar jeē jito quiyi nájñuhun vídrio.

Te xiin mesa yā un ní jicó ndúu cuñ jeē técu. Te íyó cuehé tinūu ní cáhnu ichi núu jíin ichi yátá un.

⁷ Te íin jeē técu un cáa nájñuhun ndicaha. Te inga cáa nájñuhun stiquí. Te jeē uní chí nēe nuū tēe. Te jeē cuñ chí cáa nájñuhun yaha chóco jée jicó núu tachí.

⁸ Te ndicúun jeē técu un íyó íñu ndijen jee íin íin. Te máni maá tinūu cúu ní cáhnu nde jíin ní chíjī ndijen. Te ndúu ñuū tu jécuiñi cuiti jeē cahán:

Yaā í Yaā ndoo ndasi

cúu maá Jítoho yō Yaā Dios, Yaā jnñ ndihí poder,

Yaā iyó vijna, te ni íyo yá ní cáni, te coo ya ní cáni.

Achí.

⁹ Chí máni jeē cácahān ndicúun un jée cujéhu ndasi maá Yaā jeē néne nuū mesa, Yaā jeē técu ní cáni cuiti. Te yíñúhún cácahān un jíin yá, te nácuatáhú núu yā.

¹⁰ Te táca jínu jeē casáha súcuan, te ndihóco cuñ tēe jéhu cándiso jniñu, cájecuiñi yiti de nuū Yaā jeē técu ní cáni cuiti, cáchiñúhún de ya. Te cástaa de corona de, cájequin de ichi núu jehé mesa yā. Te cácahān de:

¹¹ Jítoho ná te Yaā Dios na cúu ní.

Te vāha ndasi Yaā cúu ní jée cácahān i jeē luu cújéhu ní,

te cáhiyo yíñúhún i nuū ní, te jnñ ní ndihí poder.

Chí maá ní ni sáha ndihí jeē iyó,

te síquí jeē súcuan ni cuu ni maá ní te ni jecōo ndihí.

Achí de jíjnāhan de.

Jeé ní nune Londe Yaā Dios tutu

5

¹ Yūcuán na te ni jito rī jeē Yaā néne mesa jeē ndácu jniñu, ndaváha ya jnñ ya íin tutu cáni jeé ní tuu. Te yósó jnñuhun ndíndúu lado tutu ún, te ndihyú jíin úxá sello.

² Te ni jito rī íin ndajéhé yā jeē ndíso poder, te ni cahán jee:

¿Ndé íin cúu tēe vāha ndasi jeē cóndiso jniñu cahnde sello te nune tutu yáha? áchí ndajéhé yā.

³ Te ni andiví ni ñayiví ni jeē iyó chíjī ñayiví, tu ní íyo ní íin jeē cóndiso jniñu nune tutu ún, ni jeē cóto nuū.

⁴ Te ni ndahyū ndasi rí, chí tu ní íyo ní íin jeē cóndiso jniñu nune te cahu tutu ún, ni jeē cóto nuū.

⁵ Yūcuán na te ni cahán íin tēe jéhu un jíin rí:

Ma ndahyú rō, chí íyó íin Yaā ndíso jniñu jeē cahnde yā ndihúxá sello ndihyú tutu, te nune ya. Te maá yá chí íyó cuehé poder yā, nájñuhun jeē íyó cuehé fuerza íin ndicaha. Te ni cacu ya chíjī yucūn Judá, jeē cúu yucūn rey David. Te ni snáa yá poder táca jéneé.

⁶ Yūcuán na te ni jito rī Yaā jeē cúu Londe Yaā Dios jeē ní cajehni i te ní natecu. Te Londe un íin ya nuū íin mesa Yaā Dios, méhñú ndicúun jeē técu, jíin tēe jéhu cándiso jniñu. Te íyó úxá ndiqui jíin úxá tinūu Londe ún. Te tinūu un cúu ndihúxá Espiritu Yaā Dios jeé ní tají yá ni jengoo ní cáhnu ñayiví.

⁷ Te Londe un ní jecuiñin ya tutu jeé jniñ ndaváha Yaā jeé néne nuū mesa.

⁸ Te ná ní quihín ya tutu ún, te ndicúun jeé técu jíin ndihóco cuñ tēe jéhu cándiso jniñu, ni cajecuiñi yiti núu yā. Te ná íin ná íin tēe

jéhnun un cándaha yaa jeé naní arpa, jíin cóhō cūu oro jeé ñúhun chitú sūje cutú. Te sūje cutú un cūu máá táca jnúhun jeé cájicān tahú ñayuu yíhi ndaha Yaa Dios.

⁹ Te ni cajita de ñin yaa jeé, te suhva cáhān: Vāha ndasí Yaa cūu ní jeé quihin ní tutu te cahnde ni sello jeé ndihyú.

Chi ni cajehni i níhín, te jíin níñi ni ní nacuaan ní ñayuu

mēhñu táca raza, táca yuhu, táca ñuu, táca nación, návaha cuu i ñayuu Yaa Dios.

¹⁰ Te ni sáha ní jeé cuu i rey jíin sūtú nuú Yaa Dios,

te ndacu i jniñu ini ñayiví.

Achí de cájita de.

¹¹ Te ni jito ga rí, te ni jini sōho ri jeé cácahān cuehē ndajehé yā jeé ní cajicó ndúu xiin mesa yā, jíin xiin ndicúun jeé técu, jíin xiin tēe jéhnun cándiso jniñu. Te iyó cuehē ndasí millón ndajehé un.

¹² Te suhva ni cacahān jee ya:

Vāha ndasí Yaa cūu Londe jeé ní cajehni i.

Te jeé yúcuān jniñi ya poder, te yōhyo cúca yá, te yōhyo ndíchí yá, te ndíso ya cuehē fuerza, te cáhiyo yíñúhún ndihí nuú yā, te luu cújéhnun ya,

te cácahān i jeé váha ndasí Yaa cūu ya.

Achí.

¹³ Te suni ni jini sōho ri jeé cácahān ndihí jeé ni sáha Yaa Dios jeé iyó ini andiví jíin ini ñayiví jíin chíji ñayiví jíin ini mar. Te ndivíi un ní cacahān:

Cúsii ni yō cahān yō jeé yōhyo váha Yaa cūu máá Yaa néne mesa nuú ndácu ya jniñu,

jíin Yaa cūu Londe Yaa Dios.

Te na cóo yíñúhún yó nuú yā, chí cújéhnun luu ya,

te jniñi ya poder ní cáni cuiti.

Achí.

¹⁴ Te ni cacahān ndicúun jeé técu:

Súcuān na cóo, achí.

Te ndihóco cuñ tēe jéhnun cándiso jniñu ni cajecuiñi yití de, te ni cachíñúhún de nuú Yaa jeé técu ní cáni cuiti.

Siquí ndihúxá sello

6

¹ Yūcuān na te ni jito ri jeé Yaa cūu Londe Yaa Dios, ni jehnde yā ñin jeé uxá sello un. Te ni jini sōho ri jeé cahān ñin jnáhan ndicúun jeé técu ún, nájnūhun cahān taja:

Nehen te cuni rō.

² Te ni ndacoto ri, te ni jito ri ñin caballo cuijín. Te jeé yosó síquí tī un ndáhá ñin arco jeé stáva nduva. Te ni jecūhun ñin corona xiní. Te ni quenda ni jejnáhan, te ni cundeyí síquí ndihí.

³ Yūcuān na te Londe un ní jehnde yā sello uú. Te ni jini sōho ri jeé cahān inga jnáhan ndicúun jeé técu:

Nehen te cuni rō.

⁴ Te ni quenda ñin caballo cuehé, te jeé yosó síquí tī ndíso jniñu jeé snáa jnúhun cáyūcu máni ñayuu ñayiví, te quejeé i cahni jnáhan i. Te ni nihín ún ñin espada cáhnu.

⁵ Yūcuān na te Londe un ní jehnde yā sello uní. Te ni jini sōho ri jeé cahān inga jnáhan ndicúun jeé técu:

Nehen te cuni rō.

Te ni ndacoto ri, te ni jito ri ñin caballo jnuú. Te jeé yosó síquí tī ndáhá ñin balanza jeé chícuāha, chí coo jnamā xeén.

⁶ Te mēhñú ndicúun jeé técu un ní jini sōho ri ñin jeé cahān:

Máa ñin kilo-ni trigo nihín i jíin yáhu i jeé sájniñu i ñin quiví. Te núu cebada, te uní-ni kilo nihín i jíin yáhu i jeé sájniñu i ñin quiví. Te acíte jíin vino chí ma sáha ró jeé cúmani. Achí.

⁷ Yūcuān na te Londe un ní jehnde yā sello cuñ. Te ni jini sōho ri jeé cahān tucu inga jnáhan ndicúun jeé técu:

Nehen te cuni rō.

⁸ Te ni ndacoto ri, te ni jito ri ñin caballo cuaán yaa, te jeé yosó síquí tī cūu máa cuehyí jéhní ñayuu. Te ichi yátá un ndiquín máa jnúhun jeé quiví ñayuu lugar nuú cáyūcu ánuá ndiyí. Te ndindúu un cándiso jniñu jeé ndóna síquí ñin jeé ndicúun parte ñayiví, te cuu sáha jeé cūu ñayuu jíin guerra, jíin jnamá, jíin cuehyí xeén, jíin táca quiti xeén jeé iyó ñayiví.

⁹ Yūcuān na te Londe un ní jehnde yā sello uhún. Te chíji altar cáhnu ni jito ri anuá ñayuu jeé ní cacandíje jnúhun Yaa Dios te ni canacani ndaá i jnúhun ya, te síquí yūcuān ní cajehni ñayuu i.

¹⁰ Te ni cacana jee ánuá un:

Jitoho ná Yaa Dios, maá ní cūu Yaa ndoo te váha síquí ní jéé ní jéjnūhun ní. ¿Te nasaa ga tiempo coo te sándaá ní jéhe ná, te nacuaáha ní jéé ndútahú ñayuu ñayiví jéé ní cajehni sáñá? achí.

¹¹ Yūcuān na te ni jēhe ya sahma cuijín cūhun i jijnáhan i, te ni cahān yā jíin i jeé na ndétátú i jecu gā tiempo. Chí iyó gá hermano i jeé cájejniñu nuú yā, jeé suni jini ñúhún cuu i návaha jinu número i, achí yá.

¹² Yūcuān na te Londe un ní jehnde yā sello iñú. Te ni jito ri jeé ni jnáa ndasí. Te ni cujntúú níandii nájnūhun ñin sahma jnúú. Te ní yóo ní nduu nájnūhun níñi.

¹³ Te quimi andiví ní ñingoyo nuú ñúhun nájnūhun ñingoyo ndehē yíhi yujnu higo sáha tachí níhín.

¹⁴ Te andiví ní cuijiyo cuahān nájnūhun jeé nátuu ñin tutu cáhnu. Te táca yucu jíin táca isla ni cuijiyo cuango inga lado.

¹⁵ Te táca rey ñayiví, jíin jéé cácujehnun, jíin jéé cucá, jíin táca capitán, jíin jéé cándiso poder, jíin mozo jeé ní cajeen ñayuu, jíin tēe

cásajniñu cuenta maá, ní cachisáhi maá ini yaú cava jíin méñhu cava chji yucu.

¹⁶ Te ni cacahān i jíin yucu jíin cava:

Ndicó cáva siquí rí, na quísáhi rí návaha tú coto maá Yaā néne mesa ndácu jniñu, jíin Yaā cúu Londe jeé cuáha ya castigo xeñ ruhū.

¹⁷ Chi ní quee maá quívi cáhnu jeé cuáha ya castigo, ¿te ndé ñin canda condichi nuū yā? achí i jíināhan i.

Ñayuu tāca yúcūn Israel jeē ní jécondee sello jneē

7

¹ Te ná ni cuu jniñu yáha, te ni jito ri cuñ ndajéhe yá jeé cáhiin ndicúun lado ñayívi. Te cájesi yá nuū ndicúun tachí, návaha ma quee nuū ñuhun ni nuū mar ni nuū ní ñin yujnu.

² Te suni ni jito ri inga ndajéhe yā, vēji ichi nuū cáne niāndii. Te ndáhá yá sello Yaā Dios, Yaā técu. Te ni cahān jee ya jíin ndicúun ndajéhe un jéé ndiso jniñu jeé sáha ñaño nuū ñuhun ichi jíin nuū mar:

³ Ma sáha ró ñaño nuū ñuhun ni nuū táca yujnu ni nuū mar, chi nde na téé yó sello jneē táca ñayuu cájejniñu nuū Yaā Dios yó.

⁴ Te ni jini sōho ri jeé achí jéé iyó ciento uū xico cuñ mil ñayuu jeé ní jécondee sello jneē. Te ñayuu un cácuu táca yúcūn ñayuu Israel.

⁵ Te iyó úxi uū mil ñayuu cácuu yucūn Judá jeé ní jécondee sello, jíin úxi uū mil yucūn Rubén, jíin úxi uū mil yucūn Gad,

⁶ jíin úxi uū mil yucūn Aser, jíin úxi uū mil yucūn Neftalí, jíin úxi uū mil yucūn Manasés,

⁷ jíin úxi uū mil yucūn Simeón, jíin úxi uū mil yucūn Leví, jíin úxi uū mil yucūn Isacar,

⁸ jíin úxi uū mil yucūn Zabulón, jíin úxi uū mil yucūn José, jíin úxi uū mil yucūn Benjamín. Ndihi yucūn yáha cúu jeé ní jécondee sello.

Ñayuu cuehē jeé cáñuhun sahma cuijín

⁹ Te ná ni cuu jniñu yáha te ni ndacoto ri, te ni jito ri cuehē ndasí ñayuu. Te cúu i ñayuu táca nación jíin táca raza jíin táca yuhu jíin táca ñuu. Te cáhiin i nuū mesa nuū ndácu Yaā Dios jniñu jíin nuū maá Yaā cúu Londe. Te siquí jeé cuehē ndasí i, te ni ñin ma cúu cahu nasaa i cúu. Te cáñuhun i sahma cuijín, te cándahá i ñuu.

¹⁰ Te ni cacana jee i:

Yaā Dios maá yó cúu jeé ní jnama yóhó, Yaā jeé néne nuū mesa jeé ndácu jniñu, jíin Yaā cúu Londe Yaā Dios. Achí i jíināhan i.

¹¹ Te ndihi ndajéhe ni cajicó ndúu yā cáhiin ya xiin mesa Yaā Dios, jíin xiin tēe jéhu cándiso jniñu, jíin xiin ndicúun jeé técu. Te ni cajecuiñi yití yá ní cachíñuhún yá Yaā Dios ichi nuū mesa yā.

¹² Te ni cacahān ya:

Amén. Cúsi ní yō cahán yō jeé yóhoyo vāha Yaā cúu Yaā Dios maá yó.

Te luu cújéhu ya te ndichí yá.

Te na nácuatáhú yó nuū yā, te na cóo yíñuhún yó nuū yā.

Chi jniñu ya poder, te ndiso ya cuehē fuerza jeé ní cáni cuiti. Amén.

Achí táca ndajéhe yā.

¹³ Yūcuán na te ni cahān ñin tēe jéhu un jíin rí:

¿Ndé ñayuu cúu yáha jéé cáñuhun sahma cuijín, te ndé chí véjicoo i?

¹⁴ Te ni cahān rí jíin de:

Maá ní cúu jeé jiní, Táta.

Te ni cahān de jíin rí:

Yáha cácuu ñayuu jeé ní cayāha i jeé ní cajito i jnūndóho xeñ. Te ni canacate i sahma i jíin ññi maá Londe, te ni nduyaa vāha, cúu jeé ní ndundoó ánuá i ni sáha ya.

¹⁵ Jeé yúcūn cúu jeé cáhiin i nuū mesa nuū ndácu Yaā Dios jniñu, te cájejniñu i ini templo yá nduu ñuu. Te Yaā jeé néne nuū mesa, coto ya i jeé quéndóo vāha i nuū yā.

¹⁶ Te ma cúu gā i sóco, te ma jíichí gā i ndute. Te ma cayú gā i nuū niāndii, ni ma ndóho ga i jeé jihni.

¹⁷ Chi maá Yaā cúu Londe jeé néne nuū mesa jeé ndácu jniñu, coto ya i nájnūhun jeé cúu i lanchi ya. Te condeca ya i quihūn yā jíin i nuū cáne ndute jeé cótecu i sáha. Te Yaā Dios nacuaa yá ndute núu i jíināhan i, te ma ndahyú gā i. Achí tēe jéhu ún.

Siquí sello uxā jíin cohō cúu oro

8

¹ Te Londe un ní jehnde yā sello uxā jeé ndihyú tutu ún, te nayúú-ni ni Iyo ini andívi nájnūhun sava hora.

² Te ni jito ri ndihúxá ndajéhe jeé cáhiin nuū Yaā Dios. Te ni cajéhe uxā trompeta nuū ndajéhe un.

³ Yūcuán na te ni quee inga ndajéhe, ndáhá yá ñin cohō cúu oro, te ni jecuiñi yá nuū altar. Te ni jéhe cuehē sūje cutú núu yā, návaha socó yá jíin jnūhun cájicān tahú ndihi ñayuu cácañdije Yaā Dios. Te ni socó yá nuū altar oro jeé índichi ichi núu mesa nuū ndácu Yaā Dios jniñu.

⁴ Te nuū cohō cúu jniñu ndajéhe un ní cane ñuhmá sūje cutú, ni caa nuū Yaā Dios nde jíin jnūhun cájicān tahú ñayuu cácañdije Yaā Dios.

⁵ Yūcuán na te ni quihūn ndajéhe un cohō cúu un. Te ni scutú yá tēcu ñuhūn jeé cayú nuū altar. Te ni jete yá nde ini ñayívi. Te ni sáha jeé ni cahān taja, te ni ññin, te ni ndindéé taja, te ni jnaā.

Jnūhun siquí trompeta

⁶ Yūcuán na te ndihúxá ndajéhe jeé cándahá ndihúxá trompeta, ni casatūhva ya jeé tiví yā.

7 Te ndajéhé ìn ni tiví yā trompeta. Te ni cuun ñíñí ìni ñayíví jín ñúhùn jeé ni sácā núu jín ñíñí. Te ni cayú ìn jeé uní parte ñayíví, jín ìn jeé uní parte yujnu, jín ìn jeé uní parte ite cuíí.

8 Te ndajéhé uū ni tiví yā trompeta. Te ìn nájñuhun ìn yucu cáhnu jeé cayú ñuhùn ni ñingava cuahān nuū mar. Te ìn jeé uní parte mar ni nduu ñíñí.

9 Te ni jihí ìn jeé uní parte quiti ñúhùn nuū mar. Te ni naa cuehē barco, chí ìn ìn jeé táca úní ni naa.

10 Te ndajéhé uní ni tiví yā trompeta. Te ni ñingava ìn quāmi cáhnu ichi ándiví, te cáyú nájñuhun cáyú ìn yiti cáhnu. Te ni ñingava siquí ìn ìn jeé táca úní yúte jín núu cáne ndute.

11 Te quāmi un nání quāmi uvuā. Te ìn jeé uní parte ndute ni cuu uvuā. Te ni cajihí cuehē ñayuu ni sáha jeé ní cuu uvuā ndute ún.

12 Te ndajéhé cuūn ni tiví yā trompeta. Te ìn jeé uní parte niāndii jín yōó jín quāmi ni tiví. Te ni ndunee ìn jeé uní parte i, te tuá ni cúndijin ìn jeé uní parte nduu jín ñuú.

13 Te ni ndacoto ri, te ni jini sōho ri jeé cána jee ìn ndajéhé yā jeé ndáva cuahān sava andiví:

Nacā xeēn gā ndoho ñayuu cáyūcú ìni ñayíví, chí je yajni cuecu uní gā trompeta jeé tiví uní gā ndajéhé, achí yá.

9

1 Te ndajéhé uhūn ni tiví yā trompeta. Te ni jito ri jeé ichi ándiví ní ñingava ìn quāmi nde ìni ñayíví. Te nuū quāmi un ní jēhe ndacáa jeé núne tūhñchi cúnú ndasí.

2 Yūcuán na te ni nune un tūhñchi, te ni cane ñuhmā ni caa nájñuhun ñuhmā ìn ijnū cáhnu. Te ñuhmā un ní sáha jeé ní cunee niāndii jín ñí núu tachí.

3 Te nuū ñuhmā un ní canecoo tíca ndicuehíyí, ni jitē núu ti ñí cáhnu ñayíví. Te ni jēhe ya jñuhun jeé sáha ti nájñuhun cásáha tisuhma xeēn jeé iyó ìni ñayíví.

4 Te ni ndacu ya jñuū nuū tí jeé ma sáha tí daño ite jín yúcu cuíí jín yujnu, chí máni ñayuu jeé tu ndéé sello Yaa Dios jneé i cúu jeé tuu tí.

5 Te tu ní jēhe ya jñuhun jeé cáhni tí ñayuu, chí máni jeé stóho tí i uhūn yoó. Te sáha tí jeé jetú i nájñuhun jeé jetú ñayuu jeé túu tisuhma i.

6 Te quiví ún nducú ndasí ñayuu modo cuu i, te ma nihín i modo. Te vésú cuní i cuu i, te tú na modo cuu i.

7 Te tíca ndicuehíyí un cáa tí nájñuhun caballo jeé cáhíyo tūhva quingoo nuū cuájñahan. Te xiní tí ñuhun nájñuhun corona oro. Te néé tí nuū téé.

8 Te iyó ixi tí jeé cáa nájñuhun ixi xiní ñahan. Te jñuhun tí cáa nájñuhun jñuhun ndicaha.

9 Te ñí tí ndihíyú nájñuhun sahma cáa. Te ñhín ndijēn tí nájñuhun ñhín jeé cuángoo cuehē caballo nuū guerra cáñuhun tí carreta.

10 Te suhmā tí ndiso iñu nájñuhun tisuhma. Te jín suhmā tí cuu stóho tí ñayuu uhūn yoó.

11 Te iyó ìn jeé cujēhnu nuū tí, te suu cúu ndajéhé jexeēn jeé ndito tūhñchi cúnú ndasí un. Te ndajéhé un yuhu hebreo naní Abadón, te yuhu griego naní Apolión, jeé cuní cahān maá jēé snāa.

12 Je ni yāha ìn jñúndóho, te iyó úu gā jñúndóho jeé quíji.

13 Te ndajéhé iñu ni tiví yā trompeta. Te ni jini sōho ri ìn jñuhun jeé ni cáhān nde mēhñú ndicúún yiquí altar oro jeé ìn nuū Yaa Dios.

14 Te ni cahān un jín ndajéhé iñu jeé ndahá trompeta:

Nandají ró ndicúún ndajéhé jeé nuhñí yuhu yúte cáhnu jeé naní Eufrates, achí.

15 Te ni nandají ndicúún ndajéhé un, návāha cahñi ìn jeé uní parte ñayuu ñayíví. Chí je cáhíyo tūhva ndajéhé un jeé siquí maá hora jín quiví jín yōó jín cuyā jeé cóo súcuun.

16 Te ni jini sōho ri jeé achí jēé iyó úu ciento millón soldado jeé cáyoso caballo.

17 Te ni steén gā yā nuū ri, te ni jito ndijin ri táca caballo. Te tēe cáyoso siquí tí cáñuhun de camisa cáa jeé cuehē, jeé ndeé, jín jēé cuaán. Te xiní caballo un cándāa nájñuhun xiní ndicaha. Te yuhu tí quēnda ñuhūn jín ñuhmā jín azufre.

18 Te jín úní jeé quēnda yuhu caballo un, te ni jihí ìn jeé uní parte ñayuu, suu jín ñuhūn jín ñuhmā jín azufre.

19 Chí yuhu tí jín suhmā tí iyó fuerza jeé cáhni tí ñayuu. Chí suhmā tí cándāa nájñuhun coó, te iyó xiní, te jín yúcuun stóho tí ñayuu.

20 Te sava ga ñayuu jeé tu ní jihí jín táca jñúndóho yāha, tu ní nácani ni i stóo i ídolo jeé ní casáha i. Te tu ní stóo i jeé cáchiñúhún i táca táchi jín ídolo jeé ní cuvāha jín oro jín plata jín cáa cuaán jín yúu jín yujnu. Te táca un chí tu cúu coto, ni tu cúu cuni sōho, ni tu cúu cacá.

21 Te ni tu ní cánacani ni i stóo i jeé jēhni i ndryi, jín jēé satásí i, jín jēé jíca jñení i, jín jēé sacuíhná i.

Ndajéhé jeé ndahá libro lulí

10

1 Te ni jito ri inga ndajéhé yā jeé ndiso poder, ni cuun ya ichi ándiví. Te ñúsúcún yá vicó, te xiní yā ñuhun ticó vēhndé. Te nuū yā ndíndēe nájñuhun niāndii, te síhín ya cáa nájñuhun uū síhín jeé cáa ná cáa ñuhūn.

2 Te ndáhá yá ìn libro lulí jēé núne. Te ni jeni ya jēhē váha ya nuū mar, te jēhē jecó yá nuū ñuhun ichi.

³ Te ni cana jee téyí yá, nájñuhun jeé ndahyú ndicaha. Te ná ni cana jee ya, te ni cacahān uxā taja.

⁴ Te ná ni cacahān uxā taja, te je iyó túhva ri jeé téé ri jñuhun un núú. Te ni jini sōho ri ññ jñuhun ichi ándiví jeé ni cáhān jín ri:

Chuvāha ró táca jñuhun jeé ní cacahān uxā taja ún, te ma steén rō, ni ma téé rō, áchí.

⁵ Yūcuán na te ndajéhé jeé ní jito ri jeé ññ nuū mar jín núú ññuhun, ni ndonehen ya ndaha váha ya ichi ándiví.

⁶ Te ni ndacunehen ya síhví máá Yaā jeé técu ní cáni, Yaā ni sáha andiví jín ññáiví jín mar jín táca ndihí jeé iyó ini. Te jín síhví yá un ní cahān teyí ndajéhé:

Ma cucuéé gá jeé jñu ññáiví.

⁷ Chi núu na quéjéé ndajéhé uxā tivi yá trompeta, yūcuán na te squícu-ni Yaā Dios jñuhun sáhi yá, nájñuhun ní castúhun yá nuú táca mozo yá, téé ni canacani jñuhun ya nde jenahán, áchí ndajéhé.

⁸ Yūcuán na te máá jéé ní jini sōho ri jeé ni cáhān ichi ándiví, ni cahān tucu jín ri:

Cuáhān te quihín ró libro lulí jéé núne jeé ndahá ndajéhé jeé ññ nuū mar jín núú ññuhun, áchí.

⁹ Te ni jehén rí nuú ndajéhé un, te ni jicān rí jeé na cuáha ya libro lulí un núú rí. Te ni cahān yá:

Quihín te caji rō. Chi vixí sáha ini yuhu ró nájñuhun ndúxi, te chíji ró chí cuhiyá sáha, áchí yá.

¹⁰ Yūcuán na te ni quihín ri libro lulí jeé ndahá ndajéhé yá, te ni yeji rí. Te vixí ni sáha ini yuhu rí nájñuhun ndúxi. Te ná ni cuu ni yeji rí, te ni jité iyá ni rí.

¹¹ Te ni cacahān jín ri:

Cánuú jéé nacani tucu ró jñuhun Yaā Dios, ndese coo siquí ññayu cuehé ññu jín cuehé nación jeé sñn sñn yuhu, jín síquí cuehé rey cándacu jññu, áchí jín ri.

Siquí uú testigo yá

11

¹ Yūcuán na te ni cajéhe ññ yujnu nuú rí, jeé cúu ññ cūhva jeé chícuāha. Te ni cacahān jín ri:

Ndocuññí te chicuāha ró templo cáhnu Yaā Dios jín altar, te cahu ró nasaa ññayu cúu jeé cáchiññuhún núú yá yūcuán.

² Te ma chícuāha ró patio yatā templo. Chi je ni jéhe ya nuú ññayu táca ññu jicā. Te coyúcu i ini ññu ññ yáhá, te uú xico uú yoó cueññ i síquí ññu.

³ Te taji rí uú testigo rí jeé nácani jñuhun ri mil uú ciento uní xico quiví. Te cuhun de sahna ndáyí jéé cácuññhá ni de síquí cuéchi ññayu, áchí yá.

⁴ Te ndindúú testigo un cúu nájñuhun ndindúú yujnu olivo jín ndindúú candelero jeé ññ nuú Yaā Dios, Yaā chíí ññáiví.

⁵ Te na-ni ññayu núu nducú sáha ndevāha jín ndindúú testigo un, te quenda ññuhun yuhu ndindúú de, te cayú ndihí ññayu cájito uhú i de. Te súcuan cuu táca ññayu jeé nducú sáha ndevāha jín de.

⁶ Te iyó poder ndindúú testigo un jéé cási de jeé ma cúun saú ní tiempo jeé nácani de jñuhun ya. Te suni iyó poder de sáha de jeé nduu ññí táca ndute. Te cuu stívi de ññáiví jín ndinuú jññódoho, núu nasaa jñu cácuni de.

⁷ Te ná ni jñu ni canacani de jñuhun ya, yūcuán na te quenda quiti xéén jeé néne túhncchi ún. Te cuajnáhan jín ndindúú de, te cundeyí jín de, te cahni de.

⁸ Te ndívi ún cava nuú yáhu ññu cáhnu nuú ní cajehni i máá Jítoho yō jicā cruz. Te ññu un cácahān yatá i jeé ññu Sodoma jín Egipto cúu, síquí jeé xeén cuéchi iyó ññu ún.

⁹ Te ññayu táca ññu, táca yúcuñ, táca yuhu, táca nación, chi coto i jeé cáva ndindúú ndívi un úní quiví yosáva, te ma cuáha i jñuhun jeé quíndúji.

¹⁰ Te ññayu ní cáhnu ññáiví cusñ ndasí ni i jeé ní cajihí de, te sáha i vico, te cuáha i regalo nuú jñáhan i. Chi ndindúú téé ni canacani jñuhun ya ún, ní casáha de jeé ní candoho ndasí ññayu ññáiví.

¹¹ Te jeé yáha uní quiví yosáva ún, te Yaā Dios sáha ya jeé nastáa tachí de, te ndonda-ni de. Te yúhú ndasí ññayu coto i jeé ní canatecu de.

¹² Yūcuán na te cuni sōho de jeé cána jee ichi ándiví:

Caa ró quijicoo ró ndé yáhá, áchí.

Te ndaa de mēhñu vícō quingoo de andiví, cuni ññayu cájito uhú i de.

¹³ Te máá hora un jñáa ndasí, te ndicó cáva naa ññ jeé uxí parte ññu ún. Te jín ññjñáa un cuu uxā mil ññayu. Te táca gá ññayu jeé ndóo, yúhú ndasí i, te cahān i jeé cujéhu Yaā Dios jeé ndeé andiví.

¹⁴ Súcuan yáha jññódoho uú, te yachí coo jññódoho uní.

Siquí trompeta uxā

¹⁵ Te ndajéhé uxā ní tivi yá trompeta. Te ni jini sōho ri ni cacahān jee ichi ándiví. Te súcuan ni cacahān:

Táca nación ññáiví je ni nuquihí ndaha máá Jítoho yō Yaā Dios jín Cristo jeé ní taji yá.

Te ndacu ya jññu ní cáni cuiti.

Achí.

¹⁶ Yūcuán na te ndihóco cuñ tēe jéhu cándiso jññu jeé cánene de mesa de ichi núú Yaā Dios, ni cajecuññí yití de, ni cachíññuhún de ya.

¹⁷ Te ni cacahān de:

Na cútahū na núú ní, Tátā Yaā Dios, chí máá ní jñá ndihí poder,

te cúu ní Yaa iyó vijna, te ní Iyo ní ní cáni, te coo ní ní cáni.

Te ní najnii ní ndiví jeé iyó, te jín poder ní ní quejéé ní ndácu ní jniñu nuú.

18 Ñayuu táca nación ní caquití ní i siquí ní. Te vijna chí ní quee quiví jeé cuáha ní castigo i,

jín jeé sándaá ní jniñu táca ndíyi. Te cuáha ní táhu nuú táca mozo ní jeé ní canacani jñuhun ní,

jín nuú táca ñayuu cájejniñu nuú ní, jín ñayuu cáchiñúhún nuú ní,

cúu ñayuu cácujeñnu jín jeé tuú. Te vijna te snáhnú ndetú ní ñayuu castiví ñayiví.

Achí de jijnáhan de.

19 Yūcuán na te ní nune templo Yaa Dios jeé iyó andiví. Te ní cajito ñayuu jeé yūcuan íne jejnú jeé ñúhun contrato yá. Te ní ndindéé taja, te níhin, te cáhan taja, te ní jnaa, te ní cuun xeén ñiñí.

Jñuhun ñahan jín cóo cáhnu

12

1 Yūcuán na te ini andiví ní cane ñn jeé nahán náa ní yó jito yó: ñn ñahan jeé ñúhun ña niándii nájnūhun sahna, te íin jehé ña siquí yoó, te ñúhun ñn corona xiní ña jeé ndeé uxí uú quími.

2 Te ñúhun sēhe ña. Te ní ndahyū cohó ña jeé ndóho ña jéhné chíji ña jeé scácu ña i.

3 Yūcuán na te ini andiví ní cane tucu inga jeé náa ní yó jito yó: ñn cóo cuehé cáhnu ndasí. Te iyó úxá xiní tí jín úxí ndiquí tí. Te ndihúxá xiní tí ñúhun corona.

4 Te jín súhmā tí ní stáa tí ñn jeé uní parte quími jeé iyó andiví, te ní síngoo tí ini ñayiví. Te ní ine tí nuú ñahan jeé scácu sēhe ún, ndétu tí cócō tí sēhe ña jeé jé yajni cacu i.

5 Te ní scácu ña ñn sēhe yí, te sūchi un ní jeconaa jeé ndácu níhin i jniñu nuú ndívii nación. Yūcuán na te ní ndoñúhún sēhe yí ña ún, ní ndaa i cuahān i nde nuú íin mesa Yaa Dios nuú ndácu ya jniñu.

6 Te ñahan un ní jinu ña cuahān ña nde nuú ñúhun téhé nuú iyó ñn lugar jeé ní sātúhva Yaa Dios. Te yūcuán condee ña níhin ña jeé cáji ña mil uú ciento uní xico quiví.

7 Yūcuán na te ní cajejnáhan ini andiví. Chí ndajéhé jéhnú ga jeé naní Miguel jín táca ndajéhé jeé cácu mozo nuú yá, ní cajejnáhan jín cóo cáhnu. Te cóo un jín táca ndajéhé máa, ní cajejnáhan jín yá.

8 Te tu ní cácuandeyí tí, te tuá ní cúu coyūcu tí andiví.

9 Súcuán ní cuu jeé ní quenehen ya cóo cáhnu un jeé iyó ndé jenahán ndasí. Te nání tí jexeén jín Satanás, te máa tí cúu jeé stahú ndíhi ñayuu ñayiví. Te ní scáne ya tí nde ini ñayiví jín táca ndajéhé tí.

10 Yūcuán na te ní jini sōho rí ñn jñuhun jeé cahán jee ichi ándiví:

Je ní quee quiví jeé jinu jnama ya yohó, jín jeé steén ndijin yá jeé jniñí ya poder, jín jeé ndácu ya jniñu, jín jeé ndiso jniñu máa Cristo jeé ní tají yá. Chí je ní quenehen ya máa jeé cahán cuéchi siquí táca hermano yó. Chí nduú ñuú ní cahán cuéchi siquí i nuú Yaa Dios máa yó.

11 Te ní cacundeyí i siquí Satanás un, ní sáha jñuhun jeé ní jñí Yaa cuu Londe, jín jeé ní cacahān ndaā i jñuhun Yaa Dios, jín jeé tu ní cundáhú ní i máa i, chí ní jehé i jñuhun candíje i vésú nuu cuu i jeé siquí yá.

12 Núu súcuán te na cúsíñ ndasí ní táca róhó jeé cáyucú andiví. Te nacā xeén ndoho táca róhó jeé cáyucú ini ñayiví jín nuú mar. Chí ní cuun jexeén ní jinu nuú ró jijnáhan ró. Te quítí xeén ní, chí jíní jeé tuá cóo cuehé gá tiempo jeé stahú ñayuu. Achí.

13 Te ní jini cóo cáhnu ún jeé ní scáne ya máa cuahān ini ñayiví, te ní jinu tí jín ñahan ní scácu sēhe yí, jeé xeén sáha tí jín ña nuú.

14 Te ní cajēhe uú ndijēn yaha chócó cáhnu nuú ñahan ún, návāha ndava ña quihñ ña lugar ña nuú ñúhun téhé, te cácu ña nuú cóo ún. Te yūcuán condee ña uní cuiyā yosáva, te níhin ña jeé cáji ña.

15 Te yuhu cóo un ní cane ndute nájnūhun ñn yūte cáhnu, cuahān yatā ña návāha jneni ña.

16 Te máa ñuhun chí ní chindéé ñahán ñahan ún, chí ní nune-ni, te ní nungoo yūte jeé ní cane yuhu cóo ún.

17 Yūcuán na te xeén ní quití ní cóo cáhnu ní jito tí ña. Te cuahān tí cuajnáhan tí jín táca gá sēhe ña, suu ñayuu casquicu jniñu ndácu Yaa Dios te cácuandéje váha i jñuhun Jesucristo.

Jñuhun siquí uú quítí xéén

13

1 Te ní indichi rí yumár. Te ní jito rí jeé ní cane ñn quití xéén ini mar. Te iyó úxá xiní tí jín úxí ndiquí tí. Te ndihúxí ndiquí tí ñúhun corona. Te ndihúxá xiní tí ndeé ñn síhví néé jeé quítí ní Yaa Dios sáha.

2 Te quítí xéén jeé ní jito rí ún, cáa tí nájnūhun cuiñí, te ndaha tí cáa nájnūhun ndaha oso, te yuhu tí cáa nájnūhun yuhu ndicaha. Te nuú quítí un ní jehé cóo cáhnu poder máa jín mesa nuú ndácu máa jniñu. Te ní sáha jeé cujéhnú ndasí quítí ún.

3 Te ní jito rí jeé ní tújī ñn xiní tí, jeé jé yajni cuu tí nuú. Te ní nduváha tí jeé ní tújī tí. Te nahán ní naa ní ñayuu ñí cáhnu ñayiví ní jito i, te ní cajetáhú i nuú tí.

4 Te ní cachiñúhún i cóo cáhnu siquí jeé ní sáha tí jeé cujéhnú ndasí quítí xéén un, te suni ní cachiñúhún i quítí xéén un. Te ní cacahān i:

Tú ni ñin jeē cujéhnun nájñūhun quiti yáha, te tú ni ñin cundeyí cuajnáhan jíin tí, áchí i jíjñáhan i.

⁵ Te tu ní jési ya jeē cahān tí jeē quiti téyá cúu tí, jíin jeē cahān ndevāha tí siquī yā. Te ni nihīn jñiñu tí jeē ndácu tí jñiñu uū xico uū yoō.

⁶ Te ni quejéé tí ni cahān ndevāha tí siquī Yāā Dios, jíin siquī sihví yá, jíin siquī nuū ndeé yá, jíin siquī táca jeē iyó andiví.

⁷ Te tu ní jési ya jeē cuajnáhan tí jíin ñáyuu maá Yāā Dios, te cundeyí tí jíin i. Te suni ni nihīn jñiñu tí jeē ndácu tí jñiñu nuū ñáyuu táca yúccū, táca ñuu, táca yuhu, táca nación.

⁸ Te ñayuu ñí cáhnū ñayiví jeé tu yósó sihví i nuū tútu, ni cachiñúhún i quiti xéén un. Te Yāā cúu Londe jeé ní cajehni i, máá yá névāha tutu un jeé yósó sihví ñáyuu cotecu ñí cáni, te je yósó sihví i nde quiví ni jécōo ñayiví.

⁹ Ñayuu iyó sóho na chúsóhó váha i jñūhun cahān rí yāhá.

¹⁰ Táca ñáyuu jeé sáha jeé quiví jñáhan vecāa, suni vecāa cone máá i. Te táca ñáyuu jeé jéhní jñáhan jíin espada, suni jíin espada cuu máá i. Núu súcuān te ñayuu maá Yāā Dios chí jíni ñúhún cuandeyí ni i jíin jñúndóho te ma jécuiñi i candje i jñūhun cundáhú ni yā i.

¹¹ Yūcuān na te ni jito rí inga quiti xéén jeé ní cane chíji ñuhun. Te iyó uū ndiqui tí jeé cáa nájñūhun ndiqui lánchi. Te nájñūhun tachí coō cáhnū, súcuān tachí cahán tí.

¹² Te nájñūhun ndácu quiti xéén xīhna ñúhún jñiñu, suni súcuān ndácu quiti uū ún jñiñu, íin tí nuū quiti xīhna ñúhún. Te quiti uū sáha tí jeé chíñúhún táca ñáyuu ñí cáhnū ñayiví nuū quiti xīhna ñúhún, quiti ní túji jeé jé yajni cuu tí te ni nduvāha tí.

¹³ Te quiti uū suni sáha táca jñiñu jéhnū jeé nahán náā ni yō jíto yó. Chí ni scūun tí ñuhún ichi ándiví ní quiji iní ñayiví, ní cajito ñayuu.

¹⁴ Te ni stahú tí ñayuu ñayiví jíin táca jñiñu jéhnū jeé ni nihīn tí poder jeé sáha tí, jíto jíinúū quiti xīhna ñúhún. Te ni ndacu tí jñiñu jeé na sáha ñayuu imagen quiti xīhna ñúhún, quiti ní túji jíin espada, jeé jé yajni cuu tí te ni nduvāha tí.

¹⁵ Te quiti uū ni nihīn tí poder jeé chutáchí tí xijñi imagen quiti xīhna ñúhún, návāha cuu cahān, te cahni táca ñáyuu jeé tu cájetáhú i chíñúhún i máá.

¹⁶ Te táca ñáyuu cujéhnū jíin ñáyuu tu cújéhnū, táca ñáyuu cucá jíin ñáyuu ndahú, táca ñáyuu sájñiñu cuenta maá jíin mozo jeé ní cajeen ñayuu, ni sáha tí jeé ní jécōondee ñin jñuní ndavāha i chí jñéé i.

¹⁷ Te ni ñin ñayuu ma cúu cuān i xicó i te núu tu ndiso i jñuní jeé cúu sihví tí chí jñuní número jeé cúu sihví tí.

¹⁸ Jñūhun ndíchí cúu jeé cahán rí yāhá: Táca ñáyuu jécūhūn váha ni cuu tava i cuenta número quití xéén un, chí número un cúu

sihví ñin tēe. Te número un cúu iñū ciento uní xico iñū.

Yaa jeē cájita 144,000 ñayuu

14

¹ Yūcuān na te ni ndacoto ri, te ni jito ri jeé íin máá Yāā cúu Londe xiní yucu Sión. Te cáhīin ciento uū xico cuūn mil ñayuu jíin yá. Te jñeé i ndeé sihví máá yá jíin sihví Tátá yā Yāā Dios.

² Te ni jini sóho ri jeé ñhīn ndasí ichi ándiví, nájñūhun jeé jíca cuehē yūte chí jeé cahān ñhīn taja. Te jeé ñhīn un sáha nájñūhun jeé cátee cuehē ñayuu yaa jeé naní arpa.

³ Te cáhīin i ichi núu mesa nuū ndácu Yāā Dios jñiñu, jíin núu ndicúūn jeé técu, jíin núu ndihóco cuūn tēe jéhnū cándiso jñiñu. Te ni cajita i ñin yaa jeé. Te ni ñin ñayuu tu cúu cutūhva i yaa ún, chí máni máá ciento uū xico cuūn mil ñayuu jeé ní jnama ya i iní ñayiví.

⁴ Te táca tēe yáha cácuu jeé tu ní casáha cuēchi jíin ñahan casáha néé, chí tēe ndoo ánuá cácuu de. Te cándiquín de Londe ndé-ni cúu-ni nuū cuahán yā. Chí ni jnama ya de iní ñayiví, te máá de cácuu tēe jeé xīhna gā ni cacandje nuū Yāā Dios jíin núu Yāā cúu Londe.

⁵ Te tú cuiti na jñūhun stáhú cácahān de, chí tēe ndoo ánuá cácuu de, cáhīin de nuū mesa Yāā Dios.

Jñūhun jeé ní cacahān ndinúni ndajéhé yā

⁶ Yūcuān na te ni jito rí inga ndajéhé yā jeé ndáva cuahān sava andiví. Te ndiso ya jñūhun jeé jnáma Yāā Dios ñayuu cotecu i ñí cáni. Te ni nacani ya jñūhun un núu táca ñáyuu ñí cáhnū ñayiví, nuū ñáyuu táca nación, táca yúccū, táca yuhu, táca ñuu.

⁷ Te ni cahān jee ya:

Conso Iyo ró núu Yāā Dios, te na cahán rō jeé yóhoyo cújéhnū ya, chí je ni quee quiví jeé sándaā yā siquī rō ndese ni casáha ró. Te na chíñúhún ró yā, chí máá yá ni sáha andiví jíin ñayiví jíin mar jíin táca núu cáne ndute, áchí ndajéhé yā.

⁸ Yūcuān na te ndíquin inga ndajéhé yā vēji, te ni cahān ya:

Je ni naa í ñuu teyí Babilonia. Chí ni sáha jeé ñayuu táca nación casiquí ndeé i Yāā Dios jeé ní castóo i ya te cándiquín i idolo jíin táca jñiñu néé, áchí ndajéhé uū.

⁹ Yūcuān na te ndíquin inga ndajéhé uní vēji, te ni cahān jee ya:

Xeēn coo siquī ñayuu cáchiñúhún quití xéén jíin imagen tí, te jéhe i jñūhun condee jñuní tí jñeé i chí ndaha i.

¹⁰ Chí nihīn i castigo xeēn siquī cuēchi ni casáha i, chí quití ni Yāā Dios nuū i, te tuá cone cáhnū ni yā. Te ndoho i nuū cayú ñuhún

jiin azufre, coto tãcã ndajéhé Yaã Dios jiin Yaã cùu Londe.

¹¹ Te ñuhmã nuũ cándoho i cánda níf cáni cuiti. Te nduu ñuu tu ndetãtũ ñayuu cándoho ún jeë ní cachiñúhún quiti xéén jiin imagen tí, jiin jeë ní jécondee jnuní sihví tí.

¹² Jeë yúcuan ñáyuu maã Yaã Dios jeë casquicu i jniñu ndácu ya te cácanðje vãha i Jesús, cánuu jéë cuãndeyí ní i. Achí ndajéhé uní.

¹³ Yücuán na te ni jini sôho ri ñin jñuhun ichi ándiví jéë ní cáhãn jiin ri:

Teë ró jñuhun jeë cáhãn rí jiin ró yãhá: Nacã jeë ndetũ táca ñáyuu cácanðje Jitoho yõ jeë cájihí vjna jiin ndé níf cuãhãn yõ. Jendaã chí ndetãtũ i jeë ní casãha i jniñu váha, te jniñu i un má nãã chí sãha jeë quendõ vãha i níf cáni, áhí Espíritu.

Jeë ní nastútú yã ñayuu ñayiví

¹⁴ Yücuán na te ni ndacoto rí, te ni jito ri ñin vicõ cuijín. Te nuũ vicõ un néne Yaã ní nduu tée. Te xiní yã ñuhun corona oro, te ndáhã yã ñin hoz xeën.

¹⁵ Te ni quenda inga ndajéhé yã ini templo, te ni cana jee, te cáhãn jiin Yaã néne nuũ vicõ un:

Cahnde ni jiin hoz ní, te nastútú ní ñayuu ñayiví. Chí je ni quee quiví jeë nastútú ní i nãjnũhun táhndé trigo jeë jé níf cuaan, áhí.

¹⁶ Yücuán na te Yaã néne nuũ vicõ ní nastútú yã ñayuu váha ini ñayiví, nãjnũhun táhndé trigo jiin hoz.

¹⁷ Yücuán na te ni quenda inga ndajéhé yã ini templo jeë iyó ándiví, te suní ndáhã yã ñin hoz xeën.

¹⁸ Te nde nuũ altar ni quenda tucu inga ndajéhé, te ndíso jniñu ya siquí ñuhun altar. Te ni cana jee ya, te cáhãn yã jiin ndajéhé jeë ndáhã hoz xeën:

Cahnde ró jiin hoz xeën ró, te nastútú ró ñayuu casãha néé ini ñayiví, nãjnũhun jeë cájehnde i chutũ ndehẽ uva jeë jé ní jichi, áhí.

¹⁹ Te ndajéhé un ní jehnde yã jiin hoz yã, te ni nastútú yã ñayuu casãha néé ini ñayiví, nãjnũhun ndútútú ndéhẽ uva. Te ni jnaa ya i nuũ nihín i castigo xeën Yaã Dios, nãjnũhun jnãã i ndehẽ uva nuũ taxín.

²⁰ Te ni jehẽ ya castigo i yatã ñuũ, te ni jica niñí i nãjnũhun ndúxi uva. Te ni ndaa ni jinũ cũhva jeë sucún yuhu caballo, te ni jica cuahãn nde uní ciento kilómetro.

Ndihúxã ndajéhé jiin ndihúxã jñũndõho jeë sãndihí

15

¹ Te ni jito ri inga jniñu jéhu ichi ándiví jéë nãã níf jito yõ. Chí cáhãn uxã ndajéhé yã jeë cuãha ndihúxã jñũndõho sandihí na. Te jeë jinu ndihúxã jñũndõho yãha, te jinu jeë cuãha Yaã Dios castigo xeën siquí cuéchi.

² Te suní ní jito ri ñin jeë cáã nãjnũhun mar, te cáã nãjnũhun vidrio jeë ndíndé nãjnũhun ñuhun. Te yumar un cáhãn ñayuu ní cacundeyí siquí quiti xéén jiin imagen tí, jiin jéë tu ní cáquihin i jnuní número jeë cùu sihví tí. Te cándahã i yaa jeë naní arpa jeë ní jéhe Yaã Dios nuũ i.

³ Te cájita i yaa jeë ní tava Moisés, tée cùu mozo Yaã Dios, jiin yaa maã Yaã cùu Londe. Te súcuan cáhãn yaa ún:

Yõhoyo nãã ní na cájito ná ndihi jniñu jéhu teyí jéë sãha ní,

Tátã Yaã Dios, chí jnãã ní ndihí poder.

Te máni jniñu ndaa jniñu váha sãha ní,

jeë cùu ní Rey nuũ táca naciõn.

⁴ Tú ní ñin i iyó jéë ma cõnso iyo i nuũ ní, Tátã Yaã Dios.

Te ndihí i cáhãn nahín i jeë yõhoyo cújéhu ní. Chí máñuhún ní máã ní cùu Yaã ndoo Yaã ñi.

Te quijicoo ñayuu táca naciõn, chíñuhún i nihín,

chí je ní cajini i jeë ndaa vãha sãha ní táca jniñu.

Achí i cájita i.

⁵ Yücuán na te ni ndacoto ri, te ni jito ri jeë ini ándiví núne cuarto ñi ini templo nuũ íne tabla yuũ jeë yosó ley yã.

⁶ Te ini templo un ní quendacoo ndihúxã ndajéhé jeë cándiso jniñu siquí ndihúxã jñũndõho. Te cáñuhun ya sahã fino iyó ndoo te xiñú. Te núhni cinturón oro jicã yã.

⁷ Te ñin jnãhãn ndicúun jeë técu ní jéhe ñin ñin cohõ oro nuũ ndihúxã ndajéhé un. Te ini cohõ un ñuhun chitú castigo xeën jeë ní jéhe Yaã Dios, Yaã técu níf cáni.

⁸ Te ni chitú ndã ñuhmã ini templo, te suu ní steén jeë yõhoyo cújéhu Yaã Dios jiin poder jnãã ya. Te ni ñin tu ní cùu quiví ini templo, chí nde na ndãhi ndihúxã jñũndõho jeë cuãha ndihúxã ndajéhé yã.

Siquí ndihúxã cohõ jeë ñuhun castigo

16

¹ Yücuán na te ini templo ní jini sôho ri ñin jñuhun cáhãn jee jiin ndihúxã ndajéhé yã:

Cuangoo te cati ró siquí ñayiví ndihúxã cohõ jeë ñuhun castigo xeën jeë ní jéhe Yaã Dios, achí.

² Te cuahãn ndajéhé ñin, te ni jeta ya cohõ yã siquí ñayiví. Te táca ñáyuu jeë ndeé jnuní quiti xéén un jiin jéë cáchiñúhún imagen tí, ní canecoo ndihyí xeën jeë jetú ndasí.

³ Te ndajéhé un ní jeta ya cohõ yã nuũ mar, te ndute mar ní nduu nãjnũhun niñí ndíyí. Te ní cájihí táca quiti jeë ñuhun ini mar.

⁴ Te ndajéhé uní ní jeta ya cohõ yã ini táca yúte jín táca nuũ cáne ndute, te ni nduu niñí.

⁵ Te ní jini ri jee cáhãn ndajéhé jeë ndíso jniñu siquí ndúte:

Tátã Yaã Dios, maã ní cùu Yaã ndoo Yaã ñi, Yaã iyó vjna, te ní iyo ní níf cáni. Te ndaa

sáha ní jeé súcuan ni ndonda ní síquī cuéchi i.

⁶ Chi ni casáha i jeé ní jeti níñī ñayuu ndoo ní jín ñayuu ní canacani jñuhun ní. Te vijna chi ní sáha ní jéé cájhi i níñī, chí ñayuu casáha jñiñu néé cácuu i, jeé cácuu ndoho i súcuan.

⁷ Te ni jini sóho ri jeé cahán inga nde nuū altar:

Tátá Yaa Dios, máá ní cúu jeé jñí ndihí poder. Te jniñu váha jniñu ndaa ní sáha ní jéé ní ndonda ní síquī cuéchi i. Achí.

⁸ Te ndajéhe cuñ ni jeti ya cohō yá síquī níandii, te ní jéhe Yaa Dios jñuhun jeé ndujihní ndasí níandii náváha cayū ñayuu.

⁹ Te xeén ndasí ní cayū táca ñayuu. Te vésú súcuan te tu ní cánacani ni i stóo i cuéchi i, ni tu ní cacáhān i jeé cujéhu Yaa Dios. Chí sa suhva ní cacáhān ndeváha i síquī yá jeé ní jéhe ya táca castigo yáha nuū i.

¹⁰ Te ndajéhe uhūn ni jeti ya cohō yá nuū mesa nuū ndácu quiti xeén jniñu. Te ni cuneé ní cáhnu nuū ndácu ti jniñu. Te cánacayihí ñayuu yuhu i jeé cájetū ndasí i.

¹¹ Te vésú súcuan te tu ní cánacani ni i stóo i jniñu néé casáha i. Chí sa ní cacáhān ndeváha i síquī Yaa Dios andiví síquī jeé cájetū ndasí i jín ndíhyi xeén cándoho i.

¹² Te ndajéhe iñu ni jeti ya cohō yá síquī yúte cáhnu jeé naní Eufrates. Te ni ichi ndihí ndute yúte ún, náváha nune in ichi jeé quíjico táca rey ichi núu cáne níandii.

¹³ Te ni jito ri jeé ini yuhu coō cáhnu jín ini yuhu quiti xeén jín ini yuhu máá téé nácani jñuhun stáhú ní canecoo uní tachí jeé cáa nájñuhun sáhvá.

¹⁴ Te tachí ún chi ndajéhe jexeén cácuu, te casáha jniñu jéhu jeé náā ni ñayuu cájito i. Te ni quendacoo tachí un jéé nastútú táca rey ní cáhnu ñayiví, jéé cuajnáhan de síquī Yaa Dios quiví jeé ndíji ya. Te máá yá cúu jeé jñí ndihí poder.

¹⁵ Cuni sóho jijnáhan ró, chí sanaa ni ró te ndiji ri, nájñuhun jeé in sanaa-ni te quíji ñacuñhá. Te nacá jeé ndetū ñayuu jeé ndito ni i, te ndito yúcn i sahma i, náváha ma cáca vichí lí i, cúu jeé tú na cuéchi coo síquī i jeé cucanu i nuū táca ñayuu, achí yá.

¹⁶ Te ni canastútú táchí un táca rey, ni candutútú in lugar jeé yuhu hebreo naní Armagedón.

¹⁷ Te ndajéhe uxā ni jeti ya cohō yá nuū tachí. Te ini templo andiví jín nuū mesa nuū ndácu ya jniñu, ni cane in jñuhun jeé ní cáhān jee:

Je ní jinu, áchí.

¹⁸ Yūcuán na te ni ndindéé taja, te nhin, te cáhān taja, te ni jnáa ndasí. Chí nde ní cáni jeé iyó ñayuu ñayiví, tu ní jnáa nihin ndasí nájñuhun jeé ní jnáa ni jito ri.

¹⁹ Te máá ñuu cujéhu Jerusalén, ni cusán ni nduu uní parte, te ní cáhnu ñayiví ní naa táca ñuu. Te ñuu teyí Babilonia, chí ní sáha

nahín yá jeé ní ndutahū i castigo xeén, chí ni quiti ndasí ní yá síquī cuéchi i.

²⁰ Te ni naa táca isla, te suni yucu tuá gā.

²¹ Te ichi ándiví ní cuun ñíñí náhnu síquī ñayuu, jeé véyi nde uū xico kilo. Te ni cacáhān ndeváha ñayuu síquī Yaa Dios jeé ní cuun ndasí níñí, chí in jñundóho xeén ni cuu.

Jeé ndonda ya síquī ñuu neé Babilonia

17

¹ Yūcuán na te ni quíji in jnáhan ndihúxá ndajéhe jeé ní candáhá ndihúxá cohō ún, te ní cahān yá jín ri:

Nehen, te na stéén rí nuū rō ndese coo castigo síquī máá ñahan jnéni jeé cúu ñuu cujéhu ine nuū iyó cuéhe ndute.

² Chí táca rey ñayiví nájñuhun ní casíquī ndéé de jín ñahan ún, cúu jeé ní castóo de Yaa Dios te cándiquen de jñuhun néé ní stóo de ña. Te ní sáha ña jeé ñayuu ní cáhnu ñayiví, nájñuhun nájini i te casíquī ndéé i Yaa Dios cúu jeé ní castóo i ya te casáha ndasí i cuéchi. Achí ndajéhe yá.

³ Te ní sáha ga Espíritu Santo jeé ní jito ndijin rí, te ndajéhe yá un cuáhān yá jín rí nde nuū ñuhun téhé. Te ni jito rí in ñahan, yósó ña in quiti xeén cuuéhe. Te ní cáhnu tí ndéé jñuhun néé jéé quiti ní Yaa Dios sáha. Te iyó uxā xiní tí jín uxí ndiqui tí.

⁴ Te ñahan un ñuhun ña sahma ndihí jín sahma cuehé, te suni ñuhun ña síquī oro jín yúu luu jín perla jeé ndeé yahu. Te ndáhá ña in cohō oro jeé ñuhun chítú jín jniñu néé ndasí jín jniñu jnehén jéé jica jnéni ña.

⁵ Te jneé ña ndéé in síhví jéé cúu in jñuhun sáhi, te suhva cáhān: Yáha cúu ñuu teyí Babilonia, jeé cúu nájñuhun náná táca jéé cájica jnéni jín jéé casáha néé ndasí ini ñayiví, áchí.

⁶ Yūcuán na te ni jini rí jeé ñahan un nájini ña jeé nájñuhun ní jhi ña níñí ñayuu máá Yaa Dios jín níñí ñayuu ní cajihí síquī jeé ní canacani ndaa i jñuhun Jesús. Te nahān ní naa ni rí ni jito rí ña.

⁷ Yūcuán na te ni cahān ndajéhe un jín ri:

¿Naun náa ni ró jito ró? Na cástuhun rí nuū rō ndese cúni cahān jñuhun sáhi síquī ñahan un jín quiti xeén yósó ña, jeé iyó uxā xiní tí jín uxí ndiqui tí.

⁸ Quiti xeén jeé ní jito ró, chí ni cotecu tí, te vijna chí tuá tí. Te ndenda tucu tí ini túnhchi cúnú, te yūcuán na te quihñ tí nuū jñahnú ndetū tí. Te ñayuu cáyūcu ní cáhnu ñayiví, naa ni i coto i nuū quiti un jéé ní cotecu tí te ní jhi tí, te natecu tucu tí. Te cácuu i ñayuu jeé tu yósó síhví i nuū tútu jeé yósó síhví ñayuu cotecu ní cáni jeé ní jécósó síhví i nde quiví ní jécóo ñayiví.

⁹ Táca ñayuu jécuhun váha ní, cuu tava i cuenta ndese cúu: Ndhúxá xiní tí cácuu nájñuhun uxā yucu nuū néne ñahan ún.

¹⁰ Te ndihúxá xinī tī suni cácuu nájñūhun uxá rey. Te uhūn rey un je ni naa jeē ndácu de jniñu, te ñn de ndácu jniñu vijna, te inga de chí ná tu quiji de. Te núu na quiji de te jecu-ni tiempo coo de.

¹¹ Te quiti xéén jeé ní cotecu te tuá iyó tí vijna, máá tí cuu rey unā. Te ñn jnāhan ndihúxá rey un cúu tí. Te suni quihīn tī nuū jnahnú ndetū tí.

¹² Te ndihúxí ndiqui jeé ní jito ró cúu nájñūhun uxí rey, te ná tu ndacu de jniñu jijnāhan de. Te máá de jín quiti xéén un, chí nihīn jniñu de cuu de rey jecu-ni tiempo.

¹³ Te ndihúxí rey un chí squijnāhan de jñūhun, te nacuaña de poder de jín jniñu ndíso de nuū quiti xéén un návāha ndacu tí jniñu.

¹⁴ Te cuajnáhan de jín Yaā cúu Londe. Te Yaā cúu Londe quende yā poder de jijnāhan de. Chí máá yá cúu Jitoho nuū tāca jítoho, te máá yá cúu Rey nuū tāca rey. Te ñayuu cáhiin jín yá, chí ní nacāji Yaā Dios i te ní cana ya i, te cásquicu vāha i. Achí ndajéhé un.

¹⁵ Te ní cahān gā yā:

Cuehē ndute jeé ní jito ró núu néne ñahan jīca jñení, suu cúu ñayuu cuehē tācá ñuu, tācá yuhu, tācá nación.

¹⁶ Te ndihúxí ndiqui jeé ní jito ró jéé névāha quiti xéén un, suu cácuu rey jeé coto uhú de ñahan jīca jñení un. Te sāha de jee quendōo ndáhú ña te quendōo vichí lí ña. Te caji de cúu ña te cahmu de ña nuū ñuhún.

¹⁷ Chí Yaā Dios scānda ya ini de jeé na sāha de jniñu cúní yā. Te squijnāhan de jñūhun jeé nacuaña de jniñu ndíso de nuū quiti xéén un, ndacu tí jniñu nde na squicu tāca jñūhun ní cahān Yaā Dios.

¹⁸ Te ñahan jeé ní jito ró cúu máá ñuu teyí jéé cujéhnu nuū tāca rey ñayiví. Achí ndajéhé un.

Siqui jeé naa ñuu Babilonia

18

¹ Yūcuán na te ní jito rí jeé ní cuun inga ndajéhé yā ní quiji ichi ándiví. Te cújéhnu ndasí yá. Te jeé ndíndēe yá te ní ndíndēe núu ñayiví.

² Te ní cana jee ya:

Je ní naa ñi ñuu teyí Babilonia. Te ní nduu vehe tāca táchi, nuū ñūhun ndinuū tachi neé, jín tāca téji, quiti quini jeé tu újnahan ní yō.

³ Chí ñuu un cúu nájñūhun ñn ñahan ndevāha, te ní sāha ña jeé ñayuu tācá nación, nájñūhun nájini i te cásquí ndéē i Yaā Dios, cúu jeé ní castóo i ya te cásaña ndasí i cuéchi. Te tāca rey ñayiví, nájñūhun ní casíquí ndéē de jín ñahan ún jeé ní cajetáhú de jñūhun neé ní steén ña. Te ñayuu ní ñayiví jéé cájeen cáxicó, ní cacucúca i jín cuéhē jeneé jeé ní nevāha ña.

⁴ Yūcuán na te ní jini sóho rí inga jñūhun jeé ní cahān ichi ándiví:

Máá ró jeé cácuu ró ñayuu máá rí, quendacoo ró ini ñuu jínā, návāha ma quiví nduu ró jín tāca cuéchi jeé sāha ña, te návāha ma ndóho ró jnúndóho xeēn jeé ndoho ña.

⁵ Chí ní cadoá cuehē ndasí cuéchi ña, nájñūhun ñn montón cáhnu ndasí jéé ní cusúcún ndé andiví. Te vijna te nduxeēn Yaā Dios siquí cuéchi ña.

⁶ Stóho ró ña nájñūhun ní sāha ña jeé ní ndoho sava ga ñayuu. Te nachunaa ró nuū ña doble jnúndóho jeé ní jéhe ña nuū inga ñayuu. Te sāha ró jeé nandicó cóo doble siquí ña vésú jeé ní sāha ña siquí inga ñayuu.

⁷ Te yóhoyo ní satéyí ña máá ña, te cúcá ndasí ní cotecu ña. Te suni jín cúhva yúcuu nacuaña ró jéé ndóho xeēn ndasí ña. Chí jéni ní ña: Yāha néne rí ndácu rí jniñu, te tu cúu rí ñahan viuda, te ma quiji cuiti jnúndóho ndoho rí, achí ña.

⁸ Jeé yúcuu cúu jeé ñn quiví-ni te quiji cuehē jnúndóho siquí ña. Chí cuu ndrye, te cucuíhyá ndasí ní ña, te coo jnamā, te cayú ña nuū ñuhún. Chí yóhoyo iyó poder máá jítoho yō Yaā Dios, Yaā ní ndonda siquí cuéchi ña, áchi.

⁹ Te tāca rey ñayiví jéé ní casíquí ndéē de jín ña te ní cotecu cucá ndasí de jín ña, ndahyū de te ndahyū cohó de coto de jeé cánda ñuhmā cayú ña.

¹⁰ Te cuiñi jícá de chí yūhú de coto de jeé súcuu ndoho ña castigo. Te cahān de jijnāhan de:

Nacá jéé xeēn ndóho ró, ñuu cujéhnu Babilonia, chí yá-ni ñuu teyí ní cuu ró núu. Te vijna chí ñn núnúu-ni te ní quee castigo jeé nāá ró, achí de jijnāhan de.

¹¹ Te tāca téé ñayiví jéé cájeen cáxicó ñuu ún, ndahyū de te ndahyū cohó de jehē. Chí tuá ndé ñn cuaan ndajniñu cáxicó de.

¹² Te ndajniñu cáxicó de un cúu oro, plata, yuū luu jín perla jeé ndéē yahu, jín sahma fino jín sahma seda jeé ndihí jín jéé cuehé. Te suni tācá yujnu jeé asín jéén xicō, jín tāca ndajniñu luu jeé ní sāha jín marfil jín yujnu lúu jeé ndéē yahu jín cáa cuaan jín cáa hierro jín yuū cuijín luu.

¹³ Te suni cáxicó de canela jín tāca jíhoyo asín jín súje cutú jín súje uvuá jín tāca perfume jín vino jín aceite jín harina fina jín trigo. Te suni cáxicó de quiti ndíso jín lanchi jín caballo jín carreta, te nde ñayuu cáxicó de jeé sájniñu sáá-ni i.

¹⁴ Te cahān de jín ñuu ún:

Ní cuijyo ndihí ndajniñu cúcá jeé ní nujnahan ndasí ní ró. Te tāca jéé lúu jee vāha jeé ní cotecu cucá ró, chí ní naa ndihí, te ma nānihīn cuiti gā ró, achí de jijnāhan de.

¹⁵ Te tāca téé ní cájeen ní cáxicó ní cacucúca jéé siquí ndajniñu ñuu ún, chí cuiñi

jícá de jeē yūhú de coto de castigo coo ñuu ún. Te ndahyū de te ndahyū cohó de.

¹⁶ Te cahān de jǐjnāhan de:

Nacá jeē xeēn ndóho ñuu teyí yáha. Chi ni cuu nájñuhun in ñahan jeē ní ñuhun sahma fino, sahma ndihí jín jée cuehē. Te ni ñuhun ña siquī oro jín yúu luu jín perla jeē ndeé yahu.

¹⁷ Te vijna te in núnúu-ni te ni naa ndihí táca ndajñíu váha ún, achi de jǐjnāhan de.

Te cuiñi jícá táca tée cáscáca barco, jín ñayuu cuángoo nuū barco, jín tée cásajñíu ini barco, jín táca gá tée cásajñíu nuū mar.

¹⁸ Chi coto de ñuhmā jeē cayú ñuu ún, te cana jee de jǐjnāhan de:

¿Ndeé ine ga ñuu teyí jée cujéhnú nájñuhun ni iyo ñuu yáha? achi de.

¹⁹ Te cosó de ticachā ñuhun xinī de jeē cácuuihyá ni de. Te ndahyū de te ndahyū cohó de. Te cana jee de jǐjnāhan de:

Nacá jeē xeēn ndóho ñuu teyí yáha. Chi jín ndajñíu cúa jeē ní iyo ñuu un ní cacucúca táca ñayuu cánevāha barco cájica nuū mar. Te vijna te in núnúu-ni te ni naa ndihí-ni, achi de.

²⁰ Te na cúsī ni táca róhó jée cáyúcu andiví, siquī jeē ní naa ñuu ún. Te na cúsī ni rohó, táca tée apóstol, jín tée cánacani jñuhun Yaā Dios, jín ñayuu maá Yaā Dios. Chi ni sáha neé ñuu un siquī rō jijnāhan ró, te jeē yúcuan ní ndonda Yaā Dios siquī, achi de.

²¹ Yūcuán na te in ndajéhé ndiso poder, ni quihin ya in yuū cáhnu nájñuhun in yōso cáhnu, te ni scáne ya ini mar. Te ni cahān yā:

Nájñuhun ni naa yōso yáha, suni súcuan naa Babilonia, ñuu cujéhnú téyí. Te ma núcoo cuiñi gā jeē coto yó nuū.

²² Te ni cahān yā jín ñuu ún: Ini calle rō ma cúni sōho cuiñi gā ñayuu jeē scáta i yaa arpa jín flauta jín trompeta. Te suni ma coto cuiñi gā ñayuu casáha táca ndajñíu. Te suni ma cúni sōho ga i jeē ñihin táca molino rō.

²³ Te ni in lámpara ma sáha ga jeē cúndjin nuū rō. Te ni ma cúni sōho ga i vico jeē cácusī ni ñahan tée nándāha mēñhu rō. Te ñayuu ní cajeen ni caxlícó nuū rō, ni cacujéhnú ndasí i ini ñayiví. Te ni stahú ró ñayuu táca nación jín jniñu tasí jín jniñu mágica. Achí ndajéhé un.

²⁴ Te ñuu un ní ñihin castigo xeēn, chi siquī ñuu un ndeé cuéchi jeē ní jeti ñihí táca tée ní canacani jñuhun Yaā Dios, jín táca ñayuu maá yá, jín táca gá ñayuu ní cajehni i ní cáhnu ñayiví.

19

¹ Te ná ni cuu táca jée yáha, te ni jini sōho ri jeē cahān jee cuehē ndasí ñayuu ini andiví: Yōhoyo cujéhnú Yaā Dios. Chi Yaā Dios maá yó cúu jeē ní jnama yóhó.

Te maá yá cujéhnú ndasí, te maá yá jñi ndihí poder.

² Te ndaā te vāha sándaā yā táca jniñu, chi ni ndonda ya siquī cuéchi ñuu neé cujéhnú ún.

Chi ni stíví un ñayuu ní cáhnu ñayiví jín jñuhun cásiquí ndeé Yaā Dios.

Te ni sáha ya jeē ní ndutahū ñuu un siquī jeē ní jehni táca mozo yá.

Achí i jijnāhan i.

³ Te ni cacahān tucu i:

Yōhoyo cujéhnú ya. Chi ní cáni canda ñuhmā ñuu un jée cayú, achi.

⁴ Te ndihóco cuñ tée jéhnú cándiso jniñu, jín ndicúñ jeē técu, ni cájecuiñí yití de, te ni cachíñuhún de Yaā Dios, Yaā néne nuū mesa ndácu jniñu. Te ni cacahān:

Amén. Súcuan na cōo. Yōhoyo cujéhnú ya.

⁵ Te nde nuū mesa nuū ndácu ya jniñu ni cahān in jñuhun:

Róhó jée cájeñíu nuū Yaā Dios, jín róhó jée cándiso iyo nuū yá, jeē cácujeñú jín jée tu cácujeñú, na cáhán rō jeē yóhoyo vāha Yaā cúu ya.

Achí.

Vico jeē nándāha Yaā cúu Londe

⁶ Te ni jini sōho ri jeē cacahān ñayuu cuehē ndasí, te ñihin nájñuhun ñihin cuehē yūte, te nájñuhun jeē cahān ñihin taja. Te ni cacahān: Yōhoyo cujéhnú ya. Chi Jitoho yō Yaā Dios, Yaā jñi ndihí poder;

vijna te ndácu ñihin ya jniñu.

⁷ Te na cúsī ni yō, te sī ndasí na cōo ni yō,

te na cáhán yō jeē yóhoyo cujéhnú ya.

Chi ni queue quiví jeē nándāha maá Yaā cúu Londe.

Te je iyó túhva ñahan nandāha jín yá, te suu cúu ñayuu maá Yaā Dios.

⁸ Te ni ñihin ña jñuhun cuhun ña sahma fino jeē ndóo ndasí te xíñu.

Achí i jijnāhan i. Te sahma fino un cúu táca jniñu ndaā jeē casáha ñayuu maá Yaā Dios.

⁹ Te ni cahān ndajéhé yā jín rí:

Te rō jñuhun yáha: Nacá jeē ndetū táca ñayuu jeē ní cana ya quingoo vico nándāha Yaā cúu Londe.

Te ni cahān gā ndajéhé un jín rí:

Táca jñuhun yáha cúu jñuhun ndaā ni cahān Yaā Dios, achi yá.

¹⁰ Te ni jecuiñí yití rí nuū jehé ndajéhé un jée chíñuhún rí yá nuú. Te ni cahān yā jín rí: Ma sáha ró súcuan. Chi ruhū suni mozo Yaā Dios cúu rí, nájñuhun maá ró jín táca hermano rō jeē cácanijé vāha jñuhun Jesús. Sa suhva nuū maá Yaā Dios chíñuhún ró. Achí yá.

Chi jñuhun siquī Jesús cúu jeē cacahān ndaā ñayuu cánacani jñuhun Yaā Dios.

Yaā yosó siquī caballo cuijín

¹¹ Yūcuán na te ni jito ri jeē núne andiví. Te ni cane in caballo cuijín, te Yaā yosó siquī tī naní yá Yaā ndaā, Yaā squícu, chí squícu ya

jeē ni jéjnūhun ya. Te ndaā sándaā yā jniñu te ndaā ndóna ya siquī tāca jéneé.

¹² Te tinūu yā ndíndēe nájñūhun yáñuhūn. Te xinī yā ñūhun cuehē corona. Te yósó ñn síhvī yā jeē maá-ni ya cúu jeē jinī.

¹³ Te ñūhun ya ñn sahma jeē ni ñúndaji nuū niñí, te nání yā Jñūhun Yaā Dios.

¹⁴ Te tāca ndajéhé yā jeē iyó andiví, cáyosó caballo cuijín, cándiquín yatā yā. Te cáñuhun sahma fino cuijín iyó ndoo.

¹⁵ Te ini yuhu maá Yaa jeē yosó siquī caballo, quénda jeē cáa nájñūhun ñn espada xeén. Te espada un cúu jñūhun ya jeē stóho ya ñayuu tāca nación. Te ñihñ ndacu ya jniñu nuū i. Te sándaā yā siquī cuéchi i nájñūhun jeē jeñū siquī ndehē uva cájexín. Te cuāha ya castigo xeén ndoho i jeē quití ni yā siquī cuéchi i. Chi maá yā jñú ndihí poder.

¹⁶ Te sahma ya jín síhñ ya yosó jñūhun yáha: Rey nuū tāca rey jín Jítoho nuū tāca jítoho, áchi.

¹⁷ Yūcuán na te ni jito ri ñn ndajéhé yā jeē ñn nuū niándii. Te ni cana jee ya xinī tāca quití ndáva nuū tachí:

Ndutútú ró quijicoo ró cuxíni ró ñn víco cáhnu sáha Yaā Dios.

¹⁸ Te caji rō cūñu tāca rey jín capitán jín téé téyí, jín cúñu tāca caballo jín téé ni cayosó siquī tí. Te suni caji rō cūñu tāca gá ñayuu, cúu ñayuu casáññu cuenta maá jín mozo jeē ní cajean ñayuu, cúu ñayuu cácujuhnu jín ñayuu tu cácujuhnu. Achí ndajéhé yā.

¹⁹ Yūcuán na te ni jito ri maá quití xeén jín tāca rey ñayví jín cuéhé soldado de. Te ni candutútú de jeē cuajnáhan de jín maá Yaa yosó caballo jín tāca ndajéhé yā.

²⁰ Te ni jñú ya quití xeén cuahán tí preso jín téé ni nacani jñūhun stáhú jeē ní sáha tāca jniñu jéñu jeē ní jito jínúú quití xeén. Chi jín jniñu jéñu un cúu jeē ní stáhú de tāca ñayuu jeē ní cajéhe jñūhun condiso jñuní quití xeén, jín jéé ní cachiñúhñn imagen tí. Te quití xeén un jín téé ni nacani jñūhun stáhú un, cátecu ndindúú te ni scáne ya nuū laguna ñuhñn jeē cayú jín azufre.

²¹ Te jín espada jeē cáne yuhu Yaa yosó caballo ni cajihí tāca soldado quití xeén un. Te tāca quití ndáva nuū tachí ni candutú chíji tí ni cayejí tí cūñu de jíjnáhan de.

Siquī mil cuiyā

20

¹ Te ni jito ri jeē ní cuun ñn ndajéhé yā ichi ándiví. Te ndáhá yā ndacáa jeē nune tñhñchi cúnú ndasí. Te suni ndáhá yā ñn cadena cáhnu.

² Te ni jñú ya maá cóó cáhnu jeē iyó ndé jenahán ndasí, te nání tí jexeén jín Satanás. Te ni jihñi yā jeē conuhñi mil cuiyā.

³ Te ni scáne ya ini tñhñchi cúnú ndasí. Te ni jesi váha ya, te ni sácutu yá yuyáú, návaha ma stahú gá un ñayuu tāca nación, chí nde na jínu mil cuiyā. Te jeē yáha mil cuiyā ún, yūcuán na te cánúú jéé ndají caca cuu jecu na tiempo.

⁴ Te ni jito ri tāca mesa nuū ndácu jniñu, te yūcuán cáyūcu tāca ñayuu jeē ní canihñ jniñu i sándaā i jniñu. Te suni ni jito ri anuá tāca ñayuu jeē ní cajehnde xiní i siquí jeē ní canacani i jñūhun Jesús jín jñūhun Yaā Dios. Te tu ní cachiñúhñn i quití xeén jín imagen tí, ni tu ní cájéhe i jñūhun jeē cóndee jñuní tí jñeé i chí ndaha i. Te ni jito ri jeē ní natecu i te ni candacu i jniñu jín Cristo mil cuiyā.

⁵ Yáha cúu ndíyí jeē nátecu xíhna gá. Te tāca gá ndíyí, tu ní cánatecu i, chí nde jeē jínu mil cuiyā.

⁶ Te nacá jeē ndetú tāca ñayuu ndoo ánuá jeē nátecu xíhna gá. Chí ma cúu cuítí i vuelta uú. Te cuu i sutú nuū Yaa Dios jín nuú Cristo, te ndacu i jniñu jín yá mil cuiyā.

⁷ Te jeē jínu mil cuiyā ún, te ndají Satanás te quenda nuū yíndihyú.

⁸ Te stáhú tucu ñayuu tāca nación ní cáhnu ñayví. Te stáhú ñayuu ñuu Gog jín Magog. Te sáha jeē ndutútú tāca soldado ñuu un jéé cuajnáhan de. Te coo cuehē ndasí de nájñūhun ññí yumar.

⁹ Te cuíté núu de quingoo de ní cáhnu ñayví. Te cuicó ndúú de ñuu nuū cáyūcu ñayuu maá Yaa Dios, ñuu jeē maní yá jín. Te Yaa Dios chí scúun ya ñuhñn ichi ándiví, te cayú ndihí de.

¹⁰ Te jexeén jeē ní stáhú tāca ñayuu ún, chí scáne ya quihñ nuū laguna ñuhñn jeē cayú jín azufre. Te yūcuán chí xíhna gá ní scáne ya quití xeén jín téé ni nacani jñūhun stáhú. Te yūcuán ndoho nduú ñuu ní cáni cuítí.

Jeē sándaā yā jniñu nuū mesa cuijín

¹¹ Yūcuán na te ni jito ri ñn mesa cuijín cáhnu, te néne maá Yaa ndácu jniñu. Te ñayví jín ándiví ní ndoñúhñn cuahán jeé ní jito ya nuú, chí tuá ní cúu quendoo nuú yā.

¹² Te ni jito ri tāca ndíyí, jeé ní cujéñu jín jéé tu ní cujéñu, cáhñn nuū Yaa Dios. Te ni sáha ya jeé nune tāca libro, te suni ni nune inga libro jeé yosó síhví ñayuu cotecu ní cáni. Te ní sándaā yā siquí tāca ndíyí ún, núu ndese jniñu ni casáha i jín ndese yósó núu tāca libro un.

¹³ Te tāca ndíyí jeē ní cajihí nuū mar, ni nanecoo. Te suni ni nanecoo tāca ndíyí jeé ní cajihí i, jeé íne i maá lugar nuū cáyūcu ánuá ndíyí. Te ní sándaā yā siquí, núu ndese ní casáha ñn ñn i.

¹⁴ Yūcuán na te cuehyí jéñni ñayuu jín lugar nuū cáyūcu ánuá ndíyí, ní snáá yā ní scáne ya cuangoo nuū laguna ñuhñn. Te jeé ndóho ñayuu nuū laguna ñuhñn, yūcuán cúu jeé cúu i vuelta uú.

15 Te yūcuan ni scāne ya tāca ñāyuu ni casáha jniñu néé jée tu yósó síhví i nuū libro jeē yosó síhví ñāyuu cotecu ní cáni.

Andiví jée jíin ñáyivi jée

21

1 Yūcuán na te ni jito ri andiví jée jíin ñáyivi jée. Chi andiví jíin ñáyivi xihna ñúhún ni naa. Te suni tuá mar.

2 Te ruhū Juan, ni jito ri ñuu i jeē cúu Jerusalén jeé. Te ñuu un ní cuun vēji ichi andiví núu néne Yaā Dios. Te ñuu un luu cáa nájñuhun in ñahan jeé ni sátúhva ña ni cucutú ña jeé nándáha ña jíin yá ña.

3 Te ni jíni sōho ri in jñuhun jeé ni cáhān jee ichi andiví:

Condéhé, chi vijna te ndeé Yaā Dios mēhñu ñāyuu. Te condee yā jíin i jíinánhan i, te cuu i ñayuu maá yá. Te maá yá condee yā jíin i jeé cúu ya Yaā Dios i.

4 Te nacuaa yā ndute tñúu i jíinánhan i. Te ma cúu gā ñayuu, ni ma ndahyú gā i, ni ma cucuíhyá gā ni i, ni ma jetú gā i. Chi je ni yaha tāca jñúndóho jeé ni íyo, áchí.

5 Yūcuán na te ni cahān maá Yaā néne nuū mesa:

Condéhé, chi nasáha jeé rí tāca jée íyo, áchí yá.

Te suni ni cahān yá:
Te ró jñuhun yáha. Chi tāca jñuhun yáha cúu jñuhun jeé jíni ndije ró jée ndaā cúu.

6 Te ni cahān gā yá:
Je ni jíni. Máa rí cúu nájñuhun letra A xihna ñúhún jíin letra Z jeé sándíhí na, chi máa rí ni squejéé ndihí te máa rí sínu. Te tāca ñāyuu cájichí, súcuan-ni cuāha rí coho i ndute cáne jeé cōtecu i ní cáni.

7 Tāca ñāyuu jeé cūndeyí síquí jéneé, nihīn i ndihí jeé yáha cuu tahú i. Te cuu ri Yaā Dios i, te cuu i sēhe ri.

8 Te tāca ñāyuu jeé cáyūhú ndoho síquí jñuhun rí, jíin ñāyuu tu cácandíje, jíin ñāyuu casáha jniñu néé, jíin ñāyuu cájehni ndíyí, jíin ñāyuu cájica jnéní, jíin ñāyuu casáha tási, jíin ñāyuu cáchiñúhún ídolo, jíin tāca ñāyuu castáhú, ñayuu ún chi quívicoo i laguna ñuhūn jeé cayú jíin azufre. Te yūcuan cúu jeé cúu i vuelta uu.

Jerusalén jeé

9 Yūcuán na te ni quiji in jñahan ndihúxá ndajéhe jeé ní candáhá ndihúxá cohō jeé ni ñuhun chitú ndihúxá jñúndóho sandihí. Te ni cahān yā jíin rí:

Nehen, te na stéén rí nuū rō ñahan jeé nándáha ña cuu ña ñasihi Yaā cúu Londe, áchí yá.

10 Te ni sáha ga Espíritu Santo jeé ní jito ndijin rí, te ndajéhe un ní jeca ya ruhū cuahān yā jíin rí xiní in yucu cáhnu súcún. Te ni steén yá nuū rí maá ñuu ií cujéhnu jeé

cúu Jerusalén, te ni cuun vēji nde andiví núu néne Yaā Dios.

11 Te ndíndēé ndasí ñuu un nájñuhun ndíndēé Yaā Dios. Te xíñú nájñuhun xíñú in yuū luu jeé ndeé yahu ndasí, nájñuhun yuū cuijín jeé quiyí nájñuhun vidrio.

12 Te yuhu ñúu un ní jicó ndúu in jeé cáhnu súcún ndihyú ñuu ún. Te íyo úxí uū yehyí. Te tāca yéhyí un íin in ndajéhe yá. Te tāca yéhyí un yósó síhví ndihúxí uū yucūn Israel.

13 Te lado nuū cáne niāndii iyó úní yehyí. Te lado norte suni íyo úní yehyí. Te lado sur suni íyo úní yehyí. Te lado nuū quée niāndii suni íyo úní yehyí.

14 Te íyo úxí uū yuū náhnu jeé cúu cimientu maá jée ndihyú ñuu ún. Te tāca yúu un yósó síhví ndihúxí uū apóstol maá Yaā cúu Londe.

15 Te ndajéhe jeé ní cáhān jíin rí, ndáhá yá in yujnu oro jeé chícuaāha yá ñuu un jíin tāca yéhyí jíin máa jée ndihyú ñuu ún.

16 Te ñuu ún chí in cūhva-ni cúu ndicúuún lado. Chi jeé cáni jíin jée jité, inuú-ni cúu. Te ndajéhe un ní chícuaāha yá ñuu un jíin yujnu ún. Te néé uū mil uū ciento kilómetro jeé in in lado. Te inuú-ni cūhva jeé cáni, jeé súcún, jíin jée jité.

17 Te suni ni chícuaāha yá maá jée ndihyú ñuu ún, te néé uní xico cuūn metro jeé súcún. Te yūcuan cúu cūhva jejníñu ñayuu, jeé suni jéjníñu ndajéhe un.

18 Te máa jée ndihyú ñuu un ní cuvāha jíin yúu cuijín quiyi. Te ñuu ún chí máa nene oro cúu, te cáa nájñuhun vidrio quiyi.

19 Te tāca yúu jeé cúu cimientu maá jée ndihyú ñuu ún, ní cucutú jíin ndinuū yuū luu jeé ndeé yahu. Yuū in cúu yuū cuijín quiyi. Te jeé uú cúu yuū ndeé ndíi. Te jeé uní cúu yuū pinto. Te jeé cuún cúu yuū cuíi ndíi.

20 Te jeé uhún cúu yuū pinto jeé ñuhun raya. Te jeé íñú cúu yuū cuehé pinto. Te jeé uxá cúu yuū cuaán quiyi. Te jeé uná cúu yuū cuíi ndeé. Te jeé in cúu yuū cuaán ndíi. Te jeé uxí cúu yuū cuíi cuijín. Te jeé uxí in cúu yuū cuehé cuaán. Te jeé uxí uū cúu yuū ndihí ndíi.

21 Te ndihúxí uū yehyí un cácuu uxí uū perla jeé ndeé yahu. Te in in yéhyí cúu in in perla. Te máa nene oro cúu calle cáhnu ñuu ún, te quiyi nájñuhun vidrio.

22 Te tú na templo ni jito ri ini ñuu ún, chí ní cáhnu ñuu un ndeé máa Jitoho yō, Yaā jni ndihí poder, jíin Yaā cúu Londe.

23 Te ñuu ún tu jíni ñúhún cundijin jíin luz niāndii jíin yóó. Chi jeé ndíndēe máa Yaā Dios cúu jeé cundijin ñuu ún. Te luz ñuu un cúu máa Yaā cúu Londe.

24 Te ñayuu táca nación ñayivi jée ní jnama ya, caca i jeé cundijin luz ñuu un núu i. Te tāca rey ñayivi quijicoo de ñuu ún, quindeca de táca ndajniñu jeé ndeé yahu jíin jée cujéhnu de sáha.

²⁵ Te tāca yéhyí ñuu ún ma cóndihyū cuiti nduú, chí tú na jecuáa coo.

²⁶ Te ini ñuu ún quijicoo ñayuu tācá nación, quindecá i tācá ndajniñu jeē ndeé yahu jíin jeē cujéñnu i sáha.

²⁷ Te ma quívicoo cuiti ni ñin jeē jnehén. Ni ma quívicoo ñayuu casáha jniñu néé jíin jeé castáhú. Chí quívicoo máni máá ñayuu jeé yosó síhví i nuú libro jeé yosó síhví ñayuu cotecu níí cáni, jeé névaha Yaā cúu Londe.

22

¹ Yūcuán na te ndajéhé yā ni steén yā nuú rí ñin yūte íyo ndoo. Te ndute un sáha jeé cótecu yō níí cáni. Te xíñú nájñuhun vidrio, te cáne nuú mesa nuú ndácu Yaā Dios jniñu jíin Yaā cúu Londe.

² Te jíca yūte ún sava mēññu calle cáhnu ñuu ún. Te ndindúú lado yuyúte un yíhi yujnu jeé cótecu yō níí cáni sáha. Te yujnu un jéhe ndehē uxí uú jínu jeé ñin cuiyā, chí tāca yóó cúun ndehē. Te ndaha yúci i cúu tajná jeé ndúvaha ñayuu tācá nación.

³ Te tācá-ni jeé ni cáhān yā jeé násūu jéé vāha cúu, ma cóo ini ñuu ún. Te ini ñuu ún cuiñi máá mesa nuú ndácu Yaā Dios jniñu jíin Yaā cúu Londe. Te ñayuu cácanđije jeé cácuu i mozo yā, chíñúhún i ya.

⁴ Te coto i nuú yā, te condee síhví yá jneé i.

⁵ Te ma cóo ga jecuáa ñuu ún. Te ñayuu cáyūcu yúcuan tuá jíni ñúhún i jeé cúndijin lámpara nuú i, ni jeé cúndijin niāndii. Chí jeé ndíndēe máá Jítoho yō Yaā Dios cúu jeé cúndijin nuú i. Te ndacu i jniñu níí cáni cuiti.

Jeé cuácuyajni ndiji Cristo

⁶ Yūcuán na te ni cáhān ndajéhé un jíin rí:

Tāca jñuhun yáha cúu jñuhun jeé jíni ndije ró jéé ndaá cúu. Te Jítoho yō Yaā Dios, máá yá sáha jíin téé cánacani jñuhun ya jeé jíin Espíritu yā cánacani de. Te suu máá yā ni tají yā ndajéhé yā návaha steén nuú ñayuu cácuu mozo yā tācá jniñu jeé yachí coo.

⁷ Ndiji yachí rí, achí yá.

Te nacā jeé ndetū ñayuu chusóhó jñuhun Yaā Dios jeé yosó nuú tútu yáha.

⁸ Te ruhū Juan, ni jíni sōho rí tāca jñuhun yáha, te ni jito rí tācá jniñu yáha. Te ná ni jíni sōho rí ni jito rí, yūcuán na te ni jecuiñi yití rí nuú jehé máá ndajéhé jeé ni steén tācá jniñu yáha nuú rí, jeé chíñúhún rí yá nuú.

⁹ Te ni cáhān ndajéhé un jíin rí:

Ma sáha ró súcuan. Chí ruhū suni mozo Yaā Dios cúu rí, nájñuhun máá ró jíin táca hermano ró jeé cánacani jñuhun ya, jíin ndíhi ñayuu cájetáhú jñuhun yósó nuú tútu yáha. Sa

suhva nuú máá Yaā Dios chíñúhún ró. Achí yá.

¹⁰ Te ni cáhān gā ndajéhé un jíin rí:

Ma chísihi ró tāca jñuhun Yaā Dios jeé yosó nuú tútu yáha, chí je cuacuyajni tiempo jeé cúndaá ndíhi.

¹¹ Te ñayuu casáha jniñu néé, na sáha ga máá i jniñu néé. Te ñayuu jnehén ánuá, na quéndōo máá i súcuan. Te sa ñayuu casáha jniñu ndaá, na sáha ga i jniñu ndaá. Te ñayuu cáhīyo ndoo ánuá, na cáca ndoo ga i súcuan. Achí ndajéhé un.

¹² Jendaá jeé ndiji yachí rí, achí Jesús. Te quiji rí jíin táhū cuāha rí nuú ñin ñayuu, núu ndese jniñu ni casáha i.

¹³ Máá rí cúu nájñuhun letra A xíhna ñúhún jíin letra Z jeé sándíhi na, chí íyo rí nde xíhna ñúhún te coo rí níí cáni.

¹⁴ Nacā jeé ndetū ñayuu jeé jéhe i jñuhun ndundoo ánuá i nájñuhun ndúndoo sahna. Chí cuu caji i ndehē yujnu jeé sáha jeé cótecu i níí cáni, te cuu quívicoo i yéhyí ñuu ñi ún.

¹⁵ Te ichi fuera ñuu ún cuiñi ñayuu tu cácanđije, jíin ñayuu casáha tási, jíin ñayuu cájica jnéni, jíin ñayuu cájehni ndíyi, jíin ñayuu cáchiñúhún ídolo, jíin ñayuu cácusíi ni stahú jñáhan.

¹⁶ Máá ruhū Jesús, ni tají rí ndajéhé rí návaha castúhun yá tāca jñuhun yáha nuú tāca grupo ñayuu cácanđije. Te máá rí ni sáha jeé ni íyo rey David, te ni quiji rí nuú yucún David. Te cúu rí nájñuhun lucero ndíndēe cáne cúndijin. Achí yá.

¹⁷ Te máá Espíritu Santo jíin máá ñahan jeé nándāha jíin Yaā cúu Londe, cácanān:

Nehen, quívicoo ró ndaha ya, achí.

Te tāca ñayuu jeé jíni sōho, suni na cáhān i: Nehen, quívicoo ró ndaha ya.

Te tāca ñayuu cájichí jeé cácuu i coho i, na quívicoo i ndaha ya, te súcuan-ni na cóho i ndute jeé cótecu i níí cáni sáha.

¹⁸ Te tāca ñayuu jíni sōho jñuhun Yaā Dios jeé yosó nuú tútu yáha, cáhān ñihin rí jíin i: Núu ndé ñayuu chísoó i nuú jñuhun cáhān tutu yáha, te Yaā Dios chísoó yá jñúndōho cáhān tutu yáha, ndoho i.

¹⁹ Te núu ndé ñayuu quende i jecu jñuhun cáhān tutu yáha, te Yaā Dios quende yā tahū i jeé yosó nuú libro jeé yosó síhví ñayuu cotecu níí cáni, te ma ñihin i tahū i ini ñuu ñi ún. Te tutu yáha cúu jeé cáhān síquí tācá un.

²⁰ Te Yaā jeé ni cáhān tāca jñuhun yáha, suhva cáhān yā:

Jendaá jeé ndiji yachí rí, achí yá.

Amén. Súcuan na cóo. Jítoho ná Jesús, jícan tahú na jéé ndiji yachí rí.

²¹ Te ñúhun rí jeé Jítoho yō Jesucristo na sáha ga yá jeé vāha róhó jíjñáhan ró. Amén.